



# Nuevo Testamento en mixteco

Atatláhuca Mixtec

---

## Contents

JNUHUN VAHA NI TEE SAN MATEO	1
JNUHUN VAHA NI TEE SAN MARCOS	56
JNUHUN VAHA NI TEE SAN LUCAS	90
JNUHUN VAHA NI TEE SAN JUAN	147
JNIÑU JEHNU JEE NI CASAHA TEE APOSTOL	189
CARTA JEE NI TEE SAN PABLO APOSTOL NUU ÑAYUU ÑUU ROMA	243
CARTA HN JEE NI TEE SAN PABLO APOSTOL NUU ÑAYUU ÑUU CORINTO	265
CARTA UU JEE NI TEE SAN PABLO APOSTOL NUU ÑAYUU ÑUU CORINTO	286
CARTA JEE NI TEE SAN PABLO APOSTOL NUU ÑAYUU GALACIA	300
CARTA JEE NI TEE APOSTOL SAN PABLO NUU ÑAYUU ÑUU EFESO	308
CARTA JEE NI TEE APOSTOL SAN PABLO NUU ÑAYUU ÑUU FILIPOS	316
CARTA JEE NI TEE APOSTOL SAN PABLO NUU ÑAYUU ÑUU COLOSAS	321
CARTA HN JEE NI TEE APOSTOL SAN PABLO NUU ÑAYUU ÑUU TESALONICA	326
CARTA UU JEE NI TEE APOSTOL SAN PABLO NUU ÑAYUU ÑUU TESALONICA	331
CARTA HN JEE NI TEE SAN PABLO APOSTOL NUU TIMOTEO	334
CARTA UU JEE NI TEE SAN PABLO APOSTOL NUU TIMOTEO	340
CARTA JEE NI TEE SAN PABLO APOSTOL NUU TITO	344
CARTA JEE NI TEE SAN PABLO APOSTOL NUU FILEMON	347
CARTA JEE CUAHAN NUU ÑAYUU HEBREO	349
CARTA JEE NI TEE SANTIAGO NUU ÑAYUU CACANDIJE	365
CARTA HN JEE NI TEE SAN PEDRO APOSTOL NUU ÑAYUU CACANDIJE	371
CARTA UU JEE NI TEE SAN PEDRO APOSTOL NUU ÑAYUU CACANDIJE	378
CARTA HN JEE NI TEE SAN JUAN APOSTOL NUU ÑAYUU CACANDIJE	382
CARTA UU JEE NI TEE SAN JUAN APOSTOL	388
CARTA UNI JEE NI TEE SAN JUAN APOSTOL	389
CARTA JEE NI TEE SAN JUDAS APOSTOL NUU ÑAYUU CACANDIJE	390
JNIÑU QUIJI JEE NI JITO NDIJIN SAN JUAN	392



## **Nuevo Testamento en mixteco**

**New Testament in Mixtec, Atláhuca (MX:mib:Mixtec, Atláhuca)**

Language: Mixtec, Atláhuca

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

### **Copyright and Permission to Copy**

Copyright © 1973 Wycliffe Bible Translators, Inc.

Copyright © 1973 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

c502e6f5-df29-53ef-9850-b40a5512ad0e

ISBN: 978-1-5313-0414-0

## JNUHUN VAHA NI TEE SAN MATEO

### Lista ñayuu yucūn jeē ní quiiji Jesucristo

(Lc. 3.23-38)

**1** Yāha cúu lista ñayuu yucūn jeē ní quiiji Jesucristo. Te máá yá ni quiiji nuū yucūn rey David, te David ni quiiji nuū yucūn Abraham.

<sup>2</sup> Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jíin táca ñani i. <sup>3</sup>Te Judá ni cuu de tátá Fares jíin Zara, te náná ndindúú i ni cuu Tamar. Te Fares ni cuu de tátá Esrom, te Esrom ni cuu de tátá Aram. <sup>4</sup>Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón. <sup>5</sup>Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí. <sup>6</sup>Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xihna gā ni cuu ña ñasihí Urías.

<sup>7</sup>Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa. <sup>8</sup>Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías. <sup>9</sup>Te Uzías ni cuu de tátá Jotam, te Jotam ni cuu de tátá Acáz, te Acáz ni cuu de tátá Ezequías. <sup>10</sup>Te Ezequías ni cuu de tátá Manasés, te Manasés ni cuu de tátá Amón, te Amón ni cuu de tátá Josías. <sup>11</sup>Te Josías ni cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

<sup>12</sup>Te náa cáyucú i yūcuán, te Jeconías ni cuu de tátá Salatiel. Te Salatiel ni cuu de tátá Zorobabel. <sup>13</sup>Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor. <sup>14</sup>Te Azor ni cuu de tátá Sadoc, te Sadoc

ni cuu de tátá Aquim, te Aquim ni cuu de tátá Eliud. <sup>15</sup>Te Eliud ni cuu de tátá Eleazar, te Eleazar ni cuu de tátá Matán, te Matán ni cuu de tátá Jacob. <sup>16</sup>Te Jacob ni cuu de tátá José, tēe ni cuu yíi María. Te María ni cuu ña náná Jesús, Yāā naní Cristo.

<sup>17</sup>Te nde Abraham te nde David ni iyo uxí cuūn yucūn. Te nde David te nde náa cuángoo ñayuu Israel preso ñuu Babilonia ni iyo inga uxí cuūn yucūn. Te nde ná ni jengoo i preso te nde ni cacu Cristo, suni ni iyo inga uxí cuūn yucūn.

### Jeē ní cacu Jesucristo

(Lc. 2.1-7)

<sup>18</sup>Te jeē ní cacu Jesucristo, súcuan ni cuu: Náná yā María, je ni cundaā jeē qui-jnáhan ña jíin José. Te nde ná tu qui-jnáhan ña jíin de, te ni jecūhun séhe ña ni sáha Espíritu Santo. <sup>19</sup>Te José, tēe qui-jnáhan ña jíin, chi tēe ndaā cúu de. Te tu ní cúní de cuāha de jnūhun canu ña, chi sa cúní de jeē na jécuiñī sáhi jéē ma qui-jnáhan de jíin ña. <sup>20</sup>Te níní súcuan nácani ni de, te jíin jéni ni quee-ni ñin ndajéhé máá Jítoho yō Yāā Dios nuū de, te ni cahān yā jíin de:

José, séhe yucūn David, ma yūhu ró cueca ró ñasihí ró María, chi séhe jeē scácu ña, vēji i nde nuū máá Espíritu Santo. <sup>21</sup>Te scácu ña ñin séhe yíi. Te snání ró i Jesús, chi máá i cúu Yāā jnama ñayuu nuū cuéchi i, áchi ndajéhé.

<sup>22</sup>Súcuan ni cuu tēcá jniñu yáha, návāha squícu jnūhun Jitoho yō Yāā Dios jeē ni cahān tēe ni nacani jnūhun ya nde jenahán. Te suhva ni cahān de:

<sup>23</sup>Coo ñin sūchi síhí, te nihīn séhe i, te scácu i ñin séhe yíi,

te conaní sūchí un Emanuel.

Achí tutu. Te síhví yáha cúní cahān: Yāā Dios ndeé yá jíin yó.

<sup>24</sup>Te ni natahū ni José, te ni sáha de nájñūhun ni cahān ndajéhé Jitoho yō jíin de. Te ni jeca de María ni cuu ña ñasihí

de. <sup>25</sup> Te tu ní quíxí de jíin ña, chi nde ni scácu ña sêhe yí núde ña. Te ni snaní de i Jesús.

### Jeë ní quijicoo tēe mago nuū yā

**2** Te ná ni cacu Jesús ini ñuu Belén ndañúu Judea, te tiempo un ndácu rey Herodes jniñu. Yūcuán na te jecu tēe ndíchí jēe casuáha siquī quími, ni quijicoo de nde jicá, ichi nuū cáne niándii, te ni jinūcoo de ñuu Jerusalén. <sup>2</sup> Te ni cacajñuhún de ñayuu:

¿Nde nuū íne sūchí jeë ní cacu jeë coo rey ñayuu hebreo? Chi ichi nuū cáne niándii ni cajito ná ñin quími cáhnu jeë cúu seña jeë ní cacu i. Te vējicoo ná chiñúhún ná i, áchí de.

<sup>3</sup> Te rey Herodes, ná ni jini de jñuhun yáha, te ni cunéé ni de, nde jíin táca ñayuu ñuu Jerusalén. <sup>4</sup> Te ni nastútú de táca sūtú cácu jéhnu jíin tēe cástéén tutu ley Yaā Dios nuū ñayuu. Te ni cajñuhún de tēe un ndé nuū cacu Cristo achí tutu. <sup>5</sup> Te ni cacachi nuū de:

Ini ñuu Belén ndañúu Judea. Chi suhva cáhán nuū tútu ni tee tēe ni nacani jñuhun ya nde jenahán:

<sup>6</sup> Te róhó ñayuu ñuu Belén ndañúu Judá, cújéhnu ga ñuu rō vēsú táca gá jeë cujéhnu ini Judá.

Chi suu ini ñuu rō quenda ñin Yaā ndacu jniñu, te coto ya ñayuu maá rí Israel, achí Yaā Dios.

Achí tutu.

<sup>7</sup> Yūcuán na te Herodes ni cana sáhi de táca tēe ndíchí un jēe naní mago. Te ni cajñuhun yúcún de ndé quívi ní cane quími ún. <sup>8</sup> Te ni tají de tēe un quíngoo de ñuu Belén. Te ni cahán de:

Cuángoo ní te cajñuhun yúcún ní ndé nuū íne sūchi lúlí un. Te núu ni nanihín ní i, te quijicoo ní castūhun ní nuū ná, návaha suni maá ná quichiñúhún ná i, áchí rey.

<sup>9</sup> Te jeë ní cajini de jñuhun ni cahán rey, te cuángoo de. Te maá quími cáhnu jeë ní cajito de ichi nuū cáne niándii, yósnúu núu de cuahán nde ni jinū nuū íne sūchi lúlí un, te yūcuan ní jecuiñí.

<sup>10</sup> Te ná ni cajito de jeë ní jecuiñí quími ún, te yōhyo ni cacusiñi ni de. <sup>11</sup> Te ni jinūcoo de ni quívícoo de ini vehe, te ni cajito de nuū sūchi lúlí un jíin náná i María. Te ni cajecuiñí yití de nuū i, te ni cachiñúhún de i. Te ni canune de yejñu de, te ni casocō de oro jíin sūje cútú jíin sūje uvuā nuū i. <sup>12</sup> Yūcuán na te ni scóto jēni de, ni cachi nuū de jeë ma nuhún de nuū Herodes. Te inga ichi cuanuhun de ñuu de.

### Jeë ní jinu José cuángoo de nación Egipto

<sup>13</sup> Te náa cuanuhun táca tēe mago, te ni scóto jēni José jeë ñin ndajéhé maá Jítoho yō Yaā Dios ni cahán yā jíin de:

Ndocuiñí te cunu ró quíngoo ró jíin sūchi lúlí jíin náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchi lúlí jíin jeë cáhni de i. Achí yá.

<sup>14</sup> Te ni natahū ni José. Te cuángoo de jíin sūchi lúlí jíin náná i, te ñuú ní cajica de cuángoo de nación Egipto. <sup>15</sup> Te ni coyūcú de yūcuan ndé ni jihí Herodes. Te sūcuan ni cuu návaha squícu jñuhun Jítoho yō Yaā Dios jeë ní cahán tēe ni nacani jñuhun ya nde jenahán: Nde nación Egipto ni cana ri Sēhe ri vēji i, áchí Yaā Dios, achí tutu.

### Jeë ní ndacu Herodes jniñu jeë na cúu táca sūchi yí lúlí

<sup>16</sup> Yūcuán na te Herodes ni jini de jeë sūcuan ni castáhú tēe mago un de, te yōhyo ni quítí ni de. Te ni tají de soldado cuángoo, te ni cajehni táca sūchi yí lúlí jēe uú cuiyā jíin jēe yiquín gá jeë cáyūcú ini ñuu Belén jíin táca ñuu yajni. Chi je ni cajñuhun yúcún de táca tēe mago un

nasaa tiempo ni cuu jeē ní cacu Jesús.

<sup>17</sup>Te súcuan ni squícu jnūhun ni cahān Jeremías, tēe ni nacani jnūhun Yaā Dios nde jenahán, chi ni cahān de:

<sup>18</sup>Ini región Ramá ni jini sōho ri

jeē cándahyū te cándahyū cohó.

Chi ñahan cácuu yucūn Raquel, cándahyū ña jehē séhe ña,

te tu cácu ni ña ndusī ni ña, chi ni cajihī i.

Achí tutu.

<sup>19</sup>Yūcuán na te ni jihī Herodes. Te ni scóto jēni José jeē ñin ndajéhé Jitoho yō Yaā Dios ni cahān yā jíin de nuū ndeé de nación Egipto. <sup>20</sup>Te ni cahān yā jíin de:

Ndocuñī te nuhun rō ñuu rō Israel jíin súchi lúlí jíin náná i. Chi je ni cajihī tēe cánducú cahni súchi lúlí jíinā nuú. Achí ndajéhé.

<sup>21</sup>Yūcuán na te ni ndocuñī de, te cuanuhun de nación Israel jíin súchi lúlí jíin náná i. <sup>22</sup>Te ni nihīn de jnūhun jeē Arquelao ni nucuiñī de nuū tatá de Herodes, te máa de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quhín de región Galilea, te cuango de. <sup>23</sup>Te ni jinū de yūcuán, te ni coyūcú de ñuu naní Nazaret. Súcuan ni cuu návāha squícu jnūhun ni cacahān tēe ni canacani jnūhun Yaā Dios nde jenahán. Chi ni cacachi de jeē cahān ñayuu jeē tēe ñuu Nazaret cúu Jesús.

### Jnūhun Juan tēe scuándute

(Mr. 1.1-8; Lc. 3.1-9, 15-17; Jn. 1.19-28)

**3** Te ni yāha tiempo, te ni jinū Juan tēe scuándute nde nuū ñūhun téhé ndañūū Judea, nácani de jnūhun suhva:

<sup>2</sup>Nacani ni rō jijnáhan rō jēe stóo rō cuéchi rō, chi je ni cuyajni Yaā ndeé andiví jēe ndacu ya jniñu nuū rō. Achí de.

<sup>3</sup>Te Isaías, tēe ni nacani jnūhun Yaā Dios nde jenahán, suhva ni tee de jnūhun Juan nuū tútu:

Coo ñin tēe cana jee nde nuū ñūhun téhé: Sátūhva rō máa rō jijnáhan rō, chi quee máa Jítóho yō.

Te sáha rō jniñu ndaā, chi vēji ya, achi de.

Achí Isaías.

<sup>4</sup>Te sahma ñūhun Juan cúu ixi quiti nání camello, te núhni ñin cinturón ñii chiji de. Te jeē técu de cúu tíca ndicuéhyí jíin ndúxi yocō. <sup>5</sup>Te ñayuu ñuu Jerusalén jíin táca ñayuu región Judea jíin ñayuu yúcu yajni yuyúte Jordán, ni quijicoo i nuū de. <sup>6</sup>Te ni canacani ndaā i cuéchi i nuū Yaā Dios, te ni scuándute de i ini yūte Jordán.

<sup>7</sup>Te ná ni jito de jeē vējicoo cuehē tēe grupo fariseo jíin tēe grupo saduceo nuū scuándute de, te ni cahān de jíin:

Va séhe coō cácuu rō, chi xeēn rō nájñūhun coō. ¿A cájeni ni rō jeē cuu cunu rō cácu rō núū castigo xeēn jeē quíji? <sup>8</sup>Núu súcuan te sáha rō jniñu váha, te súcuan stéen rō jeē ní canacani ndije ni rō jeē stóo rō cuéchi rō. <sup>9</sup>Te ma cáni ni rō cahān rō jeē cuu cácu rō síquē jeē cácuu rō yúcūn Abraham. Chi cáhān rī jíin rō jeē cuu sáha Yaā Dios jeē táca yúu yáha nduu séhe Abraham jeē candíje váha, te núu cúní yā. <sup>10</sup>Te cácuu rō nájñūhun nundéhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñūhun je íyó túhva ñin cāa jeē cahnde nde yoho yujnu. Núu súcuan te sáha ya jíin rō nájñūhun jíin táca yujnu jeē tu cúun ndehē váha, jeē tahndé te cayū nuū ñuhún. <sup>11</sup>Te ruhū chi jíin ndute scuándute ri rohó, te yūcuu cúu jeē steén rō jeē ní canacani ni rō jeē stóo rō cuéchi rō. Te Yaā jeē quíji, chi nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñuhūn. Te Yaā quíji chi cújéhnu ndasí yá. Chi tú na vé jéhnu cuíti cúu ri nuū yā, ni jeē cuajniñu ri nuū yā vēsū ñin jniñu lúlí gá nájñūhun jeē quénehen ri ndi-

jēn yā. <sup>12</sup>Te sáha ya nájnūhun sáha tēe scánda trigo, chí sásin ya ñayuu vāha jíin ñayuu cunéé, nájnūhun cúndoo trigo jeē quénda sīn paja. Te nastútú yá trigo yā ndīvi ini yacā yā. Te paja chí jnaa yā nuū ñuhún jeē ma ndahvá cuiti. Achí Juan.

### Jeē ní jendute Jesús

(Mr. 1.9-11; Lc. 3.21-22)

<sup>13</sup>Yūcuán na te ni quenda Jesús región Galilea, te ni quee yā yūte Jordán nuū íne Juan, návāha scuándute de ya. <sup>14</sup>Te tu ní cúní Juan scuándute de ya, chí ni cahān de jíin yá:

Sa suhva cánuú jeē scuándute máá ní sǎñá, ¿te ndese cúu jeē sa nuū ná vēji ní? áchí de.

<sup>15</sup>Te ni cahān Jesús jíin de:

Tuú chí sáha ró, chí súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya. <sup>16</sup>Te ná ni cuu ni jendute Jesús, te ni quenda ya nuū ndúte. Te ni nune-ni andiví, te ni jito ya jeē cúun Espíritu Yaā Dios vēji, te cáa nájnūhun iin paloma, te ni quee xiní yā. <sup>17</sup>Te ichi ándiví ni cahān iin jnūhun:

Yāha cúu Sēhe ri jeē maní ndasí rí jíin, te yōhyo cúsi ni rí jíin, áchí.

### Jeē ní jito ndee jexeén Jesús

(Mr. 1.12-13; Lc. 4.1-13)

**4** Yūcuán na te ni jinū Jesús nde nuū ñūhun téhé ní sáha Espíritu Santo. Te yūcuán coto ndee jexeén yā, chí cúní jeē sáha ya cuēchi.

<sup>2</sup>Te ni iyo ndite ni yā uū xico nduú uū xico ñuú, sáá te jíí yā sōco. <sup>3</sup>Te ni quee máá jéxeén jeē cóto ndee un yá, te ni cahān jíin yá:

Núu máá ró cúu Sēhe Yaā Dios, te cahān rō jeē yuú yúcu yāha na ndúu staā caji rō, achí.

<sup>4</sup>Te ni cahān yā jíin:

Tuú chí yósó núu tútu ii: Nasūu máni máá jíin stāa cátecu ñayuu, chí suni jíin táca jnūhun cáhán Yaā Dios, achí yá.

<sup>5</sup>Yūcuán na te cahān jexeén un jíin yá nde ñuu ii Jerusalén. Te ni jeni ya xiní torre templo. <sup>6</sup>Te ni cahān jíin yá:

Te núu Sēhe Yaā Dios cúu ró, te sín-gava ró máá ró nde nuū ñūhun, chí jnama ya rohó. Chí yósó núu tútu:

Tejníñu ya ndajéhé yā quijicoo coto rōhó.

Te cunundee yā rohó jíināhan ya, návāha ma cáchihi ró jéhē rō nuū yuú.

Achí tutu. Achí jexeén.

<sup>7</sup>Te ni cahān Jesús:

Tuú chí suni yósó núu tútu jeē ma cóto ndee ñayuu Jitoho i Yaā Dios, núu jnama ya i chí tuú, áchí yá.

<sup>8</sup>Te jexeén un ní jeca tucu ya cahān jíin yá nde xiní iin yucu súcún ndasí. Te ni steén tǎcá nación níí cáhnu ñayīvi núu yā, te yōhyo luu cáa ndīhi. <sup>9</sup>Te ni cahān jíin yá:

Tǎcá ñuu yáha cuáha ri nuū rō, te núu cuiñi yítí ró chiñúhún ró ruhū, achí.

<sup>10</sup>Yūcuán na te ni cahān Jesús nuū jexeén:

Satanás, cujiyo quihin rō, chí yósó núu tútu jeē chiñúhún ñayuu maá Jitoho i Yaā Dios, te nuū maá-ni ya cuajniñu i. Achí yá.

<sup>11</sup>Yūcuán na te ni cujiyo-ni jexeén un cuáhān. Te ni quecoo ndajéhé Yaā Dios ni cajejniñu nuū yā.

### Jeē ní quejéé Jesús nácani ya jnūhun región Galilea

(Mr. 1.14-15; Lc. 4.14-15)

<sup>12</sup>Te ná ni nihin Jesús jnūhun jeē íne Juan vecāa, te cuanuhun yā región Galilea. <sup>13</sup>Te tu ní cóndee yā ñuu Nazaret, chí ni jehēn yā ni condee yā ñuu Capernaum. Te ñuu un íne yumar, máá región Zabulón jíin Neftalí. <sup>14</sup>Te súcuan ni squícu jnūhun ni tee Isaías, tēe ni nacani jnūhun Yaā Dios nde jenahán:

<sup>15</sup>Región Zabalón jíin Neftalí, ichi jeē yíhi yumar, lado yūte Jordán nuū cáne niándii, jíin región Galilea nuū cáyucú ñayuu táca nación tu jíiní jnūhun ya.

<sup>16</sup>Ñayuu ún chi nájnūhun cáyucú i nuū néē,

te coto i nájnūhun ñin luz cáhnu.

Te ñayuu je yajni naa, nihin i jnūhun váha ndasí,

suu jnūhun jeē jnama ya anuá i.

Achí Isaías.

<sup>17</sup>Te nde quiví yúcuan ní quejéé Jesús nácani ya jnūhun, te ni cahān yā suhva:

Nacani ni rō jijnáhan ró jéē stóo ró cuéchi ró, chi je ni cuyajni Yaā ndeé andiví jéē ndacu ya jniñu nuū rō, achí yá.

### Jeē ní cana ya cuūn tēe jnī chācá

(Mr. 1.16-20; Lc. 5.1-11)

<sup>18</sup>Te jíca Jesús yumar Galilea cuahān yā. Te ni jito ya nuū uú jnáhan ñani. Te ñin de cúu Simón jeē suni nání Pedro, te inga de cúu Andrés. Te tēe cájni chācá cácuu de, te cásinga de ñunu de ini mar.

<sup>19</sup>Te ni cahān yā jíin de:

Condiquin ruhū na quíhín yō, te nasáha ri rohó tēe nihin cuehē ñayuu candíje ruhū, nájnūhun cánihin rō chācá, áchí yá.

<sup>20</sup>Yūcuán na te ni castóo-ni de ñunu de, te ni candiquin de ya.

<sup>21</sup>Te ni jica ya jecu gā, te ni jito ya nuū inga uū jnáhan ñani. Te cácuu de Jacobo jíin Juan, sēhe Zebedeo. Te cáyucú de ini barco jíin tátá de Zebedeo, cánachi-jnī de ñunu de. Te suni ni cana ya de jeē condiquin de ya. <sup>22</sup>Te ni castóo-ni de tátá de jíin barco, te ni candiquin de ya cuango de.

### Jeē ní steén yā nuū cuehē ñayuu

(Lc. 6.17-19)

<sup>23</sup>Te ni jica cuu Jesús ní región Galilea, ni steén yā jnūhun ini táca

vehe ii jeē cúu sinagoga. Te ni nacani ya jnūhun váha ndese ndácu Yaā Dios jniñu. Te ni nasávāha ya ñayuu cácuu táca-ni cuehyí. <sup>24</sup>Te ni jitē núu jnūhun ya cuahān ní región Siria. Te nuū yā ni caquindeca i táca ñayuu cácuu, ñayuu cándoho tijni nuū cuehyí, jíin jéē jetú, jíin jéē ñūhun tachí ini, jíin jéē jíhí yíhí, jíin jéē ni íjin. Te ni nasávāha ya i jíjnáhan i. <sup>25</sup>Te cuehē ñayuu región Galilea jíin Decápolis, jíin ñayuu ñuu Jerusalén jíin región Judea, jíin táca ñuu ichi núu cáne niándii yūte Jordán, ni cacondiquin i ya.

### Jeē ní nacani ya jnūhun nde nuū yúcu

**5** Te ni jito Jesús nuū ñayuu cuehē. Te ni caa ya yucu cuahān yā, te ni cucóo ya. Te tēe cáscuáha jíin yá, ni jinūcoo de nuū yā yūcuán. <sup>2</sup>Te ni quejéé yá ni steén yā táca jnūhun yáha nuū de:

### Jnūhun yōhyo ndetū

(Lc. 6.20-23)

<sup>3</sup>Yōhyo ndetū ñayuu jeē cánacuni i jeē tu íyó váha ánuá i siquí cuéchi i, chi je ni quívicoo i ndaha Yaā andiví jéē ndácu ya jniñu nuū i.

<sup>4</sup>Yōhyo ndetū ñayuu cácuuñhí ní, chí ndusí ni i sáha Yaā Dios.

<sup>5</sup>Yōhyo ndetū ñayuu cáhíyo vítá suchí ini, chí ni jejnūhun ya jeē cutahú i ñayiví.

<sup>6</sup>Yōhyo ndetū ñayuu jeē nájnūhun jeē cájii i sōco cájichí i, súcuan jnáa i sáha i jniñu ndaā, chí máá yá chindéé ñáhán yá i jeē cuu sáha i.

<sup>7</sup>Yōhyo ndetū ñayuu cákundáhú ni jnáhan, chí suni cundáhú ní Yaā Dios i.

<sup>8</sup>Yōhyo ndetū ñayuu cáhíyo ndoo ini anuá, chí coto i nuū Yaā Dios.

<sup>9</sup>Yōhyo ndetū ñayuu cánasamaní jnáhan, chí cahān Yaā Dios jeē sēhe ya cácuu i.

<sup>10</sup>Yōhyo ndetū ñayuu jeē cájito xeēn inga ñayuu i siquí jeē casáha i jniñu



ndaā, chi je ni quivicoo i ndaha Yaā andiví jée ndácu ya jniñu nuū i.

<sup>11</sup>Yōhyo ndetū maá ró jijnáhan ró núu cácahān neé i nuū rō jeē siquí ruhū, te coto xeēn i rōhó, te stáú yáhu i rōhó, vēsú tú cuēchi ró. <sup>12</sup>Na cúsī ni rō jijnáhan ró núu súcuan, te sa víhyá gā cusī ni rō, chi cáhnu ndasí coo tahū rō nde andiví. Chi suni súcuan ni cajito xeēn i tāca tée ni canacani jñuhun Yaā Dios jeē ní quijicoo xihna gā vēsú rohó.

### **Jñuhun yátá siquí ñī jín siquí luz**

(Mr. 9.50; Lc. 14.34-35)

<sup>13</sup>Maá ró jijnáhan ró cájejnīñu ró ini ñayīvi nájñuhun jéjnīñu ñī nuū cúñu návāha tú tehyū. Te núu ñī ún na náā jeē uhvuá, ¿te ndese nduu uhvuā tucu? Tuá cuajñīñu cuiti gā, chi sa cate ñayuu te cueñū i siquí.

<sup>14</sup>Maá ró cácuu nájñuhun luz jeē steén ini anuá ñayuu ñayīvi. Te cácuu ró nájñuhun ñī nuū íne xinī yúcu, jeē ma cúu quisāhí. <sup>15</sup>Te ni tu nástīñ ñayuu ñī lámpara te chune i chíji cajón, chi sa suhva jéni i nuū sucún, návāha cundijin nuū tāca jée cáyūcú ini vehe. <sup>16</sup>Te suni súcuan na steén rō luz maá ró nuū tāca ñayuu, te suu cúu jeē cúni i jniñu váha cásáha ró, te cahān i jeē yóhyo váha Yaā cúu Tátá rō jeē ndeé yá andiví.

### **Jeē ni steén yā siquí ley Yaā Dios**

<sup>17</sup>Ma cáni ni rō jijnáhan ró jée véji rí snāā rī ley jeē ni jéhe Yaā Dios nuū Moisés, jíin jée snāā rī tāca jñuhun ni cacahān tēe ni canacani jñuhun ya jehahán. Tú véji rí jeē snāā rī, chi sa suhva jeē steén cají rí jñuhun ndíso. <sup>18</sup>Chi jendaá cahán rī jíin ró jeē núu níní íyó andiví jíin ñayīvi, te ma náā cuiti ni ñī punto ni ñī letra nuū tútu ley yā, chi nde na squícu tāca ndīhi jñuhun jeē cahán. <sup>19</sup>Núu súcuan te núu ñī ñayuu tu squícu i ñī jñuhun yáha jée ndácu

ley yā, vēsú ñī jñuhun lulí gá cúu, te núu steén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ñī ñayuu squícu i te steén i jeē squícu ñayuu, yūcuán na te cujéhnu i ichi andiví nuū ndácu Yaā Dios jniñu. <sup>20</sup>Chi cáhán rí jíin ró jeē núu tú coo ndaā gā jniñu cásáha ró vēsú jniñu cásáha tēe cásteén tutu ley yā jíin tēe grupo fariseo, te ma quivicoo cuiti rō ndaha Yaā andiví jée ndacu ya jniñu nuū rō.

### **Jeē ni steén yā jeē ma quití ni yō**

(Lc. 12.57-59)

<sup>21</sup>Je ni cajini ró jñuhun ni cacahān jíin ñayuu jehahán, jeē ma cáhni i ndīyi, te na-ni ñayuu núu cahni i ndīyi, te cundaā cuēchi i nuū tāca tóhō, achí. <sup>22</sup>Te ruhū chi cáhán rí jíin ró, vēsú núu máá jée quití ni ñī ñayuu jíto i jnáhan i, suni cundaā siquí cuéchi i ún. Te núu ñī ñayuu cahān neé i nuū jnáhan i, núu súcuan te cundaā cuéchi i un núu justicia cujéhnu ga. Te núu ñī ñayuu cahān i nuū jnáhan i: Róhó jée canéé íi, achi i, núu súcuan te quívi i nuū ñuhún infierno te núu ma nácani ni i.

<sup>23</sup>Jeé yúcuán te núu ni jinū rō nuū altar jíin jée socó rō nuū Yaā Dios, te núu ni nucūhun ni rō jeē ni sáha ró cuéchi siquí jnáhan ró, <sup>24</sup>núu súcuan te squéndō ró jée socó rō ún xiin altar, te xihna gā quihīn rō ndumanī rō jíin jnáhan ró. Yūcuán na te nandicó ró socó rō.

<sup>25</sup>Te núu ñī ñayuu quihīn i jíin ró nuū tohó jeē cacān i cuéchi siquí rō, núu súcuan te níní cuáhān rō jíin i ichi te sándaā maá ró jíin i, návāha ma squívi i rōhó núu juez. Chi juez siáha de rōhó núu policía, te chune de rōhó vecā. <sup>26</sup>Te jendaá cahán rí jíin ró jeē ma quénda cuiti rō yūcuán, chi nde chunaa rō ndīhi cuiti xūhun jée cájicān de.

### Jeē ni stéén yā jeē ma cósíquí ndéē jnáhan

<sup>27</sup> Ni cajini ró jnúhun ni cacahān jenahán jeē ma cósíquí ndéē jnáhan ñayuu. <sup>28</sup> Te ruhū chi cáhán rī jín ró jeē núu iin tēe ndéhe de nuū iin ñahan jeē ndíyo ni de ña, yūcuán na te je ni casíquí ndéē de ñahan ún ini anuá de.

<sup>29</sup> Núu súcuan te núu tinūu lado váha ró sáha jeē quívi ró cuéchi, váha ga quenehen ró te scáne ró, návāha tuá sáha ró cuéchi. Chi váha gā jeē nāá iin tinūu ró vésú jeē cóo ndíhi yiqui cúñu rō te quihīn rō infierno. <sup>30</sup> Te núu ndaha váha ró sáha jeē quívi ró cuéchi, váha ga cahnde rō te scáne ró, návāha tuá sáha ró cuéchi. Chi váha ga jeē nāá iin ndaha ró vésú jeē cóo ndíhi yiqui cúñu rō te quihīn rō infierno.

### Jeē ni stéén yā jeē ma ndusíin jnáhan

(Mt. 19.9; Mr. 10.11-12; Lc. 16.18)

<sup>31</sup> Te suni ni cacahān nde jenahán: Núu ndé iin cúní stóo ñasihí, te na cuáha acta nuū ña jeē ndusíin jín ña. <sup>32</sup> Te ruhū chi sa cáhán rī jín ró jeē núu iin tēe stóo de ñasihí de, te núu nasūu jéē tǎjni ni ña, núu súcuan te sáha de jeē casíquí ndéē ña de, chi condee ña jín inga tēe. Te núu iin tēe condeca de ñahan ní ndusíin, suni cásíquí ndéē de ña.

### Jeē ni stéén yā siquí jnúhun jéjnúhun téyí

<sup>33</sup> Te suni ni cajini ró jnúhun jeē ni cáhán jín ñayuu nde jenahán: Núu ni jéjnúhun téyí ró jeē squícu ró, jito jínúu Yāa Dios, núu súcuan te cánúu squícu ró jéē ni cáhán teyí ró un, áchí. <sup>34</sup> Te ruhū chi cáhán rī jín ró jijnáhan ró jeē ní iin siquí jníñu ma cahán teyí ró nde jín síhví Yāa Dios, ni ma cahán teyí ró jeē jito jínúu yā. Te núu jéjnúhun téyí ró te tú váha jeē ndácunehen ró andívi ni ñayívi. Chi andívi cúu nuū iin mesa nuū

ndácu Yāa Dios jniñu. <sup>35</sup> Te ñayívi cúu nájnūhun teyū nuū iin jehē yā. Te ni ma ndácunehen ró ñuu Jerusalén, chi suu cúu ñuu maá Yāa cúu Rey cujéñu. <sup>36</sup> Ni ma cahán rō jeē na cóndee cuéchi siquí rō núu tu squícu ró. Ma cahán rō súcuan, chi ma cúu cuiti sáha ró jéē ni iin ixi xíní rō nducuíjín chí ndujnúu. <sup>37</sup> Chi suhva-ni cahán rō: Cuu, achi rō. Tuú, achi rō. Chi núu chisóó gá rō jnúhun cahán rō, te nuū jexeén vēji.

### Jeē ni stéén yā jeē ma cuáha yó jéē ndútahū ñayuu

(Lc. 6.29-30)

<sup>38</sup> Ni cajini ró jnúhun jeē ni cáhán jín ñayuu jenahán: Núu iin tēe ndahva de tinūu jnáhan de, suni súcuan na ndáhva tinúu de. Te núu iin tēe stáva de jnúhun jnáhan de, suni súcuan na stáva jnúhun de, áchí. <sup>39</sup> Te ruhū chi sa cáhán rī jín ró: Ma nácuáha ró jéē ndútahū tēe sáha ndeváha jín ró. Chi sa núu ndé tēe cani de yiqui núu lado váha ró, te váha ga suni cuáha ró inga lado cani de, vésú jeē nácuáha ró jéē ndútahū de. <sup>40</sup> Te núu ndé tēe stáú yáhu de rōhó te quénde de camisa rō, suni cuáha ró jnúhun jeē na quíhín de jín ndé ticáchi ró. <sup>41</sup> Te núu ndé tēe scáca de rōhó jéē condiso ró ndajníñu de iin kilómetro, te caca ró úu kilómetro jín de. <sup>42</sup> Te na-ni ñayuu núu jícán i ndajníñu ró, te cuáha ró núu i. Te ñayuu jícán núu ndajníñu nuū rō, ma sasáhán ró cuáha ró núu i.

### Jnúhun jeē cundáhú ni yó ñayuu cájito uhū yohó

(Lc. 6.27-28, 32-36)

<sup>43</sup> Te suni ni cajini ró jnúhun jeē ni cáhán nde jenahán: Cundáhú ni rō ñayuu cáhíyo maní jín ró, te coto uhū rō ñayuu cájito uhū rohó, áchí. <sup>44</sup> Te ruhū chi sa cáhán rī jín ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndeváha

siquī rō. Te sāha vāha ró jíin ñayuu cáquiti ni nuū rō. Te cacān tahu rō jehē ñayuu cacāhān neé núu rō te cájito xeēn i rōhó. <sup>45</sup> Te súcuan stéén rō jeē cácuu ró séhe máá Tátá rō, Yaā ndeé andiví, chi máá yá jéhe niāndii cúndijin nuū ñayuu cunéé jíin ñayuu váha. Te jéhe ya saū nuū ñayuu casáha jniñu ndaā jíin núu ñayuu casáha jniñu neé. <sup>46</sup> Chi núu iyó máni rō jíin máa-ni ñayuu jeē maní jíin rō, te tú na tahū nihin rō nuū yā. Chi nde tēe cástúttú xúhun renta jeē castáhú, suni súcuan casáha de. <sup>47</sup> Te núu máni jnáhan ró cáhān yíñuhún ró jíin, ¿te na vé jeē váha ga sāha ró núu súcuan? Chi nde ñayuu tu cácanđije Yaā Dios, suni súcuan casáha i. <sup>48</sup> Núu súcuan te ndaā na cóo ndihi jeē sāha ró, nájnūhun íyó ndaā ndihi jeē sāha Tátá rō, Yaā ndeé andiví.

### Jeē ni stéén yā ndese sáha yó jniñu váha

**6** <sup>1</sup> Te jeē sāha ró táca jniñu váha nuū Yaā Dios, coto ró jéē ma sāha ró máá síquī jeē cúni ñayuu te cuajnúhún i rōhó. Chi núu súcuan sāha ró, te tú na tahū rō cuāha máá Tátá rō, Yaā ndeé andiví. <sup>2</sup> Jeē yúcuan te jeē sāha ró caridad, te ma sāha ró jéē cúni táca ñayuu, nájnūhun casáha tēe stáhú-ni, cáhiin de nuū cúchitú ñayuu ini táca vehe ii sinagoga jíin núu yáhu. Chi súcuan casáha de návaha cuajnúhún ñayuu de jeē váha casáha de. Jendaá cahán rī jíin ró jeē tahū de cúu jeē jejnúhún ñayuu de. <sup>3</sup> Te rōhó jíjnáhan ró, núu casáha ró caridad, te sāha yuhu rō, návaha nde amigo váha ró tú cuni jeē sāha ró. <sup>4</sup> Súcuan na sāha yuhu rō caridad. Te máá Tátá rō jeē jíto ya jeē sāha yuhu rō, iin quiví te cuāha ya tahū cuu ró.

### Jeē ni stéén yā ndese cacān tahu yō (Lc. 11.2-4)

<sup>5</sup> Te jeē cájicān tahu rō, te ma sāha ró nájnūhun casáha tēe stáhú-ni. Chi cánu-jnahan ni de cuiñi de cacān tahu de nuū iyó chitú ñayuu ini táca vehe ii sinagoga jíin táca yíqui yáhu, návaha cuni ñayuu te cuajnúhún i de. Jendaá cahán rī jíin ró jeē máá yúcuan-ni cúu tahu jeē nihín de, suu jeē jejnúhún ñayuu de. <sup>6</sup> Te rōhó jíjnáhan ró, núu cájicān tahu rō, te ndivi ró ini vehe ró te casi rō yehyí. Te cacān tahu rō nuū máá Tátá rō, Yaā ndeé yuhu jíin ró. Yúcuan na te máá Tátá rō jeē jíto ya jeē súcuan sāha yuhu rō, sāha ya jeē jíicān rō.

<sup>7</sup> Te jeē cájicān tahu rō, te ma cahán saá-ni ró jnúhun jeē tu cájecūhun ni rō, nájnūhun casáha ñayuu tu cájini jnúhun Yaā Dios. Chi cájeni ni i jeē núu cuehē jnúhun súcuan cahán i, te sáa te cuni sōho ya, te tuú. <sup>8</sup> Núu súcuan te ma sāha ró nájnūhun casáha máá i. Chi máá Tátá rō, je jíni yā na vé cájini ñúhún ró nde ná tu cacān rō nuū yā. <sup>9</sup> Núu súcuan te suhva cacān tahu rō:

Tátá máá ná jíjnáhan ná jéē ndeé ní andiví,  
níní na cóo yíñuhún ná nuū ní, chi Yaā ii cúu ní.

<sup>10</sup> Te ñúhún ni na jéē yachí quiví ndacu ní jniñu ní ñáyivi yáha.

Te na cóo táca jniñu újnahan ni ní, nájnūhun íyó ini andiví, súcuan na cóo ini ñayiví.

<sup>11</sup> Staā jeē cátecu na táca quíví, cuāha ní núu ná vijna.

<sup>12</sup> Te cone cahnu ni ni núu táca cuéchi casáha ná núu ní,  
nájnūhun cáhine cáhnu ni na núu ñayuu casáha cuéchi nuū ná.

<sup>13</sup> Te ma cuāha ni jnúhun jeē coto ndee jexeén sãñá,  
chi sa suhva jnama ní sãña núu táca jéē neé.

Chi máá ní cúu Yaā ndácu jniñu, te jní ní poder,  
te yōhyo luu cújéhu ní ní cáni. Súcuan  
na cóo. Amén.

Achi rō jijnáhan rō.

<sup>14</sup> Chi núu cone cáhnu ní rō nuū ñáyuu casáha cuéchi nuū rō, te suni súcuan cone cáhnu ní maá Tátá rō andiví nuū cuéchi rō. <sup>15</sup> Te núu ma cóne cáhnu ní rō nuū ñáyuu casáha cuéchi nuū rō, te suni súcuan ma cóne cáhnu ní maá Tátá rō nuū cuéchi rō jíjnáhan rō.

**Jeē ni stéén yā siquī  
jnúhun condite ni**

<sup>16</sup> Te núu condite ní rō jeē chiñúhún rō Yaā Dios, te ma sáha rō nájnūhun casáha tēe stáhú-ni. Chi casáha de jeē coto xí de, te súcuan stéén de nuū ñayuu jeē iyó ndite ní de, návāha cuajnúhún i de. Jendaá cahán rī jíin rō jeē maá yúcuan-ni cúu tahū jeē nihín de, suu jeē jējnúhún ñayuu de. <sup>17</sup> Te máá rō jijnáhan rō, núu iyó ndite ní rō, te sa chuhun váha rō xíní rō te nandahá núu rō, <sup>18</sup> návāha ma cúní ñayuu jeē iyó ndite ní rō. Chi máá-ni Tátá rō jeē ndeé yuhu yā jíin rō, cuni yā, te ñin quiví te cuāha ya tahū cuu rō.

**Ndese coo cúcá yó nde andiví**

*(Lc. 12.33-34)*

<sup>19</sup> Ma cóndihví ní rō caya rō ndajníñu cúcá ñin ñayívi yáha, chí quívi tiquíxin, te cáne xehyu, te tívi. Te suni quívicoo ñacuíhná te sácufhná. <sup>20</sup> Chi sa suhva sáha rō táca jniñu váha návāha cayā tahū rō nde andiví. Chi yúcuan má quívi tiquíxin ní ma cáne xehyu jeē tívi. Ni ma cúu quívi ñacuíhna sácufhná. <sup>21</sup> Chi nde nuū nihín rō tahū váha rō, yúcuan cúu nuū cóndihví ní rō siquī.

**Tinūu cúu lámpara yiqui cúñu**

*(Lc. 11.34-36)*

<sup>22</sup> Tinūu rō cúu nájnūhun lámpara nuū yiqui cúñu rō. Núu súcuan te núu tinūu rō iyó ndijin, te ní-ni yiqui cúñu rō cóndijin. <sup>23</sup> Te núu tinūu rō tu iyó ndijin, te ní-ni yiqui cúñu rō iyó nee. Te suni súcuan cúu ánuá rō, chí núu máni jeē jéni neé ní rō, te nacā jeē nee gā iyó ñin ánuá rō núu súcuan.

**Jeē ma cóndihví ní yō siquī xúhun**

*(Lc. 16.13)*

<sup>24</sup> Ni ñin mozo ma cúu cuajníñu de nuū uū patrón. Chi quití ní de nuū ñin te coo maní de jíin inga, chí squícu váha de nuū ñin te sájéé ní de nuū inga. Te suni súcuan ma cúu cuajníñu rō núu Yaā Dios te núu máni siquī xúhun ndíhví ní rō.

**Yaā Dios ndíto ya yohó**

*(Lc. 12.22-31)*

<sup>25</sup> Núu súcuan te cáhán rī jíin rō jijnáhan rō: Ma nácani ndasí ní rō siquī jeē cótecu rō, núu ndese caji rō coho rō, ní siquī sahma, núu ndese cahun rō. Chi Yaā Dios ní sáha ya jeē técu rō jíin yiqui cúñu rō, te nagā ní cuu jeē ma cuāha ya jeē caji rō jíin jéé cúhun rō. <sup>26</sup> Condēhe rō ndese cátecu saa, chí tu cátaji tí, ní tu cánastútú tí jeē chúvāha tí, ní tú yacā tí. Te vesú súcuan te máá Tátá rō andiví scáji yā tí. Te cánuú ndasí gá rō jijnáhan rō vesú táca saa ún. <sup>27</sup> ¿Te ndé ñin rō, á cuu scuéhnu rō máá rō sava metro gā, vesú na nácani ndasí ní rō?

<sup>28</sup> ¿Te najehē cánacani ndasí ní rō jeē ma nihín rō sahma? Condēhe jíjnáhan rō ndese jéé ita táca yúcū. Chi tu sájniñu, ní tu táú. <sup>29</sup> Te cáhán rī jíin rō jeē ní rey Salomón, quiví ní ñúhun de sahma váha ndasí, tú ní ñúhun de sahma lúu súcuan nájnūhun ita ún. <sup>30</sup> Te núu súcuan jéhe Yaā Dios sahma lúu ita un jéé jéé vijna te sajnē cayū nuū ñuhún, te nagā ní cuu

róhó jijnáhan ró jéē ma sáha ya jeē nihín rō sahma. ¿Te naun tu cácanđije nihín ró jéē ndító ya rohó? <sup>31</sup>Núu súcuan te ma nácani ndasí ni rō siquī jeē cáji rō, jeē coho ró, jeē cuhun ró. <sup>32</sup>Chi táca ñayuu ñayivi jéē tu cácanđije cúu jeē máni siquī jeē yáha cándihvī ni i. Te máá ró jijnáhan ró, chi iyó Tátá rō andiví, te jíní yā jeē cájini ñúhún ró táca jéē yáha. <sup>33</sup>Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō, jín siquī jeē sáha ró jniñu ndaā jeē nún-nahan ni yā. Yūcuán na te sáha ya jeē nihín rō táca jéē yáha. <sup>34</sup>Núu súcuan te ma nácani ni rō siquī jeē cóo sajnē, chi vijna cúu vijna te sajnē cúu sajnē. Chi cani ni rō siquī jnúndóho jeē iyó ná ñin ná ñin-ni quivī.

**Jeē ma cahán yō siquī  
cuéchi jnáhan yó**

(Lc. 6.37-38, 41-42)

**7** Ma cahán rō siquī ñayuu ndese sáha i, návaha suni ma cahán Yaā Dios cuéchi siquī maá ró jeē casáha ró súcuan. <sup>2</sup>Chi nájnūhun cácahān rō siquī cuéchi ñayuu, suni súcuan cahān yā siquī cuéchi ró. Te cūhva jeē cándihvī ni rō siquī i, suni cūhva yúcuan sáha ya jín ró. <sup>3</sup>Chi cuéchi jnáhan ró cúu nájnūhun jeē íne ñin yāca lúli tñúú i. ¿Te naun casáha ró cuenta jeē súcuan, te tu casáha ró cuenta cuéchi máá ró jeē cúu nájnūhun jeē íne ñin nduhu tñúú máá ró? <sup>4</sup>¿Te naun cácahān rō jín jnáhan ró: Na táva rī yāca íne tñúú ró, te tu cá-nacani ni rō jeē íne ñin nduhu tñúú máá ró? <sup>5</sup>Tē stáhú-ni cácuu ró núu súcuan. Xihna gā tñúú máá ró tava rō nduhu, te yūcuán na te cuu condēhe váha ró jéē táva rō yāca tñúú jnáhan ró.

<sup>6</sup>Ma sáha fuerza rō ñayuu cunéé quívicoo i nuū jnúhun ii yā núu tu cúní i. Chi ndonda i siquī rō nájnūhun ina jeē cáyihí tí rohó. Te ma nácani ró jnúhun ya nuū ñayuu jeē tu cúní cuiti cuajnúhún.

Chi cándāa i nájnūhun quíní jeē jeñú tí siquī perla jeē ndeé yahu ga.

**Cacān yō nuū yā te nihín yō**

(Lc. 11.9-13; 6.31)

<sup>7</sup>Cacān rō nuū Yaā Dios, te cuāha ya nuū rō. Te nducú ró táca jéē váha iyó núu yā, te nihín rō sáha ya. Te cacān tahú rō nde nihín rō, nájnūhun sáha ñayuu cahán yehyí ndé nune quíví i. <sup>8</sup>Chi táca ñayuu jicán, cuāha ya nuū i. Te ñayuu nducú, suni nihín i. Te ñayuu cahán, nune ya ichi nihín i jeē cúní i.

<sup>9</sup>¿Te ndé ñin róhó núu séhe ró jicán i staā nuū rō, te á cuāha ró ñin yuū nuū i? <sup>10</sup>¿Te núu jicán i ñin chācá, te á cuāha ró ñin coō nuū i? Tú cuiti súcuan. <sup>11</sup>Núu súcuan te máá ró jijnáhan ró, vēsú ñayuu iyó cuéchi cácuu ró, te cájini rō cuāha ró jéē váha nuū séhe ró. Te nagā ni cuu máá Tátá rō andiví jéē ma cuāha ya jeē váha nuū ñayuu jicán nuū yā.

<sup>12</sup>Te nájnūhun cúní rō jeē sáha váha ñayuu jín ró, suni súcuan na sáha váha ró jín i. Chi tutu ley Moisés súcuan ndácu jniñu, jín táca tutu tēe ni canacani jñūhun Yaā Dios.

**Siquī jeē quíví yó yéhyí túū**

(Lc. 13.24)

<sup>13</sup>Condihvī ni rō quívicoo ró ndaha Yaā Dios. Chi cúu nájnūhun ñin yéhyí túū. Chi yéhyí jín ichi jeē cuahán nuū jnahnú ndetū ñayuu, jíté te cáhnu, te cuehē i quívicoo yūcuán. <sup>14</sup>Te yéhyí jín ichi jeē cuahán nuū nihín tahú i cotecu i, chi tuū yehyí te cuíñi ichi, te jecu-ni i cánihin i.

**Jín jniñu casáha ñayuu te  
nácuni yō ndese ñayuu cácuu i**

(Lc. 6.43-44)

<sup>15</sup>Te ma cándije cuiti rō tēe stáhú jéē cácahān de jeē jnúhun Yaā Dios cá-nacani de. Chi nájnūhun lanchi, quití tú xeēn, súcuan casáha de vējicoo de nuū

rō. Te ini anuá de chi cácuu de nájñuhun yihī, quitī xéén. <sup>16</sup> Jín jniñu cásáha de te nacuni rō de ndese tēe cácuu de. Chi cúu nájñuhun jeē tu scóyo ró ndehē uva xinī iñu, ni tu scóyo ró higo xinī iñu yóquin. <sup>17</sup> Te tācá yujnu váha chi jéhe ndehē váha, te yujnu néé chi cúun ndehē neé. <sup>18</sup> ñin yujnu váha ma cúun ndehē neé, te ni ñin yujnu néé ma cuáha ndehē váha. <sup>19</sup> Te tācá yujnu jeē tu jéhe ndehē váha, chi tahndē te cayū nuū ñuhún. <sup>20</sup> Te suni súcuan cácuu tēe ún, chi jín jniñu cásáha de te nácuni rō ndese tēe cácuu de.

### Nasūú ndihi ñayuu quīvicoo andiví

(Lc. 13.25-27)

<sup>21</sup> Nasūú ndihi ñayuu jeē cahán i Jitoho i ruhū cúu jeē quīvicoo nuū ndácu Tátá rī jniñu nde andiví. Chi quīvicoo máá nene ñayuu jeē squícu jniñu cúní Tátá rī andiví. <sup>22</sup> Te quiví jeē sándaā rī jniñu ñayuu, te cuehē i cahán jín rí: Jitoho na jínáhan ná, ni canacani ná jnúhun jín síhví ní, te ni caquenehen ná táchi jín síhví ní, te ni casáha ná cuéhē jniñu jéhu jín síhví ní jeē náá ni ñayuu sáha. Achi i. <sup>23</sup> Yūcuán na te cahán rī jín ñayuu ún: Tu jíní cuiti rī rohó. Cujiyo quingoo ró, chi ñayuu casáha jniñu néé cácuu ró, achi rī.

### Siquí uú vehe

(Lc. 6.47-49; Mr. 1.22)

<sup>24</sup> Núu súcuan te tāca ñayuu jeē cájini sōho jnúhun cáhán rī te squícu i, cácuu i nájñuhun ñin tēe ni nacani váha ni, te ni jeni de vehe de siquí cáva. <sup>25</sup> Te ni cuun saū, te ni ndaa yūte, te ni quee tachī xéén, te ni cachundahá vehe ún. Te tu ní cótúú, chi siquí cáva ndéé. <sup>26</sup> Te tāca ñayuu jeē cájini sōho jnúhun cáhán rī te tu squícu i, cácuu i nájñuhun ñin tēe cánéé jeē ní jeni de vehe de nuū ñíti. <sup>27</sup> Te ni cuun saū, te ni quiji ndute ñuhún cuéhē, te ni quee tachī xéén, te ni

cachundahá vehe ún. Te ni cotúú-ni, te ni naa ñi-ni. Achí yá jín i jínáhan i.

<sup>28</sup> Te ná ni jinu ni cahán Jesús tāca jnúhun yáha, te ñayuu cuehē un ní canaa ni i ni cajini i jnúhun ni steén yā. <sup>29</sup> Chi ni steén váha ya nuū i, chi máá yá cúu jeē ndíso jniñu siquí ndihi. Te tēe cástéén tutu ley Yaā Dios, tu súcuan cástéén de.

### Jeē ní nasávāha ya ñin tēe ndóho cuehyī stehyú

(Mr. 1.40-45; Lc. 5.12-16)

**8** Te ni nanuu Jesús yucu ún, te cuehē ñayuu cándiquin i ya. <sup>2</sup> Te ñin tēe ndóho cuehyī stehyú, ni quee de nuū yā. Te ni jecuiñi yití de nuū yā, te ni cahán de jín yá:

Jíní na jēe cuu sáha ní jēe nduvāha ná, te núu cúní ni, achí de.

<sup>3</sup> Te Jesús ni soó yá ndaha ya siquí de, te ni cahán yā:

Cúní rī. Te na ndúvāha ró, achí yá.

Te ná ni cahán yā súcuan, te ni nduvāha-ni tēe ndóho cuehyī stehyú un. <sup>4</sup> Yūcuán na te ni cahán Jesús jín de:

Ma cáchi cuiti rō nuū ní ñin. Chi quis-teén rō maá ró nuū sutú, te condahá ró jeē socó rō nuū Yaā Dios, nájñuhun ni ndacu Moisés jniñu jenahán, návāha cuni ñayuu jeē ní nduvāha ró. Achí yá.

### Jeē ní nasávāha ya mozo capitán

(Lc. 7.1-10)

<sup>5</sup> Te ni quiví Jesús ñuu Capernaum. Te ñin tēe nación Roma jeē cúu capitán, ni quee de nuū yā, te ni cahán ndahú de jín yá:

<sup>6</sup> Mozo na cátú i vehe ná, chi ni ñin i te ndóho xeén i, achí de.

<sup>7</sup> Te ni cahán Jesús:

Quihín rī nasávāha ri i núu súcuan, achí yá.

<sup>8</sup> Te ni cahán capitán jín yá:

Tu cújéhu ná jēe quihín ni quiví ní vehe ná. Chi máá jēe cahán-ni ní, te na ndúvāha-ni mozo na. <sup>9</sup> Chi máá ná suni

ndíso jniñu ná ní casáha tēe cácujuhnu ga. Te cújéhnú ná núū tācá soldado na. Te núu cáhán na jíin iin de jeē na quíhín de, te cuahán de. Te núu cáhán na jíin inga de jeē na quíji de, te quíji de. Te núu ndácu ná iin jniñu nuū mozo na, te sáha i. Achí de.

<sup>10</sup> Te jeē ní jini Jesús jnūhun yáha, te ni naa ni yā. Te ni cahān yā jíin ñayuu cándiquin yā ún:

Jendaá cahán rí jíin ró jeē ni nación yō Israel tu ní níhín rí ni iin ñayuu candíje nihin súcuan, nájñūhun cándíje tēe yáha, vēsú tēe nación tu jíin jnūhun Yaā Dios cúu de. <sup>11</sup> Te cáhán rí jíin ró jeē quíjicoo cuehē ñayuu ichi núū cáne niāndii jíin ichi núū queé niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andiví. <sup>12</sup> Te sava ñayuu nación Israel jeē maá i quivícoo núú, te sa quenehen ya i quihín i nuū nēé, chí tu ní cácandíje i. Te yūcuan ndáhyū i te nacayihí yuhu i jeē ndoho xeēn i. Achí yá.

<sup>13</sup> Yūcuán na te ni cahān yā jíin tēe cúu capitán:

Cuánuhun vehe ró, chí sáha ri nájñūhun cándíje ró jēé sáha ri.

Te mozo de un ní nduvāha-ni i máá hora un.

### **Jeē ní nasávāha ya naná chíso Pedro**

(Mr. 1.29-31; Lc. 4.38-39)

<sup>14</sup> Te ni jehēn Jesús vehe Pedro. Te ni jito ya naná chíso de jeē catú ña yfhi quíji ña. <sup>15</sup> Te ni jniñi ya ndaha ña, te ni quenda-ni quíji ún ña. Te ni ndocuññi ña, te ni sáha ña jeē ní cayejí de jíin yá.

### **Jeē ní nasávāha ya cuehē ñayuu**

(Mr. 1.32-34; Lc. 4.40-41)

<sup>16</sup> Te jeē ní cuaa ni quecoo ñayuu jíin cuehē ñayuu jeē ñūhun tachí ini i. Te ni quenehen ya tachí un cuángoo jíin jnūhun cáhán-ni ya. Te suni ni nasávāha ya tāca ñayuu cácuñū. <sup>17</sup> Te súcuan ni

cuu návāha cundaā jnūhun ni cahān Isaías, tēe ni nacani jnūhun Yaā Dios jehāhán: Máá yá ni tejiyo ndinuū cuehyí cándoho yó, áchí Isaías.

### **Siquí ñayuu jeē cácuñi i condiquin i ya**

(Lc. 9.57-62)

<sup>18</sup> Te ni jito Jesús jeē ní ndicó ndúū cuehē ñayuu yā. Te ni cahān yā jíin tēe cácuáha jíin yá jeē na yáha de jíin yá inga lado mar. <sup>19</sup> Te iin tēe stéén tutu ley Yaā Dios, ni quee de nuū yā, te ni cahān de:

Maestro, condiquin na níhín quíhín yō ndé-ni cúu-ni nuū quihín ni, áchí de.

<sup>20</sup> Te ni cahān Jesús jíin de:

Tāca núcuui, íyó yáū cava cáñuhun tí. Te suni saa, iyó táca tí. Te ruhū, Yaā ní nduu tēe, tuú nuū cusú rí, achí yá.

<sup>21</sup> Te inga tēe ni cahān de jíin yá, te tēe scuáha jíin yá cúu de:

Condetu ní ndé na quíchindūji ná tátá na xíhna gā. Yūcuán na te condiquin na níhín, áchí de.

<sup>22</sup> Te ni cahān Jesús jíin de:

Condiquin ruhū na quíhín yō. Te stóo tāca ndíyi na chindūji jnāhan ndíyi, chí ndíyi cácuo ñayuu tu cácandíje. Achí yá.

### **Jeē ní jecuiñi tachí níhin jíin mar ni sáha ya**

(Mr. 4.35-41; Lc. 8.22-25)

<sup>23</sup> Yūcuán na te ni quívi Jesús ini barco, te tēe cácuáha jíin yá ni quivícoo de cuahān de jíin yá. <sup>24</sup> Te nuū mar ni jekuñi iin tachí níhin, te ni stónnda ndute mar, ni quívi ini barco un. Te Jesús chí quíxí yā. <sup>25</sup> Te tēe cácuáha jíin yá ni castónnda de ya, te ni cacahān de:

Jnama ní yóhó, chí je queé yó chíji ndute, áchí de.

<sup>26</sup> Te ni cahān yā jíin de:

¿Naun cáyūhú ndasí ró? Te tu cácandíje nihin ró jēé cácu ró sáha ri, achí yá.

Yūcuán na te ni ndocuĩñi yā, te ni cahān yā nuū tachí nihin un jín nū mar. Te ni cuu nayúu ĩ-ni. <sup>27</sup> Te ni canaa ni de jínahan de, te ni cacahān de:

¿Ndé ĩn ga cúu tēe yāha, jēe ndé tachí nihin jín mar cájetáhú jēe cahán de? áchí de.

### **Tēe Gadara jeē cándoho tachí**

(Mr. 5.1-20; Lc. 8.26-39)

<sup>28</sup> Te ni jinū yā inga lado mar, máa región ñayuu Gadara. Te uū tēe ni quendacoo de nde nuū yíndūji ndīyi, ni quijnahan de ya. Te cáñuhun tachí ini de, te siquī jēe yóhyo xeēn tachí ún, te ni ĩn ñayuu tu cúu yāha i ichi yúcuan. <sup>29</sup> Te ni cacana cóhó de ni casáha tachí:

¿Naun vēji ní nūú ná, Jesús Sēhe Yaā Dios? ¿A vēji ní yāha jeē stóho ní sáña ndé ná tu quee maá quívī? áchí.

<sup>30</sup> Te nde jicá jecu cáhiin cuehē quini cájitu ti. <sup>31</sup> Te tachí jeē cáñuhun ini tēe un ní cacahān ndahú jín yá:

Núu quenehen ní sáña, te cuāha ni jnúhun na quívicoo ná ini quini cáhiin yūcuán, áchí.

<sup>32</sup> Te ni cahān yā jín:

Cuángoo núu súcuan.

Te ni quendacoo tachí ún ini tēe ún, te ni quívicoo ini quini. Te quini un ní cajinu ti ni caningava ti ĩn yucáva, te ni ndaquíhi ti ndute mar, ni cajili ti.

<sup>33</sup> Te tēe cándito ti ni cajinu de cuángoo de jeē ní cayūhú de. Te ni najinūcoo de ñuu. Te ni cacastūhún de táca jniñu yúcuan, jín ndese ni cuu jeē ní quendacoo tachí ini ndindúú tēe ún. <sup>34</sup> Yūcuán na te ndiviñi ñayuu ñuu un, ní quendacoo i cuacondēhé i Jesús. Te ná ni jinūcoo i nuū íne ya, te ni cacahān ndahú i jín yá jeē na quenda ya región yúcuan quíhñi yā.

### **Jeē ní nasávāha ya ĩn tēe ndóho cuehyī ni ĩjin**

(Mr. 2.1-12; Lc. 5.17-26)

**9** Yūcuán na te ni ndivi Jesús ini barco. Te ni nayāha ya cuahān yā inga lado mar, te ni najinū yā ñuu maá yá. <sup>2</sup> Te ni caquindeca ñayuu ĩn tēe ndóho cuehyī ni ĩjin, cátu de nuū ĩn camilla. Te ni jini Jesús jeē cácandíje i jeē cúu nasávāha ya tēe ní ĩjin ún. Te ni cahān yā jín de:

Na ndúndeyí ní rō sēhe, chí je íne cáhnu ni rī nuū táca cuéchi ró, áchí yá.

<sup>3</sup> Yūcuán na te jecu tēe cástéén tutu ley Yaā Dios, ni cajeni ni de siquī yā: Jeē cahán tēe yāha súcuan, chí cáhán de jnúhun ndevāha jeē quití ni Yaā Dios.

<sup>4</sup> Te ni jini Jesús jeē súcuan cájeni ni de, te ni cahān yā jín de:

¿Naun cájeni ni rō jeē cahán ndevāha ri? <sup>5</sup> Jeē uú jnúhun yāha, ¿ndé ĩn yí gá cá? ¿A jēe cahán rī jín tēe cúhú: Je íne cáhnu ni rī nuū táca cuéchi ró? ¿Chí yí gá jeē cahān rī: Ndocuĩñi te caca ró, chí je ni nduvāha ró, achi rī? <sup>6</sup> Te vijna te na stéén rī jeē maá rí, Yaā ní nduu tēe, ndíso jniñu rī ini ñayivi yāha jēe cóne cáhnu ni rī nuū cuéchi.

Yūcuán na te ni cahān yā jín tēe ni ĩjin ún:

Ndocuĩñi te naquihin ró camilla rō te quinhun rō vehe ró, áchí yá jín de.

<sup>7</sup> Yūcuán na te ni ndocuĩñi-ni tēe ún, te cuanhun de vehe de. <sup>8</sup> Te ná ni cajito ñayuu un jēe súcuan ni sáha ya, te ni cayūhú i. Te ni cacahān i jeē yóhyo vāha Yaā cúu Yaā Dios jeē súcuan ni jēhe ya poder nuū ĩn tēe jeē cúu nasávāha de ñayuu, achi i cájito i Jesús.

### **Jeē ní cana ya Mateo**

(Mr. 2.13-17; Lc. 5.27-32)

<sup>9</sup> Te ni quenda Jesús yūcuán cuāhān yā. Te ni jito ya nuū ĩn tēe nání Mateo, néne de nuū cutútú xúhun renta. Te ni cahān yā jín de:



Condiquin ruhū na quhín yō.

Te ni ndocuiñi de, te cuahān de jíin yá.

<sup>10</sup> Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásáha cuēchi, suni cáyūcú de cáyeji de staā jíin Jesús jíin tēe cáscuáha jíin yá. <sup>11</sup> Te tēe grupo fariseo, ni cajito de, te ni cacahān de jíin tēe cáscuáha jíin yá:

¿Naun yeji maestro rō jíin tēe cástútú xúhun renta jíin inga tēe cásáha cuēchi? áchí de.

<sup>12</sup> Te ni jini Jesús, te ni cahān yatá yá jíin de:

Ñayuu cáhiyo vāha, tu jíni ñúhún i tēe tájné, chi ñayuu cácuñú cúu jeē jíni ñúhún. <sup>13</sup> Cuáhán jíināhan ró núu súcuan, te nacani ni rō na vé cúu jeē cahán jnūhun yáha jéē yosó núu tútu ii: Cúni rí jeē na cúndáhú ni rō jnāhan ró, nasūu jéē socó rō quití nuū rí, achí Yaā Dios nde jenahán. Te ruhū nasūu jéē véji ri cana ri ñayuu tú cuēchi, jeē cúu i nájnūhun ñayuu cáhiyo vāha, chi sa suhva véji ri cana ri ñayuu iyó cuēchi, jeē na nácani ni i te stóo i cuēchi i. Achí yá.

**Jeē ní cacajñūhún de ya  
siquī jeē cóndite ni**

(Mr. 2.18-22; Lc. 5.33-39)

<sup>14</sup> Yūcuán na te tēe cáscuáha jíin Juan tēe scuándute, ni quecoo de nuū Jesús. Te ni cacahān de jíin yá:

Saña jíin tēe grupo fariseo, tijni jínu cáhiyo ndite ni na núu Yaā Dios. Te tēe cáscuáha jíin máá ní, ¿naun tu cásáha de súcuan?

<sup>15</sup> Te ni cahān Jesús jíin de:

¿A cuu condite ni de níni jéē iyó rí jíin de? ¿A cuu cucuñhyá ni ñayuu cáhiin vico nándāha, te núu níni néne tēe nándāha? Te quee quivī jeē cújiyo tēe nándāha, te quivī ún chi condite ni i.

<sup>16</sup> Te ni cahān yā uū jnūhun yatá siquī jeē tu quíjnāhan jnūhun jeē jéē steen yā jíin táca jnūhun jenahán. Achí yá:

Ni iin tu náchuhun iin pedazo sahma jéē núu iin sahma túhú. Chi núu súcuan te ndiyi pedazo jeē un, te tahndē gā jeē túhú un, te nducáñnu ga nuū catáhdé un. <sup>17</sup> Te suni tu cáchuhun vino jeē ini ñii túhú. Chi núu súcuan te ndatá ñii ún, te naa vino jíin ñii. Chi cánuú jéē chúhun i vino jeē ini ñii jéē, te súcuan te quéndōo vāha ndindúú. Achí yá.

**Jnūhun sēhe síhí Jairo jíin  
ñahan ní quehé yusáhma ya**

(Mr. 5.21-43; Lc. 8.40-56)

<sup>18</sup> Te níni cáhán Jesús táca jnūhun yáha, te iin tēe cújéñnu nuū ñayuu hebreo, ni quee de nuū yā. Te ni jecuiñi yití de nuū yā, te ni cahān de:

Sēhe síhí ná sá ní jihí i. Te núu na quhín yō soó ní ndaha ní siquī i, te natecu i. Achí de.

<sup>19</sup> Te ni ndocuiñi Jesús, te cuahān yā jíin de, te suni cuangoo tēe cáscuáha jíin yá. <sup>20</sup> Te mēñnu ñayuu cuangoo jíin yá ni quee iin ñahan, te je ni cuu uxí uū cuiyā ndóho ña cuehyī niñi. Te ni quee ña ichi yatá yā, te ni quehé ña yusáhma ya. <sup>21</sup> Chi ni jeni ni ña: Vēsú maá sahma ya na níhín rí quehé rí, te nduvāha ri, jéni ni ña. <sup>22</sup> Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje rō jéē cuu nasávāha ri rohó, te jeē yúcuan ní nduvāha ró, áchí yá.

Te ni nduvāha ña máá hora un.

<sup>23</sup> Te ná ni jinū Jesús vehe tēe cújéñnu ún, te ni jito ya nuū tēe cácuu músico jeē quíchindūji de i, jíin núu ñayuu cuehē, cásávaā i. <sup>24</sup> Te ni cahān yā jíin i:

Cujiyo jíināhan ró, chi sūchi síhí yáha, tu ní jíhí i chi quíxí-ni i, áchí yá.

Te ni cajecū catá i jeē ni cahān yā. <sup>25</sup> Te ni quenehen ya ñayuu cuehē ún, te ni quiví ya ini vehe. Te ni jñii ya ndaha

sūchi s̄hí ní jihī ún, te ni ndocuiñi-ni i. <sup>26</sup>Te ní región yūcuan ní jitē núu jñūhun jñiñu jéhnū ní sáha ya ún.

### Jeē ní nasávāha ya uū tēe cuáá

<sup>27</sup>Te ni quenda Jesús yūcuan cuáhān yā. Te uū tēe cuáá cuángoo de yatā yā, cácana jee de:

Máá ní jeē cúu ní Sēhe yucūn David, cundáhú ni ní sáña víi, achí de.

<sup>28</sup>Te ná ni jinū yā vehe, te ni jinūcoo tēe cuáá un núu yā. Te ni cahān yā jíin de:

¿A cácañdije ró jēe cúu nanune ri tinūu ró? achí yá.

Te ni cacahān de:

Cácañdije ná, achí de.

<sup>29</sup>Yūcuán na te ni tee ya ndaha ya tinūu de, te ni cahān yā:

Na sáha ri nájnūhun cácañdije ró, achí yá.

<sup>30</sup>Te ni cananune-ni tinūu de. Te Jesús ni cahān nihin ya jíin de:

Ma cáchi cuiti ró nuū ni iin, achí yá.

<sup>31</sup>Te máá de chí ni quendacoo de, te ni cajete-ni de jñūhun ní región yūcuan jēe súcuan ni sáha ya jíin de.

### Jeē ní nasávāha ya iin tēe ñhín

<sup>32</sup>Te nuū ní quendacoo tēe un cuángoo de, te ni quecoo ñayuu jíin iin tēe ñhín, jeē ñūhun tachī ini de. <sup>33</sup>Te ni quenehen ya tachī un cuáhān. Te tēe ñhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuiti yō ni iin jñiñu súcuan ini ñuu Israel, achí i.

<sup>34</sup>Te tēe grupo fariseo chí ni cacahān de:

Tēe yáha chí quenehen de tachī jíin fuerza máá jexeén jeē cujéhnū nuū tachī, achí de.

### Jeē cundáhú ni yā ñayuu cuehē

<sup>35</sup>Te ni jica cuu Jesús táca ñuu jíin rancho, te ni steén yā jñūhun ini táca

vehe i sinagoga. Te ni nacani ya jñūhun vāha ndese ndácu Yaā Dios jñiñu. Te ni nasávāha ya ñayuu cácuñu na-ni cuehyī cándoho i. <sup>36</sup>Te cundáhú ni yā jíto ya nuū ñayuu cuehē ún. Chí cándoho i te cácuñuhyá ni i, chí cácuu i nájnūhun lanchi jeē tú jitoho tī, chí tu ndícuñ i Yaā cúu Jitoho i. <sup>37</sup>Yūcuán na te ni cahān yā jíin tēe cácuñuáha jíin yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu. <sup>38</sup>Núu súcuan te cacān tahú ró nuū máá Jitoho ró Yaā Dios jeē na tájí yá cuehē tēe na quíngoo de cahnde de trigo, cúu jeē nacani de jñūhun ya nuū ñayuu. Achí yá.

### Jeē ní nacāji ya uxī uū tēe apóstol

(Mr 3.13-19; Lc. 6.12-16)

**10** Yūcuán na te ni cana ya uxī uū tēe jeē scuáha de jíin yá. Te ni jēhe ya poder nuū de jeē quenehen de tachī ini ñayuu, jíin jēe nasávāha de ñayuu cácuñu táca ndiñuñu cuehyī.

<sup>2</sup>Te yáha cúu s̄hví ndihúxí uū tēe apóstol un: Tēe iin cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan. <sup>3</sup>Yūcuán na te Felipe, Bartolomé, Tomás, Mateo tēe ni stútú xúhun renta, Jacobo sēhe Alfeo, jíin Lebeo jeē suni nání Tadeo, <sup>4</sup>jíin Simón tēe grupo cananista, jíin Judas Iscariote, tēe jeē ní nastúu de ya.

### Jeē ní tají yá ndihúxí uū de quinaçani de jñūhun

(Mr. 6.7-13; Lc. 9.1-6)

<sup>5</sup>Te ni tají Jesús ndihúxí uū tēe yáha jeē quíngoo de. Te ni ndacu ya jñiñu nuū de ndese sáha de:

Ma quíngoo ró núu ñayuu jeē násūu ñayuu hebreo cácuu i, ni ma quívicoo ró táca ñuu ñayuu Samaria. <sup>6</sup>Chí nuū máá-ni ñayuu nación yō Israel quíngoo ró, chí cácuu i nájnūhun lanchi jeē ní

sana. <sup>7</sup> Te jeē quíngoo ró te suhva nacani ró jnūhun: Je ni cuyajni Yaā ndeē andiví jeē ndacu ya jniñu nuū rō, achi rō. <sup>8</sup> Te nasávaha ró ñáyuu cándoho cuehyī stehyú jín ñáyuu cándoho tāca gá cuehyī, te nastécu rō ndíyī te quenehen ró táchi ini ñayuu. Te súcuan-ni ni jēhe ri poder nuū rō jeē sáha ró, te suni súcuan-ni sáha ró jín i.

<sup>9</sup> Te ma cóndiso ró xúhun oro, ni xúhun plata, ni centavo cuechí. <sup>10</sup> Ni ma cóndiso ró ñunu stáa caji rō ichi, ni inga camisa, ni ndijēn, ni vara. Chi siquī jniñu jeē nácani ró jnūhun nuū ñáyuu, te cánuú coto i rōhó.

<sup>11</sup> Te na-ni ñuu chí rancho núu ni jinū-coo ró, te yūcuán nducú ró ñin ñayuu vāha, te coyūcu ró vehe i nde quingoo tucu ró. <sup>12</sup> Te jeē quívi ró vehe ñayuu ún, te cahān rō jeē na quíji jnūhun ndeyí jnūhun sī ni nuū i. <sup>13</sup> Te núu ñayuu vāha cácuu i, te jnūhun ndeyí ní cahān rō quendōo siquī i. Te núu nasūu ñáyuu vāha cácuu i, te jnūhun ndeyí ní cahān rō ma quéndōo siquī i. <sup>14</sup> Te núu iyó ñáyuu jeē tu cájetáhú i rōhó, ni tu cúní i cuni nahín i jnūhun cahān rō, yūcuán na te quendacoo ró vehe un chí ñuu ún, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i. <sup>15</sup> Jendaá cahán rī jín ró jeē quiví juicio te xeēn gā coo castigo siquī ñuu casáha súcuan vēsú siquī ñuu Sodoma jín ñuu Gomorra nuū ní casáha ndasí ñáyuu cuéchi.

### Jeē coto xeēn ñayuu de jínáhan de

<sup>16</sup> Cuni sōho ró, chi tájí rí rohó quíngoo ró nájñuhun lanchi mēhñu yñī. Núu súcuan te coo listo rō nájñuhun coō, te coo vitá ni rō nájñuhun paloma. <sup>17</sup> Te condito ró máa ró nuū ñáyuu, chi quee quiví jeē quíndeca i rōhó núu tohó, te cani i rōhó ini tāca vehe ñi sinagoga. <sup>18</sup> Te suni nde nuū tāca gobernador jín rey quíndeca i rōhó jéē siquí ruhū. Te súcuan

te nune ichi jeē nacani ndaā rō jnūhun ri nuū de jín núu ñáyuu tāca nación jeē tu jín jnūhun Yaā Dios. <sup>19</sup> Te núu ni jendeca i rōhó núu tāca tée ún, ma nácani ndasí ni rō ndese cahān rō. Chi máa hora un te máa yá steén nuū rō ndese cahān rō. <sup>20</sup> Chi nasūu máa ró cúu jeē cahán, chi Espíritu máa Tátá rō cúu jeē cahán jín yuhu ró.

<sup>21</sup> Te sava ñayuu tu cácadíje, nastúu i ñani i jeē na cúu. Te tátá nastúu sēhe. Te sēhe ndonda siquí tatá jín náná jeē na cúu. <sup>22</sup> Te ndíhi ñayuu quití ni i nuū rō jeē siquí ruhū. Te ñayuu jeē cuiñi ñihin nde jeē jínu jnūndóho, ñayuu ún chi cācu ánuá i. <sup>23</sup> Te núu cájito xeēn i rōhó ñin ñuu, te cunu ró quíhñ rō inga ñuu. Chi jendaá cahán rī jín ró jeē ma ndécāva ró caca cuu ró ndíhi nación yō Israel te ndiji-ni máa rí, Yaā ní nduu tēe.

<sup>24</sup> ñin tēe scuáha, tu cújéñnu de nuū maestro de. Ni tēe cúu mozo, tu cújéñnu de nuū patrón de. <sup>25</sup> Tēe scuáha chi nájñuhun ndóho maestro de suni súcuan ndoho nahín máa de, te tēe cúu mozo suni ndoho de nájñuhun ndóho patrón de. Núu súcuan te núu ruhū cácahān i jeē Satanás cúu ri, te nagā ni cuu jeē ma cahán i jeē rohó cácuu Satanás.

### Jeē ní cachi yā ndé ñin cúu jeē yūhu yó (Lc. 12.2-9)

<sup>26</sup> Núu súcuan te ma yūhu ró coto ró ñáyuu. Chi tāca jnūhun cácahān sáhi i ma quéndōo sáhi cuítí, chi ndíhi natūu ndijín, te cuni ñayuu. <sup>27</sup> Jnūhun ní cahān rī jín ró jeē tu ní jín ñayuu, na nácastūhun cájí ró nuū i. Te jnūhun ní nacani sáhi rí nuū rō, na nácani jee ró yátá tāca vehe. <sup>28</sup> Te ma yūhu ró coto ró ñáyuu cahni yiquí cúñu rō, chi ma cúu cahni i ánuá rō. Chi sa suhva yūhu ró jéē ma ství ró núu Yaā Dios, chi cuu snáhnú ndetū yā rohó jéē quiví ánuá rō jín yiquí cúñu rō infierno.

<sup>29</sup>Te tācá saa chi tú yahu ndéé tī, chi nde uū tī jeē iin centavo lulí. Te ni iin tī tu nńnga nuū nńhun te núu tu jéhe Tátá rō jnńhun, chi ndíto ya tī. <sup>30</sup>Te nagā ni cuu rōhó jńńáhan rō, chi nde ndíhi ixi xíní rō je ni cahu ya. <sup>31</sup>Núu súcuan te ma yūhu rō jńńáhan rō, chi cánuú ndasí gá rō nuū yā vēsú cuehē tācá saa.

**Ñayuu jejnńhún Jesucristo  
nuū inga ñayuu**

(Lc. 12.8-9)

<sup>32</sup>Te tāca ñayuu jeē cuajńńhún rńhū nuū inga ñayuu, suni súcuan cuajńńhún rí i nuū Tatá rí, Yaā ndeé andíví. <sup>33</sup>Te tāca ñayuu jeē ma cuajńńhún rńhū nuū inga ñayuu, suni súcuan ma cuajńńhún rí i nuū Tatá rí, Yaā ndeé andíví.

**Jeē siquí Jesús te cusńin ini ñayuu**

(Lc. 12.51-53; 14.26-27)

<sup>34</sup>Ma cáni ni rō jńńáhan rō jéé véji ri jeē cóyūcu mání ñayuu ñayíví. Tú vēji ri jeē cóyūcu mání ñayuu, chi sa suhva cuajńńáhan i jeē siquí ruhū. <sup>35</sup>Chi jeē siquí ruhū te cusńin ini sēhe yń jńń tátá, te sēhe sńhí jńń náná, te sēhe jēnu jńń náná chísó. <sup>36</sup>Chi tāca ñayuu candńje ruhū, chi jńáhan vehe i cúu jeē quití ni nuū i.

<sup>37</sup>Te núu ndé iin ñayuu maní gā i jńń tátá i chí jńń náná i vēsú jńń rńhū, nasūu ñayuu vāha cúu i jeē cóndiquín i ruhū. Te núu ndé iin ñayuu maní gā i jńń sēhe yń i chí jńń sēhe sńhí i vēsú jńń rńhū, te suni nasūu ñayuu vāha cúu i jeē cóndiquín i ruhū. <sup>38</sup>Te na-ni ñayuu núu tu jéhe i jnńhun ndoho i jnńndóho vēsú nde cuu i jeē siquí jeē cóndiquín i ruhū, nasūu ñayuu vāha cúu i jeē cóndiquín i ruhū. <sup>39</sup>Te núu ndé ñayuu cúní i cācu i nuū jńńndóho quiji nuū i jeē siquí ruhū, núu súcuan te jnahnū ndetū i nń cáni. Te núu ndé iin ñayuu vēsú na cúu i jeē siquí ruhū, te cotecu i nń cáni.

**Jeē iyó táhū yō nuū Yaā Dios**

(Mr. 9.41)

<sup>40</sup>Te ñayuu cuatáhú rōhó jńńáhan rō, núu súcuan te ruhū cájetáhú i. Te ñayuu cájetáhú rńhū, cájetáhú i Yaā ní tají rńhū vēji ri. <sup>41</sup>Núu na-ni ñayuu cuatáhú i iin tēe nácani jnńhun Yaā Dios, siquí jeē jíca de jnińu Yaā Dios, núu súcuan te inuú-ni coo tahū de nuū Yaā Dios jíin tēe nácani jnńhun Yaā Dios. Te núu na-ni ñayuu cuatáhú i iin tēe ndaā, siquí jeē tēe ndaā cúu de, núu súcuan te inuú-ni coo tahū de nuū Yaā Dios jíin tēe ndaā. <sup>42</sup>Te núu ndé ñayuu cuāha i vēsú iin ñajin ndute mńjin coho iin sūchi yáha, siquí jeē cúu i sūchi cándńje ruhū, ndaā ndije cúu jeē nihín i tahū i. Achí yá.

**Jeē ní tají Juan uū tēe nuū yā**

(Lc. 7.18-35)

**11** Te ná ni jinu ni ndacu Jesús jnińu nuū ndihúxí uū tēe cáscuáha jíin yá, te ni quenda ya yūcuan cuáhān yā jeē steén yā te nacani ya jnńhun tācá nńu región yūcuán.

<sup>2</sup>Te íne Juan vecāa. Te ni nihín de jnńhun tācá jnińu sáha Cristo. Te ni tají de uū tēe cáscuáha jíin de, <sup>3</sup>cuacajńńhún de ya:

¿A máá ní cúu Cristo jeē achí tutu jeē quńji, chí condetu yó inga tēe quiji? áchí de.

<sup>4</sup>Te ni cahān yā jíin de:

Cuángoo te castńhun rō nuū Juan tācá jnińu cájito rō jíin jńńhun cájini rō. <sup>5</sup>Te cachi rō nuū de jeē ñayuu cuaá cánanune tinūú i, te ñayuu yacuí cánacaca i, te ñayuu ndóho cuehyí stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnńhun nuū ñayuu ndahú jéé jnama Yaā Dios i. <sup>6</sup>Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

<sup>7</sup>Te náa cuanuhun ndíndúú tée ún, te ni quejéé Jesús cahán yā jnūhun Juan jíín ñáyuu:

¿Na vé ni jécondēhe ró jijnáhan ró nde nuū ñūhun téhé? ¿A iin tēe jéni iin jéni uū ni, nájnūhun ite jeē cánda sáha tachí? <sup>8</sup>Te núu tuú, ¿te na vé ni jécondēhe ró núu súcuan? ¿A iin tēe cúní cujéhu jeē ñūhun sahma lúu? Tuú chi cájini rō jeē tēe cáñuhun sahma lúu, máni ini vehe rey cáyucú de. <sup>9</sup>¿Te na vé ni jécondēhe ró núu súcuan? ¿A iin tēe nácani jnūhun Yaā Dios? Cáhán rī jíín rō jeē suu ni jecondēhe ró, te cújéhu ga Juan yáha vēsú tāca gá tēe ni canacani jnūhun Yaā Dios. <sup>10</sup>Chi jnūhun Juan cúu jeē ni cáhān Yaā Dios jeē yosó núu tútu ii:

Tají rí tēe nacani jnūhun ri cosnūú de ichi núu Cristo,

návāha coo tūhva ñayuu jeē jíínú yā.

Achí Yaā Dios, achí tutu. <sup>11</sup>Te jendaá cahán rī jíín rō jeē ini ñayívi yáha cújéhu ga Juan tēe scuándute vēsú tāca gá tēe jeē ni íyo ini ñayívi. Te vēsú súcuan te tāca tēe núu ga ini ñuu nuū ndácu Yaā andívi jniñu, cújéhu ga de vēsú Juan.

<sup>12</sup>Te nde quiví ní quee Juan tēe scuándute, te nde vijna, chí cánducú ndéyí ñáyuu quívicoo i ndaha Yaā andívi jéē ndácu ya jniñu nuū i. Te nde ñayuu xeēn cánducú ndéyí i siquí. <sup>13</sup>Chi nde ná tu quiji Juan, te ni iyo máá ley Moisés, te suni ni iyo tāca tēe ni canacani jnūhun Yaā Dios. Te ni cacastūhún de ndese coo jeē ndacu Yaā Dios jniñu. <sup>14</sup>Te ni cacahān de jeē ndíji Elías. Te núu cácuni rō cuatáhú ró jnūhun, te jííní rō jeē maá Juan cúu tēe jeē ní cachi tutu jeē quíji, chí cúu de nájnūhun Elías. <sup>15</sup>Tāca róhó jéé jííní sōho, na chúsóhó ró.

<sup>16</sup>Yāhá cachi rī iin jnūhun yátá návāha na cúní rō ndese cúu ñayuu tiempo vijna. Cúu i nájnūhun sūchi lúli cáhiin nuū yáhu cácasíquí i. Te cácana

ndee i xiní jnáhan i: <sup>17</sup>Ni catívi rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájnūhun cándāa sūchi lúli un jéé tu ní nújnahan ni i ni iin, súcuan cándāa ró. <sup>18</sup>Chi ni quiji Juan te cuehē jínu ni íyo ndite ni de, tu ní yéji de ni tu ní jíhi de. Te tu ní cánujnahan ni rō, chí ni cacahān rō jeē ñūhun tachí ini de. <sup>19</sup>Yūcuán na te ni quee maá rí, Yaā ní nduu tēe, te yéji rī jíhi ri, te tu cánujnahan ni rō, te chí sóo jnūhun ró cácahān rō jeē máni máá jéé yéji rī jíhi ri vino. Te quíjnahan ri jíín tēe cástútú xūhun renta jíín táca gá tēe cása ha cuēchi, achí ró. Te núu cúndichí iin tēe jíín jnūhun Yaā Dios, te jíín jniñu sáha de te nátuu jeē tēe ndíchi cúu de. Achí yá.

### Jeē ní cuxeēn yā nuū sava ñuu nihni ni

(Lc. 10.13-15)

<sup>20</sup>Yūcuán na te ni quejéé yá cúxeēn yā nuū tācá ñuu nuū ni sáha ya cuehē jniñu jéhu, chí tu ní cáncani ni i jeē stóo i cuēchi i. Te ni cahān yā:

<sup>21</sup>Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chí núu ini ñuu Tiro jíín ñuu Sidón ni sáha ri jniñu jéhu jeē ni sáha ri ini ñuu maá ró, te yachí nacani ni ñayuu ñuu un jéé stóo i cuēchi i núu. Te sáha i seña jeē steén jeē nácani ni i siquí cuēchi i, chí cūhun i sahma jnúú te chuhun i yaā xiní i núu. <sup>22</sup>Núu súcuan te cáhán rī jíín rō jeē quiví coo juicio te xeēn gā coo castigo siquí rō jijnáhan ró vēsú jeē ni íyo siquí ñuu Tiro jíín ñuu Sidón. <sup>23</sup>Te róhó ñáyuu ñuu Capernaum, ¿á cájini ni rō jeē cujéhu ró nájnūhun iin jeē cáa cuahān ichi andívi? Tuú chí sa nanuu ró ndé lugar nuū cáyūcu ánuá ndíyi. Chí núu ini ñuu Sodoma ni sáha ri jniñu jéhu jeē ni sáha ri nuū maá ró, te coo ñuu yúcuan ndé vijna núu. <sup>24</sup>Núu súcuan te cáhán rī jíín rō jeē quiví coo

juicio te xeēn gā coo castigo siquī rō vēsú jeē ni íyo siquī ñáyuu ñuu Sodoma. Achí yá.

### Nehen nuū rī ndetātu rō, achí yá

(Lc. 10.21-22)

<sup>25</sup> Te suni quivī un ní cahān Jesús:

Na cútahū na núū ni Tátā, Jitoho andiví jíin ñáyiví. Chi ni jesi ní táca jnúhun ndíchí ní, jeē ma cúní ñayuu ndichí jíin ñáyuu tūhva cuenta ñayiví yáha. Te ni steén ni núū ñáyuu cácuu nájnūhun sūchi lúlí. <sup>26</sup> Chi súcuan ni nu-jnahan ni ni Tátā, achí yá.

<sup>27</sup> Te ni cahān gā yā:

Ndivii ni jēhe Tátá rī nuū rī. Te tu cājini ñayuu ndé iin cúu ruhū, Sēhe Yaā Dios, chi máá-ni Tátá rī cúu jeē jiní yā ruhū. Ni tu cājini ñayuu ndese Yaā cúu máá Tátá, chi máá-ni Sēhe cúu jeē jiní. Te íyo ñáyuu jeē cúní máá Sēhe stéén yā nuū i ndese Yaā cúu Tátá yā, te máá i suni cuni i. <sup>28</sup> Táca rō jéē ni cuíta rō jíin táca jniñu jíin ley jeē yí sáha jíin rō, nehen quivicoo rō ndaha ri, te ndetātu rō sáha ri. <sup>29</sup> Quiví rō núū jniñu ndácu máá rí, te scuáha rō coo rō nájnūhun íyo máá rí. Chi vitá ni rī te suchí ni rī. Te súcuan te ndetātu rō jíin ánuá rō sáha ri. <sup>30</sup> Chi tú yí jéē cuandetū rō nuū rī, ni tú yí jéē squícu rō jniñu ndácu ri. Achí yá.

### Jeē ní cataxín de yoco trigo quivī ndetátú

(Mr. 2.23-28; Lc. 6.1-5)

**12** Te iin quivī ndetātu ní yáha Jesús cuahān yā nuū cáa trigo. Te tēe cáscuáha jíin yá, cājii de sōco. Te ni quejéé de cátaxín de yoco trigo cáyeji de. <sup>2</sup> Te ni cajito tēe grupo fariseo, te ni cacahān de jíin yá:

Condēhé, chi tēe cáscuáha jíin rō casáha de jniñu jeē tu íyo váha sáha yó quivī ndetátú, achí ley Moisés.

<sup>3</sup> Te ni cahān máá yá jíin de:

¿A tu ní cácahu rō tutu ndese ni sáha David, iin quivī jeē ni jíi de sōco jíin tēe cáhiin jíin de? <sup>4</sup> Te ni quiví de ini vehe Yaā Dios. Te ni yeji de pan iī jeē yosó ndijin nuū Yaā Dios. Te tú na ley jeē cáji de, ni tēe cáhiin jíin de, chi máá-ni sutū cuu caji. Te vēsú súcuan te tú na cuēchi ní íyo siquī de. <sup>5</sup> ¿Te á tu ní cácahu rō tutu ley Moisés, ndese casájniñu sutū ini templo, vēsú quivī ndetātu cúu? Te tú na cuēchi íyo síquī de, vēsú quivī ndetātu casájniñu de jniñu jeē cácuu de sutū. <sup>6</sup> Te cáhán ri jíin rō jeē máá rí jeē íyo yáha, cújéhnu ga rī vēsú templo. <sup>7</sup> Te tu cájecūhun ni rō jijnáhan rō jnúhun yáha jeē yosó núū tútu iī jeē ni cahān Yaā Dios: Jeē cuní gā rī cúu jeē cundáhú ni rō jnáhan rō, vēsú jeē socó rō quiti nuū rī, achí yá. Te núu jeē ní cajecūhun ni rō jnúhun yáha, te ma cahán rō súcuan siquī tēe jeē tú na cuēchi núu. <sup>8</sup> Chi ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quiví ndetátú, achí yá.

### Jeē ní nduváha tēe ni ichi ndaha

(Mr. 3.1-6; Lc. 6.6-11)

<sup>9</sup> Yūcuán na te cuahān Jesús, te ni quiví ya ini vehe iī sinagoga. <sup>10</sup> Te yūcuán íne iin tēe ni ichi iin ndaha de. Te cácu ni tēe grupo fariseo jeē nihin de cuēchi siquí yā, te ni cacajnūhún de ya:

¿A íyo ley jeē cuu nasávaha yó ñayuu cūhú quiví ndetátú? achí de.

<sup>11</sup> Te ni cahān yā jíin de:

¿Ndé iin rōhó, núu névaha rō iin lanchi, te núu nínga tí ini iin yaū quiví ndetátú, te á tu jéhén rō natava rō tí, chí naún? <sup>12</sup> ¿Te á tu cánuú ndasí gá iin tēe vēsú iin lanchi? Núu súcuan te vetū-ni sáha yó jniñu váha quiví ndetátú, achí yá.

<sup>13</sup> Yūcuán na te ni cahān yā jíin tēe ni ichi ndaha ún:

Scáá ndaha rō.

Te ni scaá de, te ni nduvāha-ni nájñuhun íyó inga. <sup>14</sup>Yūcuán na te ni quendacoo tēe grupo fariseo, te ni candajñuhún de siquī Jesús, ndese cahni de ya.

### **Jñuhun Jesús jeē ni cáhān Isaías nde jenahán**

<sup>15</sup>Te ni jini Jesús jeē súcuan cájeni ni de, te ni quenda ya yūcuan cuáhān yā. Te cuehē ñayuu cándiquin i ya. Te ni nasávāha ya ndihi ñayuu cuhú. <sup>16</sup>Te ni ndacu ya jniñu nuū i jeē ma stéén i ya. <sup>17</sup>Te súcuan ni cuu návāha squícu jñuhun ni cahān Yaā Dios siquī Jesús, te ni nacani Isaías jñuhun ya un ndé jenahán:

<sup>18</sup>Yāha cúu mozo rī jeē ní nacāji ri, te manī rī jíin yá, te cúsiñi ni rī jíin yá. Te cuāha ri Espírítu rī coo jíin yá. Te máá yá sándaā jniñu ñayuu tācá nación.

<sup>19</sup>Ma tejnáhan ya, ni ma cána jee ya, te ni ma cahán jee ya ichi jeē cúni ñayuu.

<sup>20</sup>Ma sáha xeēn yā jíin ñayuu ni cunihin jñundóho siquī, ni ma snāā yā ñayuu jeē maá lulí-ni cácandíje.

Chi kujéñnu ya siquī ndihi, te ndaā ndacu ya jniñu.

<sup>21</sup>Te ñayuu tācá nación cocuhun ni i jeē jnáma ya i.

Achí Yaā Dios, achí Isaías nde jenahán.

### **Jeē ní cacahān de jeē jejníñu ya fuerza Satanás**

(Mr. 3.19-30; Lc. 11.14-23; 12.10)

<sup>22</sup>Yūcuán na te ni caquindeca i nuū yā iin tēe cuáá ñíhín, chí ñuhun tachī ini de. Te ni nasávāha ya de. Te ni ndundi-jin tinūú de te ni nacahān de. <sup>23</sup>Te ndihi ñayuu cuehē un ní canaa ni i cájito i, te ni cacahān i:

¿A tēe yāha cúu jeē ni cáhān Yaā Dios jeē cacu nuū yucūn David? áchí i.

<sup>24</sup>Te tēe grupo fariseo, ni cajini de jeē súcuan cácahān i. Te ni cacahān de:

Tēe yāha ma cúu quenehen de tachī núu jeē tu sáha de jíin fuerza Satanás jeē kujéñnu nuū tachí, áchí de.

<sup>25</sup>Te Jesús ni jini yā jeē súcuan cájeni ni de, te ni cahān yā jíin de:

Tācá nación jeē casásñin máá te cá-jejnáhan máá, núu súcuan te snāā jeē iyó váha máá. Te núu iin ñuu chí iin vehe casásñin máá te cájejnáhan máá, te ma cúu ga coyūcu cáhnu. <sup>26</sup>Te suni súcuan Satanás núu quenehen jnáhan tachí, núu súcuan te sásñin máá. ¿Te ndese cuiñi ñihin Satanás jeē ndácu jniñu núu súcuan? <sup>27</sup>Chi cácahān rō jeē jíin fuerza Satanás quenehen ri tachí. Te núu súcuan cúu núú, te ñayuu cascuáha jíin máá rō jijnáhan rō, ¿na jíin fuerza cáquenehen máá i tachí, cájeni ni rō? Núu súcuan te máá i jijnáhan i cachi jeē ní castívi ndasí suhva rō ni cacahān rō jeē cáquenehen ri tachí jíin fuerza Satanás. <sup>28</sup>Te tuú chí sa jíin Espírítu Yaā Dios cúu jeē quenehen ri tachí. Núu súcuan te je ndéé Yaā Dios mēhñu rō jeē ndácu ya jniñu.

<sup>29</sup>¿Chi ndese cuu quívi iin tēe ini vehe tēe ndacuí jeē quenehen de ndajñíñu de? Chi cánuú jeē xíhna gā cuhni de tēe ndacuí ún, te yūcuán na te cuu quenehen de ndajñíñu ún. Te suni súcuan cúu jeē jíhni rī Satanás te quenehen ri tachí.

<sup>30</sup>Te ñayuu tu íyó maní jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vejicoo nuū rī.

<sup>31</sup>Jeē yúcuán cáhān rī jíin rō: Iyó modo coo jñuhun cáhnu ni nuū tāca cuéchi casáha ñayuu, jíin núu tāca jñuhun néé cácahān i. Te núu cahān ndevāha i siquī Espírítu Santo, te ma cóne cáhnu ni Yaā Dios nuū i. <sup>32</sup>Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquī

Espíritu Santo, ma cóne cáhnu ni Yaā Dios nuū i, ni jeē iyó i ñayīvi yáha, ni ní tiempo quíji.

### **Jnūhun yujnu váha jíin yujnu néé**

(Lc. 6.43-45)

<sup>33</sup> Núu yujnu váha, te vāha ndehē, te núu yujnu néé, te cánéé ndehē. Chi jíin ndéhē te jíní yō ndese yujnu cúu. Te suni súcuan ñayuu. <sup>34</sup> Va sēhe coō cácuu ró, chi xeēn rō nájñūhun coō. ¿Ndese cuu cahān rō jñūhun vāha, chi ñayuu casáha néé cácuu ró? Chi jniñu jeē jéni ni anuá ñayuu, máni yūcuan cáhán i. <sup>35</sup> Tēe vāha cáhán de jñūhun vāha, chi íyó ndáa anuá de. Te tēe sáha néé cáhán de jñūhun néé, chi cánéé ánuá de. <sup>36</sup> Te cáhán rī jíin ró jeē tācá na-ni jñūhun cácahān ñayuu, nacuāha i cuenta jñūhun un quívī coo juicio. <sup>37</sup> Chi jíin jñūhun ni cahān rō sándaā yā siquī rō, núu jeē quéndōo ndaā rō chí jéé cóndee cuēchi siquī rō. Achí yá.

### **Jeē ní cajicān ñayuu tu cácaandíje iin jniñu jéhnu**

(Mr. 8.12; Lc. 11.29-32)

<sup>38</sup> Yūcuán na te jecu tēe grupo fariseo jíin tēe cástéén tutu ley Yaā Dios, ni cacahān de jíin yá:

Maestro, cácuuni na jéé sáha ní iin jniñu jéhnu jeē steén núu máá ní cúu Yaā ní tají Yaā Dios, achí de.

<sup>39</sup> Te ni cahān yā jíin de:

Ñayuu yáha jeē casáha jniñu néé, tu cájetáhú cuití i Yaā Dios. Te cájicān i iin jniñu jéhnu jeē steén núu Yaā ní tají Yaā Dios cúu ri. Te tuá na inga jniñu jéhnu stéén rī nuū i, chi máá-ni jniñu jéhnu nájñūhun ni cuu jíin Jonás, tēe ni nacani jñūhun Yaā Dios. <sup>40</sup> Chi nájñūhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone ri chíji ñuhun unī nduú unī ñuú, te sáá te natecu rī. <sup>41</sup> Te tāca ñayuu ñuu Nínive nuū ní nacani Jonás jñūhun, natecu i jíin ñayuu tiempo

yáha, quívī juicio jeē sándaā yā cuēchi, te cahān i cuēchi siquī ñayuu yáha. Chi máá i ni canacani ni i ni castóo i cuēchi i quívī ní nacani Jonás jñūhun nuū i. Te vijna chi cújéhnu ga ruhū Yaā íne yāhá vēsú Jonás, te tu cácaandíje ró rúhū.

<sup>42</sup> Te reina jeē ní cujéhnu nación ichi sur, natecu ña jíin ñayuu tiempo yáha, quívī juicio jeē sándaā yā cuēchi, te cahān ña cuēchi siquī i. Chi nde jicá téyí ní quiji ña ni jini nahín ña jñūhun ndíchí ní cahān rey Salomón. Te vijna chi cújéhnu ga ruhū, Yaā íne yāhá vēsú Salomón, te tu cácaandíje ró rúhū.

### **Tachī jeē nastútú jnáhan ndívi ini ñayuu**

(Lc. 11.24-26)

<sup>43</sup> Núu ni quenda iin tachī ini iin tēe tu cándíje, te jíca cuu nuū ñūhun téhé, ndúcú núu ndétátú, te tu níhín, yūcuán na te jéni ni maá: <sup>44</sup> Na quínuhun rī vehe nuū ní quenda ri. Te núu ni ndee tucu, te jíto jeē tēe tu cándíje ún, cúu de nájñūhun iin vehe íyú te ni ndundoo.

<sup>45</sup> Yūcuán na te jéquiin uxā gā tachī neé gá vēsú maá. Te quívicoo ini tēe un jéé cóyūcu yūcuan. Núu súcuan te xeēn gā ndoho tēe un jéé sándíhí vēsú jeē xíhna ñūhún. Te suni súcuan ndoho ñayuu tiempo yáha jeē casáha néé. Achí yá.

### **Náná yā jíin ñani yā**

(Mr. 3.31-35; Lc. 8.19-21)

<sup>46</sup> Te níni súcuan cáhán yā jíin ñayuu ún, te ni quee naná yā jíin táca ñani yā, iin ña nuū quéhe, te cúní ña cahān ña jíin yá. <sup>47</sup> Te ni cachi iin tēe nuū yā:

Náná ni jíin táca ñani ni cáhiin nuū quéhe, te cácuuni cahān jíin ní, achí de.

<sup>48</sup> Te ni cahān yā jíin tēe ni cahān súcuan jíin yá:

¿Ndé iin cúu náná rī, te ndé iin cácuu ñani rī? Achí yá.



<sup>49</sup>Te ni steén ndaha yá nde nuū cáyūcu tée cáscuáha jíin yá. Te ni cahān yā:

Suni náná rī jíin ñani rī cácuu tāca jéē yáha. <sup>50</sup>Chi tāca ñayuu casquícu jniñu cúní maá Tátá rī, Yaā ndeé andiví, suu cácuu ñani rī, cuāha rī, náná rī. Achí yá.

### **Jnūhun yátá síquī tēe jéte trigo**

(Mr. 4.1-9; Lc. 8.4-8)

**13** Te quivī un ní quenda Jesús vehe cuahān yā, te ni jinū yā ni cucōo ya yumar. <sup>2</sup>Te ni cutútú cuéhē ndasí ñayuu nuū yā. Te ni quīvi ya ini ñin barco, ni cucōo ya. Te tāca ñayuu un cáyūcú i yumar. <sup>3</sup>Te jíin jnūhun yátá ni cahān yā cuehē jnūhun nuū i, te súcuan ni cahān yā:

Ñin tēe cate trigo, ni quenda de jeē cáte de. <sup>4</sup>Te ná ni quejéé de jéte de, te jecu trigo ni jité yuhíchi. Te ni quecoo saa, ni cayejí tī. <sup>5</sup>Te jecu gā trigo ni jité nuū ñūhun yuū, nuū tú cuehē ñūhun. Te yachī-ni ni cane, chi tu cóquin ñūhun. <sup>6</sup>Te nuū ní cane niāndii, te ni ichī-ni, te ni casun, chi tu ní níhín nuū quihín yoho. <sup>7</sup>Te jecu gā trigo ni jité nuū náne iñu. Te ni jehnu iñu ún, te ni jesí nuū. <sup>8</sup>Te jecu ni jité nuū ñūhun váha, te ni jēhe cuehē nunī. Sava ni jēhe ciento jeē ñin ñin, te sava ni jēhe uní xico, te sava ga ni jēhe ocó uxí. <sup>9</sup>Tāca róhó jéē jíni sōho, na chúsóhó ró. Achí yá.

### **Najehē cahán yā mání jnūhun yátá**

(Mr. 4.10-12; Lc. 8.9-10)

<sup>10</sup>Yūcuán na te tēe cáscuáha jíin yá un ní quecoo de nde nuū yā, te ni cajnūhún de ya:

¿Najehē cúu jeē mání jnūhun yátá cáhán ni jíin ñayuu? achí de.

<sup>11</sup>Te ni cahān yā jíin de:

Róhó jíináhan ró chi sáha ya jeē cá-jecūhun ni rō jnūhun ni yisāhi yáha, ndese quívicoo ñayuu ndaha Yaā andiví jeē ndacu ya jniñu nuū i. Te ñayuu yáha

jéē tu cáscandíje, chi ma jécūhun ni i.

<sup>12</sup>Chi ñayuu je jécūhun ni, chi steén gā yā nuū i, te víhyá gā cuni i. Te ñayuu tu cándíje, sa suhva naa jecu jeē je jíin i ún. <sup>13</sup>Jeē yúcuan cáhán rī jnūhun yátá jíin i. Chi vésú cájito i, te quendōo i nájñūhun jeē tú na vé ni cájito i. Te vésú cájini sōho i, te ma jécūhun ni i, te quendōo i nájñūhun jeē tú na vé ni cájini i. <sup>14</sup>Ñayuu yáha chi squícu síquī i jnūhun ni cahān Yaā Dios jeē ní nacani Isaías, tēe ni nacani jnūhun nde jenhán: Vésú cuni nahín ró, te ma jécūhun ni rō, te vésú coto ró, te ma nácuni rō.

<sup>15</sup>Chi ñayuu yáha yōhoyo ni ndunihni ni

i,  
te yōhoyo uhū chusóhó i,  
te nájñūhun cájesi i tinūú i,  
návāha coo nájñūhun jeē tu cájito i,  
ni tu cájini nahín i,  
te ni ma jécūhun ni i,  
ni ma násāma ini i quívicoo i nuū rī  
jeē nasávāha ri anuá i nuū cuéchi i.  
Achí Yaā Dios, achí tutu.

<sup>16</sup>Te máá ró jíináhan ró, yōhoyo ndetū rō, chi cájito ró jíin tñūu ró, te cájini nahín ró jíin sóho ró. <sup>17</sup>Chi jendaá cahán rī jíin ró jeē cuehē tēe ni canacani jnūhun Yaā Dios jíin cuehē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sóho de jeē cájini sóho máá ró, te tu ní cájini de. Achí yá.

### **Jeē ní castūhun cájí yá jnūhun yátá tēe jéte trigo**

(Mr. 4.13-20; Lc. 8.11-15)

<sup>18</sup>Núu súcuan te cuni nahín jíináhan ró na vé cuni cahān jnūhun yátá tēe jéte trigo: Trigo un cúu jnūhun Yaā Dios. <sup>19</sup>Te ñayuu cájini sōho jnūhun ndese ndácu Yaā andiví jniñu, núu tu cá-jecūhun ni i te cácuu i nájñūhun trigo jeē ni jité yuhíchi. Yūcuán na te quíji jexeén te quēnde-ni jnūhun ini anuá i. <sup>20</sup>Te trigo jeē ni jité nuū ñūhun yuū cúu

nájñuhun ñayuu cájini sōho jñuhun, te yachi-ni cájetáhú i te cácusih ni i jíin. <sup>21</sup> Te tu cúcutú jñuhun ún ini anuá i, te jecu-ni quiví cájetáhú i. Te núu ni quejéé jñúndóho, chí jíto xeēn ñayuu i síquī jñuhun ún, te quejéé nácani yátá ni i. <sup>22</sup> Te jeē ni jíte nuū náne iñu cúu ñayuu cájini nahín jñuhun, te cándihví ni i síquī jeē iyó ini ñayiví yáha, te cúní i cucucá i, te stáhu un i cujneñu i jíin. Te ndihi jeē yáha Jesús nuū jñuhun ya, te tu fje i jíin jñuhun ya. <sup>23</sup> Te trigo jeē ni jíte nuū ñuhun váha cúu nájñuhun ñayuu cájini nahín jñuhun, te cájecūhun ni i, te cáhije i jíin jñuhun ya. Te sava i cúu nájñuhun numí jeē jéhe ciento jeē iin iin, te sava ga i jéhe uní xico, te sava ga i jéhe ocō uxí. Achí yá.

### **Jñuhun yátá síquī ite lasú**

<sup>24</sup> Te ni cahān yā inga jñuhun yátá jíin de:

Jeē ndácu Yaā andiví jniñu cúu nájñuhun iin tēe jeē ní jete de trigo váha nuū ñuhun de. <sup>25</sup> Te iyó iin tēe jíto uhū de tēe chíí trigo. Te náa cáquixí tēe chíí trigo jíin táca jñáhan de, te ni jehēn ni jete ndiquín lású nuū trigo de, te cuahān. <sup>26</sup> Te nuū ní cane trigo ún, te ni cane yoco i, te suni súcuan ni jehnu ite lasú un. <sup>27</sup> Yūcuán na te ni jengoo mozo ni cacahān i jíin patrón i: ¿A násūu trigo váha ní jéte ní núu ñuhun ní? ¿Te ndese cúu jeē ní canecoo ite lasú nuū? <sup>28</sup> Te ni cahān de jíin i: Iñ tēe jíto uhū ruhū ni sáha jeē yáha. Te ni cacahān mozo un jíin de: ¿Núu súcuan te á cúní ni jēe na quíngoo ná te jñuhun ná? áchí i. <sup>29</sup> Te ni cahān de: Tuú, chí núu jñuhun ró lású un te sanaa te jñuhun ró ndé jíin trigo. <sup>30</sup> Váha ga na cuéñnu máá ndé quiví tahndé. Te quiví un cáhān rí jíin tēe cahnde jeē xihna gā ite lasú cahnde de, te chucú tútú de návāha cahmu yó. Yūcuán na te trigo chí cahnde de ndiví ini yacā rí, achí de. Achí yá.

### **Jñuhun yátá síquī ndiquin mostaza**

(Mr. 4.30-32; Lc. 13.18-19)

<sup>31</sup> Te suni ni cahān yā inga jñuhun yátá jēe steén yā ndese ndúcuehē ñayuu ndácu Yaā andiví jniñu nuū:

Ndúcuehē i nájñuhun jéñu iin ndiquin mostaza jeē ní jequin iin tēe nuū ñuhun de. <sup>32</sup> Te jendaá jeē iin ndiquin lúlí gá cúu vēsú táca gá ndiquin. Te núu ni jehnu, te cúu cáhnu ga vēsú táca gá yucū, chí ndúu nájñuhun iin yujnu. Te quíjicoo saa, te cásáha tí tacā tí chíji ndaha ún. Achí yá.

### **Jñuhun yátá síquī levadura**

(Lc. 13.20-21)

<sup>33</sup> Te inga jñuhun yátá ní cahān yā jíin de:

Jeē ndácu Yaā andiví jniñu nuū ñayuu cúu nájñuhun levadura jeē ní quihin iin ñahan. Te ni saca ña jíin úní kilo harina, nde ni ndaa ndihi ñujen ni sáha. Achí yá.

### **Jeē máni jñuhun yátá cáhán yā jíin i**

(Mr. 4.33-34)

<sup>34</sup> Táca jñuhun yáha ní cahān Jesús jíin ñayuu cuehē ún. Te táca jēe ní steén yā, máni jñuhun yátá ní cahān yā jíin i. <sup>35</sup> Súcuan ni sáha ya návāha squícu jñuhun ni cahān tēe ni nacani jñuhun Yaā Dios nde jenahán:

Cahān rí táca jñuhun yátá jíin ñayuu, te cachi rí táca jñuhun yísahí ndé quiví ní jecōo ñayiví. Achí tutu, áchí yá.

### **Jeē ní castūhun cájí yá jñuhun ite lasú**

<sup>36</sup> Yūcuán na te ni nacuatáhú Jesús nuū ñayuu. Te ni ndiví ya ini vehe. Te tēe cáscuáha un ní jinūcoo de nuū yā, te ni cacahān de jíin yá:

Nacani cájí ní jñuhun yátá ite lasú nuū ná, áchí de.

<sup>37</sup> Te ni cahān yā jíin de:

Jeē jéte trigo vāha un cúu máá rí, Yaā ní nduu tēe. <sup>38</sup> Te ñuhun un cúu ñayiví. Te trigo vāha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén. <sup>39</sup> Te tēe jíto uhū jeē ní jete lasú un cúu máá jexeén. Te quiví tahndé cúu quiví jínu ñayiví. Te tēe cahnde un cácuu ndajéhé Yaā Dios. <sup>40</sup> Te nájñuhun tahndé ite lasú te cayū nuū ñuhún, súcuan coo quiví jínu ñayiví. <sup>41</sup> Chi máá rí, Yaā ní nduu tēe, tají rí ndajéhé rí quingoo. Te nastútú yá tāca ñayuu casquíví jnāhan nuū cuéchi, jíin ñayuu casáha jniñu néé, quenehen ya i méhñu ñayuu ndácu ri jniñu nuū. <sup>42</sup> Te jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. <sup>43</sup> Yūcuán na te ñayuu squícu nuū yā chi ndindéé i nájñuhun niāndii, te coyūcú i nuū ndácu máá Tátá i jniñu. Tāca róhó jéé jíni sōho, na chúsóhó ró.

### **Jnūhun yátá síquī yejnū xūhún jeē yísāhi**

<sup>44</sup> Te jeē ndácu Yaā andiví jniñu nuū ñayuu, suni cúu nájñuhun iin yejnū xūhún jeē yísāhi chíji iin ñuhun. Te ni nanihín iin tēe, te ni nacasi tucu de síquī. Te jeē cúsiñi ni de jíin, te ni jehēn de ni xícó ndihí de jeē névāha de, te ni jeen de ñuhun ún.

### **Jnūhun yátá síquī perla jeē ndeé yahu**

<sup>45</sup> Te jeē ndácu Yaā andiví jniñu nuū ñayuu, suni cúu nájñuhun iin tēe jéen xícó, te ndúcu de perla vāha. <sup>46</sup> Te ni jini de iin perla jeē yáhu ndasí, te ni jehēn de ni xícó ndihí de jeē névāha de, te ni jeen de perla un.

### **Jnūhun yátá síquī ñunu jnīi chācá**

<sup>47</sup> Te jeē ndácu Yaā andiví jniñu nuū ñayuu, suni cúu nájñuhun iin ñunu jeē cásingava de ini mar, te quívicoo ndinuū chācá. <sup>48</sup> Te núu ni chitú ñunu ún, te cá-

natava de yundúte. Te cácucoo de cá-nacāji de chācá. Te chācá vāha cájnaa de ini jica, te chācá tú vāha cáscáne de. <sup>49</sup> Te suni súcuan coo quiví jínu ñayiví. Chi quijicoo ndajéhé yā, te sásín ya ñayuu casáha jniñu néé méhñu ñayuu casáha jniñu vāha. <sup>50</sup> Te ñayuu cunéé chi jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

### **Jnūhun yátá síquī ndajniñu ndeé yahu**

<sup>51</sup> Te ni cajñuhun yá de jíināhan de: ¿A ní cajecūhun ni rō tāca jnūhun yáha, chí tuú? áchí yá.

Te ni cacahān de jíin yá:  
Ni cajecūhun ni ná, áchí de.

<sup>52</sup> Te ni cahān yā jíin de:

Iyó vāha núu súcuan. Te iin tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca jnūhun síquī ún. Chi cúu de nájñuhun iin tēe chíi vehe. Te ini yejnū de táva de ndajniñu ndeé yahu, sava jeē jeé jíin sava jeē je ni cunahán íyó. Achí yá.

### **Jeē cuánuhun yā ñuu Nazaret**

(Mr. 6.1-6; Lc. 4.16-30)

<sup>53</sup> Te ná ni ndihí ni cahān Jesús tāca jnūhun yátá yáha, te ni quenda ya yūcuan cuáhān yā. <sup>54</sup> Te ni najinū yā ñuu yā Nazaret. Te ni steén yā jnūhun ini vehe i sinagoga yūcuán. Te ni canaa ni ñayuu cájini nahín i, te ni cacahān i:

¿Ndeé nuū ní cutūhva tēe yáha tāca jnūhun ndíchí? ¿Te ndese cúu sáha de tācá jniñu jéhnu yāhá? <sup>55</sup> Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas. <sup>56</sup> Te suni cáyūcu cuáha de jíin yó yāhá. ¿Te ndese jíiní de tāca jnūhun yáha núu súcuan? Achí ñayuu.

<sup>57</sup> Te súcuan ni cacujéē ni i nuū Jesús. Te ni cahān yā jíin i:

Tāca tēe nácani jnūhun Yaā Dios, íyó yíñúhún ñayuu jíin de, te máni ñayuu ñuu maá de jíin ñayuu vehe máa de cúu jeē tu íyó yíñúhún jíin de. Achí yá.

<sup>58</sup> Te tu ní sáha ya cuehē jniñu jéhnú yūcuán, chi tu cácadíje i ya.

### Jeē ni jíhi Juan tēe scuándute

(Mr. 6.14-29; Lc. 9.7-9)

**14** Te tiempo yúcuan te Herodes, tēe ndácu jniñu región Galilea, ni jini jnūhun de jnūhun Jesús. <sup>2</sup> Te ni cahān de jíin ñayuu cáhiin jíin de:

Tēe yúcuan cúu Juan tēe ni scuándute, te ni natecu de. Jeē yúcuan íyó poder de sáha de jniñu jéhnú. Achí de.

<sup>3</sup> Chi Herodes, je ni ndacu de jniñu jeē na quívi Juan vecāa, jíin jéē na cónuhni de jíin cadena. Súcuan ni sáha de jeē siquí Herodías, ñasihí ñani de Felipe.

<sup>4</sup> Chi Juan ni cahān de nuū Herodes:

Tu íyó ley condeca ró ña, achí de.

<sup>5</sup> Te jeē yúcuan ní cuni Herodes cahni de Juan. Te yúhú de jeē quití ni ñayuu, chí ndihí i jéni ndije ni i jeē iin tēe nácani jnūhun Yaā Dios cúu Juan. <sup>6</sup> Te iin quiví ni sáha Herodes iin vico quiví ní cacu de. Te sehe síhí Herodías ni quiví i ní jita jéhé i nuū ñayuu ní cana de ún. Te ni cusíi ni Herodes ní sáha i. <sup>7</sup> Te ni jeyñūhun téyí de jeē cuáha de núu na vé cacān i nuū de. <sup>8</sup> Te ni jehēn i ni cajñūhún i náná i na vé cacān i. Te ni ndívi i nuū Herodes, te ni cahān i:

Cuāha ní xíní Juan tēe scuándute, cone nuū iin cohō, achí i.

<sup>9</sup> Yūcuán na te rey Herodes ni cucuíhyá ni de. Te siquí jeē ni jéjñūhun téyí de, jíin jéē ní cajini sōho tēe cáyeji staā jíin de, jeē yúcuan ní ndacu de jniñu jeē na cuáha nuū i. <sup>10</sup> Te ni tají de soldado jeē na quícahnde xini Juan ini vecāa.

<sup>11</sup> Te ni quee soldado un jíin xini Juan,

íne nuū iin cohō, te ni jēhe nuū súchi síhí un. Te máa i ni jendeca i nuū naná i.

<sup>12</sup> Yūcuán na te ni jengoo tēe cáscuáha jíin Juan, te ni candonehen de yiquí cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

### Jeē ni scáji yā uhūn mil tēe

(Mr. 6.30-44; Lc. 9.10-17; Jn. 6.1-14)

<sup>13</sup> Te ná ni jini Jesús jnūhun, te ni cujiyo ya yúcuan cuáhān yā jíin barco, jeē cóne sín ya iin lugar nuū tú ñayuu. Te ni cajini ñayuu jeē cuahán yā. Te tācá ñuu ni quendacoo i cájica jéhé i, cuajnahān i ya. <sup>14</sup> Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya tāca ñayuu cácuñu jeē véjicoo i jíin. <sup>15</sup> Te nuū ní ini, te tēe cáscuáha jíin yá, ni queeco de nuū yā, te ni cacahān de:

Je ni ini, te yāhá chí tú na ñayuu yúcu. Núu súcuan te tají ní ñayuu na quíngoo i tācá ñuu, te cuaan i jeē cáji i.

<sup>16</sup> Te ni cahān Jesús jíin de:

Tu jíni ñúhún quíngoo i, chí cuāha máa ró jeē cáji i, achí yá.

<sup>17</sup> Te ni cacahān de jíin yá:

Tú na vé cánevāha ná yáha, chí uhūn-ni staā jíin úū-ni chācá, achí de.

<sup>18</sup> Te ni cahān yā jíin de:

Cuāha na quíji, achí yá.

<sup>19</sup> Te ni cahān yā jíin ñayuu un jéē na cúcōo i nuū íte. Te ni quihin ya ndihúhún staā jíin úū chācá un. Te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá. Te máa de ni casaja de nuū ñayuu cuehē ún. <sup>20</sup> Te ndivii i ni cayeji, te ni candutú chíji i. Te ni canastútú de pedazo jeē ní quendōo, te ni chítú úxi uū jíca. <sup>21</sup> Te tēe ni cayeji un cúu nájñūhun uhūn mil, te sín ga cúu ñahan jíin súchi lúlí.

**Jeē ní jica jéhé yá nuū mar***(Mr. 6.45-52; Jn. 6.16-21)*

<sup>22</sup> Yūcuán na te ni cahān-ni Jesús jíin tée cáscuáha jíin yá jeē na quívicoo de barco, te cosnūú de quingoo de nde inga lado mar, níní jéē nátají yá ñayuu un quí-nungoo i. <sup>23</sup> Te nuū ní cuu ni nacuatáhu yá nuū i, te máñúhún-ni ya ni caa ya yucu, cuacacān tahú yā. Te ni cuaa, te íne máñúhún yá yūcuán. <sup>24</sup> Te barco un, je ni cuu sava nuū mar cuahān. Te ndute mar un nátundahá níhin barco, chi vēji tachī ichi núú de. <sup>25</sup> Te jeē yínee gā ni quee Jesús nuū de, jica jéhé yá nuū mar. <sup>26</sup> Te tēe cáscuáha ún, ni cajito de ya jeē jíca ya nuū mar. Te ni candondava de, te ni cacana cóhó de jeē cáyūhú de.

Jíhná cúu, áchí de.

<sup>27</sup> Te ni cahān-ni Jesús jíin de:

Ndeyí coo ni rō, te ma yūhu ró, chi máá rí cúu, áchí yá.

<sup>28</sup> Yūcuán na te ni cahān Pedro jíin yá:

Núu máá ní cúu, te cahān ni jíin ná jéē na cáca jéhé ná nuū mar te jeē na núú ní, áchí de.

<sup>29</sup> Te ni cahān yā:

Nehen núu súcuan, áchí yá.

Te ni quenda Pedro ini barco, te ni jica de nuū ndúte cuahān de nuū Jesús. <sup>30</sup> Te nuū ní jini de jeē níhin yíhi tachī, te ni yūhú de. Te ni quejéé de queé de chíji ndute. Te ni cana cóhó de:

Jnama ní sáña, áchí de.

<sup>31</sup> Te Jesús ni jni-ni ya ndaha de. Te ni cahān yā jíin de:

Tēe tu cándíje nihin cúu ró. ¿Naun ni nayūhu ró? Achí yá.

<sup>32</sup> Te ni quívi ya ini barco un jíin de, te ni jecuíñi-ni tachī. <sup>33</sup> Yūcuán na te tēe cáhiin ini barco un, ni cajecuíñi yití de nuū yā. Te ni cacahān de:

Jendaá ndíje jeē Sēhe Yaā Dios cúu ní, áchí de.

**Jeē ní nasávāha ya ñayuu cácuahū región Genesaret***(Mr. 6.53-56)*

<sup>34</sup> Te ni quenda jíyo ya jíin de nuū mar un, ní jinū yā región Genesaret. <sup>35</sup> Te ñayuu yūcuan ní canacuni i ya. Te ni cascáca i jñūhun tācā ndañúú yūcuan jéē ni jíin yā. Te ñayuu ni caquindeca i ñayuu cácuahū nuū yā. <sup>36</sup> Te ni cacahān ndahú i jíin yá jeē na quéhé i vésú yusáhma ya. Te tāca ñayuu jeē ní caquehé sahma ya, ni canduvāha i.

**Siquī ndese cújnéhén ñáyuu***(Mr. 7.1-23)*

**15** Yūcuán na te jecu tēe grupo fariseo jíin tée cástéén tutu ley Yaā Dios, ni quendacoo de ñuu Jerusalén, te ni quecoo de nuū yā. Te ni cacahān de jíin yá:

<sup>2</sup> Tēe cáscuáha jíin ró, ¿naun cástívi de costumbre jeē ní cajequin ñayuu jehahán? Chi tu ní cáscuícu de costumbre jeē nándahá de nuū yā te caji de staā. Achí de.

<sup>3</sup> Te Jesús ni cajñūhun yá de:

Te máá ró jijnáhan ró, ¿suni naun cástívi ró jniñu ní ndacu Yaā Dios nuū rō? Chi sa costumbre maá ró cúu jeē casquícu ró. <sup>4</sup> Chi ni cahān Yaā Dios: Coo yíñúhún ró jíin tátá ró jíin náná ró. Te núu ndé iin cahān siquī tatá chí siquī naná, na cúu nahín, áchí Yaā Dios. <sup>5</sup> Te máá ró chi cacahān rō jeē cuu cahān iin tēe jíin tátá de jíin náná de: Ma cúu chindéé ñáhán ná níhín cuáha na jéē cáji ni jéē cúhun ní, chi ndíhi jeē névāha ná, je ni socō na núu Yaā Dios. <sup>6</sup> Te tēe cahān súcuan, tuá cánuú chindéé ñáhán de tátá de náná de, áchí ró jijnáhan ró. Te súcuan cástívi ró jniñu ní ndacu Yaā Dios, jeē siquí costumbre ni cajequin máá ró. <sup>7</sup> Tēe stáhú-ni cácuu ró. Ndaā ni nacani Isaías jñūhun siquī rō nde je-

nahán, yósó núū tútu ii jeē ni cáhān Yaā Dios:

<sup>8</sup> Ñayuu yáha chi máá yuhu-ni i cájetáhú i ruhū,

te nasūu ndé jíin ini jíin ánuá i.

<sup>9</sup> Te cáchiñúhún sáá-ni i ruhū, chi jñuhun cástéén i cúu jniñu ní candacu tēe,

te nasūu jéé ní ndacu máá rí cúu.

Achí Yaā Dios. Achí yá.

<sup>10</sup> Te ni cana ya ñayuu cuehē ún, te ni cahān yā jíin i:

Cuni sōho vāha jíināhan ró, te chuhun ni rō: <sup>11</sup> Nasūu jéé quívi ini yuhu ñayuu cujnéhén i sáha. Chi jñuhun jeē quénda yuhu i, yūcuan cúu jeē cujnéhén i sáha, áchí yá.

<sup>12</sup> Yūcuán na te tēe cáscuáha jíin yá, ni quecoo de nuū yā, te ni cacahān de:

¿A jíiní ni jéé ní caquitī ni tēe fariseo jeē ní cajini sōho de jñuhun ni cahān ní? áchí de.

<sup>13</sup> Te ni cahān máá yá:

Cácuu de nájñuhun yujnu jeē tu ní náchuhun Tátá rī, Yaā ndeé andiví, te iin quiví te jñuhun ya quihīn. <sup>14</sup> Na quíngoo máá de. Chi cácuu de nájñuhun tēe cuáá cástéén ichi nuū inga tēe cuáá. Chi núu iin tēe cuáá stéén de ichi nuū inga tēe cuáá, te ndíndúú de ninga de xehvā. Achí yá.

<sup>15</sup> Te ni cahān Pedro jíin yá:

Castūhun cájī ní jñuhun yátá yáha nuū na jíināhan ná, áchí de.

<sup>16</sup> Te ni cahān Jesús:

¿Te á suni máá ró ná tu jecūhun ni rō chí naún? <sup>17</sup> ¿A tu cájecūhun ni rō jeē tāca jéé yéji ñayuu, chi quívi chíji i, te quénda-ni cuahān? <sup>18</sup> Te jñuhun jeē quénda yuhu ñayuu, chi nde ini anuá i vēji, te yūcuan cúu jeē cujnéhén i sáha. <sup>19</sup> Chi nde ini anuá ñayuu quénda jeē jéni nées ni, jeē jéhni ndīyi, jeē casíquf ndéé jnāhan, jeē jíca jnéni, jeē sacuíhná, jeē cahán jñuhun stáhú, jeē cahán yāa

síquī jnāhan. <sup>20</sup> Tāca jéé yáha cúu jeē cujnéhén ñayuu sáha. Te núu tu squícu i costumbre jeē nándahá i te caji i staā, tu cúnéhén i sáha. Achí yá.

### Ñahan inga nación jeē ní candíje nihin

(Mr. 7.24-30)

<sup>21</sup> Te ni quenda Jesús yūcuan cuáhān yā región Tiro jíin Sidón. <sup>22</sup> Te iin ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátā, Sēhe yucūn David, cundáhú ni ni sáña víi. Chi sēhe síhí ná, ñuhun tachí ini i, te yōhyo xēen ndóho i, áchí ña jíin yá.

<sup>23</sup> Te tu ní cáhán cuiti yā jeē ni cáhān ña. Yūcuán na te ni quecoo tēe cáscuáha jíin yá, te ni cacahān de:

Cahān ni jíin ña na quihín ña, chi cána jee ña vēji ña yatā yō, áchí de.

<sup>24</sup> Te ni cahān yā jíin ña:

Nuū máa-ni ñayuu nación Israel ni tají Yaā Dios sáña vēji ná, chi cácuu i nájñuhun lanchi, quití ní sana.

<sup>25</sup> Te ñahan ún chi ni quee ña, te ni jecuiñí yītí ña nuū yā, te ni cahān ña:

Tátā, chindéé ñáhán ní sáña víi, achí ña.

<sup>26</sup> Te ni cahān yatá yá jíin ña:

Tu íyó vāha jeē quénde yō staā sēhe, te cuāha yó núu ína, achí yá.

<sup>27</sup> Te ni cahān ña:

Jendaá cahán ni Tátā, te chindéé ñáhán ní sáña vēsú cúu ná nájñuhun ina. Chi suni máá tí cánihīn nahín tí pedazo staā cuechí jéé cóyo chíji mesa jitoho tí cáyeji tī, achí ña jíin yá.

<sup>28</sup> Yūcuán na te ni cahān Jesús:

Yōhyo vāha jeē cándíje nihin ní súcuan, nánā. Te na sáha ná jéé cuní ni, achí yá.

Te máá hora un ní nduvāha-ni sēhe síhí ña.

**Jeē ní nasávāha ya  
cuehē ñayuu cácuhū**

<sup>29</sup>Te ni quenda Jesús cuahān yā yūcuán, te ni yāha ya yumar Galilea. Te ni caa ya ñin yucu, te yūcuan ní cucōo ya.

<sup>30</sup>Te cuehē ñayuu ni quecoo i nuū yā, te cándeca i tāca jēē cájica chácuá, jeē cuaá, jeē ñihín, jeē cacúhndú, jín cuéhē gā ñayuu cácuhū. Te ni cajequin i nuū jehé Jesús. Te ni nasávāha ya i jínáhan i. <sup>31</sup>Te ni canaa ni ñayuu un cájito i jeē nácahān ñayuu ñihín, ndúvāha ñayuu cuhndú, nácaca vāha ñayuu chacuá, ná-nune tinū ñayuu cuaá. Te ni cacahān i jeē yóhyo vāha Yaā cúu Yaā Dios ñuu i Israel.

**Jeē ni scáji yā cuñ mil tēe**

*(Mr. 8.1-10)*

<sup>32</sup>Yūcuán na te ni cana Jesús tēe cáscuáha jín yá, te ni cahān yā jín de:

Cúndáhú ni rī ñayuu cuehē yāhá, chi je ni cuu unī quivī cáyūcú i jín rí, te tuá na vé caji i. Te tu cúní rī nataj rí i nuhun ndite i, chi núu súcuan te sava ichi te cuíta í i. Achí yá.

<sup>33</sup>Te ni cacahān tēe cáscuáha jín yá:

¿Te ndé nuū ñihín yō staā caji ñayuu cuehē yāhá? Chi yāhá tú na ñayuu yúcu, achí de.

<sup>34</sup>Te ni cajñuhun yá de:

¿Nasaa staā cánevāha ró?

Te ni cacahān de:

Uxā-ni, jín jecu chācá lúlí, achí de.

<sup>35</sup>Yūcuán na te ni cahān yā jín ñayuu cuehē un jēē na cucōo i. <sup>36</sup>Te ni quihín ya ndihúxá staā jín cháca ún, te ni nacuatáhú yá nuū Yaā Dios. Te ni tahú cuéché yá, te ni jēhe ya nuū tēe cáscuáha jín yá, te máá de ni casaja nuū ñayuu. <sup>37</sup>Te ndíhi i ni cayejí, te ni candutú chíji i. Yūcuán na te ni canastútú de pedazo jeē ní quendōo, te ni chítú úxá jica. <sup>38</sup>Te tēe ni cayejí ún, nde cuñ mil de cúu, te sñn ga cúu ñahan jín súchi lúlí. <sup>39</sup>Yūcuán

na te ni nacuatáhú yá nuū ñayuu ún, te cuanungoo i. Te ni ndívi ya ini barco, te cuahān yā región Magdala.

**Jeē cájicān de ñin jniñu jéhu nuū yā**

*(Mr. 8.11-13; Lc. 12.54-56)*

**16** Te ni quecoo tēe grupo fariseo jín tēe grupo saduceo nuū yā. Chi cácuni de coto ndee de ya, te ni cajiicān de jeē na sáha ya ñin jniñu jéhu jeē coo ñin seña ichi ándiví. <sup>2</sup>Te máá yá ni cahān yā jín de:

Núu ni ini, te cácahān rō: Nandii, chi ni nasácuéhé i ándiví, áchí ró. <sup>3</sup>Te jenéhen chi cácahān rō: Vijná te cuun saū, chi ni nasácuéhé i ándiví, áchí ró. Tēe stáhú-ni cácuu ró. Chi cájiecūhun ni rō ndese stéén seña ándiví, te tu cájiecūhun ni rō ndese stéén táca jniñu jéhu sáha ri tiempo yáha. <sup>4</sup>Ñayuu yáha jeē casáha jniñu néé, tu cájetáhú cuítí i Yaā Dios. Te cájicān i jeē sáha ri ñin jniñu jéhu jeē coo ñin seña ándiví. Te tuá na inga jniñu jéhu stéén rī nuū i, chi máá-ni jniñu jéhu nájnūhun ni cuu jín Jonás, tēe ni nacani jñuhun Yaā Dios nde jenahán. Achí yá.

Te ni stóo ya de jínáhan de, te cuahān yā.

**Jñuhun levadura tēe fariseo**

*(Mr. 8.14-21)*

<sup>5</sup>Te tēe cáscuáha jín yá ni canaa ni de condiso de staā náa cuangoo de jín barco inga lado mar. <sup>6</sup>Te ni cahān Jesús jín de:

Coto má candíje ró levadura tēe grupo fariseo jín tēe grupo saduceo, achí yá.

<sup>7</sup>Te tēe cáscuáha un ní cacahān maá de:

Va siquī jeē tú na staā ndíso yó, jeē yúcuán cáhān yā súcuan, achí de.

<sup>8</sup>Te ni jini Jesús, te ni cahān yā:

¿Najehē cácahān rō jeē ni cáhān rī súcuan siquī jeē tú na staā cándiso ró? Tēe tu cándíje ñihin cácuu ró. <sup>9</sup>¿A ná

tu jecūhun ni rō jeē tu ní cáhán rī súcuan siquī jeē tu ndíso ró stāā? ¿A tu cánucūhun ni rō jeē ní tahu cuéchí rī uhūn staā ni cayeji uhūn mil tēe, te nasaa jīca ni canastútú ró jeē ni quéndōo? <sup>10</sup> ¿Te á tu cánucūhun ni rō jeē ní tahu cuéchí rī uxā staā ni cayeji cuūn mil tēe, te nasaa jīca ni canastútú tucu ró? <sup>11</sup> ¿Te najehē tu cájecūhun ni rō jeē násūu síquī staā ni cahān rī jín ró jeē ni cáhān rī jeē coto té candíje ró levadura tēe fariseo jín té saduceo? Achí yá jín de.

<sup>12</sup> Yūcuán na te ni cajecūhun ni de jeē tu ní cáhán yā jeē coto de jeē ma cáji de pan jeē yíhi levadura, chi sa suhva ni cahān yatá yá jeē ma cándíje de jnūhun stáhú cástéén tēe fariseo jín té saduceo.

### **Jeē ni cáhān Pedro jeē Jesús cúu Cristo**

(Mr. 8.27-30; Lc. 9.18-21)

<sup>13</sup> Te nuū ni jínū Jesús región Cesarea Filipino jín tée cáscuáha jín yá, te ni canūhun yá de:

Ruhū, Yaā ní nduu tēe, ¿ndé iin cúu rī cácahān ñayuu?

<sup>14</sup> Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahān. Te sava ga i cácahān jeē Jeremías chí inga tēe ni nacani jnūhun Yaā Dios cúu ní. Achí de.

<sup>15</sup> Te ni cahān yā jín de:

Te máá ró, ¿ndé iin cúu rī cácahān rō? achí yá.

<sup>16</sup> Te ni cahān Simón Pedro:

Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu ní cáni, áchí de.

<sup>17</sup> Te ni cahān Jesús:

Yōhyo ndetū rō, Simón sēhe Jonás, chi nasūú iin ñayuu ni steén jnūhun yáha nuū rō, chi sa suhva máá Tátá rī, Yaā ndeé andiví, ní steén yā nuū rō. <sup>18</sup> Te ruhū suni cáhān rī jín ró jeē máá ró cúu

Pedro, jeē cuní cahān: yuū. Te jnūhun ndaā jeē ni cáhān rō jeē maá rī cúu Cristo, suu cúu nájnūhun iin yuū cáhnu. Te siquī yuū cáhnu yáha sáha rī jeē quítuu vehe, te vehe un cúu ñayuu cácan-díje ruhū. Te tu ndé vé cundeyí cuítí siquī i, ni jnūhun xeēn jeē cájihī i, tuá na vé cúu sáha jín ánuá i. <sup>19</sup> Te máá ró condiso jniñu ró sáha ró jéé quívi-coo ñayuu ndaha Yaā andiví jeē ndacu ya jniñu nuū i. Te tāca jéé cási ró jeē ma sáha ñayuu ini ñayivi yáha, suni casi jeē cáyucú nde andiví. Te tāca jéé cuáha ró jnūhun sáha i ini ñayivi yáha, suni jeē cáyucú nde andiví cuáha jnūhun. Achí yá.

<sup>20</sup> Yūcuán na te ni ndacu ya jniñu nuū tée cáscuáha jín yá, jeē ma cáchi de nuū ní iin ñayuu jeē cúu ya Cristo.

### **Jeē ní castūhún Jesús jeē cúu yā**

(Mr. 8.31-9.1; Lc. 9.22-27)

<sup>21</sup> Te nde saá ní quejéé Jesús cástūhun cáji yá nuū tée cáscuáha jín yá jeē jini ñúhún quihīn yā ñuu Jerusalén. Te tāca téé jéhnu jín sūtū cácujeñnu jín téé cástéén tutu ley, stóho ndasí de ya. Te cahni de ya, te nuū uní quiví te natecu yā, achí yá. <sup>22</sup> Yūcuán na te Pedro, ni cana máñúhún de ya, te ni quejéé de cáhān de nuū yā:

¿Naun cáhān ni súcuan? Chi tu cuní Yaā Dios jeē cuu súcuan. Tu jini ñúhún cuítí ndoho ní jnúndóho yáha, áchí de.

<sup>23</sup> Te ni ndió cóto ya nuū Pedro, te ni cahān yā jín de:

Cujiyo quihīn rō, chi cáhān rō ná cáhān Satanás. Chi tēe ndúcú stívi rúhū cúu ró. Te tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu. Achí yá.

<sup>24</sup> Yūcuán na te ni cahān yā jín téé cáscuáha jín yá:

Na-ni ñayuu núu cuní i condiquin i ruhū, na cási i jeē cuní maá i, te na cóndiquin i ruhū te cuáha i jnūhun



ndoho i jnündóho jeē siquí rī, vēsú na cúu i. <sup>25</sup> Chi núu ndé ñáyuu cuní i cācu i nuū jnündóho quiji nuū i jeē siquí ruhū, núu súcuan te jnahnū ndetū i nń cání. Te núu ndé ñáyuu, vēsú na cúu i jeē siquí ruhū, te cotecu i nń cání. <sup>26</sup> ¿Chi ndé cuajnínu vēsú na cúndeyí ñáyuu nihīn i nń ñáyiví, te núu quiví i nuū jnahnū ndetū i? Chi tú na jíin cuiti chunaa ñayuu jeē cācu ánuá i. <sup>27</sup> Chi ruhū, Yaā ní nduu tēe, ndiji rī jíin táca ndajéhé rī, te yōhyo luu kujéhu rī nájñuhun cújéhu Tátá rī. Yūcuán na te cuāha rī tahū nuū iin iin ñayuu núu ndese jniñu ni casáha i. <sup>28</sup> Te jendaá cahán rī jíin ró jeē sava tēe cáhiin yāhá, ma cúu de chi nde cuni de jeē maá rí, Yaā ní nduu tēe, ndácu rī jniñu jíin poder rī.

### Jeē tucu ni nduu ya

(Mr. 9.2-13; Lc. 9.28-36)

**17** Yūcuán na te nuū inū quiví te Jesús ni jeca ya Pedro jíin Jacobo jíin Juan ñani Jacobo, cuahān sñin ya jíin de iin yucu súcún. <sup>2</sup> Te yūcuán, tucu ni nduu ya nuū de. Chi ni ndindēe núu yā nájñuhun niāndii. Te sahma ya ni nducujín quiyí ndasí, nájñuhun nduva luz. <sup>3</sup> Te ni cajito-ni de jeē Moisés jíin Elías, tēe ni cahīyo jenahán, cándajnūhún de jíin yá. <sup>4</sup> Te ni cahān Pedro jíin yá:

Nacā jeē váha jeē cáhiin ná yáha. Te núu cúní ni te na sáha ná únī vehe ramada, iin cuu maá ní, inga cuu Moisés, te inga cuu Elías, achí de.

<sup>5</sup> Te níni cáhán gā de, te ni quiji vicó ñuhun jēe yaa ndasí, ni jesi-ni nuū de. Te nuū vicó un ní cahān iin jñuhun:

Yáha cúu Sēhe rī jeē maní ndasí rí jíin, te cúsi ni rī jíin. Na cúni nahín ró jñuhun cáhán yā. Achí.

<sup>6</sup> Te jeē súcuan ni cajini sōho tēe cáscuáha ún, te ni cajecava ndeyí de, chi yōhyo ni cayūhú de. <sup>7</sup> Yūcuán na te ni quee Jesús, te ni soó yá ndaha ya siquí de. Te ni cahān yā:

Ndocuñī, te ma yūhu ró jijnáhan ró, achí yá.

<sup>8</sup> Te ni candacoto de, te tuá tēe un ní cájito de, chi maá iin na Jesús.

<sup>9</sup> Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní iin jeē súcuan ni cajito ró, chi nde na nátecu maá rí, Yaā ní nduu tēe, achí yá.

<sup>10</sup> Yūcuán na te tēe cáscuáha jíin yá, ni cacajnūhún de ya:

Núu súcuan te tēe cástéén tutu ley Yaā Dios, ¿najehē cácahān de jeē cánuu ndiji Elías xihna gā, te sáá te quiji Yaā cúu Cristo? achí de.

<sup>11</sup> Te ni cahān Jesús jíin de:

Jendaá cúu jeē xihna gā quiji iin tēe cuu nájñuhun Elías, te sátūhva de ndihí, achí tutu. <sup>12</sup> Te cáhán rī jíin ró jeē jé ni quiji tēe ni cuu nájñuhun Elías, te tu ní jíin ñayuu jeē suu de cúu. Te ni casáha ndevāha ñayuu jíin de ndihí jeē ní cacuu ni maá i. Te suni súcuan stóho i ruhū, Yaā ní nduu tēe. Achí yá.

<sup>13</sup> Yūcuán na te tēe cáscuáha un, ní cajúcūhun ni de jeē cahán yā jeē Juan tēe scuándute, ni cuu de nájñuhun Elías.

### Jeē ní nasávāha ya iin sūchi jíhí yīhí

(Mr. 9.14-29; Lc. 9.37-43)

<sup>14</sup> Te ni najinū yā jíin de nuū ñáyuu cuehē ún. Te ni quee iin tēe, ni jecuiñí yití de nuū yā, te ni cahān de:

<sup>15</sup> Cundáhú ni ní séhe yí ná, chi yōhyo xeēn ndóho i cuehyí jíhí yīhí. Te je ni cuu cuehē jínu cótuú i nuū ñuhún jíin núu ndúte. <sup>16</sup> Te ni quindeca ná i nuū tēe cáscuáha jíin ní, te tu ní cúu sávāha de i, achí de.

<sup>17</sup> Te ni cahān Jesús:

Ñayuu yōhyo nihni ni cácuu ró chi tu cácadíje ró jēe cuu nduvāha i. ¿Nasaa ga quiví condee rī jíin ró? ¿Te nasaa ga quiví cuandeyí ni rī jíin ró? Cuáquihin sūchí un na quíji i, achí yá.

<sup>18</sup>Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

<sup>19</sup>Yūcuán na te tēe cáscuáha un, ní cajnūhun sīn de ya:

¿Najehē tu ní cúu quenehen ná tachí un jijnáhan ná? achí de.

<sup>20</sup>Te ni cahān yā:

Siquī jeē tu cácanđje nihin ró jēē cuu sáha ró. Chi jendaá cahán ri jíin ró, jeē núu candíje ró vēsú iin tñhlí-ni, cūhva nájnūhun iin ndiquin mostaza, te cuu sáha ró táca-ni jniñu yí. Chi cuu cahān rō jeē na cújiyo yucu yáha quihīn inga lado, te cujiyo-ni. Te tācá-ni jniñu chi cuu sáha ró, te núu candíje nihin ró jēē cúu. <sup>21</sup>Te iin tachí súcuan chi ma quenda cuiti quihīn, te núu tu cacān tahú rō te coo ndite ni rō. Achí yá.

### Jeē ni cahān tucu ya jeē cúu yā

(Mr. 9.30-32; Lc. 9.43-45)

<sup>22</sup>Te jíca cuu Jesús jíin de jijnáhan de región Galilea, te ni cahān yā jíin de:

Máá rí, Yāā ní nduu tēe, nastúu i ruhū nuū tāca tēe xeēn. <sup>23</sup>Te cahni de ruhū, te nuū uní quiví te natecu rí, achí yá.

Te ni canducuñhyá ndasí ni de jeē ni cahān yā jnūhun yáha.

### Siquī xūhun cuajniñu ini templo

<sup>24</sup>Te ni jinū yā ñuu Capernaum jíin tēe cáscuáha jíin yá. Te tēe cástútú xūhun templo ni quecoo de, te ni cacajnūhún de Pedro:

Te maestro maá ró jijnáhan ró, ¿á tú cuāha de xūhún cuajniñu ini templo, chí naún? achí de.

<sup>25</sup>Te ni cahān Pedro:

Cuu, achí de.

Te ná ni quiví de ini vehe, te xihna gā Jesús ni cahān yā jíin de:

¿Ndese jéni ni rō, Simón? Tāca tēe cácuu rey ini ñayiví yáha, ¿ndé núu cájicān de xūhun renta jíin xūhun cua-

jniñu ñuu? ¿A núu séhe de chí núu ñáyuu sīn vehe? achí yá.

<sup>26</sup>Te ni cahān Pedro:

Nuū ñáyuu sīn vehe, achí de.

Te ni cahān Jesús:

Núu súcuan te tú na inga cujéhu nuū séhe rey jeē cacán xūhún un núu i.

Súcuan ni cahān yā jeē cujéhu ya cúu ya Sēhe Yāā Dios. Te ni cahān yā:

<sup>27</sup>Te na chūnaa yō, návaha tu squítí ni yō de. Núu súcuan te cuáhán ndé yumar, te scáne ró gancho jeē jnī chācá, te tava rō chācá jēē jnī xihna gā. Te ndica rō yuhu ti, te yucuan níhīn rō iin xūhun jēē cánda chunaa rō jeē cájicān de. Te quindēca ró núu de jeē cúu ruhū jíin rōhó. Achí yá.

### Ndé ñáyuu cúu jeē cujéhu ga

(Mr. 9.33-37; Lc. 9.46-48)

**18** Te suni quiví un ní quecoo tēe cáscuáha un núu yā, te ni cacajnūhún de ya:

¿Ndé iin cújéhu ga nuū ñáyuu jeē ndácu Yāā andiví jniñu nuū? achí de.

<sup>2</sup>Te ni cana ya iin sūchi lúlí, te ni jeni ya i mēhñú de. <sup>3</sup>Te ni cahān yā:

Jendaá cahán rí jíin ró, núu tú nandió cóo ni rō te cani ni rō nájnūhun iin sūchi lúlí, ma quiví cuiti rō ndaha Yāā andiví jēē ndacu ya jniñu nuū rō. <sup>4</sup>Núu súcuan te ñayuu jeē jéni ni i jeē tu cújéhu i, nájnūhun jéni ni sūchi lúlí yáha, suu i cújéhu ga nuū ñáyuu jeē ndácu Yāā andiví jniñu nuū. <sup>5</sup>Te na-ni ñayuu núu jeē siquí ruhū jetáhú i iin sūchi lúlí nájnūhun sūchi yáha, te ruhū jetáhú i. Achí yá.

### Xeēn coo siquí ñáyuu quiví nuū cuéchi

(Mr. 9.42-48; Lc. 17.1-2)

<sup>6</sup>Te núu iin sūchi lúlí yáha cándíje i ruhū, te núu quiví i cuéchi sáha na-ni ñayuu, te vāha ga núu ni conuhní iin yōso cáhnu sucūn ñayuu ún, te quēe

i chiji ndute mar nuú. <sup>7</sup>Nacā xeēn cúu jíin ñáyuu ñayíví, chí máni íyó jéē nducú squívi ñayuu nuú cuéchi. Te máni súcuan coo ini ñayíví. Te nacā xeēn ndoho ñayuu jeē squívi jnáhan nuú cuéchi.

<sup>8</sup>Núu súcuan te núu ndaha ró chí jéhē rō sáha jeē quívi ró cuéchi, vāha ga cahnde rō te scáne ró na quíhín, návāha tuá sáha ró cuéchi. Chí vāha ga jeē coo chácua ró chí coo tícúhndu ró te quívi ró núu cotecu rō níí cáni, vēsú jeē cóndee ndíndúú ndaha ró jéhē rō te quívi ró núu ñuhún jeē cayú níí cáni. <sup>9</sup>Te núu tinūu ró sáha jeē quívi ró cuéchi, vāha ga tava rō te scáne ró na quíhín, návāha tuá sáha ró cuéchi. Chí vāha ga jeē coo iin-ni tinūu ró te quívi ró núu cotecu rō níí cáni, vēsú jeē cóndee ndíndúú tinūu ró te quívi ró núu ñuhún infierno.

### **Jnúhun yátá síquī lanchi jeē ní sana**

*(Lc. 15.3-7)*

<sup>10</sup>Coto ma sájéē ni rō nuú ní iin sūchi lúlí yáha. Chí cáhán rī jíin ró jeē tācá ndajéhé andívi jéē ndíto ya i, níni cáhiin ya nuú maá Tátá rī andívi. <sup>11</sup>Chí ruhū, Yaā ní nduu tēe, vēji rī jeē jnáma rī ñayuu jeē ní sana i nuú Yaā Dios.

<sup>12</sup>¿Te ndese cájeni ni rō? Núu iin tēe ndéca de iin ciento lanchi, te núu sana iin tí, ¿á tu stóo de cuūn xico xahūn cuūn gā tí yucu, te ndicó de quinanducú de quíti ní sana ún? <sup>13</sup>Te núu ni nanihin de tí, te ndaā jeē yóhyo ga cúsihí ni de jíin quíti ún vēsú jíin cuūn xico xahūn cuūn gā quíti jeē tu ní sána. <sup>14</sup>Te suni súcuan maá Tátá rō, Yaā ndeé andívi, tu cúní yā jeē jnahnú ndetū ni iin sūchi lúlí yáha.

### **Síquī jeē cóne cáhnu ni yō nuú jnáhan yó**

*(Lc. 17.3)*

<sup>15</sup>Te núu jnáhan ró ní sáha de cuéchi síquī rō, núu súcuan te castūhun ró nuú mañúhún-ni de jeē ní sáha de cuéchi

síquī rō. Te núu ni jetáhú de jnúhun ni cahān rō jíin de, núu súcuan te je ni ndumaní de jíin ró ni sáha ró. <sup>16</sup>Te núu tu ní jétáhú de jnúhun cáhán rō, te quicāna ró iin chí úú gā ñayuu quihín rō jíin núu de, cuu i testigo jíin ró, te cundaā cuéchi de te ndumaní de jíin ró. <sup>17</sup>Te núu tu ní jétáhú tucu de jnúhun cácahān tēe ún, yūcuán na te castūhun ró nuú ñayuu cácañdije. Te núu tu ní jétáhú tucu de jnúhun cahān ñayuu cácañdije ún, te siáá rō de na cóo de nájnūhun iin tēe tu cándije nuú Yaā Dios chí tēe stútú xúhun renta.

<sup>18</sup>Jendaá cahán rī jíin ró jéē tāca jéē cási rō jeē ma sáha ñayuu ini ñayívi yáha, suni casi jeē cáyucú nde andívi. Te tāca jéē cuáha ró jnúhun sáha i ini ñayívi yáha, suni jeē cáyucú nde andívi cuáha jnúhun.

<sup>19</sup>Te suni cáhán rī jíin ró, núu uū jnáhan ró ini ñayívi yáha, inuú cani ni rō síquī iin jeē cacán tahu rō, núu súcuan te maá Tátá rī andívi cuáha ya jeē cájicān rō. <sup>20</sup>Chí núu ndé mí ndútútú úú chí úní ñayuu jeē cáchiñúhún i ruhū, te yūcuán íne rī jíin i, áchí yá.

<sup>21</sup>Yūcuán na te ni quee Pedro nuú yā, te ni cajnúhún de ya:

¿Nasaa jínu cone cáhnu ni na núu jnáhan ná jéē sáha de cuéchi síquī ná? ¿A ndé uxā jínu chí naún? áchí de.

<sup>22</sup>Te ni cahān Jesús:

Tu cáhán rī jíin ró jeē maá úxā jínu, chí nde uxā jínu jeē uní xico uxí.

### **Jnúhun yátá síquī mozo jeē tu ní íne cáhnu ni**

<sup>23</sup>Núu súcuan te Yaā ndeé andívi, suhva cúu jeē íne cáhnu ni yā nuú ñayuu ndácu ya jniñu nuú: Cúu nájnūhun iin rey jeē cuní de sándaā de jíin mozo de jeē cátaū nuú de. <sup>24</sup>Te ni quejéé de sándaā de jíin i. Te ni caquindecia i iin mozo jeē taú tíjni millón peso nuú de. <sup>25</sup>Te tú na vé névāha mozo un chunaa nuú de. Te

ni ndacu de jniñu jeē na cūyāhu mozo un jíin ñasihí jíin séhe jíin táca ndajniñu, te nucūnaa xūhun táú. <sup>26</sup> Yūcuán na te ni jecuiñi yití mozo un, te ni cahān ndahú de jíin patrón de ún: Condetu ní, te na chúnaa ndihi ná xūhun ní, áchí de. <sup>27</sup> Te máá patrón ni cundáhú ni de mozo de. Te ni ine cáhnu ni de jeē taú mozo de ún, te ni siaá de jeē ma chúnaa gā. <sup>28</sup> Te ni quenda mozo un cuáhān de, te ni najnáhan-ni de jíin iin jnáhan mozo de jeē taú jecu peso nuú de. Te ni jniñ de tēe ún, te ni quitu de sucūn, te ni cahān de: Chunaá jeē taú rō nuú rí, achí de. <sup>29</sup> Te jnáhan mozo de un ní jecuiñi yití núu de, te ni cahān ndahú jíin de: Condetu te na chúnaa ndihi ri xūhun ró, achí. <sup>30</sup> Te máá de tu ní cúní de, chí ni chune de tēe un vécāa nde quiví nachunaa jeē taú nuú de. <sup>31</sup> Te tāca jnáhan mozo de ni cajito jeē súcuan ni sáha de, te ni cajnahuhū ndasí ni de. Te cuango de nuú patrón de, te ni cacachi de ndihi ndese ni cuu. <sup>32</sup> Yūcuán na te patrón un ní nacana de mozo un, te ni cahān de jíin: Mozo ndevāha cúu ró. Chí ni ine cáhnu ni rí ndihi jeē taú rō nuú rí, chí ni cahān ndahú ró jíin rí. <sup>33</sup> Te nájnūhun ni cundáhú ni rí rohó, suni súcuan ni jini ñúhún cundáhú ni rō jnáhan mozo rō nuú, achí de. <sup>34</sup> Te ni quití ndasí ni patrón, te ni ndacu de jniñu jeē na quiví vecāa nde nachunaa ndihi jeē taú nuú de.

<sup>35</sup> Te ni jinu ni cahān yā, te áchí yá:

Nájnūhun ni sáha rey un jíin mozo de, suni súcuan sáha máá Tátá rí andiví jíin táca rohó núu tu cone cáhnu ni rō nuú jnáhan ró nde jíin ini jíin ánuá rō, núu na-ni cuēchi sáha i nuú rō. Achí yá jíin de jijnáhan de.

**Siquí jeē ma stóo  
jnéhan tēe jíin ñahan**

(Mr. 10.1-12; Lc. 16.18)

**19** Te nuú ní ndihi ni cahān Jesús táca jnúhun yáha, te ni quenda ya

Galilea cuahān yā. Te ni jinū yā región Judea, inga lado yūte Jordán, ichi núu cáne niāndii. <sup>2</sup> Te cuehē ñayuu ni candiquin i ya, te yūcuan ní nasāvāha ya ñayuu cácuñu.

<sup>3</sup> Yūcuán na te ni quecoo jecu tēe grupo fariseo nuú yā, chí cácuñi de coto ndee de ya núu ndese cahān yā. Te ni cacajnūhún de ya:

¿A íyó ley jeē cuu ndusñin iin tēe jíin ñasihí de núu na-ni siquí cúu, chí naún? áchí de.

<sup>4</sup> Te ni cahān yā:

¿A tu ní cácahu ró tutu i ndese ni sáha Yaā Dios ñayuu nde xihna ñúhún? Chí tēe jíin ñahan ni sáha ya, achí. <sup>5</sup> Te suni ni cahān Yaā Dios: Jeē yūcuan cúu jeē stóo tēe tátá de náná de, te quijnáhan de jíin ñasihí de, te iin na cuu ndindúu de, achí Yaā Dios, achí tutu. <sup>6</sup> Núu súcuan te tuá cúu uú jnáhan de, chí iin na cúu. Jeē yūcuan tu íyó váha jeē stóo jnáhan, chí jeē ni squíjnéhan Yaā Dios cúu, achí yá.

<sup>7</sup> Te ni cacajnūhún de ya:

Núu súcuan ¿te naun ni ndacu Moisés jniñu jenahán jeē núu stóo iin tēe ñasihí de, te na cúvāha acta jeē ndusñin de jíin ña? áchí de.

<sup>8</sup> Te ni cahān yā jíin de:

Siquí jeē níhni ni rō jijnáhan ró, jeē yūcuan ní jēhe Moisés jnúhun jeē stóo ró ñasihí ró. Te nde xihna ñúhún chí nasūu súcuan ní cuu. <sup>9</sup> Te ruhū chí cáhán rí jíin ró, núu iin tēe stóo de ñasihí de, te núu nasūu jēe tñni ni ña, te quijnáhan de jíin inga ñahan, núu súcuan te cásiquí ndēe de ña. Te núu iin tēe condeca de ñahan ní ndusñin, suni cásiquí ndēe de ña, achí yá.

<sup>10</sup> Yūcuán na te ni cacahān tēe cás-cuáha jíin yá:

Te núu ma cúu stóo tēe ñasihí de, núu súcuan te vāha ga ma cóndeca de ñahan, achí de.

<sup>11</sup> Te ni cahān yā jíin de:

Jnūhun ni cahān rō yāhá, tu níhín jniñu nuū ndihi tēe, chi máá nene tēe jeē ni sáha Yaā Dios jeē nihín jniñu nuū. <sup>12</sup> Chi íyó tijni siquī jeē jési jeē ma cón-deca tēe ñahan. Chi sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma cón-deca de ñahan siquī jeē ndihví ni de jíin jniñu jeē ndácu Yaā andiví nuū de. Tēe jeē cúu cuatáhú jnūhun jeē ma cón-deca de ñahan, na cuatáhú de núu súcuan. Achí yá.

### Jeē ni jícān tahu Jesús jehē sūchi lúlí

(Mr. 10.13-16; Lc. 18.15-17)

<sup>13</sup> Yūcuán na te ni quecoo ñayuu jíin súchi lúlí, jéē na sóo yá ndaha ya xiní i te cacān tahu yā jehē i. Te tēe cáscuáha jíin yá, ni cacahān de nuū ñayuu vējicoo jíin i. <sup>14</sup> Te ni cahān Jesús:

Cuāha jnūhun na quíjicoo sūchi lúlí jíinā nuū rí, te ma cási rō jeē quíjicoo i. Chi ñayuu jeē ndió cóo ni i cani ni i nájñuhun sūchi yáha, suu i quívi ndaha Yaā andiví jéē ndacu ya jniñu nuū i, achí yá.

<sup>15</sup> Te ni sóo yá ndaha ya xiní i jíjnáhan i. Te ni quenda ya yūcuan cuáhān yā.

### Jnūhun tēe cúcá

(Mr. 10.17-31; Lc. 18.18-30)

<sup>16</sup> Te ñin tēe suchí ní quee de nuū Jesús, te ni cajñuhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihín tahu na cotecu na ní cáni andiví? achí de.

<sup>17</sup> Te ni cahān yā jíin de:

¿Naun cáhān rō jeē tēe vāha cúu rí? Tú ni ñin tēe vāha íyó, chi máá ñin-ni Yaā Dios. Te núu cúní rō cotecu rō ní cáni, te squícu rō jniñu ní ndacu ya. Achí yá.

<sup>18</sup> Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndīyi. Ma cosíquí ndéē jnáhan ró. Ma sacuíhná ró. Ma sajnūhún ró. <sup>19</sup> Cuatáhú ró nuū tatá rō nuū naná rō. Te cundáhú ni rō jnáhan ró nájñuhun cundáhú ni rō maá ró, achí yá.

<sup>20</sup> Te ni cahān tēe suchí un:

Tācá jniñu yáha je ni squícu ná ndé ná lulí ná. ¿Te na vé cúmani gā sáha ná núu súcuan?

<sup>21</sup> Te ni cahān Jesús:

Núu cúní rō squícu ndihi ró, cuáhān te xico ró ndihi jeē névāha ró, te cuāha ró núu ñayuu ndahú. Te nde andiví cuāha ya jeē ndetū ndasí coo ró. Yūcuán na te quiji ró condiquín rō ruhū quihín yō, achí yá.

<sup>22</sup> Te tēe suchí un, ná ni jini sóho de jnūhun yáha, te ni cucuíhyá ni de te cuahān de, chi cúcá ndasí de.

<sup>23</sup> Yūcuán na te ni cahān Jesús jíin tēe cáscuáha jíin yá:

Jendaá cahān rí jíin ró, tēe cúcá chi yōhyo yí quívicoo de ndaha Yaā andiví jéē ndacu ya jniñu nuū de. <sup>24</sup> Te cáhān tucu rí jíin rō jeē yachí gā yāha ñin camello yaū yutícuí, vēsú jeē quívi ñin ñayuu cucá ndaha Yaā Dios jeē ndacu ya jniñu nuū i, achí yá.

<sup>25</sup> Te tēe cáscuáha jíin yá, yōhyo ni canaa ni de jeē ní cajini de jnūhun yáha, te ni cacajñuhun jnáhan de:

¿Ndé ñayuu cúu jeē cácu núu súcuan?

<sup>26</sup> Te ni ndacoto Jesús nuū de, te ni cahān yā:

Ñayuu chi ma cúu squívi i máá i ndaha Yaā Dios, te máá yá chí ndihi-ni cuu sáha ya, achí yá.

<sup>27</sup> Yūcuán na te ni cahān Pedro:

Saña jíjnáhan ná ní castóo ná ndihi jeē cánevāha ná, te cándiquín na níhín. ¿Te na vé nihín na núu súcuan? achí de.

<sup>28</sup> Te ni cahān Jesús jíin de:

Ruhū, Yaā ní nduu tēe, jendaá cahān rí jíin ró jíjnáhan ró jéē ñin quíví conene rí mesa ndacu rí jniñu, te yōhyo luu cu-jéhnu rí ini ñayívi jéé. Te quíví ún te

máá ró jeē ní cacondiquin rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxi uū yucūn ñayuu Israel. <sup>29</sup>Te tāca ñayuu jeē ní stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, siquī jeē cóndiquin i ruhū, te nanihin i ñin ciento gā jeē súcuan. Te suni nihin tahú i cotecu i níí cáni. <sup>30</sup>Te cuehē ñayuu jeē vijna cácuu i nuū, nduu i sandihí. Te ñayuu jeē vijna cácuu i sandihí, nduu i nuū. Achí yá.

### Jñuhun yátá siquī tēe cásajniñu

**20** <sup>1</sup>Te suhva cúu jeē ndácu Yaā andiví jniñu nuū ñayuu: Cúu nájñuhun ñin tēe chíí ñuhun. Te ñin nehen ni quenda de, ndúcú de tijni mozo jeē taxín ndéhē uva de. <sup>2</sup>Te ni sándaā de jíin mozo un jēe chúnaa de ñin denario jeē quiví. Te ni tají de tēe un cuángoo jeē taxín uva de. <sup>3</sup>Yūcuán na te ni quenda tucu de nájñuhun cahñin. Te ni jito de nuū sava ga tēe cáyūcu sáá-ni de nuū yáhu. <sup>4</sup>Te ni cahān de jíin: Róhó jíjnáhan ró, cuángoo taxín ró uva rí, te chunaa vāha ri yāhu ró, áchí de. Te tēe un cuángoo de. <sup>5</sup>Te ni quenda tucu de jeē cuácuu cahuxí uū jíin jēe cuácuu cahuní, te suni súcuan ni nihin tucu de mozo. <sup>6</sup>Te jeē cuácuu cahuhñn ni quenda tucu de. Te ni nihin tucu de jecu gā tēe cáyūcu sáá-ni nuū yáhu. Te ni cahān de jíin: ¿Najehē cáhñin sáá-ni ró yáha níí ndiáca? áchí de. <sup>7</sup>Te ni cacahān tēe ún: Siquī jeē tú ni ñin ní cána sáña jēe sájniñu ná. Te ni cahān de jíin tēe ún: Núu súcuan te suni máá ró quingoo ró taxín ró ndehē uva rí, chí chunaa vāha ri yāhu ró, áchí de. <sup>8</sup>Te nuū ní ini, te tēe chíí ñuhun ni cahān de jíin tēe cújehnu nuū mozo de: Cana xiní tēe cásajniñu te chunaa rō yāhu de, te xihna gā tēe ni quívicoo sandihí, te sáá te tēe ni quívicoo xihna ñuhún, áchí de. <sup>9</sup>Te ni quecoo tēe jeē ní quívicoo cahuhñn. Te ñin denario ni

caquihin ñin ñin de. <sup>10</sup>Yūcuán na te ni quecoo tēe jeē ní quívicoo xihna ñuhún. Te cájeni ni de jeē cuehē gā quiyāhu de. Te ñin-ni denario ni caquihin ñin ñin de. <sup>11</sup>Te nuū ní caquihin de, te ni caquejé de cacahān sōo de siquī tēe chíí ñuhun, áchí de: <sup>12</sup>Máá ná jíjnáhan ná, ndiáca ni cásajniñu ná, te ni candoho ná jēe jihní. Te tēe yáha jēe ní quívicoo sandihí, chí máá ñin hora-ni ni cásajniñu de. Te ñinú-ni ni chiyāhu ní sáña jíin de, áchí de. <sup>13</sup>Te tēe chíí ñuhun ni cahān jíin ñin de: Amigo, nasūu jēe tú vāha sáha ri jíin ró. ¿A tu ní sándaā yō jeē ñin denario quiyāhu ró, chí naún? <sup>14</sup>Núu súcuan te quihin yāhu ró te quinhun rō. Chí cúní rí jeē tēe ni quívicoo sandihí yáha, ñinú quiyāhu de jíin máá ró. <sup>15</sup>¿Te á tu cuu sáha ri ndese cúní rí jíin xuhun máá rí? ¿Te chí cúcuésún ni rō jeē ní chiyāhu vāha ri de jíjnáhan de siquī jeē vāha ni rí? áchí de. <sup>16</sup>Te nájñuhun ni sáha tēe chíí ñuhun, suni súcuan sáha Yaā Dios. Chí ñayuu cácuu sandihí, nduu i nuū. Te ñayuu cácuu nuū, nduu i sandihí. Chí cuehē ñayuu cána ya jeē candíje i ya. Te jecu-ni i candíje, te nácāji ya maá i jeē ndúu i séhe ya. Achí yá.

### Jeē ni cáhān tucu Jesús jeē cúu yā

(Mr. 10.32-34; Lc. 18.31-34)

<sup>17</sup>Yūcuán na te ná ni quihin Jesús ichi cuahān yā ñuu Jerusalén, te ni cana sñin ya ndihúxi uū tēe cácuáha jíin yá. Te ni cahān yā jíin de:

<sup>18</sup>Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácu-jéhnu jíin núu tēe cástéén tutu ley. Te ndonda de siquī rí jeē cúu rí. <sup>19</sup>Te squívi de ruhū nuū tēe nación Roma jeē cáyūcú Jerusalén cándacu jniñu. Te tāca tēe un sácata de nuū rí. Te cani de ruhū, te sáá te cahni de ruhū jicā cruz. Te nuū uní quiví te natecu rí. Achí yá.

**Jeē ni jícān naná Jacobo  
jíin Juan iin favor nuū yā**

(Mr. 10.35-45)

<sup>20</sup> Yūcuán na te ni quee ñasihí Zebedeo nuū yā jíin séhe ña Jacobo jíin Juan. Te ni jecuiñī yití ña nuū yā, jícān ña iin favor nuū yā. <sup>21</sup> Te ni cajñūhun yā ña:

¿Na vé cuní rō?

Te ni cahān ña:

Cuāha ní jñūhun jeē quivī ndácu ní jniñu te conēne ndindúú séhe ná yáha xiin ní, iin i lado váha ní, te inga i lado jecó ní, achí ña.

<sup>22</sup> Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho rī? Achí yá.

Te ni cacahān de:

Cuu sáha ná.

<sup>23</sup> Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho rī. Te jeē cónēne ró lado váha ri jíin lado jecó rí, nasūu rúhū cúu jeē cuáha jñūhun. Chi je íyó túhva cuu tāca tée jeē ní nacāji Tátá rī, te tēe un níhīn. Achí yá.

<sup>24</sup> Te uxī gā tēe cáscuáha jíin yá ní cajini de jñūhun yáha. Te ni caquitī ni de nuū uú ñani ún. <sup>25</sup> Te Jesús ni cana ya de, te ni cahān yā jíin de:

Cájini rō ndese cásaha tēe cácujuhnu nuū ñáyuu tǎcá nación. Chi cándacu níhīn de jniñu nuū i, te máa de cáchí ndese coo. <sup>26</sup> Te máa ró jijnáhan ró, chi ma sáha ró súcuan. Chi núu ndé iin ró cúní cujéhnu, sa suhva cuajniñu ró núu jnáhan ró. <sup>27</sup> Te núu ndé iin ró cúní cuu nuū, sa suhva sáha ró máa ró mozo nuū jnáhan ró. <sup>28</sup> Chi suni súcuan sáha ruhū, Yāa ní nduu tēe, chi nasūu jēe véji ri jeē cuajniñu ñáyuu nuū rī, chi sa suhva véji ri jeē cuajniñu ri nuū ñáyuu. Te cuāha

ri maá rí cuu rī návāha jnama ri cuehē ñáyuu, achí yá.

**Jeē ní nasávāha ya uū tēe cuáá**

(Mr. 10.46-52; Lc. 18.35-43)

<sup>29</sup> Yūcuán na te ni quenda ya jíin de ñuu Jericó. Te cuehē ndasí ñáyuu ni candiquín i ya. <sup>30</sup> Te yuhíchi un cáyūcu uū tēe cuáá. Te ni cajini de jñūhun jeē yáha Jesús cuahān yā, te ni cacana jee de:

Máa ní jeē cúu ní Séhe yucūn David, cundáhú ni ni sáña, áchí de.

<sup>31</sup> Te ñáyuu un ní cacahān i nuū de jeē na cási de yuhu de. Te víhyá gā ni cacana jee de:

Máa ní jeē cúu ní Séhe yucūn David, cundáhú ni ni sáña víi, achí de.

<sup>32</sup> Te ni jecuiñī Jesús, te ni cana ya ndindúú tēe cuáá un, te ni cajñūhun yá de:

¿Na vé sáha ri jíin ró cácu ni rō?

<sup>33</sup> Te ni cacahān de jíin yá:

Jeē na ndúndijin tinūu ná cácu ni ná, achí de.

<sup>34</sup> Te ni cundáhú ni yā de. Te ni tee ya ndaha ya tinūú de. Te ni candundijin-ni tinūú de. Te ni candiquín de ya cuangoo de jíin yá.

**Jeē ni quívī Jesús ñuu Jerusalén**

(Mr. 11.1-11; Lc. 19.28-40;

Jn. 12.12-19)

**21** Te nuū cuácuyajni ya ñuu Jerusalén, te ni jinū yā jíin tēe cáscuáha jíin yá ñuu Betfagé, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de. <sup>2</sup> Te achí yá jíin de:

Cuáhán ñuu lulí íne ichi núú. Te yūcuan níhīn rō iin burra, núhni tī jíin iin burro lulí. Te ndají ró tī, quijicoo ró jíin tī nuū rī. <sup>3</sup> Te núu ndé iin cahān jíin ró, te cachi rō nuū: Máa Jítóho yō jíini ñúhún yá tī, achí rō. Yūcuán na te siáá-ni i tī, quiji ró jíin tī, achí yá.

<sup>4</sup>Te súcuan ni cuu tãcá jniñu yáha návãha squícu jñuhun ni cahãn tãe ni nacani jñuhun Yaã Dios nde jenahán, yósó núu tútu:

<sup>5</sup>Cachi rō nuū ñayuu ñuu Jerusalén jeē naní ñuu Sión:

Yáhã condēhe rō jeē vēji Rey rō.

Tu sãjẽhnu ya maá yá, chi máá burra-ni yósó yá,

jín burrito, sēhe quití ndíso.

Achí tutu.

<sup>6</sup>Yūcuán na te tãe cáscuáha un cuán-goo de, te ni casáha de nájnũhun ni ndacu Jesús jniñu nuū de. <sup>7</sup>Te ndéca de burra jín sēhe tĩ, ni ndecoo de nuū yã. Te ni casoó de sahma de siquĩ tĩ, te ni jecosō yã tĩ. <sup>8</sup>Te cáhiin cuehẽ ñayuu, te ni cascáá i sahma i ini ichi. Te sava ga i ni cajehnde ndaha ñúú, te ni cachucun i ini ichi. <sup>9</sup>Te ñayuu cuangoo ichi núú jín ñayuu cuangoo ichi yátá, cácana jee i:

Yōhoyo cújẽhnu Yaã cúu Sēhe yucũn rey David. Yōhoyo vãha Yaã cúu Yaã jeē vēji jín jniñu máá Jítóho yō Yaã Dios. Te yōhoyo cújẽhnu máá Yaã Dios. Achí i.

<sup>10</sup>Te nuū ni quívi ya ñuu Jerusalén, te ndíhi ñayuu ñuu un ní cacuvaã i, te cuehẽ i cájnũhun jñahan:

¿Nde tãe cúu tãe yáha? achí i.

<sup>11</sup>Te ni cacahãn ñayuu vējicoo jín yá:

Yãha cúu Jesús jeē nãcani jñuhun Yaã Dios, jeē vēji nde ñuu Nazaret ndañúú Galilea. Achí i.

### **Jeē ní quenehen ya ñayuu ini templo**

(Mr. 11.15-19;

Lc. 19.45-48; Jn. 2.13-22)

<sup>12</sup>Yūcuán na te ni quívi Jesús ini templo cáhnu Yaã Dios. Te ni quenehen ya tãca ñayuu cájeen quití te cánaxico núú ñayuu jeē socō i. Te ni scotúú ndeyi ya tãca mesa tãe cástáyĩ xũhún, jín silla tãe cáxicó paloma. <sup>13</sup>Te achí yá jín i:

Yósó núu tútu ii jeē cahán Yaã Dios: Vehe ri chi vehe nuū cájicãn tahu cúu, achí Yaã Dios. Te máá rō jijnãhan rō,

chi nájnũhun yaū cava ñacuĩhná ni canasáha rō. Achí yá.

<sup>14</sup>Yūcuán na te sava ñayuu cuaá jín ñayuu chacuá ni quecoo i nuū yã ini templo un. Te ni nasávãha ya i. <sup>15</sup>Te sutú cácujeñnu jín tãe cástéén tutu ley Yaã Dios, ni cajito de tãcá jniñu jẽhnu sãha ya, te ni cajini de jeē cácana jee sũchi lúlĩ ini templo: Yōhoyo cújẽhnu Yaã cúu Sēhe yucũn rey David, achí i. Te ni caquitĩ ni de. <sup>16</sup>Te ni cacahãn de jín yá:

¿A tu jini rō jeē súcuan cácahãn sũchi yáha? achí de.

Te ni cahãn Jesús jín de:

Jini ri. ¿Te á ná tu cahu rō jeē yosó núu tútu ii jeē suhva cáhãn ñin tãe jín Yaã Dios?

Sãha ní jeē tãca sũchi lúlĩ jín sũchi cájexin, vãha ndasí cáhãn i jeē Yaã cújẽhnu cúu Cristo.

Achí.

<sup>17</sup>Te ni stóo ya de. Te ni quenda ya ñuu Jerusalén, cuahãn yã nde ñuu Betania. Te yūcuan ní ndóo ya jecuáá ún.

### **Jeē ní cáhãn yã nuū yújnu higo**

(Mr. 11.12-14, 20-26)

<sup>18</sup>Te jenéhen inga quivĩ cuanuhun yã ñuu Jerusalén, te jí yã sóco. <sup>19</sup>Te ni jito ya ñin nundēhe higo, ñin yuhíchi. Te ni jehẽn yã jehẽ. Te tú na ndehẽ ni ñhín yã, chi máá ndaha-ni ñin. Te ni cahãn yã jín:

Vijna te ma cúun cuitĩ gã ndehẽ xini rō, achí yá.

Te ni ichĩ-ni yujnu higo ún. <sup>20</sup>Te tãe cáscuáha jín yá, ni canaa ni de cájito de. Te ni cacajnũhún de ya:

¿Ndese ni sãha ní jeē yachí-ni ni ichĩ yujnu higo? achí de.

<sup>21</sup>Te ni cahãn yã jín de:

Jendaá cahãn rĩ jín rō, núu candíje rō te tú cani siquí ni rō, te cuu sãha rō jniñu jẽhnu nájnũhun ni sãha ri jín yujnu higo. Te nde jniñu jẽhnu ga cuu sãha



ró, chi nde cuu cahān rō jeē cújiyo yucu yáha, quihīn nuū mar, te sáha nájnūhun cahān rō. <sup>22</sup>Te tāca jēē cacán tahu rō jijnáhan ró, te núu candíje ró jēē nihín rō, te nihín rō. Achí yá.

### **Siquī jeē ndiso jniñu Jesús**

(Mr. 11.27-33; Lc. 20.1-8)

<sup>23</sup>Te ni quīvī tucu ya ini templo cáhnu. Te níni stéén yā jnūhun, te sutū cácujeñhu jíin táca tēe jéñhu jeē cándacu jniñu nuū ñáyuu hebreo, ni quecoo de nuū yā. Te ni cacajnūhún de ya:

¿Ndé ní nihín jniñu ró jēē sáha ró jniñu yáha? ¿Te ndé ñin ni tee jniñu siquī rō jeē sáha ró súcuan? Achí de.

<sup>24</sup>Te ni cahān Jesús:

Suni ruhū, cajñūhun rí rohó ñin jnūhun jíjnáhan ró, te núu cuu stío cuñí rō, yūcuán na te cachi rī nuū rō ndé ní nihín jniñu ri jeē sáha ri jniñu yáha. <sup>25</sup>¿Ndé ñin ni tee jniñu siquī Juan jeē ni scuándute de? ¿A Yaā Dios chí táca tēe? achí yá jíin de.

Yūcuán na te ni candajnūhun máa de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cácandíje ró de? <sup>26</sup>Te núu cahān yō jeē ñáyuu ni cateo jniñu un síquī de, te cáyūhu yó ñáyuu, chí ndívii i cácandíje i jeē tēe ni nacani jnūhun Yaā Dios ni cuu ndije Juan. Achí de cácahān máa de.

<sup>27</sup>Te ni cacahān de jíin Jesús:

Tu cájini rī, achí de.

Yūcuán na te ni cahān yā jíin de:

Ni ruhū, suni ma cáchi rī nuū rō ndé ñin ni tee jniñu siquī rī sáha ri jniñu yáha, achí yá.

### **Jnūhun yátá síquī uú sēhe yīi**

<sup>28</sup>Te ni cahān gā yā jíin de:

Cuni nahín ró jnūhun yátá yáha: ñin tēe ni iyo uū sēhe yīi de. Te ni cahān de jíin ñin i: Séhē, quihīn rō taxín ró ndehē uva rī vijna, achí de. <sup>29</sup>Te ni cahān i:

Ma quihín na, áchí i. Te ni cunúu, te ni nacani ni i, te cuahān i nuū jniñu ún. <sup>30</sup>Te tēe un ní jehēn de nuū ñnga sēhe de, te suni súcuan ni cahān de jíin i. Te ni cahān i: Cuu núu súcuan, te quihín na, áchí i. Te tu ní jehén i. <sup>31</sup>¿Te ndese cájini ni rō? Jeē ndindúú i, ¿ndé ñin i ni síquīcu jniñu cúní tatá i? achí yá.

Te ni cacahān de:

Sūchi jēē ni cáhān de jíin xñna gā, achí de.

Te ni cahān Jesús jíin de:

Súcuan cúu, te jendaá cahán rī jíin ró jeē tēe cástútú xūhun renta jíin ñahan cájica jnéni, yachí cánacani ni i jeē stóo i cuēchi i te quívicoo i ndaha Yaā Dios jeē ndacu ya jniñu nuū i, te máa ró jijnáhan ró chí ma quíví ró. <sup>32</sup>Chi ni quiji Juan, ni steén de ndese condiquín rō jnūhun ndaā, te tu ní cácandíje ró jnūhun ni cahān de. Te sa suhva tēe cástútú xūhun renta jíin ñahan cájica jnéni, ni cacandíje i jnūhun ni cahān de. Te máa ró, vésú ni cajito ró jēē ní cacandíje i, te tu ní cánacani cuiti ni rō jeē candíje ró. Achí yá.

### **Jnūhun yátá síquī tēe néé casájniñu nuū uva**

(Mr. 12.1-12; Lc. 20.9-19)

<sup>33</sup>Cuni sōho ñnga jnūhun yátá jíjnáhan ró: Ni iyo ñin tēe chí ñuhun. Te ni nachuhun de cuehē ndehē uva. Te ni jesi de corral, te ni sáha de ñin nuū cúhun ndehē un táxin. Te ni jeni de ñin vehe súcún návaha cuu coto de ní cáhnu.

Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de. <sup>34</sup>Te máa tiempo ndutútú uva, te ni tají de jecu mozo cuanuquihín sava uva nuū tēe casájniñu ún. <sup>35</sup>Te tēe un ní cajñi de mozo un. Te ñin i ni cacani de, te ñnga i ni cajehni de, te ñnga i ni cajēhe de yuū xiní. <sup>36</sup>Te tēe chí uva ni tají tucu de jecu gā mozo

cuangoo, cuehē gā vēsú jeē xíhna ññhún. Te suni súcuan ni casáha tēe un jíin ndíhi mozo un.

<sup>37</sup>Te jeē sándíhí na te ni tají de sēhe de cuahān. Te jéni ni de: Tēe ún chi cuatáhú de jíjnáhan de nuū sēhe ri. <sup>38</sup>Te tēe casájniñu ún, núu ní cajito de nuū sēhe tēe chíf uva, te ni cacahān maá: Tēe chíf táhū cúu jeē yáha. Na cáhni yō de, te ndōo tahú de cuu yó, áchí. <sup>39</sup>Te ni cajniñi de i, te ni caquenehen de i inga lado, te ni cajehni de i. Achí yá.

<sup>40</sup>Yūcuán na te ni cajnūhun yá de:

Núu súcuan te núu na quíji tēe chíf uva un, ¿te ndese sáha de jíin tēe casájniñu ún? áchí yá.

<sup>41</sup>Te ni cacahān de jíin yá:

Ma cundáhú cuiti ni de tāca tēe casáha jniñu néé un, chi cahni de. Te cuāha de ññhun cáá uva un núu inga sava tēe sájniñu nuū, cuu sava de ndehē jíin. Te quiví ndutútú ndehē, te tēe ún nacuāha de sava ndehē nuū tēe chíf uva. Achí de.

<sup>42</sup>Te ni cahān Jesús jíin de:

¿Te á ná tu cahu ró jnúhun yáha jeē yosó núu tútu ii, jeē ruhū cúu nájñūhun iin yuū? Chi áchí tutu:

Yuū jeē ní casquéhichí tēe cájeni vehe, yuū yáha nduu jeē quítuu vehe.

Maá Jítóho yō Yaā Dios ní sáha ya súcuan,

te cánaa ni yō jító yó jniñu yáha.

Achí tutu. <sup>43</sup>Núu súcuan te cáhán rí jíin ró jeē cujiyo-ni jeē ndácu Yaā Dios jniñu nuū rō jíjnáhan ró, te nacuāha ya jniñu un núu inga ñayuu jeē squícu váha i jniñu ndácu ya nájñūhun cúni yā. <sup>44</sup>Te ñayuu tu cácandíje, ndoho i nájñūhun ndóho ñayuu jeē cotútú siquī yuú te jnáhnú i. Te quiví sándaā Yaā Dios cuēchi, te ñayuu tu cácandíje, ndoho i nájñūhun ndóho ñayuu jeē nńga yuū siquī i te cundihi i sáha. Achí yá.

<sup>45</sup>Te sutū cácujeñnu jíin tēe grupo fariseo ni cajini sōho de tāca jnúhun yátá ní cahān yā. Te ni cajecūhun ni de jeē

siquī maá de cúu jñūhun yátá ní cahān yā siquī tēe casájniñu nuū uva jíin tēe cájeni vehe. <sup>46</sup>Te ni canducú de modo jniñi de ya. Te cáyühú de jeē quítí ni ñayuu, chí cájeni ni i jeē tēe nácani jñūhun Yaā Dios cúu ya.

### Jñūhun yátá siquī vico nándāha

**22** Yūcuán na te ni cahān tucu Jesús inga jñūhun yátá jíin de jíjnáhan de:

<sup>2</sup>Súcuan cúu jeē ndácu Yaā andiví jniñu nuū ñayuu: Cúu nájñūhun iin rey jeē sáha de iin vico jeē nándāha sēhe yíi de. <sup>3</sup>Te ni tají de tāca mozo de cuacana ñayuu jeē ni cáhān de jíin jéē quíjicoo.

Te ñayuu ún tu ní cácuñi i quíjicoo i. <sup>4</sup>Te ni tají tucu de jecu gā mozo quingoo, te áchí de jíin: Cahān jíin ñayuu ní cana ri un jéē iyó túhva ndeyu. Chi je ni jehni rí stiquī rí jíin táca gá quítí ní nduu, te ndíhi je iyó túhva. Nehen jíjnáhan ró vico nándāha. Achí rō jíin i. Achí de.

<sup>5</sup>Te ñayuu ní cana de ún tu ní casáha i cuenta. Chi iin i cuahān nuū ítu i, te inga i cuahān nuū jniñu sáha i. <sup>6</sup>Te sava ga i ni cajniñi i tāca mozo rey, te ni casácatā i nuū, te ni cajehni i. <sup>7</sup>Yūcuán na te yōhyo ni quítí ni rey. Te ni tají de soldado de ni jengoo, ni cajehni de ñayuu ní cajehni ndíyi ún, te ni cajehmu de ñuu i.

<sup>8</sup>Yūcuán na te ni cahān de jíin sava ga mozo de: Ndihi je iyó túhva jeē cóo vico nándāha. Te ñayuu ní cana ri ún, tu iyó váha jeē quíjicoo i chi nasūu ñayuu váha cácuo i. <sup>9</sup>Núu súcuan te cuáhán jíjnáhan ró tāca núu náquijnáhan calle. Te cana ró núu nasaa ñayuu nihin rō, na quíjicoo i vico nándāha. Achí de. <sup>10</sup>Te ni quendacoo mozo un cuángoo tācá ichi. Te ni castútú de ndíhi ñayuu ní canihin de, cúu ñayuu cunéé, cúu ñayuu váha. Te súcuan te ni chítú ñayuu ini vehe nuū iyó vico nándāha.

<sup>11</sup>Te ni quíví rey ini vehe jeē cahán de jíin ñayuu ni cutútú. Te ni jito de nuū

iin tēe jeē tu ñúhun sahma jeē ni jéhe de cuhun ñayuu quijicoo vico nándāha. <sup>12</sup>Te ni cahān de jíin tēe ún: Amigo, ¿ndese ni quívi ró yáha jéē tu ñúhun ró sahma vico nándāha? áchí de. Te máá tēe ún tu ní cáhán cuiti de. <sup>13</sup>Yūcuán na te ni cahān rey jíin tēe cájeni cohō: Jnií de te cuhni rō ndaha de jehē de, te quenehen ró de na quíhín de nuū quéhe nuū neē. Te yūcuán ndáhyū de te nacayihí yuhu de jeē ndóho xeēn de. Achí rey. <sup>14</sup>Chi cána Yaā Dios cuehē ñayuu jeē na cándíje i. Te jecu-ni i candíje, te máá i nácáji ya jeē ndúu i sēhe ya. Achí Jesús.

### Siquí xúhun renta

(Mr. 12.13-17; Lc. 20.20-26)

<sup>15</sup>Yūcuán na te cuango tēe grupo fariseo. Te ni candajnūhún de núu ndese sáha de návāha cahān yā iin jnūhun jeē nihín de cuēchi siquí yā. <sup>16</sup>Te ni catají de jecu tēe cáscuáha jíin máá de jíin tēe grupo Herodes cuango de. Te ni cacahān de jíin yá:

Maestro, cájini na jéē tēe cáhán ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ni iin ñayuu siquí ní, chí tu sáha ní cuenta ndese cúu iin iin i, chí inuú-ni sáha ní jíin i. <sup>17</sup>Núu súcuán te cahān ní ndese jéni ní ní: ¿A íyó váha jeē chúnaa yō renta nuū rey nación Roma jeē jnií nación yō, chí tuú? áchí de.

<sup>18</sup>Te ni jini Jesús jeē cájito ndee de ya. Te ni cahān yā jíin de:

Tēe stáhú-ni cácuu ró. ¿Najehē cájito ndee rō ruhū? <sup>19</sup>Stéén xūhun jéē jéconaa renta na cóto ri, achí yá.

Te ni castéén de iin denario nuū yā. <sup>20</sup>Te ni jito ya, te ni cajnūhun yá de:

¿Ndeé iin nuū cúu jeē ndeé nuū xúhun yáha, te ndé síhví cúu jeē ndeé yāhá?

<sup>21</sup>Te ni cacahān de jíin yá:

Nuū jíin síhví rey un cúu, áchí de.

Yūcuán na te ni cahān yā jíin de:

Núu súcuán te nacuāha ró núu rey un jéē yíhi cuenta nuū de, te nacuāha ró núu Yaā Dios táca jéē yíhi cuenta nuū maá yá, achí yá.

<sup>22</sup>Te nuū ní cajini de jeē ndichí ní cahān yā jnūhun yáha, te ni canaa ni de, te ni castóo de ya, te cuango de.

### Jeē ní cacajnūhún de siquí jeē nátecu ndīyi

(Mr. 12.18-27; Lc. 20.27-40)

<sup>23</sup>Te suni quívi un ní quecoo jecu tēe grupo saduceo nuū yā. Te tēe un cácahān jeē tu nátecu cuiti ndīyi. Te ni cacahān de jíin yá siquí iin jnūhun, áchí de:

<sup>24</sup>Maestro, Moisés ni cahān de jeē núu iin tēe cuu de, te ndōo ñasihí de, te núu tú sēhe de ní íyo jíin ña, núu súcuán te cánuú jeē ñani de naquihin ñasihí de, te sēhe de jeē cácu jíin ña nucuiñi nuū ndíyi ñani de. Achí Moisés. <sup>25</sup>Te ñuu na ní íyo uxā ñani. Te tēe núu ní quijnáhan de jíin ñahan. Te ni jihí de. Te jeē tú sēhe de ní íyo, te ni ndōo ñasihí de nuū ñani de. <sup>26</sup>Te tēe ún suni ni jihí de, te tú na sēhe de ní íyo tucu. Te suni súcuán tēe uní, nde jíin ndihúxá de. <sup>27</sup>Te nuū ní ndíhi de ni cajihí, te suni ni jihí ñahan ún. <sup>28</sup>Núu súcuán te quívi nátecu ndīyi, ¿ndé iin de cuu ña ñasihí de? Chi ndihúxá de ni condeca de ña. Achí de jíin yá.

<sup>29</sup>Yūcuán na te ni cahān yā jíin de:

Yōhyo cástívi ró jnūhun siquí jeē tu cájecūhun ni rō jeē cahán tutu ií, ni tu cájini rō jeē iyó poder Yaā Dios jeē nastécu yā ndīyi. <sup>30</sup>Chi quívi nátecu ndīyi, te tuá na jnūhun quijnáhan tēe jíin ñahan coo. Chi coo i nájñūhun ndajéhé Yaā Dios andívi. <sup>31</sup>Te siquí jeē nátecu ndīyi, ¿á tu ní cácahu ró tutu jnūhun jeē cahán Yaā Dios jíin ró? <sup>32</sup>Máá rí cúu Yaā Dios Abraham jíin Isaac jíin Jacob, achí Yaā Dios. Chi vésú je ni cajihí de, te cátecu de nuū iyó máá yá, chí cúu ya Yaā sáha jeē técu ñayuu ní cáni. Achí yá jíin de.

<sup>33</sup>Te ñayuu un ní canaa ni i cájini nahín i jñuhun stéen yā.

**Jniñu cánuú ndasí gá  
jeē ní ndacu Yaā Dios**

(Mr. 12.28-34)

<sup>34</sup>Yūcuán na te tēe grupo fariseo ni cajini de jeē ní cajesi tēe saduceo yuhu de ni sáha ya. Te ni candutútú de nuū yā.

<sup>35</sup>Te iin de jeē cúu tēe stéen tutu ley Yaā Dios, ni cajñuhún de ya, chi coto ndee de ya cuní de:

<sup>36</sup>Maestro, ¿ndé iin cúu jñuhun ndácu jniñu cánuú ndasí gá nuū tútu ley? achí de.

<sup>37</sup>Te ni cahān Jesús jíin de:

Coo maní ndasí ró jíin máá Jítóho rō Yaā Dios, nde jnāā ndasí ró sáha ró ndihi jeē cúsi ni yā, nde jíin ini jíin ánuá rō, jíin ní jēe níjnūnī rō, achí tutu. <sup>38</sup>Yāha cúu jniñu ndácu ya jeē cujéhnu ga te cánuú ndasí gá. <sup>39</sup>Te jniñu uū jeē ní ndacu ya, suni súcuan cáhān: Cundáhú ni rō jnāhan ró nájñuhun cundáhú ni rō máá ró. <sup>40</sup>Te chiji ndindúú jñuhun yáha ní quenda ndihi ley jeē ní tee Moisés, jíin ndihi jeē ní castéén tēe ni canacani jñuhun Yaā Dios, achí yá.

**Siquí jeē cúu Cristo sēhe yucūn David**

(Mr. 12.35-37; Lc. 20.41-44)

<sup>41</sup>Te níni cáyūcu tútú gá tēe fariseo un, te Jesús ni cajñuhun yá de:

<sup>42</sup>¿Nde se cájeni ni rō siquí Cristo? ¿Sēhe ndé yúcūn cúu ya?

Te ni cacahān de:

Sēhe yucūn David, achí de.

<sup>43</sup>Te ni cahān yā jíin de:

Núu súcuan ¿te ndese cúu jeē David ni cahān de Jítóho de ya, ni sáha Espíritu Santo nde jenahán? Chi ni cahān de:

<sup>44</sup>Máá Jítóho yō Yaā Dios ni cahān yā jíin Jítóho rī, Yaā quiiji:

Cucōo ró lado váha ri nuū cujéhnu ró, te na sáha ri jeē quende rō poder táca jéé cájito uhū rohó.

Achí Yaā Dios. Achí David. <sup>45</sup>Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

<sup>46</sup>Te ni iin de tu ní cúu stió cuñí cuítí de jñuhun nuū yā. Te nde quivī ún tuá ni iin de ní chūndeyí ni de cajñuhún de ya.

**Jeē ni cáhān yā jeē  
iyó cuéchi de jíjnāhan de**

(Mr. 12.38-40; Lc. 11.37-54; 20.45-47)

**23** Yūcuán na te ni cahān Jesús jíin ñayuu jíin tēe cáscuáha jíin yá:

<sup>2</sup>Tēe cástéén tutu ley Yaā Dios jíin tēe grupo fariseo, cájeni ni de jeē ndíso jniñu de jeē steén de ley jeē ni jéhe ya nuū Moisés. <sup>3</sup>Núu súcuan te cuatáhú ró te squícu ró táca jēe cándacu de nuū rō. Te ma sáha ró nájñuhun casáha máá de. Chi cacahān-ni de, te tu cáscuácu de. <sup>4</sup>Chi suni cástéén de táca ley ni catava máá de jeē yí sáha, te cátee de siquí ñayuu, te tu cácuñdeyí i squícu i. Te máá de jíjnāhan de, chi ni iin xiní ndáha de tu cáscánda de jeē squícu de. <sup>5</sup>Te máni siquí jeē na cuájñuhún ñayuu de cúu ndihi jeē casáha de. Chi cánujnahan ni de cuhni de cuehē jñuhun tutu i jneē de jíin ndaha de. Te suni cáscácani ga de yuhvā yusáhma de jeē steén jeē cácujeñnu ga de vesú inga ñayuu. <sup>6</sup>Te cánujnahan ni de cucōo de nuū silla yíñuhún gá nuū cáyeji ñayuu vico, jíin silla yíñuhún gá ini vehe i sinagoga. <sup>7</sup>Te suni cánujnahan ni de jeē cahán yíñuhún ñayuu jíin de nuū calle, jíin jéé cahán i maestro jíin de.

<sup>8</sup>Te máá ró jíjnāhan ró, ma cuáha ró jñuhun jeē cahán ñayuu maestro jíin ró. Chi inuú cácuu ndihi ró jéé cácuu ró hermano, te íyó iin-ni Maestro rō jeē cúu ruhū, Cristo. <sup>9</sup>Te ma chiñuhún ró ni iin tēe ñayiví yáha jeē cahán rō padre jíin de. Chi íyó iin-ni Tátá rō jíjnāhan ró, Yaā ndeé andiví. <sup>10</sup>Te suni ma cuáha ró

jnúhun jeē cahán i jitoho jíin ró. Chi íyó ñni Jitoho rō, te suu cúu ruhū, Cristo.  
<sup>11</sup> Te tēe mēhñu ró jíjnáhan ró jeē jejníñu nuū jnáhan, suu de cúu jeē cujéñu ga.  
<sup>12</sup> Chi tēe jeē sajeñu de máá de, sa ndulú de. Te tēe jeē sálulí de máá de, sa ndujéñu de.

<sup>13</sup> 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cájesi ró jeē quívi ñayuu ndaha Yaā andiví jēe ndacu ya jniñu nuū i. Chi tu quívicoo máá ró, ni tu cájēhe ro jnúhun quívicoo ñayuu nducú quívi.

<sup>14</sup> 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cáquende rō vehe ñahan ní caquendōo ndáhú. Yūcuán na te cájicān tahu nahán ró návāha cani ni ñayuu jeē tú na cuēchi ró. Jeē yúcuan xeēn gā ndoho ró castigo.

<sup>15</sup> 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi ní ñuhun íchi jíin ní mar cájica cuu ró cánducú ró ñni ñayuu scandíje ró sáhān maá ró. Te núu ni candíje i, te cásáha ró jēe vihyá gā cúu cuēchi i jeē quihín i infierno vēsú maá ró.

<sup>16</sup> 'Nacā xeēn ndoho ró, chi cácuu ró nájnūhun tēe cuáá jēe steén ichi nuū ñayuu. Chi cácahān rō: Núu ndé tēe jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō. <sup>17</sup> Tēe cánéé tēe cuáá cácuu ró jēe castívi ró jnūhun cácahān rō. ¿Ndé ñni cúu jeē cujéñu ga, á oro un chíí Yaā Dios jeē ndeé ini templo jeē sáhii oro un? <sup>18</sup> Te suni cácahān rō: Núu ndé tēe jéjnūhun téyí de, te núu cahān de jeē Yaā Dios jeē chíí altar na cuáha ya cas-

tigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí ndajniñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō. <sup>19</sup> Tēe cánéé tēe cuáá cácuu ró jēe castívi ró jnūhun cácahān rō. ¿Ndé ñni cúu jeē cujéñu ga, á ndajniñu yúcu nuū altar, chíí Yaā Dios jeē sáhii yā ndajniñu ún? <sup>20</sup> Núu súcuan te tēe jéjnūhun téyí, te núu ndácunehen de Yaā Dios jeē chíí altar, núu súcuan te nde jíin ndajniñu yúcu nuū altar ndácunehen de. <sup>21</sup> Te tēe jeē jéjnūhun téyí, te núu ndácunehen de templo, núu súcuan te nde jíin Yaā Dios jeē ndeé ini templo ndácunehen de. <sup>22</sup> Te tēe jéjnūhun téyí, te núu ndácunehen de andiví, núu súcuan te suni ndácunehen de mesa Yaā Dios te nde jíin máá Yaā Dios jeē ndeé nuū mesa un.

<sup>23</sup> 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cásáha ró úxí úxí nuhni taminú jíin yucū anís jíin yucū comino, te cásocō rō ñni ñni siquí tāca úxí un núu Yaā Dios. Te cástóo ró jnūhun cánuú ndasí gā nuū ley, suu jeē cáca ndaā rō, jíin jēe cundáhú ni rō jnáhan ró, jíin jēe candíje ró. Tāca jēe yáha cánuú sáha ró núu, te suni ma stóo ró jēe socó rō tāca yucū ún. <sup>24</sup> Cácuu ró nájnūhun tēe cuáá jēe steén ichi nuū ñayuu. Chi cásquícu ró ñni jeē lulí gā un, te cástóo ró jēe cánuú gā. Te suu cúu nájnūhun jeē cātava rō chūcún ndíhi jeē ñuhun nuū ndúxí, te cácocó ró ñni quití cáhnu jeē naní camello.

<sup>25</sup> 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi nájnūhun jeē cá-nacate ró yátā vaso jíin yátā cohó. Te ichi íni rō chi ñuhun máni máá jnūhun cuíhna jíin jnūhun ndíyo ni. <sup>26</sup> Tēe cuáá cácuu ró, fariseo. Xihna gā sáha ró jēe coo ndoo ini anuá rō, te yūcuán na te

suní coo ndoo tāca jéē casáha ró jéē cájito ñayuu nuū.

<sup>27</sup> 'Nacā xeēn ndoho róhó tée cástéén tutu ley jiín róhó tée fariseo, chí tée stáhú-ni cácuu ró. Chí cándāa ró nájnūhun vehe ndīyi nuū panteón jeē cáyaa. Chí ichi yátá jíto luu, te ichi íni nūhun chítú síqui ndīyi jiín tāca jéē tehyú. <sup>28</sup> Te súcuan cácuu máá ró, chí ichi yátá ró casáha ró jeē tée ndaā cácuu ró núu ñayuu. Te ichi íni ró nūhun chítú jnúhun stáhú-ni jíin jnúhun néé.

<sup>29</sup> 'Nacā xeēn ndoho róhó tée cástéén tutu ley jiín róhó tée fariseo, chí tée stáhú-ni cácuu ró. Chí casáha ró vehe síqui nuū yíndūji ndīyi jí ró, tée ni canacani jnúhun Yaā Dios nde jenahán. Te casáha luu ró vehe síqui nuū yíndūji tāca tée ni iyo ndaā. <sup>30</sup> Te cácahān ró: Núu jeē suni yúcu yó tiempo jeē ní cotecu ndīyi jí yō, te ma squívi nduu yō jíin de jeē cáhni yō tée ni canacani jnúhun Yaā Dios, achí ró. <sup>31</sup> Te súcuan cácahān ndaā ró jeē máá ró cácuu yucūn ñayuu ni cajehni tée ni canacani jnúhun ya. <sup>32</sup> Núu súcuan te tāca cuéchi jeē ní casquejéé ndīyi jí ró, máni un casáha ga máá ró.

<sup>33</sup> 'Va sēhe coō cácuu ró, chí xeēn ró nájnūhun coō. ¿Ndesé cācu ró jéē ma jnahnú ndetū ró quingoo ró infierno? <sup>34</sup> Núu súcuan te tají rí tāca tée nacani jnúhun Yaā Dios nuū ró, jíin tāca tée ndíchi jéē castéén jnúhun ya. Te sava de cahni ró, te sava de cata caa ró jicā cruz. Te sava ga de caní ró de ini tācá vehe íi sinagoga, te scúnu ró de quingoo de tācá ñuu. <sup>35</sup> Te súcuan te condee cuéchi síqui máá ró jeē ní cajehni jí ró tāca tée ndaā, xihna gā nde Abel tée ndaā, te nde Zacarías sēhe Berequías, tée ni cajehni de ini templo sava mēhñu cuarto íi jíin altar. <sup>36</sup> Jendaá cahán rí jíin ró jeē tāca cuéchi yáha condee síqui ñayuu iyó vijna.

## Jeē cucuíhyá ni yā jíto ya ñuu Jerusalén

(Lc. 13.34-35)

<sup>37</sup> 'Róhó ñuu Jerusalén, jéhni ró tée cá-nacani jnúhun Yaā Dios, te jéhe ro yúu xiní tée tájí Yaā Dios vējicoo nuū ró. Te cuehē jínu ni cuni rí nastútú rí sēhe ró, nájnūhun ndují jéē nastútú tí sēhe tí chíji ndijēn tí, te tu ní cúní ró. <sup>38</sup> Núu súcuan te vijna te stóo uun na rí rohó jíin sēhe ró. <sup>39</sup> Chí cáhān rí jíin ró jéē ndé vijna te ma cóto cuiti gā ró nuū rí, chí nde quiji quiví jeē cahán sēhe ró: Yōhoyo vāha Yaā cúu Yaā véndiji jíin jniñu máá Jítoho yō Yaā Dios, achí i. Achí yá.

## Jeē ní cachi yā jeē náā templo

(Mr. 13.1-2; Lc. 21.5-6)

**24** Te ni quenda Jesús ini templo cáhnu cuahān yā. Te ni quecoo tée cáscuáha jíin yá, te ni cacahān de jíin yá síqui tācá vehe jeē ndejnáhan jeē cúu máá templo un. <sup>2</sup> Te ni cahán yā jíin de: Tāca jéē cájito ró yáha, jendaá cahán rí jíin ró jeē quiji quiví jeē ma cóso jnáhan ga ni íin yuū, chí ndíhi jnanū. Achí yá.

## Na seña coo nuū cuácuyajni ndíhi ñayiví

(Mr. 13.3-23; Lc. 21.7-24; 17.22-24)

<sup>3</sup> Te ni jehēn yā jíin tée cáscuáha jíin yá nde yucu Olivos, te ni cucōo ya yūcuán. Te ni quecoo de nuū yā, te ni cacajnúhun sfin de ya:

Castūhun ní ndé quiví coo tāca jéē ní cachi ní jéē coo. ¿Te na seña coo núu ni cuyajni quiví ndíji ní jíin jéē jínu ñayiví? achí de.

<sup>4</sup> Te ni cahán Jesús:

Coto ró jéē ma stahú ni íin de róhó. <sup>5</sup> Chí quijicoo cuehē tée jeē stahú jíin síhvi rí. Máá rí cúu Cristo, achí de. Te súcuan stáhú de cuehē ñayuu. <sup>6</sup> Te nihin ró jnúhun jeē tāca lado iyó guerra, chí je yajni coo guerra. Te ma yūhu ró,

chi cánuú coo súcuan. Te ni ná tu jinū quivī ndihi ñayiví. <sup>7</sup> Chi ndonda nación siquī inga nación, te ndonda ñuu siquī inga ñuu jeē cuajnáhan. Te coo jnamā jíin cuehyi xeēn. Te cháha chúcuan jnāa. <sup>8</sup> Te tāca jéē yáha cácuu jnūndóho que-jéé xihna ñúhún gá.

<sup>9</sup> Yūcuán na te nastúu i róhó jíjnáhan ró jéē stóho i róhó te cahni i róhó. Te ndihí ñayuu quitī ni i nuū rō jeē siquī ruhū. <sup>10</sup> Te quivī ún chi cuehē ñayuu candíje caca yátá i, te quitī ni i nuū jnáhan i, te nastúu jnáhan i. <sup>11</sup> Te canecoo cuehē tēe stáhú, te cahān de jeē jnúhun Yaā Dios cánacani de, te stáhú de cuehē ñayuu. <sup>12</sup> Te nducuehē jniñu néé, te jeē yúcuau cuehē i ma cóo manī gā i. <sup>13</sup> Te ñayuu cuiñi nihin jíin jnúhun ri nde quivī jínu, ñayuu ún chi cácu. <sup>14</sup> Te jnúhun yáha siquī ndese ndácu Yaā Dios jniñu, cuitē núu ní cáhnu ñayiví, návaha cuni ñayuu tācá nación. Yūcuán na te jinu ñayiví.

<sup>15</sup> Te Daniel, tēe ni nacani jnúhun Yaā Dios, ni tee de jnúhun iin tēe néé jéē quíji. Te róhó jéē cácahu tutu ún, na jécūhun ni rō. Chi iin quivī te cuni rō jeē sáha ndeváha de jeē stívi de tācá ndajniñu iini templo, te cuiñi de ini lugar i. <sup>16</sup> Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. <sup>17</sup> Te ñayuu cáyūcu núu quéhe, ma ndívi i ini vehe jeē quénehen i ndajniñu i, chi cánuú cunu yachí i návaha cácu i. <sup>18</sup> Te ñayuu cáhiin nuū ítu, ma ndíji i vehe jeē quíhin i sahma i. <sup>19</sup> Te quivī ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachí ña. <sup>20</sup> Te cacān tahú rō jeē ma quíji jnūndóho un jéē cunu ró máá tiempo cúun yuhvā ni quivī ndétátú. <sup>21</sup> Chi jeē quejéé un te coo cuehē jnūndóho xeēn, jeē ná tu coo súcuan nde quivī ní jecōo ñayiví te nde vijna. Te jeē ndíhi jnūndóho ún te ni ma cóo ga jeē súcuan. <sup>22</sup> Te núu tú nastívi

Yaā Dios tiempo jnūndóho ún, te ni iin ñayuu ma cácu cuiti i. Te jeē siquī ñayuu cácondíje jeē ní nacāji ya, jeē yúcuau nastívi ya tiempo un.

<sup>23</sup> Núu súcuan te núu iin ñayuu cahān jíin ró: Yáha condēhe ró íne Cristo, chí: Yūcuán condēhe ró íne ya, achi i, te ma candíje ró jéē cahān i. <sup>24</sup> Chi canecoo tēe cástáhú jéē achi de jeē Cristo cúu de, chí achi de jeē tēe nácani jnúhun Yaā Dios cúu de. Te sáha de jniñu jéhu jeē naa ni ñayuu coto i, návaha stáhú de nde máá ñayuu ní nacāji ya, te núu na cúu. <sup>25</sup> Je ni castūhun rí nuū rō vijna nde ná tu coo. <sup>26</sup> Núu súcuan te núu cahān ñayuu jíin ró: Cuácondēhe ró, chi nde nuū ñúhun téhé íne ya, achi i, te ma quihín rō condēhe ró. Chí núu cahān i: Nehen condēhe ró, chi ini vehe yáha íne ya, achi i, te ma candíje ró jíjnáhan ró. <sup>27</sup> Chi nájnūhun jeē ndíndēe sáha taja te cúndijin nde ichi núu cáne niāndii jíin ndé ichi núu quéé niāndii, suni súcuan coo quivī ndiji ruhū, Yaā ní nduu tēe, chi ndíhi ñayuu coto. <sup>28</sup> Te nájnūhun jeē cutútú téji ndé-ni cúu nuū catú quiti ní jíhi, suni súcuan coo tāca jéē ní cáhān rí ndé-ni cúu-ni nuū cáhiyo ñayuu.

### **Ndese coo quivī ndiji Yaā ní nduu tēe**

(Mr. 13.24-37; Lc. 21.25-33;  
17.26-30, 34-36)

<sup>29</sup> Yūcuán na te núu ni ndíhi tāca jnūndóho quivī ún, te cojnúu níandii, te yoō ma ndíi gā. Te ningoo quimi andiví. Te tāca jéē íin andiví chi quisi i. <sup>30</sup> Yūcuán na te coto ñayuu nuū máá rí, Yaā ní nduu tēe, ndiji ri ichi ándiví. Te ndahyū ñayuu tācá nación ní cáhnu ñayiví. Te coto i nuū ruhū, Yaā ní nduu tēe, ndiji ri jíin vícō andiví, te condiso ri cuehē poder, te yōhyo luu cujéhu ri. <sup>31</sup> Te tají rí ndajéhé rí quingoo, te tiví nihin ya trompeta. Te quinastútú yá ñayuu ní nacāji ri ndicúun lado ñayiví, nde iin lado ñayiví jíin ndé inga lado.

<sup>32</sup> Vijnā te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. <sup>33</sup> Te suni súcuan núu ni cajini rō jeē ní quejéé cúu tǎcá jniñu jeē ni cáhān rī, yūcuán na te na jécūhun ni rō jeē ní cuyajni quivī ndiji ri, te yachī coo. <sup>34</sup> Jendaá cahán rī jíin ró jeē ma cúu ndihī ñayuu jeē cóto jnūndóho ún, chi nde squícu ndihī jniñu ún. <sup>35</sup> Andiví jíin ñáyiví chi naa, te tǎca jnūhun cáhān rī chi ma náā, chi ndihī squícu.

<sup>36</sup> Te quivī jíin hora jeē ndíji ri, tú ni ñin ñayuu jiní, ni máá ndajéhé cáhiyo andiví, ni máá rí, Sēhe Yaā Dios. Chi máá ñin ni Tátá rī Yaā Dios cúu jeē jiní.

<sup>37</sup> Chi nájnūhun ni cuu quivī ni íyo Noé, suni súcuan coo quivī ndiji ruhū, Yaā ní nduu tēe. <sup>38</sup> Chi quivī ún, nde ná tu cuun saū xeén, te cáyeji i cájihī i, cánandāha i, te cájēhe i sēhe síhī i jeē nándāha, nde ni jinū quivī jeē ni quivī Noé ini barco cáhnu jeē naní arca. <sup>39</sup> Te tu ní cácandíje ñayuu jeē cuun saū xeén, te ni cuun, te ni ndaa ndute ni cajihī ndihī i. Te suni súcuan coo núu na ndíji ruhū, Yaā ní nduu tēe. <sup>40</sup> Te quivī ún cone uū tēe sájniñu nuū ítu. Te ñin de naquihin ri, te inga de ndōo. <sup>41</sup> Te coo uū ñahan jeē ndíco cáhnu, te ñin ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chi tu ní cácandíje i.

<sup>42</sup> Núu súcuan te ndito na cóo ni rō, chi tu cájini rō na quivī ndiji Jitoho rō. <sup>43</sup> Te na chúhun ni rō jeē cahán jnūhun yátá yáha: Tēe chíí vehe, núu jeē jiní de na hora quiji ñacuíhná, te condito de, te ma cuáha de jnūhun sácuihná ndajniñu vehe de núú. <sup>44</sup> Te rōhó jíjnáhan ró, suni súcuan coo tūhva ró, chi máá hora jeē tú na vé cájeni ni rō, te ndiji ruhū, Yaā ní nduu tēe.

## Jnūhun yátá síquī mozo

(Lc. 12.41-48)

<sup>45</sup> Núu súcuan te coo ró nájnūhun ñin mozo jeē ndíto xinī te squícu vāha. Te máá patrón ni jeni de mozo un jéé cóto i ñayuu vehe de, návāha scáji i máá hora. <sup>46</sup> Te yōhyo ndetū mozo un jéé núu ni ndee patrón, te cuni de jeē súcuan squícu vāha i. <sup>47</sup> Jendaá cahán rī jíin ró jeē cani de mozo un jéé cóto i ndihī ndajniñu de. <sup>48</sup> Te núu mozo sáha néé cúu i, te jéni ni i jeē ma ndíji yachī patrón i, <sup>49</sup> te quejéé i cani i jnáhan mozo i, te caji i coho i jíin tēe cánajini, <sup>50</sup> núu súcuan te ndee-ni patrón quivī jeē tu ndétu i jíin hora jeē tú na vé jéni ni i. <sup>51</sup> Te stóho xeén de i, te squívi de i nuū cáhiin tēe stáhú-ni. Te yūcuan ndáhyū i te nacayihí yuhu i jeē ndoho xeén i. Achí yá.

## Jnūhun yátá síquī uxī sūchi síhī

**25** Te suhva cúu jeē ndácu Yaā andiví jniñu nuū ñáyuu: Cúu nájnūhun ñin vico nándāha. Te ni íyo uxī sūchi síhī jeē ní caquihin i linterna cándaha i, te ni quendacoo i cuajnahān i ñin tēe nandāha. <sup>2</sup> Te uhūn i chi tú ndito xinī i, te uhūn i chi ndito xinī i. <sup>3</sup> Te sūchi tú ndito xinī, cándaha i linterna i, te tu cándaha i petróleo jeē náchuhun i. <sup>4</sup> Te sūchí ndito xinī, chi cándaha i botella petróleo jíin linterna i. <sup>5</sup> Te níni cúcuéé quiji tēe nandāha ún, te ni quee máhná, te ni caquixī ndihī i. <sup>6</sup> Te nuū ní cuu sava ñuú, te ni cajini i jeē cácana jee: Je vēji tēe nandāha. Cuángoo quijnahan rō de jíjnáhan ró, áchí. <sup>7</sup> Yūcuán na te tǎca sūchi síhī un ní candonda i, te ni casátūhva i linterna i. <sup>8</sup> Te sūchi tú ndito xinī, ni cacahān i jíin sūchi ndito xinī: Cuāha jecu petróleo nuū rī jijnáhan ró, chi cuandahvā linterna rī, achí i. <sup>9</sup> Te ni cacahān sūchí ndito xinī: Ma cúu, chi ma cánda jeē cúu máá rí jíin máá ró. Vāha ga quingoo ró núu cúyāhu, te cuaan ró



jéē cúu máá ró. Achí i. <sup>10</sup> Te níní cuán-goo i cuaan i, te ni quee-ni tēe nandāha. Te sūchi cáhiyo tūhva un, ní quívicoo i jín de vico nándāha de. Te ni ndihyū yehyí. <sup>11</sup> Te ni cunúu, te ni quecoo uhūn gā sūchi síhí un. Te ni cacahān i jín tēe nándāha: Nune ní yéhyí na quívicoo ná, áhí i. <sup>12</sup> Te ni cahān maá de: ¿Ndé nuū véjicoo ró? Chi tu jíní rī rohó, áhí de. Achí yá.

<sup>13</sup> Yūcuán na te ni cahān yā:

Núu súcuan te ndito coo ni rō, chi tu cájini rō na quiví na hora ndiji ruhū, Yaā ní nduu tēe. Achí yá.

### **Jnūhun yátá síquī tēe ní jēhe núu xūhun núu tāca mozo**

<sup>14</sup> Te suhva cúu jeē ndácu Yaā andiví jniñu nuū ñayuu: Cúu nájnūhun iin tēe jeē quihín jicá de inga ñuu. Te nde ná tu quihín de te ni cana de mozo de jijnáhan, te ni jēhe núu de xūhún de nuū i, jeē na sájniñu i jín nāvāha nducuehē.

<sup>15</sup> Te nuū iin i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de iin mil. Súcuan ni jēhe de, chi jíní de nasaa canda iin iin i sájniñu i jín. Yūcuán na te ni quihín de ichi cuahān jicá de. <sup>16</sup> Te mozo jeē ní quihín uhūn mil xūhún, ni sájniñu de jín. Te ni nihín de uhūn gā mil síquī. <sup>17</sup> Te mozo jeē ní quihín uū mil xūhún, suní ni nihín de uū gā mil síquī. <sup>18</sup> Te mozo jeē ní quihín iin mil xūhún, ni jehēn de ni jete de yaū, te ni chisāhí de xūhún patrón de.

<sup>19</sup> Te ni yāha cuehē tiempo, te ni ndee patrón mozo un jijnáhan. Te ni nandacān de cuenta nuū i. <sup>20</sup> Te ni quee mozo jeē ní quihín uhūn mil xūhún un, te ni nacuāha de xūhún un núu patrón de jín úhūn gā mil jeē ni nihín de síquī. Te ni cahān de: Ni jēhe ní úhūn mil nuū ná, te yāha íyó úhūn gā mil jeē ni nihín na síquī. Achí de. <sup>21</sup> Te ni cahān patrón jín de: Iyó váha núu súcuan. Yōhyo

vāha mozo cúu ró jéē síquī vāha ró. Chi vāha ni síquī ró iin jniñu lúlí-ni, te vijna te cuāha ri jniñu jéhu ndacu ró. Te quiví ró núu cusí ni rō jín rí. Achí de. <sup>22</sup> Yūcuán na te ni quee mozo jeē ní quihín uū mil xūhún un. Te ni cahān de: Ni jēhe ní uū mil nuū ná, te yāha íyó uū gā mil jeē ni nihín na síquī. Achí de. <sup>23</sup> Te ni cahān patrón jín de: Iyó váha núu súcuan. Yōhyo vāha mozo cúu ró jéē síquī vāha ró. Chi vāha ni síquī ró iin jniñu lúlí-ni, te vijna te cuāha ri jniñu jéhu ndacu ró. Te quiví ró núu cusí ni rō jín rí. Achí de. <sup>24</sup> Te ni quee mozo jeē ní quihín iin mil xūhún un, te ni cahān de jín patrón: Je jíní na nihín jéē tēe xeēn cúu ní. Chi cuehē gā cuní ni vēsú jeē cúu sáha mozo ni, te cuehē gā nandacān ní vēsú jeē ni jēhe ní. <sup>25</sup> Te jeē yúcuan ní yūhu ná, te ni jehēn na ní chisāhí ná xūhun ní chíji ñuhun. Te yāhá na nācuāha na xūhun ní. Achí de. <sup>26</sup> Te ni cahān patrón jín de: Mozo cuxí cúu ró te máni jniñu néé sáha ró. Chi jéni ni rō jeē cuehē gā cuní rī vēsú jeē cuu sáha mozo rī, te cuehē gā nandacān rī vēsú jeē ni jēhe rí. <sup>27</sup> Núu jeē ni chúne ró xūhun rí nuū banco nuú, te jeē ní ndee rī te naquihín ri xūhun rí nde jín séhe xūhun núu. Achí de jín i. <sup>28</sup> Te ni cahān de jín táca gá mozo de: Núu súcuan te quende rō mil xūhun jínā nuū i, te cuāha ro núu mozo névāha uxí mil. <sup>29</sup> Chi ñayuu jeē névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ni vēsú jecu jeē névāha i. <sup>30</sup> Te mozo yāha jéē tu sájniñu vāha, quenehen ró i na quíhín i nuū quéhe nuū néē. Te yúcuan ndáhyū i te nacayihí yuhu i jeē ndoho xeēn i. Achí patrón un.

### **Síquī jeē cóo juicio tācá nación**

<sup>31</sup> Te ni cahān gā yā:

Iin quiví te ndiji máá Yaā ní nduu tēe, te cuu ya Rey nuū ñayuu. Te tācá ndajéhé yā cuiñi ní xiin ya. Te cucōo ya

mesa nuū ndácu ya jniñu, te yōhyo luu cujéhnu ya. <sup>32</sup>Te ndutútú ñayuu tācá nación nuū yā. Te sásñn ya i jijnáhan i, nájñuhun cúsñn lanchi jíin ndixúhú sáha tēe ndító ti. <sup>33</sup>Te ñayuu váha jeē cúu nájñuhun lanchi, chucú yá i lado váha ya. Te ñayuu neé jeē cúu nájñuhun ndixúhú, chucú yá i lado jecó yá. <sup>34</sup>Yūcuán na te cahān Rey jíin ñayuu cáhiin lado váha ya: Nacā ndetū ró jeē ni sáha Tátá rī jíin ró. Nehen quívicoo ró núu ndácu ró jniñu. Chi nde quívī ní jecōo ñayívī te je ni sātūhva ya nuū ndacu ró jniñu. <sup>35</sup>Chi ni jīi rī sōco, te ni cajēhe ro jēē ní yeji rī. Ni jichī rī ndute, te ni cajēhe ró jēē ní jihi rī. Ni quiji ri nde ñuu jicá, te ni cajēhe núú ró vehe ni ndōo rī. <sup>36</sup>Ni cumani sahma ri, te ni cajēhe ró. Ni cocuhū rī, te ni jecondēhe ró ruhū. Ni ine ri vecāa, te suni ni jecondēhe ró ruhū. Súcuan cahān yā jíin ñayuu cáhiin lado váha ya. <sup>37</sup>Yūcuán na te cahān ñayuu váha un jíin yá: ¿Na quívī ní cajito ná níhín jēē jíi ni sóco, te ni cajēhe na jēē ní yeji ní, chí jēē jichí ni ndute, te ni cajēhe ná ní jihi ní? <sup>38</sup>¿Te na quívī ní cajito ná jēē ní quiji ní ndé ñuu jicá, te ni cajēhe núú ná vehe ni ndōo ní, chí jēē cúmani sahma ní, te ni cajēhe ná? <sup>39</sup>¿Te na quívī ní cajito ná jēē huhú ní, chí jēē íne ní vecāa, te ni jecondēhe ná níhín? achí i. <sup>40</sup>Yūcuán na te cahān Rey jíin i: Jendaá cahān rī jíin ró jēē ná ni casáha ró súcuan jíin iin tācá hermano rī jeē cácandíje, vēsú ñayuu núu ga cúu i, te nuū maá rí ni casáha ró.

<sup>41</sup>Yūcuán na te suni cahān Rey jíin ñayuu cáhiin lado jecó yá: Ñayuu jnahnū ndetū cácuu ró. Cuiyo quingoo ró núu ñuhún jeē cayú níí cáni, nuū iyó túhva cone jexeén jíin táca táchi jeē cájejniñu nuū. <sup>42</sup>Chi ni jīi rī sōco, te tu ní cájēhe ro jēē cáji rī. Ni jichī rī ndute, te tu ní cájēhe ro jēē coho rī. <sup>43</sup>Ni quiji ri nde ñuu jicá, te tu ní cájēhe núú ró vehe ndōo rī. Ni cumani sahma ri, te tu ní cájēhe ró.

Ni cocuhū rī, ni ine ri vecāa, te tu ní jécondēhe ró ruhū. Súcuan cahān yā jíin ñayuu cáhiin lado jecó yá. <sup>44</sup>Yūcuán na te cahān ñayuu un jíin yá: ¿Na quívī ní cajito na níhín jēē jíi ni sóco, chí jēē jichí ni ndute, chí jēē ní quiji ní ndé ñuu jicá, chí jēē cúmani sahma ní, chí jēē huhú ni, chí jēē íne ní vecāa, te tu ní cájēhe na jēē cúmani nuū ní? Achí i. <sup>45</sup>Yūcuán na te cahān yā jíin i: Jendaá cahān rī jíin ró, jeē tu ní casáha ró súcuan jíin ni iin tācá hermano ri jeē cácandíje, vēsú ñayuu núu ga cúu i. Núu súcuan te suni nuū maá rí cúu jeē tu ní casáha ró, achí yā. <sup>46</sup>Yūcuán na te quingoo ñayuu un núu ndóho i níí cáni. Te ñayuu váha un quívicoo i nuū cótecu i níí cáni. Achí Jesús.

### Jeē ní casquíjnáhan de jñuhun jeē jnií de Jesús

(Mr. 14.1-2; Lc. 22.1-2; Jn. 11.45-53)

**26** Te nuū ní ndihi ni cahān Jesús tāca jñuhun yáha, te ni cahān yā jíin tēe cáscuáha jíin yá:

<sup>2</sup>Je cájini rō jeē uū na quívī te coo vico pascua. Te ruhū, Yaā ní nduu tēe, nastúu i ruhū jeē cúu rī jicā cruz, achí yá.

<sup>3</sup>Yūcuán na te sutū cácujeñnu, jíin tēe cástéén tutu ley, jíin táca tēe jéñnu jeē cándacu jniñu nuū ñayuu hebreo, ni candutútú de ini patio vehe palacio maá sutū cujéñnu ga jeē naní Caifás. <sup>4</sup>Te ni candajñuhún de ndese jnií de Jesús jíin jñuhun stáhú, te cahni de ya. <sup>5</sup>Te ni cacahān de:

Ma jnií yó de máa quívī víco, chi ndonda ñayuu siquī yō, achí de.

### Jñuhun ñahan jeē ní chuhun perfume xinī yā

(Mr. 14.3-9; Jn. 12.1-8)

<sup>6</sup>Te íne Jesús ñuu Betania vehe Simón, tēe ni ndoho cuehyī stehyú. <sup>7</sup>Te ni quee iin ñahan nuū yā, ndáhá ña iin frasco yuū luu jeē ñuhun aceite perfume jeē

yóhoyo yahu ndéé. Te ni chuhun ña xini yā níní jéé yéji yā staā. <sup>8</sup>Te ni cajito tēe cáscuáha jíin yá, te ni caquití ni de, te ni cacahān de:

¿Najehē cúu jeē náā saá-ni perfume jíinā? <sup>9</sup>Chi cuu xicó yahu yó núú, te cuāha yo xúhun núú ñáyuu ndahú. Achí de.

<sup>10</sup>Te ni jini Jesús jnūhun cácahān de. Te ni cahān yā jíin de:

¿Naun cásaáha ró jéé nácani uhū ni ñahan yáha? Chi iin jniñu váha cúu jeē ni sáha ña jíin rí. <sup>11</sup>Chi níní coyūcu ñáyuu ndahú jíin ró, te ruhū chi tuá condee rí jíin ró. <sup>12</sup>Chi jeē ní chuhun ña perfume yáha ruhū, suu cúu jeē ni sátūhva ña ruhū nde quiví quíndūji ri. <sup>13</sup>Jendaá cahán rí jíin ró jeē ní cáhnu ñayívi ndé-ni cúu nuū cuité jnūhun yáha jéé jnáma ri ñayuu, suni nacani i jnūhun jeē ni sáha ñahan yáha, návāha cocuhun ni ñayuu ña, áchí yá.

### Jeē ní nastúu Judas yā

(Mr. 14.10-11; Lc. 22.3-6)

<sup>14</sup>Yūcuán na te iin jeē ndihúxí uū tēe cáscuáha ún, nání de Judas Iscariote, ni jehēn de nuū sutú cácujuhnu. <sup>15</sup>Te ni cahān de jíin:

¿Nasaa cuāha ní núū ná, te na nastúu ná de nuū ní? áchí de.

Te ni cajēhe ocō uxí xūhun plata nuū de. <sup>16</sup>Yūcuán na te nde quiví un ní quejéé de ndúcú de modo ndese nastúu de ya nuū sutú jijnáhan.

### Jeē ní jequin yā Cena yā

(Mr. 14.12-25; Lc. 22.7-23;

Jn. 13.21-30; 1 Co. 11.23-26)

<sup>17</sup>Te máá quiví jeē quejéé vico jeē cáyeji ñayuu pan jeē tú na levadura yíhi, te ni quijicoo tēe cáscuáha un núú Jesús. Te ni cacahān de jíin yá:

¿Ndé nuū cuní ni jéé quísatūhva ná cuxíni ní vico pascua? áchí de.

<sup>18</sup>Te ni cahān yā:

Cuángoo nde ñuu, vehe tēe jeē jé ni cacahān yō, te cahān rō jíin de: Achí máá Maestro jeē ní cuyajni quiví cuu yā. Te vijna te caji yā vico pascua ini vehe ní jíin tēe cáscuáha jíin yá, achi rō. Achí yá.

<sup>19</sup>Te tēe cáscuáha jíin yá, ni casáha de nájñūhun ni ndacu Jesús jniñu nuū de, te ni casátūhva de jeē cuxíni ya vico pascua.

<sup>20</sup>Te jeē cuácuaa, te ni quee yā, te ni cucōo ya mesa jíin ndihúxí uū tēe cáscuáha jíin yá. <sup>21</sup>Te níní yéji yā jíin de te ni cahān yā:

Jendaá cahán rí jíin ró jeē iin rōhó nastúu ruhū vijna, áchí yá.

<sup>22</sup>Te ni cacucuíhyá ndasí ni de. Te ná iin ná iin de ni cacajñūhún de ya:

¿A sáña cúu? áchí de.

<sup>23</sup>Te ni cahān yā:

Iin rōhó jéé cáyeji cáhnu jíin rí iin cohō, suu ró nastúu ruhū. <sup>24</sup>Te ruhū, Yā ní nduu tēe, jendaá cúu jeē quihín rí cuu rí, nájñūhun yósó jnúhun ri nuū tútu ii. Te nacā xeēn ndoho tēe nastúu ruhū. Vāha ga núu tu ní cácu tēe un núú, áchí yá.

<sup>25</sup>Yūcuán na te ni cahān Judas, tēe nastúu ya:

¿A sáña cúu, Maestro? áchí de.

Te ni cahān yā jíin de:

Suu ró cúu, áchí yá.

<sup>26</sup>Te níní jéé cáyeji de jíin yá, te ni quihin ya pan, te ni nacuatáhu yá, te ni tahú cuéchi yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chi yāha cúu yiqui cúñu rí, áchí yá.

<sup>27</sup>Yūcuán na te ni quihin ya iin copa ndūxí uva, te ni nacuatáhu yá, te ni jēhe ya nuū de. Te ni cahān yā:

Coho jíjnáhan ró. <sup>28</sup>Chi yāha cúu niñí rí jeē cuáha ri jeē cúu contrato jeé, te cati jeē ndundoo cuéchi cuehē ñayuu, te coo jnūhun cáhnu ni nuū cuéchi i. <sup>29</sup>Te cahán rí jíin ró jeē ndé vijna te ma cóho

ga rī ndūxi ndehē uva yāhá, chi nde quiji quivī ndacu Tátá rī jniñu ní ñayiví, te sáá te coho tucu ri jíin ró jijnáhan ró. Achí yá.

**Jeē ní cachi yā jeē yūhu Pedro  
cahān de jeē jíin de ya**

(Mr. 14.26-31;

Lc. 22.31-34; Jn. 13.36-38)

<sup>30</sup> Te ni jita ya iin yaa ii jíin de jijnáhan de. Te ni quenda ya cuahān yā jíin de nde yucu Olivos. <sup>31</sup> Yūcuán na te ni cahān yā:

Ndivii rō nayūhu ró jeē siquí ruhū jecuáā vijna. Chi suhva je yósó jnūhun ri nuū tútu ii, ni cahān Yaā Dios: Cuāha ri jnūhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, achí.

<sup>32</sup> Te jeē nátecu rī, te xihna ruhū cosnūu rí quihīn rī región Galilea, te sáá te najinūcoo ró, achí yá.

<sup>33</sup> Yūcuán na te ni cahān Pedro:

Vēsú ndihī de na náyūhú de, te máá ná chi ma náyūhú cuítē ná, achí de jíin yá.

<sup>34</sup> Te ni cahān yā jíin de:

Jendaá cahán rī jíin ró jeē jecuáā vijna, nde ná tu cana líhli, te yūhu ró jeē jniñ ñayuu rohó, te unī jíinu cahān rō jeē tu jíin rō ruhū, achí yá.

<sup>35</sup> Te ni cahān Pedro jíin yá:

Vēsú núu cuu na jíin ní, te ma cahán cuítē na jēē tu jíin na níhín, achí de.

Te suni súcuan ni cacahān ndihī tēe cáscuáha jíin yá.

**Jeē ni jicān tahú yā  
nuū huerto Getsemaní**

(Mr. 14.32-42; Lc. 22.39-46)

<sup>36</sup> Yūcuán na te ni jínū Jesús jíin tēe cáscuáha jíin yá iin lugar nuū naní Getsemaní. Te ni cahān yā jíin de:

Yāhá-ni cucōo ró, te na quihīn rī yūcuan cácan tahú rī, achí yá.

<sup>37</sup> Te ni jeca ya Pedro jíin ndindúú séhe Zebedeo cuahān yā jíin de. Te ni quejéé yá cucuíhyá ndasí ni yā te cúxí ni

yā jeē quíji jnūndóho siquí yā. <sup>38</sup> Yūcuán na te ni cahān yā jíin de:

Yōhyo cucuíhyá ni rī, te ndúcú sáha jeē cúu rī. Yāhá condetu ró te condito ró jíin rī.

<sup>39</sup> Te ni jica ya jecu gā, te ni jecuñī yití yá ni jequin ya nuū yā nuū nūhun, te ni jicān tahú yā suhva nuū Yaā Dios:

Tátá maá ná, núu cuu te tejiyo ní jnūndóho yáha jēē ma quíji siquí ná. Te nasūu jēē cuní maá ná, chi jeē cuní maá ní na cóo, achí yá.

<sup>40</sup> Yūcuán na te ni ndee yā nuū ndinúni tēe cáscuáha jíin yá, te ni jito ya jeē cáquixi de. Te ni cahān yā jíin Pedro:

¿A tu ní cánda ró condito ró jíin rí vēsú iin hora? <sup>41</sup> Coó ndito ni rō te cacān tahú rō jeē chindéé ñáhán yá rohó jēē ma sáha ró cuéchi jeē coto ndee jeneé rohó. Chi cúní ndije ánuá rō squícu vāha ró, te yiqui cúñu rō chi tu fuerza, achí yá.

<sup>42</sup> Te ni jehēn tucu ya vuelta uū, te suhva ni jicān tahú yā:

Tátá maá ná, te núu ma cúu cujiyo jnūndóho yáha jeē ma ndóho ná, te na cóo jeē cuní maá ní núu súcuan, achí yá.

<sup>43</sup> Te ni ndee tucu ya nuū de, te ni jito ya jeē cáquixi tucu de, chi yōhyo cájii de máhná. <sup>44</sup> Te ni stóo ya de, te cuahān tucu ya cuacacān tahú yā vuelta unī. Te suni jnūhun yúcuan ní cahān yā.

<sup>45</sup> Yūcuán na te ni ndee tucu ya nuū de jijnáhan de, te ni cahān yā jíin de:

Vijna te cusū rō te ndetātu ró. Te je ni quee hora, te ruhū, Yaā ní nduu tēe, natūu ri te jniñ tēe cáhiyo cuéchi ruhū.

<sup>46</sup> Ndocuñī jijnáhan ró, chi je vēji tēe nastúu ruhū, te quihīn yō jíin de, achí yá.

**Jeē ní cajniñ de Jesús**

(Mr. 14.43-50;

Lc. 22.47-53; Jn. 18.2-11)

<sup>47</sup> Te sá cáhán gā yā súcuan, te ni quee-ni Judas, iin jnāhan jeē uxí uū tēe cáscuáha jíin yá. Te vējicoo cuehē tēe

jíin de, cándaha de espada jíin yujnu. Chi sutū cácujéhnu jíin táca tée jé́hnu cándacu jniñu nuū ñáyuu hebreo, ni cataj́í tée ún. <sup>48</sup>Te Judas, tée nástúu ya ún, je ni jéhe de ñin seña nuū tée un jíjnáhan, chi ni achi de:

Tée jeē téchūhu rí un cúu. Te jniñ ró jíjnáhan ró, áchí de.

<sup>49</sup>Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya. <sup>50</sup>Te ni cahān Jesús jíin de:

Amigo, ¿na jniñu vēji ró? áchí yá.

Yūcuán na te ni jniñuco tāca gá tée ún, te ni cajniñ de Jesús.

<sup>51</sup>Te ñin tée jeē cáhiin jíin Jesús, ni tava de espada de, te ni jehnde de sōho ñin mozo maá sūtū cujéhnu ga. <sup>52</sup>Yūcuán na te ni cahān Jesús jíin de:

Nachuvāha espada rō, chi tāca jéē cájejnáhan jíin espada, suni jíin espada cuu. <sup>53</sup>¿Te á tu cájini rō jeē cuu cacān tahú rí nuū Tatá rí, te vijna ñúhún tají yá víhyá gā uxí uū mil ndajéhé andiví jeē jnama ruhū? <sup>54</sup>Te núu súcuan, ¿te ndese cuu squícu jñuhun cáhán tutu ñi jeē cánuú ndoho rí súcuan? áchí yá.

<sup>55</sup>Yūcuán na te ni cahān yā jíin ñáyuu cuehē ún:

¿Te va tée cuíhná cúu rí jeē véjicoo ró jíin espada jíin yujnu jeē jniñ ró rúhū jeē súcuan. Tāca quívi ni cucōo rí jíin ró jíjnáhan ró ini templo cáhnu, ni steén rí jñuhun, te tu ní cájniñ ró rúhū. <sup>56</sup>Te súcuan cásaaha ró návāha na squícu jeē cahán tutu ñi jeē ní catee tée ni canacani jñuhun Yaā Dios, achí yá.

Yūcuán na te ndíhi tée cáscuaha jíin yá, ni castóo de ya, ni cajinu de cuango de.

### Jeē ní indichi Jesús nuū junta tée cácujéhnu ga

(Mr. 14.53-65; Lc. 22.54-55,  
63-71; Jn. 18.12-14, 19-24)

<sup>57</sup>Te tée ni cajniñ Jesús, cuango de jíin yá nuū Caifás, tée cúu sutū cujéhnu ga. Te yūcuán cáhiin tutú tée cásteén tutu ley jíin táca tée jé́hnu cándacu jniñu. <sup>58</sup>Te Pedro chi jíicá-ni ndíquín de ya, te ni jinū de patio sutū cujéhnu ga. Te ni quívi de ini patio, te ni cucōo de jíin táca policia, návāha coto de ndese coo siquí yā.

<sup>59</sup>Te sutū cácujéhnu jíin táca tée jé́hnu jíin ndíhi tée cásaaha junta cujéhnu ga, ni canducú de tée cahān jñuhun yáá síquí Jesús, chi cahni de ya cácuni de. <sup>60</sup>Te vēsú ni quecoo cuehē ñáyuu cácahān yaá, te tu ní cánihin de cuēchi siquí yā jeē cáhni de ya. Te jeē sándihí te ni quecoo uū testigo jeē cahán yaá síquí yā.

<sup>61</sup>Te áchí:

Tée yáha ní cahān de jeē cuu canu de templo Yaā Dios, te nuū uní-ni quívi te nucondichi sáha de, áchí.

<sup>62</sup>Yūcuán na te ni ndocuiñi maá sūtū cujéhnu ga, te ni cahān de jíin yá:

¿Naun tu cáhán cuítí ró? ¿A iyó ndāa jeē cácahān tée yáha síquí ró? Achí de.

<sup>63</sup>Te Jesús tu ní cáhán cuítí yā. Te ni cahān maá sūtū cujéhnu ga:

Ndácu rí jniñu nuū rō jeē cahān ndāa rō cuni nahín maá Yaā Dios, Yaā técu. Cachi cají te núu máá ró cúu Cristo, Sēhe Yaā Dios, achí de jíin yá.

<sup>64</sup>Te ni cahān yā:

Suu rí cúu, nájñuhun cáhán rō. Te na cástūhun rí nuū rō jíjnáhan ró jéē tāca quívi jeē quíji te coto ró rúhū, Yaā ní nduu tée, condee rí lado váha Yaā iyó poder. Te coto ró jéē ndíji rí ichi ándiví jíin vícō. Achí yá.

<sup>65</sup>Yūcuán na te sutū cujéhnu ga ni jehnde de sahna de jeē quití ndasí ni de, te ni cahān de:

Tēe yáha chi cáhán de jnūhun ndevāha jeē quití ni Yaā Dios, chi sáha de máá de Sēhe Yaā Dios. ¿Ndé jíní ñúhún gá yō testigo núu súcuan? Chi je ni cajini ró jnúhun ndevāha cáhán de. <sup>66</sup> ¿Te ndese cáhán ni rō? achí de.

Te ni cacahān tēe cuēhē ún:

Cuēchi cúu jeē cahán de súcuan, te jíní ñúhún cuu de, achí.

<sup>67</sup> Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā. <sup>68</sup> Te ni cacahān de:

Te núu Cristo cúu ró, te cachi rō ndé ñin cúu jeē ní cani rōhó, achí de.

**Jeē ní cachi Pedro jeē tu jíní de ya**

(Mr. 14.66-72; Lc. 22.56-62;  
Jn. 18.15-18, 25-27)

<sup>69</sup> Te níní jēē súcuan cúu, te Pedro néne de nuū quéhe ini patio. Te ni quee ñin ñahan jéjníñu vehe ún, te ni cahān ña jíní de:

Róhó chi suni ni jica ró jíní Jesús tēe Galilea, achí ña.

<sup>70</sup> Te máá de tu ní cáchi de, chi ni cahān de ni cajini ndihi ñayuu:

Tu jíní rī na jnūhun cáhán rō, achí de.

<sup>71</sup> Te ni quenda de yéhyí núu quéhe, te ni jito inga ñahan nuū de. Te ni cahān ña jíní ñayuu cáhiin yūcuán:

Tēe yáha chi suni ni jica de jíní Jesús, tēe ñuu Nazaret, achí ña.

<sup>72</sup> Te inga jínu tu ní cáchi tucu de, chi sa ni cahān teyí de:

Tu jíní rī tēe ún, achí de.

<sup>73</sup> Te ni cunúu jecu gā, te ñayuu cáhiin yūcuan ní quecoo i nuū Pedro, te ni cacahān i:

Jendaá ndije jeē suni jnáhan tēe un cúu ró, chi ndijin cahán rō jeē tēe Galilea cúu ró, achí i.

<sup>74</sup> Yūcuán na te ni quejé de cáhán teyí de jeē na cóndee cuēchi siquí de núu tu cáhán ndaā de:

Tu jíní cuiiti rī tēe ún, achí de.

Te ni cana-ni líhli. <sup>75</sup> Te ni nucūhun ni de jnūhun ni cahān Jesús jíní de: Nde ná tu cana líhli, te yūhu ró te cahān rō uní jínu jeē tu jíní rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

**Jeē cuángoo de jíní yá nuū Pilato**

(Mr. 15.1; Lc. 23.1-2; Jn. 18.28-32)

**27** Yūcuán na te ni cundijin. Te tāca sūtū cácujeñhu jíní táca tēe jéñhu jeē cándacu jniñu nuū ñáyuu hebreo, ni casquínáhan de jnūhun ndese sáha de jeē cuu Jesús. <sup>2</sup> Te ni cajihni de ya, te cuangoo de jíní yá nuū Poncio Pilato, tēe cúu gobernador.

**Jeē ni jíhí Judas**

<sup>3</sup> Yūcuán na te Judas, tēe ni nastúu ya un, ní jito de jeē ní cunihin siquí yā jeē cúu yā. Te ni jnahuhū ni de, te ni nacuāha de ocō uxí xūhun plata jeē ni níhín de nuū sūtū cácujeñhu jíní núu táca tēe jéñhu. <sup>4</sup> Te ni cahān de jíní:

Cuēchi ni sáha ná jēē ní nastúu ná ñin tēe cuu de, te tú na cuēchi de.

Te máá sūtū un ní cacahān de:

¿Vé jítu ni ruhū? Cuēchi máá ró cúu. Achí de.

<sup>5</sup> Te ni scáne Judas xūhún un ini templo. Te ni quenda de cuahān de, te ni scuéhne de máá de.

<sup>6</sup> Te sūtū cácujeñhu ni canastútú de xūhún un, te ni cacahān de:

Ma cúu chuhun yó xūhun yáha ini jejnū nuū cásocō ñayuu, chi xūhun jēē ni jéconaa jeē cúu ñin tēe cúu, achí de.

<sup>7</sup> Yūcuán na te ni casándaā de jeē xūhun yūcuan cuaan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá. <sup>8</sup> Jeē yūcuan cúu jeē ndé vijna nání ñuhun ún Lugar Ñuhun Niñí. <sup>9</sup> Te súcuan ni squícu jnūhun ni cahān Jeremías, tēe ni nacani jnūhun Yaā Dios nde jenahán: Ni caqui-hin de ndihócó uxí xūhun plata, te

súcuan-ni cúu ñin yāhu jeē ní casáha ñayuu Israel cuenta jeē ndeé yā nuū i.  
<sup>10</sup> Te jíin xúhun un ní cajeen de ñuhun quíxin, nájñuhun ni ndacu máá Jítóho yō Yaā Dios jniñu nuū rī. Achí Jeremías.

### Jeē ní indichi Jesús nuū Pilato

(Mr. 15.2-5; Lc. 23.3-5; Jn. 18.33-38)

<sup>11</sup> Te nuū ní jinūcoo de jíin Jesús nuū gobernador, tēe cúu Pilato, te ni cajñuhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu ri cúu, nájñuhun cáhān rō.

<sup>12</sup> Te sutū cácujeñhu jíin tēe jéñhu cándacu jniñu, ni cacahān de cuēchi siquī yā. Te tú na vé ni cáhān cuiti yā.

<sup>13</sup> Yūcuán na te ni cahān Pilato jíin yá:

¿A tu jíni ró jēē cácahān de cuehē cuēchi siquī rō? achí de.

<sup>14</sup> Te tu ní cáhān cuiti yā ni ñin jñuhun jíin de. Te nahān ní naa ni gobernador jeē tú na vé ni cáhān yā jíin de.

### Jeē ní cundaā jeē cúu yā

(Mr. 15.6-20; Lc. 23.13-25;

Jn. 18.38-19.16)

<sup>15</sup> Te íyó costumbre gobernador jeē quivī víco un siaá de ñin tēe ñe vecāa, núu na-ni tēe cáconi ñayuu. <sup>16</sup> Te suu quivī un íyó ñin tēe ñe vecāa, nání de Barrabás, te je ni jitē núu jñuhun jeē ni sáha de cuēchi xeēn. <sup>17</sup> Te nuū ní candutútú ñayuu, te ni cahān Pilato jíin i:

¿Ndeé tēe cáconi rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

<sup>18</sup> Súcuan ni cahān de chi cúní de siaá de Jesús. Chi je ni jecūhun ni de jeē ní cacucuésún ni tāca sūtū un cájito de ya, te jeē yúcuan ní quijicoo jíin yá nuū de.

<sup>19</sup> Te níni jēē néne Pilato silla nuū sándaā de jniñu, te ñasihí de ní tají ña jñuhun nuū de: Ma quívi nduu rō jíin

ñáyuu siquī tēe ndaā jiñā, chi yōhyo ni siūhu jéni ruhū cuni jeē siquí de, achí ña.

<sup>20</sup> Te sutū cácujeñhu jíin táca tēe jéñhu, ni cascáhān de ñayuu jeē na cácan i jeē siaá de Barrabás, te na cúu Jesús. <sup>21</sup> Yūcuán na te ni cajñuhún tucu gobernador:

Jeē uú de, ¿ndeé ñin de cáconi rō jeē siaá rī? achí de.

Te ni cacahān i:

Siaá ni Barrabás, achí i.

<sup>22</sup> Te ni cajñuhún Pilato:

Núu súcuan te ¿ndese cáconi rō jeē sáha ri jíin Jesús, tēe cúu Cristo? achí de.

Te ni cacahān ndihi i:

Cata caa ní de jicā cruz, na cúu de, achí i.

<sup>23</sup> Yūcuán na te ni cahān Pilato:

¿Na cuēchi ni sáha de núu súcuan? achí de.

Te ñayuu un ní cacana jee ndasí i:

Cata caa ní de jicā cruz, na cúu de, achí i.

<sup>24</sup> Te ni jini Pilato jeē tu cundeýi de jíin ñáyuu, chi sa víhyá gā cácuvaā i. Te ni ndacu de jniñu jeē na quíji ndute, te ni nandahá de nuū ñáyuu cuehē ún. Te ni cahān de:

Jeē nándahá rí yāha cúu seña jeē tú na cuēchi condee siquī rī jeē cúu tēe vāha yāhá. Chi siquī máá ró jijnáhan ró na cóndee. Achí de.

<sup>25</sup> Te ni cacahān ndihi ñayuu:

Suu siquī máá ná jíin siquī séhe ná na cóndee cuēchi jeē cúu de, achí i.

<sup>26</sup> Yūcuán na te ni siaá de Barrabás. Te ni ndacu de jniñu jeē na cáni tācá soldado un Jesús, jíin jēē cáta caa de ya jicā cruz.

<sup>27</sup> Yūcuán na te soldado un cuangoo de jíin Jesús ini palacio. Te ni cacana de ndihi jnáhan de ni candutútú núu yā.

<sup>28</sup> Te ni caquenehen de sahma ya, te ni cachuhun de ya ñin sahma cuehé jeē cúu sahma rey. <sup>29</sup> Te ni casáha de ñin corona iñu, ni cachuhun de xinī yā. Te ni cachihi

de ndaha váha ya iin yujnu jeē nájñuhun bastón. Te ni casácata de nuū yā, chi ni cajecuiñi yití de, cásaha de jeē chiñúhún de ya.

Nacā jeē váha rey cúu Rey ñayuu hebreo, achí de.

<sup>30</sup> Te ni catesihí de nuū yā. Te ni caquihin de yujnu jeē ní cachihí de ndaha ya, te ni cacani de xiní yā. <sup>31</sup> Te nuū ní cuu ni casácata de nuū yā, te ni catava de sahma cuehé un, te ni canachuhun de ya sahma máá yá. Te cuango de jín yá jeē cata caa de ya jicā cruz.

### Jeē ní cacata caa de ya jicā cruz

(Mr. 15.21-32;

Lc. 23.26-43; Jn. 19.17-27)

<sup>32</sup> Te nuū ní quendacoo soldado un jín yá, te ni canajnáhan de jín iin tē ñuu Cirene, naní de Simón. Te ni catejñíu de tē un jéé cóndiso de cruz yā.

<sup>33</sup> Te ni jinūcoo de iin lugar nuū naní Gólgota, jeē cuní cahān Lugar Yiquí Xíní.

<sup>34</sup> Te ni cajēhe de vino jeē ní sácā núu jín iin jeē uvuá jeē cóho ya. Te nuū ní jito ndee ya, te tu ní cuní yā coho ya.

<sup>35</sup> Te nuū ní cuu ni cacata caa de ya jicā cruz, te ni casáha de sorteo jeē siquí ndese nihin iin de sahma ya. Te súcuan ni squícu jñuhun ni tee tē ni nacani jñuhun Yaā Dios jenahán: Ni casáha de sorteo siquí ndese nihin iin de sahma ri, achí yā, achí tutu. <sup>36</sup> Yūcuán na te ni cacucōo de yūcuan jéé cóto de nde cuu yā. <sup>37</sup> Te ni catee de iin jñuhun xiní cruz yā jeē cahán na siquí ni jhí yā: Yāha cúu Jesús, Rey ñayuu hebreo, achí.

<sup>38</sup> Te suni ni cacata caa de uū tē cuíhná núu uū gā cruz, iin de lado váha ya, te inga de lado jecó yá. <sup>39</sup> Te ñayuu cáyaha yūcuan cáscuicó i xiní i, te cácahān neé i:

<sup>40</sup> Róhó chi cáhán rō jeē cánu rō templo cáhnu, te nuū uní quiví te nacani ró. Núu súcuan te jnama ró máá ró vijna. Te

núu Sēhe Yaā Dios cúu ró, te nuu ró jicā cruz vii, achí i.

<sup>41</sup> Te sutū cácujeñnu, jín tēe cástéén tutu ley, jín tēe grupo fariseo, jín tēe jéñnu jijnáhan de, suni súcuan ni cacahān catá de, te achí de cácahān maá de:

<sup>42</sup> Núu inga ñayuu ni jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návaha candíje yó de. <sup>43</sup> Ni candíje de Yaā Dios, te na jnama ya de vijna te núu cundáhú ni yā de, chi ni cahān de jeē cúu de Sēhe ya. Achí de jijnáhan de.

<sup>44</sup> Te tēe cuíhná jeē cándita caa xiin ya, suni súcuan ni cacahān neé de.

### Jeē ni jhí Jesús

(Mr. 15.33-41;

Lc. 23.44-49; Jn. 19.28-30)

<sup>45</sup> Te nuū ní cuu cahuxí uū, te ni cunee ní cáhnu nde cahuní. <sup>46</sup> Te nájñuhun cahuní, te ni cana jee Jesús:

Elí, Elí, ¿lama sabactani? achí yá. Te jñuhun un cuní cahān: Yaā Dios maá ná, Yaā Dios maá ná, ¿naun ni stóo ní saña?

<sup>47</sup> Te sava ñayuu cáhiin yūcuan ní cajini i jñuhun ún, te ni cacahān i:

Tēe yáha cána de xiní Elías, tēe ni nacani jñuhun Yaā Dios jenahán, achí i.

<sup>48</sup> Te ni jinu-ni iin tēe, ni jequihin de iin cachí, te ni chundaji de nuū vinagre iyá. Te ni tee de xiní iin yujnu, te ni tee de yuhu ya jeē coho ya. <sup>49</sup> Te sava ga de ni cacahān:

Condetu ró, na cóndēhe yó núu quiji Elías jnama de chí tuú, achí de.

<sup>50</sup> Te Jesús ni cana jee ya inga jínu, te ni jihí-ni ya. <sup>51</sup> Te sahma ndíta caa jeē ndihyú cuarto iini templo cáhnu, ni ndatā-ni sava sava nde xiní te nde nuū jehé. Te ni jnāa, te ni catahū sava toto.

<sup>52</sup> Te ni cananune yaū nuū yíndūji ndīyi. Te cuehē ndīyi jeē ní cacandíje i Yaā Dios, ni canatecu i. <sup>53</sup> Te nuū ní natecu Jesús, te ni quendacoo i nuū yíndūji i.



Te ni ndāvicoo i ini ñuu iī Jerusalén, te cuehē ñayuu ni cajito nuū i.

<sup>54</sup>Te ná ni jihī Jesús, te tēe cúu capitán jíin tēe cáhiin jíin de jeē cándito de nde cuu yā, ni cajini de jeē ni jnáa, jíin táca gá jniñu ní cuu. Te yōhyo ni cayūhú de, te ni cacahān de:

Jendaá ndije jeē Séhe Yaā Dios cúu tēe yāha, áchí de.

<sup>55</sup>Te yūcuan cáhiin cuehē ñahan, cándēhe jícá ña. Te suu ñahan un ní candiquin ña Jesús nde Galilea, vējicoo ña cájejniñu ña nuū yā. <sup>56</sup>Te unī ñahan un cácuu María ñuu Magdala, jíin María naná Jacobo jíin José, jíin naná ndindúú séhe Zebedeo.

### Jeē ní quindūji Jesús

(Mr. 15.42-47;

Lc. 23.50-56; Jn. 19.38-42)

<sup>57</sup>Te nuū ní ini quivī ún, te ni quee iin tēe cúca, nání de José, te tēe ñuu Arimatea cúu de. Te suni tēe ni scuáha jíin Jesús cúu de. <sup>58</sup>Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de. <sup>59</sup>Te José ni quihin de yiqui cúñu yā, te ni chusúcún de iin sahma cuitá íyó ndoo. <sup>60</sup>Te névāha de iin yaū jeē ní caan jeé jícā iin cava, nuū ná tu quindūji ndiyi. Te yūcuan ní chindūji de ya. Te ni jesi de iin yuū cáhnu yuhu yáú un, te cuahān de. <sup>61</sup>Te María ñuu Magdala, jíin inga María, cáyūcú ña ichi núú nuū yindūji ya.

### Jeē ní cacondito soldado nuū yindūji ya

<sup>62</sup>Te ni cuu tācá jniñu yāha máa quívī jeē casátūhva ñayuu jeē quiji quivī ndétátú. Yūcuán na te ni cundijin maá quívī ndétátú. Te sutū cácujuhnu jíin tēe grupo fariseo ni jengoo de nuū Pilato. <sup>63</sup>Te ni cacahān de:

Cánucūhun ni na jéē nde na técu tēe stáhú néé un te ni cahān de jeē nátecu

de nuū unī quivī. <sup>64</sup>Núu sūcuan te ndacu ní jniñu na cóto vāha tācá soldado yuhu yáú un nde núu ni yāha unī quivī. Chi núu tuū te sanaa te quijicoo tēe ni cascuáha jíin de, te tava cuihná de ndīyí ún jecuáa, quingoo de jíin. Yūcuán na te cachi de nuū ñayuu jeē ní natecu tēe ún. Te cáhú gá cuu jñūhun stáhú yūcuan vēsú jeē xihna ñúhún. Achí de.

<sup>65</sup>Te ni cahān Pilato:

Yāha cáhiyo soldado. Cuángoo jíin de, te sácutu vāha ró yuhu yáú un, te coto vāha ró, núu ndese vāha ga cuu sáha ró. Achí de.

<sup>66</sup>Te cuangoo de, te ni casácutu de yuū jeē ndihyú yuhu yáú nuū yindūji ya, te ni castiñ nihin de. Te ni castóo de tācá soldado un cándito.

### Jeē ní natecu Jesús

(Mr. 16.1-8; Lc. 24.1-12; Jn. 20.1-10)

**28** Te ni yāha quivī ndétátú un, te ni cundijin quivī domingo. Te María ñuu Magdala jíin inga María un, ní jecondéhé ña nuū ní yindūji Jesús. <sup>2</sup>Yūcuán na te iin sanaa-ni te ni jnáa nihin ndasí. Chi iin ndajéhé maá Jí-toho yō Yaā Dios ni cuun ya ichi ándiví, ni quee ya nuū ní yindūji Jesús. Te ni stáa ya yuū ndihyú yuhu yáú un, te ni cucóo ya siquí. <sup>3</sup>Te ndíndēe núu yā nájnūhun taja, te sahma ñúhun ya yaa quiyi nájnūhun yuhvā volcán. <sup>4</sup>Te soldado cándito yūcuan ní quisi i de jeē cáyūhú de cájito de ya. Te ni cacuu ndīyí de. <sup>5</sup>Te ni cahān ndajéhé jíin ndindúú ñahan ún:

Ma yūhu ró, chi jíin rī jeē vécondēhe ró Jesús, Yaā ni jihī jicā cruz. <sup>6</sup>Tuá yā yāhá, chi je ni natecu yā, nájnūhun ni cahān yā. Nehen condēhe ró nuū ní cachindūji de ya. <sup>7</sup>Te yachí quingoo ró, te cachi rō nuū tēe cáscuáha jíin yá jeē ní natecu yā. Te xihna gā maá yá jinū Galilea, te sáa te najinūcoo de. Te yūcuán coto de nuū yā. Achí rō na

cúni de. Je ni castūhun rí nuū rō, achí ndajéhé.

<sup>8</sup>Te ni quendacoo ña nuū ní yindūji ya, te yachí cuango ña. Te cáyūhú ña, te suni yōhyo cácusī ni ña. Te ni cajinu ña cuacastūhún ña nuū tée cáscuáha jíin yá. <sup>9</sup>Te níní cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñúhún ña ya. <sup>10</sup>Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tēcá hermano rí, tēe ni cascuáha jíin rí, jeē na núngoo de nde Galilea, te yūcuán coto de nuū rí. Achí yá.

### **Jnūhun ní cacahān soldado**

<sup>11</sup>Te níní cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácu-jéhnu tēcá jniñu jeē ní cuu. <sup>12</sup>Te sutū cácu-jéhnu ni candutútú de nuū táca tée jéhnu cándacu jniñu, te ni casquíjnáhan de jnūhun. Yūcuán na te ni cajēhe de cuehē xūhun núū soldado jijnáhan. <sup>13</sup>Te ni cacahān de jíin:

Cahān rō jijnáhan ró jēe tée cáscuáha jíin de ni quiijicoo jecuaā, te ni catava cuihna ndíyī un níní cáquixī rō, achí rō.

<sup>14</sup>Te núu na cúni gobernador jnūhun yáha, te máá rí quiscahán rí de, návāha tú nihīn rō castigo jijnáhan ró. Achí de.

<sup>15</sup>Te soldado un ní caquihin de xūhún un, te ni cacachi de nájñūhun ni cacahān jíin de. Te nde vijna chi súcuan cácahān ñayuu hebreo nájñūhun ni cacahān soldado un.

### **Jeē ní tejnīñu ya de nacani de jnūhun**

(*Mr. 16.14-18;*

*Lc. 24.36-49; Jn. 20.19-23)*

<sup>16</sup>Te ndihúxí iin tēe ni cascuáha un cuánungoo de nde Galilea, nde yucu nuū ní cachi Jesús jeē quíngoo de. <sup>17</sup>Te nuū ní cajito de nuū yā, te ni cachiñúhún de ya. Te sava de tu cácaandíje vāha de jeē máá yá cúu. <sup>18</sup>Te ni quee ya nde nuū de, ni cahān yā jíin de:

Je ni jēhe Tátá rí ndihī poder nuū rí jeē ndácu ri jniñu andiví jíin ñáyiví. <sup>19</sup>Núu súcuan te cuángoo nuū ñayuu tēcá nación, te stéén rō jnūhun ri nuū i návāha na cándíje i. Te scuándute ró i jeē ní cacandíje i máá Tátá jíin Séhe jíin Espíritu Santo. <sup>20</sup>Te stéén rō nuū i jeē na cuátáhú i tēcá jniñu ní ndacu ri nuū rō. Te cocuhun ni rō jeē máá rí íne ri jíin ró níf cáni nde quivī jínu ñayiví. Achí yá. Te ni cuu. Amén.

## JNUHUN VAHA NI TEE SAN MARCOS

### Jnūhun Juan tēe scuándute

(Mt. 3.1-12; Lc. 3.1-9,  
15-17; Jn. 1.19-28)

**1** Yāha quejéé jnúhun vāha máá Jesu-cristo Sēhe Yaā Dios, jeē ní quiji ya jeē jnama ya yohó.

<sup>2</sup> Isaías, tēe ni nacani jnūhun Yaā Dios nde jenahán, súcuan ni tee de jnūhun Juan nuū tútu:

Tají rí tēe nacani jnūhun ri cosnūú de ichi núú rō, návāha coo tūhva ñayuu jeē jinú rō, achí Yaā Dios jíin Cristo.

<sup>3</sup> Te tēe ún cana jee de nde nuū ñūhun téhé:

Sátūhva ró máá ró jijnáhan ró, chi quee maá Jítóho yō.

Te sáha ró jniñu ndaā, chi vēji ya, achi de.

Achí Isaías. <sup>4</sup> Te Juan ni jinū de nde nuū ñūhun téhé, scuándute de ñayuu. Te cáhán de jíin i jeē na nacani ni i jeē stóo i cuēchi i te cuandute i, návāha cone cáhnu ni Yaā Dios nuū cuēchi i.

<sup>5</sup> Te tāca ñayuu región Judea jíin ñayuu ñuu Jerusalén, ni quijicoo i nuū de. Te ni canacani ndaā i cuēchi i nuū Yaā Dios, te ni scuándute de i ini yūte Jordán.

<sup>6</sup> Te sahma ñūhun Juan cúu ixi camello, te núhni ñin cinturón ñii chíji de. Te jeē técu de cúu tíca ndicuéhyí jíin ndúxi yocō. <sup>7</sup> Te suhva ni nacani de jnūhun:

Quiji máá Yaā cujéhnu ndasí. Chi tú na vé jéhnu cuiti cúu ri nuū yā, ni jeē cuajniñu ri nuū yā vēsú ñin jniñu lúli gá nájñūhun jeē cuíta ndeyi ri ndají rí correa ndijēn yā. <sup>8</sup> Te ruhū chi jíin ndute scuándute ri rohó jijnáhan ró, te Yaā ún chi nájñūhun jeē scuándute ya rohó cúu

jeē cuáha ya Espíritu Santo condee ini anuá rō, achí Juan.

### Jeē ní jendute Jesús

(Mt. 3.13-17; Lc. 3.21-22)

<sup>9</sup> Te ni cuu jecu quiví, te Jesús ni quenda ya ñuu Nazaret ndañū Galilea, te Juan ni scuándute de ya ini yūte Jordán. <sup>10</sup> Te ná ni quenda ya nuū ndúte, te ni jito ya jeē ní nune-ni andiví, te ni cuun Espíritu Santo ni quee xiní yā, te cáa nájñūhun ñin paloma. <sup>11</sup> Te ichi ándiví ní cahān ñin jnūhun:

Máá ró cúu Sēhe ri jeē maní ndasí rí jíin, te yōhoyo cúsiñ ni rí jíin ró, achí.

### Jeē ní jito ndee jexeén Jesús

(Mt. 4.1-11; Lc. 4.1-13)

<sup>12</sup> Yūcuán na te ni jinū Jesús nde nuū ñūhun téhé ní sáha Espíritu Santo. <sup>13</sup> Te uū xico quiví ni condee yā nuū ñūhun téhé un núú ñin quiti yúcu. Te ni jito ndee Satanás yā, chi cúní jeē sáha ya cuēchi. Te nuū ní cujiyo Satanás cuahān, te ni quecoo ndajéhé Yaā Dios, ni cajejniñu nuū yā.

### Jeē ní quejéé Jesús nacani ya jnūhun

(Mt. 4.12-17; Lc. 4.14-15)

<sup>14</sup> Yūcuán na te ná ni cachune de Juan vecāa, te ni jinū Jesús región Galilea, nacani ya jnūhun vāha ndese ndácu Yaā Dios jniñu. <sup>15</sup> Te ni cahān yā:

Je ni jinū quiví, te je ni cuyajni jeē ndácu Yaā Dios jniñu nuū rō. Nacani ni rō jeē stóo ró cuēchi ró jijnáhan ró, te candíje ró jnúhun jeē jnama ya rohó. Achí yá.

### Jeē ní cana ya cuūn tēe jniñi chācá

(Mt. 4.18-22; Lc. 5.1-11)

<sup>16</sup> Te jíca Jesús yumar Galilea cuahān yā. Te ni jito ya nuū Simón jíin ñani de Andrés. Te tēe cájniñi chācá cácuu de, te cásinga de ñunu de ini mar. <sup>17</sup> Te ni cahān yā jíin de:

Condiquin ruhū na quíhín yō, te nasáha ri rohó téé nihin cuehē ñayuu candíje ruhū, nájñuhun cánihin rō chácá, áchí yá.

<sup>18</sup> Yūcuán na te ni castóo-ni de ñunu de, te ni candiquin de ya.

<sup>19</sup> Te ni jica ya jecu gā, te ni jito ya nuū Jacobo jíin ñani de Juan, sēhe Zebedeo, suni cáyucú de ini barco de, cánachijnī de ñunu de. <sup>20</sup> Te suni ni cana ya de jeē cōndiquin de ya. Te ni castóo-ni de tátá de Zebedeo ini barco un jíin mozo de, te ni candiquin de ya cuango de.

### **Jeē ní quenehen ya tachí ini iin tēe**

(Lc. 4.31-37)

<sup>21</sup> Te ni jinū yā jíin de ñuu Capernaum. Te quivī ndétatu ní quivī ya ini vehe i sinagoga, te ni steén yā jñuhun. <sup>22</sup> Te ni canaa ni ñayuu ni cajini i jñuhun steén yā. Chi ni steén vāha ya nuū i, chi máá yá cúu jeē ndíso jñiñu siquī ndihí. Te tēe cástéén tutu ley Yaā Dios, tu súcuan cástéén de. <sup>23</sup> Te ini vehe i sinagoga ñuu un íne iin tēe jeē ñuhun tachí ini. Te ni cana cóhó de:

<sup>24</sup> ¿Naun vēji ní núū na jíjnáhan ná, Jesús ñuu Nazaret? ¿A vēji ní jēē snáā ní sáña, chí naún? Je jíin na ndé iin cúu ní, chí Sēhe i Yaā Dios cúu ní. Achí de.

<sup>25</sup> Te Jesús ni cahān xeēn yā jíin táchi ún:

Casi yuhu ró te quenda ró ini de, áchí yá.

<sup>26</sup> Te tachí ún xeēn ni jehni yíhí téé ún. Te ni cana cóhó, te ni quenda ini de cuahān. <sup>27</sup> Te ndihí ñayuu ni cayuhú i, te cácajnūhun jnáhan i:

¿Na vé cúu jeē yáha? ¿A iin jñuhun jéé cúu jeē yáha? Chi tēe yáha cújéhn de jeē ndácu de jniñu nde nuū tachí te quéndacoo, áchí i.

<sup>28</sup> Te yachí ni jitē núu jñuhun Jesús cuahān ní cáhnu región Galilea.

### **Jeē ní nasávāha ya naná chisó Simón Pedro**

(Mt. 8.14-15; Lc. 4.38-39)

<sup>29</sup> Te ni quenda ya jíin de jíjnáhan de ini vehe i sinagoga. Te Jesús ni jehēn yā jíin Jacobo jíin Juan nde vehe Simón jíin Andrés. <sup>30</sup> Te naná chisó Simón, catú ña yíhí quiji ña. Te ni cacastühun de nuū yā jeē kuhú ña. <sup>31</sup> Yūcuán na te ni quindehe ya nuū catú ña, te ni jñi ya ndaha ña, te ni ndonehen ya ña. Te ni quenda-ni quiji ún ña, te ni sáha ña jeē ní cayeji de jíin yá.

### **Jeē ní nasávāha ya cuehē ñayuu**

(Mt. 8.16-17; Lc. 4.40-41)

<sup>32</sup> Te ni quēe niāndii te ni cuaa. Te ni quecoo ñayuu jíin táca ñáyuu cácuñu jíin jéé ñuhun tachí ini. <sup>33</sup> Te táca ñáyuu ñuu un ní cacutútú i yéhyí un. <sup>34</sup> Te ni nasávāha ya cuehē ñayuu cácuñu tñni nuū cuehyí, te ni quenehen ya cuehē tachí un cuángoo. Te tachí chí je cajini un yá, te tu ní jéhe ya jñuhun jeē cástühun ndé iin cúu ya.

### **Jeē ní nacani ya jñuhun región Galilea**

(Lc. 4.42-44)

<sup>35</sup> Te nehen ndasí ní ndonda ya, nde yínee gā. Te ni quenda ya cuahān sñin ya yatā ñúū nuū tú ñayuu, te yūcuan ní jicān tahú yā. <sup>36</sup> Te Simón jíin téé cáhiin jíin de, ni jenanducú de ya. <sup>37</sup> Te ni cananihin de ya, te ni cacahān de jíin yá:

Tāca ñáyuu cánanducú i níhín, áchí de.

<sup>38</sup> Te máá yá ni cahān yā:

Sa suhva na quíhín yō táca gá ñuu íne yajni, návāha suni nacani ri jñuhun nuū i, chí jeē yūcuan ní quee rī. Achí yá.

<sup>39</sup> Te súcuan te ni jica cuu ya níhí región Galilea, ni nacani ya jñuhun ini vehe i

sinagoga tācā ñuu, te ni quenehen ya tachī ini ñayuu.

**Jeē ní nasávāha ya iin tēe  
ndóho cuehyī stehyú**

(Mt. 8.1-4; Lc. 5.12-16)

<sup>40</sup> Te iin tēe ndóho cuehyī stehyú, ni quee de ni jecuiñī yití de nuū yā, te ni cahān de jíin yá:

Jíní na jeē cuu sāha ní jēē nduvāha ná, te núu cúní ní, áchí yá.

<sup>41</sup> Te Jesús ni cundáhú ní yā de, te ni soó yá ndaha ya siquī de, te ni cahān yā:

Cúní rí. Te na ndúvāha ró, áchí yá.

<sup>42</sup> Te ná ni cahān yā súcuan, te ni nduvāha-ni tēe ndóho cuehyī stehyú un.

<sup>43</sup> Yūcuán na te nātájí yá de quinhun de, te ni cahān nihin ya jíin de:

<sup>44</sup> Ma cáchi cuiñi rō nuū ní iin. Chi quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájñuhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

<sup>45</sup> Te ni quenda de cuahān de, te ni quejéé de nácani de jñuhun nuū ndihí ñayuu ndese ni nduvāha de. Te siquī yúcuan tuá ní cúu quívi Jesús tācā ñuu, chí cúchitú ndasí ñayuu nuū yā. Te ni jica ya yatā tācā ñuu nuū tu cúchitú ñayuu. Te tāca lado ni quijicoo ñayuu nuū yā.

**Jeē ní nasávāha ya iin tēe  
ndóho cuehyī ni íjin**

(Mt. 9.1-8; Lc. 5.17-26)

**2** Te ni cuu jecu quívi, te ni quívi tucu Jesús ñuu Capernaum. Te ni cajini ñayuu jeē néne ya vehe. <sup>2</sup> Te ni cacutútú-ni cuehē ñayuu, te ni chitú vehe jeē ndé yehí tuá núne. Te ni nacani ya jñuhun Yaā Dios nuū i. <sup>3</sup> Yūcuán na te ni quecoo cuñ tēe nuū yā, cándiso de iin tēe ndóho cuehyī ni íjin. <sup>4</sup> Te tu ní cúu quívicoo de nuū yā siquī jeē chitú ñayuu. Te ni cacao de

siquī véhe, te ni canune de ndaā nuū iin ya, te yaū un ní cascúun de tēe cúhú, cátú de nuū iin camilla. <sup>5</sup> Te ni jini Jesús jeē cácanñe de jeē cúu nasávāha ya tēe cúhú un. Te ni cahān yā jíin tēe cúhú un:

Séhē, je íne cáhnu ni rí nuū tāca cuéchi ró, áchí yá.

<sup>6</sup> Te yūcuan cáyucú jecu tēe cástéén tutu ley Yaā Dios, te tēe un ní cajeni ni de siquī yá: <sup>7</sup> ¿Naun cáhán tēe yáha súcuan? Cáhán de jñuhun ndevāha jeē quití ni Yaā Dios, chí nasūu Yáā Dios cúu de jeē cóne cáhnu ni de nuū cuéchi. <sup>8</sup> Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha rí? <sup>9</sup> Jeē uú jñuhun yáha, ¿ndé iin yí gá cáa? ¿A jēē cahán rí jíin tēe cúhú: Je íne cáhnu ni rí nuū tāca cuéchi ró? ¿Chí yí gá jeē cahān rí: Ndocuiñi te naquihin ró camilla rō, te caca ró, achi rí? <sup>10</sup> Te vijna te na stéén rí jeē maá rí, Yaā ní nduu tēe, ndíso jniñu rí ini ñayívi yáha jēē cóne cáhnu ni rí nuū cuéchi.

Yūcuán na te ni cahān yā jíin tēe ni íjin ún:

<sup>11</sup> Cáhán rí jíin ró, ndocuiñi te naquihin ró camilla rō, te quinhun rō vehe ró, áchí yá jíin de.

<sup>12</sup> Yūcuán na te ni ndocuiñi-ni tēe ún, te ni naquihin de camilla de, te ni quenda de cuahān de, jíto jñutú ndihí ñayuu. Te ndivii i ni canaa ni i cájito i, te ni cacahān i jeē yóhyo vāha Yaā cúu Yaā Dios. Te áchí i:

Ná tu coto cuiñi yō ni iin jniñu súcuan, áchí i.

**Jeē ní cana ya Leví**

(Mt. 9.9-13; Lc. 5.27-32)

<sup>13</sup> Te ni quenda tucu ya cuahān yā nde yumar. Te tāca ñayuu ni jinūcoo i nuū yā, te ni steén yā jñuhun nuū i. <sup>14</sup> Yūcuán na te ni yáha ya cuahān yā, te ni jito ya nuū Leví sēhe Alfeo, néne de nuū cutútú xúhun renta. Te ni cahān yā jíin de:

Condiquin ruhū na quhín yō.

Te ni ndocuiñi de, te cuahān de jíin yá.

<sup>15</sup> Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásáha cuēchi, suni cáyūcú de cáyeji de staā jíin Jesús jíin tēe cáscuáha jíin yá, chi íyó cuēhē de jeē cándiquin de ya. <sup>16</sup> Te tēe cástéén tutu ley Yaā Dios jíin tēe grupo fariseo, ni cajito de jeē yéji yā staā jíin ndihí táca tēe ún. Te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe cásáha cuēchi? áchí de.

<sup>17</sup> Te ni jini Jesús, te ni cahān yā jíin de:

Ñayuu cáhiyo váha, tu jini ñúhún i tēe tájné, chi ñayuu cácuñú cúu jeē jini ñúhún. Te ruhū nasūu jeē véji ri cana ri ñayuu tú cuēchi, jeē cúu i nájnūhun ñayuu cáhiyo váha. Chi sa suhva véji ri cana ri ñayuu cáhiyo cuēchi, jeē na nácani ni i te stóo i cuēchi i. Áchí yá.

**Jeē ní cacajñuhún de ya  
siquí jeē cóndite ni**

(Mt. 9.14-17; Lc. 5.33-39)

<sup>18</sup> Te ni cuu iin quiví jeē cáhiyo ndite ni tēe cáscuáha jíin Juan, jíin tēe cáscuáha jíin grupo fariseo. Te ni quecoo jecu tēe, ni cacahān de jíin Jesús:

Tēe cáscuáha jíin Juan jíin jeē cascuáha jíin grupo fariseo, tijni jínu cáhiyo ndite ni de. Te tēe cáscuáha jíin máá ní, ¿naun tu cásáha de súcuan?

<sup>19</sup> Te ni cahān Jesús jíin de:

¿A cuu condite ni de níni jeē iyó rí jíin de? ¿A cuu condite ni ñayuu cáhiin vico nándāha, te núu níni néne tēe nándāha? Chi núu néne tēe nándāha, te ma cúu condite ni i. <sup>20</sup> Te quee quiví jeē cújiyo tēe nándāha, te quiví ún chi condite ni i.

<sup>21</sup> Te ni cahān yā uū jñūhun yátá siquí jeē tu quíjnáhan jñūhun jeē jéē steén yā jíin táca jñūhun jengahán. Áchí yá:

Ni iin tu náchuhun iin pedazo sahma jéé núu iin sahma túhú. Chi núu súcuan te ndiyi pedazo jeé un, te tahndē gā jeé tuhú un, te nducáhnū ga nuū cááhndé un. <sup>22</sup> Te suni tu cáchuhun vino jeé ini ñii túhú. Chi núu súcuan te vino jeé un ndatá ñii ún, te naa vino jíin ñii. Jeē yúcuan cánuú jéé chúhun i vino jeé ini ñii jéé.

**Jeē ní cataxín de yoco  
trigo quiví ndétátú**

(Mt. 12.1-8; Lc. 6.1-5)

<sup>23</sup> Te iin quiví ndétátú ní yāha Jesús cuahān yā mēhñú nuū cáa trigo. Te tēe cáscuáha jíin yá, cájica de cuahān de, te ni quejéé de cátaxín de yoco trigo cáyeji de. <sup>24</sup> Yūcuán na te tēe grupo fariseo ni cacahān de jíin yá:

Condéhé. ¿Najehē casáha tēe cáscuáha jíin ró súcuan? Chi áchí ley Moisés jeē ma cúu sáha yó ni iin jniñu quiví ndétátú. Achí de.

<sup>25</sup> Te ni cahān maá yá jíin de:

¿A tu ní cácahu cuítí rō tutu ndese ni sáha David, iin quiví ní cumaní jeē cáji de, te ni jii de sōco jíin tēe cáhiin jíin de? <sup>26</sup> Te ni quiví de ini vehe Yaā Dios. Te Abiatar ni cuu sutū cujéhnū ga. Te ni yeji de pan ii jeē yosó ndijin nuū Yaā Dios. Te tú na ley jeē cáji ni iin tēe, chi máá-ni sutū cuu caji. Te suni ni jēhe de ni cayejí tēe cáhiin jíin de. Te tú na cuēchi ní íyo siquí de. Achí yá.

<sup>27</sup> Te suni ni cahān yā jíin de jíjnáhan de:

Tu ní jéconaa ñayuu jeē ndóho i nuū quiví ndétátú, chi ni jeconaa quiví un jeē ndétátú i. <sup>28</sup> Núu súcuan te ruhū, Yaā ní nduu tēe, máá rí cúu jeē ndácu jniñu siquí ndese sáha ñayuu quiví ndétátú, áchí yá.

### Jeē ní nduvāha tēe ni ichi ndaha

(Mt. 12.9-14; Lc. 6.6-11)

**3** Te ni quívi tucu Jesús ini vehe ii sinagoga. Te yūcuan íne ñin tēe ni ichi ñin ndaha de. <sup>2</sup> Te tēe grupo fariseo cájito yuhu de ya núu nasávāha ya tēe un quívi ndétátú, návāha ñihin de cuēchi siquí yā. <sup>3</sup> Yūcuán na te ni cahān yā jíin tēe ni ichi ndaha ún:

Ndocuññi te condichi rō mēhñu yāha, áchí yá.

<sup>4</sup> Te ni cajñuhun yá de jíjnāhan de:

¿Ndese cáhán ley siquí quívi ndétátú? ¿A jēe sáha vāha yó, chí sáha néé yó? ¿A jēe nasávāha yó ñayuu je yajni cuu, chí sáha yó jēe cúu i? áchí yá.

Te máá de tú na vé ni cacahān de. <sup>5</sup> Te ni quití ni yā ni jito ya nuū de jíjnāhan de, te ni cucuíhyá ni yā jeē ñihni ni de. Te ni cahān yā jíin tēe ni ichi ndaha:

Scáá ndaha ró.

Te ni scaá de, te ni nduvāha-ni ndaha de. <sup>6</sup> Yūcuán na te ni quendacoo tēe grupo fariseo, te ni casquíjnāhan de jñuhun jíin tēe grupo Herodes siquí yā, ndese cahni de ya.

### Jeē ní quecoo cuehē ñayuu nuū yā yumar

<sup>7</sup> Te Jesús cuahān yā nde yumar jíin tēe cáscuáha jíin yá. Te cuehē ñayuu región Galilea ni candiquín i ya. <sup>8</sup> Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi núu cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jñuhun i jñiñu jéhnu ni sáha ya, te ni quecoo i nuū yā. <sup>9</sup> Te ni cahān yā jíin tēe cáscuáha jíin yá jeē na cóo tūhva ñin barco quívi ya, návāha ma chítú ñihin ñayuu cuehē ún xiin ya. <sup>10</sup> Chí cuehē ñayuu je ni nasávāha ya, te jeē yúcuán vējicoo cuehē gā ñayuu cándoho tāca núu cuehyí, te chítú ñihin i xiin ya jeē quehé i ya cácuni

i. <sup>11</sup> Te ñayuu cáñuhun tachí ini, núu ni cajito nuū yā, te cájecuññi yití núu yā, te cácana cóhó:

Máá ní cúu Sēhe Yaā Dios, achí.

<sup>12</sup> Te ni ndacu ñihin ya nuū tachí un jēe ma cáhán gā jeē cúu ya Sēhe Yaā Dios.

### Jeē ní nacāji ya uxí uū tēe apóstol

(Mt. 10.1-4; Lc. 6.12-16)

<sup>13</sup> Yūcuán na te ni caa ya cuahān yā ñin yucu. Te ni cana ya tāca tēe jeē cuní maá yá caca jíin yá, te ni quecoo de nuū yā. <sup>14</sup> Te ni jeni ya uxí uū de jeē cuñi de jíin yá, te tají yá de quingoo de nacani de jñuhun. <sup>15</sup> Te ni sáha ya jeē cóndiso jñiñu de nasávāha de ñayuu cuhú te quenehen de tachí ini ñayuu. <sup>16</sup> Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro. <sup>17</sup> Te Jacobo jíin ñani de Juan, sēhe Zebedeo. Te ni nasnání yá ndindúú de Boanerges, jeē cuní cahān: Tēe yíhi fuerza nacani jñuhun, nájñuhun yíhi fuerza taja. <sup>18</sup> Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista, <sup>19</sup> jíin Judas Iscariote, tēe jeē ní nastúu de ya.

### Jeē ní cacahān ñayuu jeē jejníñu ya fuerza Satanás

(Mt. 12.22-32; Lc. 11.14-23; 12.10)

Yūcuán na te ni quívi ya ñin vehe jíin tēe cáscuáha jíin yá un. <sup>20</sup> Te ni ndutútú tucu cuehē ñayuu, te ni tuá ni cúu caji yā staā jíin de. <sup>21</sup> Te tāca jnāhan vehe ya ni cajini jñuhun jeē súcuán cúu. Te ni quecoo de venūquihin de ya. Chí cacahān de jeē ní sana xiní yā.

<sup>22</sup> Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yāha ñuhun Satanás ini de, jeē cujéhnu nuū tachí. Te jíin fuerza un quenehen de tachí, achí de.

<sup>23</sup>Te ni cana ya de jíjnáhan de, te ni cahān yā iin jnūhun yátá jíin de:

¿Ndese cuu quenehen Satanás maá?

<sup>24</sup>Chi núu iin nación sásíin maá te cuajnáhan maá, nación un má cúu ga coyūcu cáhnu. <sup>25</sup>Te núu ñayuu iin vehe sásíin maá te cuajnáhan maá, ñayuu un má cúu ga coyūcu cáhnu. <sup>26</sup>Te suni súcuan Satanás jíin jnáhan tachī, chi núu sásíin maá te cuajnáhan maá, núu súcuan te ma cóo ga, chi sa suhva naa.

<sup>27</sup>Te ni iin tēe ma cúu quívi de ini vehe tēe ndacuī jeē quenehen de nda-jníñu de. Chi cánuú jeē xíhna gā cuhni de tēe ndacuī ún. Te suni súcuan cúu jeē jíhni rī Satanás te quénehen ri tachī.

<sup>28</sup>Te jendaá cahán rī jíin ró jeē iyó modo coo jnūhun cáhnu ni nuū tāca cuéchi cásaáha ñayuu, te suni nuū tāca jnúhun néé cácahān i. <sup>29</sup>Te núu cahān ndevāha i siquī Espíritu Santo, te ma cóne cáhnu ni Yaā Dios nuū i, chi sa suhva condee cuéchi siquī i níí cáni, áchí yá.

<sup>30</sup>Súcuan ni cahān yā, chi ni cacahān i jeē quénehen ya tachī jíin fuerza Satanás.

### Náná yā jíin ñani yā

(Mt. 12.46-50; Lc. 8.19-21)

<sup>31</sup>Yūcuán na te ni quee naná yā jíin tāca ñani yā. Te íin ña nuū quéhe, te ni tají ña jnūhun cuahān nuū yā jeē cána ña ya. <sup>32</sup>Te ñayuu cáyūcu níí xiin ya, ni cacahān i jíin yá:

Náná ni jíin tāca ñani ni cáhiin nuū quéhe, te cácuni cahān jíin ní, áchí i.

<sup>33</sup>Te ni cahān maá yá:

¿Ndé iin cúu náná rī jíin ñani rī? achí yá.

<sup>34</sup>Yūcuán na te ni ndacoto ya nuū ñáyuu cáyūcú xiin ya ún, te ni cahān yā:

Suni náná rī jíin ñani rī cácuu tāca ñáyuu yáha. <sup>35</sup>Chi tāca ñáyuu casquícu jniñu cúní Yaā Dios, suu cácuu ñani rī, cuāha ri, náná rī, achí yá.

### Jnūhun yátá síquī tēe jéte trigo

(Mt. 13.1-9; Lc. 8.4-8)

**4** Te yumar ni quejéé tucu Jesús steén yā jnūhun. Te ni cutútú cuéhē ndasí ñáyuu nuū yā, te jeē yúcuan ní quívi ya ni cucōo ya ini iin barco nuū mar. Te tāca ñáyuu un cáyūcú i yumar. <sup>2</sup>Te jíin jnūhun yátá ni steén yā cuéhē jnūhun nuū i, te súcuan ni cahān yā:

<sup>3</sup>Cuni nahín jíjnáhan ró: iin tēe cate trigo, ni quenda de jeē cáte de. <sup>4</sup>Te ná ni quejéé de jéte de, te jecu trigo ni jitē yuhíchi. Te ni quecoo saa, ni cayeji tí.

<sup>5</sup>Te jecu gā trigo ni jitē nuū ñúhun yuū, nuū tú cuéhē ñuhun. Te yachī-ni ni cane, chí tu cóquin ñuhun. <sup>6</sup>Te nuū ní cane niāndii, te ni ichī-ni, te ni casun, chí tu ní níhín nuū quihín yoho. <sup>7</sup>Te jecu gā trigo ni jitē nuū náne iñu. Te ni jehnu iñu ún, te ni jesi nuū, te tu ní jéhe nuni.

<sup>8</sup>Te jecu ni jitē nuū ñúhun váha. Te ni cane, te ni jehnu, te ni jéhe cuéhē nuni. Sava ni jéhe ocō uxí jeē íin iin nuni, te sava ga ni jéhe uní xico, te sava ga ni jéhe ciento. Achí yá.

<sup>9</sup>Yūcuán na te ni cahān yā jíin de:

Tāca róhó jéé jíni sóho, na chúsóhó ró. Achí yá.

### Najehē cahán yā mání jnūhun yátá

(Mt. 13.10-17; Lc. 8.9-10)

<sup>10</sup>Yūcuán na te ni quendōo maá na yā, jíin ndihúxí uū tēe cáscuáha jíin yá, jíin jecu gā ñayuu cáhiin jíin de. Te ni cacajnúhún de ya na vé cuní cahān jnūhun yátá un. <sup>11</sup>Te ni cahān yā jíin de:

Róhó, chí sáha Yaā Dios jeē cájecūhun ni rō jnūhun ni yisāhi yáha, ndese quívi-coo ñayuu ndaha ya ndacu ya jniñu nuū i. Te ñayuu jeē cáhiin síin siquī, chí mání jíin jnúhun yátá cáhán rī tāca jnúhun jíin i. <sup>12</sup>Súcuan cáhán rī návāha vésú cájito i, te quendōo i nájnúhun jeē tú na vé ni cájito i. Te vésú cájini sóho i, te ma jécūhun ni i, te ma násāma ini i quívi-



coo i nuū rī, te ma cóo jñuhun cáhnu ni nuū cuéchi i, áchí yá.

**Jeē ní castūhun cájī yá  
jnūhun yátá téē jéte trigo**

(Mt. 13.18-23; Lc. 8.11-15)

<sup>13</sup> Te ni cahān gā yā jíin de jíjnāhan de:

Núu tu cájecūhun ni rō jñuhun yátá yáha, ¿te ndese jecūhun ni rō tāca gá jñuhun yátá núu súcuan? <sup>14</sup> Tēē jéte trigo cúu tēē scuté núu jñuhun Yaā Dios. <sup>15</sup> Te trigo jeē ni jíitē yuhíchi cúu nájñuhun ánuá sava ñayuu. Chi cájini nahín i jñuhun ya, te ná ni cajini i, te quíji-ni Satanás te quénde-ni jñuhun ini anuá i. <sup>16</sup> Te trigo jeē ni jíitē nuū ñuhun yuū, chi cúu nájñuhun ánuá sava ñayuu cájini nahín jñuhun, te yachi-ni cájetáhú i te cácusī ni i jíin. <sup>17</sup> Te tu cúcutú jñuhun ún ini anuá i, te jecu-ni quivī cájetáhú i. Te núu ni quejéé jnúndóho, chí jíto xeēn ñayuu i siquī jñuhun ún, te quejéé nácani yátá ni i. <sup>18</sup> Te jeē ni jíitē nuū náne iñu cúu nájñuhun jecu gā ñayuu. Chi vēsú ni cajini sōho i, <sup>19</sup> te cándihvī ni i siquī jeē iyó ini ñayivī yáha. Te cácuni i cucúca i, te stáhú un i jeē cutóo ni i siquī tācá ndajññu. Te ndihí jeē yáha cácuñeñu i jíin, te jési nuū jñuhun ya, te tu íje i jíin jñuhun ya. <sup>20</sup> Te trigo jeē ni jíitē nuū ñuhun váha cúu nájñuhun ñayuu cájini nahín jñuhun, te cájetáhú i, te cáhije i jíin jñuhun ya. Te sava i cúu nájñuhun nunī jeē jéhe ocō uxī jeē íin íin, te sava i jéhe unī xico, te sava ga i jéhe ciento. Achí yá.

**Jñuhun yátá síquī lámpara**

(Lc. 8.16-18)

<sup>21</sup> Suni ni cahān yā jíin de:

Núu nástíin ñayuu íin lámpara, ¿a chúne i chíji íin cajón chí chíji jíto? Tuú, chí jéni i nuū sucún návāha cundijin. <sup>22</sup> Te suni súcuan, tu íyó ni íin jñuhun sāhi jéē ma cúni ñayuu, chí ndihí tāca jñuhun natūu ndijin te cuni ñayuu.

<sup>23</sup> Tāca róhó jéē jíni sōho, na chúsóhó ró, áchí yá.

<sup>24</sup> Te suni ni cahān yā jíin i:

Cuni sōho váha ró. Chi cūhva jeē chusóhó ró jñuhun Yaā Dios, suni cūhva un cuáha ya nuū rō, te víhyá gā cuáha ya nuū maá ró jeē chusóhó váha ró. <sup>25</sup> Chi ñayuu je jécūhun ni, stéén gā yā nuū i. Te ñayuu tu cándíje, maá jecu jeē jíin i ún, sa suhva naa. Achí yá.

**Jñuhun yátá síquī trigo jeē jéhu**

<sup>26</sup> Te ni cahān gā yā:

Súcuan cúu jeē ndácu Yaā Dios jñiñu nuū ñayuu: Cúu nájñuhun trigo jeē ní jete íin tēē. <sup>27</sup> Yūcuán na te quíxí de te ndónnda de, te súcuan jíca quivī cuahān. Te trigo un cáne te jéhu. Te maá de tu jíin de ndese cúu jeē jéhu. <sup>28</sup> Chi maá ñuhun sāha jeē jéhu trigo, xihna gā yucū, sáa te cáne yoco, yūcuán na te íje maá núnī. <sup>29</sup> Te núu ni cuaan trigo un, te quejéé ñayuu cájehnde i, chí je ni jíin quivī tahndé. Achí yá.

**Jñuhun yátá síquī ndiquin mostaza**

(Mt. 13.31-32; Lc. 13.18-19)

<sup>30</sup> Te suni ni cahān yā:

Na cáhán rī íin jñuhun yátá návāha cuni rō ndese ndúcuehē ñayuu jeē ndácu Yaā Dios jñiñu nuū. <sup>31</sup> Ndúcuehē i nájñuhun jéhu íin ndiquin mostaza jeē jéquin i nuū ñuhun. Te yūcuán cúu íin ndiquin lúli gá vēsú tācá ndiquin jeē iyó. <sup>32</sup> Te ná ni jequin i, te cáne te jéhu ga vēsú tāca gá yucū, te cúnáhnu ndaha. Te tācá saa chí sāha tí tacā tí nuū cuándahú xiní ún. Achí yá.

**Jeē máni jñuhun yátá cáhán yā jíin i**

(Mt. 13.34-35)

<sup>33</sup> Te cuehē jñuhun yátá súcuan ni cahān yā jíin ñayuu, núu nasaa cánda i jecūhun ni i. <sup>34</sup> Te tāca jéē ni stéén yā, máni maá jñuhun yátá ní cahān yā

jíin i. Te nuū tēe cáscuáha jíin yá chi ni nacastūhun cájí yá jnūhun ún.

**Jeē ní jecuiñī tachī nīhin  
jíin mar ni sáha ya**

(Mt. 8.23-27; Lc. 8.22-25)

<sup>35</sup> Te jeē cuácuaa quivī ún, te ni cahān yā jíin tēe cáscuáha jíin yá:

Na yáha yó quihīn yō inga lado mar, achí yá.

<sup>36</sup> Te ni casquéndōo de ñayuu cuehē ún, te ni quivicoo de ini barco nuū je íne Jesús, cuango de jíin yá. Te suni cuango jecu gā barco jíin de jíjnáhan de. <sup>37</sup> Te ni jequihī ñin tachī nīhin, te ni stóna ndute mar, te ni quivī ini barco. Te je yajni chitú ndute ini barco. <sup>38</sup> Te Jesús cáttú yá yatā de ini barco, quixí yā te yīhi ñin sahma cástfhi xinī yā. Te ni castóna de ya, te ni cacahān de:

Maestro, ¿á tu sáha ní cuenta jeē quēe yó chíji ndute te cuu yō? achí de.

<sup>39</sup> Te ni ndocuiñī yā, te ni cahān yā nuū tachī nīhin un jíin núu mar:

Jecuiñī te nayúu-ni coo ró, achí yá.

Te ni jecuiñī tachī, te ni cuu nayúu í-ni. <sup>40</sup> Te ni cahān yā jíin de jíjnáhan de:

¿Naun cáyūhú ndasí ró? ¿Naun tu cá-candíje ró jēe cácu ró sáha rí?

<sup>41</sup> Te yōhyo ni cayūhú de, te ni cacahān de jíin jnāhan de:

¿Nde ñin ga cúu tēe yáha jēe nde tachī nīhin jíin mar cájetáhú jēe cahān de? achí de.

**Tēe Gadara jeē ndóho tachī**

(Mt. 8.28-34; Lc. 8.26-39)

**5** Te ni jinū Jesús jíin de jíjnáhan de inga lado mar, región Gadara. <sup>2</sup> Te ná ni quenda ya ini barco un, te ñin tēe ñūhun tachī ini, ni quenda de nde nuū yíndūji ndīyi, te ni quee de nuū yā. <sup>3</sup> Tēe un ndéé de nuū yíndūji ndīyi. Te tu jéjníñu jeē jílni ñayuu de, ni jíin cadena. <sup>4</sup> Chi cuehē jíinu ni conuhñi jehē de

ndaha de jíin cadena. Te tāca jínu jéhnde de, te sácuéché de. Te tú ni ñin cúndeyí jíin de. <sup>5</sup> Te nduú ñuú jíca de yucu jíin núu yíndūji ndīyi, te cána cóhó de, te stújí de máá de jíin yúu. <sup>6</sup> Te náa jíca gá vēji Jesús, te ni jito de ya. Te jínu de ni quee de nuū yā, te ni jecuiñī yití de nuū yā. <sup>7</sup> Te ni cana cóhó de:

¿Naun vēji ní núu ná, Jesús Sēhe Yaā Dios, Yaā cujéhnu téyí? Cáhan ndahú ná jíin ní, jñi nahín Yaā Dios, ma stóho ní sáña, achí de.

<sup>8</sup> Súcuan ni cahān de, chi je ni cahān Jesús:

Táchī, quenda ini tēe yáha quihīn rō.

<sup>9</sup> Te ni cajñuhun yá de:

¿Na vé naní ró?

Te ni cahān de:

Legión naní ná, chi cuehē tachī ñūhun ini ná, achí de.

<sup>10</sup> Te ni cahān ndahú ndasí de jíin yá jeē ma tájí yá tachī quendacoo región ún. <sup>11</sup> Te yajni yucu yúcuán cáhiin cuehē quínī cájitu tí. <sup>12</sup> Te tachī jeē ñūhun ini tēe un ní cacahān ndahú jíin yá:

Núu tají ní sáná, te cuāha ní jñuhun quivicoo ná ini quínī yúcuán, achí.

<sup>13</sup> Te Jesús ni jēhe ya jñuhun. Te ni quendacoo tachī ún ini tēe ún, te ni quivicoo ini quínī, te íyó nájnūhun uū mil tí. Te quínī un ní cajinu tí ni ñingoo tí ñin yucáva, ni quivicoo tí nuū mar. Te ni ndaquihī tí ndute, ni cajihī tí.

<sup>14</sup> Te tēe cándito tí, ni cajinu de cuango de jeē ní cayūhú de. Te ni jinūcoo de ni cacastūhún de nuū ñayuu ñuu un jíin ñayuu tāca rancho. Te cuango ñayuu un cuácondēhé i na vé ni cuu. <sup>15</sup> Te ni jinūcoo i nuū íne Jesús, te ni cajito i nuū tēe ni ñūhun cuehē tachī ini. Te néne de, te ñūhun de sahma, te je ni nducájí xíní de. Te ni cayūhú ñayuu ún. <sup>16</sup> Te tēe ní cajito, ni canacani de jñuhun nuū ñayuu, ndese ni nduvāha tēe ni ñūhun tachī ini, jíin ndese ni candoho quínī ún. <sup>17</sup> Yúcuán na te ni caquejéé i cacahān

ndahú i jíin yá jeē na cújiyo ya región yūcuan quíhīn yā.

<sup>18</sup> Te ni ndīvi ya ini barco. Te tēe ni ñuhun tachī ini un ní cahān ndahú de jíin yá jeē na cuáha ya jñuhun quíhīn de jíin yá. <sup>19</sup> Te Jesús tu ní jéhe ya jñuhun, chí ni cahān yā jíin de:

Cuánuhun vehe ró núu jñahan ró, te nacani ró jñuhun nuū i ndese yōhyo jéhu jniñu ni sáha máá Jítóho rō jíin ró, te ndese ni cundáhú ni yā rohó, áchí yá.

<sup>20</sup> Te ni quenda de cuahān de, te ni quejéé de nácani de jñuhun tǎcá ñuu Decápolis ndese yōhyo jéhu jniñu ni sáha Jesús jíin de. Te ndīvii ñayuu un ní canaa ni i cájini nahín i.

**Jñuhun sēhe síhí Jairo jíin ñahan ní quehé yusáhma ya**

(Mt. 9.18-26; Lc. 8.40-56)

<sup>21</sup> Te ni nayāha tucu Jesús cuanuhun yā inga lado mar jíin barco. Te ni quecoo cuehē ñayuu nuū yā, nuū íne ya yumar.

<sup>22</sup> Te ni quee ñin tēe cújéhu ini vehe ii sinagoga, naní de Jairo. Te ná ni jito de nuū yā, te ni jecuiñī yití de nuū jehé yā.

<sup>23</sup> Te ni cahān ndahú ndasí de jíin yá:

Sēhe síhí ná je yajni cuu i. Na quíhīn yō vehe ná te soó ní ndaha ní síquī i nāvāha na ndúvāha i te cotecu i, áchí de.

<sup>24</sup> Yūcuán na te cuahān yā jíin de. Te cuehē ñayuu cándiquin i ya, te ni chitú níhin i xiin ya cuango i. <sup>25</sup> Te mēhñu ñáyuu un cuahān ñin ñahan cúhú, jeē ní cuu uxí uū cuiyā ndóho ña cuehyī niñī.

<sup>26</sup> Te yōhyo ni ndoho ña, chí ni jexin ña tǎca jéé névāha ña jíin cuéhē tēe tájná, te tu ní jéjñiñu jeē ndúvāha ña, chí sa suhva víhyá gā sáha. <sup>27</sup> Te ñahan yáha ná ni níhin ña jñuhun Jesús, te ni quee ña ichi yátá yā mēhñu ñáyuu cuehē ún, te ni quehé ña yusáhma ya. <sup>28</sup> Chí ni jeni ni ña: Vēsú maá sahma ya na níhin rī quehé rí, te nduvāha ri, jeni ni ña. <sup>29</sup> Te ni jecuiñī-ni niñī ña, te ni jini ña jeē ní

nduvāha ña cuehyī ún. <sup>30</sup> Te Jesús ni jini yā jeē ní nduvāha ñin ñayuu jíin fuerza yā. Te ni ndió cóto ya nuū ñáyuu cuehē, te ni cahān yā:

¿Ndé ñin ni quehé sahma ri? Achí yá.

<sup>31</sup> Te tēe cáscuáha jíin yá, ni cacahān de:

Jító ní jéé ñáyuu cuehē yāha ní chitú níhin i xiin ní te cáquihī i níhin níf cáni ichi, te cájñuhun ní ndé ñin ni quehé sahma ní.

<sup>32</sup> Te máá yá jito ya cháha chúcuan, cúni yá jeē na cáchi ñayuu ni sáha. <sup>33</sup> Te ñahan un yúhú ña te quísi i ña, te je jíin ña jeē ní nduvāha ña. Te ni quee ña, te ni jecuiñī yití ña nuū yā, te ni cachi ña ndíhi ndese ni cuu jíin ña. <sup>34</sup> Te ni cahān yā jíin ña:

Séhē, ni candíje ró jéé cuu nasávāha ri rohó, te jeē yúcuán ní nduvāha ró. Cuahán te na ndúsī ni rō, chí je ni nduvāha ró cuehyī ní ndoho ró, áchí yá.

<sup>35</sup> Te níni cáhán gā yā súcuan, te ni quecoo ñayuu cáyucú vehe tēe cújéhu ini vehe ii sinagoga, te ni cacahān i jíin de:

Je ni jihī sēhe síhí ní. Te ma sajnéñu ga ní Maestro, achí i.

<sup>36</sup> Te Jesús tu ní sáha ya cuenta jeē súcuan cácahān i, te ni cahān yā jíin tēe cújéhu ini vehe ii sinagoga:

Ma yūhu ró, chí candíje ró jéé nastécu ri i, áchí yá.

<sup>37</sup> Te tu ní jéhe ga yā jñuhun condiquin ñayuu yā, chí máá-ni Pedro jíin Jacobo, jíin Juan ñani Jacobo. <sup>38</sup> Te ni jinū yā vehe tēe cújéhu ini vehe ii sinagoga, te ni jito ya ñayuu, cácuvaā i, te cándahyū i, te cácana cóhó i. <sup>39</sup> Te ni quívi ya, te ni cahān yā:

¿Najehē yōhyo cásvaā rō te cándahyū rō? Sūchi síhí yáha, tu ní jíhí i, chí quíxí-ni i, áchí yá.

<sup>40</sup> Te ni cajecū catá i jeē ni cáhān yā. Te ni quenehen ndíhi ya i cuahān i nuū quehé. Te ni cana ya máá-ni tátá jíin

náná sūchi sǎhí un, jíin tēe cáhiin jíin yá, te ni quívi ya jíin de nuū catú súchi sǎhí ní jihí ún. <sup>41</sup>Te ni jnī ya ndaha i, te ni cahān yā jíin i:

Talita cumi, achí yá. Te jñuhun un cúní cahān: Sǎhí, cáhán rī jíin ró, ndocuiñí, achí yá.

<sup>42</sup>Te ni ndocuiñí-ni sūchi sǎhí un, te ni nacaca i, chí je íyó i uxí uū cuiyā. Te yóhyo ni canaa ni ñayuu cájito i. <sup>43</sup>Te ni ndacu niñin ya jniñu nuū i jíjnáhan i jeē ma cáchi cuití i nuū ni ñin. Te ni cahān yā jeē na cuáha ña jeē cáji sūchi sǎhí.

### Jeē cuánuhun yā ñuu Nazaret

(Mt. 13.53-58; Lc. 4.16-30)

**6** Te ni quenda Jesús yūcuán, te cuanuhun yā ñuu yā. Te tēe cás-cuáha jíin yá cuango de jíin yá. <sup>2</sup>Te máá quívi ndétātu ní steén yā jñuhun ini vehe ii sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutúhva tēe yáha tāca jnúhun yáha? ¿Te ndese cúu jeē cahán de jñuhun ndíchí yáha jíin jéē sáha de jniñu jéñnu yáha? <sup>3</sup>Chi tēe yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yáhá. Achí i.

Te súcuan ni cacujéē ni i nuū Jesús. <sup>4</sup>Te ni cahān yā jíin i:

Tāca tēe nácani jñuhun Yaā Dios, íyó yíñúhún ñayuu jíin de, chí máni ñayuu ñuu maá de, jíin jnáhan de, jíin ñáyuu vehe de cúu jeē tu íyó yíñúhún jíin de. Achí yá.

<sup>5</sup>Te tu ní cúu sáha ya cuehē jniñu jéñnu yūcuán. Chi jecu-ni ñayuu cácuñu ni soó yá ndaha ya siquí i, te ni nasávāha ya i. <sup>6</sup>Te náá ni yā jíto ya jeē tu cácan-díje ñayuu jíjnáhan i. Yūcuán na te ni jica cuu ya tācā ñuu yajni, ni steén yā jñuhun.

### Jeē ní tají yá ndihúxí uū de cuanacani de jñuhun

(Mt. 10.5-15; Lc. 9.1-6)

<sup>7</sup>Te ni cana ya ndihúxí uū tēe cás-cuáha jíin yá, te ni tají yá ndihuū ndihuū de quingoo de. Te ni sáha ya jeē cóndiso jniñu de quenehen de tachí ini ñayuu.

<sup>8</sup>Te ni ndacu ya jeē tú na vé condiso de jeē cuajniñu de ichi, ni ñunu, ni staā, ni xūhún. Chí máá vara-ni condahá de. <sup>9</sup>Te quihí de ndijēn, te ma quihín de jíin úū sahma, áchí yá. <sup>10</sup>Te suni ni cahān yā jíin de:

Na-ni vehe núu ni quívicoo ró, te yūcuán coyūcu ró ndé quenda tucu ró quihín rō inga ñuu. <sup>11</sup>Te núu ñin ñuu tu cájetáhú i róhó, ni tu cúní i cuni nahín i jñuhun cahān rō, na quéndacoo ró yúcuán, te scóyo ró tícachā jehē rō, te súcuan steén rō jeē iyó cuéchi i jeē tu ní cájetáhú i. Jendaá cahán rī jíin ró jeē quívi coo juicio te xeēn gā coo castigo siquí ñuu cásáha súcuan vésú siquí ñuu Sodoma jíin ñuu Gomorra nuū ní casáha ndasí ñáyuu cuéchi.

<sup>12</sup>Te ni quendacoo de cuahān de, te ni canacani de jñuhun jeē na nácani ni ñayuu jeē stóo i cuéchi i. <sup>13</sup>Te suni ni caquenehen de cuehē tachí ini ñayuu. Te ni cachihi de aceite cuehē ñayuu cácuñu, te ni canduvāha i.

### Jeē ni jíhí Juan tēe scuándute

(Mt. 14.1-12; Lc. 9.7-9)

<sup>14</sup>Te rey Herodes ni jini jñuhun de jñuhun Jesús, chí ni jitē núu jñuhun ya ní cáhnu. Te ni cahān de:

Tēe yúcuán cúu Juan tēe ni scuándute, te ni natecu de. Jeē yúcuán íyó poder de sáha de jniñu jéñnu. Achí de.

<sup>15</sup>Te sava ga ñayuu ni cacahān i:

Tēe un cúu Elías jeē ní nacani jñuhun jenahán.

Te sava ga i ni cacahān:

Tuú chi iin tēe nácani jnūhun Yaā Dios cúu de, nájñūhun tēe ni canacani jnūhun ya nde jenahán, áchí i.

<sup>16</sup> Te ná ni jini Herodes, te ni cahān de:

Tuú chi yūcuan cúu Juan jeē ní ndacu ri jniñu ni tahndē xini, te ni natecu de núu súcuan, áchí de.

<sup>17</sup> Chi máá Herodes ni ndacu de jniñu jeē na quiví Juan vecāa, jíin jéē na cónuhni de jíin cadena. Súcuan ni sáha de jeē siquí Herodías, ñasihí ñani de Felipe. Chi Herodes ni quihin de ña jeē cúu tucu ña ñasihí de. <sup>18</sup> Te Juan ni cahān de nuū Herodes:

Tu íyó ley jeē cóndeca ró ñasihí ñani rō, áchí de.

<sup>19</sup> Te jeē yūcuan Herodías ni jito uhū ña Juan, te cúní ña jeē na cúu de, te tu ní nínín ña modo. <sup>20</sup> Chi Herodes yúhú de cahni de Juan, chi jíin de jeē tēe ndaā tēe ndoo cúu Juan. Te jeē yūcuan ní jesi de jeē nducú ña jeē cúu Juan. Te nújñahan ni de jíini nahín de jnūhun cáhán Juan, vēsú tu jécūhun vāha ni de. <sup>21</sup> Te ni quee iin quiví jeē ní cundeyí Herodías. Chi ni sáha Herodes iin vico quiví ní cacu de, te ni jēhe de jeē ní cacuxíni tēe cándiso jniñu nuū de, jíin tēe cácuu capitán, jíin tēe cácujeñhu región Galilea. <sup>22</sup> Te ni quiví sēhe síhí máá Herodías, ni jita jéhé i nuū chitú un. Te ni cacusiñ ni rey Herodes jíin tēe cácuuxíni jíin de. Te ni cahān de jíin súchi síhí un:

Cacān na vé cuní rō, te cuāha ri nuū rō, áchí de.

<sup>23</sup> Te ni cahān teyí de jeē cuāha de núu na vé cuní i cacān i, vēsú nde sava región jeē yñhi ndaha de. <sup>24</sup> Te ni quenda i, ni jecajñuhún i náná i:

¿Na vé cacān na núu de? áchí i.

Te ni cahān ña:

Xini Juan tēe scuándute cacān rō nuū de, áchí ña.

<sup>25</sup> Yūcuán na te ni ndívi-ni i nuū rey, te ni cahān i:

Cúní na jéē vijna ñuhún-ni cuāha ní xini Juan tēe scuándute, cone nuū iin cohō, áchí i jíin de.

<sup>26</sup> Yūcuán na te ni cucuíhyá ndasí ni rey un jeē ní cundeyí Herodías jeē cúu Juan. Te siquí jeē ni jéjñūhun téyí de, jíin jéē ní cajini sóho tēe cáyeji staā jíin de, jeē yūcuan tu ní cúní de sásahán de jeē ni jíicān i. <sup>27</sup> Te ni tají-ni de iin soldado jeē quíquihin de xini Juan. <sup>28</sup> Te ni jehēn soldado un vecāa, te ni jehnde de xini Juan. Te ni quee de jíin xini Juan, íne nuū iin cohō. Te ni jēhe de nuū sūchi síhí un, te máá i ni jēhe i nuū naná i.

<sup>29</sup> Te tēe cácuáha jíin Juan ni canihin de jnūhun, te ni jengoo de, ni candonehen de yiquí cúñu Juan, te ni cachindūji de.

### Jeē ni scáji yā uhūn mil tēe

(Mt. 14.13-21; Lc. 9.10-17; Jn. 6.1-14)

<sup>30</sup> Yūcuán na te tēe cácuu apóstol jeē ní tají yá cuangoo nacani jnūhun, ni ndecoo de nuū Jesús. Te ni canacani de nuū yā táca jniñu ni casáha de, jíin jnūhun ni castéén de. <sup>31</sup> Te ni cahān yā jíin de:

Na quíngoo yó iin lugar nuū tú ñayuu, te ndetātu yó jecu, áchí yá.

Chi cuehē ñayuu cuahān i vēji i nuū yā, te ni tu ní núne ya jeē cáji yā staā jíin de. <sup>32</sup> Yūcuán na te ni quiví ya iin barco jíin táca tēe apóstol un, te cuangoo sín ya jíin de iin lugar nuū tú ñayuu. <sup>33</sup> Te cuehē ñayuu ni cajito i jeē cuahán yā jíin de, te ni canacuni i jeē maá yá cúu. Te nde táca ñuu ni quendacoo i, te yachí cuangoo i, te xihna gā i ni jinūcoo vēsú maá yá. <sup>34</sup> Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chi cúu i nájñūhun lanchi jeē tú jitoho tī. Te ni steén yā cuehē jnūhun nuū i. <sup>35</sup> Te nuū ní ini, te tēe cácuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu.

<sup>36</sup> Núu súcuan te tají ní ñayuu na quín-

goo i tāca rancho jíin ñuu yajni, te cuaan i staā caji i, chi tú na vé cándiso i caji i, áchí de.

<sup>37</sup> Te ni cahān Jesús jíin de:

Cuāha máá ró jeē caji i, áchí yá.

Te ni cacahān de:

¿Te ndese cuu? Chi ni ma cúu vēsú núu quicuuan ná ndé uū ciento denario staā caji ñayuu, áchí de.

<sup>38</sup> Te ni cahān yā jíin de:

¿Nasaa staā cánevāha ró? Cuacondēhe, áchí yá.

Te nuū ní cajini de, te ni cacahān de:

Uhūn-ni staā jíin úu chācá íyó, áchí de.

<sup>39</sup> Yūcuán na te ni cahān yā jíin ñayuu jeē na cúcōo sīn i cuenta grupo nuū íte.

<sup>40</sup> Te ni cacucōo sīn ciento ciento i, jíin cincuenta cincuenta i. <sup>41</sup> Te ni quihin ya ndihúhún staā jíin úu chācá un, te ni ndacoto ya ichi ándiví, te ni nacuatáhú yá. Te ni tahu cuéché yá staā ún, te ni jēhe ya nuū tée cáscuāha jíin yá, te máá de ni casaja de nuū ñayuu cuehē ún. Te suni ni jēhe ya ndíndúú chācá, ni casaja de nuū i. <sup>42</sup> Te ndívii i ni cayeji, te ni candutú chíji i. <sup>43</sup> Yūcuán na te ni canastútú de pedazo staā jíin cháca jéé ní quendōo, te ni chitú úxi uū jica. <sup>44</sup> Te téē ni cayeji, chi uhūn mil de cúu.

**Jeē ní jica jéhé yá nuū mar**

(Mt. 14.22-27; Jn. 6.16-21)

<sup>45</sup> Yūcuán na te ni cahān-ni Jesús jíin téē cáscuāha jíin yá jeē na quívicoo de barco, te cosnūú de yāha de inga lado mar ñuu Betsaida. Te máá yá chi natají yá ñayuu quínuhun i, te sáá te suni quihīn yā. <sup>46</sup> Te nuū ní cuu ni natají yá i, te ni caa ya yucu cuacacān tahu yā. <sup>47</sup> Te jeē ní cuua, te barco un je ni cuu sava nuū mar cuahān, te máñúhún-ni ya ni quendōo nuū ñúhun íchi. <sup>48</sup> Te ni jito ya jeē yóhyo jnūndóho cáscáca de barco, chi nihīn vēji tachī ichi núú de. Te jeē yínee gā ni quee ya nuū de, jica jéhé yá nuū mar. Te yāha ya nuū de quihīn yā

nuú. <sup>49</sup> Te ni cajito de jeē jica ya nuū mar, te ni cajeni ni de jeē jihná cúu, te ni cacana cóhó de. <sup>50</sup> Chi ndihī de ni cajito nuū yā, te ni cayuhú ndasí de. Te ni cahān-ni ya jíin de:

Ndeyí coo ni rō, te ma yūhu ró, chi máá rí cúu, áchí yá.

<sup>51</sup> Te ni quívi ya ini barco un, te ni jecuiñī-ni tachī. Te yóhyo ni canaa ni de cájito de. <sup>52</sup> Chi cándāa néé gá jeē níjnūnī de, chi ni jíin jniñu jéhu jeē ní nducuehē staā, tu ní cájēcūhun ni de jeē maá yá cúu Yāá ní tají Yāá Dios.

**Jeē ní nasávāha ya ñayuu cácuñu región Genesaret**

(Mt. 14.34-36)

<sup>53</sup> Te ni quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco. <sup>54</sup> Te nuū ní quenda ya jíin de ini barco, te ñayuu yúcuan ni canacuni-ni i ya. <sup>55</sup> Te yachī ni jengoo i tācá ndañúú yūcuán, te ni caquindeca i ñayuu cácuñu, cáyosó i nuū camilla, vējicoo ñayuu nuū ní jito i íne ya. <sup>56</sup> Te ndé-ni cúu-ni núu ni quívi ya, núu ñuu lulí, chí ñuu cáhnu, chí rancho, te cájequin i ñayuu cácuñu yuhíchi, te cácahān ndahú i jíin yá jeē na quéhé i vēsú yusáhma ya. Te tāca ñayuu jeē ní caquehé sahma ya, ni canduvāha-ni i.

**Siquī ndese cújnehén ñayuu**

(Mt. 15.1-20)

**7** Yūcuán na te téē grupo fariseo jíin jecu téē cástéén tutu ley Yāá Dios, ni quendacoo de ñuu Jerusalén, te ni quecoo de nuū Jesús. <sup>2</sup> Te téē un ní cajito de jeē sava téē cáscuāha jíin Jesús, ni cayeji jnehén de staā, chi tu ní cáscuácu de costumbre jeē nándahá de nuū Yāá Dios. Te ni cacahān siquī de. <sup>3</sup> Chi téē fariseo jíin ndihī ñayuu hebreo, névāha i costumbre jenahán jéé ma caji i staā núu tu nandahá váha i xihna gā. <sup>4</sup> Te núu ni ndecoo i jeē ní jéngoo i nuū yáhu, te tu cáyeji i

te núu tu nandahá i. Te íyó cuéhē gā costumbre jenahán jeē casquícu i, nájnūhun jeē ndúndoo taza, tindhō, cohō cáa, jíin jíto. <sup>5</sup>Te tēe fariseo jíin tēe cástéén tutu ley Yaā Dios, ni cacajñuhún de ya:

Tēe cáscuáha jíin ró, ¿naun tu cáscuícu de costumbre ñayuu jenahán? Chi sa cáyeji jnehén de staā, achí de.

<sup>6</sup>Te ni cahān yā jíin de:

Ndaā ni nacani Isafas jñūhun siquī rō jijnáhan ró jēe tēe stáhú-ni cácuu ró. Chi súcuan ni tee de jñūhun ni cahān Yaā Dios nde jenahán:

Ñayuu yáha chi máá yuhu-ni i cájetáhu i ruhū,

te nasūu ndé jíin ini jíin ánuá i.

<sup>7</sup>Te cáchiñuhún sáa-ni i ruhū, chi jñūhun cástéén i cúu jniñu ní candacu tēe,

te nasūu jēe ní ndacu máá rí cúu.

Achí Yaā Dios. Achí Isafas. <sup>8</sup>Súcuan cácuu ró, chi ni casiáá rō jniñu ní ndacu Yaā Dios nuū rō, te cáscuícu ró costumbre jeē ní cajequin ñayuu, jeē ndúndoo tindhō jíin taza. Te cuehē gā costumbre súcuan cáscuícu ró, achí yá.

<sup>9</sup>Te suni ni cahān yā:

Cásiáá rō jniñu ní ndacu Yaā Dios, návaha squícu ró costumbre ni cajequin máá ró. <sup>10</sup>Chi Moisés ni cahān de: Coo yñuhún ró jíin tátá rō jíin náná rō. Te núu ndé iin cahān siquī tátá chí síquī naná, na cúu nahín. Achí Moisés. <sup>11</sup>Te máá ró chi cácahān rō jeē cuu cahān iin tēe jíin tátá de náná de: Ma cúu chindéé ñáhán ná nhín cuáha na jēe cáji ni jēe cúhun ní, chi ndihí jeē névaha ná, chi Corbán cúu, achí ró. (Te jñūhun Corbán cuní cahān jeē ni sócō nuū Yaā Dios.)

<sup>12</sup>Te cácahān rō jeē núu súcuan cahān iin tēe, te tuá cánuu chindéé ñáhán de tátá de náná de. <sup>13</sup>Te súcuan cástívi ró jniñu ní ndacu Yaā Dios, jeē síquí costumbre ni cajequin ñayuu jenahán vēji. Te cuehē gā jniñu súcuan cásaáha ró, achí yá.

<sup>14</sup>Te ni cana tucu ya ñayuu cuehē ún, te ni cahān yā jíin i:

Cuni sóho vāha ró jijnáhan ró, te chuhun ni rō: <sup>15</sup>Tāca jēe iyó, te núu ni quívi yuhu ñayuu te tu cújnehén i sáha. Chi jeē quénda ini anuá ñayuu, yūcuan cúu jeē cújnehén i sáha. <sup>16</sup>Tāca rōhó jēe jíni sóho, na chúsohó ró, achí yá.

<sup>17</sup>Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni cacajñuhún de ya siquī jñūhun yátá yáha jēe ni cahān yā. <sup>18</sup>Te ni cahān yā jíin de:

¿A máá ró suni ná tu jecūhun ni rō, chí naún? ¿A tu cájini rō jeē tāca jēe quívi ini ñayuu, ma cúu cújnehén i sáha? <sup>19</sup>Chi tu quívi ini anuá i, chi chíji i quívi, te quénda-ni cuahān, achí yá.

Súcuan ni steén yā jeē tāca jēe yéji ñayuu, tu cújnehén ánuá i sáha. <sup>20</sup>Te ni cahān gā yā:

Jeē quénda ini anuá ñayuu, yūcuan cúu jeē cújnehén i sáha. <sup>21</sup>Chi nde ini anuá ñayuu quénda jeē jéni néé ni, jeē casíquí ndéé jnāhan, jeē jíca jnéni, jeē jéhni ndíyi, <sup>22</sup>jeē sacuíhna, jeē ndíyo ni ndajniñu jnāhan, jeē sáha néé, jeē stahú jnāhan, jeē máni cuēchi sáha, jeē cucuésún ni, jeē cahān yāa síquī jnāhan, jeē sandúxí máá, jeē canéé xíni. <sup>23</sup>Tācá jniñu néé yáha, máni ini anuá ñayuu quénda, te cújnehén i sáha, achí yá.

### **Ñahan inga nación jeē ní candíje nihin**

(Mt. 15.21-28)

<sup>24</sup>Te ni quenda ya yūcuan cuáhān yā región Tiro jíin Sidón. Te ni quívi ya iin vehe, te cúni yā jeē tú ni iin ñayuu cuni jeē íne ya yūcuán. Te vēsú súcuan, te tu ní cúu cone sáhi yá. <sup>25</sup>Te iin ñahan íyó séhe síhí ña jeē ñūhun tachí ini i, ni nihīn-ni ña jñūhun jeē íne ya. Te ni quee ña, te ni jecuíñi yití ña nuū jehé yá. <sup>26</sup>Te ñahan ñuu jicá cúu ña, chi nde Sirofenicia cúu nación ña. Te ni cahān ndahú ña

jiín yá jeē na quénehen ya tachī ini sēhe s̄hí ña. <sup>27</sup> Te ni cahān Jesús jiín ña:

Nasūu nūū maá ní vēji ná, chi máni nuū ñáyuu cácuu sēhe Israel. Chi tu íyó váha jeē quénde yō staā sēhe te cuāha yó nūū ína, achí yá.

<sup>28</sup> Te ni cahān ña:

Jendaá cahān ní Tātā, te chindéé ñáhán ní s̄na vēsú cúu ná nájñuhun ina. Chi suni máá tí cáhiin tí chíji mesa, cánihin tí staā cuechí jeē cóyo yuhu sūchi lúlí cayeji tí, achí ña.

<sup>29</sup> Yūcuán na te ni cahān yā jiín ña:

Váha ni cahān ní. Cuáhán ní nūu sūcuan, chi je ni quenda tachī ún ini sēhe s̄hí ní, achí yá.

<sup>30</sup> Te ni najinū ña vehe ña, te ni jito ña jeē catú sēhe s̄hí ña nuū jíto, te je ni quenda tachī ún ini i.

### **Jeē ní nasávāha ya iin tēe sóhó cástété**

<sup>31</sup> Te ni quenda tucu ya región Tiro, ni yāha ya Sidón jiín táca ñuu Decápolis, te ni jinū yā mar Galilea. <sup>32</sup> Te ni caquin-deca i iin tēe sóhó cástété nuū yā, te ni cacahān ndahú i jiín yá jeē na sóo yá ndaha ya siquí de. <sup>33</sup> Te ni quenehen s̄hín ya de nuū ñáyuu cuehē ún, te ni chune ya xiní ndáha ya sóho de, te ni tesíhi yá, te ni quehé yá yaá de. <sup>34</sup> Te ni ndacoto ya ichi ándiví, te ni jitū ni yā, te ni cahān yā:

Efata, achí yá, jeē cuní cahān: Nanune.

<sup>35</sup> Te ni nanune-ni sóho de, te ni nduvāha yáá de, te ni nacahān vāha de. <sup>36</sup> Te ni ndacu ya jniñu nuū ñáyuu un jéē ma cáchi i nuū ní iin. Te vēsú ni cahān ñihin ya jiín i, te v̄hyá gā ni cajete i jñuhun. <sup>37</sup> Te yōhyo ni canaa ni i cájito i, te ni cacahān i:

Váha sáha ya tācá jniñu, chi nde tēe cásohó, cánacuni sóho de, te tēe cándāa ñhín, cánacahān vāha de sáha ya, achí i.

### **Jeē ni scáji yā cuñ mil ñayuu**

(Mt. 15.32-39)

**8** Te tiempo un ní candutútú cuehē ndasí ñáyuu, te tuá na vé caji i. Te ni cana Jesús tēe cáscuáha jiín yá, te ni cahān yā:

<sup>2</sup> Cúndahú ni rī ñayuu yāhá, chi je ni cuu uní quiví cáyucú i jiín rí, te tuá na vé caji i. <sup>3</sup> Te nūu natají rí i quinhun ndite i vehe i, te cuita fí i sava ichi, chi íyó sava i jeē jicá véjicoo i, achí yá.

<sup>4</sup> Te tēe cáscuáha un ní cacahān de:

¿Te ndé nuū nihín yō staā caji i jíjnáhan i? Chi yāhá tú na ñayuu yúcu, achí de.

<sup>5</sup> Te ni cajñuhun yá de:

¿Nasaa staā cánevāha ró?

Te ni cacahān de:

Uxā-ni, achí de.

<sup>6</sup> Yūcuán na te ni cahān yā jiín ñáyuu cuehē un jéē na cúcoo i. Te ni quihin ya ndihúxá staā ún, te ni nacuatáhú yá nuū Yaā Dios. Te ni tahu cuechí yá, te ni jēhe ya nuū tēe cáscuáha jiín yá. Te máá de ni casaja de nuū ñáyuu cuehē ún.

<sup>7</sup> Te suni cándiso de jecu chācá lúlí. Te ni nacuatáhú yá siquí, te ni cahān yā jeē suni saja de jíjnáhan de. <sup>8</sup> Te ndihí i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxá jica. <sup>9</sup> Te tēe ni cayeji un, íyó nájñuhun cuñ mil de. Te ni nacuatáhú yá nuū ñáyuu ún, te cuanungoo i.

<sup>10</sup> Yūcuán na te ni ndiví-ni ya ini barco jiín tēe cáscuáha jiín yá, te cuahān yā región Dalmanuta.

### **Jeē ní cajicān de iin jniñu jéhnu nuū yā**

(Mt. 16.1-4; Lc. 12.54-56)

<sup>11</sup> Yūcuán na te ni quecoo tēe grupo fariseo, te ni caquejéé de stíchí de Jesús. Te cácuni de coto ndee de ya, te ni cajicān de jeē sáha ya iin jniñu jéhnu jeē coo iin seña ichi ándiví. <sup>12</sup> Te ni jitū ni



yā siquī jeē tu cácanđije de jíjnáhan de, te ni cahān yā:

¿Naun cájicān ñayuu yáha iin jniñu jéhnú nuū rī? Jendaá cahān rī jeē ma stéén rī ni iin jniñu jéhnú nuū ñáyuu yáhá.

<sup>13</sup> Te ni squéndōo ya de jíjnáhan de, te ni ndívi tucu ya ini barco, te cuahān yā inga lado mar.

### Jnūhun levadura tēe fariseo

(Mt. 16.5-12)

<sup>14</sup> Te tēe cáscuáha jíín yá ni canaa ni de condiso de jeē cáji de, chi iin-ni pan cánevāha de ini barco. <sup>15</sup> Te ni ndacu ya jniñu nuū de:

Coto má candije ró levadura tēe grupo fariseo jíín levadura Herodes, achí yá.

<sup>16</sup> Te ni cacahān tēe cáscuáha un jíín táca jnāhan de:

Va siquī jeē tú na staā ndíso yó, jeē yúcuán cáhān yā súcuán, achí de.

<sup>17</sup> Te ni jini Jesús, te ni cahān yā:

¿Najehē cándajnūhun ró jeē ni cáhān rī súcuán siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhān rī súcuán siquī jeē tu cándiso ró stáá? ¿A yóhoyo uun ni rō candije ró?

<sup>18</sup> Iyó tñnū ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ni rō? <sup>19</sup> Chí ná ni tahú cuéché rí uhūn staā ni cayeji uhūn mil tēe, ¿te nasaa jica ni chitú pedazo staā jeē ní canastútú ró? Achí yá.

Te ni cacahān de:

Uxī uū jica, achí de.

<sup>20</sup> Te suni súcuán ná ni tahú cuéché rí uxā staā ni cayeji cuūn mil tēe, ¿te nasaa jica ni chitú pedazo staā jeē ní canastútú ró? Achí yá.

Te ni cacahān de:

Uxā jica, achí de.

<sup>21</sup> Te ni cahān yā jíín de:

Te nde vijna ¿á ná tu jecūhun ni rō jinnáhan ró?

Súcuán ni cahān yatá yá jeē ma cándije de jnūhun stáhú cástéén tēe ún.

### Jeē ní nasávāha ya tēe cuáá ñuu Betsaida

<sup>22</sup> Yúcuán na te ni jinū yā jíín de ñuu Betsaida. Te ni caquindeca ñayuu iin tēe cuáá núū yā, te ni cacahān ndahú i jíín yá jeē na tēe ya ndaha ya nuū de. <sup>23</sup> Yúcuán na te ni jniñu ya ndaha tēe cuáá un, te ni quenehen ya de yatā núū ún. Te ni tee ya tesíhi yá tñnū de, te ni tee ya ndaha ya siquī. Te ni cajñūhun yá de núu cuu coto de jecu. <sup>24</sup> Te ni ndacoto de, te ni cahān de:

Jíto ná ñayuu jeē cájica i, te tu jíto cáji ná, chi ná cáa yujnu cáa i, achí de.

<sup>25</sup> Yúcuán na te ni tee tucu ya ndaha ya siquī tñnū de. Te ni ndacoto vāha de, te ni nduvāha-ni tñnū de, te ni jito cáji de ndíhi-ni. <sup>26</sup> Te ni natají yá de quinhun de vehe de, te achí yá:

Ma quívi ró ñuu, ni ma cáchi cuiti rō nuū ní iin, achí yá.

### Jeē ni cáhān Pedro jeē Jesús cúu Cristo

(Mt. 16.13-20; Lc. 9.18-21)

<sup>27</sup> Yúcuán na te Jesús jíín tēe cáscuáha jíín yá, cuahān yā táca ndañúú Cesarea Filipo. Te ichi un ní cajñūhun yá de:

Ruhū, ¿ndé iin cúu ri cácahān ñayuu?

<sup>28</sup> Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahān. Te sava ga i cácahān jeē inga tēe ni nacani jnūhun Yaā Dios cúu ní.

<sup>29</sup> Yúcuán na te ni cajñūhun yá de:

Te máá ró, ¿ndé iin cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

<sup>30</sup> Te ni ndacu ya jniñu nuū de jijnáhan de jeē ma cáchi de jñuhun yáha nuū ní iin ñayuu.

### Jeē ní castühún Jesús jeē cúū yā

(Mt. 16.21-28; Lc. 9.22-27)

<sup>31</sup> Te ni quejéé yá steen yā nuū de:

Máá rí, Yaa ní nduu tēe, cánuú ndoho xeēn rí. Te táca tēe jéhu jín sūtū cácu-jéhu jín tēe cástéén tutu ley, squéhichi de ruhū, te cahni de ruhū. Te nuū uní quiví te natecu rí, achí yá.

<sup>32</sup> Te cájí ní cahān yā jñuhun yáha. Yūcuán na te Pedro, ni cana máñuhún de ya, te ni quejéé de cáhān de nuū yā jeē ma cuáha ya jñuhun coo súcuan. <sup>33</sup> Te máá yá ni ndió cóto ya ni jito ya nuū tēe cáscuáha jín yá. Te ni cahān yā nuū Pedro:

Cujiyo quihīn rō, chi cáhān rō ná cáhān Satanás. Chi tu jéni ní rō nájnūhun jéni ní Yaa Dios, chi sa suhva jéni ní rō nájnūhun cájeni ní ñayuu, achí yá.

<sup>34</sup> Te ni cana ya tēe cáscuáha jín yá jín ñayuu cuehē ún, te ni cahān yā:

Na-ni ñayuu núu cúní i condiquin i ruhū, na cási i jeē cuní maá i, te na cóndiquin i ruhū te cuáha i jñuhun ndoho i jñúndóho jeē siquí rí, vēsú na cúū i. <sup>35</sup> Chi núu ndé ñayuu cuní i cácu i nuū jñúndóho quiji nuū i jeē siquí ruhū, núu súcuan te jnahñú ndetū i níf cáni. Te núu ndé ñayuu, vēsú na cúū i jeē siquí ruhū jín siquí jeē scáca i jñuhun jeē jnáma rí ñayuu, núu súcuan te cotecu i níf cáni. <sup>36</sup> ¿Chi ndé cuajniñu vēsú na cúndeyí ñayuu nihin i níf ñáyiví, te núu quiví i nuū jnahñú ndetū i? <sup>37</sup> Chi tú na jín cuiti chunaa ñayuu jeē cácu ánuá i. <sup>38</sup> Te ñayuu yáha tu cácañdije cuiti i, te máni máá cuéchi cása i. Te núu na-ni ñayuu cúcanu i nuū ñayuu yáha jeē siquí ruhū, Yaa ní nduu tēe, jín siquí jñuhun cáhān rí, suni súcuan cucanu rí jeē siquí máá i, quiví ndíji rí jín táca ndajéhé ndoo rí. Te quiví ún chi yōhoyo luu cu-

jéhu rí nájnūhun cújéhu Tátá rí. Achí yá.

**9** Te suni ní cahān yā jín de jijnáhan de:

Jendaá cahān rí jín ró jeē sava tēe cáhiin yáha, ma cúū de chi nde cuni de jeē ndácu Yaa Dios jniñu jín poder yā, achí yá.

### Jeē tucu ní nduu ya

(Mt. 17.1-13; Lc. 9.28-36)

<sup>2</sup> Yūcuán na te nuū iñú quiví te Jesús ní jeca ya Pedro jín Jacobo jín Juan, cuahān sīn ya jín de iin yucu súcún. Te yūcuán, tucu ní nduu ya nuū de. <sup>3</sup> Te sahma ya ní ndindēé, te ní nducujín quiyí, nájnūhun yuhvā volcán. Te tú ní iin ñayuu ñayiví yáha cuu nacate jeē ndúquiyí ndasí súcuan. <sup>4</sup> Te ní cajito de jeē Elías jín Moisés cándajnūhún de jín yá. <sup>5</sup> Yūcuán na te ní cahān Pedro jín Jesús:

Maestro, nacā jeē váha jeē cáhiin na yáha. Te na sáha ná úní vehe ramada, iin cuu máá ní, inga cuu Moisés, te inga cuu Elías, achí de.

<sup>6</sup> Chi yōhoyo ní cayūhu tēe cáscuáha ún, te Pedro tu ní sáha de cuenta na vé cúu jeē cahān de. <sup>7</sup> Te ní quiji vicō nūhun ní jesi-ni nuū de. Te nuū vicó un ní cahān iin jñuhun:

Yáha cúu Sēhe rí jeē maní ndasí rí jín. Te na cúní nahín ró jñuhun cáhān yā. Achí.

<sup>8</sup> Te ní candacoto-ni de, te tuá tēe un ní cájito de, chi máá iin na Jesús.

<sup>9</sup> Te ní cananuu de jín yá yucu ún. Te ní ndacu nihin ya jniñu nuū de jeē ma cáchi de nuū ní iin jeē súcuan ní cajito de, chi nde na nátecu maá yá, Yaa ní nduu tēe, achí yá. <sup>10</sup> Jeē yúcuán ní cachuvāha de táca jēé ní cuu ún, te cácajnūhun jnáhan de na jñuhun cúu jeē nátecu yā. <sup>11</sup> Te ní cacajnūhún de ya:

Te tēe cástéén tutu ley Yaa Dios, ¿najehe cácahān de jeē cánuú ndiji Elías

xihna gā, te sáa te quiji Yaā cúu Cristo? achí de.

<sup>12</sup>Te ni cahān yā:

Jendaá cúu jeē xihna gā quiji ĩn tēe cúu nájñuhun Elías, te sátuhva de ndihi, áchí tutu. ¿Te ndese cahān tucu tutu ĩi siquī ruhū, Yaā ní nduu tēe? Cahān jeē ndoho xeēn rī, te sájéē ni i nuū rī. <sup>13</sup>Te cahān rī jíin ró jeē jé ni quiji tēe ni cuu nájñuhun Elías, te ni casáha ndevāha ñayuu jíin de táca jéē ní cacuu ni maá ĩ, nájñuhun cahān jñuhun de nuū tútu, áchí yá.

**Jeē ní nasávāha ya  
ĩn sūchi ñuhun tachī ini**

(Mt. 17.14-21; Lc. 9.37-43)

<sup>14</sup>Te ni najinū yā jíin de nuū sava ga tēe cáscuáha jíin yá, te ni cajito ya ñayuu cuehē ndasí, ni cajicó ndúū i de. Te suni cáhiin tēe cástéén tutu ley Yaā Dios, cátejnāhan jíin de. <sup>15</sup>Te nuū ní cajito táca ñayuu un jéē véji ya, te ni canaa ni i. Te cájinu i cuango i nuū yā jeē cahān i jíin yá. <sup>16</sup>Te ni cajñuhun yá ĩ:

¿Na siquī cátejnāhan ró jíin de jíjnāhan de? áchí yá.

<sup>17</sup>Te ni cahān ĩn tēe ĩne yūcuán:

Maestro, vendeca ná séhe ná núū ní, chí ñuhun ĩn tachī ini i, te ni cuñhín i ni sáha. <sup>18</sup>Te ndé-ni cúu nuū ĩne i, te tachī un scótúú i, te jéhi yihí-ni i. Te jéē tiñū yuhu i, te squihñi jñuhun i. Te cuacuxí ndasí i sáha. Te ni cahān ndahú ná jíin tēe cáscuáha jíin ní jeē na quénehen de tachí ún, te tu ní cúu sáha de, áchí de.

<sup>19</sup>Te ni cahān yā jíin de jíjnāhan de:

Ñayuu tu cándíje cuiti cácuu ró. ¿Nasaa ga quivī condee rī jíin ró? ¿Te nasaa ga quivī cuandeyí ni rī jíin ró? Cuáquihñi sūchí un, na quíji i, áchí yá.

<sup>20</sup>Te ni caquindeca de i nuū yā. Te nuū ní jito tachī un núū yā, te ni jehni yihí-ni i. Te ni cotúú i, te cónehén cócāni i, te jéē tiñū yuhu i. <sup>21</sup>Te Jesús ni cajñuhun yá tátá ĩ:

¿Nasaa cuiyā ni cuu jeē sáha súcuan jíin i?

Te ni cahān de:

Nde lulí i. <sup>22</sup>Te ni cuu cuehē jínu scótúú táchí ún i nuū ñuhún nuū ndúte, jeē cáhni i cúní. Te núu cuu sáha ní, te cundáhú ni ní chindéé ñáhan ní sāna jéē ndúvāha séhe ná, áchí de.

<sup>23</sup>Te ni cahān Jesús jíin de:

Núu cuu cándíje ró jéē sáha ri, chí ñayuu cándíje te cuu táca jéē cuní i, áchí yá.

<sup>24</sup>Te maá tátá sūchí un ní cahān jee de:

Cándíje ná, te chindéé ñáhan ní sāna jéē cándíje nihin ga ná, áchí de.

<sup>25</sup>Te ni jito Jesús jeē ní cutútú cuéhē ñayuu nuū yā. Te ni cahān yā nuū tachí:

Tachí jeē sañhín sásóhó, ruhū ndácu ri jniñu jeē na quénda ró ini sūchi yáha, te ma ndívi ga rō ini i, áchí yá.

<sup>26</sup>Yūcuán na te ni cana cóhó táchí ún, te ni jehni yihí tucu i, te ni quenda cuahān. Te sūchí un ní cuu i nájñuhun ndíyi. Te ni cacahān cuehē ñayuu jeē jé ni jihí i. <sup>27</sup>Te Jesús ni jñi ya ndaha i, te ni ndonehen ya i, te ni nucuiñi-ni i.

<sup>28</sup>Yūcuán na te ni quívi ya ini ĩn vehe, te tēe cáscuáha jíin yá, ni cacajñuhun sñi de ya:

¿Najehē tu ní cúu quenehen ná tachí un jíjnāhan ná? áchí de.

<sup>29</sup>Te ni cahān yā:

Ĩn tachí súcuan chí ma quénda cuiti te núu tú cacān tahú rō te coo ndite ni rō, achí yá.

**Jeē ni cahān tucu ya jeē cúu yā**

(Mt. 17.22-23; Lc. 9.43-45)

<sup>30</sup>Te ni quenda ya yūcuan jíin de jíjnāhan de, te ni yāha ya ndañúú Galilea cuahān yā. Te tu ní cúní yā jeē cúni ni ĩn ñayuu. <sup>31</sup>Chí stéén yā nuū tēe cáscuáha jíin yá, te áchí yá:

Maá rí, Yaā ní nduu tēe, nastúu i ruhū nuū táca tēe xeēn. Te cahni de ruhū, te

núu ni jihí rí, te nuū uní quíiví te natecu rí, achí yá.

<sup>32</sup>Te tu ní cájecūhun ni de jnūhun yáha, te cáyūhú de cajnūhún de ya siquí jnūhun ni cahān yā.

### Ndé ñayuu cúu jeē cujéhu ga

(Mt. 18.1-5; Lc. 9.46-48)

<sup>33</sup>Te ni jinū yā jíin de ñuu Capernaum, te nuū ni quíiví ya ini vehe, te ni cajnūhun yá de:

¿Na jnūhun ni candajnūhun ró ichi véji yó? áchí yá.

<sup>34</sup>Te tu ní cacahān cuíti de, chi ichi un ní cacahān de siquí núu ndé ñin de cújéhu ga. <sup>35</sup>Yūcuán na te ni cucōo ya, te ni cana ya ndihúxí uū de, te ni cahān yā:

Núu ndé ñin ró cúní cujéhu ga, na cúu ró téé núu ga nuū tāca jnáhan ró, te cua-jniñú ró núu jnáhan ró.

<sup>36</sup>Yūcuán na te ni jniñ ya ndaha ñin sūchi lúlí, te ni jeni ya i mēhñú de jíjñáhan de. Te ni nundee yā i, te ni cahān yā jíin de:

<sup>37</sup>Na-ni ñayuu núu jeē siquí ruhū jetáhú i ñin sūchi lúlí nájnūhun sūchi yáha, te ruhū jetáhú i. Te ñayuu jetáhú rúhū, nasūu máá ñin-ni ruhū, chi suni Yaā ní tají rúhū jetáhú i, achí yá.

### Ñayuu tu cáhán siquí yā, ñin i jíin yá

(Mt. 10.42; Lc. 9.49-50)

<sup>38</sup>Yūcuán na te ni cahān Juan jíin yá:

Maestro, ni cajito ná ñin téé jeē jíin síhví ní quénehen de tachí ini ñayuu. Te ni cajesi ná jéé sáha de, chi tu jíca de jíin yó, achí de.

<sup>39</sup>Te ni cahān Jesús jíin de:

Ma cási ró jeē sáha de. Chi ni ñin téé jeē jíin síhví rí sáha de jniñú jéhu, ma cúu nacahān de siquí rí. <sup>40</sup>Chi téé tu cáhán siquí yó, ñin de jíin yó. <sup>41</sup>Te na-ni ñayuu núu jeē siquí ruhū cuāha i vésú ñin ña-

jin ndute coho ró, siquí jeē cá candíje ró ruhū, ndaā ndije cúu jeē nihín i tahū i. Achí yá.

### Xeēn coo siquí ñayuu quíiví nuū cuéchi

(Mt. 18.6-9; Lc. 17.1-2)

<sup>42</sup>Te núu ñin sūchi lúlí yáha cándíje i ruhū, te núu quíiví i cuéchi sáha na-ni ñayuu, te vāha ga núu ni conuhní ñin yōso cáhnu sucūn ñayuu ún, te quēe i chiji ndute mar nuú. <sup>43</sup>Te núu ndaha ró sáha jeē quíiví ró cuéchi, vāha ga cahnde rō na quíhín, návāha tuá sáha ró cuéchi. Chi vāha ga jeē cóndee ñin-ni ndaha ró te quíiví ró núu cotecu rō níí cáni, vésú jeē cóndee ndindúú ndaha ró te quíiví ró infierno, nuū cayú ñuhūn jeē ma ndahvá cuíti. <sup>44</sup>Te yūcuán chi tu cájihí tindacú, te tu ndáhvá cuíti ñuhūn. <sup>45</sup>Te núu jehē rō sáha jeē quíiví ró cuéchi, suni vāha ga cahnde rō na quíhín, návāha tuá sáha ró cuéchi. Chi vāha ga jeē cóo cúhndu ró te quíiví ró núu cotecu rō níí cáni, vésú jeē cóndee ndindúú jehē rō te quíiví ró infierno, nuū cayú ñuhūn jeē ma ndahvá cuíti. <sup>46</sup>Te yūcuán chi tu cájihí tindacú, te tu ndáhvá cuíti ñuhūn. <sup>47</sup>Te núu tinūu ró sáha jeē quíiví ró cuéchi, vāha ga tava ró na quíhín, návāha tuá sáha ró cuéchi. Chi vāha ga jeē quíiví ró ñuu nuū ndácu Yaā Dios jniñú jíin ñin na tinūu ró, vésú jeē cóndee ndindúú tinūu ró te quíiví ró infierno. <sup>48</sup>Te yūcuán chi tu cájihí tindacú, te tu ndáhvá cuíti ñuhūn.

<sup>49</sup>Chi nájnūhun quénda vāha oro sáha ñuhūn, súcuan quénda vāha ñayuu sáha jnūndóho. Te tāca cúñu jeē socó ñayuu nuū yā, cúhuhvuā sáha ññ. <sup>50</sup>Vāha íyó ññ, te núu ññ ún na náá jeē uhvuá, ¿te ndese nduu uhvuā tucu sáha ró? Núu súcuan te cuu ró ñayuu vāha, nájnūhun íyó vāha ññ. Te na cóyūcu vāha ró jíin jnáhan ró. Achí yá jíin de.

**Siquí jeē ma stóo  
jnáhan tēe jíin ñahan**

(Mt. 19.1-12; Lc. 16.18)

**10** Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steen tucu ya jnūhun nuū i, nájñuhun sáha ya. <sup>2</sup>Yūcuán na te jecu tēe grupo fariseo ni quecoo de nuū yā, chi cáconi de coto ndee de ya núu ndese cahān yā. Te ni cacajñuhún de ya núu íyó ley jeē cuu ndusín ñin tēe jíin ñasihí de. <sup>3</sup>Te ni cahān yā jíin de:

¿Na jniñu ni ndacu Moisés nuū rō nde jenahán?

<sup>4</sup>Te ni cacahān de:

Moisés ni jēhe de jnūhun jeē cúvāha ñin acta jeē ndusín de jíin ña, te ndōo ña, áchí de.

<sup>5</sup>Te ni cahān Jesús jíin de:

Siquí jeē níhni ni rō jijnáhan ró, jeē yūcuan ní ndacu de jniñu yáha núu rō.

<sup>6</sup>Te nde xihna ññuhún, ná ni sáha Yaā Dios ndíhi, chi tēe jíin ñahan ni sáha ya. <sup>7</sup>Jeē yūcuan cúu jeē stóo tēe tátá de náná de, te quijnáhan de jíin ñasihí de. <sup>8</sup>Te ñin na cuu ndíndúú de, áchí Yaā Dios. Núu súcuan te tuá cúu uū jnáhan de, chi ñin na cúu. <sup>9</sup>Jeē yūcuan tu íyó váha jeē stóo jnáhan, chi jeē ni squíjñahan Yaā Dios cúu, áchí yá.

<sup>10</sup>Te tēe cáscuáha ún nuū ni quívicoo de vehe, te ni cacajñuhún tucu de ya siquí jnúhun ún. <sup>11</sup>Te ni cahān yā jíin de:

Núu ndé tēe stóo de ñasihí de te condeca de inga ñahan, núu súcuan te cásiquí ndéē de ñasihí de. <sup>12</sup>Te núu ñin ñahan stóo ña yí ña te condeca ña inga tēe, suni cásiquí ndéē ña de. Achí yá.

**Jeē ni jicān tahú Jesús jehē sūchi lúlí**

(Mt. 19.13-15; Lc. 18.15-17)

<sup>13</sup>Yūcuán na te ni quecoo ñayuu jíin sūchi lúlí, jéē na sóo yá ndaha ya xiní i. Te tēe cáscuáha jíin yá, ni cacahān de nuū ñayuu vējicoo jíin i. <sup>14</sup>Te ni jito Jesús, te ni quití ni yā, te ni cahān yā jíin de:

Cuāha jnūhun na quíjicoo sūchi lúlí jíinā nuū rí, te ma cási rō jeē quíjicoo i. Chi ñayuu jeē ndió cóo ni i cani ni i nájñuhun sūchi yáha, suu i quívi ndaha Yaā andiví jeē ndacu ya jniñu nuū i. <sup>15</sup>Te jendaá cahān rí jíin ró, núu ñin ñayuu tú cuatáhú i jeē ndácu Yaā Dios jniñu nuū i, nájñuhun jétáhú ñin sūchi lúlí, ma quívi cuítí i ndaha ya, achí yá.

<sup>16</sup>Te ni nundee ya i, te ni soó yá ndaha ya xiní i, te ni jicān tahú yā jehē i jíjñahan i.

**Jnūhun tēe cúcá**

(Mt. 19.16-30; Lc. 18.18-30)

<sup>17</sup>Yūcuán na te ni quihin tucu ya ichi cuahān yā. Te jínu ñin tēe ni quee de, te ni jecuñí yití de nuū yā, ni cajñuhún de ya:

Tēe váha cúu ní Maestro. Te cachi ní, ¿na jniñu váha sáha ná te nihín tahú na cotecu na ní cáni andiví? áchí de.

<sup>18</sup>Te ni cahān yā jíin de:

¿Naun cáhán rō jeē tēe váha cúu rí? Tú ni ñin tēe váha íyó, chi máá ñin-ni Yaā Dios. <sup>19</sup>Je jíin rō tēcá jniñu ní ndacu Yaā Dios: Ma cosíquí ndéē jnáhan ró. Ma cáhni rō ndíyi. Ma sacuíhná ró. Ma sajnúhún ró. Ma stahú ró jnáhan ró. Cuatáhú ró nuū tátá rō nuū naná rō. Achí yá.

<sup>20</sup>Te ni cahān tēe un jíin yá:

Tēcá jniñu yáha je ni squícu ná ndé ná lulí ná, Maestro, achí de.

<sup>21</sup>Yūcuán na te ndáhú jíto ya nuū de jeē cúsi ni yā jíin de. Te ni cahān yā:

Īn na jniñu cúmanī sáha ró núu súcuan. Cuáhán te xico ró ndiñi jeē névāha ró, te cuāha ró núū ñáyuu ndahú. Te nde andiví cuāha ya jeē váha ndasí núū rō. Yūcuán na te quiji ró condiquin rō ruhū, te cuāha ró jnūhun ndoho ró jnūdóho jeē siquí rī, achí yá.

<sup>22</sup> Te ná ni jini sōho de jnūhun yáha, te ni jnahuhū ni de, te cúcuñhyá ni de cuahān de, chi cúcá ndasí de.

<sup>23</sup> Yūcuán na te Jesús ni ndacoto ya ní xiin ya, te ni cahān yā jíin tée cáscuáha jíin yá:

Tee cúcá chi yōhyo yí quívico de ndaha Yaā Dios jeē ndacu ya jniñu nuū de, achí yá.

<sup>24</sup> Te tē cáscuáha jíin yá, yōhyo ni canaa ni de jeē ní cajini de jnūhun ni cahān yā. Te ni cahān tucu ya jíin de:

Séhē, ñayuu tēnuū xūhún, yōhyo yí quívico i ndaha Yaā Dios jeē ndacu ya jniñu nuū i. <sup>25</sup> Yachī gā yāha ĩn camello yaū yutícuí, vēsú jeē quívi ĩn ñayuu cucá ndaha Yaā Dios jeē ndacu ya jniñu nuū i, achí yá.

<sup>26</sup> Te víhyá gā ni canaa ni de cájini de, te ni cacajñūhun jnáhan de:

¿Nde ñáyuu cúu jeē cácu núu súcuan?

<sup>27</sup> Te ni ndacoto ya nuū de, te ni cahān yā:

Ñayuu chi ma cúu squívi i máa i ndaha Yaā Dios, te máa yá chi cuu sáha ya, chi ndiñi-ni jniñu cuu sáha ya, achí yá.

<sup>28</sup> Yūcuán na te ni cahān Pedro jíin yá:

Saña jíjnáhan ná, ní castóo ná ndiñi jeē cánevāha ná, te cándiquin na níhín, achí de.

<sup>29</sup> Te ni cahān Jesús:

Jendaá cahán ri jíin ró jíjnáhan ró, núu na-ni ñayuu stóo i vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, jeē siquí ruhū jíin síquī jeē scáca i jnūhun jeē jnáma ri ñayuu, <sup>30</sup> núu súcuan te nanihín i ĩn ciento gā jeē súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun,

te nde jíin jéē cóto xeē ñayuu i. Te nde inga vida quiji te cotecu i ní cáni. <sup>31</sup> Te cuehē ñayuu jeē vijna cácujeñnu, nduu i ñayuu núu ga. Te ñayuu jeē núu ga vijna, chi ndujéñnu i, achí yá.

### Jeē ni cáhān tucu ya jeē cúu yā

(Mt. 20.17-19; Lc. 18.31-34)

<sup>32</sup> Te cáñuhun de ichi jeē cáa cuahān ñuu Jerusalén. Te Jesús yósnúu yá nuū tēe cáscuáha ún. Te cánaa ni de ni cajini sōho de jnūhun ni cahān yā. Te cáyuhú de cuángoo de jíin yá. Yūcuán na te ni cana sīn tucu ya ndihúxi uū tēe cáscuáha, te ni quejéé yá cástūhún tucu ya nuū de tāca jéē quíji siquí yā. <sup>33</sup> Achí yá:

Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujeñnu jíin núu tēe cástéén tutu ley. Te ndonda de siquí rī jeē cúu rī, te squívi de ruhū nuū tēe nación Roma jeē cáyucú Jerusalén cándacu jniñu. <sup>34</sup> Te tāca tēe un sácata de nuū rī, te cani de ruhū, te tesihí de nuū rī, te sáa te cahni de ruhū. Te nuū uní quiví te natecu rī, achí yá.

### Jeē ni jíicān Jacobo jíin Juan ĩn favor nuū yā

(Mt. 20.20-28)

<sup>35</sup> Yūcuán na te Jacobo jíin Juan, ndindúú séhe Zebedeo, ni quecoo de nuū Jesús, te ni cacahān de:

Maestro, cácuni na jéē sáha ní ĩn jeē cacán na núu ní, achí de.

<sup>36</sup> Te ni cahān yā jíin de:

¿Ndese cácuni rō jeē sáha ri jíin ró? achí yá.

<sup>37</sup> Te ni cacahān de:

Cuāha ní jnūhun jeē cóñene ná xiin ní quívi ndujéñnu ní, ĩn ná lado váha ní, te inga ná lado jecó ní, achí de.

<sup>38</sup> Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnūdóho nájnūhun jeē

qují siquī rī? ¿Te á canda ró ndoho xeēn rō nájñuhun ndoho rī? achí yá.

<sup>39</sup> Te ni cacahān de:

Cuu sáha ná.

Te ni cahān yā jíin de:

Jendaá jeē ndoho ró jnúndóho nájñuhun jeē qují siquī rī, te ndoho xeēn rō nájñuhun ndoho rī. <sup>40</sup> Te jeē cónēne ró lado váha ri jíin lado jecó rí, nasūu rúhū cúu jeē cuáha jñuhun. Chi je íyó túhva cuu táca téē jeē ní nacáji Tátá rī, te téē un nhīn, achí yá.

<sup>41</sup> Te uxí gā téē cáscuáha un, ní cajini de jñuhun yáha, te ni caquitī ni de nuū Jacobo jíin Juan. <sup>42</sup> Te Jesús ni cana ya de, te ni cahān yā jíin de:

Cájini rō ndese cásáha téē cácujuhnu nuū ñáyyu táca nación. Chi cándacu nihin de jniñu nuū i, te máá de cáchí ndese coo. <sup>43</sup> Te máá ró jijnáhan ró, chi ma sáha ró súcuan. Chi núu ndé iin ró cúni cujéhu, sa suhva cuajniñu ró núu jnáhan ró. <sup>44</sup> Te núu ndé iin ró cúni cuu nuū, sa suhva sáha ró máá ró mozo nuū táca jnáhan ró. <sup>45</sup> Chi suni súcuan sáha ruhū, Yaā ní nduu téē, chi nasūu jéē véji ri jeē cuajniñu ñayuu nuū rī, chi sa suhva véji ri jeē cuajniñu ri nuū ñayuu. Te cuáha ri maá rí cuu rī návaha jnama ri cuehē ñayuu, achí yá.

**Jeē ní nasávāha ya Bartimeo téē cuáá**

(Mt. 20.29-34; Lc. 18.35-43)

<sup>46</sup> Yūcuán na te ni jinū yā ñuu Jericó jíin téē cáscuáha jíin yá. Te sáá te ni quenda ya yūcuan jíin de jíin ñayuu cuehē ndasí. Te Bartimeo téē cuáá, sēhe Timeo, néne de yuhíchi, jícan de caridad. <sup>47</sup> Te ni jini de jñuhun jeē Jesús ñuu Nazaret véji ya. Te ni quejéé de cána jee de:

Jesús Sēhe yucūn David, cundáhú ni ní sáña, achí de.

<sup>48</sup> Te cuehē ñayuu ni cacahān i nuū de jeē na cásí de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ní sáña ví, achí de.

<sup>49</sup> Yūcuán na te ni jecuiñī Jesús, te ni cahān yā:

Cana de na qují de.

Te ni cacana i téē cuáá un:

Ndeyí coo ni rō. Ndocuiñī, na quhín yō, chí cána ya rohó, achí i jíin de.

<sup>50</sup> Yūcuán na te ni scáne de ticáchí de, te yachí ni ndocuiñī de, te ni jinū de nuū Jesús. <sup>51</sup> Te ni cahān yā jíin de:

¿Na vé cuní rō jeē sáha ri jíin ró?

Te máá de ni cahān de:

Maestro, jeē na ndúndijin tinūu ná cuní na, achí de.

<sup>52</sup> Te ni cahān Jesús jíin de:

Cuáhán núu súcuan. Ni candíje ró jeē cuu nasávāha ri rohó, te jeē yúcuán ní nduvāha ró, achí yá.

Te ni ndundijin-ni tinūú de, te ni ndiquin de Jesús cuahān de jíin yá ichi ún.

**Jeē ni quívi Jesús ñuu Jerusalén**

(Mt. 21.1-11; Lc. 19.28-40; Jn. 12.12-19)

**11** Te ni cuyajni ya ñuu Jerusalén, véji ya ñuu Betfagé jíin ñuu Betania, jeē íne jehē yucu Olivos. Te ni tají yá uū téē cáscuáha jíin yá jeē quíngoo de. <sup>2</sup> Te achí yá jíin de:

Cuángoo ñuu lulí íne ichi núú. Te núu ni quívi-ni ró yúcuán, te nihin rō iin burro núhni tí, jeē ní iin téē ná tu coso de tí. Te ndají ró tí, quiqicoo ró jíin tí. <sup>3</sup> Te núu ndé iin cajñuhún naun cándají ró tí, te cachi rō: Máá Jítoho yō jíni ñúhún yá tí, te yachí natají yá tí ndiji tí, achi rō. Achí yá jíin de.

<sup>4</sup> Te cuángoo de, te ni canihin de burro un núhni tí yehyí núú quéhe nuū náqui-jnáhan ichi. Te ni cándají de tí. <sup>5</sup> Te sava ñayuu cáhiin yūcuan ní cacahān jíin de:

¿Na vé cúu jeē casáha ró jeē cándají ró burro jíinā? achí i.

<sup>6</sup> Yūcuán na te ni cacahān de nájñuhun ni cachi Jesús. Te ni casíáá i tí véjicoo de

jiín tí. <sup>7</sup> Te ni ndecoo de jiín tí nuū Jesús, te ni casoó de sahma de siquī tī, te ni jecosō yā tī. <sup>8</sup> Te cuehē ñayuu ni cascáa i sahma i ini ichi. Te sava ga i ni cajehnde i ndaha núú, te ni cachucun i ini ichi ún.

<sup>9</sup> Te ñayuu cuangoó ichi núú jiín ñáyuu cuangoó ichi yátá, cácana jee i:

Yōhyo cújéhu ya. Yōhyo vāha Yaā cúu Yaā jeē véji jiín jniñu máá Jítóho yō Yaā Dios. <sup>10</sup> Te yōhyo luu coo, chi je ya-jni ndacu ya jniñu nájnūhun ni ndacu jíf yō rey David. Te yōhyo cújéhu máá Yaā Dios. Achí i.

<sup>11</sup> Te ni quívi Jesús ñuu Jerusalén, jiín ini templo cáhnu. Te ni jito ya nuū táca ndajniñu yúcu níf yúcuán. Te ni quenda ya cuahān yā ñuu Betania jiín ndihúxí uū de, chi je ni ini.

### Jeē ni cáhān yā nuū yújnu higo

(Mt. 21.18-19)

<sup>12</sup> Te inga quivī ún, nuū ní quenda ya ñuu Betania cuahān yā jiín de, te jíf yā sóco. <sup>13</sup> Te nde jíca ni jito ya ñn nundēhe higo jeē ñn ndaha. Te ni jecondēhe yá núu sanaa te nihīn yā ndehē caji yā. Te tú na vé ni nihīn yā, chi máá ndaha-ni ñn. Chi nasūu tiempo ndehē cúu. <sup>14</sup> Yūcuán na te ni cahān yā nuū yujnu ún:

Tuá na ndehē cuun cuítí xini rō jeē cáji ñayuu, achí yá.

Te tēe cáscuáha jiín yá ni cajini de jeē súcuán ni cahān yā.

### Jeē ní quenehen ya ñayuu ini templo

(Mt. 21.12-17; Lc. 19.45-48; Jn. 2.13-22)

<sup>15</sup> Te ni najinū yā jiín de ñuu Jerusalén. Te ni quívi ya ini templo cáhnu, te ni quenehen ya ñayuu cájeen quití te cánaxico núú ñáyuu jeē socō i. Te ni scotúú ndeyi ya táca mesa tēe cástáyi xuhún, jiín silla tēe cáxicó paloma. <sup>16</sup> Te tu ní jēhe ya jnūhun jeē yáha ñayuu ini templo jiín ndajniñu ndíso i. <sup>17</sup> Te ni steén yā jnūhun nuū i, achí yá:

Yósó núú tútu ii jeē cahán Yaā Dios: Vehe ri chi vehe nuū cájicān tahú ñayuu táca nación cúu, achí yá. Te máá ró jijnáhan ró chi nájnūhun yaū cava ñacuihna ní canasáha ró, achí yá.

<sup>18</sup> Te tēe cástéén tutu ley Yaā Dios jiín sūtū cácujeñnu, ni cajini de jnūhun yáha, te ni quejéé de cánducu de modo ndese cahni de ya. Chi cáyuhú de jeē ndujéñnu ga maá yá vésu maá de, chi táca ñáyuu yōhyo cácusī ni i cájini i jnūhun steén yā. <sup>19</sup> Te jeē cuácuaa, te ni quenda ya ñuu Jerusalén cuahān yā.

### Jeē ni íchī nundēhe higo

(Mt. 21.20-22)

<sup>20</sup> Te jenéhen inga quivī ni nayāha ya jiín de cuahān yā. Te ni cajito de jeē nundēhe higo un je ni ichi nde yoho. <sup>21</sup> Yūcuán na te ni nucūhun ni Pedro, te ni cahān de jiín yá:

Maestro, cundēhe ní nundēhe higo jeē ni cáhān ni núú, te vijna je ni ichi caján, achí de.

<sup>22</sup> Te ni cahān Jesús jiín de:

Candíje ró jéé sáha Yaā Dios jeē jícan rō. <sup>23</sup> Chi jendaá cahán rī jiín ró, núu ndé ñáyuu cahān i jeē cújiyo yucu yáha quihīn nde nuū mar, te núu tú nacani siquí ni i, chi sa suhva candíje i jeē cóo nájnūhun ni cahān i, yūcuán na te cundaá jeē ni jícan i. <sup>24</sup> Jeē yúcuán cáhān rī jiín ró, táca jéé cacán tahú rō, te núu candíje ró jéé nihīn rō, te nihīn rō. <sup>25</sup> Te jeē cájicān tahú rō, te cone cáhnu ni rō nuū ñáyuu casáha cuéchi siquī rō, návāha máá Tátá rō jeē ndeé yá andiví, suni cone cáhnu ni yā nuū cuéchi ró. <sup>26</sup> Chi núu tú cone cáhnu ni rō nuū jnáhan ró, te suni máá Tátá rō jeē ndeé yá andiví, ma cóne cáhnu ni yā nuū cuéchi ró, achí yá.

### Siquī jeē ndíso jniñu Jesús

(Mt. 21.23-27; Lc. 20.1-8)

<sup>27</sup> Yūcuán na te ni najinū tucu ya ñuu Jerusalén. Te jíca cuu ya ini templo



cáhnū. Te sutū cácujéhnū jíín tée cástéén tutu ley Yaā Dios jíín tée jéhnū cándacu jniñū, ni quecoo de nuū yā. <sup>28</sup> Te ni cajñūhún de ya:

¿Ndé ní nihīn jniñū ró jéē sáha ró jniñū yáha? ¿Te ndé iin ni tee jniñū siquī rō jeē sáha ró súcuan? áchí de.

<sup>29</sup> Te ni cahān Jesús:

Suni ruhū, cajñūhun rí rohó iin jñūhun jíjnáhan ró. Te núu cuu stíó cuñí rō, yūcuán na te cachi ri nuū rō ndé ní nihīn jniñū ri jeē sáha ri jniñū yáha. <sup>30</sup> ¿Ndé iin ni tee jniñū siquī Juan jeē ni scuándute de? ¿A Yaā Dios chí táca tée? Cachi nuū rí, achí yá.

<sup>31</sup> Yūcuán na te ni candajñūhun máa de:

Núu cahān yō jeē Yaā Dios ni tee ya jniñū un síquī Juan, te cahān de jíín yó: Núu súcuan ¿te najehē tu ní cácañdije ró de? <sup>32</sup> Te núu cahān yō jeē ñáyuu ni catee jniñū un síquī de, te quitī ni ñayuu nuū yō, achí de cácahān maá de.

Chi cáyūhú de jeē quitī ni ñayuu, chi ndivii i cácañdije i jeē tée ni nacani jñūhun Yaā Dios ni cuu ndije Juan. <sup>33</sup> Jeē yúcuán ní cacahān de jíín yá:

Tu cájini rí, achí de.

Yūcuán na te ni cahān Jesús:

Ni ruhū, suni ma cáchi rí nuū rō ndé iin ni tee jniñū siquī rí sáha ri jniñū yáha, achí yá.

**Jñūhun yátá síquī tēe  
néé cásájniñū nuū uva**

(Mt. 21.33-46; Lc. 20.9-19)

**12** Te ni quejéé yá cahán yā jñūhun yátá jíín de jíjnáhan de:

Iin tēe ni nachuhun de cuehē uva, te ni jesi de corral, te ni sáha de iin nuū cúhun ndehē un táxīn. Te ni sáha de iin vehe súcún návāha cuu coto de níí cáhnū.

Te ni stóo de nuū sava tēe sájniñū nuū, te cuu sava de ndehē jíín. Te ni tee de ichi cuahān jicá de. <sup>2</sup> Te máá tiempo

ndutútú uva, te ni tají de iin mozo de cuanuquihin sava uva nuū tēe cásájniñū ún. <sup>3</sup> Te tēe un ní cajñi de mozo un, te ni cacani de i, te ni canatají de i cuanuhun i súcuan-ni. <sup>4</sup> Yūcuán na te tēe chíí uva un ní tají tucu de inga mozo cuahān. Te tēe cásájniñū un ní cajēhe de yuū xini mozo un, te ni castújí de, te ni cacahān ndevāha de nuū. <sup>5</sup> Te tēe chíí uva ni tají tucu de inga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

<sup>6</sup> Te tēe chíí uva, iyó iin sēhe de jeē maní ndasí de jíín. Te jeē sándihí na ni tají de sēhe de un cuahān nuū tēe cásájniñū. Te jéni ni de: Tēe ún chi cutáhú de jíjnáhan de nuū sēhe ri. <sup>7</sup> Te tēe cásájniñū un ní cacahān maá: Tēe chíí táhū cúu jeē yáha. Na cáhni yō de, te ndōo tahū de cuu máá yó, achí. <sup>8</sup> Te ni cajñi de i, ni cajehni de i, te ni cascáne de i inga lado. Achí yá.

<sup>9</sup> Yūcuán na te ni cajñūhun yá de:

Núu súcuan ¿te ndese sáha tēe chíí uva un? Ndiji de te cahni de tēe cásájniñū ún, te cuāha de ñūhun cáá uva un núu inga sava tēe sájniñū nuū.

<sup>10</sup> ¿Te á ná tu cahu ró jñūhun yáha jéé yosó núu tútu ii, jeē ruhū cúu nájñūhun iin yuū? Chi áchí tutu:

Yuū jeē ní casquéhichí tēe cájeni vehe, yuū yáha nduu jeē quítuu vehe.

<sup>11</sup> Máá Jítoho yō Yaā Dios ni sáha ya súcuan,

te cánaa ni yō jíto yó jniñū yáha.

Achí tutu, achí yá.

<sup>12</sup> Yūcuán na te ni canducú de modo jñi de ya. Chi ni cajecūhun ni de jeē siquī maá de cúu jñūhun yátá ní cahān yā siquī tēe cásájniñū nuū uva jíín tēe cájeni vehe. Te siquī jeē cáyūhú de jeē quitī ni ñayuu, te ni castóo de ya te cuango de.

### Siquī xúhun renta

(Mt. 22.15-22; Lc. 20.20-26)

<sup>13</sup> Yūcuán na te ni catají de sava tēe grupo fariseo jíin tēe grupo Herodes cuangoo de nuū yā, ndúcú de ndese sáha de návāha cahān yā iin jñūhun jeē nihín de cuēchi siquī yā. <sup>14</sup> Te ni quecoo de, te ni cacahān de jíin yá:

Maestro, cájini na jēe tēe cáhán ndaā cúu ní, te tu yúhú ní jeē cahán ni iin ñayuu siquī ní. Chi tu sáha ní cuenta ndese cúu iin iin i, chi inuú-ni sáha ní jíin i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chú-naa yō renta nuū rey nación Roma jeē jñí nación yō, chí tuú? ¿A chúnaa yō, chí má chúnaa yō? Achí de jíin yá.

<sup>15</sup> Te máá yá jiní yā jeē stahú-ni de, te ni cahān yā jíin de:

¿Najehē cájito ndee rō ruhū? Cuāha iin xūhún na cóto ri, achí yá.

<sup>16</sup> Te ni cajēhe de xūhún. Te ni jito ya, te ni cajñūhun yá de:

¿Ndeé iin nuū cúu jeē ndeé nuū xúhun yáha, te ndé síhví cúu jeē ndeé yāhá?

Te ni cacahān de jíin yá:

Nuū jíin síhví rey un cúu, achí de.

<sup>17</sup> Yūcuán na te ni cahān yā jíin de:

Núu súcuán te nacuāha ró núu rey un jēe yíhi cuenta nuū de, te nacuāha ró núu Yaā Dios tāca jēe yíhi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

### Jeē ní cacajñūhún de siquī jeē nátecu ndīyi

(Mt. 22.23-33; Lc. 20.27-40)

<sup>18</sup> Yūcuán na te jecu tēe grupo saduceo ni quecoo de nuū yā. Te tēe un cacahān jeē tu nátecu cuiti ndīyi. Te ni cacahān de jíin yá siquī iin jñūhun, achí de:

<sup>19</sup> Maestro, Moisés ni tee de nuū tútu jeē cánevāha yó: Núu iin tēe cuu de, te ndōo ñasihí de, te núu tu ní íyó sēhe de

jíin ña, núu súcuán te cánuú jeē ñani de naquihin ñasihí de, te sēhe de jeē cácu jíin ña nucuññi i nuū ndīyi ñani de, achí tutu. <sup>20</sup> Núu súcuán te ni iyo uxā ñani. Te tēe núu ní quijnáhan de jíin ñahan. Te ni jihí de, te tú sēhe de ní íyo. <sup>21</sup> Te tēe uū ni naquihin de ña, te suni ni jihí de, te tú sēhe de ní íyo. Te suni súcuán tēe uní. <sup>22</sup> Te ndihúxá de ni condeca de ña, te ni iin de tú sēhe de ní íyo. Te jeē sándñíhí te suni ni jihí ñahan ún. <sup>23</sup> Núu súcuán te núu na nátecu de jíjnáhan de quiví nátecu ndīyi, ¿te ndé iin de cuu ña ñasihí de? Chi ndihúxá de ni condeca de ña. Achí de jíin yá.

<sup>24</sup> Yūcuán na te ni cahān yā jíin de:

Yōhoyo cástívi rō jñūhun siquī jeē tu cájecūhun ni rō jeē cahán tutu ií, ni tu cájini rō jeē iyó poder Yaā Dios jeē nastécu yā ndīyi. <sup>25</sup> Chi quiví nátecu ndīyi, te tuá na jñūhun quijnáhan tēe jíin ñahan coo. Chi coo i nájñūhun ndajéhé Yaā Dios andíví. <sup>26</sup> Te siquī jeē nátecu ndīyi, ¿á tu ní cácahu ró tutu ní tee Moisés, ndese ni cahān Yaā Dios jíin de mēhñu yúcū jeē cayú yáñuhūn? Máá rí cúu Yaā Dios Abraham jíin Isaac jíin Jacob, achí yá jíin Moisés. <sup>27</sup> Chi vēsú je ni cajihí de, te cátecu de nuū iyó máá yá, chí cúu ya Yaā sáha jeē técu ñayuu ní cáni. Yōhoyo cástívi rō jñūhun núu súcuán. Achí yá jíin de.

### Jniñu cánuú ndasí gá jeē ní ndacu Yaā Dios

(Mt. 22.34-40)

<sup>28</sup> Te ni quee iin tēe stéén tutu ley Yaā Dios, te ni jini de jeē castíchí jñáhan tēe un jíin Jesús. Te ni jini de jeē váha ni nastíó cuññí yā jñūhun. Te ni cajñūhún de ya:

¿Ndeé iin cúu jñūhun ndácu jniñu cánuú ndasí gá nuū tāca gá jniñu ni ndacu ya jenahán? achí de.

<sup>29</sup> Te ni cahān Jesús jíin de:

Yáha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítóho yō Yaā Dios, maá ñin-ni ya iyó. <sup>30</sup>Núu súcuan te coo maní ndasí ró jíin máá Jítóho rō Yaā Dios, nde jnāā ndasí ró sáha ró ndihí jeē cúsiñ ni yā, nde jíin ini jíin ánuá rō, jíin ñí jeē níjnūnī rō, jíin ñí fuerza rō. Yáha cúu jniñu ndácu ya jeē cánuú ndasí gá. <sup>31</sup>Te jniñu uū jeē ní ndacu ya, suni súcuan cáhán: Cundáhú ni rō jnáhan ró nájñuhun cundáhú ni rō maá ró. Tuá inga jñuhun ndácu jniñu cánuú gá iyó, chí suu máá jēē yáha-ni. Achí yá jíin de.

<sup>32</sup>Yūcuán na te ni cahān tēe stéén tutu ley jíin yá:

Váha ni cahān ní, Maestro. Chi ndaā chí íyó ñin-ni Yaā Dios, te tuá na inga yā iyó. <sup>33</sup>Te cánuú jēē coo maní ndasí yó jíin yá nde jíin ini jíin ánuá yō, jíin ñí jeē níjnūnī yō, jíin ñí fuerza yō, te cundáhú ni yō jnáhan yó nájñuhun cundáhú ni yō maá yó. Te cánuú ndasí gá jeē yáha vēsú jeē cáhmu yó quití jíin táca gá jeē socó yō nuū yā. Achí de jíin yá.

<sup>34</sup>Yūcuán na te ni jini Jesús jeē váha ni stió cuñí de, te ni cahān yā jíin de:

Je yajni cuu quívi ró ndaha Yaā Dios jeē ndacu ya jniñu nuū rō, achí yá.

Yūcuán na te ni ñin ga de, tuá ni chúndehyí ni de cajñuhún de ya.

### **Siquí jeē cúu Cristo sēhe yucūn David**

*(Mt. 22.41-46; Lc. 20.41-44)*

<sup>35</sup>Te stéén Jesús jñuhun ini templo, te ni cahān yā:

¿Ndese cúu jeē cácahān tēe cástéén tutu ley Yaā Dios jeē Cristo cúu sēhe yucūn David? <sup>36</sup>Chi máá David suhva ni cahān de jñuhun ya ni sáha Espíritu Santo nde jenahán:

Máá Jítóho yō Yaā Dios ni cahān yā jíin Jítóho rī, Yaā quiji:

Cucōo ró lado váha ri nuū cujéhnu ró, te na sáha ri jeē quende rō poder táca jēē cájito uhū rohó.

Achí Yaā Dios. Achí David. <sup>37</sup>Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

Te ñayuu cuehē, cánujnahan ni i cájini nahín i táca jñuhun cáhān yā.

### **Jeē ni cáhān yā jeē iyó cuéchi de jíin de**

*(Mt. 23.1-36; Lc. 11.37-54; 20.45-47)*

<sup>38</sup>Te stéén yā jñuhun, te ni cahān yā jíin i:

Coto má candíje ró táca tēe cástéén tutu ley. Chi cácuñi ni de cáñuhun de sahma cáni jeē steén jeē cujéhnu de, cájica cuu de jíin. Te cánujnahan ni de jeē cahán yíñuhún ñayuu jíin de ini calle.

<sup>39</sup>Te cánujnahan ni de cucōo de nuū silla yíñuhún gá ini vehe ñi sinagoga, jíin silla yíñuhún gá nuū víco cáyeji ñayuu. <sup>40</sup>Te cáquende de vehe ñahan ní caquendōo ndáhú. Te nahán cájicān tahu de návāha caní ni ñayuu jeē tú na cuéchi de. Tēe yáha jíin de chí xeñ gā ndoho de castigo. Achí yá.

### **Jeē ni sócō ñahan viuda xūhún**

*(Lc. 21.1-4)*

<sup>41</sup>Te ñin quívi néne Jesús ini templo ichi núu táca yéjñu nuū cásocō i xūhún. Te jíto ya ndese cáchuhun ñayuu xūhún ini yejnū ún. Te cuehē ñayuu cucá ní cachuhun i cuehē xūhún. <sup>42</sup>Te ni quee ñin ñahan viuda jeē ndóho ndáhú. Te ni chuhun ña uū centavo lulí ini yejnū ún. <sup>43</sup>Yūcuán na te ni cana ya tēe cáscuáha jíin yá, te ni cahān yā jíin de:

Jendaá cahán ri jíin ró jeē cuehē gá cúu jeē ni sócō ñahan viuda ndahú yáha, vēsú jeē ní casocō táca ñayuu cucá.

<sup>44</sup>Chi táca i ni casocō i jeē ni ndóo siquí xūhun cuéhe i. Te ñahan yáha, vēsú ndahú ndóho ña, te ni chuhun ndihí ña jeē cótecu ña. Achí yá jíin de.

## Jeē ní cachi yā jeē náā templo

(Mt. 24.1-2; Lc. 21.5-6)

**13** Te ni quenda Jesús ini templo cáhnu, te iin tēe scuáha jíin yá ni cahān de:

Maestro, condēhe ní ná luu jíto tācá vehe yáha jéē cúu templo, jíin tāca yúu jeē ní cuvāha, áchí de.

<sup>2</sup>Te ni cahān yā jíin de:

Tācá vehe náhnu yāha jéē cájito ró, chi ma cóso jnáhan ga ni iin yuū, chi ndihi jnanū. Achí yá.

### Na seña coo nuū cuacuyajni ndihi ñayiví

(Mt. 24.3-28; Lc. 21.7-24; 17.22-24)

<sup>3</sup>Te ni jehēn yā jíin de yucu Olivos jeē íne ichi núú templo cáhnu. Te ni cucōo ya yūcuán. Te Pedro jíin Jacobo jíin Juan jíin Andrés ni cacajñuhun sñin de ya:

<sup>4</sup>Castūhun ní nuū ná, ¿ndé quiví coo tāca jéē ní cachi ní jéē coo? ¿Te na seña coo núu cuacuyajni squícu tāca jéē ni cahān ní? áchí de.

<sup>5</sup>Te ni cahān yā jíin de:

Coto ró jéē ma stahú ni iin de róhó.

<sup>6</sup>Chi quijicoo cuehē tēe jeē stahú jíin sñhví rí. Máá rí cúu Cristo, achi de. Te súcuan stahú de cuehē ñayuu.

<sup>7</sup>Te nihin rō jñuhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinū quiví ndihi ñayiví. <sup>8</sup>Chi ndonda nación siquí inga nación, te ndonda ñuu siquí inga ñuu jeē cuajnáhan. Te cháha chúcuan jnáa, te coo jnamā, te ndonda ñayuu siquí jnáhan i. Te tāca jéē yáha cácuu jñundóho quejéé xíhna ñúhún gá.

<sup>9</sup>Te condito ró máá ró, chi nastúu i róhó núu tāca tóhō, te ini tācá vehe ii sinagoga caní i róhó. Te quindecia i sava ró núu tācá gobernador jíin núu tāca rey, te cahān i cuēchi siquí rō siquí jeē cá-candíje ró rúhū. Te súcuan te cuu nacani ró jñuhun ri nuū de. <sup>10</sup>Te jíni ñúhún

jéē xíhna gā cuitē núu jñuhun nuū tācá nación ndese jnáma ri i, te sáá te ndihi quiví. <sup>11</sup>Te núu ni cajni de róhó cuán-goo de jíin ró nuū tāca tóhō, te ma ná-cani ni rō xíhna gā ndese stío cuíñí rō nuū de te cācu ró. Chi máá hora un te máá Yāā Dios cuāha ya jñuhun nuū rō ndese cahān rō, te jñuhun ún cahān rō. Chi nasūu máá ró cúu jeē cahān, chi Espíritu Santo cúu jeē cahān. <sup>12</sup>Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquí tatá jíin náná jeē cahni. <sup>13</sup>Te tāca ñayuu quití ni i nuū rō jeē siquí ruhū. Te ñayuu cuiñi nihin jíin jñuhun ri nde quiví jínu, chí cācu i.

<sup>14</sup>Te Daniel, tēe ni nacani jñuhun Yāā Dios, ni tee de jñuhun iin tēe néé jéē quíji. Te róhó jéē cácahu tutu ún, na jécūhun ni rō. Chi iin quiví te cuni rō jeē sáha ndevāha de jeē stívi de tācá ndajníñu ii ini templo, te cuiñi de nuū tú na ley cuiñi de. Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i.

<sup>15</sup>Te ñayuu cáyūcu núu quéhe, ma ndívi i ini vehe jeē quénehen i ndajníñu i, chí cánuú cunu yachí i návāha cācu i.

<sup>16</sup>Te ñayuu cáhiin nuū ítu, ma ndíji i vehe jeē quíhin i sahma i. <sup>17</sup>Te quiví ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihin ña cunu yachí ña.

<sup>18</sup>Te cacān tahú rō jeē ma quíji jñundóho un jéē cunu ró máá tiempo cúun yuhvā.

<sup>19</sup>Chi jeē que-jéé un te coo cuehē jñundóho xēen, jeē ná tu coo súcuan nde quiví ní sáha Yāā Dios ñayiví te nde vijna. Te jeē ndíhi jñundóho ún te ni ma cóo ga jeē súcuan.

<sup>20</sup>Te núu tú nastíyi máá Jítóho yō Yāā Dios tiempo jñundóho ún, te ni iin ñayuu ma cácu cuiti i. Te jeē siquí ñayuu cácan-díje jeē ní nacāji ya, jeē yúcuu nastíyi ya tiempo un.

<sup>21</sup>Núu súcuan te núu iin ñayuu cahān jíin ró: Yāhá condēhe ró íne Cristo, chí:

Yūcuán condēhe ró íne ya, achi i, te ma candíje ró jēē cahán i. <sup>22</sup> Chi canecoo tēē cástáhú te cahán de jeē Cristo cúu de, chí cáhān de jeē tēē nácani jnūhun Yaā Dios cúu de. Te sáha de jniñu jéhu jeē naa ni ñayuu coto i, návāha stáhú de nde maá ñayuu ní nacāji ya, te núu na cúu. <sup>23</sup> Te ndito na cóo ni rō, chí je ni castūhun rí nuū rō vijna nde ná tu coo.

**Ndese coo quivī ndiji Yaā ní nduu tēē**

(Mt. 24.29-35, 42-44; Lc. 21.25-36)

<sup>24</sup> Te quivī ún, núu je ni ndihi jnūndóho ún, te cujnúú nfāndii, te yoō ma ndíi gā. <sup>25</sup> Te ningoo quūmi ín andiví. Te tāca jēē ín andiví chí quisi i. <sup>26</sup> Yūcuán na te coto ñayuu nuū maá rí, Yaā ní nduu tēē, ndiji rí jíin vícō, te condiso rí cuehē poder, te yōhyo luu cujéhu rí. <sup>27</sup> Yūcuán na te tají rí ndajéhé rí quinastútú yá ñayuu ní nacāji rí ndicúún lado ñayiví, nde nuū ndíhi ñayiví te nde nuū ndíhi andiví.

<sup>28</sup> Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. <sup>29</sup> Te suni súcuan núu ni cajini rō jeē ní quejéé cúu tācá jniñu jeē ní cáhān rí, yūcuán na te na jécūhun ni rō jeē ní cuyajni quivī ndíji rí, te yachí coo. <sup>30</sup> Jendaá cahán rí jíin ró jeē ma cúu ndíhi ñayuu jeē cóto jnūndóho ún, chí nde squícu ndíhi jniñu ún. <sup>31</sup> Andiví jíin ñáyiví chí naa, te tāca jnúhun cáhān rí chí ma náā, chí ndíhi squícu.

<sup>32</sup> Te quiví jíin hora jeē ndíji rí, tú ni iin ñayuu jiní, ni máá ndajéhé cáhīyo andiví, ni máá rí, Sēhe Yaā Dios. Chi máá iin ni Tátá rí cúu jeē jiní.

<sup>33</sup> Núu súcuan te na cócūhun ni rō tāca jnúhun yáha, te ndito na cóo ni rō, te cacān tahú rō, chí tu cájini rō na quiví ndíji rí. <sup>34</sup> Chi coo nájñūhun iin tēē jeē quihín jicá de, te nde ná tu quenda de vehe de, te ni ndacu de jniñu nuū tāca mozo de ndese sáha iin iin de. Te ni

ndacu de jniñu nuū tēē ndíto yéhyí jēē na cóndito de. <sup>35</sup> Te suni súcuan róho jíjnāhan ró, ndito na cóo ni rō. Chi cúu rí nájñūhun jitohe vehe ún, te tu cájini rō na hora ndíji rí, á jēē cuácuaa, chí ñuú, chí jēē cána líhli, chí jénéhen. <sup>36</sup> Chi iin sanaa-ni te ndíji rí, te coto ró jēē ma nánihin rí rohó jēē tu ndíto ró. <sup>37</sup> Te jnūhun cáhān rí jíin ró jíjnāhan ró, suni cáhān rí jíin ndivii ñayuu: Ndito na cóo ni rō jíjnāhan ró. Achí yá.

### Jeē ní casqujñáhan de jnūhun jeē jniñ de Jesús

(Mt. 26.1-5; Lc. 22.1-2; Jn. 11.45-53)

**14** Te cúmaní uū gā quiví te quejéé vico pascua jeē cáyeji ñayuu hebreo pan jeē tú na levadura yíhi. Te sutū cácujeñu jíin tēē cástéén tutu ley, ni canducú de modo ndese jniñ de Jesús jíin jnúhun stáhú, te cahni de ya. <sup>2</sup> Te ni cacahān de:

Ma jniñ yó de máá quiví vico, chí ndonda ñayuu siquí yō, achí de.

### Jnūhun ñahan jeē ní chuhun perfume xiní yā

(Mt. 26.6-13; Jn. 12.1-8)

<sup>3</sup> Te íne Jesús ñuu Betania vehe Simón, tēē ni ndoho cuehyí stehyú. Te níni yéji yā staā, te ni quee iin ñahan nuū yā, ndáhá ña iin frasco yuū luu jeē ñūhun aceite perfume, jeē máni ita nardo cúu, te yōhyo yahu ndéé. Te ni tahú ña frasco un, te ni chuhun ña xiní yā. <sup>4</sup> Te sava tēē cáhīin yūcuan ní caquití ni de, te ni cacahān de:

¿Najehē cúu jeē náā saá-ni perfume jíñā? <sup>5</sup> Chi cuu xícō yahu yó víhyá gā uní ciento denario, te cuāha yo nuū ñayuu ndahú núu, áchí de.

Te ni cacahān sōo de jíin ña.

<sup>6</sup> Te ni cahān Jesús:

Ma stáhān rō ña. ¿Naun casáha ró jēē nácani uhū ni ña? Chi iin jniñu váha cúu jeē ní sáha ña jíin rí. <sup>7</sup> Chi níni coyūcu

ñáyuu ndahú jíin ró, te núu cácu ni rō te cuu sáha vāha ró jíin i. Te ruhū chi tuá condee rī jíin ró. <sup>8</sup> Chi ni sáha ña ndíhi jeē cuu sáha ña jeē maní ña jíin rí. Chi nde ná tu quindūji ri te je ni sátūhva ña ruhū jeē ní chuhun ña perfume ruhū. <sup>9</sup> Jendaá cahán rī jíin ró jeē ní cáhnu ñayīvi ndé-ni cúu nuū cuité núu jnūhun jeē jnáma ri ñayuu, suni nacani i jnūhun jeē ní sáha ñahan yáha, návāha cocuhun ni ñayuu ña, áchí yá.

### Jeē ní nastúu Judas yā

(Mt. 26.14-16; Lc. 22.3-6)

<sup>10</sup> Yūcuán na te Judas Iscariote, ñin jeē ndihúxi uū tēe cáscuáha un, ní jehēn de nuū sutú cácujeñhu, ni sándaā de jíin jéē nastúu de Jesús nuū jijnáhan. <sup>11</sup> Te nuū ní cajini sōho sutū un jéē cahán de, te ni cacusiñ ni, te ni cajejnūhun jeē cuáha xūhun núu de. Te nde quivī un ní nducú de modo ndese nastúu de ya.

### Jeē ní jequin yā Cena yā

(Mt. 26.17-29; Lc. 22.7-23;

Jn. 13.21-30; 1 Co. 11.23-26)

<sup>12</sup> Te ni quee máá quivī jeē quejéé vico pascua jeē cáyeji ñayuu pan jeē tú na levadura yíhi, te suni quivī un cájehni i londe nájnūhun ni ndacu Yaā Dios jniñu jeē sáha i vico pascua un. Te tēe cáscuáha un ní cacajnūhún de ya:

¿Ndé nuū cuní ni jéē quísátūhva ná cuxíni ní vico pascua? áchí de.

<sup>13</sup> Te ni tají yá uū tēe cáscuáha ún quingoo de, te áchí yá jíin de:

Cuangoo nde ñuu, te yūcuán najnáhan rō jíin ñin tēe ndíso quīyī ndute. Te condiquin rō de quihín rō jíin de. <sup>14</sup> Te vehe jeē ndívi de, yūcuán cáhán rō jíin tēe chíí vehe: Achí máá Maestro: ¿Ndé ñin cúu cuarto vehe ní cuāha núu ní núu cuxíni ya vico pascua jíin tēe cáscuáha jíin yá? áchi rō. <sup>15</sup> Te máá de stéén de

ñin cuarto cáhnu nde xinī véhe jeē je íyó túhva. Te yūcuán sátūhva ró jéē cuxíni yó, áchí yá jíin de.

<sup>16</sup> Te cuangoo tēe cáscuáha ún, te ni jinūcoo de ñuu, te ni canihín de nájnūhun ni cahán yā jíin de. Te ni casátūhva de jeē cuxíni ya vico pascua.

<sup>17</sup> Te jeē cuácuaa, te ni quee ya jíin ndihúxi uū de. <sup>18</sup> Te ni cacucōo de mesa cáyeji de staā, te ni cahán yā:

Jendaá cahán rī jíin ró jeē ñin rōhó jéē yéji jíin rí, nastúu ro rúhū, áchí yá.

<sup>19</sup> Yūcuán na te ni cacucufhýa ni de, te ná ñin ná ñin de ni cacajnūhún de ya:

¿A sáña cúu? áchí ñin de.

Te suni súcuán inga de:

¿A sáña cúu? áchí ñin ñin de.

<sup>20</sup> Te ni cahán yā jíin de:

Ñin jeē uxí uū rō jeē cáyeji cáhnu jíin rí ñin cohō, suu nastúu ruhū. <sup>21</sup> Te ruhū, Yaā ní nduu tēe, jendaá cúu jeē quihín rī cuu rī, nájnūhun yósó jnúhun ri nuū tútu ii. Te nacā xeēn ndoho tēe nastúu ruhū. Vāha ga núu tu ní cácu tēe un núu, áchí yá.

<sup>22</sup> Te níní cáyeji de jíin yá, te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū tēe cáscuáha jíin yá. Te ni cahán yā:

Caji rō jijnáhan ró, chi yāha cúu yiqui cúñu rī, áchí yá.

<sup>23</sup> Yūcuán na te ni quihin ya ñin copa ndūxi uva, te ni nacuatáhú yá, te ni jēhe ya ni cajihí ndíhi de. <sup>24</sup> Te ni cahán yā jíin de:

Yāha cúu ñiñ rī jeē cuáha ri jeē cúu contrato jeé, te cati jeē ndundoo cuēchi cuehē ñayuu. <sup>25</sup> Te jendaá cahán rī jíin ró jeē ndé vijna te ma cóho ga rī ndūxi ndehē uva yāhá, chi nde quiji quivī ndacu Yaā Dios jniñu ní ñayīvi, te sáá te coho tucu ri jíin ró jijnáhan ró. Achí yá.

**Jeē ní cachi yā jeē yūhu Pedro  
cahān de jeē jíní de ya**

(Mt. 26.30-35;

Lc. 22.31-34; Jn. 13.36-38)

<sup>26</sup> Te ni jita ya iin yaa ii jín de jínáhan de. Te ni quenda ya cuahān yā jín de nde yucu Olivos. <sup>27</sup> Yūcuán na te ni cahān yā:

Ndivii rō nayūhu rō jeē siquí ruhū jecuaá vijna. Chi suhva je yósó jnúhun ri nuū tútu ii, ni cahān Yaā Dios: Cuāha ri jnúhun jeē cáhni ñayuu tēe ndíto lanchi, te lanchi un cuitē núu tí jeē yūhu tí, achí.

<sup>28</sup> Te jeē nátecu rī, te xihna ruhū cosnūu rí quihín rī región Galilea, te sáa te najinūcoo ró, achí yá.

<sup>29</sup> Yūcuán na te ni cahān Pedro:

Vesú ndihi de na náyūhú de, te máa ná chi ma náyūhú cuiti ná, achí de jín yá.

<sup>30</sup> Te ni cahān yā jín de:

Jendaá cahán rī jín ró jeē jecuaá vijna, nde ná tu cana líhli uū jínu, te yūhu ró jeē jñi ñayuu rohó, te uní jínu cahān rō jeē tu jíní rō ruhū, achí yá.

<sup>31</sup> Te ni cahān teyí de jín yá:

Vesú núu cuu na jín ní, te ma cahán cuiti na jéé tu jíní na nhín, achí de.

Te suni súcuan ni cacahān ndihi de.

**Jeē ni jícān tahú yā  
nuū huerto Getsemaní**

(Mt. 26.36-46; Lc. 22.39-46)

<sup>32</sup> Yūcuán na te ni jinū Jesús jín tēe cáscuáha jín yá iin lugar nuū naní Getsemaní. Te ni cahān yā jín de:

Yáhá-ni cucōo ró, te na quíhín rī cacān tahú rī, achí yá.

<sup>33</sup> Te ni jeca ya Pedro jín Jacobo jín Juan, cuahān yā jín de. Te ni quejéé yá cucuíhyá ndasí ni yā te cúxí ni yā jeē quíji jnúndóho siquí yā. <sup>34</sup> Te ni cahān yā jín de:

Yōhyo cúcuíhyá ni rī, te ndúcu sáha jeē cúu rī. Yáhá condetu ró te condito ró, achí yá.

<sup>35</sup> Te ni jica ya jecu gā, te ni jecuíñi yití yá ni jequin ya nuū yā nuū ñúhun. Te ni jicān tahú yā nuū Yaā Dios jeē núu cuu te ma ndóho ya jnúndóho jeē quejéé quíji siquí yā. <sup>36</sup> Te suhva ni cahān yā:

Tátá maá ná, ndihi-ni jniñu cuu sáha maá ní. Te tejiyo ní jnúndóho yáha jéé ma quíji siquí ná. Te nasūu jéé cuní maá ná, chi jeē cuní maá ní na cóo, achí yá.

<sup>37</sup> Te ni ndee yā nuū ndinúní tēe cáscuáha jín yá, te ni jito ya jeé cáquixi de. Te ni cahān yā jín Pedro:

Simón, ¿á quíxí rō? ¿A tu ní cánda ró condito ró jín rí vesú iin hora? <sup>38</sup> Coondito ni rō te cacān tahú rō jeē chindéé ñáhán yá rohó jeé ma sáha ró cuéchi jeé coto ndee jeneé rohó. Chi cuní ndije ánuá rō squícu vāha ró, te yiqui cúnu rō chi tu fuerza, achí yá.

<sup>39</sup> Te ni jehēn tucu ya, ni jicān tahú yā, te suni jnúhun yúcuan ní cahān yā. <sup>40</sup> Te ni ndee ya nuū de, te ni jito ya jeé cáquixi tucu de, chi yōhyo cájii de máhna. Te tuá ni cánihin de jnúhun stío cuíñí de nuū yā. <sup>41</sup> Te ni ndee yā jeé vuelta uní, te ni cahān yā jín de:

Vijna te cusū rō te ndetātu ró. Te tuú chi je ni cuu, chi je ni quee hora, te ruhū, Yaā ní nduu tēe, natūu ri te jñi tēe cáhiyo cuéchi ruhū. <sup>42</sup> Ndocuíñi jijnáhan ró, chi je vēji tēe nastúu ruhū, te quihín yō jín de. Achí yá.

**Jeē ní cajnií de Jesús**

(Mt. 26.47-56; Lc. 22.47-53; Jn. 18.2-11)

<sup>43</sup> Te sá cáhán gā yā súcuan, te ni quee-ni Judas, iin jnáhan jeē uxí uū tēe cáscuáha jín yá. Te vējicoo cuehē tēe jín de, cándaha de espada jín yujnu. Chi sutū cácujeñnu jín tēe cástéén tutu ley jín tēe jéñnu cándacu jniñu, ni catají de tēe ún. <sup>44</sup> Te Judas, tēe nastúu ya ún, je ni jēhe de iin seña nuū tēe un jínáhan, chi ni cachi de:

Tēe jeē téchūhu rí un cúu. Te jnií ró jíjnáhan ró quihín rō jíín, te ma siaá cuiti rō, achí de.

<sup>45</sup> Te ni quee de nde nuū Jesús, te ni cahán de jíín yá:

Maestro, Maestro, achí de.

Te ni techūhú de ya. <sup>46</sup> Te tāca gá tēe un ní cajnií de ya, te cuango de jíín yá.

<sup>47</sup> Te iin tēe íne jíín yá ni tava de espada de, te ni jehnde de sōho iin mozo maá sūtū cujéhnū ga. <sup>48</sup> Te ni cahán Jesús jíín ñáyyu cuehē ún:

¿Te va tēe cuíhná cúu ri jeē véjicoo ró jíín espada jíín yujnu jnií ró rúhū jeē súcuan? <sup>49</sup> Tāca quívī ni ine ri jíín ró jíjnáhan ró ini templo cáhnu, ni steén rí jnūhun, te tu ní cajnií ró rúhū. Te súcuan cásáha ró návāha na squícu jeē cahán tutu ií, achí yá.

<sup>50</sup> Yūcuán na te ndihí tēe cáscuáha jíín yá, ni castóo de ya, ni cajinu de cuango de.

### Tēe suchí jeē ní jinu

<sup>51</sup> Te iin tēe suchí, ndíquin de ya cuahán de jíín yá. Te ndí de máá iin sahma cuitá. Te ni cajnií tēe ún de. <sup>52</sup> Te máá sahma cuitá un ní canihín. Te ni jinu máá ñii-ni de cuahán de.

### Jeē ní indichi Jesús nuū junta tēe cácujehnū ga

(Mt. 26.57-68; Lc. 22.54-55,  
63-71; Jn. 18.12-14, 19-24)

<sup>53</sup> Yūcuán na te ni jinūcoo de jíín Jesús nuū sutū cujéhnū ga. Te tāca sūtū cácujehnū jíín tēe jéhnū cándacu jniíu jíín tēe cástéén tutu ley, ni candutútú de. <sup>54</sup> Te Pedro chí jíca-ni ndíquin de ya, te ni jinū de nde ini patio sutū cujéhnū ga. Te ni cucōo de jíín táca policía, násaā de ñuhūn.

<sup>55</sup> Te sutū cácujehnū jíín ndihí tēe cásáha junta cujéhnū ga, ni canducú de

cuēchi siquī Jesús, chí cahni de ya cácuñi de. Te tu ní cánihin de. <sup>56</sup> Chí cuehē de ni cacahán yaá síquī yā, te tu ní quíjnáhan jnūhun ni cacahán de. <sup>57</sup> Yūcuán na te ni candocuñí sava de, te ni catee de cuēchi siquī yā, achí de:

<sup>58</sup> Máá ná ni cajini ná cáhán de jeē canu de templo yáha jéé ní cuvāha ni casáha tēe, te nuū uní quiví te nacani de inga jeē násūu jíín ndaha tēe cuvāha, achí de. Achí jíjnáhan.

<sup>59</sup> Te ni jnūhun yáha tu ní quíjnáhan tucu jeē cácahán de siquī yā.

<sup>60</sup> Yūcuán na te sutū cujéhnū ga ni ndocuñí de nuū ñáyyu cuehē ún, te ni cajnūhún de Jesús:

¿Naun tu cáhán cuiti rō? ¿A íyó ndáa jeē cácahán tēe yáha síquī rō? achí de.

<sup>61</sup> Te máá yá tu ní cáhán cuiti yā, chí tú na vé ni stío cuíñí yā. Te sutū cujéhnū ga ni cajnūhún tucu de ya:

¿A máá ró cúu Cristo, Sēhe Yaā vāha jeē cujéhnū? achí de jíín yá.

<sup>62</sup> Te ni cahán yā:

Suu ri cúu. Te coto ró jéé ruhū, Yaā ní nduu tēe, condee rí lado vāha Yaā iyó poder, te ndiji ri ichi ándiví jíín vícō, achí yá.

<sup>63</sup> Yūcuán na te sutū cujéhnū ga ni jehnde de sahma de jeē quití ndasí ni de, te ni cahán de:

¿Nde jíni ñuhún gá yō testigo núu súcuan? <sup>64</sup> Chí je ni cajini ró jéé cahán de jnūhun ndevāha jeē quití ni Yaā Dios, chí sáha de máá de Sēhe Yaā Dios. ¿Te ndese cájeni ni rō? Achí de.

Te ndihí de ni cacahán jeē na cúu yā.

<sup>65</sup> Te sava de ni catesihí de nuū yā, te ni cajesí de sahma nuū yā, te ni cacani de ya. Te cácahán de jíín yá:

Cachi ndé iin cúu jeē ní cani rōhó, achí de.

Te tāca tēe policía ni cacani de nuū yā.



**Jeē ní cachi Pedro jeē tu jíní de ya**

(Mt. 26.69-75; Lc. 22.56-62;  
Jn. 18.15-18, 25-29)

<sup>66</sup>Te íne Pedro ini patio ichi chíji nuū cáhiin de jíin Jesús. Te ni quee ñin ñahan jéjníñu vehe sutū cujéñnu ga ún. <sup>67</sup>Te ni jito ña nuū de jeē néne de násaā de yuñúhún. Te ni jito váha ña nuū de, te ni cahān ña:

Róhó chí suni ni jica ró jíin Jesús, tēe ñuu Nazaret, achí ña.

<sup>68</sup>Te máá de tu ní cáchi de, chí ni cahān de:

Tu jíin rí de, ni tu jíin rí na jñuhun cáhān rō, achí de.

Te ni quenda de yéhyí nuū quéhe. Te ni cana-ni líhli. <sup>69</sup>Te ñahan jéjníñu un ní jito tucu ña nuū de, te ni quejéé ña cáhān ña jíin ñáyuu cáhiin yūcuán:

Tēe yáha suni jnáhan táca tēe un cúu, achí ña.

<sup>70</sup>Te máá de tu ní cáchi tucu de. Te ni cunúu jecu gā, te ñayuu cáhiin yūcuan ní cacahān tucu i jíin Pedro:

Jendaá ndije jeē suni jnáhan de cúu ró, chí tēe Galilea cúu ró, te ínuú-ni cáhān rō jíin de jíjínáhan de. Achí i.

<sup>71</sup>Yūcuán na te ni quejéé de cáhān teyí de jeē na cóndee cuēchi siquī de núu tu cáhān ndaā de:

Tu jíin rí tēe un jéé cácahān rō jñuhun de, achí de.

<sup>72</sup>Yūcuán na te ni cana-ni líhli vuelta uū. Te ni nucūhun ni de jñuhun ni cahān Jesús jíin de: Nde ná tu cana líhli uū jínu, te yūhu ró te cahān rō uní jínu jeē tu jíin rō ruhū. Te ni nacani ni de siquī jñuhun ún, te ni ndahyū de.

**Jeē ní indichi Jesús nuū Pilato**

(Mt. 27.1-2, 11-14;  
Lc. 23.1-5; Jn. 18.28-38)

**15** Te jeē ní cundijin, te sutū cácu-jéñnu ni candutútú de jíin tēe jéñnu cándacu jniñu, jíin tēe cástéén

tutu ley, jíin ndíhi tēe cásáha junta cu-jéñnu ga, te ni casquíjñahan de jñuhun. Te ni cajihni de Jesús, te cuangoo de jíin yá nuū Pilato, tēe cúu gobernador. <sup>2</sup>Te Pilato ni cajñuhún de ya:

¿A máá ró cúu Rey ñayuu hebreo? achí de.

Te ni cahān yā:

Suu ri cúu, nájñuhun cáhān rō.

<sup>3</sup>Te sutū cácu-jéñnu un ní cacahān de cuehē cuēchi siquī yā. <sup>4</sup>Te Pilato ni cajñuhún tucu de ya:

¿Naun tu cáhān cuiti rō? ¿A tu jíin ró jéé cuehē cuēchi cácahān de siquī rō? achí de.

<sup>5</sup>Te tu ní cáhān cuiti yā ni ñin jñuhun jíin de. Te nahán ní naa ni Pilato ndéhe de nuū yā.

**Jeē ní cundaā jeē cúu yā**

(Mt. 27.15-31; Lc. 23.13-25;  
Jn. 18.38-19.16)

<sup>6</sup>Te íyó costumbre Pilato jeē quiví víco un siáá de ñin tēe íne vecāa, núu na-ni tēe cácuni ñayuu. <sup>7</sup>Te íyó ñin tēe nání Barrabás, íne de vecāa jíin táca jnáhan de siquī jeē ní candonda de siquī tohō te ni cajehni de ndíyi. <sup>8</sup>Te ni quecoo ñayuu cuehē, te ni cacahān i jíin Pilato jeē na sáha de nájñuhun íyó costumbre de. <sup>9</sup>Te ni cahān Pilato jíin i:

¿A tu cácuni rō jeē siaá rí tēe cúu Rey róhó ñáyuu hebreo? achí de.

<sup>10</sup>Súcuan ni cahān de, chí cúní de siáá de Jesús. Chí je ni jecūhun ni de jeē ní cacucuéśún ni táca sūtū un cájito de ya, te jeē yúcuan ní quijicoo jíin yá nuū de. <sup>11</sup>Te sutū cácu-jéñnu un ní cascáhān de ñayuu cuehē un jéé váha ga na cácan i jeē siaá Pilato Barrabás. <sup>12</sup>Yūcuán na te ni cajñuhún tucu Pilato:

Núu súcuan ¿te ndese cácuni rō jeē sáha ri jíin tēe jeē cácahān rō jeē cúu de Rey róhó ñáyuu hebreo? achí de jíin i.

<sup>13</sup>Te ni cacana jee i:

Cata caa ní de jicā cruz, na cúu de, áchí i.

<sup>14</sup>Te ni cahān Pilato:

¿Na cuēchi ni sáha de núu súcuan?

Te ñayuu un ní cacana jee tucu i:

Cata caa ní de jicā cruz, na cúu de, áchí i.

<sup>15</sup>Te Pilato cuní de jeē na cúsi ni ñayuu jiín de, te ni siaá de Barrabás. Yūcuán na te ni ndacu de jniñu jeē na cáni táca soldado Jesús, jiín jeē cata caa de ya jicā cruz.

<sup>16</sup>Yūcuán na te soldado un cuángoo de jiín yá ini patio palacio, jeē sácata de nuū yā. Te ni canastútú de ndiñi jnáhan de.

<sup>17</sup>Te ni cachuhun de ya iin sahma cuehé ndíhí jeē cúu sahma rey. Te ni casáha de iin corona iñu, ni cachuhun de xiní yā.

<sup>18</sup>Yūcuán na te ni cacana de:

Nacā jeē váha rey cúu Rey ñayuu hebreo, achí de.

<sup>19</sup>Te ni cacani de yujnu xiní yā, te ni catesihí de nuū yā, te ni cajecuiñi yití de nuū yā, casáha de jeē chiñúhún de ya.

<sup>20</sup>Te nuū ní cuu ni casácata de nuū yā, te ni catava de sahma cuehé ndíhí un, te ni canachuhun de ya sahma máá yá. Te ni caquenehen de ya jeē cata caa de ya jicā cruz.

### Jeē ní cacata caa de ya jicā cruz

(Mt. 27.32-44;

Lc. 23.26-43; Jn. 19.17-27)

<sup>21</sup>Te iin tēe nání Simón ñuu Cirene, tēe cúu tátá Alejandro jiín Rufo, vendiji de jeē ni jéhēn de rancho. Te ni yāha de yūcuán, te ni catejniñu soldado un de jeē cóndiso de cruz yā.

<sup>22</sup>Te cuángoo de jiín yá iin lugar nuū naní Gólgota, jeē cuní cahān Lugar Yiquí Xíní. <sup>23</sup>Te ni cajēhe de vino jeē ni sácā núu jiín súje uvuā jeē cóho ya, te tu ní jíhí ya. <sup>24</sup>Te ni cacata caa de ya jicā cruz. Te ni casáha de sorteo jeē siquí ndese ni hñ iin iin de sahma ya.

<sup>25</sup>Te cahñn ni cacata caa de ya. <sup>26</sup>Te jñūhun ni catee de xiní cruz cahán na siquí ni jíhí yā: Yāha cúu Rey ñayuu hebreo, achí. <sup>27</sup>Te suni ni cacata caa de uū tēe cuíhná núu uū gā cruz, iin de lado váha ya, te inga de lado jecó yá. <sup>28</sup>Te ni squícu jñūhun cáhán tutu i: Ni casqujñáhan de ya jiín tēe casáha néé, áchí.

<sup>29</sup>Te ñayuu cáyāha yūcuán cáscuicó i xiní i, te cácahān neé i:

Jājaan. Róhó chí cáhán rō jeē cánu rō templo cáhnu, te nuū uní quiví te nucondichi sáha ró. <sup>30</sup>Núu súcuan te jnama ró máá ró, te nuu ró jicā cruz vii, achí i.

<sup>31</sup>Te suni súcuan ni cacahān catá sutú cácujuhnu jiín tēe cástéén tutu ley, te áchí de cácahān maá de:

Núu inga ñayuu ni jnama de, ¿te naun tu cúu jnama de máá de vijna? <sup>32</sup>Núu na cúni yō jeē Cristo, Rey ñayuu Israel, nuu de jicā cruz vijna, yūcuán na te candíje yó, achí de jíjnáhan de.

Te tēe cándita caa jiín yá, suni súcuan ni cacahān neé de.

### Jeē ni jíhí Jesús

(Mt. 27.45-56;

Lc. 23.44-49; Jn. 19.28-30)

<sup>33</sup>Te nuū ní cuu cahuxí uū, te ni cunee ní cáhnu nde cahuní. <sup>34</sup>Te nuū ní cuu cahuní, te ni cana jee Jesús:

Eloi, Eloi, ¿lama sabactani? achí yá. Te jñūhun un cúni cahān: Yaā Dios maá ná, Yaā Dios maá ná, ¿naun ni stóo ní sáña?

<sup>35</sup>Te sava ñayuu cáhiin yūcuán, ní cajini i jñūhun ún, te ni cacahān i:

Cuni nahín, chí cána de xiní Elías, tēe ni nacani jñūhun Yaā Dios jenahán, achí i.

<sup>36</sup>Te ni jinu iin tēe, ni jechundaji de cachí nuū vinagre iyá. Te ni tee de xiní iin yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnúu de, áchí de.

<sup>37</sup>Te máá Jesús ni cana jee ya, te ni jihī-ni ya. <sup>38</sup>Yūcuán na te sahma ndíta caa jeē ndihyú cuarto iī ini templo cáhnu, ni ndatā sava sava nde xinī te nde nuū jehé. <sup>39</sup>Te tēe űuu Roma jeē cúu capitán, índichi de nuū yā, te ni jini de jeē ní cana jee ya te ni jihī yā. Te ni cahān de:

Jendaá ndije jeē Séhe Yaā Dios cúu tēe yāha, áchí de.

<sup>40</sup>Te suni cáhiin sava ñahan, cándēhe jícá ña. Te unī ña cácuu María űuu Magdala, jíin María naná José jíin Jacobo suchí, jíin ñahan naní Salomé. <sup>41</sup>Te ñahan yāha ní candiquin ña ya, ni cajejnīñu ña nuū yā nde náa jícá ya Galilea. Te suni cáhiin cuehē gā ñahan jeē ni jéngoo jíin yá űuu Jerusalén.

### Jeē ní quindūji Jesús

(Mt. 27.57-61;

Lc. 23.50-56; Jn. 19.38-42)

<sup>42</sup>Te ni ini quivī ún. Te quivī sátūhva cúu, chi sajnē cúu quivī ndétátú. <sup>43</sup>Te ni quee José, tēe űuu Arimatea. Te cúu de iin tēe cújéhnu nuū junta cújéhnu ga. Te suni ñūhun ni de jeē quiji quivī jeē ndacu Yaā Dios jniñu. Te tu yúhú de chi ni quivī de nuū Pilato, ni jicān de yiqui cúñu Jesús. <sup>44</sup>Te Pilato chi náa ni de jeē yachí ni jihī yā. Te ni cana de capitán, te ni cajñūhún de tēe un núu je ni jihī yā. <sup>45</sup>Yūcuán na te ni cucáhnu ni de jeē ní cahān capitán jíin de, te ni jēhe de jñūhun jeē quihin José yiqui cúñu yā. <sup>46</sup>Te José ni jeen de iin sahma cuitá váha. Te ni snúu de yiqui cúñu yā, te ni chusúcún de sahma ún. Te ni chindūji de ya ini iin yaū jeē quindūji ndīyī, jeē ní caan jicā iin cava. Te ni jesi de iin yaū yuhu yaú un. <sup>47</sup>Te María űuu Magdala, jíin María naná José, ni cajito ña nuū ní cachindūji de ya.

### Jeē ní natecu Jesús

(Mt. 28.1-10; Lc. 24.1-12; Jn. 20.1-10)

**16** Te ni ini quivī ndétátú, te María űuu Magdala, jíin María naná Jacobo, jíin Salomé, ni cajeen ña tēcá perfume jeē quíchuhun ña yiqui cúñu yā. <sup>2</sup>Te jenēhen quivī domingo, jeē ní cane niāndii, te ni jinūcoo ña nuū ní yindūji ya. <sup>3</sup>Te cácahān ña:

¿Ndé nñin yō tēe tejiyo yaū ndihyú yuhu yaú? áchí ña.

<sup>4</sup>Te ni candacoto ña, te ni cajito ña jeé jé ni cujiyo yaū cáhnu un cuáhān. <sup>5</sup>Te ni quivicoo ña ini yaū ndīyī. Te ni cajito ña iin ndajéhé Yaā Dios jeē cáa nájñūhun tēe suchí, néne ya ichi lado váha, ñūhun ya iin sahma cuijín cáni. Te ni cayūhú ña. <sup>6</sup>Te ni cahān yā jíin ña:

Ma yūhu ró jijnáhan ró. Chi vecondēhe ró Jesús űuu Nazaret, Yaā ni jihī jicā cruz. Tuá yā yāhá, chi je ni natecu yā. Yāhá condéhé ró nuū ní cachindūji de ya. <sup>7</sup>Cuánungoo te cachi rō nuū tēe cás-cuáha jíin yá, jíin núu Pedro, jeé xíhna gā maá yá jinū Galilea, te sáa te nájñūcoo de. Te yūcuán coto de nuū yā, nájñūhun ni cahān yā jíin de nde saá, áchí yá jíin ña.

<sup>8</sup>Yūcuán na te ñahan un ní quenda-coo ña nuū ní yindūji ya, te cájinu ña cuangoo ña. Chi quísi i ña jeé cáyūhú ña. Te tu ní cácachi cuiti ña nuū ní iin, chi cáyūhú ña.

### Jeē ní nane Jesús nuū María űuu Magdala

(Jn. 20. 11-18)

<sup>9</sup>Te Jesús ni natecu yā jenēhen quivī domingo. Te xíhna gā ni nane ndijin yā nuū María űuu Magdala, ñahan jeē ní quenehen ya uxā tachī ini. <sup>10</sup>Te cuahān ña cuacastūhún ña nuū tēca tēe ni cajica jíin yá jeē ní nane ya nuū ña. Te cácu-cuíhyá ni de te cándahyū de. <sup>11</sup>Te nuū ní cajini de jñūhun jeē ní jito ña nuū yā

jeē técu yā, te tu ní cácanđije de jnūhun cáhān ña.

**Jeē ní nane ya nuū uū  
tēe cáscuáha jíin yá**

*(Lc. 24.13-35)*

<sup>12</sup>Yūcuán na te ni quendacoo uū jnāhan tēe ún, cájica de cuahān de ichi rancho, te sñin modo ni nane ndijin yā nuū de. <sup>13</sup>Te ni canandicó de, ni ca-castūhún de nuū tāca gá jnāhan de. Te ni tu ní cácanđije tucu jnāhan de jeē cácahān ndindúú de.

**Jeē ní tejniñu ya de nacani de jnūhun**

*(Mt. 28.16-20;*

*Lc. 24.36-49; Jn. 20.19-23)*

<sup>14</sup>Te cúcuéé gá te ni nane ndijin yā nuū ndihúxí ñin de jeē cáyūcú de mesa cáyeji de staā. Te ni cahān yā nuū de, chi ñihni ni de jeē tu cácanđije de jeē cácahān jnāhan de un, jēé ní natecu yā ni cajito de ya. <sup>15</sup>Te ni cahān yā jíin de:

Cuángoo jíjnāhan ró ní ñayiví, te nacani ró jnúhun ri nuū tāca ñáyuu

ndese jnáma ri i. <sup>16</sup>Te ñayuu candíje te cuandute i, chi cācu i. Te ñayuu tú candíje, chi jnahnū ndetū i. <sup>17</sup>Te ñayuu candíje, sáha i tācá jniñu jéhnu yáha jeē steén jeē iyó rí jíin i: Jíin síhví rí quenehen i tachí ini ñayuu. Te cahān i tijni yuhu jéé. <sup>18</sup>Te núu ni jniñ sanaa i coō, chí núu ni jihí i veneno, te ma sáha dañu jíin i. Te suni soó i ndaha i siquī ñáyuu cácuñū, te nduvāha. Achí yá jíin de.

**Jeē ní ndaa ya cuanuhun yā andiví**

*(Lc. 24.50-53)*

<sup>19</sup>Yūcuán na te nuū ní ndihí ni cahān maá Jítóho yō jíin de jíjnāhan de, te ni ndaa ya cuanuhun yā andiví, te ni cucōo ya lado váha Yaā Dios nuū cu-jéhnu ya. <sup>20</sup>Te máá de ni quendacoo de, ni canacani de jnūhun ya tāca lado ndese jnáma ya ñayuu. Te máá Jítóho yō ni chindéé ñáhán yá de. Te ni jēhe ya fuerza jeē sáha de tācá jniñu jéhnu jeē steén jeē iyó ndáa jnūhun cánacani de. Te ni cuu. Amén.

## JNUHUN VAHA NI TEE SAN LUCAS

**1** Cuehē tēe ni cajicu de ni catee yúcuñ de historia Jesús, tācá jniñu jeē ni sáha ya ni cajito yó. <sup>2</sup>Te ni catee de tāca jnúhun jeē ní cacastühun ñayuu nuú yō, jeē ní cajito i jniñu yúcuñ nde ná ni quejéé, te ni canacani i jnúhun ya. <sup>3</sup>Te máá ná, suni ni nanducú yúcuñ ná tāca jnúhun ya, nde nuú ní quejéé. Te ni jeni ni na jéé suni íyó váha jeē tée cájǐ ná tāca jnúhun yáha núú ní, amigo Teófilo. <sup>4</sup>Te súcuñ te cuni ni jéé iyó ndāā tāca jnúhun jeē ní cacastühún i nuú ní.

### Jeē ní cachi ndajéhé jeē cacu Juan tēe scuándute

<sup>5</sup>Tiempo jeē ní cuu Herodes rey región Judea, te ni íyo iin sutū ñayuu hebreo, naní de Zacarías, te grupo Abías cúu de. Te ñasihí de naní ña Elisabet, te suni sēhe yucūñ maá sūtū Aarón cúu ña. <sup>6</sup>Te ndindúú de cahiyo ndāā de nuú Yaā Dios, te ndāā váha cásquicu de jniñu ndácu ley maá Jítóho yō Yaā Dios, cájito tāca ñayuu. <sup>7</sup>Te tú sēhe de íyó, chi ñahan númá cúu Elisabet, te je jéhu ndindúú de.

<sup>8</sup>Te iin quiví te jéjñíñu Zacarías nuú jniñu jeē cúu de sutū nuú Yaā Dios, chi ní quee quiví jeē ndívi grupo de. <sup>9</sup>Te ní casáha de sorteo, nájnūhun íyó costum-bre sutū. Te ní sáha tocar Zacarías jeē quiví de ini cuarto i templo Jitoho yō Yaā Dios, te cahmu de sūje cútú. <sup>10</sup>Te hora jeē cayú sūje cútú, te tāca ñayuu cuehē cáhiin i fuera, cájicāñ tahu i. <sup>11</sup>Te ní cane iin ndajéhé maá Jítóho yō nuú de, iin ya lado váha altar nuú jéhu de sūje cútú. <sup>12</sup>Te ní cunéé ni Zacarías ní jito de nuú yā, te yōhyo ní yūhú de. <sup>13</sup>Te ní cahāñ ndajéhé un jíin de:

Zacarías, ma yūhu ró, chi je ní chihí Yaā Dios cuenta jeē ní jícāñ tahu rō. Te

ñasihí ró Elisabet, scácu ña iin sēhe yíí, te snání ró i Juan. <sup>14</sup>Te yōhyo cusíñ ní rō. Te cuehē ñayuu cusíñ ní jeē cácu i. <sup>15</sup>Chi cujéhu sēhe ró sáha máá Yaā Dios. Te ma cóho i vino ní ndixi cuií. Te cunuú máá Espiritu Santo jíin i, nde ná tu cacu i. <sup>16</sup>Te sáha i jeē cuehē ñayuu nación rō Israel ndívicoo i nuú Jítóho i Yaā Dios. <sup>17</sup>Te xihna gā Juan quiji nacani jnúhun Jitoho yō Jesús, te sáá te quiji ya. Te sáha i nájnūhun ní sáha Elías, tēe ní nacani jnúhun Yaā Dios jenahán, te conevāha i poder jeē nácani i jnúhun, nájnūhun ní conevāha Elías. Te sáha i jeē tāca tátá ndumaní de jíin sēhe de. Te suni sáha i jeē ñayuu nihni ní cu-atáhú i nuú Yaā Dios, nduu i ñayuu ndāā. Súcuñ sātühva i ñayuu návāha candíje i máá Jítóho yō jeē quíji ya. Achí ndajéhé.

<sup>18</sup>Te Zacarías ní cajnúhún de ya:

¿Ndese cucáhnu ní na núu jendaá cúu? Chi tēe jéhu cúu ná, te suni jéhu ñasihí ná, áchí de.

<sup>19</sup>Te ní cahāñ ndajéhé un jíin de:

Máá rí cúu Gabriel, te íne ri nuú Yaā Dios, jejniñu ri nuú yā. Te ní tají yá ruhú vēji ri cahāñ rí jíin ró, te nácani ri jnúhun váha yáha núú rō. <sup>20</sup>Te jeē tu ní cándíje ró jnúhun ní cahāñ rí, te cuñfhín ró, te ma cúu cahāñ rō, chí nde na cácu sēhe ró. Te squícu nahín jnúhun cáhán rí yáhá, na queé quiví, achí ndajéhé.

<sup>21</sup>Te ñayuu cáhiin ichi fuera, cándetu i Zacarías, te cájeni ní i na vé ní cuu jeē cucuéeé de ini cuarto i templo. <sup>22</sup>Te nuú ní quenda de, te tuá ní cúu cahāñ de jíin i. Te ní cajecūhun ní i jeē ini templo ní jito ndijin de iin jeē ní stéén yā nuú de. Te máá seña na ní sáha de nuú i, chí ní cuñfhín de.

<sup>23</sup>Te nuú ní jínu quiví ní jejniñu de ini templo, te cuanuhun de vehe de. <sup>24</sup>Te ní cuu jecu quiví, te ñasihí de Elisabet ní jecūhun sēhe ña. Te ní íyo ña vehe ña uhūñ yoō jeē tuá nde ní jéhen ña. Te jéni ní ña: <sup>25</sup>Súcuñ ní sáha máá Jítóho yō

jiín rí, te ni tejiyo ya jnūhun jeē cúcanu rī nuū ñáyuu jeē tú sēhe rí, jéni ni ña.

### Jeē ní cachi ndajéhé jeē cacu Jesús

<sup>26</sup> Te nuū inū yoō, te ni tají Yaā Dios ndajéhé yā Gabriel, ni jehēn yā in inū naní Nazaret, ndañū Galilea. <sup>27</sup> Te ni jehēn yā nuū in sūchi sfhí nání María. Te je ni cundaā jeē quijnáhan ña jíin in tēe nání José, te sēhe yacūn rey David cúu de. <sup>28</sup> Te ni quívi ndajéhé un núu ndeé ña, te ni cahān yā:

Tandii, nacā ndetū cúu ró. Chi máá Jítóho yō Yaā Dios iyó yá jíin ró, te ni sáha ya jeē yóhoyo ndetū gā cúu ró núu tāca gā ñahan, áchí yá.

<sup>29</sup> Te nuū ni jíto ña nuū yā, te ni cunéé ni ña jeē súcuan cáhán yā, te jéni ni ña naun cáhán yā súcuan jíin ña. <sup>30</sup> Te ni cahān gā ndajéhé un jíin ña:

Ma yūhu ró María, chi ni sáha Yaā Dios jeē váha jíin ró. <sup>31</sup> Te jecūhun sēhe ró te scácu ró in sēhe yíí, te snání ró i Jesús. <sup>32</sup> Te kujéhnū i, te conaní i Sēhe Yaā kujéhnū téyí. Te máá yá jeē cúu ya Jítóho yō Yaā Dios, sáha ya jeē cuu i rey, nájnūhun jíi i David ni cuu de rey. <sup>33</sup> Te ní cáni ndacu i jniñu nuū ñáyuu nación Israel. Te ma ndíhi cuiti jeē ndácu i jniñu. Achí ndajéhé.

<sup>34</sup> Yūcuán na te ni cajnūhún María:

¿Ndeese coo jeē ni cáhán ní? Chi ná tu coo yíí ná, áchí ña.

<sup>35</sup> Te ni cahān ndajéhé un:

Máá Espíritu Santo quiji siquī rō, te poder maá Yaā kujéhnū téyí sáha in jniñu jéhnū jíin ró. Te jeē yúcuan máá sūchi íi jeē cácu, quíhi cuenta i nuū Yaā Dios, te cahān ñayuu jeē Sēhe Yaā Dios cúu i. <sup>36</sup> Te suni cástūhun rí nuū rō jeē jnánhan ró Elisabet, suni scácu ña in sēhe vēsú je jéhnū ña. Te vijna iyó ínū yoō jeē tuá cácahān ñayuu jeē cúu ña ñahan númá. <sup>37</sup> Chi ndíhi-ni cuu sáha Yaā Dios, te tu iyó ni in jeē ma cúu sáha ya, achí ndajéhé un.

<sup>38</sup> Yūcuán na te ni cahān María:

Cuu núu súcuan, chi sáha ná táca jniñu ndácu Jítóho yō Yaā Dios, te na cóo jíin ná nájnūhun ni cachi ní, áchí ña.

Te máá ndajéhé un cuáhān-ni ya.

### Jeē ni jécondēhé María Elisabet

<sup>39</sup> Te ni cuu jecu quívī, te yachí cuahān María, ni caa ña yucu cuahān ña in inū región Judea. <sup>40</sup> Te ni jinū ña vehe Zacarías, te ni cahān ña jíin Elisabet. <sup>41</sup> Te nuū ní jini Elisabet jeē cahān María jíin ña, te sūchi nūhun chíji ña ni canda-ni i. Te ni cunuú Espíritu Santo ini anuá ña. <sup>42</sup> Te ni cahān jee ña:

Ni sáha Yaā Dios jeē yóhoyo ndetū gā cúu ró núu tāca gā ñahan, jíin jéé yóhoyo ndetū sēhe ró. <sup>43</sup> ¿Te ndese cúu jeē ní quee naná máá Jítóho rī nuū rī? Chi tu cújéhnū cuiti rī. <sup>44</sup> Chi jeē ní jini-ni ri jnūhun ni cahān rō jíin rí, te sūchi nūhun chíji ri ni canda i jeē cúsi ni i. <sup>45</sup> Te nacā ndetū rō jeē ní candíje ró, chi squícu nahín tāca jnūhun ni cahān máá Jítóho yō jíin ró. Achí Elisabet.

<sup>46</sup> Yūcuán na te ni cahān María:

Cáhán rī jeē kujéhnū ndasí máá Jítóho yō Yaā Dios,

<sup>47</sup> te cúsi ni rī jíin Yaā Dios, Yaā jnáma ruhū.

<sup>48</sup> Chi ni sáha ya cuenta ruhū, vēsú tu cújéhnū rí.

Te na squícu ri jniñu ndácu ya.

Te nde vijna te tāca ñáyuu jeē nácacu, cahān i jeē yóhoyo ndetū rí.

<sup>49</sup> Chi Yaā jní ndíhi poder, ni sáha ya jniñu jéhnū jíin rí.

Te Yaā ii ndoo cúu ya.

<sup>50</sup> Te ní cáni cundáhú ni yā tāca ñáyuu ndíso iyo nuū yā.

<sup>51</sup> Ni sáha ya jniñu jéhnū jíin poder yā, chí ni scúnu ya ñayuu casándúxi máá,

<sup>52</sup> te ñayuu cácujehnū, ni quende ya jeē kujéhnū i.

Te ñayuu ndahú chí ni sajehnū ya i,

<sup>53</sup> te ñayuu cájii sōco ni jēhe ya jeē cáji vāha i.

Te ñayuu cucá ní natajái yá i súcuan-ni.

<sup>54</sup> Te ni chindéé ñáhán yá yohó, ñáyuu nación Israel, jeē cácuu yó mozo yā, te tu náá ni yā jeē cundáhú ni yā yohó.

<sup>55</sup> Chi súcuan ni jejnūhun ya nuū tāca jíi yō, nuū Abraham jíin tāca yúcūn de jeē cóo ní cáni.

Achí María.

<sup>56</sup> Te ni condee ña jíin Elisabet nájnūhun uní yoō. Yūcuán na te cuanuhun ña vehe ña.

### Jeē ní cacu Juan tēe scuándute

<sup>57</sup> Te ni jinū quivī jeē scácu Elisabet sēhe ña, te ni scácu ña iin sēhe yíi.

<sup>58</sup> Te tāca ñáyuu ndeé yajni jíin ña jíin tāca jnāhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jnūhun sīi ni jíin ña. <sup>59</sup> Yūcuán na te nuū uná quivī jeē ní cacu i, te ni jengoo ñayuu ni sáha i circuncidar sūchi yíquín un. (Te yūcuán cúu iin jnūni nuū yiqui cúnu tāca sūchi yíi hebreo jeē steén jeē cácuu i ñayuu Yaā Dios.) Te snání i sūchí un síhví tátá i Zacarías nuú. <sup>60</sup> Te ni cahān naná i:

Ma cúu, chí Juan conaní i, áchí ña.

<sup>61</sup> Te ni cacahān i jíin ña:

¿Te naun? Chi tú ni iin jnāhan ró nání súcuan, áchí i.

<sup>62</sup> Yūcuán na te jíin seña ni cacajnūhún i tátá sūchí un ndese cúní de jeē cónaní i. <sup>63</sup> Te máá de ni jicān iin tutu, te ni tee de: Juan conaní i. Te tāca ñáyuu un ní canaa ni i cájito i. <sup>64</sup> Te ni nduvāha Zacarías jeē ní cuñhín de, te ni quejéé de cáhán de jeē yóhoyo vāha Yaā cúu Yaā Dios. <sup>65</sup> Te tāca ñáyuu ndeé yajni jíin de, yóhoyo ni canaa ni i. Te ní yucu región Judea ni jitē núu tāca jnūhun yáha jeē súcuan ni cuu. <sup>66</sup> Te tāca ñáyuu jeē ní cajini jnūhun, ni quejéé i cánacani ni i, te cacajnūhun jnāhan i:

¿Ndese coo na cuéhnu sūchi yáha? áchí i.

Chi máá Jítóho yō yóhoyo ni sáha ya jeē vāha jíin i.

### Jnūhun luu jeē ní nacani Zacarías

<sup>67</sup> Te tátá i Zacarías ni cunuú Espiritu Santo jíin de, te ni nacani de jnūhun ni steén Yaā Dios nuú de:

<sup>68</sup> Yóhoyo vāha Yaā cúu máá Jítóho yō, Yaā Dios yohó ñáyuu Israel, chí ni quiji ya nuū yō jeē cácuu yó ñáyuu yā, te ni jnama ya yohó.

<sup>69</sup> Te ni jeni ya iin Yaā iyó poder jeē jnáma ya yohó,

te Yaā ún cacu yucūn mozo yā rey David.

<sup>70</sup> Chi súcuan ni jejnūhun ya, ni cacahān tāca tēe ndoo ánuá jeē ní canacani de jnūhun ya jenahán.

<sup>71</sup> Chi ni cacahān de jeē jnáma ya yohó núu jeē cájito uhú yohó, jíin núu jeē cáquitī ni nuū yō.

<sup>72</sup> Chi ni cundáhú ni yā tāca jíi yō jijnāhan,

te tu ní náá ni yā contrato íi yā.

<sup>73</sup> Chi suu un ní jejnūhun téyí yá nuū jíi yō Abraham,

<sup>74</sup> suu jeē jnáma ya yohó núu ñáyuu cájito uhú yohó,

návāha cuajnínu yó núu yā, te ma yūhu yó i.

<sup>75</sup> Te coo ndaā coo ndoo ánuá yō, cuajnínu yó núu yā tāca quívi jeē cótecu yō.

<sup>76</sup> Te róhó sūchi lúlí, cuu ró tēe nacani jnūhun Yaā cujéhnu téyí.

Chi cosnúu ró ichi núu máá Jítóho yō, návāha sátūhva ró ñáyuu, te sáá te quiji ya.

<sup>77</sup> Te castūhun ró nuū ñáyuu maá yá jeē jnáma ya i,

jíin jēé cóne cáhnu ni yā nuū tāca cuéchi i.

<sup>78</sup> Chi Yaā Dios maá yó, vāha ni yā te cundáhú ni yā yohó.

Jeē yúcuan tají yá maá Yaā jeē sáha jeē cúndijin ini anuá yō, quiji ya nde andiví,

<sup>79</sup> nāvāha jecūhun ni yohó jēē cáyūcu nájñūhun nuū néē nuū jé yajni cuu yō.

Te chuhun ya yohó ichi nuū cóo ndeyí coo siī ni yō.

Achí Zacarías.

<sup>80</sup> Te sūchi lúlí un ní jehnu i te ni ije i jíin jnúhun ya. Te ni condee i nde nuū ñúhun téhé ndé quiví ní quenda ndijin i nuū ñáyuu Israel.

### Jeē ní cacu Jesús

(Mt. 1.18-25)

**2** Te ni cuu jecu quiví, te Augusto, tēē cúu rey, ni ndacu de jniñu jeē coo censo jeē núcosō síhví ndivii ñáyuu ní cāhnu nuū ndácu de jniñu. <sup>2</sup> Yāha cúu censo xihna ñúhún jēē ní casáha de ná ni cuu Cirenio gobernador nación Siria. <sup>3</sup> Te ndivii ñáyuu cuanungoo i ná ñuu ná ñuu maá i jeē nácuāha i síhví i. <sup>4</sup> Te suni José ni quenda de ñuu Nazaret, ndañú Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucún David cúu de. <sup>5</sup> Te ni jehēn de nāvāha nacuāha de síhví de jíin María, chi je yajni quijnáhan ña jíin de. Te ñúhun sēhe ña ni sáha Espíritu Santo. <sup>6</sup> Te níni cāhiin de yūcuán te ni jinū quiví jeē cacu sēhe ña. <sup>7</sup> Te ni scácu ña sēhe yíí núú ña, te ni chusúcún ña i sahma cuitá, te ni jequin ña i ini iin nundōo núú yéji quiti, chi tuá núne mesón condee ña.

### Jeē ní canecoo ndajéhé yā nuū pastor

<sup>8</sup> Te yajni ñuu Belén cāhiin tēē cácuu pastor, te cándito de lanchi de níí niñu jecuáá nde yucu ún. <sup>9</sup> Te iin sanaa-ni te ni cane iin ndajéhé maá Jítóho yō nuū de, te nduva maá Jítóho yō ni ndindēē níí núú cāhiin de. Te yōhoyo ni cayuhú de. <sup>10</sup> Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jñūhun vāha nuū rō, te sáha jeē cúsiī ndasí ni tāca ñáyuu: <sup>11</sup> Chi vijna nde ini ñuu David ni cacu iin Yaā jnama rōhó, te maá Jítóho yō Cristo cúu ya. <sup>12</sup> Te súcuan nacuni rō sūchi yíquín un, chi ñúsúcún i sahma cuitá te cátú i ini iin nundōo núú yéji quiti. Achí yá.

<sup>13</sup> Te iin sanaa-ni te ni canecoo cuehē gā ndajéhé andiví, cāhiin ya jíin ndajéhé un, te cácahān yā jeē yóhoyo vāha Yaā cúu Yaā Dios. Te áchí yá:

<sup>14</sup> Yōhoyo luu cújéhnú Yaā Dios nde nuū sucún.

Te na ndúvāha ni tāca ñáyuu ñayiví, sáha ya jeē cúsiī ni yā jíin i.

Achí táca ndajéhé.

<sup>15</sup> Yūcuán na te cuanungoo ndajéhé un andiví. Te tēē cácuu pastor ni cacahān de jijnáhan de:

Na quíhín yō nde ñuu Belén, te cuni yō na vé ni cuu jeē ní castūhun maá Jítóho yō nuū yō, achí de.

<sup>16</sup> Te yachi cuangoo de, te ni nanihin de María jíin José jíin sūchi yíquín un, cátú i ini nundōo núú yéji quiti. <sup>17</sup> Te nuū ní cajini de nuū i, te ni canacani de jñūhun jeē ní cachi ndajéhé yā nuū de siquī sūchi yíquín un. <sup>18</sup> Te ni canaa ni tāca ñáyuu cājini nahín i jñūhun cácahān tēē cácuu pastor. <sup>19</sup> Te María, ni quendōo tāca jnúhun yáha nuū jeē níjnūní ña, te nácani ni ña siquī. <sup>20</sup> Te tēē cácuu pastor cuanungoo de, te ni cacahān de jeē yóhoyo vāha Yaā cúu Yaā Dios siquī tāca jēē ní cajini sōho de jíin jēē ní cajito de, chi ni squícu nahín nájñūhun ni cahān ndajéhé yā jíin de.

### Jeē ní castéén de i nuū Yaā Dios ini templo

<sup>21</sup> Te ni cuu unā quiví jeē ní cacu ya, te ni casáha de circuncidar sūchi yíquín un. Te ni casnání de i Jesús, chi síhví yúcuan ní cachi ndajéhé yā nuū María nde ná tu jecūhun i.



<sup>22</sup> Te ni jinu quivī jeē casquīcu ña costumbre jeē ndúndoo ña nuū Yaā Dios jijnáhan ña, nájñuhun cáhán ley jeē ni jéhe ya nuū Moisés. Te ni jengoo de jíin i ñuu Jerusalén jeē nácuāha de i nuū maá Jítóho yō Yaā Dios. <sup>23</sup> Súcuan ni casáha de, chi yósó núú tútu ley yā: Tāca sūchi yíh núú jéē cácacu, quihi cuenta i nuū Jítóho yō Yaā Dios, achí tutu. <sup>24</sup> Te suni cuasocō de nájñuhun cáhán ley maá Jítóho yō: Socō rō uū livi chí úu paloma, achí tutu.

<sup>25</sup> Te ni iyo iin tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún váha nuū Yaā Dios cúu de. Te ñúhun ni de jeē quée maá Yaā jnama ñayuu nación de Israel. Te maá Espiritu Santo íyó yá jíin de. <sup>26</sup> Te je ni castúhun yá nuū de jeē ma cúu cuiti de chi nde coto de nuū Cristo jeē tají maá Jítóho yō Yaā Dios. <sup>27</sup> Te ni steén yā nuū de jeē quihín de templo quivī ún. Te suni tátá naná sūchi yíquín Jesús, ni quívicoo de ini templo jíin i, jeē nácuāha de i nuū Yaā Dios nájñuhun cáhán ley Moisés. <sup>28</sup> Te Simeón ni ñunundee de i, te ni cahān de jeē yóhoyo váha Yaā cúu Yaā Dios, te achí de:

<sup>29</sup> Tátā Yaā Dios, vijna te cuu cuāha ni jnúhun jeē cuu ná, chi je ni cusī ni ná.

Chi je ni squīcu ní jnúhun ni jejnúhun ní núú sãña jéé cúu ná mozo ni.

<sup>30</sup> Chi ni jito jínúu na núú Yaā jnama sãña jíjnáhan ná.

<sup>31</sup> Chi ni jeni ní yá jeē jnama ya tāca ñáyuu ñayiví.

<sup>32</sup> Te maá yá sáha jeē cúndijin ini anuá ñayuu tācá nación, nāvāha jecúhun ni i siquī ní.

Te sáha ya jeē kujéhu ñayuu maá ní Israel.

Achí Simeón.

<sup>33</sup> Te José jíin náná i cánaa ni de cájini nahín de jnúhun ni cahān Simeón siquī i. <sup>34</sup> Te ni jicān tahú Simeón jehé de

jijnáhan de, te ni cahān de jíin náná i María:

Sūchi yáha vēji i jeē candíje cuehē ñayuu nación yō Israel, te cācu i jíjnáhan i. Te sava i ma candíje i, te jnahnū ndetū i. Chi cúu i Yaā ní tají Yaā Dios, te sa squéhichí ni cuehē ñayuu i. <sup>35</sup> Te súcuan te quenda ndijin ndese cájeni ni tāca ñáyuu. Te maá rō chi jnahuhū ndasí ni rō coto rō jéé ndóho i. Achí Simeón.

<sup>36</sup> Te suni íne iin ñahan nácani jnúhun Yaā Dios, naní ña Ana. Te sēhe Fanel, yucūn Aser cúu ña. Te je jéhu ndasí ña. Te nde ná lulí ña te ni condee ña jíin yí ña uxā cuiyā. <sup>37</sup> Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe i, chi jéjníñu ña nuū Jítóho yō Yaā Dios nduú ñuú, te ndite ni ña te jicān tahú ña. <sup>38</sup> Te suni hora un ní quee ña, te ni nacuatáhú ña nuū Yaā Dios. Te ni cahān ña jnúhun sūchi yíquín un jíin táca ñáyuu Jerusalén jeē cáñuhun ni i jeē quée Yaā jnama i.

### Jeē cuanungoo de ñuu Nazaret

<sup>39</sup> Te ni jinu ni casquīcu de tācá jniñu ndácu ley maá Jítóho yō Yaā Dios, te cuanungoo de ñuu de Nazaret, ndañúu Galilea. <sup>40</sup> Te sūchi lúlí un ní jehnu i, te ni ije i, te ni cundíchí gá i. Te ni sáha Yaā Dios jeē váha ndasí jíin i.

### Jeē íne sūchi lúlí Jesús ini templo

<sup>41</sup> Te ndijnahan cuiyā jéngoo tátá i náná i ñuu Jerusalén, jeē cúu vico pas-cua. <sup>42</sup> Te nuū ní cuu uxí uū cuiyā i, te cuangoo tucu de Jerusalén, nájñuhun sáha sáha de quiví víco ún. <sup>43</sup> Te ni yáha vico, te cuanungoo de. Te sūchi lúlí Jesús, ni quendōo i Jerusalén, te tu ní cájini José jíin náná i. <sup>44</sup> Te cájeni ni de jeē cuahán i mēhñu ñáyuu cájica ichi ún. Te ni cajica de iin quiví, te sáá te ni cananducú de i mēhñu táca jnáhan de jíin ñáyuu cájini jnáhan de jíin. <sup>45</sup> Te

tu ní cánanihîn de i. Te ni canandicó de cuango de Jerusalén, cuananducú de i.

<sup>46</sup>Te nuū uní quivî te ni cananihîn de i ini templo, néne i mēhñu tēe cástéén tutu ley Yaā Dios, te jíni nahín i jeē cácahān de te cájnūhún i de síquî jñuhun ún. <sup>47</sup>Te tāca ñáyuū cájini jñuhun cáhán i, cánaa ni cájito jeē váha cájí xínî i te váha nástfó cuñîf i jñuhun. <sup>48</sup>Te nuū ní cajito tátá i náná i nuū i, te ni canaa ni de. Te ni cahān naná i jíni i:

Séhē, ¿naun ni sáha ró súcuan jíni rí? Chi ruhū jíni tátá rō, yōhyo ni canacani ni rí cánanducú rí rohó, achí ña.

<sup>49</sup>Yūcuán na te ni cahān i:

¿Naun cánanducú ní sāña? ¿A tu cájini ni jēe cánuú cocu ná jíni jniñu Tátá na Yaā Dios? Achí i.

<sup>50</sup>Te tu ní cájecūhun ni tátá i náná i jñuhun ni cahān i.

<sup>51</sup>Yūcuán na te cuanuhun i jíni de jíjnáhan de ñuu Nazaret, te ni jendije i nuū de. Te náná i, ni quendōo tāca jñuhun yáha núū jeē níjnūmî ña. <sup>52</sup>Te Jesús ni jehnu ga i, te ni cundíchí gá i, te cúsi ni Yaā Dios jíni i, te suni súcuan tāca ñáyuū.

### Jñuhun Juan tēe scuándute

(Mt. 3.1-12; Mr. 1.1-8; Jn. 1.19-28)

**3** Te ni cuu xahūn cuiyā jeē ndácu Tiberio jniñu níf naciún. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíni Traconite, te Lisaniaš cúu de gobernador Abilinia. <sup>2</sup>Te sutū cujēhnu ga cácuu Anás jíni Caifás. Te ni quee jñuhun Yaā Dios nuū Juan sēhe Zacarías, jeē íne de nuū ñuhun téhé. <sup>3</sup>Te ni jica nuu de tācá ñuu jeē iyó yajni yūte Jordán. Te cáhán de jíni ñáyuū jeē na nácani ni i jeē stóo i cuéchi i te cuandute i, návāha cone cáhnu ni Yaā Dios nuū cuéchi i. <sup>4</sup>Te súcuan ni squícu jñuhun Juan jeē

yosó nuū tútu ni tee Isaías, tēe ni nacani jñuhun Yaā Dios nde jenahán:

Coo ñin tēe cana jee nde nuū ñuhun téhé: Sátūhva ró máá ró jíjnáhan ró, chi quee maá Jítóho yō.

Te sáha ró jniñu ndaā, chi vēji ya.

<sup>5</sup>Te tāca xéhvā na ndúndaā, te tācá yucu jíni loma na ndúnduhvā, te na ndúyóhó ichi yácuá, te na ndúlii ichi ndáyí.

Te ndihî un cúu jeē ndúvāha ndundaā anuá ñayuu nuū yā.

<sup>6</sup>Te ndihî i cuni i jeē jnáma Yaā Dios i. Súcuan cahān Juan, achí tutu.

<sup>7</sup>Te ni quendacoo cuehē ñayuu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chi xeēn rō nájnūhun coō. ¿A cájeni ni rō jeē cuu cunu ró cācu ró núū castigo xeēn jeē quíji? <sup>8</sup>Núu súcuan te sáha ró jniñu váha, te súcuan stéén rō jeē ní nacani ndije ni rō jeē stóo ró cuéchi ró. Te ma cáni ni rō cahān rō jeē cuu cācu ró síquî jeē cácuu ró yúcūn Abraham. Chi cáhán rî jíni ró jeē cuu sáha Yaā Dios jeē tāca yúū yáha nduu sēhe Abraham jeē candíje váha, te núu cúnî yā. <sup>9</sup>Te cácuu ró nájnūhun nundéhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájnūhun je íyó túhva ñin cāa jeē cahnde nde yoho yujnu. Núu súcuan te sáha ya jíni ró nájnūhun jíni táca yujnu jeē tu cúun ndehē váha, jeē tahndé te cayū nuū ñuhún. Achí de.

<sup>10</sup>Te ñayuu un ní cacajñuhún i de:

¿Te ndese sáha ná núu súcuan? Achí i.

<sup>11</sup>Te ni cahān de:

Róhó jēe cánevāha uū sahna, na cuáha ró ñin nuū jeē tu névāha. Te róhó jēe cánevāha jeē yéji, suni súcuan na sáha ró, achí de jíni i.

<sup>12</sup>Te suni jecu tēe cástútú xuhun renta, ni quecoo de jeē cuándute de. Te ni cacajñuhún de Juan:

Maestro, te máá ná, ¿ndese sáha ná jijnáhan ná?

<sup>13</sup> Te ni cahān Juan jín de:

Ma scaá ró cācān rō xūhún, chi máá cūhva-ni jeē ní ndacu jniñu nuū rō, achí de.

<sup>14</sup> Te suni ni cacajñuhún jecu soldado:

Te máá ná, ¿ndese sáha ná jijnáhan ná? áchí de.

Te ni cahān Juan jín de:

Ma quénde rō ndajñiñu ni iin jín jñuhun siúhú ni jín jñuhun stáú yáhu, te cusī ni rō jín yáhu ró, áchí de.

<sup>15</sup> Te tāca ñayuu cándetu i jeē quiji Cristo, Yaā jeē tají Yaā Dios, te cájeni ni i jeē sanaa te suu cúu Juan. <sup>16</sup> Te ni cahān Juan jín i jijnáhan i:

Ruhū chi jín ndute scuándute ri rohó. Te vēji iin Yaā jeē nájñuhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñuhun ñuhūn. Te cújéhu ndasí yá, chi tú na vé jéhu cuiti cúu ri nuū yā, ni jeē cuajniñu ri nuū yā vēsú iin jniñu lúli gá nájñuhun jeē ndají rí vēsú correa ndi-jēn yā. <sup>17</sup> Te sáha ya nájñuhun sáha tēe scánda trigo, chi sásin ya ñayuu vāha jín ñayuu cunéé, nájñuhun cúndoo trigo jeē quénda sīn paja. Te nastútú yá trigo yā ndīvi ini yacā yā. Te paja chi jnaa yā nuū ñuhún jeē ma ndahvá cuiti. Achí Juan.

<sup>18</sup> Te súcuan te jín cuéhē gā jñuhun ni stihví ni de ñayuu un, ní nacani de jñuhun vāha Yaā Dios nuū i. <sup>19</sup> Te suni ni cahān xeēn de nuū Herodes, tēe cúu gobernador, chi tēe un ní nacueca de Herodías, ñasihí ñani de Felipe. Te cuehē gā jniñu néé súcuan ni sáha Herodes. <sup>20</sup> Te sa víhyá gā ni sáha de jeē neé gá, chi ni chune de Juan vecāa.

### Jeē ní jendute Jesús

(Mt. 3.13-17; Mr. 1.9-11)

<sup>21</sup> Te nde ná tu quívi Juan vecāa, ná ni ine de ni scuándute de tāca ñayuu,

te suni ni scuándute de Jesús. Te jícán tahu yā, te ni nune-ni andívi. <sup>22</sup> Te ni cuun Espíritu Santo ni quee xinī yā, te cáa nájñuhun iin paloma. Te ichi ándívi ní cahān iin jñuhun:

Máá ró cúu Sēhe ri jeē maní ndasí rí jín, te yōhyo cúsi ni rí jín ró, achí.

### Lista ñayuu yucūn ní quiji Jesucristo

(Mt. 1.1-17)

<sup>23</sup> Te ná ni quejéé Jesús steén yā jñuhun, te íyó yá nájñuhun ocō uxī cuiyā. Te cájeni ni ñayuu jeē séhe José cúu ya. Te José ni cuu séhe Elí, <sup>24</sup> te Elí ni cuu séhe Matat, te Matat ni cuu séhe Leví, te Leví ni cuu séhe Melqui, te Melqui ni cuu séhe Jana, te Jana ni cuu séhe José, <sup>25</sup> te José ni cuu séhe Matatías, te Matatías ni cuu séhe Amós, te Amós ni cuu séhe Nahum, te Nahum ni cuu séhe Esli, te Esli ni cuu séhe Nagai, <sup>26</sup> te Nagai ni cuu séhe Maat, te Maat ni cuu séhe Matatías, te Matatías ni cuu séhe Semei, te Semei ni cuu séhe José te José ni cuu séhe Judá, <sup>27</sup> te Judá ni cuu séhe Joana, te Joana ni cuu séhe Resa, te Resa ni cuu séhe Zorobabel, te Zorobabel ni cuu séhe Salatiel, te Salatiel ni cuu séhe Neri, <sup>28</sup> te Neri ni cuu séhe Melqui, te Melqui ni cuu séhe Adi, te Adi ni cuu séhe Cosam, te Cosam ni cuu séhe Elmodam, te Elmodam ni cuu séhe Er, <sup>29</sup> te Er ni cuu séhe Josué, te Josué ni cuu séhe Eliezer, te Eliezer ni cuu séhe Jorim, te Jorim ni cuu séhe Matat, <sup>30</sup> te Matat ni cuu séhe Leví, te Leví ni cuu séhe Simeón, te Simeón ni cuu séhe Judá, te Judá ni cuu séhe José, te José ni cuu séhe Jonán, te Jonán ni cuu séhe Eliaquim, <sup>31</sup> te Eliaquim ni cuu séhe Melea, te Melea ni cuu séhe Mainán, te Mainán ni cuu séhe Matata, te Matata ni cuu séhe Natán, <sup>32</sup> te Natán ni cuu séhe David, te David ni cuu séhe Isaí, te Isaí ni cuu séhe Obed, te Obed ni cuu séhe Booz, te Booz ni cuu séhe Salmón, te Salmón

ni cuu sēhe Naasón, <sup>33</sup> te Naasón ni cuu sēhe Aminadab, te Aminadab ni cuu sēhe Aram, te Aram ni cuu sēhe Esrom, te Esrom ni cuu sēhe Fares, te Fares ni cuu sēhe Judá, <sup>34</sup> te Judá ni cuu sēhe Jacob, te Jacob ni cuu sēhe Isaac, te Isaac ni cuu sēhe Abraham, te Abraham ni cuu sēhe Taré, te Taré ni cuu sēhe Nacor, <sup>35</sup> te Nacor ni cuu sēhe Serug, te Serug ni cuu sēhe Ragau, te Ragau ni cuu sēhe Peleg, te Peleg ni cuu sēhe Heber, te Heber ni cuu sēhe Sala, <sup>36</sup> te Sala ni cuu sēhe Cainán, te Cainán ni cuu sēhe Arfaxad, te Arfaxad ni cuu sēhe Sem, te Sem ni cuu sēhe Noé, te Noé ni cuu sēhe Lamec, <sup>37</sup> te Lamec ni cuu sēhe Matusalén, te Matusalén ni cuu sēhe Enoc, te Enoc ni cuu sēhe Jared, te Jared ni cuu sēhe Mahalaleel, te Mahalaleel ni cuu sēhe Cainán, <sup>38</sup> te Cainán ni cuu sēhe Enós, te Enós ni cuu sēhe Set, te Set ni cuu sēhe Adán, te Adán ni cuu sēhe Yaā Dios, chi ni sáha ya de.

### Jeē ní jito ndee jexeén Jesús

(Mt. 4.1-11; Mr. 1.12-13)

**4** Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū yā nde nuū nūhun téhé ní sáha Espíritu Santo. <sup>2</sup> Te ni ine ya yūcuan úu xico quivī, te ni jito ndee jexeén yā, chi cúní jeē sáha ya cuēchi. Te tāca quivī ún tu ní yéji cuiti yā, te ná ni yāha quivī ún, te jí yā sōco. <sup>3</sup> Yūcuán na te ni cahān jexeén un jíin yá:

Núu máá ró cúu Sēhe Yaā Dios, te cahān rō jeē yuū yáha na ndúu staā caji rō, achí.

<sup>4</sup> Te ni cahān Jesús jíin:

Tuú chi yósó núu tútu ii: Nasūu máni máá jíin stāā cátecu ñayuu, chi suni jíin tāca jnūhun cáhán Yaā Dios, achí yá.

<sup>5</sup> Yūcuán na te cuahān jexeén un jíin yá nde xinī iin yucu súcún, te iin núnúu-ni ni steén nuū yā tācá nación níí cáhnu ñayiví. <sup>6</sup> Te ni cahān jíin yá:

Nuū maá ró cuāha ri jeē kujéhnu ró núu ndivii nación yáha, chi yōhyo luu cáa. Chi máá rí jnāi ndihi, te cuu cuāha ri nuū ndé iin cúní rí. <sup>7</sup> Núu súcuan te núu cuiñi yítí ró chiñúhún ró ruhū, te cuāha ndihi ri nuū rō. Achí jexeén.

<sup>8</sup> Te ni cahān Jesús jíin:

Satanás, cujiyo quihin rō, chi yósó núu tútu jeē chiñúhún ñayuu maá Jítóho i Yaā Dios, te nuū maā-ni ya cuajniñu i. Achí yá.

<sup>9</sup> Yūcuán na te cuahān jexeén un jíin yá nde ñuu Jerusalén. Te ni jeni ya xiní torre templo. Te ni cahān jíin yá:

Te núu Sēhe Yaā Dios cúu ró, te sín-gava ró máá ró nde nuū nūhun, chi jnama ya rohó. <sup>10</sup> Chi yósó núu tútu: Tejniñu ya ndajéhé yā quijicoo coto rōhó.

<sup>11</sup> Te cunundee yā rohó jíināhan ya, návāha ma cáchihi ró jéhē rō nuū yuú. Achí tutu. Achí jexeén.

<sup>12</sup> Te ni cahān Jesús:

Tuú chi suni yósó núu tútu jeē ma cóto ndee ñayuu Jítóho i Yaā Dios, núu jnama ya i chí tuú, achí yá.

<sup>13</sup> Te tuá ni níhín jexeén modo coto ndee Jesús quivī ún, te ni cujiyo cuahān jecu-ni tiempo.

### Jeē ní quejéé Jesús nácani ya jnūhun región Galilea

(Mt. 4.12-17; Mr. 1.14-15)

<sup>14</sup> Te ni cunuú fuerza Espíritu Santo ini Jesús, te cuanuhun yā Galilea. Te níí región yajni yūcuan ní jitē núu jnūhun ya. <sup>15</sup> Te ni steén yā jnūhun ini tācá vehe ii sinagoga, te ndihi ñayuu ni cajejnūhún i ya.

### Jeē cuánuhun yā ñuu Nazaret

(Mt. 13.53-58; Mr. 6.1-6)

<sup>16</sup> Te ni najinū yā ñuu Nazaret nuū ní jehnu ya. Te quivī ndétátú ni quivī ya ini vehe ii sinagoga, nájnūhun sáha sáha ya. Te ni ndocuñi yā jeē cahu ya tutu ii.

<sup>17</sup> Te ni cajēhe de tutu ni tee Isaías, tēe ni nacani jnūhun Yaā Dios nde jenahán. Te ni nune ya tutu ún, te ni nanihin yā nuū yosó jnūhun ni cahu ya:

<sup>18</sup> Espíritu maá Jítóho yō Yaā Dios iyó yá jíin rí,

chi ni tejníñu ya ruhū jeē nácani ri jnūhun vāha nuū ñayuu ndahú.

Te ni tají yá ruhū vēji ri jíin jnūhun jeē ndúvāha ni ñayuu cácuclíhyá ni.

Te castūhun rí nuū ñayuu cáyihí ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ni,

te jnama ri ñayuu jeē cándoho i sáha jnáhan i.

<sup>19</sup> Te nacani ri jnūhun jeē ní quee tiempo jeē sáha Jítóho yō Yaā Dios jeē vāha ñayuu.

Achí tutu ni cahu ya.

<sup>20</sup> Te ni nacasi yā tutu ún, te ni nacuāha ya nuū tēe jéjníñu ini sinagoga, te ni nucōo ya jeē steén yā jnūhun nuū ñayuu cáhiin ini sinagoga. Te tācá i cájito vāha i nuū yā. <sup>21</sup> Te ni quejéé yá cahán yā jíin i:

Vijna te ni squícu jnūhun cáhán tutu i i yāha ní cajini sōho ró, áchí yá.

<sup>22</sup> Te ndivii i ni cacahán jeē vāha tēe cúu ya, te cánaa ni i jeē ní cajini i tāca jnūhun luu ni cahán yā. Te ni caca-jnūhun jnáhan i:

¿A násūu séhe José cúu tēe yáha?

<sup>23</sup> Te ni cahán yā jíin i:

Jíní vāha ri jeē cájeni ni rō cahán rō jnūhun yátá yáha jíin rí: Tēe tájné, sátájné ró maá ró núu súcuan. Te jnūhun yáha cúní cahán jeē nájjnūhun ni nasávāha ri cuehē ñayuu cácuclí ini ñuu Capernaum ni canihín rō jnūhun, suni súcuan na sáha ri ñuu yō yāhá návāha candíje ró cájeni ni rō. Achí yá jíin i.

<sup>24</sup> Te ni cahán gā yā:

Jendaá cahán rí jíin ró, ni iin tēe nácani jnūhun Yaā Dios, tu cájetáhú ñayuu ñuu maá de nuū de. <sup>25</sup> Te suni jendaá

cahán rí jíin ró jeē ni íyo cuehē ñahan ní ndóo ndáhú ini nación yō Israel, tiempo ni cotecu Elías, tēe ni nacani jnūhun Yaā Dios. Te tiempo un tu ní cúun cuítí saū uní cuiyā yosáva, te ni íyo iin jnamā xeēn ní cáhnu nación. <sup>26</sup> Te tu ní tájí Yaā Dios Elías quihín de nuū ni iin ñahan viuda nación yō Israel, chi nuū máá iin-ni ñahan viuda jeē ndeé ñuu Sarepta ndańúú Sidón, ni jehēn de ni jito de jeē ní yeji ña. <sup>27</sup> Te ini nación yō Israel suni ni iyo cuehē tēe ni candoho cuehyí stehyú, tiempo jeē ní cotecu Eliseo, tēe ni nacani jnūhun Yaā Dios. Te ni iin de tu ní cándíje jeē ndúvāha de sáha Eliseo, chi sa suhva máńúhún-ni Naamán, tēe nación Siria ni nduvāha. Achí yá.

<sup>28</sup> Yūcuán na te tāca ñayuu cáhiin ini sinagoga, yōhyo ni caquítí ni i jnūhun ní cahán yā. <sup>29</sup> Te ni candocuiñí i, te ni caquenehen i ya yatā ñúú ún, cuahán i jíin yá xini yúcu íne ñuu ún, chi cácuni i chundahá i ya ñinga ya cava ún. <sup>30</sup> Te tu ní cúu sáha i, chi ni yāha-ni ya mēhúú i cuahán yā.

### Jeē ní quenehen ya tachí ini iin tēe

(Mr. 1.21-28)

<sup>31</sup> Yūcuán na te cuahán Jesús ñuu Capernaum región Galilea. Te quiví ndétātu ní steén yā jnūhun nuū ñayuu. <sup>32</sup> Te ni canaa ni i cájini i jnūhun steén yā. Chi ni steén vāha ya nuū i, chi jíní vāha máá yá.

<sup>33</sup> Te ini vehe sinagoga un íne iin tēe jeē ñúhun tachí xeén ini de. Te tēe un ní cana cóhó de:

<sup>34</sup> Cuijiyo ní. ¿Naun vēji ní núu na jíjnáhan ná, Jesús ñuu Nazaret? ¿A véji ní jéē snáa ni sáña, chí naún? Je jíiní na ndé iin cúu ní, chi Séhe ií Yaā Dios cúu ní. Achí de.

<sup>35</sup> Te Jesús ni cahán xeēn yā nuū tachí ún:

Casi yuhu ró te quenda ró ini tēe yáha, áchí yá.

Te ni cotúú-ni tēe un núú tāca ñayuu, ni sāha tachī ún. Te ni quenda ini de cuahān, te tú na vé ni sāha ga jíin de. <sup>36</sup>Te ndíhi ñayuu un ní cayūhú i, te ni cacahān i jíin jnāhan i:

¿Na jnūhun cúu yāha jēē ní cuu súcuan? Chi cújéhnu tēe yāha jēē ndácu nihin de jniñu nuū tachí, te quéndacoo-ni, áchí i.

<sup>37</sup>Te jnūhun ya ni jitē núu cuahān níí cáhnu región yūcuán.

**Jeē ní nasávāha ya naná  
chisó Simón Pedro**

(Mt. 8.14-15; Mr. 1.29-31)

<sup>38</sup>Yūcuán na te ni quenda Jesús ini vehe íi sinagoga, te cuahān yā te ni jinū yā vehe Simón. Te naná chisó Simón, yíhi xeēn quiji ña, te ni cacahān ndahú de jíin yá jehē ña. <sup>39</sup>Te ni jita ndeyi ya nuū ña, te ni cahān yā jēē na ndíco quiji ún. Te ni nduvāha-ni ña. Te ni ndocuiñi-ni ña, te ni sāha ña jēē ní yeji yā jíin de.

**Jeē ní nasávāha ya cuehē ñayuu**

(Mt. 8.16-17; Mr. 1.32-34)

<sup>40</sup>Te jēē ni quée niāndii, te tāca ñayuu jēē iyó jnāhan i cácuñu ndinuū cuehyi, ni caquindeca i jnāhan i un núú yā. Te ni soó yá ndaha ya siquī ñi ñi i, te súcuan ni nasávāha ya i. <sup>41</sup>Te suni cuehē ñayuu ni quendacoo tachī ini i, te cácana cóhó táchí ún:

Maá ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jnūhun jēē cahán gā súcuan, chi cájini jēē maá yá cúu Cristo, Yaā ní tají Yaā Dios.

**Jeē ní nacani ya  
jnūhun región Galilea**

(Mr. 1.35-39)

<sup>42</sup>Te nuū ní cundijin, te ni quenda ya cuahān sín ya yatá ñúú nuū tú ñayuu. Te tāca ñayuu cánanducú i ya, te ni jinūcoo

i nuū íne ya. Te cástétu i ya jēē tú cujiyo ya nuū i. <sup>43</sup>Te ni cahān yā jíin i:

Suni cánuú jēē nacani ri jnūhun vāha nuū tāca gā ñuu siquī ndese ndácu Yaā Dios jniñu, chi jēē yúcuan ní tají yá ruhú vēji ri. Achí yá.

<sup>44</sup>Te ni jica cuu ya níí región Galilea, nácani ya jnūhun ini táca vehe íi sinagoga.

**Jeē ní canihin de cuehē  
chācá ni sāha ya**

(Mt. 4.18-22; Mr. 1.16-20)

**5** Te ñiñ quivī te íne Jesús yumar Gensaret. Te ni quecoo cuehē ñayuu, te ni chitú nihin i nuū yā, chi cácuñi i cuni nahín i jnūhun Yaā Dios. <sup>2</sup>Te ni jito ya jēē yúcu uū barco yajni yumar. Te tēe cájniñ chācá, je ni quendacoo de ini barco, te cánacate de ñunu de. <sup>3</sup>Te ni quivī ya ini ñiñ barco jēē cúu barco Simón. Te ni cahān yā jíin de jēē na scáca yátá de quihín jecu gā nuū ndúte. Te ni cucōo ya, te nde ini barco un ní steén yā jnūhun nuū ñayuu cuehē jēē yúcu i yundúte un. <sup>4</sup>Te nuū ni jínu ni steén yā, te ni cahān yā jíin Simón:

Scáca ró barco na quihín yō nde nuū iyó cúnú ndute, te sínga ró ñunu ró jniñ ró chāca, áchí yá.

<sup>5</sup>Te ni cahān Simón:

Maestro, níí niñu ni casínga ná ñunu jēē jniñ ná tí, te tu ní níhín cuítí ná ni ñiñ tí. Te jēē cahán maá ní súcuan, te na sínga tucu ná ñunu, áchí de.

<sup>6</sup>Te ni casínga de, te ni quivícoo cuehē ndasí chāca, nde nducú táhndē ñunu de. <sup>7</sup>Te ni cacaja ndahá de nuū jnāhan de cáhiin ini inga barco, na quíjicoo chindéé ñájnāhan jíin de. Te ni quecoo de, te ni cascútú ndíi de tí ndíndúú barco, te nde je yajni quée barco. <sup>8</sup>Te ni jito Simón Pedro jēē súcuan ni cuu. Te ni jecuiñi yití de nuū Jesús, te ni cahān de:

Cujiyo ní núū ná, chi tēe iyó cuéchi cúu ná, áchí de.

<sup>9</sup> Chi máá de jíin táca tēe cáhiin jíin de, ni cayūhú de jeē ní canihin de cuehē chácá un ní sáha ya. <sup>10</sup> Te suni ni cayūhú Jacobo jíin Juan, ndindúú séhe Zebedeo, chi tēe chindéé nájnanhan jíin Simón cácuu de. Te ni cahān Jesús jíin Simón:

Ma yūhu ró, chi nde vijna te sáha ri jeē nihin rō cuehē ñayuu candíje ruhū, nájñuhun ni nihin rō cuehē chácá. Achí yá.

<sup>11</sup> Yūcuán na te nuū ni jínūcoo de jíin barco nuū ñúhun íchi, te ni castóo de ndíhi ndajnínū de, te ni candiquin de ya cuangoo de.

**Jeē ní nasávāha ya iin tēe ndóho cuehyī stehyú**

(Mt. 8.1-4; Mr. 1.40-45)

<sup>12</sup> Yūcuán na te íne Jesús ini iin ñuu, te ni quee iin tēe ndóho cuehyī stehyú. Te ni jito de nuū Jesús, te ni jecuiñi yití de ni jequín de nuū de nde nuū ñúhun, te ni cahān ndahú de jíin yá:

Jíní na jēe cuu sáha ní jēe nduvāha ná, te núu cúní ní, áchí de.

<sup>13</sup> Yūcuán na te ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un.

<sup>14</sup> Te ni ndacu ya jniñu nuū de jeē ma cáchi cuiti de nuū ní iin. Te áchí yá:

Quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájñuhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

<sup>15</sup> Te víhyá gā ni jitē núu jñuhun ya cuahān. Te ni cataca cuehē ñayuu jeē cúni nahín i jñuhun stéén yā, jíin jēe nasávāha ya i nuū tāca cuéhyī cándoho i. <sup>16</sup> Te máá yá cuahān síin ya nuū tú ñayuu, te ni jicān tahú yā.

**Jeē ní nasávāha ya iin tēe ndóho cuehyī ni íjin**

(Mt. 9.1-8; Mr. 2.1-12)

<sup>17</sup> Te iin quivī te stéén yā jñuhun, te jecu tēe grupo fariseo jíin tēe cástéén tutu ley Yaā Dios, cáyucú de yūcuán. Te tēe un ní quecoo de nuū yā jeē véjicoo de táca ndañúū Galilea, jíin ndañúū Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuu. <sup>18</sup> Yūcuán na te ni quecoo jecu tēe, cándiso de iin tēe ndóho cuehyī ni íjin, cátú de nuū iin camilla. Te cánducú de squíví de tēe ún ini vehe, te caquin de nuū íne ya. <sup>19</sup> Te tu ní canihin de modo quívicoo de jíin tēe un, chi cáyucú chitú ñayuu. Te ni cacao de siquī véhe, te ni canune de teja. Te ni cascúun de tēe cúhú un jíin camilla de nde nuū íne Jesús mēhñu ñayuu. <sup>20</sup> Te ni jini Jesús jeē cá-candíje de jeē cúu nasávāha ya tēe cúhú un. Te ni cahān yā jíin tēe cúhú un:

Róhó, je íne cáhnu ni rī nuū tāca cuéchi ró, áchí yá.

<sup>21</sup> Yūcuán na te tēe cástéén tutu ley Yaā Dios jíin tēe grupo fariseo, ni que-jéé de cájeni ni de siquī yā: ¿Nde iin cúu tēe yáha jēe cahán de jñuhun ndevāha jeē quití ni Yaā Dios? Chi nasūu Yáā Dios cúu de jeē cóne cáhnu ni de nuū cuéchi.

<sup>22</sup> Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri? <sup>23</sup> Jeē uú jñuhun yáha, ¿nde iin yíí gá cáa? ¿A jēe cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yíí gá jeē cahān rī: Ndocuiñi te caca ró, chi je ni nduvāha ró, achi rī? <sup>24</sup> Te vijna te na stéén rī jeē maá rí, Yaā ní nduu tēe, ndíso jniñu ri ini ñayivi yáha jēe cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Cáhán rí jín ró, ndocuiñi te naquihin ró camilla rō, te quinhun rō vehe ró, áchí yá jín de.

<sup>25</sup> Te ni ndocuiñi-ni tēe ún, jito jínúu ñayuu. Te ni naquihin de camilla nuū ni cátu de, de cuanhun de vehe de. Te nácuatáhu de nuū Yaā Dios. <sup>26</sup> Te yōhyo ni canaa ni tāca ñayuu cájito i, te ni cacahān i jeē yōhyo vāha Yaā cúu Yaā Dios. Te suni yōhyo cáyuhú i, te cácahān i:

Vijna te ni cajito yó jniñu jéhu téyí, áchí i.

### Jeē ní cana ya Leví

(Mt. 9.9-13; Mr. 2.13-17)

<sup>27</sup> Yūcuán na te ni quenda ya cuahān yā, te ni jito ya nuū iin tēe stútú xúhun renta, naní de Leví, néne de nuū cutútú xúhun renta. Te ni cahān yā jín de:

Condiquin ruhū na quhín yō.

<sup>28</sup> Te ni ndocuiñi de, te ni stóo de ndiñi ndajniñu de, te cuahān de jín yá.

<sup>29</sup> Yūcuán na te ni sáha Leví iin vico cáhnu vehe de, jeē cúsi ni de jín Jesús. Te cuehē tēe cástútú xúhun renta jín sava ga tēe, cáyucú de mesa cáyeji de staā jín yá. <sup>30</sup> Te tēe grupo fariseo jín tēe cástéen tutu ley Yaā Dios, ni quejé de cácahān de síquī tēe cáscuáha jín yá, te ni cacajnūhún de:

¿Najehē cáyeji rō cájihu ró jín tēe cástútú xúhun renta jín tēe cása ha cuēchi? áchí de.

<sup>31</sup> Te ni cahān Jesús:

Ñayuu cáhiyo vāha, tu jini ñuhún i tēe tájna, chi ñayuu cácu hū cúu jeē jini ñuhún. <sup>32</sup> Te ruhū nasūu jéē véji ri cana ri ñayuu tú cuēchi, jeē cúu i nájnūhun ñayuu cáhiyo vāha. Chi sa suhva véji ri cana ri ñayuu cáhiyo cuēchi, jeē na nácani ni i te stóo i cuēchi i. Achí yá.

### Jeē ní cacajnūhún de ya síquī jeē cóndite ni

(Mt. 9.14-17; Mr. 2.18-22)

<sup>33</sup> Yūcuán na te ni cacahān de jín yá:

Tēe cáscuáha jín Juan, jín tēe cáscuáha jín grupo fariseo, cuehē jínu cáhiyo ndite ni de te cájicān tahu de. Te tēe cáscuáha jín máá ní, ¿naun tu cása ha de súcuan? Chi cáyeji de cájihu de.

<sup>34</sup> Te ni cahān yā jín de:

¿A cuu condite ni de níni jéē iyó rí jín de? ¿A cuu sáha ró jéē condite ni ñayuu cáhiin vico nánda ha, te núu níni néne tēe nánda ha? <sup>35</sup> Te quee quiví jeē cújiyo tēe ni nánda ha, te quiví ún chi condite ni i. Achí yá.

<sup>36</sup> Te suni ni cahān yā uū jnūhun yátá síquī jeē tu quíjnāhan jnūhun jeē jéē steén yā jín táca jnūhun jenahán. Achí yá:

Ni iin ñayuu tu jéhn de i iin pedazo sahma jéé i, te nachuhun i nuū iin sahma túhú i. Chi núu súcuan te stávi i sahma jéé i, te suni tu quíjnāhan jeē jeé un jín jéé tuhú. <sup>37</sup> Te tú ni iin chúhun vino jeé ini ñií túhú. Chi núu súcuan, te vino jeé un ndatá ñií, te naa vino jín ñií. <sup>38</sup> Chi cánuú jéé chúhun vino jeé ini ñií jéé, te súcuan te quéndōo vāha ndindúú. <sup>39</sup> Te ñayuu cájihu vino áva, tu cúní i coho i jeé jeé, chi jeé áva cúu jeé vāha ga, achí i. Achí yá.

### Jeē ní cataxín de yoco trigo quiví ndétátú

(Mt. 12.1-8; Mr. 2.23-28)

**6** Te iin quiví ndétátu ní yāha Jesús cuahān yā mēhñu nuū cáa trigo. Te tēe cáscuáha jín yá ni cataxín de yoco trigo, te ni caquūn de ini ndaha de, te ni cayejí de. <sup>2</sup> Te sava tēe grupo fariseo ni cacajnūhún de:

¿Najehē casáha ró jniñu jeē tu íyó vāha sáha ró quiví ndétátú?

<sup>3</sup> Te ni cahān Jesús jín de:

¿A tu ní cácahu cuítí rō tutu ndese ni sáha David, iin quiví jeē ni jíi de sóco jín tēe cáhiin jín de? <sup>4</sup> Te ni quiví de ini vehe Yaā Dios, te ni quihin de pan íi



jeē yosó ndijin nuū Yaā Dios. Te ni yeji de, te suni ni jēhe de ni cayeji tēe cáhiin jíin de. Te tú na ley jeē cáji ni iin tēe, chi máá-ni sutū cuu caji. Te vēsú súcuan te tú na cuēchi ní iyo siquī de. Achí yá.

<sup>5</sup> Te ni cahān gā yā jíin de:

Ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quivī ndétátú, achí yá.

### Jeē ní nduvāha tēe ni ichi ndaha

(Mt. 12.9-14; Mr. 3.1-6)

<sup>6</sup> Te inga quivī ndétátú, suni ni quivī ya ini vehe iī sinagoga, te ni steén yā jñuhun. Te yūcuan íne iin tēe ni ichi ndaha váha de. <sup>7</sup> Te tēe cástéén tutu ley jíin tēe grupo fariseo, cájito yuhu de ya núu nasávāha ya tēe un quivī ndétátú, návāha nihin de cuēchi siquī yā. <sup>8</sup> Te máá yá je jíin yā ndese cájeni ni de. Te ni cahān yā jíin tēe ni ichi ndaha ún:

Ndocuñī, te condichi rō mēhñu yáha, achí yá.

Te ni ndocuñī de, te ni jecondichi de mēhñú. <sup>9</sup> Yūcuán na te ni cahān yā jíin de jíin de:

Na cájnūhun rí rohó iin jñuhun: ¿Ndese cáhán ley siquī quivī ndétátú? ¿A jēe sáha váha yó, chí sáha neé yó? ¿A jēe nasávāha yó ñayuu je yajni cuu, chí sáha yó jēe cúu i? Achí yá.

<sup>10</sup> Te ndéhé yá nuū de jeē cáyūcú de ní xiin ya. Te ni cahān yā jíin tēe cúhú un:

Scaá ndaha ró.

Te ni scaá de, te ni nduvāha-ni ndaha de. <sup>11</sup> Te yōhyo ni caquitī ni tāca tēe un, te ni quejé de cándajñuhún de siquī Jesús, ndese cahni de ya.

### Jeē ní nacāji ya uxī uū tēe apóstol

(Mt. 10.1-4; Mr. 3.13-19)

<sup>12</sup> Te ni cuu jecu quivī, te ni quenda ya cuacacān tahú yā nde yucu. Te ní niñu ni jicān tahú yā nuū Yaā Dios. <sup>13</sup> Te nuū ní cundijin, te ni cana ya tāca tēe cás-

cuáha jíin yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jñuhun ya. <sup>14</sup> Te yāha cúu shví de jíin de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé, <sup>15</sup> Mateo, Tomás, Jacobo sēhe Alfeo, Simón tēe grupo cananista, <sup>16</sup> Judas ñani Jacobo, jíin Judas Iscariote, tēe jeē ní nastúu de ya.

### Jeē ni steén yā nuū ñayuu cuehē

(Mt. 4.23-25)

<sup>17</sup> Te ni nanuu ya yucu jíin táca tēe un jēe cascuáha jíin yá, te ni jecuñī yā iin nduhvā jíin de. Te cuehē ñayuu ní región Judea jíin ñuu Jerusalén, jíin ñayuu yumar ñuu Tiro jíin ñuu Sidón, ni quecoo i jeē cúni nahín i jñuhun steén yā, jíin jēe ndúvāha i cuehyī cándoho i. <sup>18</sup> Te ñayuu jeē ñuhun tachī ini i, suni ni canduvāha i ni sáha ya. <sup>19</sup> Te ndivii ñayuu cáculi i quehé i ya, chi súcuan ndúvāha i sáha ya jíin poder yā.

### Jñuhun ñayuu yōhyo ndetū jíin ñayuu jeē xeén ndoho

(Mt. 5.1-12)

<sup>20</sup> Te ni ndacoto ya nuū tēe cáscuáha jíin yá un, te ni cahān yā:

Yōhyo ndetū rohó jēe cándoho ndáhú, chí quivī ró ñuu nuū ndácu Yaā Dios jniñu.

<sup>21</sup> Yōhyo ndetū rohó jēe cájii sōco vi-jna, chí quiji quivī jeē ndutú hiji ró.

Yōhyo ndetū rohó jēe cándahyū rō vi-jna, chí quiji quivī jeē cuecú ró.

<sup>22</sup> Yōhyo ndetū rō te núu cáquitī ni ñayuu nuū rō jeē siquī ruhū, Yaā ní nduu tēe, te cáscuáha i rohó, te cácahān neé i nuū rō, te cácahān i jeē ñayuu casáha jniñu neé cácuu ró. <sup>23</sup> Te na cóo siñ ni rō quivī sáha i súcuan, te víhyá gā na cúsiñ ni rō, chí cáhnu téyí coo tahū rō nde andiví. Chi suni súcuan ni casáha

uhū tāca jíí i jíín tée ni canacani jñuhun Yaā Dios nde jenahán.

<sup>24</sup>Te nacā jeē xeēn ndoho róhó ñáyuu cucá, chí vjina-ni cúu jeē cáhiyo sīi ni rō.

<sup>25</sup>Nacā jeē xeēn ndoho róhó ñáyuu jeē vjina cáhiyo vetū chíji ró, chí quiji jeē quivī jeē cuu rō sōco.

’Nacā jeē xeēn ndoho róhó ñáyuu jeē vjina cájecū rō, chí quiji quivī jeē nducuíhyá ni rō te ndahyū rō.

<sup>26</sup>Nacā jeē xeēn ndoho tāca ró núu cájejnúhún ñáyuu rohó, chí suni súcuan ni cajejnúhún jíí i tāca tée ni canacani jñuhun stáhú ndé jenahán.

### **Jñuhun jeē cundáhú ni yō ñayuu cájito uhū yohó**

(Mt. 5.38-48; 7.12)

<sup>27</sup>Te cáhán rī jíín róhó jeē cájini sōho: Cundáhú ni rō ñayuu cájito uhū rohó. Te sáha vāha ró jíín ñáyuu cáquitī ni nuū rō. <sup>28</sup>Te cacān rō jeē váha coo ñayuu cácahān ndevāha síquī rō. Te cacān tahú rō jehē ñáyuu cácahān neé núu rō. <sup>29</sup>Te núu ndé tée cani de iin lado yiqui núu rō, te vāha ga suni cuāha ró inga lado cani de, vēsú jeē nácuāha ró jéé ndútahū de. Te núu ndé tée cúní de quende de ticāchi ró, suni cuāha ró jñuhun jeē na quíhín de jíín ndé camisa rō. <sup>30</sup>Te na-ni ñayuu jicán nuū rō, te cuāha ró núu i. Te ñayuu quíhín ndajníñu ró, ma nándacān rō. <sup>31</sup>Te nájnūhun cáconi rō jeē sáha vāha ñayuu jíín ró, suni súcuan na sáha vāha ró jíín i.

<sup>32</sup>’Chí núu íyó mánī rō jíín máá-ni ñayuu jeē maní jíín ró, ¿te na vé jeē vāha ga sáha ró núu súcuan? Chí nde tēe cásáha cuēchi, suni maní de jíín tēe maní jíín máá de. <sup>33</sup>Te núu sáha vāha ró jíín máá-ni ñayuu jeē casáha vāha jíín ró, ¿te na vé jeē vāha ga sáha ró núu súcuan? Chí nde tēe cásáha cuēchi, suni súcuan cásáha de. <sup>34</sup>Te núu cuāha núu ró núu maá-ni ñayuu jeē nūhūn ni rō nacuāha i nuū rō, ¿te na vé jeē váha ga

sáha ró núu súcuan? Chí nde tēe cásáha cuēchi, suni jéhe núu de nuū tāca gá tēe cásáha cuēchi, návāha nanihín tucu de.

<sup>35</sup>Núu súcuan te cundáhú ni rō ñayuu cájito uhū rohó, te sáha vāha ró jíín i, te cuāha núu ró núu i. Te ma cuāha ró máá síquī jeē cani ni rō jeē suni nacuāha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā cújéhnu téyí. Chí máá yá vāha ni yā jíín ñáyuu tu nácuatáhú núu yā jíín ñáyuu casáha neé. <sup>36</sup>Núu súcuan te cundáhú ni rō ñayuu, nájnūhun máá Tátá rō cundáhú ni yā i.

### **Ma cahán yō siquī cuēchi jnáhan yó**

(Mt. 7.1-5)

<sup>37</sup>’Ma cahán rō siquī cuēchi ñayuu ndese sáha i, návāha suni ma cahán Yaā Dios cuēchi siquī rō jeē casáha ró súcuan. Ma cahán xeēn rō siquī i jeē tú vāha sáha i, návāha suni ma cahán Yaā Dios súcuan siquī rō. Cone cáhnu ni rō nuū i, te suni cone cáhnu ni yā nuū rō. <sup>38</sup>Cuāha ró núu ñáyuu, te suni súcuan cuāha Yaā Dios nuū rō. Chí vāha ndasí cuáha ya nuū rō, nájnūhun jeē chícuāha váha ya, quisi ya, sáníhín ya, te nde scáa ya cuāha ya nuū rō. Chí cūhva jeē cájēhe ró núu ñáyuu, suni cūhva un cuáha ya nuū rō. Achí yá.

<sup>39</sup>Te ni cahán yā iin jñuhun yátá jíín i:

Tēe cástéén jñuhun tú ndaā, cácuu de nájnūhun tēe cuáá. Te iin tēe cuáá, ¿á cuu stéén de ichi nuū inga tēe cuáá? ¿A tú ningava ndindúú de ini xehvā? <sup>40</sup>Iin tēe scuáha, tu cújéhnu de nuū maestro de. Te tēe scuáha ún, núu je ni cutūhva vāha de, te jinū de coo de nájnūhun maestro de.

<sup>41</sup>’Te cuēchi jnáhan ró cúu nájnūhun jeē íne iin yāca lúlí tinūú i. ¿Te naun cásáha ró cuenta jeē súcuan, te tu cásáha ró cuenta cuēchi máá ró jeē cúu nájnūhun jeē íne iin nduhu tinūu máá ró? <sup>42</sup>¿Te naun cácahān rō jíín jnáhan

ró: Condetu, na táva rī yāca íne tinūu ró, te tu cánacani ni rō jeē íne ìin nduhu tinūu máá ró? Tēe stáhú-ni cácuu ró núu súcuan. Xihna gā tinūu máá ró tava rō nduhu, te yūcuán na te cuu condēhe váha ró jēē táva rō yāca tñūu jnāhan ró.

**Jíin jniñu cásáha ñayuu te nácuni yō ndese ñayuu cácuu i**

(Mt. 7.17-20; 12.34-35)

<sup>43</sup> Tu íyó yujnu váha jeē jēhe ndehē neé, te ni tu íyó yujnu neé jēē jēhe ndehē váha. <sup>44</sup> Chi jíin ndéhē jeē jēhe ìin ìin yujnu, te jíní yō núu yujnu váha cúu. Chi tu scóyo yó ndehē higo xiní íñu, ni tu scóyo yó ndehē uva xiní yucú zarza. <sup>45</sup> Te suni súcuan tēe váha, cáhán de jñūhun váha, chi váha ánuá de. Te tēe sáha neé cáhán de jñūhun neé, chi cánéé ánuá de. Chi modo ndese íyó ánuá ñayuu, máni jeē yúcuan cúu jeē cácahān i.

**Siquī uú vehe**

(Mt. 7.24-27)

<sup>46</sup> ¿Najehē cácahān yinūhún ró jíin rí: Jitoho ná, áchí ró, te tu cásquícú ró jniñu ndácu ri? <sup>47</sup> Tāca ñayuu vēji nuū rī te jíní sōho jñūhun cáhán rī te squícú, na stéén rī nuū rō ndese cúu i. <sup>48</sup> Cúu i nájñūhun ìin tēe jeē ní jeni de vehe de, te ni jete cúnú de nde ni nihin de toto, te ni jeni de siquī. Te nuū ní ndaa yūte, te ni chundahá vehe ún, te tu ní cánda cuiti sáha, chi siquī toto íin. <sup>49</sup> Te tāca ñayuu jíní sōho jñūhun cáhán rī, te tu squícú i, cúu i nájñūhun ìin tēe ni jeni de vehe de nuū ñūhun, te tu yítuu jehē. Te nuū ní ndaa yūte, te ni chundahá vehe ún, te ni cotúu-ni, te ni naa ìi-ni. Achí yá jíin i jíjnāhan i.

**Jeē ní nasávāha ya mozo capitán**

(Mt. 8.5-13)

**7** Te nuū ni jíinu ni cahān yā ni cajini nahín ñayuu ún, te cuahān yā ñuu

Capernaum. <sup>2</sup> Te ìin tēe nación Roma jeē cúu capitán, íyó ìin mozo de jeē maní ndasí de jíin. Te mozo un cūhú i te je yajni cuu i. <sup>3</sup> Te ni jini capitán jñūhun Jesús. Te ni tají de jecu tēe jénu cándacu jniñu nuū ñayuu hebreo, cuangoo de nuū yā jeē cahán ndahú de jíin yá jeē na quíji ya sávāha ya mozo de. <sup>4</sup> Te ni jinūcoo tēe un núu Jesús, te ni cacahān ndahú ndasí de jíin yá:

Chindéé ñáhán ní tēe cúu capitán, chi tēe váha cúu de. <sup>5</sup> Chi maní de jíin nación yō, te máá de ni ndacu jniñu ni cuvāha ìin vehe sinagoga cuu yó. Achí de.

<sup>6</sup> Yūcuán na te cuahān Jesús jíin de jíjnāhan de. Te nuū ní cuyajni ya vehe capitán, te ni tají de jecu amigo de cuaj-nahan yā. Te ni cacahān de jíin yá:

Achí capitán jeē tu cúní de sájñénu de níhín, chi tu cújénu de jeē quihín ni quívi ní vehe de. <sup>7</sup> Jeē yúcuan tu ní sájénu de máá de jeē quíji de nuū ní, áchí de. Te máá jēē cahán-ni ní, te na ndúvāha-ni mozo de, áchí de. <sup>8</sup> Chi máá de suni ndíso jniñu de ni casáha tēe cácu-jénu ga. Te cújénu de nuū táca soldado de, áchí de. Te núu cáhán de jíin ìin tēe jeē na quihín de, te cuahān de. Te núu cáhán de jíin inga tēe jeē na quíji de, te quíji de. Te núu ndácu de ìin jniñu nuū mozo de, te sáha i, áchí de. Achí táca tēe un jíin yá.

<sup>9</sup> Te jeē ní jini Jesús jñūhun yáha, te ni naa ni yā. Te ni ndió cóto ya ni cahān yā jíin ñayuu cuehē cándiquin yatā yā:

Jendaá cahán rī jíin ró jeē ni nación yō Israel tu ní níhín rī ni ìin ñayuu candíje nihin súcuan, nájñūhun cándíje tēe ún, vésú tēe nación tu jíní jñūhun Yaā Dios cúu de. Achí yá.

<sup>10</sup> Te tēe ni tají capitán nuū yā, ni najinūcoo de vehe, te ni cajito de jeē jé ni nduvāha mozo un.

### Jeē ní nastécu yā sēhe yíi ñahan viuda

<sup>11</sup> Yūcuán na te cuahān yā iin ñuu naní Naín. Te tēe cáscuáha jíin yá, jíin ñáyuu cuehē, suni cuango i jíin yá. <sup>12</sup> Te ná ni cuyajni ya yuñúú ún, te yūcuan ní quendacoo ñayuu jeē quíchindūji i iin tēe suchí jēē ni jīhī. Te máñúhún-ni i nuū naná i, te ñahan viuda cúu ña. Te cuehē ñayuu ñuu un véjicoo jíin ña. <sup>13</sup> Te ná ni jito máá Jítoho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, áchí yá.

<sup>14</sup> Yūcuán na te ni jinū yā nde nuū ndíyí ún, te ni jnií ya jejnū, te ni cajecuiñī tēe cándiso ún. Te ni cahān yā jíin sūchi ní jīhī:

Cáhán rī jíin ró, ndocuiñī, achí yá.

<sup>15</sup> Yūcuán na te ni nucōo sūchi ní jīhī ún, te ni quejéé i nácahān i. Te ni nacuāha ya i nuū naná i. <sup>16</sup> Te ndívii ñayuu ni cayūhú i jeē ní cajito i, te ni cacahān i jeē yóhoyo vāha Yaā cúu Yaā Dios. Te cacahān i:

Mēhñu yó ni quee iin tēe cújēhnu nácani jñūhun Yaā Dios.

Te suni cacahān i:

Máá Yaā Dios ni quejéé yá chindéé ñáhnán yá ñayuu yā. Achí i.

<sup>17</sup> Te ni jītē núu jñūhun ya níí cáhnu región Judea jíin táca región yajni yūcuán.

### Jeē ní tají Juan uū tēe nuū yā

(Mt. 11.2-19)

<sup>18</sup> Te íne Juan vecāa, te tēe cáscuáha jíin de ni cacastūhun núu de jeē súcuan ni cuu tācá jniñu yáha. <sup>19</sup> Te ni cana Juan uū tēe ún, te ni tají de cuango nuū Jesús, návāha cajñūhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasūu yá cúu te condetu de inga. <sup>20</sup> Te ni jinūcoo tēe un núú yā, te ni cacahān de:

Juan tēe scuándute ni tají de sāña véjicoo ná cajñūhun ná nihín núu máá ní

cúu Cristo jeē achí tutu jeē quíji, chí condetu yó inga tēe quíji. Achí de.

<sup>21</sup> Te máá hora un ní nasávāha ya cuehē ñayuu cácuñū, jíin ñáyuu cándoho cuehyī xeēn, jíin ñáyuu ñūhun tachí ini. Te suni cuehē ñayuu cuaá ní ndundijin tinūú i ni sáha ya. <sup>22</sup> Te ni cahān yā jíin de:

Cuango te castūhun ró nuū Juan tācá jniñu ni cajito ró jíin jñūhun ni cajini ró. Te cachi ró nuū de jeē ñáyuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jñūhun nuū ñáyuu ndahú jēē jnama Yaā Dios i. <sup>23</sup> Te yóhoyo ndetú tēe jeē ma nácani yátá ni de jeē ruhū cúu Cristo. Súcuan cachi ró nuū Juan. Achí yá jíin de.

<sup>24</sup> Te ná cuanuhun ndindúú tēe ún, te ni quejéé Jesús cahān yā jñūhun Juan jíin ñáyuu:

¿Na vé ni jécondēhe ró jijnáhan ró ndé nuū ñūhun téhé? ¿A iin tēe jéni iin jéni uū ni, nájnūhun ite jeē cánda sáha tachí? <sup>25</sup> Te núu tuú, ¿te na vé ni jécondēhe ró núu súcuan? ¿A iin tēe cúni cújēhnu jeē ñūhun sahma lúu? Tuú chí cájini ró jeē tēe cáñuhun sahma lúu te cánducú táca jēē cúsihī ni, máni ini vehe rey cáyūcú de. <sup>26</sup> ¿Te na vé ni jécondēhe ró núu súcuan? ¿A iin tēe nácani jñūhun Yaā Dios? Cáhán rī jíin ró jeē suu ni jecondēhe ró. Te cújēhnu ga Juan yáha vēsú táca gá tēe ni canacani jñūhun Yaā Dios. <sup>27</sup> Chí jñūhun Juan cúu jeē ni cahān Yaā Dios jeē yosó núu tútu i:

Tají rí tēe nacani jñūhun ri cosnūú de ichi núú Cristo,

návāha coo tūhva ñayuu jeē jinú yā.

Achí Yaā Dios, achí tutu. <sup>28</sup> Te cáhán rī jíin ró jeē ini ñayiví yáha cújēhnu ga Juan tēe scuándute vēsú táca gá tēe jeē ni íyo ini ñayiví. Te vēsú súcuan te táca

tée núu ga ini ñuu nuū ndácu Yaā Dios jniñu, cújehnu ga de vésu Juan. Achí yá.

<sup>29</sup> Te táca ñáyuu jíin táca tée cástútú xúhun renta, ni cajini i jñuhun cáhán yā, te ni cajetáhú i jeē Yaā ndaā cúu Yaā Dios, chi je ni cajendute i nuū Juan. <sup>30</sup> Te tée grupo fariseo jíin tée cástéén tutu ley, ni casquéhichí de jñuhun jeē cuní Yaā Dios sáha ya jeē váha de, chi tu ní cájendute de nuū Juan. <sup>31</sup> Te ni cahān gā maá Jítóho yō:

Yáhá cachi rī ñin jñuhun yátá návāha na cúni rō ndese cúu ñayuu tiempo vijna.

<sup>32</sup> Cúu i nájñuhun sūchi lúlí cáhiin nuū yáhu cácasíquí i. Te cácana ndee i xiní jñahan i: Ni cativi rī scuilí, te tu ní cájita jéhe ró. Te ni cajita ri yaa jeē cuihyá jíta, te tu ní cándahyū rō, achí i. Te nájñuhun cándāa sūchi lúlí un jéē tu ní nújñahan ni i ni ñin, suni súcuan cándāa ró. <sup>33</sup> Chi ni quiji Juan tée scuándute, te cuehē jínu ni iyo ndite ni de, tu ní yéji de staā ni tu ní jíhi de vino. Te tu ní cánujñahan ni rō, chi ni cacahān rō jeē ñuhun tachí ini de. <sup>34</sup> Yūcuán na te ni quee máá rí, Yaā ní nduu tée, te yéji rī jíhi ri, te tu cánujñahan ni rō, te chísoó jñuhun ró cácahān rō jeē máni máá jéē yéji rī jíhi ri vino. Te quíjñahan ri jíin tée cástútú xúhun renta jíin táca gá tée casáha cuēchi, áchí ró. <sup>35</sup> Te núu cúndíchí ñin tée jíin jñuhun Yaā Dios, te jíin jniñu sáha de te cájini táca gá tée ndíchí jeē ndichí de. Achí yá.

### Jeē íne Jesús vehe Simón tée fariseo

<sup>36</sup> Te ñin tée fariseo ni cana de Jesús jeē cáji yā staā jíin de. Te ni jinū yā vehe de, te ni cucōo ya mesa jeē cáji yā staā. <sup>37</sup> Yūcuán na te ñin ñahan sáha cuēchi, ndéé ña ñuu yúcuan, te ni jini ña jeē ni jíin Jesús vehe tée fariseo un, yéji yā staā. Te ni quee ña jíin ñin frasco yuū luu jeē ñuhun chítú aceite perfume. <sup>38</sup> Te ñin yítí ña nuū jehé yā, te ndáhyú ña. Te ni quejéé ña stáji ña jehē yā jíin ndute tñnúú ña, te ni nasíchí ña jíin ixi xíní ña. Te ni

techūhú ña jehē yā, te ni chuhun ña perfume un. <sup>39</sup> Te tée fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tée nácani jñuhun Yaā Dios cúu tée yáha, te cuni de ndese ñahan cúu ñahan yáha jeē quehé ña de, chí ñahan sáha cuēchi cúu ña, jéni ni de. <sup>40</sup> Yūcuán na te ni cahān Jesús jíin de:

Simón, cúni rī cahān rī jíin ró ñin jñuhun.

Te ni cahān maá de:

Cahān ní, Maestro.

<sup>41</sup> Te ni cahān Jesús:

Ñin tée jéhe núu xúhún, ni iyo uū tée táú nuū de. ñin de ni cotaū uhūn ciento denario, te ñinga de ni cotaū uū xico uxí denario. <sup>42</sup> Te tú na vé cánevāha tée un jéē náchunaa de. Te tée jéhe núu xúhun ní ine cáhnu ni de nuū ndindúú tée ún. Núu súcuan te cachi rō: Jeē ndindúú tée ún, ¿ndé ñin de coo maní gā jíin de? Achí yá.

<sup>43</sup> Te ni cahān Simón:

Jéni ni na jéē tée ni cotaū cuehē gā, achí de.

Te ni cahān yā jíin de:

Ndaā cahán rō, achí yá.

<sup>44</sup> Te jíto ya nuū ñahan ún, te ni cahān gā yā jíin Simón:

¿A jíto ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehē rī nájñuhun íyó costumbre. Te ñahan yáha ní stáji ña jehē rī jíin ndute tñnúú ña, te ni nasíchí ña jíin ixi xíní ña. <sup>45</sup> Te tu ní téchūhu ró ruhū nájñuhun íyó costumbre. Te ñahan yáha, nde jeē ni quívi ri vehe ró, tu jécuiñí ña jeē téchūhú ña jehē rī. <sup>46</sup> Te tu ní chūhun ró aceite xini rī nájñuhun íyó costumbre. Te ñahan yáha ní chuhun ña aceite perfume jehē rī. <sup>47</sup> Núu súcuan te cáhán rī jíin ró jeē ni stéén ña jeē yóhyo maní ña jíin rí siquí jeē íne cáhnu ni rī nuū táca cuēchi ña, vésu cuehē cúu. Te núu cone cáhnu ni rī nuū ñin ñayuu íyó jecu-ni

cuēchi, te jecu-ni stéén i jeē maní i jíín rí, achí yá.

<sup>48</sup> Te ni cahān yā jíín ña:

Je íne cáhnu ni rí nuū tāca cuēchi ró, achí yá.

<sup>49</sup> Yūcuán na te ñayuu cáyeji staā jíín yá, ni quejéé i cácahān maá i:

¿Ndé ñin ga cúu tēe yáha jéé cahān jeē íne cáhnu ni nuū cuēchi? achí i.

<sup>50</sup> Te Jesús ni cahān gā yā jíín ñahan ún:

Ni candíje ró rúhū, te jeē yúcuan ní jnama ri rohó. Cuáhán te na ndúsii ni rō. Achí yá.

### Jnūhun ñahan ní cajejnīnu nuū yā

**8** Yūcuán na te ni cuu jecu quivī, te ni jica cuu Jesús tācá ñuu náhnu jíín ñuu lulí. Te nácani ya jnūhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jíín yá. <sup>2</sup> Te sumi íyó jecu ñahan cájica jíín yá, jeē ní quenehen ya tachí ini sava ña, te ni nasávāha ya sava ña jeē cándoho cuehyī. Te ñin ña cúu María ñuu Magdala, te ini ñahan un ní quenehen ya uxā tachí. <sup>3</sup> Te inga ña cúu Juana, ñasihí Chuza, tēe ndíso jniñu ini vehe Herodes. Te inga ña cúu Susana, jíín cuéhē gā ñahan jeē cáchindéé ñahán ña, jéhe ña tāca jéé jíni nūhún yá jíín de jíínáhan de.

### Jnūhun yátá síquī tēe jéte trigo

(Mt. 13.1-9; Mr. 4.1-9)

<sup>4</sup> Te cuehē ñayuu tācá ñuu yúcuan ní jinūcoo i nuū Jesús. Te ni cacutútú cuéhē ndasí ñayuu, te ni cahān yā ñin jnūhun yátá jíín i:

<sup>5</sup> ñin tēe cate trigo, ni quenda de jeē cáte de. Te ná ni quejéé de jéte de, te jecu trigo ni jítē yuhíchi. Te ni cajeñū ñayuu síquī, te ni cayejí saa. <sup>6</sup> Te jecu gā ni jítē nuū ñūhun yuū. Te ni cane, te ni ichí-ni, chí tú cuehē cajin. <sup>7</sup> Te jecu gā ni jítē nuū náne ñnu. Te ñnuú-ni ni canecoo ñnu jíín,

te ni jesí nuū. <sup>8</sup> Te jecu ni jítē nuū ñūhun váha. Te nuū ní jehnu, te ni jēhe cuehē nuni, chí jeē ñin ñin ni jēhe nde ciento. Achí yá.

Yūcuán na te ni cahān jee ya:

Tāca rōhó jéé jíni sōho, na chúsóhó ró, achí yá.

### Najehē cahán yā maní jnūhun yátá

(Mt. 13.10-17; Mr. 10-12)

<sup>9</sup> Te tēe cáscuáha jíín yá ni cacajñūhún de ya na vé cuní cahān jnūhun yátá yáha.

<sup>10</sup> Te ni cahān yā:

Róhó jíínáhan ró, chí sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te maní jíín jnūhun yátá cáhán rí jíín sava ga i, návāha vēsú cájito i, te quéndōo i nájñūhun jeē tú na vé ni cájito i. Te vēsú cájini sōho i, te ma jécūhun ni i.

### Jeē ní castūhun cájí yá jnūhun yátá tēe jéte trigo

(Mt. 13.18-23; Mr. 4.13-20)

<sup>11</sup> Jnūhun yátá yáha cuní cahān: Trigo un cúu jnūhun Yaā Dios. <sup>12</sup> Te trigo jeē ni jítē yuhíchi cúu nájñūhun ñayuu cájini sōho jnūhun, te quíji-ni jexeén te quénde-ni jnūhun ini anuá i, návāha ma candíje i te ma jnáma ri i. <sup>13</sup> Te trigo jeē ni jítē nuū ñūhun yuū cúu nájñūhun ñayuu cájini jnūhun, te cájetáhú i te cácusii ni i jíín. Te tu cúcutú jnūhun ún ini anuá i. Te jecu-ni quivī cáccandíje i, te núu ni quejéé jnúndóho, te cájica yátá i. <sup>14</sup> Te trigo jeē ni jítē nuū náne ñnu cúu nájñūhun ñayuu cájini jnūhun, te cuango i te cácuñeñu i jíín jniñu i jíín jéé cuní i cucúcá i te coo síi ni i. Te tu íje i jíín jnūhun ya. <sup>15</sup> Te trigo jeē ni jítē nuū ñūhun váha cúu nájñūhun ñayuu cájini nahín jnúhun ya, te cájini vāha i, chí íyó váha íyó ndāā anuá i. Te cáhije i jíín jnúhun ya, chí cáccandíje vāha i.

## Jnūhun yátá síquī lāmpara

(Mr. 4.21-25)

<sup>16</sup>Nūu nástīn ñayuu iin lāmpara, te tu jési i ni iin síquī, ni tu jéni i chíji jito. Chi sa suhva jéni i nuū sucún, návāha cundijin nuū ñayuu quívicoo vehe. <sup>17</sup>Te suni súcuan tu íyó ni iin jnūhun sāhi jéē ma cūni ñayuu, chi ndihi tāca jnūhun cácahān i nane ndijin te cuni ñayuu.

<sup>18</sup>Nūu súcuan te na cūni sōho vāha ró, chi ñayuu je jécūhun ni, stéén gā yā nuū i. Te ñayuu tu cándíje, máá jecu jeē jéni ni i jeē jiní i, sa suhva naa. Achí yá.

## Náná yā jíin ñani yā

(Mt. 12.46-50; Mr. 3.31-35)

<sup>19</sup>Yūcuán na te ni quee naná yā jíin táca ñani yā nuū íne ya. Te tu ní cúu quívicoo ña nuū yā síquī jeē chitú ñayuu.

<sup>20</sup>Te iin ñayuu ni castūhun núu yā:

Náná ni jíin táca ñani ni cáhiin nuū quéhe, te cácuni cahān jíin ní, áchí i.

<sup>21</sup>Te ni cahān maá yá:

Suni náná rī jíin ñani rī cácuu ñayuu cájini sōho jnūhun Yaā Dios te cásquícú i, áchí yá jíin i.

## Jeē ní jecuiñī tachī níhin jíin mar ni sáha ya

(Mt. 8.23-27; Mr. 4.35-41)

<sup>22</sup>Te iin quivī ni quivī ya iin barco jíin tée cáscuáha jíin yá, te ni cahān yā jíin de:

Na yáha yó quihīn yō inga lado mar.

Te ni cascáca de barco cuango de.

<sup>23</sup>Te níni cáscáca de barco, te ni quixí yā. Te ni jequihī iin tachī níhin nuū mar, te je yajni chitú ndute ini barco, te ndúcú queé barco. <sup>24</sup>Te ni castóna de ya, te ni cacahān de:

Maestro, Maestro, vijna te quēe yó chíji ndute te naa yō, achí de.

Te ni ndocuiñī-ni ya, te ni cahān yā nuū tachī níhin jíin núu mar. Te ni

cajecuiñī-ni, te ni cuu nayúú íi-ni. <sup>25</sup>Te ni cahān yā jíin tée cáscuáha jíin yá:

¿Naun tu cácañdije ró?

Te máá de yōhyo ni cayūhú de, te cánaa ni de, te cácahān de jíin jnāhan de:

¿Ndé iin ga cúu tēe yáha jéē nde nuū tachí níhin jíin núu ndúte ndácu de jniñu te cájetáhú jéē cahān de? Achí de.

## Tēe Gadara jeē ndóho tachī

(Mt. 8.28-34; Mr. 5.1-20)

<sup>26</sup>Yūcuán na te ni cane ya jíin de región Galilea, te cuahān yā región Gadara jeē íne inga lado mar Galilea.

<sup>27</sup>Te nuū ní nanuu ya nuū ñūhun íchi, te iin tēe ñuu un ní quee de nuū yā. Te je ni cuu cuehē cuiyā ñūhun cuehē tachī ini de. Te tu ñūhun cuiti de sahama, ni tu ndéé de vehe, chi sa suhva nuū cáyindūji ndīyi ndeé de. <sup>28</sup>Te ná ni jito de nuū Jesús, te ni jecuiñī yití de nuū yā, te ni cana cóhó de:

¿Naun vēji ní núu ná, Jesús Sēhe Yaā cujéhnu téyí? Cáhán ndahú ná jíin ní jeē ma stóho ní sáña, áchí de.

<sup>29</sup>Súcuan ni cahān de, chi je ni ndacu ya jniñu nuū tachí un jéē na quéndacoo ini de. Te ni cuu cuehē jínu sáha xeēn tachī jíin de. Te cájihni ñayuu ndaha de jehē de jíin cadena, návāha tú na vé sáha de. Te ndihi-ni jéhnde de, te jínu de jéhén de nde nuū ñūhun téhé sáha tachí ún. <sup>30</sup>Te Jesús ni cajnūhun yá de:

¿Na vé naní ró?

Te ni cahān de:

Legión naní ná.

Súcuan ni cahān de jeē naní de, chi ñūhun cuehē tachī ini de. <sup>31</sup>Te ni cacahān ndahú táchi un jíin yá jeē ma tají yá quihīn ini tūhñchi cúnú. <sup>32</sup>Te yucu yúcuan cáhiin cuehē quini cájitu ti. Te tachí jeē cáñuhun ini tēe un ní cacahān ndahú jíin yá jeē na cuáha ya jnūhun quívicoo ini quini ún. Te ni jēhe ya jnūhun. <sup>33</sup>Te ni quendacoo tachí ún ini tēe ún, te ni quívicoo ini quini. Te quini

un ní cajinu ti ni ningoo ti iin yucáva, ni quívicoo ti nuū mar, te ni ndaquíhi ti ndute, ni cajihí tī.

<sup>34</sup>Te tēe cándito ti ni cajito de jeē súcuan ni cuu, te ni cayūh de. Te ni cajinu de cuacastūhún de nuū ñáyuu ñuu un jíin ñáyuu tāca rancho. <sup>35</sup>Te cuangoo ñayuu un cuácondéhé i na vé ni cuu. Te ni jinūcoo i nuū íne Jesús. Te ni cajito i nuū tēe ní quendacoo tachí ini, néne de nuū jehé Jesús, te ñūhun de sahma, te je ni nducájí xíní de. Te ni cayūhu ñáyuu ún. <sup>36</sup>Te tēe ní cajito ni canacani de jñūhun nuū ñáyuu, ndese ni nduvāha tēe ni ñūhun tachí ini.

<sup>37</sup>Yūcuán na te tāca ñáyuu ní región Gadara, ni caquejéé i cacahān ndahú i jíin yá jeē na cújiyo ya quihīn yā, chi yōhoyo cáyūhú i. Te ni ndīvi ya ini barco jeē quínuhun yā. <sup>38</sup>Te tēe jeē ní quendacoo tachí ini, ni cahān ndahú de jíin yá jeē na cuáha ya jñūhun quihīn de jíin yá. Te Jesús ni cahān yā jeē na quéndōo de, te áchí yá:

<sup>39</sup>Cuánuhun vehe ró, te nacani ró jñūhun ndese yōhoyo jéhnū jniñu ni sáha Yaā Dios jíin ró, achí yá jíin de.

Te cuahān de, te ni nacani de jñūhun ní ñuu ún, ndese yōhoyo jéhnū jniñu ni sáha Jesús jíin de.

**Jñūhun sēhe síhí Jairo jíin ñahan ní quehé yusáhma ya**

(Mt. 9.18-26; Mr. 5.21-43)

<sup>40</sup>Te nuū ní najinū Jesús inga lado mar, te ñayuu un ní cacusiñ ni i jeē ní najinū yā, chi ndihí i cándetu i ya. <sup>41</sup>Te ni quee iin tēe cújéhnū ini vehe i sinagoga, naní de Jairo. Te ni jecuiñí yití de nuū jehé yā, te ni cahān ndahú de jíin yá jeē na quihīn yā jíin de vehe de. <sup>42</sup>Chi íyó iin sēhe síhí de jeē mañūhún-ni i nuū de, te íyó i nájnūhun uxí uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquin i ya, te ni chitú níhin i xiin ya cuangoo i.

<sup>43</sup>Te mēhñu ñáyuu un cuáhān iin ñahan cúhú jeē ní cuu uxí uū cuiyā ndóho ña cuehyí niñí. Te ni jexin ña tāca jéé névāha ña jíin tēe tájné, te tu ní ndúvāha ña sáha ni iin de. <sup>44</sup>Te ni quee ña ichi yátá yā, te ni quehé ña yusáhma ya. Te ni jecuiñí-ni niñí ña.

<sup>45</sup>Yūcuán na te ni cahān Jesús:

¿Ndé iin ni quehé sahma ri? achí yá.

Te ndivii i ni cacahān jeē tu ní quehé i. Te Pedro jíin tēe cáhiin jíin de, ni cacahān de:

Maestro, jito ní jéé ñáyuu cuehē yāha ní chitú níhin i xiin ní, te cáquihí i níhin, te cájnūhun ní ndé iin ni quehé sahma ní.

<sup>46</sup>Te ni cahān Jesús:

Tuú chi iin ñayuu ni quehé sahma ri, chi ni jini rí jeē jíin fuerza rí ni nduvāha iin ñayuu, achí yá.

<sup>47</sup>Te ni jini ñahan un jéé tu ní cúu coo yuhu jeē ni sáha ña. Te quísi i ña ni quee ña, te ni jecuiñí yití ña nuū jehé yā. Te jito jínúu tāca ñáyuu, te ni cachi cají ña najehē ni quehé ña yusáhma ya, jíin jéé ní nduvāha-ni ña. <sup>48</sup>Te ni cahān yā jíin ña:

Séhē, ni candíje ró jéé cuu nasávāha ri rohó, te jeē yúcuan ní nduvāha ró. Cuáhān te na ndúsñ ni rō, achí yá.

<sup>49</sup>Te níni cáhān gā yā súcuan, te ni quee iin tēe vēji vehe Jairo, tēe cújéhnū ini sinagoga, te ni cachi nuū de:

Je ni jihí sēhe síhí ní. Te ma sájnēñu ga ní Maestro, achí de.

<sup>50</sup>Te ni jini Jesús jñūhun yāha, te ni cahān yā jíin Jairo:

Ma yūhu ró, chi candíje-ni ró, te nastécu rí sēhe ró, achí yá.

<sup>51</sup>Te ni jinū yā vehe, te tu ní jéhe ya jñūhun quívi ñayuu jíin yá, chi máa-ni Pedro jíin Juan jíin Jacobo jíin tátá naná sūchi síhí un. <sup>52</sup>Te cácuquíyá ni ndihí ñayuu cáyucú ini vehe, te cándahyū i jehé sūchí un. Te ni cahān yā:

Ma ndahyú rō jijnáhan ró. Tu ní jíhí i, chí quíxí-ni i, achí yá.



<sup>53</sup>Te ni cajecū catá i jeē ni cáhān yā, chi cājini i jeē ni jīhī sūchi síhī un. <sup>54</sup>Yūcuán na te ni jniñi ya ndaha i, te ni cahān jee ya jíin i:

Sfhī, ndocuiñi, achí yá.

<sup>55</sup>Te ni natecu i, te ni ndocuiñi-ni i. Te ni ndacu ya jniñu jeē na cuáha ña jeē caji i. <sup>56</sup>Te tátá i náná i yōhyo ni canaa ni de cājito de. Te ni ndacu nihin ya jniñu nuū de jeē ma cáchi de nuū ni ñin jeē súcuan ni cuu.

### Jeē ní tají yá ndihúxí uū de cuanacani de jñuhun

(Mt. 10.5-15; Mr. 6.7-13)

**9** Te ni nastútú yá ndihúxí uū tēe cáscuáha jíin yá, te ni sáha ya jeē cóndiso jniñu de te coo poder de jeē quénehen de tachī ini ñayuu, jíin jéē nasávāha de ñayuu cácuñu. <sup>2</sup>Te ni tají yá de quingoo de jeē nácani de jñuhun ndese ndácu Yaā Dios jniñu, jíin jéē nasávāha de ñayuu cácuñu. <sup>3</sup>Te ni cahān yā jíin de:

Ma cóndiso ró jéē cuajniñu ró ichi, ni vara, ni ñunu, ni staā, ni xūhún. Te quihín ró jíin ñin-ni camisa, te ma cóndiso ró inga. <sup>4</sup>Te na-ni vehe núu ni quívi-coo ró, te yūcuán coyūcu ró nde quenda tucu ró quíhín ró inga ñuu. <sup>5</sup>Te núu ñin ñuu tu cājetáhú i róhó, na quéndacoo ró yūcuán, te scóyo ró tícachā jehē ró, te súcuan stéén ró jeē iyó cuéchi i jeē tu ní cājetáhú i. Achí yá.

<sup>6</sup>Te ni quendacoo de cuahān de, ni cajica nuu de tēcá ñuu, ni canacani de jñuhun jnáma Yaā Dios ñayuu. Te tēcá lado ni canasávāha de ñayuu cácuñu.

### Jeē ni jíhī Juan tēe scuándute

(Mt. 14.1-12; Mr. 6.14-29)

<sup>7</sup>Te Herodes, tēe cúu gobernador, ni jini jñuhun de tēcá jniñu sáha Jesús. Te ni cunéé ni de, chi cājini ni sava ñayuu cácahān i jeē Juan ni natecu de. <sup>8</sup>Te sava ga i cácahān jeē ní nane Elías, tēe ni

nacani jñuhun Yaā Dios nde jenahán. Te sava ga i cácahān jeē inga tēe ni nacani jñuhun ya nde jenahán, ní natecu de. <sup>9</sup>Te ni cahān Herodes:

Juan chi ni ndacu ri jniñu ni tahndē xinī. Núu súcuan ¿te ndé tēe cúu tēe yáha jeē jíni jñuhun ri jeē sáha de jniñu jéhu? Achí de.

Te ni nducú Herodes modo coto de nuū Jesús.

### Jeē ni scáji yā uhūn mil tēe

(Mt. 14.13-21; Mr. 6.30-44; Jn. 6.1-14)

<sup>10</sup>Te ni ndecoo tēe cácuu apóstol jeē ní tají yá ni canacani jñuhun. Te ni cacachi de nuū yā tēcá jniñu ni casáha de. Te ni jeca ya de cuahān sñin ya jíin de ñin lugar nuū tú ñayuu, yajni ñuu Betsaida. <sup>11</sup>Te ni cajini ñayuu, te suni cuango i. Te ni jetáhú yá i, te ni nacani ya jñuhun ndese ndácu Yaā Dios jniñu, te ni nasávāha ya ñayuu cácuñu.

<sup>12</sup>Te nuū cuáhini, te ni quecoo ndihúxí uū tēe cáscuáha jíin yá, te ni cacahān de jíin yá:

Tají ní ñayuu cuehē yāhá na quingoo i tēcá ñuu jíin tēcá rancho yajni yāhá, te nducú i nuū ndóo i te cuaan i jeē caji i, chi tú na vé iyó yáha, achí de.

<sup>13</sup>Te ni cahān yā jíin de:

Cuāha máá ró jeē caji i, achí yá.

Te ni cacahān de:

Tú na vé cánevāha ná, chi uhūn-ni staā jíin úu-ni chácá. Te vésú núu quicuaan ná staā caji ndihi ñayuu cuehē yáha, te ni ma cúu, achí de.

<sup>14</sup>Chi íyó nájñuhun uhūn mil tēe. Te ni cahān yā jíin tēe cáscuáha ún:

Cahān jíin ñayuu na cúcōo sñin cincuenta cincuenta i, achí yá.

<sup>15</sup>Te súcuan ni casáha de, te ni cacucōo ndihi ñayuu. <sup>16</sup>Te ni quihin ya ndihúhún staā jíin úu chácá un, te ni ndacoto ya ichi ándiví, te ni nacuatáhú yá. Te ni tahú cuéchi yá staā ún, te ni jēhe ya nuū tēe cáscuáha jíin yá, te ni

casaja de nuū ñáyuu cuehē. <sup>17</sup> Te ndívii i ni cayeji, te ni candutú chíji i. Te ni canastútú de pedazo staā jeē ní quendōo, te ni chitú úxi uū jica.

**Jeē ní cahān Pedro  
jeē Jesús cúu Cristo**

(Mt. 16.13-19; Mr. 8.27-29)

<sup>18</sup> Te ñn quivī ni cusñin Jesús, jícán tahu yā, te máá-ni tēe cáscuáha un cáhiin de jíin yá. Te ni cajñuhun yá de:

Ruhū, ¿ndé ñn cúu ri cácahān ñayuu? achí yá.

<sup>19</sup> Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñuhun Yaā Dios nde jenahán. Te sava ga i cácahān jeē inga tēe ni nacani jñuhun ya ni natecu de.

<sup>20</sup> Yūcuán na te ni cajñuhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

**Jeē ní castühún Jesús jeē cúu yā**

(Mt. 16.20-28; Mr. 8.30-9.1)

<sup>21</sup> Yūcuán na te ni ndacu ñihin ya jñiñu nuū de jeē ma cáchi de jñuhun yáha núu ní ñn ñayuu. <sup>22</sup> Te ni cahān yā:

Máá rí, Yaā ní nduu tēe, cánuú ndoho xeēn rī. Te tāca tēe jéhu jíin sūtū cácu-jéhu jíin tēe cástéén tutu ley, squéhichi de ruhū. Te cahni de ruhū, te nuū uní quivī te natecu rī, achí yá.

<sup>23</sup> Yūcuán na te ni cahān yā jíin ndihi de:

Na-ni ñayuu núu cúní i condiquin i ruhū, na cási i jeē cuní maá i, te na cóndiquin i ruhū tāca quívī, te cuáha i jñuhun ndoho i jñúndóho jeē siquí rī, vésú na cúu i. <sup>24</sup> Chi núu ndé ñáyuu cuní i cácu i nuū jñúndóho quiji nuū i jeē siquí ruhū, núu súcuan te jñahnū ndetū i níí cáni. Te núu ndé ñáyuu, vésú na cúu i

jeē siquí ruhū, te cotecu i níí cáni. <sup>25</sup> ¿Chi ndé cuajñiñu vésú na cúndeyí ñayuu ñiñi i níí ñáyvī, te núu squívī i máá i nuū jñahnū ndetū i níí cáni? <sup>26</sup> Chi núu na-ni ñayuu cúcanu i jeē siquí ruhū, Yaā ní nduu tēe, jíin siquí jñuhun cáhán rī, suni súcuan cucanu rī jeē siquí máá i, quivī ndíji rī. Te quivī ún chi yōhyo luu cujéhu rī, nájnūhun cújéhu Tátá rī, te suni cácu-jéhu ndajéhé ndoo ya sáha ya. <sup>27</sup> Te jendaá cáhán rī jíin ró jeē sava tēe cáhiin yáhá, ma cúu de chi nde cuni de jeē ndácu Yaā Dios jñiñu jíin poder yā. Achí yá.

**Jeē tucu ni nduu ya**

(Mt. 17.1-8; Mr. 9.2-8)

<sup>28</sup> Yūcuán na te nájnūhun nuū uná quivī jeē ni cáhān yā jñuhun yáha, te ni caa ya ñn yucu, cuacacān tahu yā. Te Pedro jíin Jacobo jíin Juan cuangoo de jíin yá. <sup>29</sup> Te níí jícán tahu yā, te tucu ni nduu nuū yā, te sahna ya ni nducujín quiyi, te ndíndé. <sup>30</sup> Yūcuán na te ni canecoo uū tēe, cándajñuhún de jíin yá. Te cúu de Moisés jíin Elías, tēe ni cahíyo jenahán. <sup>31</sup> Te luu ndíndé de cáhiin de, te ni cacahān de jíin yá siquí jeē ní cuyajni cuu yā ñuu Jerusalén. <sup>32</sup> Te Pedro jíin tēe cáyūcu jíin de, yōhyo cájii de máhná, te vésú súcuan te tu ní cáquixi de. Te ni cajito de jeē lúu ndíndé yá jíin ndíndúú tēe cáhiin jíin yá. <sup>33</sup> Te nuū ní cacujiyo tēe un núu yā, te ni cahān Pedro jíin yá:

Maestro, nacā jeē váha jeē cáhiin ná yáha. Te na sáha ná úní vehe ramada, ñn cuu máá ní, inga cuu Moisés, te inga cuu Elías, achí de.

Te tu sáha de cuenta na vé cúu jeē cáhán de. <sup>34</sup> Te níí cáhán de súcuan, te ni quee vicō ñuhun ní jesi nuū de jíjnáhan de. Te ni cayuhú de jeē cáhiin de chíji vicō ún. <sup>35</sup> Te nuū vicō un ní cahān ñn jñuhun:

Yāha cúu Sēhe ri jeē maní ndasí rí jíín. Te na cúni nahín ró jnūhun cáhán yā, achí.

<sup>36</sup>Te nuū ni jínu ni cahān jnūhun ún, te máá iin na Jesús ín ya nuū de. Te máá de tu ní cácahān cuítí de, te tāca quíví ún tu ní cácachi de nuū ni iin jeē súcuan ni cajito de.

**Jeē ní nasávāha ya iin sūchi nūhun tachí ini**

*(Mt. 17.14-21; Mr. 9.14-29)*

<sup>37</sup>Te inga quíví un ní nanuu ya yucu jíín de. Te cuehē ñayuu ni jejnahan i ya.

<sup>38</sup>Te mēhñu ñayuu cuehē un ní cana jee iin tēe:

Maestro, jícan tahu na núu ni jéē condēhe ní sēhe yíí ná, chi máñúhún i nuū ná. <sup>39</sup>Te máni jeē sáha xeēn tachí jíín i, te cána cóhó i sáha, te jéhni yíhí i, te jée tiñū yuhu i. Te yōhyo stóho i, te yōhyo uhū siaá i. <sup>40</sup>Te ni cahān ndahú ná jíín tēe cáscuáha jíín ní jeē na quénehen te tachí ún, te tu ní cúu sáha de, achí de.

<sup>41</sup>Te ni cahān yā jíín de jíínáhan de:

Ñayuu yōhyo nihni ni cácuu ró, chi tu cácañdije ró jéē cuu nduvāha i. ¿Nasaa ga quíví condee rí jíín ró jeē cuándeyí ni rí jíín ró? Cuáquihin sēhe ró na quíji i, achí yá.

<sup>42</sup>Te níni véji i nuū yā, te ni cotúú i ni sáha tachí, te ni jehni yíhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya i nuū tatá i. <sup>43</sup>Te ndívii ñayuu nahán ní canaa ni i cájito i jeē yóhyo jéhnú jniñu sáha Yaā Dios.

**Jeē ni cáhān tucu ya jeē cúu yā**

*(Mt. 17.22-23; Mr. 9.30-32)*

Te níni cánaa ni i cájito i tācá jniñu ni sáha Jesús, te ni cahān yā jíín tēe cáscuáha jíín yá:

<sup>44</sup>Chuhun vāha ni rō jnūhun cáhán rí yāhá, te ma náa ni rō, chi ruhū, Yaā ní

nduu tēe, nastúu i ruhū quíví ri ndaha tāca tēe xeēn, achí yá.

<sup>45</sup>Te tu ní cájecūhun ni de jnūhun cáhán yā, chi tu ní cúu cuítí jecūhun ni de. Te ni cayūhú de cajnūhún de ya siquū jnūhun ni cahān yā.

**Ndé ñayuu cúu jeē kujéhnú ga**

*(Mt. 18.1-5; Mr. 9.33-37)*

<sup>46</sup>Yūcuán na te tēe cáscuáha jíín yá ni caquejéē de cácahān de siquū núu ndé iin de kujéhnú ga. <sup>47</sup>Te Jesús ni jini yā jeē súcuan cájeni ni de. Te ni jniñi ya ndaha iin sūchi lúlí, te ni jeni ya i xiin ya. <sup>48</sup>Te ni cahān yā jíín de:

Na-ni ñayuu núu jeē siquū ruhū jetáhú i sūchi lúlí yāha, te ruhū jetáhú i. Te ñayuu jetáhú rúhú, suni jétáhú i Yaā ní tají rúhú véji ri. Te ñayuu núu ga mēhñu ró, máá i cújéhnú ga, achí yá.

**Ñayuu tu cáhán siquū yā, iin i jíín yá**

*(Mr. 9.38-40)*

<sup>49</sup>Yūcuán na te ni cahān Juan:

Maestro, ni cajito ná iin tēe jeē jíín síhví ní quénehen de tachí ini ñayuu. Te ni cajesi na jéē sáha de, chi tu jíca de jíín yó, achí de.

<sup>50</sup>Te ni cahān Jesús jíín de:

Ma cási rō jeē sáha de, chi tēe tu cáhán siquū yō, ín de jíín yó, achí yá.

**Jeē ni cáhān yā nuū Jacobo jíín Juan**

<sup>51</sup>Te ni cuyajni quíví jeē quínuhun yā andíví, te ni tee téyí ni yā jeē quihín yā ñuu Jerusalén. <sup>52</sup>Te ni tají yá sava tēe yósnúu de jíín jnūhun jeē jinú yā. Te cuango de iin ñuu Samaria návāha nducú de nuū ndóo ya. <sup>53</sup>Te ñayuu Samaria un tu ní cájēhe i vehe ndōo ya, chi ni cajini i jeē ndé Jerusalén quihín yā. <sup>54</sup>Te Jacobo jíín Juan, tēe cáscuáha jíín yá, ni cajini de jeē súcuan cúu, te ni cacahān de jíín yá:

¿A cúní ni jéē ndácu yó jniñu quiji ñuhūn nde andiví, nájñuhun ni sáha Elías, návāha naa ñayuu yáha? Achí de.

<sup>55</sup> Yūcuán na te ni ndió cóto Jesús nuū de, te ni cahān yā nuū de:

Tu cājini rō na nuū vēji jñuhun cácahān rō. <sup>56</sup> Chi ruhū, Yaā ní nduu tēe, tú vēji ri jeē snáa rī ñayuu, chi sa suhva jeē jnáma ri ñayuu, achí yá.

Yūcuán na te cuahān yā jíin de inga ñuu.

### Siquí ñáyuu jeē cáculi i condiquin i ya

(Mt. 8.19-22)

<sup>57</sup> Te níní jíca ya ichi jíin de, te ni cahān ñin tēe jíin yá:

Condiquin na níhín quihín yō ndé-ni cúu-ni nuū quihín ni, achí de.

<sup>58</sup> Te ni cahān Jesús jíin de:

Tāca ñucuii, iyó yáū cava cáñuhun ti. Te suni saa, iyó táca tī. Te ruhū, Yaā ní nduu tēe, tú nuū cusú rī, achí yá.

<sup>59</sup> Te ni cahān yā jíin inga de:

Condiquin ruhū na quihín yō.

Te máá tēe un ní cahān de:

Condetu ní ndé na quíchindūji ná tátá na xihna gā. Yūcuán na te condiquin na níhín, achí de.

<sup>60</sup> Te ni cahān Jesús jíin de:

Stóo tāca ndíyi na chindūji jnáhan ndíyi, chi ndíyi cácuu ñayuu tu cá-candíje. Te rōhó, cuáhán te nacani rō jnúhun ndese ndácu Yaā Dios jniñu, achí yá.

<sup>61</sup> Yūcuán na te suni ni cahān inga de:

Cúní na condiquin na níhín, te cuāha ní jnúhun jeē xihna gā quicahān na jíin ñáyuu cáyucú vehe ná, achí de.

<sup>62</sup> Te ni cahān Jesús jíin de:

Núu na-ni tēe quéjéé de condiquin de ruhū, te núu máni jeē nácani cuihyá ni de siquí tāca jéé ni stóo de, núu súcuan te cúu de nájñuhun ñin tēe jítu jíin yátá, te jícó cóto de ichi vehe de. Te ma cuajniñu

de condiquin de ruhū siquí jniñu ndácu Yaā Dios, achí yá.

### Jeē ní tají yá uní xico uxí de

**10** Te ná ni cuu tāca jniñu yáha, te máá Jítoho yō ni nacāji ya uní xico uxí gā de. Te ni tají yá ndihuū ndihuū de jeē cósnūú de nuū yā, quingoo de tāca ñuu jíin tāca lugar nuū jé yajni quihín maá yá. <sup>2</sup> Te ni cahān yā jíin de:

Ñayuu yáha cácuu i nájñuhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. Núu súcuan te cacān tahú rō nuū maá Jítoho rō Yaā Dios jeē na tájí yá cuehē tēe na quingoo de cahnde de trigo, cúu jeē nacani de jñuhun ya nuū ñáyuu. <sup>3</sup> Te cuángoo jíjnáhan rō, te na cástūhun rí nuū rō jeē tají rí rohó quingoo rō nájñuhun londe mēhñu yāhī. <sup>4</sup> Te ma cóndiso rō ñunu, ni yijni xūhún, ni ndijēn. Te ichi ma cucuéé rō ndajnūhun rō jíin ni ñin. <sup>5</sup> Te na-ni vehe núu ni quívi rō, te xihna gā cahān rō: Na quíji jñuhun ndeyí jñuhun siñ ni nuū rohó, ñáyuu vehe yáha, achi rō. <sup>6</sup> Te núu vehe yúcuan iyó ñáyuu vāha, te jñuhun ndeyí ní cahān rō jinū siquí i. Te núu tuú, te jñuhun ndeyí ní cahān rō ma jinú siquí i. <sup>7</sup> Te suni vehe yúcuan coyūcu rō, te caji rō coho rō jéé cuáha ñayuu nuū rō. Chi siquí jniñu jeē nácani rō jnúhun nuū ñáyuu, te cánuú coto i rōhó. Ma quéndōo rō tijni vehe, chi ñin-ni vehe. <sup>8</sup> Te na-ni ñuu núu ni quívi-coo rō, te núu cuatáhu i rōhó, te caji rō tāca jéé cuáha i nuū rō. <sup>9</sup> Te nasávāha rō ñáyuu cácuu ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achi rō. <sup>10</sup> Te na-ni ñuu núu ni quívi-coo rō, te núu tu ní cájetáhu i rōhó, te quendacoo rō ini calle yūcuán, te cahān rō: <sup>11</sup> Nde ticachā ñuu rō yāha jéé ni jñí jehē rī, na náscóyo ri jeē cúu seña jeē iyó cuéchi rō jéé tu ní cájetáhu rō. Te na cónahán rō jeē Yaā Dios je ni cuyajni ya jeē ndacu ya jniñu nuū rō

nuú. <sup>12</sup>Te cáhán rī jín ró jeē quivī juicio te xeēn gā coo castigo siquī ñuu casáha súcuan vésú siquī ñuu Sodoma nuú ní casáha ndasí ñáyyuu cuēchi.

### Jeē ní cuxeēn yā nuú

#### sava ñuu nihni ní

(Mt. 11.20-24)

<sup>13</sup>Nacā jeē xeēn ndoho ró, ñáyyuu ñuu Corazín. Te nacā jeē xeēn ndoho ró, ñáyyuu ñuu Betsaida. Chi núu ini ñuu Tiro jín ñuu Sidón ní sáha ri jniñu jéhu jeē ní sáha ri ini ñuu maá ró, te yachí nacani ní ñáyyuu ñuu un jéē stóo i cuēchi i núú. Te sáha i seña jeē steén jeē ná-cani ní i siquī cuēchi i, chi cuhun i sahma jnúú te chuhun i yaā xini i núú. <sup>14</sup>Núu súcuan te quivī coo juicio te xeēn gā coo castigo siquī ró jijnáhan ró vésú jeē ní íyo siquī ñuu Tiro jín ñuu Sidón. <sup>15</sup>Te róhó ñáyyuu ñuu Capernaum, ¿á cájeni ní ró jeē cujéhu ró nájnūhun ñin jeē cáa cuahān ichi ándiví? Tuú chi sa nanuu ró ndé lugar nuú cáyūcu ánuá ndīyi. Achí yá.

<sup>16</sup>Te ní cahān gā yā jín tée jeē tají yá quingoo:

Ñáyyuu chusóhó jnúhun cahān ró, nuú maá rí chusóhó i. Te ñáyyuu squéhichí rohó, suni ruhū squéhichí i. Te ñáyyuu squéhichí ruhū, suni squéhichí i Yaā ní tají rúhū vēji ri. Achí yá.

### Jeē ní ndecoo tēe ní tají yá

<sup>17</sup>Te ní ndecoo unī xico uxí tēe un, cá-cusiī ní de te cácahān de jín Jesús:

Nde tachí cájetáhu núu ná jéē jín síhví ní, chí quéndacoo ini ñáyyuu, achí de.

<sup>18</sup>Te ní cahān yā jín de:

Súcuan cúu, chí ní jito ri jeē nájnūhun ñin taja ní ñingava Satanás ichi ándiví, chí ní quende rī ndihí poder un. <sup>19</sup>Te vijna te je ní jēhe ri fuerza nuú ró jeē cueñū ró nájnūhun siquī táca cóo jín tísuhma, te cundeyí ró siquī táca fuerza maá jéē jíto uhū yohó, te tú ná vé sáha ga jín ró.

<sup>20</sup>Te ma cúsiī ní ró maá-ni jeē cájetáhu táchi nuú ró, chí sa cusíī gā ní ró jeē yosó síhví ró nde ándiví. Achí yá.

### Jeē ní cusíī ní Jesús

(Mt. 11.25-27; 13.16-17)

<sup>21</sup>Te suni hora un ní cusíī ní Jesús, ní sáha Espíritu Santo, te ní cahān yā:

Na cútahū ná núu ní Tátā, Jitoho ándiví jín ñáyiví. Chí ní jesí ní táca jnúhun ndíchí ní, jeē ma cúni ñáyyuu ndichí jín ñáyyuu túhva cuenta ñáyiví yáha. Te ní steén ní núu ñáyyuu cácuu nájnūhun sūchi lúli. Chí súcuan ní nujnahan ní ní Tátā, achí yá.

<sup>22</sup>Te ní cahān gā yā:

Ndivíi ní jēhe Tátá rī nuú rī. Te tu cájini ñáyyuu ndé ñin cúu ruhū, Sēhe Yaā Dios, chí maá-ni Tátá rī cúu jeē jiní yā ruhū. Ní tu cájini ñáyyuu ndese Yaā cúu maá Tátá, chí maá-ni Sēhe cúu jeē jiní. Te íyo ñáyyuu jeē cuní maá Sēhe steén yā nuú i ndese Yaā cúu Tátá yā, te maá i suni cuni i. Achí yá.

<sup>23</sup>Yūcuán ná te jíto ya nuú tēe cáscuáha ún, te ní cahān yā jín maá-ni de:

Yōhyo ndetū ñáyyuu cájito jniñu jéhu jeē cájito maá ró. <sup>24</sup>Chí cáhán rī jín ró jeē cuehē tēe ní canacani jnúhun Yaā Dios, jín táca rey, ní cacuni de coto de jeē cájito maá ró, te tu ní cájito de. Te suni ní cacuni de cuni sōho de jeē cájini sōho maá ró, te tu ní cájini de. Achí yá.

### Jnúhun ñin tēe vāha ní nación Samaria

<sup>25</sup>Yūcuán ná te ñin tēe steén tutu ley Yaā Dios, ní ndocuiñí de ní jecahān de jín Jesús, chí cúni de coto ndee de ya. Te ní cajnúhún de:

Maestro, ¿ná vé sáha ná te nihñi tahú ná cotecu ná ní cáni ándiví? áchí de.

<sup>26</sup>Te ní cahān yā jín de:

¿Ndese yósó núu tútu ley? ¿Ndese cáhán cáhu ró? Achí yá.

<sup>27</sup> Te máá téé un ní cahān de jeē cahān nuū tūtu:

Coo manī ndasí ró jíin máá Jítóho rō Yaā Dios, nde jnāā ndasí ró sáha ró ndihí jeē cúsī ni yā, nde jíin ini jíin ánuá rō, jíin ní fuerza rō, jíin ní jéē níjnūnī rō. Te cundáhú ni rō jnāhan ró nájnūhun cundáhú ni rō maá ró, achí. Achí de.

<sup>28</sup> Te ni cahān yā jíin de:

Vāha ni cahān rō. Te núu cuu sáha ró súcuan te nihin tahu rō cotecu rō níí cáni, áchí yá.

<sup>29</sup> Te máá téé un cúní de jeē quéndōo ndaā de nuū yā jíin jnúhun ni cajnúhún de, te ni cahān de:

¿Te ndé ñayuu cácuu jnāhan ná? áchí de.

<sup>30</sup> Te ni cahān Jesús:

Īn tēe ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuihna núu de, te ni caque-nde ndihí ndajniñu de, te nde sahma ñúhun de. Te ni cacani ndevāha ún de jeē jé yajni cuu de núu. Te ni castóo ún de, te cuangoo. <sup>31</sup> Te ni cuu jeē íchi un yāha ĩin sutū quihín de, te ni jito de nuū téé ún, te ni síyo-ni de cuahān de. <sup>32</sup> Te suni súcuan ĩin tēe grupo levita jeē cá-jejniñu ini templo, vēji de ichi ún, te ni jito de nuū téé ún, te ni yāha jíicá-ni de cuahān de. <sup>33</sup> Te ĩin tēe nación Samaria, suni vēji de ichi ún, te nuū ní jito de, te ni cundáhú ni de tēe ún. <sup>34</sup> Te ni quee de nde nuū catú téé ún, te ni chuhun de aceite jíin vino nuū ni túji tēe ún, te ni jihni de sahma nuū. Te ni soó de tēe un síquī quití de, te cuahān de jíin téé un ndé ĩin mesón, te ni condito de. <sup>35</sup> Te ĩnga quivī ún, hora jeē quihín de, te ni tava de uū xūhun cáa, ni jēhe de nuū tēe chíí mesón. Te ni cahān de: Coto ní téé yāha, te núu caxīn gā ni xūhun ní jíin de, te nuū nándicó ná te nachunaa ná núu ní, áchí de. <sup>36</sup> Núu súcuan ¿te ndese jéni ni rō? Jeē ndinúní téé ún, ¿ndé ĩin de ni chihí cuenta jeē jnāhan de cúu tēe ni

canecoo ñacuihna núu? Achí yá jíin téé stéén tutu ley.

<sup>37</sup> Te ni cahān de:

Tēe jeē ní cundáhú ni tēe ni tuji, vēsú tēe ĩnuu jíicá cúu de.

Yūcuán na te ni cahān Jesús jíin de:

Cuāhán núu súcuan, te suni súcuan cundáhú ni rō tāca ñayuu, achí yá.

### Jeē ni íne ya vehe Marta jíin María

<sup>38</sup> Yūcuán na te ni quihín tucu ya ichi cuahān yā, te ni jinū yā ĩin ñuu lulí. Te ĩin ñahan nání Marta, ni cana ña ya ni jehēn yā vehe ña. <sup>39</sup> Te Marta, íyo ĩin cuhū ña nání María. Te María ni cucōo ña nuū jehé Jesús, jíni nahín ña jnúhun cáhán yā. <sup>40</sup> Te Marta chí cúnéé máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñúhún ña sāña núu jniñu? Te cahān ni jíin ña na chéndéé ñáhan ña sāñá, áchí ña.

<sup>41</sup> Te ni cahān Jesús jíin ña:

Marta, yōhyo ndíhví ni rō jíin cuéhē jniñu, te yōhyo stóho ró máá ró jíin. <sup>42</sup> Te íyo ĩin-ni jniñu cánuú. Te María chí ni nacāji ña jniñu cánuú, suu jeē ndíhví ni ña síquī jnúhun Yaā Dios, te ma quénehen yó ña nuū ún. Achí yá.

### Jeē ni stéén yā ndese cacān tahu yō

(Mt. 6.9-15; 7.7-11)

**11** Te ĩin quivī íne Jesús ĩin lugar jíicán tahu yā. Te nuū ní ndihí ni jíicān tahu yā, te ĩin tēe scuāha jíin yá, ni cahān de:

Stéén ni núu ná ndese cacān tahu na jíjnāhan ná, nájnūhun ni steén Juan nuū téé ni cascuāha jíin de, áchí de.

<sup>2</sup> Te ni cahān yā jíin de:

Jeē cacān tahu rō, te suhva cahān rō: Tátá máá ná jíjnāhan ná jéē ndeé ní andíví, níní na cóo yíñúhún ná nuū ní, chí Yaā ĩi cúu ní.

Te ñúhun ni na jéé yachī quiji quivī ndacu ní jniñu ní ñáyiví yáha.

Te na cóo táca jniñu nújnahan ni ní, nájnūhun íyó ini andiví, súcuan na cóo ini ñáyiví.

<sup>3</sup>Staā jeē cátecu na táca quivī, cuāha ní núu ná vijna.

<sup>4</sup>Te cone cáhnu ni ní núu táca cuéchi cása ha ná núu ní, nájnūhun cáhine cáhnu ni na núu ñáyuu casáha cuéchi nuū ná.

Te ma cuáha ní jnúhun jeē coto ndee jex-eén sáña, chi sa suhva jnama ní sáña nuū táca jéé neé.

Achi rō jijnáhan rō. Achí yá.

<sup>5</sup>Te ni cahān gā yā:

Núu ndé ñin róhó íyó ñin amigo rō, te núu quihīn rō vehe de sava ñuú te cahān rō jíin de: Amigo, cuāha núu unī staā nuū rī. <sup>6</sup>Chi ñin amigo rī jeē jíca de viaje, ni quee de vehe ri, te tú na vé névāha ri jeē cuáha ri caji de. Achi rō. <sup>7</sup>Te núu cahān tēe íne ini vehe: Ma stáhān rō ruhū, chi ndíhyú yehyí rí, te je cáquixi sēhe ri jíin rí, te ma cúu ndonda ri jeē cuáha ri nuū rō, achi de. <sup>8</sup>Te cáhān rī jíin rō, vēsú ma ndónnda de cuāha de nuū rō siquī jeē cúu de amigo rō, te jeē yóhyo stáhān rō de, jeē yúcuan ndonda de cuāha de ndíhi jeē jíin rō. <sup>9</sup>Núu súcuan te cáhān rī jíin rō jijnáhan rō jeē suni súcuan cacān tahú rō nuū Yaā Dios, te cuāha ya nuū rō. Te nducú rō táca jéé váha íyó núu yā, te nihīn rō sáha ya. Te cacān tahú rō nde nihīn rō, nájnūhun sáha ñáyuu cahān yehyí ndé nune quiví i. <sup>10</sup>Chi táca ñáyuu jicān, cuāha ya nuū i. Te ñáyuu nducú, suni nihīn i. Te ñáyuu cahān, nune ya ichi nihīn i jeē cuní i.

<sup>11</sup>¿Te ndé ñin rō cúu tátá, te núu sēhe rō jíicān i staā nuū rō, te á cuáha rō ñin yuū nuū i? Te núu jíicān i chácá, ¿te á cuáha rō ñin coō nuū i? <sup>12</sup>Chí núu jíicān i ñin ndiví, ¿te á cuáha rō ñin tisuhma nuū i? Tú cuiñi súcuan. <sup>13</sup>Núu súcuan

te máá rō jijnáhan rō, vēsú ñáyuu iyó cuéchi cácuu rō, te cájini rō cuāha rō jéé váha nuū sēhe rō. Te nagā ni cuu máá Tátá rō andiví jeē ma cuáha ya Espiritu Santo nuū ñáyuu jicān nuū yā. Achí yá.

**Jeē ní cacahān de jeē  
jejníñu ya fuerza Satanás**  
(Mt. 12.22-30; Mr. 3.19-27)

<sup>14</sup>Te quénehen ya ñin tachī ini ñin tēe, jeē ní cuiñíñin de ni sáha. Te nuū ní quenda tachī, te ni nacahān tēe ni cuiñíñin un. Te ni canaa ni ñáyuu cájito i. <sup>15</sup>Te sava ñáyuu ún chi ni cacahān i:

Jíin fuerza Satanás jeē cujéhnu nuū tachí, quénehen tēe yáha táca táchi ini ñáyuu, achí i.

<sup>16</sup>Te sava ga i cúní i coto ndee i ya, te ni cajicān i jeē sáha ya jeē coo ñin seña ichi ándiví. <sup>17</sup>Te máá yá jíin yā jeē súcuan cájeni ni i, te ni cahān yā:

Táca nación jeē sasín máá te cua-jnáhan máá, núu súcuan te snāá jeē iyó váha máá. Te núu ñáyuu ñin vehe sásín máá te cuajnáhan máá, núu súcuan te ma cúu ga coyūcu cáhnu. <sup>18</sup>Te suni súcuan Satanás, núu sásín máá jíin jnáhan tachī, ¿te ndese cuiñi nihin jeē ndácu jniñu núu súcuan? Chi cácahān rō jeē jíin fuerza Satanás quénehen ri tachī ini ñáyuu. <sup>19</sup>Te núu súcuan cúu núu, te ñáyuu cascuáha jíin máá rō jijnáhan rō, ¿na jíin fuerza cáquenehen máá i tachī, cájeni ni rō? Núu súcuan te máá i jijnáhan i cachi jeē ní castívi ndasí rō ni cacahān rō jeē cáquenehen ri tachī jíin fuerza Satanás. <sup>20</sup>Te tuú chi sa suhva jíin fuerza Yaā Dios cúu jeē quénehen ri tachī. Núu súcuan te je ndéé Yaā Dios mēhñu rō jéé ndácu ya jniñu.

<sup>21</sup>Te núu ñin tēe ndacuī, ndíto de vehe de jíin nújii de, núu súcuan te tú ni ñin ndajniñu de ndoñuhún. <sup>22</sup>Te núu quiji inga tēe ndacuī gā, te cundeyí jíin tēe ún, núu súcuan te quende nujii de jeē ndíto de vehe de, te sáha de ndese cúní maá de

jíin ndajniñu jeē quénde de. Te nájnūhun tēe ndacuí gā ún, súcuan cúu máá rí nuū Satanás.

<sup>23</sup>Te ñayuu tu íyó mání jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

**Tachī jeē nastútú jnáhan ndívi ini ñayuu**

*(Mt. 12.43-45)*

<sup>24</sup>Núu ni quenda iin tachī ini iin tēe tu cándíje, te jíca cuu nuū ñūhun téhé, ndúcú núu ndétátú, te tu níhín, yūcuán na te jéni ni maá: Na quínuhun rī vehe nuū ní quenda rī. <sup>25</sup>Te núu ni ndee tucu, te jíto jeē tēe tu cándíje un cúu de nájnūhun iin vehe jeē ní ndundoo. <sup>26</sup>Yūcuán na te jéquiñin uxā gā tachī xeén gā vēsú maá. Te quívicoo ini tēe un jéé cóyūcu yúcuan. Núu súcuan te xeén gā ndoho tēe un jéé sándīhí vēsú jeē xihna ñūhún. Achí yá.

**Yōhoyo ndetū ñayuu cájini nahín jnūhun ya**

<sup>27</sup>Te níni cáhán yā jnūhun yáha, te iin ñahan íne mēhñu ñáyuu cuehē un, ní cahān jee ña jíin yá:

Yōhoyo ndetū ñahan ní scácu níhín te ní scáxin ña níhín, áchí ña.

<sup>28</sup>Te ni cahān yā:

Sa suhva yōhoyo ga ndetū ñayuu cájini nahín jnūhun Yaā Dios te cásquícu i, áchí yá.

**Jeē ní cajicān ñayuu tu cácandíje iin jniñu jéhu**

*(Mt. 12.38-42; Mr. 8.12)*

<sup>29</sup>Te ni cataca cuehē gā ñayuu nuū Jesús, te ni quejéé yá cahān yā:

Ñayuu iyó vijna mání cásáha néé i. Te cájicān i iin jniñu jéhu jeē stéén núu Yaā ní tají Yaā Dios cúu rī. Te tú

na inga jniñu jéhu stéén rī nuū i, chí máá-ni jniñu jéhu nájnūhun ni cuu jíin Jonás, tēe ni nacani jnūhun Yaā Dios nde jenahán. <sup>30</sup>Chí nájnūhun ni cajini ñayuu ñuu Nínive jeē ní cuu iin jniñu jéhu jíin Jonás, suni súcuan cuni ñayuu tiempo yáha jeē coo iin jniñu jéhu jíin rúhū, Yaā ní nduu tēe, jeē quijnáhan jíin modo ni ndoho Jonás. <sup>31</sup>Te reina jeē ní cujéhu nación ichi sur, natecu ña jíin ñáyuu tiempo yáha, quívi juicio jeē sándaā yā cuēchi, te cahān ña cuēchi siquī i. Chí nde jíca téyí ní quiji ña ni jini nahín ña jnūhun ndíchí ní cahān rey Salomón. Te vijna chí cújéhu ga ruhū, Yaā íne yāhá vēsú Salomón, te tu cácandíje ró rúhū. <sup>32</sup>Te tāca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo yáha, quívi juicio jeē sándaā yā cuēchi, te cahān i cuēchi siquī ñáyuu yáha. Chí máá i ni canacani ni i ni castóo i cuēchi i quívi ní nacani Jonás jnūhun nuū i. Te vijna chí cújéhu ga ruhū, Yaā íne yāhá vēsú Jonás, te tu cácandíje ró rúhū.

**Jnūhun yátá síquī lámpara**

*(Mt. 5.15; 6.22-23)*

<sup>33</sup>Núu nástíin ñayuu iin lámpara, tu chísháhí i, ni tu chúne i chíji iin cajón. Chí sa suhva jéni i nuū sucún, návāha cundi-jin nuū ñáyuu quívicoo vehe. <sup>34</sup>Te tinūu ró cúu nájnūhun lámpara nuū yiquí cúñu rō. Núu súcuan te núu tinūu ró íyó ndi-jin, te ní-ni yiquí cúñu rō cúndijin. Te núu tinūu ró tu íyó ndijin, te ní-ni yiquí cúñu rō iyó nee. <sup>35</sup>Te suni súcuan cúu ánuá rō, te coto ró jéé ma cáni néé ni rō, návāha tú coo nee ini anuá rō. <sup>36</sup>Chí núu mání jniñu váha cásáha ró, te tú na jniñu néé cásáha ró, núu súcuan te luz yā cúndijin váha ini anuá rō, nájnūhun iin lámpara jeē sáha jeē cúndijin váha. Achí yá.



**Jeē ni cāhān yā jeē  
iyó cuēchi de jijnáhan de**

(Mt. 23.1-36; Mr. 12.38-40;

Lc. 20.45-47)

<sup>37</sup> Te nuū ní cuu ni cahān yā, te iin tēe grupo fariseo ni cana de ya jeē caji yā staā vehe de. Te ni quivī ya, te ni cucōo ya mesa jeē caji yā staā. <sup>38</sup> Te tēe fariseo un nāā ni de jíto de jeē tu squícu ya costumbre jeē nandahá yá te caji yā staā. <sup>39</sup> Te ni cahān maá Jítóho yō jíin de:

Róhó tēe fariseo jijnáhan ró, chi nájnūhun jeē cánacate ró yátā vaso jíin yátā cohó cúu jeē nándahá ró. Te ichi íni ró chi nūhun maní maá jnúhun cuíhná jíin jnúhun néé. <sup>40</sup> Tēe cánéé cácuu ró. ¿A tu cájini ró jeē Yaā ni sáha yiqui cúñu ró, suni ni sáha ya anuá ró? <sup>41</sup> Te jeē cájēhe ró caridad nuū ñáyuu ndahú, na sáha ró síquī jeē cundáhú ndije ni ró i. Te súcuan te coo ndaā anuá ró.

<sup>42</sup> 'Nacā xeēn ndoho róhó tēe fariseo, chi cásquícu ró táca jniñu lúlí, te tu cásquícu ró jniñu cánuú. Chi cásáha ró úxí uxí nuhní tamínu jíin ruda jíin táca yucú, te cásocō ró iin iin síquī táca úxí un núu Yaā Dios. Te tu cásáha cuití ró jniñu ndaā, ni tu cáhiyo maní ró jíin Yaā Dios. Táca jéē yáha cánuú sáha ró núú, te suni ma stóo ró jéē socó ró táca yúcú ún.

<sup>43</sup> 'Nacā xeēn ndoho róhó tēe fariseo, chi maní cánujnahan ni ró cucōo ró núú silla yinúhún gá ini vehe íi sinagoga. Te cánujnahan ni ró jeē cahán yinúhún ñáyuu jíin ró nuū calle.

<sup>44</sup> 'Te nacā xeēn ndoho róhó tēe castéén tutu ley Yaā Dios, jíin róhó tēe fariseo, chi tēe stáhú-ni cácuu ró. Chi cándāa ró nájnūhun yaū ndīyi jeē tú ndijin, chi cásnāā ró anuá ñáyuu, te tu jíin i jeē súcuan cásáha ró jíin i. Achí yá jíin de.

<sup>45</sup> Yūcuán na te ni cahān iin tēe stéén tutu ley:

Maestro, jeē ni cāhān ni táca jnúhun yáha, suni nde síquī maá ná jijnáhan ná ní cahān ní, achí de jíin yá.

<sup>46</sup> Te ni cahān yā:

Suni nacā xeēn ndoho róhó tēe castéén tutu ley. Chi suni castéén ró táca ley ni catava maá ró jeē yíí sáha, te tu cá-cundeyí ñáyuu squícu i. Te máá ró, chi ni iin xini ndáha ró tu cásánda ró jéē squícu ró.

<sup>47</sup> 'Nacā xeēn ndoho ró jijnáhan ró. Chi cásáha ró vehe síquī nuū yínduji ndīyi jíi ró, tēe ni canacani jnúhun Yaā Dios nde jenahán. Te suni táca jíi ró ni cajehni de tēe ún. <sup>48</sup> Te jeē casáha ró súcuan cúu jeē cáquijnáhan ró jíin de síquī jniñu ní casáha de. Chi máá de ni cajehni tēe ún, te máá ró cásáha ró vehe ndīyi ún.

<sup>49</sup> 'Jeē yúcuan nde jenahán ní cahān Yaā Dios iin jnúhun ndíchí: Tají rí táca tēe nacani jnúhun ri jíin táca tēe apóstol quingoo de nuū i. Te sava de cahni i, te sava ga de coto xeēn i, achí Yaā Dios. <sup>50</sup> Te súcuan te síquī ñáyuu tiempo yáha na cóndee cuēchi jeē ní cajehni jíi i tēe ni canacani jnúhun Yaā Dios, nde quiví ni jécōo ñayiví te nde vijna, <sup>51</sup> nde Abel xihna gā te nde Zacarías, tēe ni cajehni de ini templo sava mēhñu cuarto íi jíin altar. Núu súcuan te cáhán rí jíin ró jeē síquī ñáyuu tiempo yáha condee táca cuēchi ún.

<sup>52</sup> 'Nacā xeēn ndoho róhó jéē castéén tutu ley, chi cájesi ró ichi jeē jécūhun ni ñáyuu jnúhun ya. Chi ní máá ró tu cácuu ró jecūhun ni ró, ni tu cájēhe ró jnúhun jeē jecūhun ni ñáyuu cácuu. Achí yá.

<sup>53</sup> Te jeē ni cāhān yā jnúhun yáha, te tēe castéén tutu ley Yaā Dios jíin tēe fariseo, yōhyo ni caquití ni de nuū yā. Te ni caquejéé de cástíchí de ya síquī cuehē gā jnúhun. <sup>54</sup> Chi yuhu-ni cánducú de núu sanaa te stíví yá jnúhun cahān yā, návāha nihin de cuēchi síquī yā.

**Siquī jnūhun stáhú  
cácahān tēe fariseo**

**12** Te níní súcuan cúu, te ni cacutútú cuéhē mil ñayuu, chi nde cájeñū i siquī jehé jnāhan i. Te xihna gā ni quejéé yá cahán yā jíin tēe cáscuáha jíin yá:

Coto má candíje ró levadura tēe grupo fariseo, chi suu cúu jnūhun stáhú cácahān de. Chi jíitē núu nuū ñayuu, nájñūhun ndécava levadura nuū ñújen pan. <sup>2</sup> Chi jnūhun stáhú un má quéndōo sáhí cuítí, chi ndíhi natūu ndíjin, te cuni ñayuu. <sup>3</sup> Núu súcuan te suni máá ró, táca jnūhun ni cacahān rō jeē tu ní jíin ñayuu, iin quivī te cuni vāha i. Te táca jnūhun ni cacahān sāhi ró jeē ndíhyú yehyí, iin quivī te cahān jee ñayuu yatā táca vehe.

**Jeē ní cachi yā ndé iin cúu jeē yūhu yó**

(Mt. 10.28-31)

<sup>4</sup> Cáhán rī jíin ró jíjnāhan ró, amigo: Ma yūhu ró coto ró ñayuu cahni yiqui cúñu rō, chi núu ni cajehni i rōhó, te tuá na vé cúu sáha ga i. <sup>5</sup> Te na cáchi rī nuū rō ndé iin yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te íyó poder yā chune ya rohó infierno. Suu máá yá cúu jeē yūhu ró jeē ma stfvi ró nuū yā.

<sup>6</sup> Te táca saa chi tú yahu ndéé tī, chi nde uhūn tī jeē uú centavo lulí. Te ni iin tí tu náā ni Yaā Dios jeē tu ndíto ya. <sup>7</sup> Te nagā ni cuu rōhó jíjnāhan ró, chi nde ndíhi ixi xíní rō je ni cahu ya. Núu súcuan te ma yūhu ró jíjnāhan ró, chi cánuú ndasí gá rō nuū yā vēsú cuéhē táca saa.

**Ñayuu jejnúhún Jesucristo  
nuū inga ñayuu**

(Mt. 10.32-33; 12.32; 10.19-20)

<sup>8</sup> Te cáhán rī jíin ró, táca ñayuu jeē cuajnúhún rúhū nuū inga ñayuu, suni súcuan ruhū, Yaā ní nduu tēe, cuajnúhún rí i nuū táca ndajéhé Yaā Dios. <sup>9</sup> Te táca

ñayuu jeē ma cuajnúhún rúhū nuū inga ñayuu, suni súcuan ma cuajnúhún rí i nuū táca ndajéhé Yaā Dios.

<sup>10</sup> Te núu ndé ñayuu cahān i siquī ruhū, Yaā ní nduu tēe, cone cáhnu ni Yaā Dios nuū i. Te núu ndé ñayuu cahān ndevāha i siquī Espíritu Santo, ma cóne cáhnu ni Yaā Dios nuū i.

<sup>11</sup> Te núu cuandeca i rōhó táca vehe i sinagoga nuū tēe cásandaā cuéhí, jíin núu tēe cácuu tohō, te ma nácani ndasí ni rō ndese stíó cuñí rō jnūhun nuū de. <sup>12</sup> Chi máá hora un te Espíritu Santo steén yā nuū rō ndese cahān rō. Achí yá.

**Siquī jeē ma tēnuū yō ndajniñu cúca**

<sup>13</sup> Yūcuán na te iin tēe íne nuū ñayuu cuéhē un ní cahān de jíin Jesús:

Maestro, cahān ni jíin ñani na jéē na táhú sáva de tahū na jíin de, áchí de.

<sup>14</sup> Te ni cahān yā jíin de:

¿Ndé iin ni jeni ruhū jeē ndacu ri jniñu tahū sáva tahū rō? Achí yá.

<sup>15</sup> Te ni cahān gā yā:

Condito ró máá ró jíjnāhan ró jéē ma ndíyo ni rō xūhun jíin táca gá. Chi vēsú cuéhē ndasí ndajniñu névāha iin tēe, te nasūu jéē yúcuan sáha jeē quéndōo ndetū de, áchí yá.

<sup>16</sup> Yūcuán na te ni cahān yā iin jnūhun yatá jíin i:

Ni iyo iin tēe cúca jeē névāha ñuhun jeē cúu vāha ndasí itu. <sup>17</sup> Te tēe cúca un ní nacani ni de: ¿Ndese sáha rí? Chi tuá ndé cuhun niñi rí. Achí de. <sup>18</sup> Te ni jeni ni de: Suhva na sáha rí. Na cánu rī táca yáca rí, te nasáha rí jeē náhnu ga. Te yūcuán chuvāha ndíhi rí niñi rí jíin táca ndajniñu rí. <sup>19</sup> Yūcuán na te cahān rī jíin ánuá rí: Vijna te cuéhē teyí névāha yó jéē canda cuéhē cuiyā. Na ndétātu yó te caji yō coho yó, te na cúsi ni yō, ni jeni ni de. <sup>20</sup> Te ni cahān Yaā Dios jíin de: Tēe cánéé cúu ró. Chi jecuáa vijna cuu rō, te táca jéē ní chuvāha ró, ¿ndé tēe cuu? Achí Yaā Dios jíin de. <sup>21</sup> Te súcuan

ndoho tāca tée jeē sacúca de máa de, te tu ndúcú de jeē quendōo ndetū de sáha Yaā Dios. Achí yá.

### Yaā Dios ndító ya yohó

(Mt. 6.25-34)

<sup>22</sup> Te ni cahān yā jíin tée cáscuáha jíin yá:

Núu súcuan te cáhān rí jíin ró: Ma nácani ndasí ni rō siquī jeē cótecu rō, núu ndese caji rō, ni siquī sahma, núu ndese cuhun rō. <sup>23</sup> Chi Yaā Dios ni sáha ya jeē técu rō jíin yiqui cúñu rō, te nagā ni cuu jeē ma cuáha ya jeē caji rō jíin jéē cúhun rō. <sup>24</sup> Condēhe ró ndese cátecu quití cácuu nájnūhun calú, chi tu cátaji tí, ni tu cánastútú tí jeē chuvéha tí, ni tú yacā tí. Te vēsú súcuan te máa Yaā Dios scáji yā tí. Te cánuú ndasí gá rō jíjnáhan ró vēsú tācá quití ún. <sup>25</sup> ¿Te ndé ĩn ró, á cuu scuéhnu ró máá ró sava metro gā, vēsú na nácani ndasí ni rō? <sup>26</sup> Te núu ma cúu sáha ró vēsú ĩn jniñu lúli súcuan, ¿te najehē cánacani ndasí ni rō siquī jeē caji rō jíin jéē cuhun rō?

<sup>27</sup> Condēhe jíjnáhan ró ndese jée ita tāca yúcū. Chi tu sájniñu, ni tu táú. Te cáhān rí jíin ró jeē ni rey Salomón, quiví ní ñúhun de sahma váha ndasí, tu ní ñúhun de sahma lúu súcuan nájnūhun ita ún. <sup>28</sup> Te núu súcuan jéhe Yaā Dios sahma lúu ita un jéē jée vijna te sajnē cayū nuū ñuhún, te nagā ni cuu rōhó jíjnáhan ró jéē ma sáha ya jeē nihín rō sahma. ¿Te naun tu cácanđije nihín ró jéē ndító ya rohó? <sup>29</sup> Núu súcuan te ma nácani cúhyá ni rō ndese caji rō ndese coho ró. <sup>30</sup> Chi tāca ñáyuu ñayivi jéē tu cácanđije cúu jeē máni siquī jeē yáha cándihvī ni i. Te máa ró jíjnáhan ró, chi íyó Tátá rō andiví, te jíní yā jeē cájini ñuhún ró tāca jéē yáha. <sup>31</sup> Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō. Yūcuán na te sáha ya jeē nihín rō tāca jéē yáha.

### Ndese coo cúca yó nde andiví

(Mt. 6.19-21)

<sup>32</sup> Ma yūhu ró jíjnáhan ró chi cácuu ró nájnūhun lanchi rí. Chi vēsú jecu-ni cácuu ró, te máa Tátá rō cúsiñi ni yā jeē quívicoo ró ñuu nuū ndácu ya jniñu. <sup>33</sup> Xico ró jeē cánevāha ró, te cuāha ró xúhun un núu ñáyuu ndahú. Te súcuan caya rō tahū rō nde andiví núu ma cútúhú, nájnūhun jeē chuvéha ró xúhun ini yijni. Chi nde andiví te ma náa jeē váha conevāha ró. Chi yūcuan má quívi ñacuñhá, ni ma cúu stívi tiquixin. <sup>34</sup> Chi nde nuū nihín rō tahū váha ró, yūcuan cúu nuū cóndihvī ni rō siquī.

### Jeē na cóo tūhva yó jéē ndéē yā

<sup>35</sup> Coo tūhva ró jíjnáhan ró jéē ndéē Jitoho rō, te coo ró nájnūhun mozo jeē nastíin i lámpara i. <sup>36</sup> Chi íyó tūhva i te cándetu i jeē ndéē patrón i jeē cuahán de vico nándāha. Chi núu ni ndee de te cahān de, te nune-ni i yéhyí jíjnáhan i. <sup>37</sup> Te yōhoyo ndetū mozo un núu ni ndee patrón i, te cuni de jeē cándito i. Jendaá cahán rí jíin ró jeē máa patrón sátūhva de máa de, te scúcōo de i mesa te caní de cohō i. <sup>38</sup> Te vēsú cucuéé de ndee de nde sava ñuú, chí jéē nēē gā, te núu cuni de jeē súcuan cándito mozo de, te yōhoyo ndetū i jíjnáhan i núu súcuan. <sup>39</sup> Te na jécūhun ni rō jeē cahán jnūhun yátá yáha: Tēe chíí vehe, núu ni jini de na hora quiñi ñacuñhá, te condito de, te ma cuáha de jnūhun jeē sacuíñhá vehe de núu. <sup>40</sup> Te suni súcuan coo tūhva ró jíjnáhan ró, chi núu tuú, te máa hora jeē tú na vé cájeni ni rō, te ndee ruhū, Yaā ní nduu tēe. Achí yá jíin de.

### Jnūhun mozo váha jíin mozo tu squícu

(Mt. 24.45-51)

<sup>41</sup> Yūcuán na te Pedro ni cajnūhún de ya:

¿A jíin máa-ni ná jíjnáhan ná cáhán ni jnúhun yátá yáha, chí suni cáhán ni jíin ndíhi ga ñayuu? achí de.

<sup>42</sup>Te ni cahán maá Jítoho yō:

Cáhán rī jíin ndé-ni ñayuu cúu nájñuhun mozo jeē ndito xinī te squícu vāha. Te máá patrón sáha de jeē condiso jníñu i coto i ñayuu vehe de, návāha scáji i máá hora. <sup>43</sup>Te yōhyo ndetū mozo un jēē núu ni ndee patrón, te cuni de jeē súcuan squícu vāha i. <sup>44</sup>Jendaá cahán rī jíin ró jeē cani de mozo un jēē cóto i ndíhi ndajníñu de. <sup>45</sup>Te núu jéni ni i jeē ma ndíji yachī patrón i, te quejéé i cani i tēe jíin ñahan cácuu jnáhan mozo i, te caji i coho i te najīni i, <sup>46</sup>núu súcuan te ndee-ni patrón quivī jeē tu ndétu i jíin hora jeē tú na vé jéni ni i. Te stóho xeēn de i, te squívi de i ndoho i jíin ñáyuu tu cásquícu.

<sup>47</sup>Te mozo jeē jíin i ndese nújñahan ni patrón i, te núu tu sátūhva i ni tu squícu i jeē cuní de, ndoho xeēn i jíin yujnu xíi.

<sup>48</sup>Te mozo jeē tu jíin i ndese nújñahan ni patrón i, te núu sáha i jniñu jeē cani de i, núu súcuan te cūhva-ni cani de i. Chí ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu téjññu ya i, suni cuehē gā nandacān yā nuū i.

### **Jeē siquí Jesús te cusíin ini ñayuu**

*(Mt. 10.34-36)*

<sup>49</sup>‘Ni quee rī jeē nájñuhun jeē scuíquín rī ñuhūn ini ñayívi, te suu cúu jeē cusíin ini ñayuu jeē siquí ruhū. Te cuní rī jeē yachī coo súcuan, návāha quívicoo ñayuu ndaha Yaā Dios. <sup>50</sup>Te íyó ññ jññdóho cánuú ndoho ri, te cúcuíhyá ndasí ni rī chí nde jññu ndoho ri, te ndusíi ni rī. <sup>51</sup>¿A cájeni ni rō jeē véji rī jeē cóyūcu mání ñayuu ñayívi? Cáhán rī jíin ró jeē tuú, chí sa suhva jeē cusíin ini ñayuu jeē siquí ruhū. <sup>52</sup>Chí nde vijna te quejéé jēē uhūn ñayuu ññ vehe, sásíin máá jíjnáhan, unī siquí uú, te uū siquí

uní. <sup>53</sup>Chí tátá cusíin ini jíin séhe yíi, te séhe yíi jíin tátá, te náná jíin séhe síhí, te séhe síhí jíin náná, te náná chíso jíin séhe jēnú, te séhe jēnu jíin náná chíso. Achí yá.

### **Jeē ni cáhán yā siquí seña andiví**

*(Mt. 16.1-4; Mr. 8.11-13)*

<sup>54</sup>Te suni ni cahán yā jíin ñáyuu cuehē ún:

Núu cájito ró jeē náne vicō ichi núu cáne niāndii, te cácahán rō jeē cuun saū, te súcuan cúu. <sup>55</sup>Te núu queé tachī vēji ichi sur te cácahán rō jeē nandii, te súcuan cúu. <sup>56</sup>Tēe stáhú-ni cácuu ró. Chí cájecūhun ni rō ndese stéén seña andiví jíin ini ñayívi, ¿te naun tu cájecūhun ni rō ndé ññ cúu ruhū jeē sáha ri tēcá jniñu jéhnú tiempo yáha?

### **Jeē cóndihvī ni yō jeē ma cóndee cuēchi siquí yō**

*(Mt. 5.25-26)*

<sup>57</sup>¿Te najehē tu cánacani ni maá ró ndé ññ cúu jniñu ndaā sáha ró? <sup>58</sup>Te núu ññ ñayuu quihīn i jíin ró nuū tohó jeē cacán i cuēchi siquí rō, núu súcuan te níní cuáhán rō jíin i ichi te condihvī ni rō sándaā rō jíin i. Chí núu tuú, te squívi i rōhó núu juez, te juez síáha de rōhó núu policía, te policía chune de rōhó vecāa. <sup>59</sup>Te jendaá cahán rī jíin ró jeē ma quéndá cuítī rō yūcuán chí nde chunaa rō ndíhi cuítī xūhun cájicān de. Te suni súcuan condihvī ni rō cahán ndahú ró jíin Yaā Dios, návāha ma ndácunehen ya cuēchi siquí rō. Achí yá jíin de.

### **Jeē cánuú nacani ni yō jeē stóo yó cuēchi yó**

**13** Te ññ quivī yúcuán ní quecoo jecu tēe, ni canacani de jññuhun nuū yā ndese ni candoho jecu tēe Galilea. Chí ná cájehni de quítī jeē socó de, te ni quecoo mozo Pilato ni cajehni tēe ún. <sup>2</sup>Te ni cahán Jesús:

Tēe Galilea un, ¿á cájeni ni rō jeē súcuan ni candoho de siquī jeē xeēn gā ni iyo cuēchi de vēsú tāca gā ñayuu Galilea? <sup>3</sup> Cáhán rī jín ró jeē tuú. Te rōhó jijnáhan ró suni jnahnū ndetū rō núu tú nacani ni rō jeē stóo ró cuēchi ró. <sup>4</sup> Te xahūn unī tēe jeē ní cotúú torre Siloé siquī de, te ni cajihī de, ¿á cájeni ni rō jeē ní casáha de cuēchi xeēn gā vēsú tāca gā ñayuu ñuu Jerusalén? <sup>5</sup> Cáhán rī jín ró jeē tuú. Te máá ró jijnáhan ró, suni jnahnū ndetū rō núu tú nacani ni rō jeē stóo ró cuēchi ró.

### **Jnūhun yátá núndēhe higo**

<sup>6</sup> Yūcuán na te ni cahān yā jnūhun yátá yáha jéē steén yā ndese cácuu ñayuu tu squícu jnūhun Yaā Dios:

Cácuu i nájnūhun iin nundēhe higo jeē iin nuū ñūhun iin tēe. Te ni jecondēhé de núu iin ndehē xinī, te tú na vé iin. <sup>7</sup> Te ni cahān de jín mozo sájniñu nuū ñūhun de: Vijna te je íyó unī cuiyā jeē quíji ri nducú rí ndehē xinī yújnu higo yáha, te tú na vé cúun xinī. Núu súcuan te cahnde rō, chi máá jéē sajnéñu nuū ñūhun, achí de. <sup>8</sup> Te ni cahān mozo un jín de: Stóo ní na cuíñi iin na cuiyā, te na nástáyā ná jéhē te chuhun ná jéhen. <sup>9</sup> Te na cóndēhe yó núu tú cuun ndehē inga cuiyā. Te núu tuú, te tahndē, achí mozo. Achí yá.

### **Jeē ní nasávāha ya iin ñahan quivī ndétátú**

<sup>10</sup> Te iin quivī ndétátú te stéén Jesús jnūhun ini vehe iī sinagoga. <sup>11</sup> Te íyó iin ñahan jeē ní cuu xahūn unī cuiyā kuhú ña. Chi iin tachī ni sáha jeē jíca tñhí ña, te tuá cúu cuiñi caca jnuu ña. <sup>12</sup> Te ni jito Jesús nuū ña, te ni cana ya ña, te ni cahān yā jín ña:

Vijna te nduvāha ní jéē kuhú ni.

<sup>13</sup> Te ni soó yá ndaha ya siquī ña, te ni nucuiñi jnuu-ni ña, te ni nacuatáhú ña nuū Yaā Dios. <sup>14</sup> Te tēe cújéñu ini vehe iī sinagoga, ni quiñi ni de nuū Jesús jeē

ní nasávāha ya ñahan un quivī ndétátú. Te ni cahān de jín ñayuu:

Iñū quivī iyó jéē sájniñu yó, te tāca quivī ún quijicoo ró nduvāha ró. Te quivī ndétátú chi ma cúu, achí de.

<sup>15</sup> Yūcuán na te ni cahān maá Jítoho yō jín de:

Tēe stáhú-ni cácuu ró. Quivī ndétátú ¿á tu cándají ró stiquī rō burro ró jéē quíscóho ró tí ndute? <sup>16</sup> Te ñahan yáha jéē cúu ña iin sēhe yucūn Abraham, chi nájnūhun ni conuhñi ña xahūn unī cuiyā ni sáha Satanás. ¿Te á tu íyó váha jeē nájnūhun nandají rí ña nuū cuehyī ndóho ña quivī ndétátú? Achí yá.

<sup>17</sup> Te jeē ni cahān yā súcuan, te tāca tēe cájito uhū de ya, ni cacucanu de. Te ndíhi ñayuu ún chi ni cacusiñi ni i jito i tācá jniñu jéñu sáha ya.

### **Jnūhun yátá siquī ndiquin mostaza**

(Mt. 13.31-32; Mr. 4.30-32)

<sup>18</sup> Te ni cahān yā:

Na cáhán rī iin jnūhun yátá návāha cuni rō ndese ndúcuehē ñayuu ndácu Yaā Dios jniñu nuū. <sup>19</sup> Ndúcuehē i nájnūhun jéñu iin ndiquin mostaza jeē jéquin iin tēe nuū ñūhun de, te ndúu nájnūhun iin yujnu. Te cúu cáhnu, te tācá saa chi casáha tí tacá tí chiji ndaha ún. Achí yá.

### **Jnūhun yátá siquī levadura**

(Mt. 13.33)

<sup>20</sup> Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū: <sup>21</sup> Cúu nájnūhun levadura jeē ní quihin iin ñahan, te ni saca ña jín ún kilo harina, te ni ndaa ndíhi ñujen ni sáha. Achí yá.

### **Siquī jeē quiví yó yéhyí túu**

(Mt. 7.13-14, 21-23)

<sup>22</sup> Te jíca Jesús jeē cuahán yā ichi ñúu Jerusalén, te yáha ya tācá ñuu náhnu

jíin ñuu lulí, te steén yā jnūhun. <sup>23</sup> Te iin ñayuu ni cajñuhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíin i:

<sup>24</sup> Condihvī ni rō quivicoo ró ndaha Yaā Dios. Chí cúu nájnūhun iin yéhyí túú. Te cáhān rī jíin ró jeē iin quivī te cuehē ñayuu nducú i quivicoo i, te ma cúu ga. <sup>25</sup> Te quivī ún te sáha ri nájnūhun iin tēe chíf vehe jeē ndocuiñi de te nacasi de yéhyí. Te ichi yátá véhe cuiñi ró jíjnāhan ró, te scáján ró yehyí, te cahān rō: Nune ní yéhyí na quivicoo ná. Te cahān de jíin ró: ¿Ndé nuū véjicoo ró? Chí tu jíin rī rohó, achi de. <sup>26</sup> Yūcuán na te quejéé ró cahān rō jíin de: Ni cayeji ná ni cajihí ná jíin ní, te ini calle ñuu na ní steén ni jnūhun, achi rō. <sup>27</sup> Te cahān maá de: Cáhān rī jíin ró jeē tu jíin rī rohó ndé chí véjicoo ró. Cujiyo quingoo ró, chí ñayuu casáha jniñu néé cácuu ró. Achi de. <sup>28</sup> Te quivicoo ró núū ndahyú rō, te nacayihí yuhu ró jeē ndoho xeēn rō. Te coto ró núū Abraham jíin Isaac jíin Jacob jíin ndihí tēe ni canacani jnūhun Yaā Dios, cáyucú de ñuu nuū ndácu ya jniñu. Te rōhó, vésú cácuu ró yúcūn de, te quivicoo ró núū ndoho ró. <sup>29</sup> Te cuehē ñayuu, vésú tu cácuu i yucūn de, te quijicoo i ichi núū cáne niāndii jíin ichi núū quée niāndii, ichi norte jíin ichi sur. Te cucōo i mesa caji i staā ñuu nuū ndácu Yaā Dios jniñu. <sup>30</sup> Te sava ñayuu jeē vijna cácuu i sandihí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandihí. Achí yá.

**Jeē ní cucuíhyá ní yā siquī  
ñayuu ñuu Jerusalén**

(Mt. 23.37-39)

<sup>31</sup> Te maá quivī un ní quecoo jecu tēe fariseo, te ni cacahān de jíin yá:

Cujiyo ní quihín ní inga lado, chí cúni Herodes cahni de níhín, áchí de.

<sup>32</sup> Te ni cahān yā:

Cuángoo te castūhun ró nuū tēe mañoso un jeē ná tu jinū quivī cuu rī, chí vijna jíin sájnē quenehen ri tachí ini ñayuu, te nasávāha ri ñayuu cácuu. Te isá te jinu jniñu sáha ri, achi rō. <sup>33</sup> Chí cánuú jeē cáca ri quihín rī vijna jíin sájnē jíin isá, te jinū rī Jerusalén. Chí tēe cá-nacani jnūhun Yaā Dios, tu cájihí de inga lado, chí maá-ni ini ñuu Jerusalén cá-jehni i de. Achí yá.

<sup>34</sup> Rōhó ñuu Jerusalén, jéhni rō tēe cá-nacani jnūhun Yaā Dios, te jéhe ró yúū xiní tēe tájí Yaā Dios vējicoo nuū rō. Te cuehē jíin ni cuni rī nastútú rī sēhe ró, nájnūhun ndují jeē nastútú tí sēhe tí chiji ndijēn tí, te tu ní cúni rō. <sup>35</sup> Núu súcuan te vijna te stóo uun na ri rohó jíin sēhe ró. Te cáhān rī jíin ró jeē ndé vijna te ma cóto cuiti gā rō nuū rī, chí nde quiji quivī jeē cahān sēhe ró: Yōhyo vāha Yaā cúu Yaā véndiji jíin jniñu maá Jítóho yō Yaā Dios, achi i. Achí yá.

**Jeē ní nasávāha ya  
iin tēe cúhú cuehyī cuiñi**

**14** Te iin quivī ndétātu ní jehēn yā vehe iin tēe fariseo cujéhnu, ni jecaji yā staā jíin de. Te tāca gá tēe fariseo cájito yuhu de ya núu stfvi yá. <sup>2</sup> Te yúcuan íne iin tēe cúhú de cuehyī cuiñi, índichí de nuū yā. <sup>3</sup> Te ni cajñuhun yá tēe cástéén tutu ley Yaā Dios jíin táca tēe fariseo:

¿A íyó ley jeē nasávāha ri ñayuu cácuu quivī ndétātu, chí tuú? áchí yá.

<sup>4</sup> Te maá de tu ní cacahān cuiti de. Te ni jniñi ya tēe cúhú un, te ni nasávāha ya de, te ni cahān yā jeē na núhun de vehe de. <sup>5</sup> Te ni cahān yā jíin de jíjnāhan de:

¿Ndé iin rōhó núu burro ró chí stfquī rō ñingava tí ini pozo, te á tu yachí natava rō tí vésú quivī ndétātu cúu, chí naún? Achí yá.

<sup>6</sup> Te tu ní cúu stío cuiñi de ni iin jnūhun nuū yā jeē súcuan ni cahān yā.

### Jnūhun siquī ñayuu jéngoo vico

<sup>7</sup>Te ni jito Jesús jeē tée ni cataca ún, cánacāji de silla yinūhún gá nuū mesa cucōo de. Te ni cahān yā jnūhun yáha jíin de:

<sup>8</sup>Núu iin tēe cana de jeē quihín rō iin vico nándāha, te ma cucōo ró lugar nuū yinūhún gá. Chi núu súcuan te sanaa te je ni cana de iin tēe cújéhu ga vésú rohó. <sup>9</sup>Te quee tēe ni cana rōhó, te cahān de jíin ró: Ndonga, te na cucōo tēe yáha jíinā. Yūcuán na te cucanu rō jeē quihín rō cucōo ró ndé sandīhí na. <sup>10</sup>Chi sa suhva núu ni cana iin tēe rōhó, te cucōo ró ndé lugar sandīhí na. Te núu quee tēe ni cana rōhó, te cahān de jíin ró: Amigo, nehen cucōo ró iin lugar nuū yinūhún gá, achi de. Yūcuán na te ñayuu cáyūcu mesa jíin ró coto i jeē sajéhnu de rōhó. <sup>11</sup>Súcuan ni cahān rī jnūhun yáha návāha cuni rō jeē tāca ñayuu jeē sajéhnu i máá i, nuu i sáha Yaā Dios. Te ñayuu jeē snūū i máá i, ndujéhu i sáha ya. Achí yá.

<sup>12</sup>Te suni ni cahān yā jíin tēe ni cana ya yéji yā staā:

Núu sáha ró iin vico cúsamá chí jéé cuxíni, te ma cána ró ñayuu cácuu amigo rō, jíin ñani rō, jíin jnāhan ró, jíin ñayuu cucá. Chi núu súcuan te suni máá i nacana i rōhó, te súcuan nanihin rō jeē ni jéhe ró. <sup>13</sup>Chi sa suhva núu sáha ró vico, te cana ró ñayuu ndahú, ñayuu cuhndú, ñayuu chacuá, jíin ñayuu cuaá. <sup>14</sup>Te súcuan te quendōo ndetū rō, chi ma cúu nacuāha i nuū rō. Te nihin rō tahū rō quivī nátecu ñayuu ndaa, achí yá.

### Jnūhun yátá síquī vico cúxíni

<sup>15</sup>Te iin tēe yéji staā jíin yá, ni jini de jnūhun yáha, te ni cahān de jíin yá:

Yōhyo ndetū ñayuu jeē cáji staā nde ñuu nuū ndácu Yaā Dios jniñu, achí de.

<sup>16</sup>Yūcuán na te ni cahān Jesús iin jnūhun yátá jéé steén yā jeē cána Yaā

Dios ñayuu quivīcoo i ñuu nuū ndácu ya jniñu:

Iin tēe ni sáha de iin vico cáhnu cuxíni, te ni tají de mozo ni cana cuehē ñayuu. <sup>17</sup>Te máá quivī cuxíni, te ni tají de mozo de cuacana ñayuu jeē quíjicoo caji staā: Nehen ní jíināhan ní, chi je íyó túhva ndihí, achí mozo. <sup>18</sup>Te ndihí i ni cacahān i jeē na cóne cáhnu ni de chi ma quíngoo i. Iin tēe ni cahān de: Sáá ní jeen rī iin ñuhun te cánuú quícondēhe rí, te na cóne cáhnu ni de chi ma jeé rī. Achí de. <sup>19</sup>Te inga de ni cahān: Ni jeen rī uhūn yunta stiquī, te quihín rī coto ndee rī tī, te na cóne cáhnu ni de nuū rī chi ma jeé rī, achí de. <sup>20</sup>Te inga de ni cahān de: Sáá ní quijnāhan rī, te jeé yúcuan ma cúu jeé rī, achí de. <sup>21</sup>Te cuanuhun mozo un, te ni castūhún de nuū patrón de ndese ni cacahān ñayuu. Yūcuán na te ni quitī ni patrón, te ni cahān de jíin mozo de: Yachí quihín rō tāca calle náhnu jíin calle lulí, te cana ró ñayuu ndahú, ñayuu cuhndú, ñayuu chacuá, jíin ñayuu cuaá, na quíjicoo i vico, achí de. <sup>22</sup>Te ni jehēn mozo, te ni ndee de, te ni cahān de jíin patrón de: Je ni sáha ná jéé ni cáhān ní, te cúmani gā ñayuu te chitú vehe ní, achí de. <sup>23</sup>Te ni cahān tucu patrón: Quihín tucu ró táca calle jíin ichi, te cana fuerza rō ñayuu na quíjicoo i, návāha chitú vehe rī. <sup>24</sup>Chi cáhān rī jíin ró jeé ní iin tēe ni cana rī xihna ñúhún, ma cuáha cuitī rī jnūhun jeé cuxíni de vehe rī, achí de. Achí yá.

### Jnūhun jeē cánuú nacani vāha ni yō te condiquin yō Cristo

<sup>25</sup>Te cuehē ndasí ñayuu cándiquin i Jesús cuangoo i jíin yá, te ni ndió cóto ya nuū i, te ni cahān yā jíin i:

<sup>26</sup>Núu na-ni ñayuu cuní condiquin ruhū, te núu manī gā i jíin tátá i, náná i, ñasihí i, sēhe i, ñani i, cuāha i, vésú jíin ruhū, ma cúu cuu i ñayuu scuáha jíin rī. Te núu ndíhví gā ni i siquī jeé cóo vāha

maá i vēsú jeē cōndiquīn i ruhū, te suni ma cúu tucu. <sup>27</sup>Te na-ni ñayuu núu tu jéhe i jñūhun ndoho i jñūndóho vēsú nde cuu i jeē siquī jeē cōndiquīn i ruhū, te ma cúu cuu i ñayuu scuáha jíin rí. <sup>28</sup>Chi núu ndé iin ró cúní rō sáha ró iin vehe cáhnu, ¿á tu cánuú jéē xíhna gā cucōo ró te tava rō cuenta núu canda xūhun jéē sínu ró? <sup>29</sup>Chi núu tuú, te núu je ni je-quin rō cimientu, te tu cánda xūhun ró sínu ró, yūcuán na te tāca ñáyuu sácata i coto i róhó. <sup>30</sup>Te cahān i: Tēe yáha ní quejéé de sáha de vehe, te tu ní cánda de sínu de, achi i. <sup>31</sup>Te suni súcuan núu iin rey quihīn de cuajnáhan de jíin inga rey jeē véji siquī de, ¿á tu cánuú jéē xíhna gā cucōo de te nacani ni de núu canda uxī mil soldado jeē cuajnáhan de jíin inga rey jeē véji siquī de jíin ócō mil soldado? <sup>32</sup>Chi núu tú canda de, te níni jíicá gá véji inga rey, te tají de tēe cándiso jníñu, cajñūhún de na vé cuní inga rey jeē cuáha de nuū, te jecuiñī-ni. <sup>33</sup>Te máá ró jijnáhan ró, suni súcuan cánuú jéē xíhna gā nacani ni rō cahnde ni rō stóo ró ndihi jeē névāha ró, chi núu tuú te ma cúu cuu ró ñáyuu scuáha jíin rí.

### **Jñūhun yátá síquī ñīī**

(Mt. 5.13; Mr. 9.50)

<sup>34</sup>Te ñayuu cácandíje cácuu i nájnūhun ñīī. Vāha iyó ñīī, te núu ñīī ún na náā jeē uhvuá, ¿te ndese nduu uhvuā tucu? <sup>35</sup>Tuá cuajníñu cuítī, ni jeē chūhun ñayuu nuū ítu, ni jeē ndúu jēhen, chi máá cate ii-ni i. Tāca róhó jéē jíni sōho, na chúsóhó ró. Achí yá.

### **Jñūhun yátá síquī lanchi ní sana**

(Mt. 18.10-14)

**15** Te tāca tēe cástútú xūhun renta jíin táca gá tēe cásáha cuēchi, ni quecoo de nuū Jesús jeē cuni sōho de jñūhun cáhán yā. <sup>2</sup>Te tāca tēe grupo fariseo jíin tēe cástéén tutu ley Yaā Dios, ni cacahān de síquī yā:

Tēe yáha jétáhú de tāca tēe cásáha cuēchi te yéji de jíin, áchí de.

<sup>3</sup>Te ni cahān yā jñūhun yátá yáha jíin de:

<sup>4</sup>¿Ndé iin ró núu névāha ró iin ciento lanchi, te núu scuíta ró iin tí, te á tu stóo ró cúūn xico xahūn cuūn gā tí yucu, te quinanducú ró quítī ní sana ún ndé nanihīn ró tí? <sup>5</sup>Te núu ni nanihīn ró tí, te coso súcun ró tí, te cusī ni rō. <sup>6</sup>Te núu ni ndee rō vehe ró, te nastútú ró tācá amigo ró jíin ñáyuu yúcu yajni jíin ró, te cahān ró jíin i: Na cúsi ni yō, chi ni nanihīn ri lanchi ri jeē ní sana. Achi rō. <sup>7</sup>Te cáhán rī jíin ró jeē suni súcuan cúu nde andiví. Chi cúsi gā ni yā jíin iin ñayuu iyó cuēchi núu nacani ni i jeē stóo i cuēchi i, vēsú jíin cúūn xico xahūn cuūn ñayuu iyó ndāā jeē tuá jíni ñūhún nacani ni i.

### **Jñūhun yátá síquī ñahan ní scuíta xūhún**

<sup>8</sup>Te núu iin ñahan névāha ña uxī peso cāa, te núu scuíta ña iin, ¿á tu nastūñ ña lámpara te nastāa ña vehe, te nanducú yúcún ña nde nanihīn ña? <sup>9</sup>Te núu ni nanihīn ña, te nastútú ña tācá amiga ña jíin ñáyuu yúcu yajni jíin ña, te cahān ña jíin i: Na cúsi ni yō, chi ni nanihīn rī xūhun jéē ni scuíta ri. Achí ña. <sup>10</sup>Te cáhán rī jíin ró jeē suni súcuan cúsi ni tācá ndajéhé Yaā Dios síquī iin ñayuu iyó cuēchi núu nacani ni i jeē stóo i cuēchi i. Achí yá.

### **Jñūhun yátá síquī sūchi ní jéhēn jecó**

<sup>11</sup>Te ni cahān gā yā:

Iin tēe ni iyo uū sēhe yí de. <sup>12</sup>Te tēe suchí gá ni cahān i jíin tátá i: Tátā, tahú sáva ní ndajníñu ní, te cuāha ní sava cuu tahū ná, áchí i. Te ni tahú sáva de tahū ndíndúú i. <sup>13</sup>Te ni cuu jecu-ni quiví, te tēe suchí gá un ní stutú ndihi i ndajníñu i. Te ni quenda i cuahān i iin ñuu jíicá. Te yúcuan ní snāā i tahū i, chi ni jexin



cāhá i. <sup>14</sup>Te ná ni ndíhi ni jexín i, te ni quee ñn jnamā xeén ini ñuu ún, te ni quejéé cúmaní jeē cájí i. <sup>15</sup>Yūcuán na te cuanducú jniñu i nuū ñn tēe ñuu ún. Te ni tají de i cuahān i rancho de jeē cóto i quíní de. <sup>16</sup>Te cúní i caji i vēsú soō ndúchi jeē cáyeji quíní ún, návāha ndutú chíji i. Te ni ñn ñayuu tú na vé jéhe nuū i. <sup>17</sup>Yūcuán na te ni quejéé i nácani ni i: Tāca mozo casájniñu vehe tátá rí, íyó cuéhē staā cáyeji i. Te ruhū chí jí rí sóco yāhá. <sup>18</sup>Na quínuhun rí nuū tátá rí, te cahān rí jíin de: Tátā, ni sáha ná cuéchi nuū Yaā Dios jíin núu maá ní. <sup>19</sup>Vijna te nasūu gá tēe vāha cúu ná jēé cónaní ná sēhe ní. Te cuāha ní jnúhun cuu ná nájnuhun ñn mozo ni, achi rí. <sup>20</sup>Yūcuán na te ni naquihin i ichi cuanuhun i vehe tátá i.

<sup>21</sup>Te níni jíca gá vēji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de sucūn i, te ni techūhú de i. <sup>21</sup>Yūcuán na te ni cahān i jíin de: Tátā, ni sáha ná cuéchi nuū Yaā Dios jíin núu maá ní. Vijna te nasūu gá tēe vāha cúu ná jēé cónaní ná sēhe ní. Achí i. <sup>22</sup>Te maá tátá i chí sa ni cahān de jíin táca mozo de: Cuáquihín sahma vāha ga te chuhun ró i. Te chuhun ró ñn xehyu ndaha i, te chíhi ró ndíjēn jehē i. <sup>23</sup>Te quiquihín ró becerro xēhen, te cahni rō tī na cájí yō, chí sáha yó vico. <sup>24</sup>Chí sēhe yíí rí yāha, nájnuhun je ni jíhi i, te ni natecu i. Chí tu ní jíin rí ndé chí ní jēhēn i, te ni ndee i, achí de. Te ni caquejéé de cásáha de vico.

<sup>25</sup>Te sūchi jévāha, íne i nde rancho, te vēndiji i, te ni cuyajni i yatā véhe. Te ni jini i jeē cúu yaa te cájita jéhé ñayuu. <sup>26</sup>Te ni cana i ñn mozo, te ni cajnúhún i na vé cúu jeē cúu. <sup>27</sup>Te ni cachi mozo un núu i: Ni ndee ñani rō, te tátá rō ni jehni de becerro xēhen, chí ni ndee vāha i nuū de, achí mozo. <sup>28</sup>Yūcuán na te ni quítí ni sūchi jévāha, te tu ní cúní i ndívi i. Te ni quenda tátá i, te ni cahān ndahú

de jíin i jeē na ndívi i. <sup>29</sup>Te ni cahān i jíin tátá i: Níní sáha ná jniñu ndácu ní, te tu cúniñni cuítí ni na núu ní. Te tu jéhe ní vēsú ñn lítú núu ná, jeē sáha ná vico caji na jíin táca amigo na. <sup>30</sup>Te ni ndee sēhe ní yāha jeē ní jéxín cāhá i xūhun ní jíin táca ñahan. Te ni jehni ní becerro xēhen caji i, achí i jíin tátá i. <sup>31</sup>Yūcuán na te ni cahān de jíin i: Sēhē, róhó chí níni ndéé ró jíin rí, te ndíhi jeē névāha rí chí suni cuenta maá ró cúu. <sup>32</sup>Te vijna chí íyó vāha jeē sáha yó vico te cusíi ni yō. Chí ñani rō yāhá, nájnuhun ni jíhi i, te ni natecu i. Chí tu ní jíin yō ndé chí ní jēhēn i, te ni ndee i, achí de. Achí yá.

### Jnúhun yatá síquī mozo jeē ni stáhú de patrón de

**16** Te suni ni cahān Jesús jíin tēe cáscuáha jíin yá:

Ñn tēe cúca ní íyo ñn mozo de jeē ndíso jniñu nuū tāca gá mozo. Te ni cacahān jíin patrón un jēé mozo un snāá cāhá ndajniñu de. <sup>2</sup>Te ni cana de mozo un, te ni cahān de jíin: ¿Na jnúhun cúu yāha jēé nihín rí síquī rō? Nacuāha cuenta jniñu ndíso ró, chí ma cóndiso jniñu ga rō nuū mozo rí. Achí de. <sup>3</sup>Yūcuán na te jéni ni maá de: ¿Ndese sáha rí vijna? Chí patrón rí quenehen de jniñu rí. Te tú ndacuí rí jeē cáte rí ñuhun, te jeē cacán rí caridad chí cúcanu rí. <sup>4</sup>Núu súcuan te jíin rí ñn jeē sáha rí, návāha ñayuu cájeen nuū patrón rí, cuāha i vehe condee rí núu na quée quiví jeē quenehen de jniñu rí. <sup>5</sup>Te ni cana de ná ñn ná ñn tēe jeē cátaū nuū patrón de. Te ni cajnúhún de ñn: ¿Nasaa táu rō nuū patrón rí? <sup>6</sup>Te ni cahān tēe ún: ñn ciento barril aceite, achí de. Te ni cahān mozo un: Yāhá na cuāha rí lista rō, te cucōo yachí rō, te na sáha ró ñnga lista jeē úu xico uxí na, achí de. <sup>7</sup>Yūcuán na te ni cajnúhún de ñnga tēe: Te róhó, ¿nasaa táu rō? Te tēe un ní cahān de: ñn ciento cajón trigo, achí de. Te ni cahān de jíin tēe

ún: Yáhá na cuáha ri lista rō, te na sáha ró inga lista jeē cuún xico na, áchí de. <sup>8</sup>Yūcuán na te patrón ni cahān de: Nacā jeē ndichí ní sáha tēe cúnéé un, áchí de. Te cāhán rī jín ró jeē ñayuu ñayīvi yáha, ndichí gá casáha i jeē quendōo vāha i nuū jnāhan i, vēsú ñayuu cācandíje nuū Yaā Dios.

<sup>9</sup>Núu sūcuan te cāhán rī jín ró jeē ndichí gá na sáha ró vēsú jeē ni sáha mozo ndichí un. Chi ini ñayīvi yáha nuū yīhi cuēchi, na sáha ró jniñu vāha jín xūhun ró, cuāha ró núu ñayuu ndahú, nāvāha vēsú núu ni ndihi xūhun ró ñayīvi yáha, te quīvicoo ró andiví núu coo vehe ró ní cāni.

<sup>10</sup>Tēe jeē squícu vāha jín ñin jniñu lúli-ni, suni squícu vāha de jín jniñu cāhnu. Te tēe jeē stahú jín ñin jniñu lúli-ni, suni stáhú de jín jniñu cāhnu. <sup>11</sup>Núu sūcuan te núu tu squícu vāha ró jín xūhun jeē iyó ñayīvi yáha nuū yīhi cuēchi, te ma cuáha ya jeē vāha cuu ró ní cāni andiví. <sup>12</sup>Te núu tu squícu vāha ró jín ndajniñu jeē ni jéhe núu ya nuū rō ñayīvi yáha, te ma cuáha ya tahū cuu ró ní cāni.

<sup>13</sup>Ni ñin mozo ma cúu cuajniñu de nuū uū patrón. Chi quitī ni de nuū ñin te coo maní de jín inga, chí squícu vāha de nuū ñin te sájéé ni de nuū inga. Te suni sūcuan ma cúu cuajniñu ró núu Yaā Dios te núu mání siquī xūhun ndíhvi ni rō, achí yá.

<sup>14</sup>Te tēe fariseo ni casacatā de nuū yā jeē ní cajini de tāca jnūhun cāhán yā, chí tēe cútóo xūhun cácuu de. <sup>15</sup>Te ni cahān yā jín de:

Máá ró casáha ró jéé tēe ndaā cácuu ró núu ñayuu. Te Yaā Dios chí jín yā ndese cáa ini anuá rō. Chi jniñu cájeni ni ñayuu jeē jniñu jéhnu cúu, te nuū Yaā Dios chí jniñu néé cúu.

### **Siquī ley Yaā Dios jín siquī jeē ndácu ya jniñu**

<sup>16</sup>Nde ná tu quiji Juan tēe scuándute, te ni iyo ley jeē ni jéhe Yaā Dios nuū Moisés, te suni ni castéén tāca tēe cānacanani jnūhun ya. Yūcuán na te ná ni quiji Juan, te ni quejéé jítē núu jnūhun vāha ndese ndácu Yaā Dios jniñu. Te tāca ñayuu nducú ndéyí i quívicoo i ndaha ya.

<sup>17</sup>Te yí gá cúu jeē nāā ñin letra nuū tútu ley yā vēsú jeē nāā andiví jín ñayīvi, chí squícu ndihi jnūhun cāhán.

### **Siquī jeē ma stóo jnāhan tēe jín ñahan**

(Mt. 19.1-12; Mr. 10.1-12)

<sup>18</sup>Núu ñin tēe stóo de ñasihí de te qui-jnāhan de jín inga ñahan, núu sūcuan te cásiquí ndéé de ña. Te núu ñin tēe con-deca de ñahan ní ndusín, suni cásiquí ndéé de ña, achí yá.

### **Jnūhun tēe cúca jín Lázaro**

<sup>19</sup>Te ni cahān gā yā:

Ni iyo ñin tēe cúca, ní ñuhun de sahma lúu vāha ndasí. Te ndiquiví ni iyo vāha ndasí jéé ní yeji de. <sup>20</sup>Te suni ni iyo ñin tēe ndáhú, nání de Lázaro, néne de yéhyí tēe cúca un, te ní cāhnu de ñin ndíhyi. <sup>21</sup>Te mání cúní de jeē ndutú chíji de jín stāa cuēchi jeē stívi tēe cúca un. Te quécoo ina te cānayuu tí nuū ndíhyi de. <sup>22</sup>Te ni jihí tēe ndáhú un, te tācá ndajéhé Yaā Dios cuangoo ya jín ánuá de nde andiví nuū néne Abraham. Te suni ni jihí tēe cúca un, te ni quindūji de. <sup>23</sup>Te tēe cúca un xeēn ndóho de ñe de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jín de. <sup>24</sup>Yūcuán na te ni cana cóhó de: Tātā Abraham, cundáhú ni ni sáña, te tají ní Lázaro, na quíchundaji de xiní ndáha de nuū ndúte, te quiji de stáji de yáá ná. Chi xeēn ndóho ná núu

yáñuhūn yāhá. Achí de. <sup>25</sup> Te ni cahān Abraham jíin de: Séhē, nucūhun ni rō jeē ni níhīn rō ndīhī jeē váha ná ni cotecu rō, te Lázaro chi sa suhva jnūndóho ni nihīn de. Te vijna je ni ndusiī ni de yāhá, te rōhó chi ndóho rō jíñā. <sup>26</sup> Te suni íyó ñin jeē cunú téyí, ñne mēhñu yó jíjnáhan yó. Te ñayuu cáhiin yāhá, vēsú cáconi i yāha i jeē i nuū rō, te ma cúu. Te ni ma cúu yāha máá rō quijicoo rō yāha. Achí Abraham. <sup>27</sup> Yūcuán na te ni cahān tēe cúcá: Núu súcuan te cáhán ndahú ná jíin ní, Tátā Abraham, tají ní Lázaro na quíhīn de vehe tátá na. <sup>28</sup> Chi íyó úhūn gā ñani ná, te na quícachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yāha, áchí de. <sup>29</sup> Te ni cahān Abraham jíin de: Je cánevāha i tutu jeē ní tee Moisés jíin táca tēe ni canacani jnūhun Yaā Dios. Suu yūcuán na chúhun ni i, áchí Abraham. <sup>30</sup> Te ni cahān tucu tēe cúcá: Vēsú súcuan, Tátā Abraham, te núu ñin ñayuu ni jíhī quihīn nuū i, yūcuán na te nacani ni i jeē stóo i cuēchi i, áchí de. <sup>31</sup> Te ni cahān Abraham jíin de: Núu tu chúhun ni i jnūhun ni nacani Moisés jíin táca tēe ni canacani jnūhun Yaā Dios, suni ma candíje cuítī i núu natecu ñin ndiyi quihīn nuū i, áchí de.

**Xeēn coo siquī ñayuu squívi jnāhan nuū cuēchi**

(Mt. 18.6-7, 21-22; Mr. 9.42)

**17** Te ni cahān Jesús jíin tēe cás-cuáha jíin yá:

Máni íyó jēē nducú squívi ñayuu nuū cuēchi. Te nacā xeēn ndoho ñayuu jeē squívi jnāhan nuū cuēchi. <sup>2</sup> Vāha ga núu ni conuhni ñin yōso cáhnu sucūn i te quēe i chíji ndute mar, vēsú jeē squívi i ñin sūchi lúlí yāha núu cuēchi. <sup>3</sup> Coto ma sáha rō súcuan jíjnáhan rō.

<sup>4</sup> Te núu jnāhan rō sáha de cuēchi siquī rō, te cahān rō nuū de. Te núu nacani ni de, te cone cáhnu ni rō nuū de. <sup>4</sup> Te

núu uxā jínu jeē ñin quívī sáha de cuēchi siquī rō, te núu uxā jínu nácani ni de te cahān de jíin rō jeē cone cáhnu ni rō chi ma sáha ga de, te cánuú cone cáhnu ni rō nuū de. Achí yá.

**Jeē yóhoyo cújéhnu jnūhun cándíje**

<sup>5</sup> Te tēe cácuu apóstol ni cacahān de jíin Jítóho yō:

Sáha ní jēē nihīn ga candíje ná jēē sáha Yaā Dios jeē cájicān na núu yā, achí de.

<sup>6</sup> Te ni cahān maá Jítóho yō jíin de:

Núu cáncandíje rō vēsú ñin tíhli-ni, nájnūhun ñin ndiquín mostaza jeē tíhli-ni cáa, te cuu cahān rō jeē nuyūhndu yāha na quénda te nucondichi nde nuū mar, te coo nájnūhun cahān rō.

**Jeē cánuú squícu vāha yó núu yā**

<sup>7</sup> Ndé ñin rō íyó mozo rō jeē jítu de chí ndíto de quítī ndéca rō, te núu ni najinū de vehe rō, te tu cáhán rō jíin de jeē cúcōo de caji de staā. <sup>8</sup> Chi sa suhva cáhán rō: Sáha rō ndeyu cuxíni rī, te caní rō cóhō rī. Te núu ni cuu ni yeji rī ni jíhi rī, yūcuán na te caji maá rō coho rō, cácahān rō. <sup>9</sup> Te cácahān rō jeē tu cánuú nacuatáhú rō nuū mozo núu ni sáha de jniñu ní ndacu rō, chí jeē cánuú sáha de cúu. <sup>10</sup> Te suni súcuan máá rō jíjnáhan rō, cácuu rō mozo Yaā Dios. Te núu ni casquícu rō táca jniñu ní ndacu ya nuū rō, te cahān rō: Tu cánuú nacuatáhú yá nuū rī, chí ni sáha rī máá-ni jeē cánuú sáha rī, achi rō. Achí yá.

**Jeē ní nasávāha ya uxí tēe ndóho cuehyī stehyú**

<sup>11</sup> Te jíca Jesús ichi cuahān yā ñuu Jerusalén, te ni yāha ya cuahān yā mēhñū región Samaria jíin Galilea. <sup>12</sup> Te ni jinū yā ñin ñuu, te uxí tēe ndóho cuehyī stehyú ni quendacoo de vejnahan de ya, te jíca ní cajecuiñī de. <sup>13</sup> Te ni cacana jee de:

Jesús, Maestro, cundáhú ni ni sáña, áchí de jijnáhan de.

<sup>14</sup>Te ni jito Jesús nuū de, te ni cahān yā jín de:

Cuángoo te steén rō maá ró nuū tāca sūtū jeē ní canduvāha ró, áchí yá.

Te níni cuángoo de te ni canduvāha-ni de. <sup>15</sup>Yūcuán na te ĩn-ni de ni nandió cóo de nuū Jesús, te cāhān jee de, nácuatáhú de nuū Yaā Dios jeē ní nduvāha de. <sup>16</sup>Te ni jecuiñi yitf de nuū yā, te ni jequin de nuū de nde nuū ññuhun, te ni nacuatáhú de nuū yā. Te tēe Samaria cúu de. <sup>17</sup>Te ni cahān Jesús:

¿A násūū ndihúxi de ni canduvāha? Te ĩn gā de, ¿naun tu ní cánandicó de nacuatáhú de? <sup>18</sup>¿A mánúhún-ni tēe ñnuu jicá yáha cúu jeē ní nandicó de nácuatáhú de nuū Yaā Dios?

<sup>19</sup>Te ni cahān yā jín tēe ún:

Ndocuiñi quinhun rō. Chi ni candíje ró jēe cuu nasávāha ri rohó, te jeē yúcuan ní nduvāha ró, áchí yá.

**Ndese coo quivī jeē ndíji ya ndacu ya jniñu**

(Mt. 24.23-28, 36-41)

<sup>20</sup>Te tēe fariseo ni cacajñuhún de Jesús ndé quivī quejéé jēe ndácu Yaā Dios jniñu ini ñayiví. Te ni cahān yā jín de:

Ma quéē ndijin jeē ndácu Yaā Dios jniñu. <sup>21</sup>Ni ma cúu cahān ñayuu: Yāha íne ya ndácu ya jniñu, chí: Yūcuan íne ya, achi i. Chi je ndácu Yaā Dios jniñu mēhñu ró jijnáhan ró. Achí yá.

<sup>22</sup>Yūcuán na te ni cahān yā jín tēe cáscuāha jín yá:

Quee tiempo jeē yóhoyo cúu ni rō coto ró jēe ndiji ruhū, Yaā ní nduu tēe, te ma cóto ró jijnáhan ró. <sup>23</sup>Te cahān ñayuu jín ró: Yāha íne ya, chí: Yūcuan íne ya, achi i. Te ma quíngoo ró condēhe ró, ni ma cóndiquin rō i. <sup>24</sup>Chi nájnūhun sáha taja jeē ndíndēe ĩn lado andiví te cúndijin nde inga lado, suni súcuan cuu quivī

ndíji ruhū, Yaā ní nduu tēe, chi ndíhi ñayuu coto. <sup>25</sup>Te jini ñúhún jēe xíhna gā ndoho xeēn rī, te ñayuu iyó vijna, squéhichī i ruhū. <sup>26</sup>Chi nájnūhun ni cuu quivī ni íyo Noé, suni súcuan cuu quivī ndíji ruhū, Yaā ní nduu tēe. <sup>27</sup>Chi quivī un ní cayeji i, ni cajihi i, ni canandāha i, ni cajēhe i sēhe síhí i jeē nándāha, nde ni jinū quivī jeē ni quivī Noé ini barco cáhnu jeē namí arca. Te ni cuun saū xeēn, te ni ndaa ndute ni cajihi ndíhi i. <sup>28</sup>Te suni súcuan ni cuu quivī ni íyo Lot. Ni cayeji i, ni cajihi i, ni cajeen i, ni caxícó i, ni cataji i itu, ni cajeni i vehe. <sup>29</sup>Te quivī jeē ní quenda Lot ini ñnuu Sodoma cuahān de, te ni cuun ñuhūn jín azufre ichi ándiví, te ni snāā ndíhi ñayuu. <sup>30</sup>Te suni súcuan coo quivī jeē ndíji ruhū, Yaā ní nduu tēe.

<sup>31</sup>Te quivī ún te ñayuu cáhiin yatā véhe, te ndajniñu i ññuhun ini vehe, cāhān rī jín i jeē ma ndívi i naquihin i, chi cánuú cunu yachī i jeē cácu i. Te suni súcuan ñayuu casájniñu nuū ítu, ma quinhun i vehe i jeē quíhin i ndajniñu i. <sup>32</sup>Te nucūhun ni rō ndese ni ndoho ñasihí Lot jeē ni jíhi ña. <sup>33</sup>Te núu ndé ñayuu cuní i cácu i nuū jnúndóho quiji nuū i jeē siquí ruhū, núu súcuan te jnahnū ndetū i níf cáni. Te núu ndé ñayuu, vésú na cúu i jeē siquí ruhū, te cotecu i níf cáni.

<sup>34</sup>Te cāhān rī jín ró jeē quivī ndíji ri te quixí uū tēe ĩn jito jecuāā, te ĩn de naquihin ri, te inga de ndōo, chi tu ní cándíje de. <sup>35</sup>Te coo uū ñahan jeē ndíco cáhnu, te ĩn ña naquihin ri, te inga ña ndōo. <sup>36</sup>Te uū tēe sájniñu de nuū ítu, te ĩn de naquihin ri, te inga de ndōo. Achí yá.

<sup>37</sup>Te jeē ní cajini de jñuhun yáha, te ni cacajñuhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jín de:

Nájnūhun jeē cutútú téji ndé-ni cúu nuū catú quití ní jíhī, suni súcuan coo tāca jéē ni cáhān rī ndé-ni cúu-ni nuū cáhīyo ñayuu.

**Jnūhun yátá síquī juez  
jíin ñahan viuda**

**18** Te ni cahān yā iin jnūhun yátá jíin de jeē cánuú jeē niní cácan tahú de, te ma ndīnuu ni de jíin. <sup>2</sup> Te ni cahān yā:

Ni iyo iin juez ini iin ñuu. Te ni tu ndíso iyo de nuū Yaā Dios, ni tu yúhú de nuū ní iin ñayuu. <sup>3</sup> Te suni ñuu un íyó iin ñahan ní ndóo ndáhú. Te ñahan un jéhén-ni jéhén-ni ña nuū de, jícan ña jeē na sándaā de síquī iin ñayuu jeē jíto uhū i ña. <sup>4</sup> Te cuehē quivī tu ní cúní de sándaā de, te yūcuán na te ni jeni ni de: Vēsú tu ndíso iyo ri nuū Yaā Dios, ni tu yúhú rí nuū ní iin ñayuu, <sup>5</sup> te ñahan viuda yáha, yōhyo stáhān ña ruhū, te jeē yúcuan na sándaā rī síquī ñayuu jeē jíto uhū i ña. Chi núu tuú, te quejéé rí jnaníní ni rī jeē quíji quíji ña. Achí de. Achí máá Jítoho yō.

<sup>6</sup> Te ni cahān gā yā:

Súcuan cúu jeē ni cáhān juez, tēe tú ndaā. <sup>7</sup> Te Yaā Dios, nasūu súcuan cúu ya, chí sándaā yā síquī jnīnu ñayuu ní nacāji ya jeē nduú ñuú cácahān ndahú i jíin yá. Chi jnama ya i nuū tāca jéē cájito uhū i. ¿Te á cuéé jnama ya i? <sup>8</sup> Cáhān rī jíin ró jeē yachī. Te quivī ndíji ruhū, Yaā ní nduu tēe, ¿á ñhīn gā ri ñayuu cácan-díje nihin ini ñayiví? Achí yá.

**Jnūhun yátá síquī tēe fariseo  
jíin tēe stútú xūhun renta**

<sup>9</sup> Te suni ni cahān yā jnūhun yátá yáha jíin jecu ñayuu jeē cájeni ni i jeē ñayuu ndaā cácuu i, te cájeni ni i jeē sava ga ñayuu tu cáhīyo ndaā:

<sup>10</sup> iin tēe fariseo cuahān de templo jeē cacān tahú de. Te iin tēe stútú xūhun renta suni cuacacān tahú de templo.

<sup>11</sup> Te tēe fariseo, índichi de, te súcuan ni jícan tahú de: Tátā Yaā Dios, na cú-tahū na núu ní, chí tu cúu ná nájnūhun cándaā sava ga tēe, tēe cuíhná, tēe néé, tēe cásiquí ndéē jnāhan cácuu de. Ni tu cúu ná nájnūhun cáa tēe yúcuan jéē stútú xūhun renta jeē scāa ga de jícan de nuū ñayuu. <sup>12</sup> Te uū jínu jeē semana iyó ndite ni na núu ní, te jéhe ná nuū ní iin iin síquī tāca úxí ndajnínu ñhīn na, áchí de. <sup>13</sup> Te tēe stútú xūhun renta, ni jecuíñí jíca de nuū templo, ni tu ní chūndeyí ni de jeē ndonehen de nuū de, chí sa suhva ni cani de yīqui jíca de jeē cucuíhyá ni de. Te ni cahān de: Tátā Yaā Dios, cundáhú ni ni sáña, chí tēe íyó cuéchi cúu ná, áchí de. <sup>14</sup> Te cáhān rī jíin ró jeē tēe stútú xūhun renta, ni jetáhú Yaā Dios de, te cuanuhun de vehe de. Te tēe fariseo chí tu ní jétáhú yá de. Chí ñayuu jeē sajeñnu i máá i, sa ndululí i. Te ñayuu jeē sálulí i máá i, sa ndujéñnu i. Achí yá.

**Jeē ni jícan tahú Jesús jehē sūchi lúlí**

(Mt. 19.13-15; Mr. 10.13-16)

<sup>15</sup> Te ni quecoo ñayuu jíin sūchi lúlí núu Jesús, jeē na sóo yá ndaha ya xiní i. Te tēe cáscuáha un ní cajini de jeē súcuan cúu, te ni cacahān de nuū ñayuu vējicoo jíin i. <sup>16</sup> Te máá Jesús ni cana ya de, te ni cahān yā:

Cuāha jnūhun na quíjicoo sūchi lúlí jíñā nuū rī, te ma cási rō jeē quíjicoo i. Chí ñayuu jeē ndió cóo ni i cani ni i nájnūhun sūchi yáha, suu i quíví ndaha Yaā Dios jeē ndacu ya jniñnu nuū i. <sup>17</sup> Te jendaá cahān rī jíin ró, núu iin ñayuu tú cuatáhú i jeē ndácu Yaā Dios jniñnu nuū i, nájnūhun jétáhú iin sūchi lúlí, ma quíví cuítí i ndaha ya, achí yá.

**Jnūhun tēe cúcá**

(Mt. 19.16-30; Mr. 10.17-31)

<sup>18</sup> Te iin tēe cújéñnu ni cajnūhún de ya:

Tēe vāha cúu ní Maestro. ¿Te na jniñu vāha sáha ná te nihin tahú na cotecu na ní cáni andiví? Achí de.

<sup>19</sup> Te ni cahān Jesús jín de:

¿Naun cáhān rō jeē tēe vāha cúu ri? Tú ni iin tēe vāha íyó, chi máá iin-ni Yaā Dios. <sup>20</sup> Je jíní rō tācá jniñu ní ndacu Yaā Dios: Ma cosiquí ndēē jnāhan rō. Ma cáhni rō ndiyi. Ma sacuíhná rō. Ma sajnūhún rō. Cuatáhú rō nuū tatá rō nuū naná rō. Achí yá.

<sup>21</sup> Te ni cahān maá de:

Tācá jniñu yáha je ni squícu ná ndé ná lulí ná, achí de.

<sup>22</sup> Te Jesús ni jini ya jnūhun yáha, te ni cahān yā jín de:

Iin na jniñu cúmani sáha rō núu súcuan. Xicó ndihi jeē névāha rō, te cuāha rō núu ñayuu ndahú. Te nde andiví cuāha ya jeē váha ndasí núu rō. Yūcuán na te quiji rō condiquin rō ruhū, achí yá.

<sup>23</sup> Te ná ni jini sōho de jnūhun yáha, te yōhyo ni cucuíhyá ni de, chi cúcá ndasí de. <sup>24</sup> Te jító Jesús jeē súcuan cucuíhyá ni de, te ni cahān yā:

Tēe cúcá chi yōhyo yíí quívicoo de ndaha Yaā Dios jeē ndacu ya jniñu nuū de. <sup>25</sup> Yachí gā yáha iin camello yaū yutícuí vēsú jeē quívi iin ñayuu cucá ndaha Yaā Dios jeē ndacu ya jniñu nuū i, achí yá.

<sup>26</sup> Te tēe ní cajini jnūhun yáha, ní cacahān de:

¿Ndé ñayuu cúu jeē cácu núu súcuan? Achí de.

<sup>27</sup> Te ni cahān yā jín de:

Ñayuu chi ma cúu squívi i máá i ndaha Yaā Dios, te máá yá chi cuu sáha ya, achí yá.

<sup>28</sup> Yūcuán na te ni cahān Pedro:

Sāña jijnáhan ná ní castóo ná ndihi jeē cánevāha ná, te cándiquin na níhín, achí de.

<sup>29</sup> Te máá yá ni cahān yā jín de:

Jendaá cahán rī jín rō jijnáhan rō, núu na-ni ñayuu stóo i vehe, chí tátá, chí ñani, chí ñasihí, chí séhe, jeē siquí jeē scáca i jnūhun jeē ndácu Yaā Dios jniñu nuū ñayuu, <sup>30</sup> núu súcuan te nanihín cuehē gā i ini ñayívi yáha, te tiempo quiji te cotecu i ní cáni, achí yá.

**Jeē ni cahān tucu ya jeē cúu yā**

(Mt. 20.17-19; Mr. 10.32-34)

<sup>31</sup> Te ni cana sñin ya ndihúxí uū tēe cás-cuáha jín yá, te ni cahān yā jín de:

Vijna je cuángoo yó ñuu Jerusalén. Te yūcuan squícu ndihi jnūhun ndese ndoho ruhū, Yaā ní nduu tēe, nájñūhun ni catee tēe ni canacani jnūhun Yaā Dios nde jenahán. <sup>32</sup> Chi ñayuu nastúu i ruhū nuū tēe nación Roma jeē cáyūcú Jerusalén cándacu jniñu. Te tēe un sácatā de nuū rī, te cahān neé de nuū rī, te tesihí de nuū rī. <sup>33</sup> Te cani de ruhū, te sáá te cahni de ruhū. Te nuū uní quiví te natecu rī. Achí yá.

<sup>34</sup> Te máá de tu ní cájecūhun cuítí ni de tāca jnūhun yáha. Chi jnūhun yíí cúu, te tu ní cúu jecūhun ni de jeē cahán yā.

**Jeē ní nasávāha ya iin tēe cuáá ñuu Jericó**

(Mt. 20.29-34; Mr. 10.46-52)

<sup>35</sup> Te ni cuyajni ya cuahān yā ñuu Jericó. Te iin tēe cuáá néne de yuhíchi, jícán de caridad. <sup>36</sup> Te ni jini sōho de jeē yáha cuehē ñayuu cuangoo i, te ni cajñūhún de naun cuángoo i. <sup>37</sup> Te ni cacahān i jín de jeē Jesús, tēe ñuu Nazaret, yáha ya cuahān yā. <sup>38</sup> Yūcuán na te ni cana jee de:

Jesús Sēhe yucūn David, cundáhú ni ni sáña, achí de.

<sup>39</sup> Te ñayuu cuangoo ichi núú yā, ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

<sup>40</sup>Yūcuán na te ni jecuñī Jesús, te ni cahān yā jeē na quíndeca i de. Te nuū ní cuyajni de nuū yā, te ni cajnúhun yá de:

<sup>41</sup>¿Na vé cuní rō jeē sáha ri jíin rō? achí yá.

Te ni cahān de:

Jeē na ndúndijin tinūu ná cuní na, áchí de.

<sup>42</sup>Te ni cahān Jesús jíin de:

Ndúndijin tinūu rō núu súcuan. Ni candíje rō jeē cuu nasávāha ri rohó, te jeē yúcuan ní nduvāha rō, áchí yá.

<sup>43</sup>Te ni ndúndijin-ni tinūu de, te ni ndiquín de ya, te nácuatáhu de nuū Yaā Dios. Te ndíhi ñayuu jeē ní cajito i, suni ni cacahān i jeē yóhyo vāha Yaā cúu Yaā Dios.

### Jnúhun Zaqueo

**19** Te ni quívi Jesús ini ñuu Jericó, te ni yāha-ni ya cuahān yā. <sup>2</sup>Te yúcuan íyó iin tēe cúca nání de Zaqueo, te cújéhnu de nuū tēe cástútú xúhun renta. <sup>3</sup>Te cúní de coto de návāha cuni de ndé iin cúu Jesús. Te tu ní cúu, chí cuehē ñayuu cuango i jíin yá, te ndiquí-ni cáa de. <sup>4</sup>Te jínu de ni cosnúu de. Te ni caa de xinī iin nuyühndú návāha coto de nuū yā, chí yúcuan yáha ya quihín yā. <sup>5</sup>Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachī nuu rō, chí jíni ñúhún jéē ndóo ri vehe rō vijna, áchí yá.

<sup>6</sup>Yūcuán na te ni cusī ni de, te yachī ni nanuu de, te ni jeca de ya cuahān de jíin yá vehe de. <sup>7</sup>Te ni cajito ñayuu jeē súcuan ni cuu, te ni cacahān i siquī yā jeē cuahán yā ndōo ya vehe iin tēe sáha cuēchi. <sup>8</sup>Yūcuán na te ni ndocuñī Zaqueo, te ni cahān de jíin máá Jítoho yō:

Vijna te sava ndíhi ndajníñu ná chí cuāha ná núu ñayuu ndahú. Te núu ni scáa ga na ní jicān na xúhun nuū ñayuu, te nacuāha ná úní gā siquī naquihin i, áchí de.

<sup>9</sup>Te ni cahān Jesús:

Vijna te vehe yáha je ni cācu iin tēe jeē ma jnahnú ndetū de, chí ni candíje de nájnūhun ni candíje jíi de Abraham.

<sup>10</sup>Chí ruhū, Yaā ní nduu tēe, ni quiji ri nducú rí ñayuu jeē jnahnú ndetū, te jnama ri i, áchí yá.

### Jnúhun yátá síquī uxí mozo jíin xúhun

<sup>11</sup>Te nuū ñayuu ní cajini tāca jnúhun yáha, ní cahān gā Jesús iin jnúhun yátá jéē steén yā ndese coo quívi ndíji ya. Chí je ni cuyajni ya ñuu Jerusalén, te cájeni ni i jeē víjna ñúhún quejéé jéē ndácu ya jniñu sáha Yaā Dios. <sup>12</sup>Te ni cahān yā:

Iin tēe cújéhnu cuahān jicá de inga nación, návāha nihín jniñu de cuu de rey, te ndíji de ndacu de jniñu. <sup>13</sup>Te nde ná tu quihín de, te ni cana de uxí mozo de, te nuū iin iin i ni jēhe de iin xúhun jéē ndeé yahu ndasí. Te ni cahān de jíin i: Sájniñu rō jéē na ndúcuehē xúhun yáha jíjnáhan rō níní jéē quihín rí te ndee rí, achí de. <sup>14</sup>Te ñayuu nación de cáquiti ni i nuū de, te ni cataj i jecu tēe cándiso jniñu cuango yatā de jeē cahān: Tu cánujnahan ni ñayuu nación na jéē cuáha ní jniñu nuū tēe yáha jéē cuu de rey nuū i, áchí. <sup>15</sup>Te vésú súcuan te ni nihín jniñu de cuu de rey, te vendíji de nación de. Te nuū ní ndee de, te ni ndacu de jniñu jeē na quíjicoo mozo jeē ni jéhe de xúhun núu, návāha na cúní de nasaa ni canihín iin iin i siquī. <sup>16</sup>Te ni quee iin mozo un núu de, te ni cahān i: Iin xúhun jéē ni jéhe ní núu ná, ni nduu uxí, achí i. <sup>17</sup>Te ni cahān maá rey: Vāha mozo cúu rō, te vāha ni sáha rō. Chí ni squícu vāha rō jíin iin jniñu lúlí-ni, te vijna te sáha ri jeē cújéhnu rō ndacu rō jniñu nuū uxí ñuu jñí ri, achí de. <sup>18</sup>Te ni quee inga mozo, te ni cahān i: Iin xúhun jéē ni jéhe ní núu ná, ni nduu uhún, achí i. <sup>19</sup>Te suni ni cahān de jíin mozo un: Róhó, cújéhnu rō ndacu rō jniñu nuū uhún ñuu

jní ri, achí de. <sup>20</sup> Te ni quee inga mozo, ni cahān i: Yāha nácuāha ná xúhun ní, chí ni chuvāha ná ini ĩn pañuelo. <sup>21</sup> Chí ni yūhu ná nihín, chí tēe xeēn cúu ní. Chí cuehē gā nándacān ní vēsú jeē ni jéhe ní, te cuehē gā cuní ni vēsú jeē cúu sāha mozo ni, achí de. <sup>22</sup> Yūcuán na te ni cahān rey: Mozo neé cúu ró núu súcuan, te jín jnūhun ni cahān rō te sándā ri jeē iyó cuechi ró jēē tu ní sájniñu ró jín xúhun rí. Chí jéni ni rō jeē tēe xeēn cúu ri, te cuehē gā nándacān ri vēsú jeē ni jéhe ri, te cuehē gā cuní ri vēsú jeē cúu sāha mozo rí. <sup>23</sup> Núu súcuan ¿te naun tu ní chúne ró xúhun rí vēsú nuū banco? Te jeē ní ndee rí te naquiñin ri xūhun rí nde jín séhe xūhun núu. Achí de. <sup>24</sup> Te ni cahān de jín ñayuu cáhiin yūcuán: Quende xūhun jínā nuū i, te cuāha ró núu mozo jeē névāha uxí, achí de. <sup>25</sup> Te ñayuu un ní cacahān i jín de: Te ndese, chí je névāha de uxí, achí i. <sup>26</sup> Te ni cahān tucu rey: Cáhán ri jín ró jeē ñayuu je névāha, sa quiji ga nuū i, te conevāha cuehē i. Te ñayuu jeē tu névāha, sa cujiyo-ni vēsú jecu jeē névāha i. <sup>27</sup> Te tēe jeē cájito uhū ruhū, jeē tu ní cánujnahan ni de jeē cuu ri rey nuū de, cuáquiin de na quíjicoo de yāhá. Te cahni rō de coto ri, achí de. Achí Jesús.

### Jeē ni quívi Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

<sup>28</sup> Te nuū ní ndihi ni cahān yā jnūhun yāha, te ni jica ga yā cuahān yā ñuu Jerusalén. <sup>29</sup> Te nuū ní cuyajni ya ñuu Betfagé jín ñuu Betania, yajni nuū íne yucu nání yucu Olivos, te ni tají yá uū tēe cáscuāha jín yá jeē quíngo de. <sup>30</sup> Te achí yá jín de:

Cuáhán ñuu lulí íne ichi núu. Te núu ni quívi ró, te nihín rō ĩn burro núhní tī, jeē ní ĩn tēe ná tu coso de tī. Te ndají ró tī quiji ró jín tī. <sup>31</sup> Te núu ndé ĩn cajnūhún naun cándají ró tī, te cahān rō jín: Máá

Jítóho yō jíní ñúhún yá tī, achí rō. Achí yá.

<sup>32</sup> Te cuango tēe ni tají yá, te ni canihín de tī nájnūhun ni cahān yā jín de. <sup>33</sup> Te jeē cándají de tī, te ni cacahān jítóho tī jín de:

¿Naun cándají ró burro ri? achí.

<sup>34</sup> Te ni cacahān de:

Máá Jítóho yō jíní ñúhún yá tī.

<sup>35</sup> Te ni ndecoo de jín tī nuū Jesús. Te ni casoó de sahma de siquī tī, te ni casáha de jeē ní jecosó yā siquī tī. <sup>36</sup> Te ná-ni cuahān yā, sáá cáscáá ñayuu sahma i ini ichi. <sup>37</sup> Te nuū ní cuyajni ya nuū cúun ichi yucu Olivos, te ndihi ñayuu cácdíje jeē cándiquín i ya, ni caquejéé i cácsuñi ni i, te cácana jee i jeē yóhoyo vāha Yaā cúu Yaā Dios siquī táca jniñu jéhnu ni sāha ya ni cajito i. <sup>38</sup> Te achí i:

Yóhoyo vāha Yaā cúu Rey jeē véji jín jniñu máá Jítóho yō Yaā Dios. Te sāha ya jeē cóo maní yō jín Yaā Dios andiví. Te yóhoyo cújéhnu Yaā Dios, achí i jijnáhan i.

<sup>39</sup> Yūcuán na te jecu tēe fariseo cáhiin mēhñu ñayuu cuehē ún, ní cacahān de jín yá:

Maestro, cahān ni núu ñayuu cándiquín nihín jēē na cási i yuhu i, achí de.

<sup>40</sup> Te ni cahān Jesús:

Cáhán ri jín ró jeē núu ñayuu yáha na cási i yuhu i, te táca yúu chí cana jee, achí yá.

<sup>41</sup> Te nuū ní cuyajni ya Jerusalén, te ni jito ya ñuu ún, te ni ndahyū yā siquī.

<sup>42</sup> Te ni cahān yā:

Róhó ñayuu Jerusalén, yóhoyo ni cuu ni ri jeē na jécūhun ni rō jeē cuu ndu-maní rō jín Yaā Dios sāha ri. Te siquī jeē tu cácdíje ró, te vijna chí ma cúu ga jecūhun ni rō. <sup>43</sup> Chí quee quíví jeē coo jnūndóho, te ñayuu cájito uhū rohó, cuicó ndúu i ñuu rō, te casi cutú i jín yúu, te táca lado ndonda i siquī rō.



<sup>44</sup>Te ndihí vehe scótúú i, te cahni i róhó jíjnáhan ró. Te ma stóo i ni iin vehe jeē cóso jnáhan ga yuū. Chi ni quiji ri nde nuū Yaā Dios jeē jnáma ri rohó, te tu ní cácandíje ró. Achí yá.

### Jeē ní quenehen ya ñayuu ini templo

(Mt. 21.12-17;

Mr. 11.15-19; Jn. 2.13-22)

<sup>45</sup>Te ni quívi ya ini templo cáhnu, te ni quejéé yá quenehen ya táca ñayuu cá-jeen quiiti te cánaxico nuū ñayuu jeē socō i. <sup>46</sup>Te ni cahān yā jíin i:

Yósó núu tútu ii jeē cahán Yaā Dios: Vehe ri chi vehe nuū cájicān tahu cúu, áchí Yaā Dios. Te máá ró jíjnáhan ró, chi nájnūhun yaū cava ñacuihna ní canasáha ró, áchí yá.

<sup>47</sup>Te ndiquiví ni steén yā jnūhun ini templo. Te sutū cácujeñnu jíin tée cástéén tutu ley Yaā Dios jíin tée cácu-jeñnu nuū ñayuu ñuu ún, cánducú de modo ndese cahni de ya. <sup>48</sup>Te tu cáni-hin de modo sáha de, chi ndivii ñayuu yōhyo cájetáhú i cájini nahín i jnūhun cáhán yā.

### Siquí jeē ndíso jniñu Jesús

(Mt. 21.23-27; Mr. 11.27-33)

**20** Te iin quívi steén yā jnūhun nuū ñayuu ini templo, te nácani ya jnūhun jeē jnáma Yaā Dios ñayuu. Te ni quecoo sutū cácujeñnu jíin tée cástéén tutu ley Yaā Dios jíin táca tée jeñnu cándacu jniñu. <sup>2</sup>Te ni cacahān de:

Castūhún, ¿ndé ní nihin jniñu ró jéé sáha ró jniñu yáha? ¿Te ndé iin ni tee jniñu siquí rō jeē sáha ró súcuan? Achí de.

<sup>3</sup>Te ni cahān Jesús jíin de:

Suni ruhū cajnūhun rí rohó iin jnūhun jíjnáhan ró. Castūhun núu rí: <sup>4</sup>¿Nde iin ni tee jniñu siquí Juan jeē ni scuándute de? ¿A Yaā Dios chí táca tée? Achí yá.

<sup>5</sup>Yūcuán na te ni candajñūhun máá de:

¿Ndese cahān yō? Núu cahān yō jeē Yaā Dios ni tee ya jniñu un síquí Juan, te cahān de jíin yó: ¿Najehē tu ní cácan-díje ró de núu súcuan? <sup>6</sup>Te núu cahān yō jeē ñayuu ni catee jniñu un síquí de, te ndivii ñayuu cahni i yóhó jíin yūú, chi cácandíje i jeē tée ni nacani jnūhun Yaā Dios ni cuu ndíje Juan, achí de cácahān maá de.

<sup>7</sup>Te ni cacahān de jeē tu cájini de ndé iin ni tee jniñu siquí Juan jeē ni scuándute de. <sup>8</sup>Yūcuán na te ni cahān Jesús:

Ni ruhū, suni ma cáchi rí nuū rō ndé iin ni tee jniñu siquí rí sáha rí jniñu yáha, áchí yá.

### Jnūhun yátá siquí tēe néé cásajniñu nuū uva

(Mt. 21.33-44; Mr. 12.1-11)

<sup>9</sup>Te ni quejéé Jesús cahán yā jnūhun yátá yáha jíin ñayuu ún:

Iin tēe ni nachuhun de cuehē uva nuū ñūhun de. Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahán de inga ñuu. <sup>10</sup>Te máá tiempo ndutútú uva, te ni tají de iin mozo cuahān nuū tēe cásajniñu ún, návaha naquihin de sava ndehē uva un. Te tēe un ní cacani de mozo, te ni canatají de i cuanuhun i súcuan-ni. <sup>11</sup>Te tēe chíí uva ni tají tucu de inga mozo cuahān. Te tēe cásajniñu ún, suni ni cacahān ndevāha de nuū i, te ni cacani de i, te ni canatají de i cuanuhun i súcuan-ni. <sup>12</sup>Te tēe chíí uva ni tají tucu de inga mozo cuahān. Te tēe cásajniñu ún, suni ni castújí de mozo un, te ni cascúnu de i.

<sup>13</sup>Yūcuán na te ni cahān tēe chíí uva: ¿Ndese sáha rí? Na tají rí sēhe rí jeē maní rí jíin, chi sanaa te núu ni cajito de i te coo yínúhún de nuū i. Achí de. <sup>14</sup>Te tēe cásajniñu ún, ná ni cajito de jeē véji i, te ni cacahān de: Tēe chíí táhū cúu jeē véji ún. Na cáhni yō de, te ndōo tahū de cuu

maá yó, achí. <sup>15</sup>Te ni caquenehen de i inga lado, te ni cajehni de i, achí yá.

Te ni cajñuhun yá de:

Núu súcuan ¿te ndese sáha tēe chíi uva jíin tēe cásájniñu ún? <sup>16</sup>Ndiji de te cahni de tēe un jíjnáhan, te cuáha de ñuhun cáá uva un núu inga sava tēe sájniñu nuu, achí yá.

Te jeē ní cajini ñayuu jñuhun yáha, te ni cacahān i:

Aí, núu ma cóo cuiti súcuan víi, achí i.

<sup>17</sup>Te ndéhe yá nuu i jíjnáhan i, te ni cahān yā:

Núu súcuan ¿te á cájecūhun ni rō jñuhun yáha jēe yosó núu tútu i jēe cúu ri nájñuhun iin yuū? Chi achí tutu:

Yuū jēe ní casquéhichī tēe cájeni vehe, yuū yáha nduu jēe quítuu vehe.

Achí. <sup>18</sup>Te ñayuu tu cá candíje, ndoho i nájñuhun ndóho ñayuu jēe cotúú siquī yuú te jnánú i. Te quivī sándaā Yaā Dios cuēchi, te ñayuu tu cá candíje, ndoho i nájñuhun ndóho ñayuu jēe nīnga yuū siquī i te cundihī i sáha. Achí yá.

### Siquī xúhun renta

(Mt. 21.45-46; 22.15-22; Mr. 12.12-17)

<sup>19</sup>Yūcuán na te sutū cácujuhnu jíin tēe cástéén tutu ley Yaā Dios, ni cacuni de jñi de ya maá hora un. Chi ni cajecūhun ni de jēe siquī maá de cúu jñuhun yátá ní cahān yā siquī tēe cásájniñu nuu uva jíin tēe cájeni vehe. Te tu ní cúu, chi cáyūhú de jēe quítū ní ñayuu. <sup>20</sup>Yūcuán na te ni catajī de jecu tēe cuacoto yuhu de ya, te tēe un cásáha-ni de jēe tēe ndaā cácuu de. Te cánducú de sáha de jēe cahán yā iin jñuhun jēe nihín de cuēchi siquī yā, te quindeca de ya nuu tēe cúu gobernador.

<sup>21</sup>Te ni cacahān de:

Maestro, cájini na jēe cahán vāha ní, te stéén ndaā ní. Te tu sáha ní cuenta ndese cúu iin iin ñayuu, chi inuú-ni sáha ní jíin i. Te stéén ndaā ní ndese squícu ñayuu nuu Yaā Dios. <sup>22</sup>Núu súcuan te cachi ní: ¿A íyó vāha jēe chúnnaa yō renta nuu rey

nación Roma jēe jñi nación yō, chí tuú? achí de.

<sup>23</sup>Te ni jini yā jēe cáculi de stáhú de ya, te ni cahān yā jíin de:

¿Najehē cájito ndee rō ruhū? <sup>24</sup>Stéén iin xúhún na cóto ri. ¿Ndé iin nuu cúu jēe ndeé nuu xúhun yáha, te ndé síhví cúu jēe ndeé yāhá? achí yá.

Te ni cacahān de jíin yá:

Nuu jíin síhví rey un cúu, achí de.

<sup>25</sup>Yūcuán na te ni cahān yā jíin de:

Núu súcuan te nacuāha rō núu rey un jēe yñi cuenta nuu de, te nacuāha rō núu Yaā Dios tāca jēe yñi cuenta nuu maá yá, achí yá.

<sup>26</sup>Te tāca tēe ún tu ní cúu nihin de cuēchi siquī yā jíin ni iin jñuhun cáhán yā, cájito jíinúu ñayuu. Chi sa ni canaa ni de jēe ndichí ní stió cuñí yā jñuhun nuu de, te tuá na vé ni cacahān de.

### Jeē ní cacajñuhún de siquī jēe nátecu ndíyi

(Mt. 22.23-33; Mr. 12.18-27)

<sup>27</sup>Yūcuán na te jecu tēe grupo saduceo ni quecoo de nuu yā. Te tēe un cacahān jēe tu nátecu cuiti ndíyi. Te ni cacahān de jíin yá:

<sup>28</sup>Maestro, Moisés ni tee de nuu tútu jēe cánevāha yó: Núu iin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jēe ñani de naquihin ñasihí de, te sēhe de jēe cácu jíin ña nucuiñi i nuu ndíyi ñani de, achí tutu. <sup>29</sup>Núu súcuan te ni íyo uxā ñani. Te tēe núu ní quijnáhan de jíin ñahan. Te ni jihí de, te tú sēhe de ní íyo. <sup>30</sup>Te tēe uū ni naquihin de ña, te suni ni jihí de, te tú na sēhe de ní íyo. <sup>31</sup>Te tēe uní ni naquihin de ña. Te suni súcuan ndihúxá de ni condeca de ña, te ni cajihí ndihi de, te ni iin de tú sēhe de ní íyo. <sup>32</sup>Te jēe sándihí te suni ni jihí ñahan ún. <sup>33</sup>Núu súcuan te núu na nátecu de jíjnáhan de quivī nátecu ndíyi, ¿te ndé iin de cuu ña

ñasihí de? Chi ndihúxá de ni condeca de ña. Achí de jíjnáhan de.

<sup>34</sup> Yūcuán na te ni cahān yā jíin de:

Ñayivi yáha chi cáquijnáhan tēe jíin ñahan. <sup>35</sup> Te ñayuu váha jeē natecu i quivicoo i andiví, ma quijnáhan ga i yūcuán, chi tuá na jnūhun quijnáhan tēe jíin ñahan coo. <sup>36</sup> Ni ma cúu cuiti gā i, chi coo i nájnūhun ndajéhé Yāā Dios. Te sēhe Yāā Dios cuu i, chi je ni canatecu i. <sup>37</sup> Te suni máá Moisés cáhán de jeē nátecu ndíyi, chi ni tee de nuū tútu ndese ni cahān yā jíin de mēhñu yícū jeē cayú yāñuhūn. Chi ni cahān de jeē cúu ya Yāā Dios Abraham jíin Isaac jíin Jacob. <sup>38</sup> Te jeē ni cahān de súcuan cúu jeē ní cachi de jeē cátecu táca ndíyi. Chi vēsú je ni cajihí i, te cátecu i nuū iyó máá yá, chi cúu ya Yāā sáha jeē técu ñayuu níí cáni. Achí yá jíin de.

<sup>39</sup> Te jecu tēe cástéén tutu ley Yāā Dios ni cacahān de:

Váha ni cahān ní Maestro.

<sup>40</sup> Te tuá ni cáchundeyí ni de cajnūhún de ya.

### **Siquí jeē cúu Cristo sēhe yucūn David**

(Mt. 22.41-46; Mr. 12.35-37)

<sup>41</sup> Te ni cahān yā jíin de jíjnáhan de:

¿Ndese cúu jeē cácahān ñayuu jeē Cristo cúu sēhe yucūn David? <sup>42</sup> Chi máá David suhva ni cahān de jnūhun ya nuū tútu Salmo:

Máá Jítóho yō Yāā Dios suhva ni cahān yā jíin Jítóho rī, Yāā quiji:

Cucōo ró lado váha ri nuū kujénu ró,

<sup>43</sup> te na sáha ri jeē quende rō poder táca jēé cájito uhū rohó.

Achí Yāā Dios. Achí David. <sup>44</sup> Te núu sēhe yucūn David cúu Cristo, ¿te ndese cúu jeē ni cahān de jeē Jítóho de cúu ya? áchí yá.

### **Jeē ni cáhān yā jeē iyó cuéchi de jíjnáhan de**

(Mt. 23.1-36; Mr. 12.38-40;

Lc. 11.37-54)

<sup>45</sup> Te ni cahān yā jíin tēe cáscuáha jíin yá, te suni ni cajini sōho ndihi ñayuu:

<sup>46</sup> Coto má cándíje ró táca tēe cástéén tutu ley. Chi cácusī ni de cáñuhun de sahma cáni jeē steén jeē kujénu de, cájica cuu de jíin. Te cánujnahan ni de jeē cáhán yīñúhún ñayuu jíin de nuū yáhu. Te cánujnahan ni de cucōo de nuū silla yīñúhún gá ini vehe i sinagoga, jíin silla yīñúhún gá nuū víco cáyeji ñayuu. <sup>47</sup> Te cáquende de vehe ñahan ní caque-ndōo ndáhú. Te nahán cájicān tahú de náváha cani ni ñayuu jeē tú na cuéchi de. Tēe yáha jíjnáhan de chi xēn gā ndoho de castigo. Achí yá.

### **Jeē ni sócō ñahan viuda xūhún**

(Mr. 12.41-44)

**21** Te ná ni iyó ya ini templo, te jító ya nuū ñayuu cucá jēé cáchuhun i cuehē xūhún ini táca yéjnū nuū cásocō i. <sup>2</sup> Te suni ni jito ya nuū iin ñahan viuda jeē ndóho ndáhú, te ni chuhun ña uū centavo lulí ini yejnū ún. <sup>3</sup> Te ni cahān yā:

Jendaá cáhán rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō táca gá ñayuu. <sup>4</sup> Chi táca i ni casocō i jeē ni ndóo siquí xūhun cuéhē i. Te ñahan yáha, vēsú ndahú ndóho ña, te ni chuhun ndihi ña jeē cótecu ña. Achí yá jíin de.

### **Jeē ní cachi yā jeē náā templo**

(Mt. 24.1-2; Mr. 13.1-2)

<sup>5</sup> Te sava de ni cacahān de jeē luu cáa templo cáhnu, chi ni cuváha jíin táca yúu luu jíin táca jēé ní casocō ñayuu. Yūcuán na te ni cahān yā:

<sup>6</sup>Ndihí jeē cájito ró yáha, quee quiví jeē ma cóso jnáhan ga ni ñn yuū, chi ndihí jnanū, achí yá.

**Na seña coo nuū  
cuácuyajni ndihí ñayiví**

(Mt. 24.3-28; Mr. 13.3-23)

<sup>7</sup>Te ni cacajnuhún de ya:

Maestro, ¿ndé quiví coo tāca jéē ní cachi ní jéē coo? ¿Te na seña coo nuū cuácuyajni squícu tāca jéē ni cáhān ní? áchí de.

<sup>8</sup>Te ni cahān yā:

Coto ró jéē ma stahú i róhó. Chi quijicoo cuehē tēe jeē stahú jíin síhví rí, te cahān de: Máá rí cúu Cristo. Te suni cahān de: Je ni quee quiví ndihí ñayiví, achi de. Te ma cóndiquin rō de. <sup>9</sup>Te núu nihin rō jnūhun jeē tāca lado iyó guerra te cándonda ñayuu siquī tohō, te ma yūhu ró, chi cánuú jéē xihna gā coo súcuan, te ni ma jinú yachí quiví ndihí ñayiví. Achí yá.

<sup>10</sup>Te ni cahān gā yā:

Ndonda nación siquī inga nación, te ndonda ñuu siquī inga ñuu jeē cuajnáhan. <sup>11</sup>Te cháha chúcuan jnāa téyí, te coo jnamā jíin cuéhyi xeēn. Te coo seña jéhu ichi ándiví jéē yūhú ndasí ñayuu coto i.

<sup>12</sup>Te nde ná tu coo tāca jniñu yáha, te coto xeēn i róhó, te jniñi i róhó. Te quindeca i sava ró tāca vehe ñi sinagoga jeē cahán i cuéchi siquī rō. Te chune i sava ró vecāa. Te quindeca i sava ró núu tāca rey jíin núu tāca gobernador, te cahān i cuéchi siquī rō jeē siquí jeē cácandíje ró rúhū. <sup>13</sup>Te jeē súcuan coo, te cuitē núu ga jnūhun ri, chi nacani ndaā rō nuū de jíjñáhan de. <sup>14</sup>Núu súcuan te cundaā ni rō jeē ma nacani ni rō xihna gā ndese stíó cuñí rō nuū de te cācu ró. <sup>15</sup>Chi ruhū cuāha ri jnūhun ndíchí cahān rō, návaha ñayuu jeē cájito uhū rohó, ma cúndehyí i jíin ró ni ma cúu cahān i siquī rō. <sup>16</sup>Te nde tatá rō, naná rō, ñani rō, jnáhan ró,

jíin amigo rō, nastúu i róhó núu ñayuu xeēn. Te cahni i sava ró. <sup>17</sup>Te tāca ñayuu chi quitē ni i nuū rō jeē siquí ruhū. <sup>18</sup>Te ni ñn ixi xíní rō jíjñáhan ró ma nāá, chi coto ya rohó. <sup>19</sup>Te núu cuñí nihin ró jíin jnūhun ri, te cotecu rō níí cáni.

<sup>20</sup>Te núu ni cajito ró jéē ní cajicó ndúu soldado ñuu Jerusalén, te na jécūhun ni rō jeē jé yajni naa ñuu ún. <sup>21</sup>Yūcuán na te ñayuu cáyucú región Judea, na cúnu i caa i yucu quingoo i. Te ñayuu cáyucú Jerusalén, na quéndacoo i quingoo i. Te ñayuu cáhiin nde rancho, ma nándicó i ñuu ún. <sup>22</sup>Chi tāca quiví un cuáha Yaā Dios castigo nuū ñayuu jeē siquí cuéchi i, návaha squícu tāca jnūhun jeē yosó núu tútu. <sup>23</sup>Te quiví ún nacā jeē ndahú ñahan cáñuhun sēhe jíin ñahan cándeca yiquín, chi ma cúniñin ña cunu yachí ña. Chi yōhyo xeēn coo jnūndóho ini ñayiví, te quiji castigo xeēn siquí ñayuu yáha. <sup>24</sup>Te sava i cuu nuū guerra, te sava i quingoo preso nde tācá inga nación. Te ñayuu tāca gá nación ndacu nihin i jniñu nuū ñayuu ñuu Jerusalén, nde jinu tiempo jeē jéhe Yaā Dios jnūhun ndacu i jniñu.

**Ndese coo quiví ndiji Yaā ní nduu tēe**

(Mt. 24.29-35, 42-44; Mr. 13.24-37)

<sup>25</sup>Yūcuán na te coo seña nuū níándini jíin núu yoó jíin núu quími. Te ini ñayiví te quiji jnūndóho xeēn siquí ñayuu tācá nación. Te cunéé ni i, te yūhú i jeē ñhin xeēn mar te ndóna xeēn ndute mar vēji nuū ñūhun. <sup>26</sup>Te cuu sōó sava ñayuu jeē cáyuhú i cándetu i tāca jnūndóho quiji siquí ñayiví. Te tāca jéē ñin ándiví chi quisi i. <sup>27</sup>Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhyo luu cujéhu ri. <sup>28</sup>Te núu ni quejéé tāca jniñu yáha, te ndeyí coo ni rō, te cocunuū rō ándiví, chi je yajni jnama ya rohó. Achí yá jíin de jíjñáhan de.

<sup>29</sup>Te suni ni cahān yā jnūhun yátá yáha:

Condēhe jíjnáhan ró ndese sáha nundēhe higo jíin táca gá yujnu. <sup>30</sup>Núu cájito ró jēē ní quejéé náne numa yújnu ún, te cájini rō jeē jé yajni coo tiempo jihní. <sup>31</sup>Te suni súcuan núu ni cajito ró jēē ní quejéé cúu táca jniñu jeē ni cáhān rī, yūcuán na te na jécūhun ni rō jeē ní cuyajni quivī ndacu Yaā Dios jniñu ini ñayiví.

<sup>32</sup>Jendaá cahán rī jíin ró jeē ma cúū ndihi ñayuu tiempo un, chi nde squícu ndihi jniñu ún. <sup>33</sup>Andiví jíin ñayiví chi naa, te táca jnūhun cáhān rī chi ma náā, chi ndihi squícu.

<sup>34</sup>Te coto ma stívi ró maá ró jijnáhan ró jēē sáha ró táca cuéchi, jíin jēē najini ró, jíin jēē cujneñu ró jíin táca ndajniñu cotecu rō, návāha tú sanaa ni rō te quee quivī un síquī rō. <sup>35</sup>Chi najnūhun jeē núu ñin trampa, súcuan quee jnūndóho síquī ñayuu cáyūcu ní cáhnu ñayiví. <sup>36</sup>Núu súcuan te ndito coo ni rō, te níni cácan tahú rō, návāha cuu cácu ró núu táca jnūndóho jeē quíji ún, te cuu cuiñi ró núu ruhū, Yaā ní nduu tēe. Achí yá.

<sup>37</sup>Te ndiquiví steén yā jnūhun ini templo, te ndijnahan jecuáā jéndōo ya nde yucu jeē naní Olivos. <sup>38</sup>Te táca jénēhen quécōo ñayuu nuū yā ini templo jeē cúni sōho i jnūhun stéén yā.

### Jeē ní casquijnáhan de jnūhun jniñ de Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

**22** Yūcuán na te ni cuyajni vico pascua jeē cáyeji ñayuu hebreo pan jeē tú na levadura yíhi. <sup>2</sup>Te sutū cácu-jéhnu jíin tēe cástéén tutu ley, ni canducú yuhu de modo cahni de Jesús, chi cáyūhú de jeē quitī ni ñayuu.

<sup>3</sup>Te ni quiví Satanás ini anuá Judas jeē nastúu de ya. Te suni naní de Iscariote, te cúu de ñin jnáhan jeē ndihúxí uū

tēe apóstol. <sup>4</sup>Te ni jehēn de ni canda-jnūhún de jíin táca sutū cácu-jéhnu jíin tēe cándiso jniñu ini templo, núu ndese nastúu de ya nuū tēe un jíjnáhan. <sup>5</sup>Te tēe un ní cacusiñi ni de, te ni cajejnūhun de jeē cuáha de xūhun núu Judas. <sup>6</sup>Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

### Jeē ní jequin yā Cena yā

(Mt. 26.17-29; Mr. 14.12-25; Jn. 13.21-30; 1 Co. 11.23-26)

<sup>7</sup>Te ni quee maá quiví vico jeē cáyeji ñayuu pan jeē tú na levadura yíhi, te suni quiví un cájehni i londe najnūhun ni ndacu Yaā Dios jniñu jeē sáha i vico pascua un. <sup>8</sup>Te Jesús ni tají yá Pedro jíin Juan quingoo de, te áchí yá jíin de:

Cuángoo te sátūhva ró jēē cuxíni yó vico pascua, achí yá.

<sup>9</sup>Te ni cacajjnūhún de ya:

¿Ndé nuū cuní ni jēē quisátūhva ná? áchí de.

<sup>10</sup>Te ni cahān yā jíin de:

Cuángoo ñuu yūcuán, te núu ni quiví-coo ró te najnáhan ró jíin ñin tēe ndíso quíyi ndute. Te condiquin rō de quihin rō jíin de nde vehe nuū ndiví de. <sup>11</sup>Te cahān rō jíin tēe chíí vehe ún: Achí máá Maestro: ¿Ndé ñin cúu cuarto vehe ní cuáha núú ní núu cuxíni ya vico pascua jíin tēe cáscuáha jíin yá, achí rō. <sup>12</sup>Yūcuán na te stéén de ñin cuarto cáhnu nde xiní véhe jeē je íyó túhva, te yūcuán sátūhva ró jēē cuxíni yó, áchí yá.

<sup>13</sup>Te cuangoo de, te ni canihin de najnūhun ni cahān yā. Te ni casátūhva de jeē cuxíni ya vico pascua.

<sup>14</sup>Yūcuán na te ni jinū hora jeē cuxíni, te ni quee Jesús, te ni cucōo ya mesa jíin tēe cácuu apóstol. <sup>15</sup>Te ni cahān yā jíin de:

Yōhyo ni cuu ni rī cuxíni ri jíin ró jijnáhan ró vico pascua yáha, vijna nde ná tu cuu rī. <sup>16</sup>Chi cáhān rī jíin ró jeē ma

cáji cuiṭi gā rī vico pascua, chi nde quiji quivī ndacu Yaā Dios jniñu nñ ñayiví, te sáá te caji tucu ri, achí yá.

<sup>17</sup> Te ni quihin ya ñin copa ndūxi uva, te ni nacuatáhú yá, te ni cahān yā:

Quihin copa yáha, te coho ró jín jnāhan ró. <sup>18</sup> Chi cáhān rī jín ró jeē ndé vijna te ma cóho ga rī ndūxi uva, chi nde quiji quivī ndacu Yaā Dios jniñu nñ ñayiví, te sáá te coho tucu ri. Achí yá.

<sup>19</sup> Te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū de jínāhan de. Te ni cahān yā:

Yáha cúu yiqui cúñu rī jeē socō rī jeē chunaa rī cuēchi ró jínāhan ró. Te níni caji ró súcuan jeē cáñuhun ni ró ruhū jeē ni jíhi rī jēhē ró. Achí yá.

<sup>20</sup> Te suni súcuan ni sáha ya jín copa ndūxi uva, ná ni cuu ni cuxíni ya. Te ni cahān yā jín de:

Yáha cúu niñi rī jeē cuáha ri jeē cúu contrato jeé, te cati jeē ndundoo cuēchi ró jínāhan ró.

<sup>21</sup> Te vijna chi tē nastúu ruhū, néne de jín rí nuū mesa yáha. <sup>22</sup> Chi ruhū, Yaā ní nduu tē, jendaá cúu jeē quihín rī cuu rī nájnūhun je ni sándaā Yaā Dios jeē súcuan coo. Te nacā xeēn ndoho tē jeē nastúu ruhū, achí yá.

<sup>23</sup> Yūcuán na te ni caquejéé de cácajnūhun jnāhan de ndé ñin de cúu jeē nastúu de ya.

### **Jeē ní cacahān de siquī ndé ñin de cújéhnu ga**

<sup>24</sup> Yūcuán na te yōhyo ni cacahān de siquī ndé ñin de cújéhnu ga nuū jnāhan de. <sup>25</sup> Te ni cahān Jesús jín de:

Rey tācá nación chi cándacu nihin de jniñu nuū ñayuu cájni de, te cácahān i jeē tēe cásáha vāha cúu jeē cácujeñu nuū i. <sup>26</sup> Te róho jínāhan ró, ma cóo ró súcuan. Chi núu ndé ñin ró cújéhnu ga, te sa nasáha lulí ró maá ró. Te núu ndé ñin ró ndácu jniñu, te sa nasáha ró maá ró tēe jéjñiñu nuū jnāhan. <sup>27</sup> ¿Te ndé ñin

cúu jeē cújéhnu ga, á tēe yéji nuū mesa, chí tēe jéni cohō? ¿A násūu tēe jeē yéji nuū mesa cúu jeē cújéhnu ga? Te ruhū nasūu súcuan cúu ri, chi ni nasáha ri maá rí nájnūhun tēe jéjñiñu nuū ró, chi vēji ri sáha ri jeē nihín tahú ró.

<sup>28</sup> Te maá ró cácuu tēe jeē níni cáhiin jín rí tāca quiví jeē ndóho rí jñundóho.

<sup>29</sup> Núu súcuan te nájnūhun ni sáha Tátá ri jeē ndácu ri jniñu, suni súcuan sáha ri jeē ndacu ró jniñu jínāhan ró. <sup>30</sup> Te caji ró coho ró jín rí ñini ñuu nuū ndacu ri jniñu. Te cucōo ró ñin ñin mesa jeē sándaā ró jniñu ndihúxí uū yucūn Israel. Achí yá.

### **Jeē ní cachi yā jeē yūhu Pedro cahān de jeē jini de ya**

*(Mt. 26.31-35;*

*Mr. 14.27-31; Jn. 13.36-38)*

<sup>31</sup> Te suni ni cahān maá Jítóho yō jín Simón Pedro:

Simón, cuni sōho ró, chi ni jicān Satanás rohó jínāhan ró jéé coto ndee rohó nájnūhun jeē síjin trigo, te stúu ndé ñin ró cácuu nájnūhun paja jeē nayūhu ró, te ndé ñin ró cácuu nájnūhun trigo jeē candíje nihin ró. <sup>32</sup> Te ni jicān tahú rí jēhē ró návāha ma náyūhu ró jeē ma cándíje ga ró. Te jeē náncandíje tucu ró, te sáha ró jéé íje tāca jnāhan ró jín jñūhun ri. Achí yá.

<sup>33</sup> Te ni cahān de jín yá:

Je íyó túhva ná quíhin na jín ní vecāa te vēsú na cuu na jín ní, achí de.

<sup>34</sup> Te ni cahān yā:

Pedro, cáhān rī jín ró jeē nde ná tu cana líhli vijna, te yūhu ró jeē jniñi ñayuu rohó, te uní jínu cahān ró jeē tu jini ró ruhū, achí yá.

### **Jeē ní cuyajni coto ya jñundóho**

<sup>35</sup> Yūcuán na te ni cajnūhun yá de jínāhan de:

Ná ni tají rí rohó ní jengoo ró jéé tu ní cóndiso ró ñunu ni yijni xuhún ni ndijēn,

¿te á ní iyo ñin jeē ní cumani nuū rō? Achí yá.

Te ni cacahān de:

Tú ni ñin ní cúmani.

<sup>36</sup>Te ni cahān yā:

Nde vijna sa cáhān rī jeē cóndiso ró ñunu ró, te suni yijni xūhún. Te tēe jeē tu névāha espada jeē coto de máa de, na xico de ticāchi de te na cuāan de. <sup>37</sup>Chi cáhān rī jíin ró jeē quee quivī ndoho yó jnúndóho, chi cánúu squícu jnúhun yáha jēē cahān nuū tútu siquī rī: Sáha ñayuu jíin yá nájnūhun cásáha i jíin tēe sáha cuēchi xeēn, áchí tutu. Chi táca jnúhun un jēē yosó cáhān siquī rī, chi squícu nahín, áchí yá.

<sup>38</sup>Yūcuán na te ni cacahān de:

Yáha íyó úu espada, achí de.

Te ni cahān yā jíin de:

Jíin jēē yáha-ni, áchí yá.

### Jeē ní jíicān tahú yā nuū huerto Getsemaní

(Mt. 26.36-46; Mr. 14.32-42)

<sup>39</sup>Te ni quenda ya cuahān yā yucu Olivos nájnūhun sáha sáha ya. Te tēe cáscuáha jíin yá ni candiquín de ya cuango de jíin yá. <sup>40</sup>Te nuū ni jínū yā yūcuán, te ni cahān yā jíin de:

Cacān tahú rō jijnáhan ró jēē chindéé ñáhán yá rohó jēē ma sáha ró cuēchi núu coto ndee jeneé rōhó, achí yá.

<sup>41</sup>Te ni jica ya jecu, cūhva jeē jicá jínú yuū jeē squíin. Te ni jecuiñi yití yá, te suhva ni jíicān tahú yā:

<sup>42</sup>Tátā, núu cúní ni te tejiyo ní jnúndóho yáha jēē ma quíji siquī ná. Te nasūu jēē cuní maá ná, chi jeē cuní maá ní na cóo, áchí yá.

<sup>43</sup>Te ni cane ñin ndajéhé andiví núū yā, te ni jēhe fuerza nuū yā. <sup>44</sup>Te cúcuíhyá ndasí ni yā jeē quiji jnúndóho siquī yā, te ni nducú ndéyí gá yā ni jíicān tahú yā. Te ni cane jnañū yā, te too nuū ñūhun nájnūhun yúyú náhnu ñiñi.

<sup>45</sup>Te ná ni ndocuiñi yā jeē ní jíicān tahú yā, te ni ndee yā nuū tēe cáscuáha jíin yá. Te ni jito ya jeē cáquixi de, chi tuá cáhiyo ndeyí ni de cacān tahú de jeē cácuquíhyá ndasí ni de. <sup>46</sup>Te ni cahān yā jíin de:

¿Naun cáquixi ró? Ndonga te cacān tahú ró jeē chindéé ñáhán yá rohó jēē ma sáha ró cuēchi jeē cóto ndee jeneé rōhó. Achí yá.

### Jeē ní cajnií de Jesús

(Mt. 26.47-56;

Mr. 14.43-50; Jn. 18.2-11)

<sup>47</sup>Te sá cáhān gā yā súcuan, te ni quecoo cuehē ñayuu. Te tēe nání Judas, ñin jnáhan jeē uxí uū tēe scuáha jíin yá, yós-núu de nuū ñáyuu un véji de. Te ni quee de nde nuū Jesús, te ni techūhú de ya, te súcuan ni nastúu de ya. <sup>48</sup>Te ni cahān Jesús jíin de:

Judas, ¿á jíin jēē téchūhu ró ruhū cúu jeē nastúu ró rúhū, Yāā ní nduu tēe? Achí yá.

<sup>49</sup>Te tēe cáhiin jíin yá, ni cajito de jeē ní quejéé cúu, te ni cacajnúhún de ya:

¿A ndonga ná jijnáhan ná síquí de jíin espada? áchí de.

<sup>50</sup>Te ñin de ni stují de mozo sutú cu-jéhnu ga, chi ni jehnde de sōho lado váha. <sup>51</sup>Te ni cahān Jesús:

Siáá, na jécuiñi, achí yá.

Te ni tee ya ndaha ya sōho mozo un, te ni nasávāha ya de. <sup>52</sup>Te ni cahān yā jíin sūtú cácu-jéhnu jíin tēe cándiso jniñu ini templo jíin táca tēe jéhnu jeē ní quecoo de jeē jnií de ya:

¿Te va tēe cuíhna cúu ri jeē véjicoo ró jíin espada jíin yujnu jeē jnií ró rúhū jeē súcuan? <sup>53</sup>Tāca quíiví ni ine ri jíin ró jijnáhan ró ini templo cáhnu, te tu ní cájnií ró rúhū. Te vijna te ni quee hora jeē jnií ró rúhū jíin jēē sáha ró táca jniñu jeē ndácu jeneé jēē ndeé núu néē. Achí yá.

**Jeē ní cachi Pedro jeē tu jíní de ya**

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup>Te ni cajnī de ya cuango de jíin yá vehe sutū cujéhu ga. Te Pedro chi jíca-ni ndíquín de ya. <sup>55</sup>Te táca policia ni cascáyú de ñuhūn ini patio, te ni condúu de yuñúhūn un cáyucú de. Te suni ni cucōo Pedro jíin de. <sup>56</sup>Te iin ñahan jéniñū ini vehe un, ní jito ña nuū de jeē néne de yuñúhūn. Te ní jito váha ña nuū de, te ní cahān ña:

Tēe yáha suni ní jica de jíin tēe ún, áchí ña.

<sup>57</sup>Te máá de tu ní cáchi de, chi ní cahān de:

Tu jíiní rī tēe ún, áchí de.

<sup>58</sup>Te ní cunúu jecu gā, te ní jito tucu inga ñayuu nuū Pedro, te ní cahān:

Róhó, suni jnáhan táca tēe un cúu ró, áchí.

Te ní cahān Pedro:

Nasūu cúu ri, hombre, achí de.

<sup>59</sup>Te ní cuu nájnūhun iin hora gā, te ní cahān nihin inga de:

Jendaá ndije jeē tēe yáha ní jica de jíin tēe ún, chí suni tēe región Galilea cúu de, áchí de.

<sup>60</sup>Te ní cahān Pedro:

Hombre, tu jíiní rī na jnūhun cáhán rō.

Te sá súcuan cáhán gā de, te ní cana-ni líhli. <sup>61</sup>Yūcuán na te ní ndió cóto máá Jítóho yō, te ní jito ya nuū Pedro. Te ní nucūhun ní de jnūhun ní cahān yā jíin de: Nde ná tu cana líhli, te yūhu ró te cahān rō unī jínu jeē tu jíiní rō ruhū. <sup>62</sup>Te ní quenda de cuahān de, te yōhyo ní ndahyū de jeē ní cachi de jeē tu jíiní de ya.

**Jeē ní casácatā de nuū yā**

(Mt. 26.67-68; Mr. 14.65)

<sup>63</sup>Te táca tēe cándito Jesús, ní casácatā de nuū yā, te ní cacani de ya. <sup>64</sup>Te

ni cajesi de sahma nuū yā, te ní cacani de nuū yā, te ní cacahān de:

Cachi ndé iin cúu jeē ní cani róhó, áchí de.

<sup>65</sup>Te cuehē gā jnūhun súcuan ní cacahān neé de jíin yá.

**Jeē ní indichi Jesús nuū junta tēe cácujehu ga**

(Mt. 26.59-66;

Mr. 14.55-64; Jn. 18.19-24)

<sup>66</sup>Te jeē ní cundijin, te ní candutútú táca tēe jéhu cándacu jniñu nuū ñayuu hebreo, jíin sūtū cácujehu, jíin tēe cástéén tutu ley Yaā Dios. Te cuango de jíin yá nuū junta tēe cácujehu ga, te yūcuan ní cacajnūhūn de ya:

<sup>67</sup>Cachi, ¿á máá ró cúu Cristo jeē ní tají Yaā Dios? Achí de.

Te ní cahān yā jíin de:

Vēsú na cáhán rī jeē suu ri cúu, te ní ma candíje cuiti rō. <sup>68</sup>Te suni núu cajnūhun máá rí rohó jíjnáhan ró, te suni ma stiō cuíñí rō nuū rī, ní ma siaá rō ruhū. <sup>69</sup>Te ruhū, Yaā ní nduu tēe, táca quívi jeē quíji conene ri lado váha máá Yaā iyó poder, achí yá.

<sup>70</sup>Yūcuán na te ndíhi de ní cacajnūhūn de ya:

¿A máá ró cúu Sēhe Yaā Dios núu súcuan?

Te ní cahān yā jíin de:

Suu ri cúu, nájnūhun cácahān rō, achí yá.

<sup>71</sup>Yūcuán na te ní cacahān de:

¿Na testigo gā jíiní ñúhūn yó núu súcuan? Chí ní cajini sōho yó jíin yuhu máá de jeē cáhán ndevāha de jeē cúu de Sēhe Yaā Dios. Achí de jíjnáhan de.

**Jeē ní indichi Jesús nuū Pilato**

(Mt. 27.1-2, 11-14;

Mr. 15.1-5; Jn. 18.28-38)

**23** Yūcuán na te ní candocuiñí ndíhi de, te cuango de jíin yá nuū Pi-



lato. <sup>2</sup>Te yūcuan ní caquejéé de cácahān de cuēchi siquī yā:

Ní canihīn na tēe yáha jēé stónnda de ñayuu siquī tohō. Te cáhān de jeē tú vāha jeē cuāha ná xúhun renta nuū rey nación Roma jeē ndácu jniñu nuū nación na. Te suni cáhān de jeē maá de cúu Cristo, Rey jeē ní tají Yaā Dios. Achí de jíjnāhan de.

<sup>3</sup>Yūcuán na te Pilato ni cajñuhún de ya:

¿A maá ró cúu Rey ñayuu hebreo?

Te ni cahān yā:

Suu ri cúu, najñuhun cáhān rō, achí yá.

<sup>4</sup>Te ni cahān Pilato jíjn sūtū cácujeñhu jíjn ñayuu cuehē ún:

Tú ni ñin jñuhun stívi cáhān tēe yáha jēé nihín rī cuēchi siquī de, achí de.

<sup>5</sup>Te maá de víhyá gā ni cacahān de:

Tēe yáha stónnda ndasí de ñayuu siquī tohō jíjn jñuhun stéén de ní Judea. Chi ni quejéé de stéén de nde Galilea, te vi-  
jna te nde yāha, achí de.

### Jeē ní indichi Jesús nuū Herodes

<sup>6</sup>Te nuū ní jini sōho Pilato jeē Galilea cácahān, te ni cajñuhún de ñayuu núu tēe región Galilea cúu ya. <sup>7</sup>Te nuū ní cacahān ñayuu jeē cúu ya tēe Galilea, te ni ndacu de jniñu jeē na quíngoo de jíjn yá nuū Herodes, tēe cúu gobernador Galilea. Chi quivī ún suni íne Herodes ñuu Jerusalén. <sup>8</sup>Te nuū ní jito de nuū Jesús, te yōhyo ni cusī ni de, chí je ni cuu cuehē tiempo jeē cuní de coto de nuū yā. Chi ni nihín de jñuhun ya, te ñuhun ni de jeē sáha ya ñin jniñu jéñhu coto de. <sup>9</sup>Te ni cajñuhún de ya cuehē jñuhun, te tu ní stío cuíñí yā ni ñin jñuhun nuū de. <sup>10</sup>Te suni cáhiin tāca sūtū cácujeñhu jíjn tēe cástéén tutu ley, te nihin ni cacahān de cuēchi siquī yā. <sup>11</sup>Yūcuán na te Herodes jíjn táca soldado de ni cacahān neé de jíjn yá, te ni casá-  
catā de nuū yā, chí ni cachuhun de ya

sahma váha luu jeē cúu sahma rey. Te Herodes ni ndacu de jniñu jeē na quínnun-  
deca de ya nuū Pilato. <sup>12</sup>Te maá quívī un ní candumaní jnāhan Pilato jíjn Herodes, chí ichi yátá ni caquiñ jnāhan ni de.

### Jeē ní cundaā jeē cúu yā

(Mt. 27.15-26; Mr. 15.6-15;

Jn. 18.39-19.16)

<sup>13</sup>Yūcuán na te ni cana Pilato tāca sūtū cácujeñhu jíjn táca tēe cándiso jniñu jíjn táca gá ñayuu, ni candutútú. <sup>14</sup>Te ni cahān de:

Ni caquindeca ró tēe yáha núu rī, jeē cácahān rō jeē stónnda de ñayuu siquī tohō. Te je ni stichí rī de, ni cajito jínúu rō. Te tu ní nihín rī ni ñin cuēchi siquī de najñuhun jeē cácahān rō. <sup>15</sup>Te ni Herodes, tu ní nihín de, chí ni natají tucu de tēe yáha núu rī. Te tú cuiti ni ñin cuēchi ní sáha de jeē cúu de. <sup>16</sup>Núu súcuan te na cuáha ri castigo de, te siáá rī de quihín de, achí Pilato.

<sup>17</sup>Te íyó costumbre jeē tācá vico pas-  
cua siaá Pilato ñin preso jeē cuní ñayuu. <sup>18</sup>Te ñayuu cuehē ún, inuú-ni ni cacana jee i:

Na cúu tēe jíñá, te siáá ní Barrabás, achí i.

<sup>19</sup>Te Barrabás íne de vecāa siquī jeē ni stónnda de ñayuu siquī tohō ini ñuu ún, te ni jehni de ndíyi. <sup>20</sup>Te Pilato cuní de siáá de Jesús, te ni cahān tucu de jíjn ñayuu. <sup>21</sup>Te maá i víhyá gā ni cacana jee i:

Cata caa ní de jicā cruz, na cúu de, achí i.

<sup>22</sup>Te ni cahān tucu de jíjn i vuelta uní:  
¿Na cuēchi ni sáha de núu súcuan? Tu ní nihín cuiti rī ni ñin cuēchi siquī de jeē cúu de. Núu súcuan te na cuáha ri castigo de, te siáá rī de quihín de, achí Pilato.

<sup>23</sup>Te víhyá gā ni cacana jee ñayuu un, ní cacahān nihin i jeē na cúu yā jicā cruz. Te maá i jíjn táca sūtū cácujeñhu, ni cacana jee ndasí i. Te ni cacundeyí

i ni cascáhān i Pilato jeē na cúū yā. <sup>24</sup>Yūcuán na te ni ndacu Pilato jniñu jeē na cóo nájnūhun cácuti i. <sup>25</sup>Te ni siaá de tēe jeē ní cajicān i, tēe jeē íne vecāa jeē ni stóna de ñayuu siquī tohō te ni jehni de ndīyi. Te ni jēhe de jnūhun jeē na cúū Jesús nájnūhun cácuti i.

### Jeē ní cacata caa de ya jicā cruz

(Mt. 27.32-44;

Mr. 15.21-32; Jn. 19.17-27)

<sup>26</sup>Te cuangoo tācá soldado jíin yá jeē cahni de ya jicā cruz. Te ni canihin de iin tēe ñuu Cirene, nání de Simón, vendiji de jeē ni jéhēn de rancho. Te ni catejniñu de tēe un jēe cóndiso de cruz yā quihin de yata yā.

<sup>27</sup>Te cuehē ndasí ñayuu ndíquín i yata yā cuangoo i. Te suni cuehē ñahan cuangoo ña, te cándahyū cohó ña jeē cácu-cuñhyá ni ña jehē yā. <sup>28</sup>Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chi sa suhva ndahyú rō jehē maá ró jíin jéhē sēhe ró jijnáhan i.

<sup>29</sup>Chi quee quivī jeē coo jnūndóho xeēn siquī rō, te cahān rō: Yōhyo ndetū tācá ñahan númá, jíin jēe tu ní scácu sēhe, jíin jēe tu ní cóndeca yiquín, chi tú sēhe ña jeē jnahuhū ni ña jeē ndóho i, achi rō jijnáhan ró. <sup>30</sup>Quivī ún te quejéé ñayuu cahān i jíin táca yucu: Cotúú siquī rī jijnáhan rī návāha cuu rī. Te suni jíin táca loma: Casi siquī rī jijnáhan rī, achi i. <sup>31</sup>Chi núu casáha xeēn i jíin rúhū jeē tú na cuēchi rī, te nagā ni cuu jeē ma cóo xeēn siquī ndihi ñayuu chi íyó cuēchi i. Achí yá.

<sup>32</sup>Te suni cuangoo de jíin úū tēe ni casáha cuēchi xeēn, jeē suni cuu de jíin yá. <sup>33</sup>Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni ni cacata caa de ndindúú tēe ni casáha cuēchi xeēn un núu uū gā cruz, iin de lado váha ya,

te inga de lado jecó yá. <sup>34</sup>Te níní jēe súcuan cúu, te ni cahān Jesús:

Tátā, cone cáhnu ni ni núu de jijnáhan de, chi tu cájini de na vé casáha de, achí yá.

Te soldado un ní casáha de sorteo jeē siquí ndese nihin iin de sahna ya. <sup>35</sup>Te cáhiin ñayuu yūcuan, cájito i nuū yā. Te suni nde tēe cándiso jniñu, cácahān catá de cájito de ya:

Núu inga ñayuu ni jnama de, te na jnáma de máá de vjna, te núu ndaā jeē Cristo jeē ní nacāji Yaā Dios cúu de, achí.

<sup>36</sup>Te tācá soldado suni ni casacatā de nuū yā, chi ni quecoo de nde nuū yā, te ni cajēhe de vinagre iyá coho ya. <sup>37</sup>Te cácahān de jíin yá:

Núu máá ró cúu Rey ñayuu hebreo, te na jnáma ró máá ró, achí de.

<sup>38</sup>Te suni ni íyo jnūhun jeē ndeé xini cruz yā jeē cahán na siquī ni jíhī yā, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, achí.

<sup>39</sup>Te iin jeē ndindúú tēe ni casáha cuēchi xeēn, jeē cándita caa, ni cahān neé de nuū yā:

Núu máá ró cúu Cristo, te na jnáma ró máá ró te suni jnama ró ndindúú rí, achí de.

<sup>40</sup>Te inga de ni cahān de nuū jnáhan de:

¿A tu yúhú ró Yaā Dios naún? Chi inuú cándoho yó jíin Yaā yāha. <sup>41</sup>Te máá yó chi vetū-ni cándoho yó, chi yāha cánihin yō castigo siquī jniñu neé ní casáha yó. Te Yaā yāha chi tú ni iin cuēchi ní sáha ya, achí de.

<sup>42</sup>Te ni cahān de jíin yá:

Jesús, nucūhun ni ni sáña jēe quéjéé ní ndacu ní jniñu, achí de.

<sup>43</sup>Yūcuán na te ni cahān Jesús jíin de:

Jendaá cahán rī jíin ró jeē vjna te condee rō jíin rí nuū jardín andiví, achí yá.

### Jeē ni jíhī Jesús

(Mt. 27.45-56;

Mr. 15.33-41; Jn. 19.28-30)

<sup>44</sup>Te nuū ní cuu nájñuhun cahuxī uū, te ni cunee níf cáhnu nde cahunī. <sup>45</sup>Te ni cujnúú níandii. Te sahna ndíta caa jeē ndihyú cuarto ii ini templo cáhnu, ni ndatā-ni sava sava. <sup>46</sup>Yūcuán na te ni cana jee Jesús:

Tátā, naquihin ní ánuá na, áchí yá.

Te súcuan ní cahān yā, te ni jihī-ni ya.

<sup>47</sup>Te tēe nación Roma jeē cúu capitán ni jito de jeē súcuan ni cuu, te ni cahān de jeē yóhoyo cújéhnu Yaā Dios, te áchí de:

Jendaá ndije jeē tée tú na cuēchi cúu tēe yáha, áchí de.

<sup>48</sup>Te ndivii ñayuu cáhiin yūcuan ní cajito i tāca jéē ní cuu, te cácani i yīqui jicā i jeē cájnahunū ni i, te ni nandió cóo i cuanungoo i. <sup>49</sup>Te tāca ñayuu cájini jnāhan jíin yá, jíin tāca ñahan Galilea jeē ní cajica ña jíin yá, cáhiin jicā ña cájito ña tāca jéē ní cuu.

### Jeē ní quindūji Jesús

(Mt. 27.57-61;

Mr. 15.42-47; Jn. 19.38-42)

<sup>50</sup>Te ni iyo ñin tēe vāha tēe ndaā, nání de José. Te tēe ñuu Arimatea ndañúú Judea cúu de. Te cúu de jnāhan tāca tēe hebreo cácujeñnu ga jeē casáha junta. <sup>51</sup>Te ñúhun ni de jeē quiji quivī jeē ndacu Yaā Dios jniñu, te suni tu ní núnahan ni de jeē ní casándaā junta un jéē cúu Jesús. <sup>52</sup>Te tēe un ní jehēn de nuū Pilato, ni jicān de yīqui cúñu Jesús. <sup>53</sup>Te ni snúu de ya jicā cruz, te ni chuscúcn de ya ñin sahna cuitá. Te ni chindūji de ya ini ñin yaū jeē ní caan jicā ñin cava, nuū ná tu quindūji ndīyi. <sup>54</sup>Te quivī un cúu quivī casátuhva ñayuu, chi jehíni un quejéé quivī ndétátú.

<sup>55</sup>Te ñahan ní quijicoo jíin yá nde Galilea, ni jengoo ña jíin José, te ni cajito

vāha ña yaū ún, jíin ndese ni cachindūji de ya. <sup>56</sup>Te cuanungoo ña vehe ña, te ni casátuhva ña tācá perfume jíin aceite yucú jeén asín. Te ni candetátú ña quivī ndétátú, nájñuhun ndácu ley Yaā Dios jniñu.

### Jeē ní natecu Jesús

(Mt. 28.1-10; Mr. 16.1-8; Jn. 20.1-10)

**24** Te jenéhen ndasí quivī domingo, te ni jinūcoo tucu ñahan un núu ní yindūji Jesús, te cándahá ña tācá perfume jíin aceite ni casátuhva ña. Te suni cuangoo sava ga ñahan jíin ña. <sup>2</sup>Te nuū ni jíinūcoo ña, te ni cajito ña jeē ní cujiyo yuū ndihyú yuyáú ndīyi. <sup>3</sup>Te ni quivicoo ña yaū ún, te tuá yīqui cúñu Jitoho yō Jesús ni cájito ña. <sup>4</sup>Te ni cacunéé ni ña cájito ña jeē tuá ndīyi. Sáá te ni cajito ña uū ndajéhé Yaā Dios jeē caa nájñuhun tēe, cáhiin ya xiin ña, te cáñuhun ya sahna ndíndéé. <sup>5</sup>Te yóhoyo ni cayūhū ña, te ni cajexin ña nuū ña nde nuū ñúhun. Te ni cacahān ndajéhé un jíin ña:

¿Naun sa nuū cáyindūji ndīyi cánanducú ró Yaā técu? <sup>6</sup>Tuá yā yāhá, chi je ni natecu yā. Te nucūhun ni rō ndese ni cahān yā jíin ró ná íne ga yā región Galilea. <sup>7</sup>Chi ni cachi ya jeē maá yá, Yaā ní nduu tēe, cánuú natūu ya nuū tāca tēe cáhiyo cuēchi, jeē jniñ de ya cahni de ya jicā cruz, te nuū uní quivī te natecu yā. Achí ndajéhé un.

<sup>8</sup>Yūcuán na te ni canucūhun ni ña tāca jnúhun ni cahān Jesús. <sup>9</sup>Te ni quenda-coo ña nuū ní yindūji ya, te cuanungoo ña. Te ni canacani ña tāca jnúhun yáha núu ndihúxí ñin apóstol jíin núu tāca gá de. <sup>10</sup>Te ñahan ní canacani jnúhun yáha núu tēe cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña. <sup>11</sup>Te tācá apóstol chí cájeni ni de jeē jnúhun cánéé cáñúú cácahān ña, te tu ní cácanđije de.

<sup>12</sup>Te vésú súcuan, te Pedro ni quenda de, te jínu de cuacondéhé de nuū ní

yindūji ya. Te ni jito nihni de ini yaū, te ni jito de jeē sahna cuitá un cáyūcu máá na. Te cuanuhun de vehe de, te nahán nāá ni de jeē ní jito de jeē tuá yā.

**Jeē ní ndajñūhun yá jíin  
ūū de ichi cuahán Emaús**

(Mr. 16.12-13)

<sup>13</sup>Te suu quivī un cuángoo uū jñáhan de iin ñuu naní Emaús, jeē jicá nájñūhun uxī iin kilómetro jíin ñuu Jerusalén. <sup>14</sup>Te cándajñūhún de siquī tācá jniñu jeē ní cuu ún. <sup>15</sup>Te níni cándajñūhún de te cácajnūhun jñáhan de, te máá Jesús ni cuyajni ya yatā de, te jíca ya cuahān yā jíin de. <sup>16</sup>Te ni sáha jíin de jeē tu ní cá-nacuni de ya, vēsú cájito de nuū yā. <sup>17</sup>Te ni cajñūhun yá de:

¿Na jñūhun cándajñūhun ró cájica ró? ¿Te najehē cácuuñhyá ni rō? Achí yá.

<sup>18</sup>Te iin de jeē naní Cleofas ni cahān de jíin yá:

Nđihí cuiti ñayuu cájini i tācá jniñu ní cuu ini ñuu Jerusalén tāca quivī yáha. ¿Te á máñūhún-ni níhín cúu jeē ní quee ní ñuu un jéé tu jíin ni na vé ni cuu? Achí de.

<sup>19</sup>Te ni cajñūhun yá de:

¿Te na vé ni cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jñūhun Yaā Dios. Te jíin poder Yaā Dios ni sáha ya tācá jniñu jéñu te ni nacani ya jñūhun, jíto jíinū Yaā Dios jíin tāca ñáyuu. <sup>20</sup>Te sutū cácujeñu jíin tée cándiso jniñu nuū ná, ni canastúu de ya nuū tāca tée Roma, te tée un ní casán-daā de jeē cúu yā jicā cruz. <sup>21</sup>Te máá ná ní cañūhun ni na jéé maá yá jnama ya nación na Israel nuū ñáyuu Roma nuú. Te siquī tācá jniñu yáha, te ni cane inga jñūhun. Chi vijna je íyó úní quivī jeē ní cuu ún. <sup>22</sup>Te sava ñahan cájini jñáhan ná jíin, ni canacani ña iin jñūhun jeē yóhyo cánaa ni na sáha, chi cácahān ña jeē ní natecu yā. Chi jenéhen ndasí ní jengoo

ña yaū ndíyi ún. <sup>23</sup>Te tuá ni cájito ña yiquí cúñu yā. Te ni ndecoo ña nuū na jíjñáhan ná, te cácahān ña jeē ní cájito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús. <sup>24</sup>Te ni jengoo sava jñáhan ná ndé yaū ndíyi ún, te ni cájito de jeē súcuan íyó, nájñūhun ni cacahān ñahan ún, te tu ní cájito cuiti de nuū yā.

<sup>25</sup>Yūcuán na te ni cahān maá yá jíin de:

Tēe tu cájecūhun cuiti ni cácuu ró. Yóhyo uhū cácañdije ró tāca jñūhun Cristo ni cacahān tēe ni canacani jñūhun Yaā Dios nde jenahán. <sup>26</sup>¿Te á tu súcuan ní jíni ñūhún ndoho Cristo tāca jñúndóho yáha, te sáá te quinhun yā nuū lúu cujeñu ya? Achí yá.

<sup>27</sup>Te ni nacani cájí yá tāca jñūhun jeē yosó núu tútu ii jeē cahán siquī maá yá. Te ni quejéé yá jíin jñūhun ni tee Moisés, te ni cahān gā yā tāca jñūhun jeē ní catee tēe ni canacani jñūhun ya nde jenahán.

<sup>28</sup>Te nuū ní jíñūcoo de ñuu nuū cuángoo de ún, te Jesús ni sáha ya jeē cáca ga yā quihín yā. <sup>29</sup>Te máá de ni castétu de ya, ni cacahān de jíin yá:

Ndōo ní vehe ná, chi je ni ini te je yajni cuaa, achí de.

Yūcuán na te ni quivī ya jeē quéndōo ya jíin de. <sup>30</sup>Te nuū ní cucōo ya mesa jeē cájí yā jíin de jíjñáhan de, te ni quihín ya staa, te ni jicān tahú yā, te ni tahú cuéché yá, te ni jēhe ya nuū de. <sup>31</sup>Te jeē sáha ya súcuan, te nájñūhun ni cananune tinūu de, te ni canacuni de ya. Te ni ndoñūhún-ni ya nuū de cuahān yā. <sup>32</sup>Te ni cacahān maá de:

Jendaá jeē yóhyo ni cacusií ni yō ná ni nacani ya jñūhun nuū yō ichi ún te ni castūhun cájí yá jñūhun cáhán tutu ii. Achí de.

<sup>33</sup>Yūcuán na te yachi ni canaquiñ de ichi, ni canandicó de cuanungoo de ñuu Jerusalén. Te ni canajñáhan de jíin ndihúxí iin ga apóstol, cáyūcu tútu de

jiín sava ga jnáhan de. <sup>34</sup>Te ni cacahān tēe cáyūcu tútú un:

Jendaá ndije jeē ní natecu maá Jítóho yō, te ni nane ndijin yā nuū Simón, achí de jíjnáhan de.

<sup>35</sup>Yūcuán na te ndindúú tēe un ní canacani de jnúhun ndese ni najnáhan ya jiín de ichi, jíín ndese ni canacuni de ya ná ni tahú cuéchi yá staā.

**Jeē ní nane ya nuū  
tēe cáscuáha jíín yá**

*(Mt. 28.16-20;*

*Mr. 16.14-18; Jn. 20.19-23)*

<sup>36</sup>Te sá cácahān gā de tāca jnúhun yáha, te ni jecuiñi-ni Jesús mēhñú de jíjnáhan de. Te ni cahān yā jíín de:

Ndeyí sñi coo ni rō jijnáhan ró, achí yá.

<sup>37</sup>Te ni candacoto iyo de, ni cayūhú ndasí de, chi ni cajeni ni de jeē ñn ánuá cúu ya. <sup>38</sup>Te ni cahān yā jíín de:

¿Naun cáyūhu ró, te naun cájeni siquí ni rō súcuan? <sup>39</sup>Condēhé ndaha ri jíín jēhē rī, te cuni rō jeē maá rí cúu. Jniñ ruhū te cuni rō, chí ñn ánuá tu névāha cūñu ni yiquí nájñūhun cájito ró jēe névāha máá rí, achí yá.

<sup>40</sup>Te jeē ni cáhān yā súcuan, te ni steén yā ndaha ya jehē yā nuū ni yñhi ndūyu cāa. <sup>41</sup>Te yōhyo ni cacusiñi de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíín de:

¿A cánevāha ró jecu jeē cáji rī yāhá? achí yá.

<sup>42</sup>Yūcuán na te ni cajēhe de ñn pedazo chācá ní tau nuū yā, jíín ñn pedazo ñahmā ndūxi yocō. <sup>43</sup>Te ni quihin ya, te ni yeji yā nuū de jíjnáhan de. <sup>44</sup>Te ni cahān yā jíín de:

Tāca jēe ní cuu jíín rí cúu jeē ni cáhān rī ná ni ine ri jíín ró jíjnáhan ró ndé saá, jeē cánuú squícu tāca jnúhun ri jeē yosó núu tútu ley Moisés, jíín núu tācá tutu tēe ni canacani jnúhun Yaā Dios, jíín núu tútu salmo, achí yá.

<sup>45</sup>Te ni nune ya jeē níjnūnī de, návāha cuu jecūhun ni de tāca jēe cahān tutu ñi. <sup>46</sup>Te ni cahān yā:

Súcuan cáhān nuū tútu jeē ruhū Cristo, cánuú cuu rī, te nuū uní quivī natecu rī. <sup>47</sup>Te cuitē núu jnúhun ri jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuítē núu jnúhun yáha, te quihin nuū ñayuu tācá nación. <sup>48</sup>Te máá ró cácuu tēe nacani jnúhun tācá jniñu ní cajito ró. <sup>49</sup>Te tají rí Espíritu Santo quiji ya nuū rō jijnáhan ró, nájñūhun ni jejnūhun Tátá rī. Te na quéndōo ró ñuu Jerusalén condetu ró ndé nihñ rō poder Espíritu Santo jeē quíji nde andiví. Achí yá.

**Jeē ní ndaa ya cuanuhun yā andiví**

*(Mr. 16.19-20)*

<sup>50</sup>Yūcuán na te ni quenda ya ñuu Jerusalén, cuahān yā nde ñuu Betania jíín de jíjnáhan de. Te ni ndonehen ya ndindúú ndaha ya, te ni jicān tahú yā jehē de. <sup>51</sup>Te níñi jicān tahú yā jehē de, te ni cujiyo-ni ya nuū de, ni ndaa ya cuanuhun yā andiví. <sup>52</sup>Te máá de ni cachiñúhún de ya. Te sáá te cuanungoo de ñuu Jerusalén, te yōhyo cácusñi ni de. <sup>53</sup>Te níñi cáhiin de ini templo cáhnu, cá-nacuatahú de nuū Yaā Dios. Te ni cuu. Amén.

## JNUHUN VAHA NI TEE SAN JUAN

### Yaā naní Jnúhun Yaā Dios ni nduu ya tēe

**1** Nde xihna ñúhún ná ni jecōo ndihi jeē iyó, te je iyó Yaā naní Jnúhun Yaā Dios, chi stéén yā ndihi jnúhun ndese Yaā cúu Yaā Dios. Te Yaā naní Jnúhun un ndéé yá jíin Yaā Dios, te Yaā Dios cúu ya. <sup>2</sup>Máá yá ndeé yá nde jeē xihna ñúhún jíin Yaā Dios. <sup>3</sup>Te ni sáha Yaā Dios jeē jíin máá yá ni jecōo ndihi tāca jéé iyó. Te ma jécōo ni ñin jeē iyó núu tu ní sáha máá yá. <sup>4</sup>Máá yá sáha jeē técu ndihi-ni, te máá yá cúu luz jeē steén ini anuá ñayuu, cúu jeē sáha ya jeē jécūhun ni i siquī Yaā Dios. <sup>5</sup>Te Yaā cúu luz ún ndíndēe núú ñayuu tu cájica ndaā, jeē nájnūhun cáhiyo i nuū néé. Te ñayuu cáhiyo nuū néé tu cúu ndahva i luz yā.

<sup>6</sup>Te ni iyo ñin tēe jeē ní tají Yaā Dios, naní de Juan. <sup>7</sup>Tēe un ní quiji de jeē nácani cájí de jnúhun máá Yaā cúu luz, návāha candíje tāca ñayuu jeē jíin jnúhun cáhán de. <sup>8</sup>Nasūu máá Juan cúu luz ún, chi cúu de ñin jeē ní nacani cájí jnúhun máá luz un. <sup>9</sup>Te máá Yaā cúu luz ndíje jeē steén ini anuá tāca ñayuu, nde saá ní quiji ya ini ñayiví.

<sup>10</sup>Te Yaā cúu Jnúhun Yaā Dios ni condee yā ini ñayiví, te vēsú jeē jíin máá yá ni sáha Yaā Dios ñayiví, te ñayuu ñayiví tu ní cáconi i cuatáhú i jeē maá yá cúu. <sup>11</sup>Ni quiji ya nuū ñayuu maá yá nación hebreo, te ñayuu ún tu ní cá-jetáhú i ya. <sup>12</sup>Te vēsú súcuan te sava ñayuu chi ni cajetáhú i ya, te ni cacandíje i jeē sáha ya jehē i. Te nuū maá i ni jēhe ya jnúhun jeē ndúu i sēhe Yaā Dios. <sup>13</sup>Te jeē ndúu i sēhe Yaā Dios, nasūu jíin modo jeē cácacu ñayuu ini ñayiví, ni nasūu síquī jeē cáconi tēe, chi máá Yaā Dios sáha ya jeē ndúu i sēhe ya.

<sup>14</sup>Te máá Yaā cúu Jnúhun Yaā Dios ni nduu ya tēe, te ni condee yā jíin yó. Te ni cajito yó jéé yóhoyo luu cújéhnu ya, chi máñúhún-ni ya cúu Sēhe Tátá yā, Yaā cújéhnu súcuan. Te máni máá jéé sáha ya jeē váha yóhó, te máni máá jnúhun ndaā cahán yā. <sup>15</sup>Te Juan ni nacani de jnúhun ya, te ni cahán de:

Yaā yáha cúu jeē ní cahán rí náa áchí rí jeē Yaā quiji chi cújéhnu ga yā vēsú ruhū, chi je iyó yá nde ná tu cacu ri, achí de.

<sup>16</sup>Te ndihi yó ní canihín yō cuehē ndasí jeē váha iyó núu yā, chi máni jeē váha sáha sáha ya jíin yó. <sup>17</sup>Moisés ni steén de ley Yaā Dios nuū ñayuu jehahán, te Jesucristo chi sáha ya jeē váha yóhó te steén yā tāca jnúhun ndaā Yaā Dios nuū yō. <sup>18</sup>Tú ni ñin ñayuu ni jíto cuiti nuū Yaā Dios. Te máñúhún-ni Sēhe ya jeē ndeé yá jíin Tátá yā, suu ya ni steén nuū yō ndese Yaā cúu Yaā Dios.

### Jnúhun Jesús jeē ní cahán Juan tēe scuándute

(Mt. 3.11-12; Mr. 1.7-8; Lc. 3.15-17)

<sup>19</sup>Te ñayuu hebreo ñuu Jerusalén, ni catajé i jecu sutú jíin tēe grupo levita jeē cájejniñu ini templo, ni jengoo de nuū Juan, návāha cajnúhún de ndé ñin cúu Juan te na jniñu ndíso de. <sup>20</sup>Te Juan cájí ní cachi de:

Nasūu rúhū cúu Cristo, achí de.

<sup>21</sup>Te ni cacajnúhún tucu de:

Núu súcuan ¿te ndé ñin cúu ró? ¿A cúu ró Elías, tēe ni nacani jnúhun Yaā Dios nde jehahán, chí naún?

Te ni cahán Juan:

Nasúu de cúu ri.

Te ni cacajnúhún tucu de:

Núu súcuan ¿te á cúu ró tēe nacani jnúhun Yaā Dios jeē achí tutu ñi jeē quíji?

Tuú, áchí tucu Juan.

<sup>22</sup>Te ni cacahán tucu jíin de:

¿Te ndé ñin cúu ró núu súcuan? Cachi nuū rí jijnáhan ri, chí jíni ñúhún

castūhun rí nuū tāca tée ni catajǐ rúhū vējicoo ri. Cachi na jniñu ndíso ró víi.

<sup>23</sup> Te ni cahān Juan:

Máá rí cúu tēe jeē ni cáhān Isaías, tēe ni nacani jñūhun Yaā Dios nde jeh-nahán, jeē quǐji ri cana jee ri nde nuū ñūhun téhé. Te cáhān rí jín ñáyuu jeē na sātūhva i máá i, chi quiji máá Jítóho yō. Achí Juan.

<sup>24</sup> Te tēe grupo fariseo cácuu jeē ní catajǐ tēe ni quijicoo ún. <sup>25</sup> Te ni cacajñuhún de Juan:

Núu súcuan ζte naun scuándute ró te núu nasūu Cristo ni Elías ni máá tēe quiji nacani jñūhun Yaā Dios cúu ró?

<sup>26</sup> Te ni cahān Juan:

Ruhū chi jín ndute scuándute ri. Te mēhñu ró jijnáhan ró íne ñin Yaā jeē tu cájini rō. <sup>27</sup> Te Yaā un cúu jeē ni cáhān rí jeē quǐji ya te cújéhnu ga yā vēsú ruhū. Chi tú na vé jéhnu cuiti cúu ri nuū yā, ni jeē cuajniñu ri nuū yā vēsú ñin jniñu lúlí gá nájñūhun jeē ndajǐ rí correa ndijēn yā. Achí de.

<sup>28</sup> Súcuan ni cuu jeē ní candajñuhún de jín Juan nde Betábara jeē íne ichi núu cáne niāndii yūte Jordán, nuū scuándute Juan.

### **Siquǐ jeē cúu ya Londe Yaā Dios**

<sup>29</sup> Te inga quivǐ un ní jito Juan nuū Jesús jeē véji ya nuū de. Te ni cahān de jín ñáyuu:

Condēhe jijnáhan ró, chi yāha véji Yaā cúu Londe jeē ní tajǐ Yaā Dios, te cuu yā jeē sándoo ya cuēchi ñayuu ñayiví. <sup>30</sup> Yaā yáha cúu jeē ni cáhān rí jeē quǐji ñin Yaā cujéhnu ndasí, chi je íyó yá nde ná tu cacu ri. <sup>31</sup> Te nde saá te tu ní jín rí jeē yāha cúu Yaā ní tajǐ Yaā Dios. Te ni quiji ri jeē scuándute ri ñayuu ñuu yō Israel jín ndute, návāha stéén rí nuū i jeē suu ya cúu, achí Juan.

<sup>32</sup> Te suni ni cahān gā de jñūhun ya:

Ní jito ri Espiritu Santo, ni cuun ya ichi ándiví, cáa ya nájñūhun paloma, te ni

quee ya xiní Jesús. <sup>33</sup> Te nde saá te ná tu cuni rí jeē Jesús cúu. Te máá Yaā Dios jeē ní tajǐ yá ruhū jeē scuándute ri jín ndute, ni cahān yā jín rí: Núu ni jito ró jéé cúun Espiritu Santo te quendōo xiní ñin tēe, yūcuan cúu Yaā jeē cuáha Espiritu Santo condee ini anuá ñayuu, achí Yaā Dios. <sup>34</sup> Te je ni jito ri ún, te nacani cájǐ rí jñūhun jeē máá yá cúu Sēhe Yaā Dios. Achí Juan.

### **Uū tēe jeē ní cana ya xihna gā**

<sup>35</sup> Te inga quivǐ ún te Juan íne tucu de yūcuan jín uū tēe cájica jín de. <sup>36</sup> Te ni jito de nuū Jesús jeē jíca ya yūcuán. Te ni cahān de:

Condēhe jijnáhan ró, chi yūcuan cúu Yaā cúu Londe jeē ní tajǐ Yaā Dios.

<sup>37</sup> Te ndindúú tēe cájica jín Juan ni cajini sōho de jñūhun yáha, te ni candiquín de Jesús. <sup>38</sup> Te ni ndió cóto Jesús, te ni jito ya jeē candiquín de yatā yā. Te ni cahān yā jín de:

¿Na vé cánanducú ró?

Te ni cacahān de jín yá:

Maestro, ¿ndé nuū ndeé ní?

<sup>39</sup> Te ni cahān yā jín de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jín yá quivǐ ún, chi nájñūhun cacuñ jehíni cúu.

<sup>40</sup> Te Andrés, ñani Simón Pedro, cúu ñin jeē ndindúú tēe un jéé ní cajini sōho jñūhun ni cahān Juan, te ni candiquín Jesús. <sup>41</sup> Te Andrés, yachí ni jenanducú de ñani de Simón, te ni cahān de jín:

Ni caquijnáhan ri jín Mesías, achí de. Te jñūhun un cúní cahān Cristo, Yaā ní tajǐ Yaā Dios.

<sup>42</sup> Yūcuán na te cuanuhun de nuū Jesús jín Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jñūhun un cúní cahān Pedro, jeē cuní cahān yūu.

### Jeē ní cana ya Felipe jíin Natanael

<sup>43</sup>Te inga quiví un cúní Jesús quihín yā región Galilea. Te ni nihín jnáhan ya jíin Felipe, te ni cahān yā jíin de:

Condiquín ruhū na quihín yō.

<sup>44</sup>Te Felipe cúu tēe űnuu Betsaida, jeē cúu űnuu Andrés jíin Pedro. <sup>45</sup>Te ni jendanducú de Natanael, te ni cahān de jíin:

Ni canihín jnáhan ri jíin Yaā jeē yosó jnúhun ya nuū tútu ley jeē ní tee Moisés, jíin núu tútu ni catee tēe ni canacani jnúhun Yaā Dios nde jenahán. Te Jesús sēhe José űnuu Nazaret cúu ya. Achí de.

<sup>46</sup>Te ni cahān Natanael jíin de:

¿Te ndese cúu cujéhu in tēe jeē ní cacu űnuu ndahú Nazaret?

Te ni cahān Felipe:

Quihín yō de cuni rō, achí de.

<sup>47</sup>Te ni jito Jesús jeē véji Natanael, te ni cahān yā:

Yāha véji in tēe ndaā jeē cúu ndije yucūn Israel, chi tu stáhú cuiti de, achí yá.

<sup>48</sup>Te ni cahān Natanael jíin yá:

¿Ndese jíiní ni sáña?

Te ni cahān Jesús:

Je ni jito ri rohó ndé ná tu cana Felipe xiní rō, ná ine ró jéhē nundéhe higo, achí yá.

<sup>49</sup>Yūcuán na te ni cahān Natanael jíin yá:

Maestro, máá ní cúu Sēhe Yaā Dios, máá ní cúu Rey űnuu yō Israel, achí de.

<sup>50</sup>Te ni cahān Jesús:

¿A máá jēe ni cahān rī jeē ní jito ri rohó ná ine ró jéhē nundéhe higo, te jeē yucuan cándije ró rúhū naún? Tuú chi coo jniñu jéhu ga coto ró vēsú jeē yáha, achí yá jíin de.

<sup>51</sup>Te ni cahān gā yā:

Jendaá cahán rī jíin ró jijnáhan ró jēe nde vijna te coto ró jēe núne andiví, te tēcá ndajéhé Yaā Dios cándaa cánuu nuū ruhū, Yaā ní nduu tēe, achí yá.

### Jeē ni jéhēn yā in vico nándāha űnuu Caná

**2** Te ni yāha uní quiví, te ni iyo in vico nándāha űnuu Caná ndañú Galilea. Te yucuan ine náná Jesús. <sup>2</sup>Te suni ni cacana i Jesús jíin tēe cáscuáha jíin yá, ni jehēn yā vico un jíin de. <sup>3</sup>Te ni ndoco vino. Te náná Jesús ni cahān ña jíin yá:

Ni ndoco vino i, achí ña.

<sup>4</sup>Te ni cahān Jesús jíin ña:

¿Naun cáhán ni súcuan jíin ná náná? Chi ná tu quee quiví jeē sáha ná jniñu jéhu, achí yá.

<sup>5</sup>Te náná yā chi ni cahān ña jíin ñáyuu cájeni cohō:

Sáha ró jijnáhan ró táca jēe cahān yā jíin ró. Achí ña.

<sup>6</sup>Te yucuan íyó ínū tenéjā yuū jeē űnúhun ndute cájichi ñayuu hebreo jeē ndúndoo i nuū Yaā Dios. Te in in tenéjā un cánda cuhun cuūn xico chí ciento litro ndute. <sup>7</sup>Te ni cahān Jesús jíin ñáyuu cájeni cohō:

Scútú ndī rō tēcá tenéjā yáha.

Te ni cascútú ndī i. <sup>8</sup>Te ni cahān yā jíin i:

Vijna te quēen ró jecu te quindeca ró coto ndee tēe ndíto vico, achí yá.

Te ni cajendeca i nuū de. <sup>9</sup>Te ni séyūhú de ndute jeē ní nduu vino, te tu jíin de ndé ní canihín i. Chi máni mozo un cúu jeē cájini, chi máá i ni caquēen ndute ún. Yūcuán na te tēe ndíto vico ni cana de tēe nándāha. <sup>10</sup>Te ni cahān de jíin:

Tāca ñáyuu chi xihna gā vino váha cájēhe i, te núu je ni cajihí vāha ñayuu cáhiin vico, yūcuán na te jēhe de vino ndahú na. Te máá ró tucu ni sáha ró, chi nde jeē sándihí te jēhe ró vino jeē yóhyyo váha ga jíhi, achí de.

<sup>11</sup>Jniñu yáha jēe ni sáha Jesús ini űnuu Caná ndañú Galilea cúu jniñu jéhu xihna űnúhún jēe ni sáha ya jeē steén yā poder yā. Te súcuan ni steén yā jeē



yóhoyo cújéhnua ya. Te tēe cáscuáha jíin yá ni cacandíje de ya.

<sup>12</sup>Te ná ni yáha jniñu yáha, te cuahān yā ñuu Capernaum jíin náná yā jíin táca ñani yā jíin tēe cáscuáha jíin yá. Te ni coyūcu yá yūcuán jecu quivī.

**Jeē ní quenehen ya ñayuu ini templo**

(Mt. 21.12-13;

Mr. 11.15-18; Lc. 19.45-46)

<sup>13</sup>Te jeē cuácuyajni vico pascua casáha jnánhan ñuu yā hebreo, te cuahān yā ñuu Jerusalén. <sup>14</sup>Te ini templo cáhnu ni jito ya ñayuu cáxicó stiquī jíin lanchi jíin paloma, jíin ñayuu castáyī xūhun, cáyūcú i nuū mesa i. <sup>15</sup>Te jeē súcuan ni jito ya, te ni sáha ya ñin cuarta ñii. Te ni scúnu ya tǎcá i ini templo, nde jíin lanchi jíin stiquī i. Te ni jete yā xūhun ñayuu castáyī. Te ni scotúú yá táca mesa i. <sup>16</sup>Te ni cahān yā jíin ñayuu cáxicó paloma:

Tava tǎcá quitī yáha. Te ma sáha ró yáhu ini vehe Tátá rī. Achí yá.

<sup>17</sup>Yūcuán na te tēe cáscuáha jíin yá, ni canucūhun ni de jnūhun yósó núu tútu ii: Je yajni cuu na jēe yóhoyo ndíhvī ni na síquī vehe ní, áchí yá jíin Tátá yā, achí tutu.

<sup>18</sup>Te tēe ñuu yā hebreo ni cacajnūhún de ya:

¿Na jniñu jéhnua sáha ró jēe steén rō poder rō, te cucáhnua ni rī jeē ndíso jniñu ró sáha ró súcuan? áchí de jíin yá.

<sup>19</sup>Te ni cahān yatá Jesús:

Canu rō templo yáha, te nuū uní quivī te nucondichi sáha rī, achí yá.

<sup>20</sup>Yūcuán na te ni cacahān tēe hebreo un:

Uū xico iñū cuiyā te ni jīnu ni cuvāha templo yáha. Te rōhó, ¿á núu uní-ni quivī te nucondichi sáha ró naún? Achí de.

<sup>21</sup>Te templo jeē cahán Jesús cúu máá yiqui cúnu yā, chi cahni ñayuu yā te natecu yā nuū uní quivī. <sup>22</sup>Jeē yúcuán

cúu jeē ná ni natecu yā jeē ni jíhī yā, te tēe cáscuáha jíin yá ni canucūhun ni de jeē ni cáhān yā jnūhun yáha. Te ni cacandíje de jnūhun jeē yosó núu tútu ii, jíin jnūhun yáha jēe ni cáhān Jesús.

**Jeē jíin Jesús ndese cáa ini anuá ñayuu**

<sup>23</sup>Te ná íne Jesús ñuu Jerusalén máá vico pascua, te cuehē ñayuu ni cacandíje i jeē cúu ya Cristo, chí ni cajito i tǎcá jniñu jéhnua sáha ya jeē steén yā poder yā. <sup>24</sup>Te máá Jesús chí tu ní jétáhú yá i, chí je jíin yā ndese cáa ini anuá i jíinánhan i. <sup>25</sup>Te tu jíin ñúhún yá jeē cáchi ni ñin ñayuu nuū yā ndese íyó táca ñayuu, chí máá yá je jíin yā ndese cáa ini anuá i.

**Jeē ní candajnūhún Jesús jíin Nicodemo**

**3** Te ni íyo ñin tēe grupo fariseo, naní de Nicodemo, te cújéhnua de nuū ñayuu ñuu de hebreo. <sup>2</sup>Tēe yáha ní quiji de nuū Jesús ñin jecuáa, te ni cahān de jíin yá:

Maestro, je cájini na jēe maá Yaā Dios ni tají yá nihín jēe steén ni jnūhun ya nuū na jíinánhan ná. Chí núu tu íyó Yaā Dios jíin ní, te ma cúu sáha ní ni ñin jniñu jéhnua nájñūhun sáha máá ní jeē steén ni poder ní, áchí de.

<sup>3</sup>Te ni cahān Jesús:

Jendaá cahán rī jíin ró jeē núu tu nacacu jeē ñin ñayuu, te ma cúu quivī i ndaha Yaā Dios jeē ndacu ya jniñu nuū i, áchí yá jíin de.

<sup>4</sup>Te ni cahān Nicodemo jíin yá:

¿Te ndese cuu nacacu ñin tēe te núu je ni jéhnua de? ¿A cuu nucūhun tucu de chíji náná de te nacacu tucu de? áchí de.

<sup>5</sup>Te ni cahān Jesús:

Jendaá cahán rī jíin ró jeē núu tú nacacu ñin ñayuu, te ma cúu quivī i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuéchi i nájñūhun jíin ndute, te condee Espírítu

Santo ini anuá i. <sup>6</sup> Jeē cácu sáha ñayuu, chi sēhe ñayuu cúu. Te jeē cácu sáha Espíritu yā, chi sēhe ya cúu. <sup>7</sup> Ma náā ni rō cani ni rō ndese cúu jñuhun ni cahān rī jín rō jeē cánuú jēē nacacu jeē rō jijnáhan rō. <sup>8</sup> Te tachī chi quée cuahān ndé-ni cúu nuū cuní maá, te jíní sōho rō jēē cáyu, te tu jíní rō ndé nuū véji ni ndé nuū quihín. Te suni súcuan cúu tāca ñayuu jeē nacacu sáha Espíritu, chi tu jíní rō ndese sáha ya jniñu ún, áchí yá.

<sup>9</sup> Te ni cahān tucu Nicodem:

¿Ndese ga cúu núu súcuan?

<sup>10</sup> Te ni cahān Jesús:

Maá rō cúu iin maestro jeē cujéhnu nuū ñayuu ñuu yō Israel, te ¿á tu jécūhun ni rō jñuhun yáha naún? <sup>11</sup> Jendaá cahān rī jín rō jeē jñuhun cájecūhun ni rī cúu jeē cácahān rī jín rō. Te cá-nacani cáji rí jñuhun jniñu ní cajito ri. Te tu cácaandíje rō jñuhun cácahān rī. <sup>12</sup> Chi ni cahān rī jñuhun ndese sáha Yaā Dios ini ñayiví, te tu cácaandíje rō. Núu súcuan ¿te ndese candíje rō núu cahān rī jñuhun táca ndese sáha ya nde andiví?

<sup>13</sup> Chi ni iin tu ní cáa andiví jeē cúni ndese íyó yúcuan, chi máñúhún-ni ruhū, Yaā ní nduu tēe. Chi andiví ndéé rí, te ni cuun ri véji ri. <sup>14</sup> Te nájnūhun ni cata caa Moisés iin coō cáa nuū iin yujnu, ná ni cajica ñayuu nuū ñuhun téhé, suni súcuan máá rí, Yaā ní nduu tēe, cánuú jēē cóndita caa ri jicā cruz. <sup>15</sup> Te súcuan cánuú návaha tāca ñayuu jeē candíje i jeē jnáma ri i, ma jnahnú ndetū i, chi sa suhva cotecu i níf cáni andiví.

### Yōhoyo ni cundáhú ni yā ñayuu ñayiví

<sup>16</sup> Chi Yaā Dios yōhoyo ni cundáhú ni yā ñayuu ñayiví. Jeē yúcuan ní tají yá Sēhe ya ni quiji, vésú mañúhún-ni ya iyó, návaha tāca ñayuu jeē candíje i jeē jnáma ya i, ma jnahnú ndetū i, chi sa suhva cotecu i níf cáni andiví. <sup>17</sup> Chi tu ní tají Yaā Dios Sēhe ya ini ñayiví jēē

snahnú ndetū yā ñayuu, chi sa suhva jeē jnáma ya ñayuu.

<sup>18</sup> Ñayuu jeē candíje i jeē jnáma ya i, ma jnahnú ndetū i. Te ñayuu tu cándíje, je ni jnahnú ndetū i, chi tu ní cándíje i máá Sēhe Yaā Dios, te máá iin-ni ya iyó. <sup>19</sup> Máá Yaā jeē stíndēé ini anuá ñayuu, je ni quee ya ini ñayiví. Te cánujnahān gā ni ñayuu caca i nájnūhun nuū nēē vésú nuū luz yā, chi jniñu cásaá i cúu jniñu néé. Jeē yúcuan cúu jeē jnahnú ndetū ñayuu tu cácaandíje ún. <sup>20</sup> Chi tāca ñayuu casaá jniñu néé, tu nújnahān cuiti ni i luz yā. Te tu jéhe i jñuhun jeē stíndēe yá ini anuá i, chi tu cúní i jeē natūu jniñu néé casaá i. <sup>21</sup> Te ñayuu jeē cájica jín jniñu ndaā, jéhe i jñuhun jeē stíndēe yá ini anuá i, návaha natūu ndijin jeē táca jniñu casaá i cúu jniñu cúní Yaā Dios. Achí yá jín de.

### Jeē ni cáhān tucu Juan jñuhun Jesús

<sup>22</sup> Yūcuán na te Jesús jín tēe cáscuáha jín yá, cuahān yā región Judea. Te ni condee yā yūcuán jecu tiempo jín de, te cáscuándute de ñayuu. <sup>23</sup> Te suni scuándute Juan, íne de lugar jeē naní Enón yajni ñuu Salim, chi yúcuan íyó cuéhē ndute. Te ni quijicoo ñayuu nuū de, te ni scuándute de i. <sup>24</sup> Súcuan ni sáha Juan nde ná tu quiví de vecāa.

<sup>25</sup> Yūcuán na te sava tēe cáscuáha jín Juan yōhoyo ni cacahān de jín sava jnáhan de hebreo siquí núu ndé iin cúu modo vāha ga jeē cúchi ñayuu ndundoo i nuū Yaā Dios. <sup>26</sup> Te ni quecoo de nuū Juan, te ni cacahān de:

Maestro, tēe ní ine jín ní yūte Jordán ichi núu cáne niāndii, jeē ní nacani ní jñuhun de nuū ná, vijna te scuándute máá de, te ndivii ñayuu cuango i nuū de.

<sup>27</sup> Te ni cahān Juan:

Ni iin tēe ma cúu sáha de jniñu Yaā Dios te núu ma tejniñu ya de. <sup>28</sup> Máá rō jijnáhan rō chi ni cajini sōho rō jēē ni

cahān cají rí jeē násū máá rí cúu Cristo, chí cúu rí ìn jeē ní tají Yaā Dios jeē cósnūú nacani jñuhun jeē quíji ya. <sup>29</sup> Te núu cásáha vico quíjnáhan, te máá yíi cúu jeē ndéca ñasihí. Te amigo yíi un íne jíin de, te jíni sōho jñuhun cáhán de. Te yōhyo cúsiñ ni jíni sōho jñuhun cáhán yíi ún. Te suni súcuan ruhū, chí cúu rí nájñuhun amigo yíi, chí ni quee maá Cristo, te yōhyo cúsiñ ni rí jíni sōho rí jñuhun cáhán yā. <sup>30</sup> Te jíni ñúhún jéē ndujéhu ga maá yá te ndululí gá maá rí, achí Juan.

### Jeē ní quiji ya nde nuū sucún

<sup>31</sup> Te Yaā jeē véji nde andiví, cújéhu ya nuū ndíhi. Chí táca jéē ní cacu ini ñayívi yáha, sēhe ñayívi cúu, te máni jñuhun ñayívi cáhán. Te Yaā jeē véji ichi ándiví, chí cújéhu ya nuū ndíhi ñayuu. <sup>32</sup> Te nácani ya jñuhun jeē ní jito ya jíin jéē ní jini sōho ya. Te ñayuu chí tu cá-candíje i jñuhun cáhán yā. <sup>33</sup> Te núu ìn ñayuu candíje i jñuhun cáhán yā, suu cúu jeē jejnúhún i jeē Yaā ndaā cúu Yaā Dios. <sup>34</sup> Chí Yaā ní tají Yaā Dios véji, máni máá jnúhun Yaā Dios cahán yā. Chí Yaā Dios tu yícuáha jéhe ya Espíritu yā nuū Yaā ní tají yá. <sup>35</sup> Máá yá jeē cúu ya Tatá, yōhyo maní yā jíin Séhe ya, te ndivii ni jéhe ya ndaha Séhe ya jeē ndacu ya jniñu nuū. <sup>36</sup> Ñayuu jeē candíje máá Séhe ya jeē jnáma ya i, cotecu i níf cáni andiví. Te ñayuu tu cúní candíje Séhe ya, ma cótecu i níf cáni andiví, chí sa suhva cuáha Yaā Dios castigo jeē ndoho i níf cáni.

### Jeē ni cahān Jesús jíin ñahan ñúu Samaria

**4** Te tēe grupo fariseo, ni canihin de jñuhun jeē iyó cuéhē gā tēe cáscuáha jíin Jesús vésú jíin Juan, jíin jéē cuehē gā ñayuu scuándute ya vésú Juan. <sup>2</sup> Te nasūu jéē scuándute máá yá, chí tēe cáscuáha jíin yá cúu jeē cascuándute. <sup>3</sup> Te

ná ni jini Jesús jeē súcuan ni canihin de jñuhun, te ni quenda ya región Judea, te cuanuhun yā región Galilea.

<sup>4</sup> Te ichi jeē nuhún yā chí yáha región Samaria. <sup>5</sup> Te ni jinū yā ìn ñuu región Samaria jeē naní Sicar, yajni ñuhun jeē ni jéhe Jacob nuū séhe de José nde jehahán. <sup>6</sup> Te yūcuan íne pozo jeē naní pozo Jacob. Te ni cucōo Jesús xiin pozo un, chí ni cuita yá jeē cuahán yā ichi. Te nájñuhun cahuxi uū cúu. <sup>7</sup> Te ni quee ìn ñahan Samaria, véji ña vequihin ña ndute. Te ni cahān Jesús jíin ña:

Cuáha ní ndute coho ná, achí yá.

<sup>8</sup> Te tēe cáscuáha jíin yá, chí je cuan-goo de nde ñuu, cuacuaan de jeē cáji de jíin yá. <sup>9</sup> Te ñahan Samaria un ní cahān ña jíin yá:

¿Ndese cúu jeē jicán ni ndute nuū ná coho ní? Chí tēe hebreo cúu ní, te ñahan Samaria cúu ná, achí ña.

Súcuan ni cahān ña, chí ñayuu hebreo tu cácahān i jíin ñayuu Samaria. <sup>10</sup> Te ni cahān Jesús:

Núu jeē jiní ni ndese cúní Yaā Dios sáha ya jeē váha níhín, jíin ndé ìn cúu sāña jéē jicán na ndute nuū ní, yūcuán na te máá ní cacān ni núu ná, te cuáha ná ndute jeē cótecu ni níf cáni sáha, achí yá.

<sup>11</sup> Te ni cahān ña jíin yá:

Tatá, yōhyo cúnú pozo yáha, te tú na vé ndahá ní jéē táva ní ndute. Núu súcuan ¿te ndé nuū nihín ni ndute jeē cótecu na sáha? <sup>12</sup> ¿Te á cújéhu ga maá ní vésú jíi yō Jacob, chí naún? Chí máá de ni stóo de pozo yáha nuū yō. Te yāha ní cajihí máá de ndute, jíin táca séhe de, jíin quiti ndéca de. Achí ña.

<sup>13</sup> Te ni cahān Jesús:

Táca ñayuu jeē jíhi ndute yáha, chí jichí tucu i. <sup>14</sup> Te ñayuu coho ndute jeē cuáha na núu i, chí ma jichí cuiti gā i. Chí ndute jeē cuáha ná un, cane ini i nájñuhun ndute jeē cáne ñuhún, te sáha jeē cotecu i níf cáni, achí yá jíin ña.

<sup>15</sup> Te máá ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuiti gā ná, ni tuá jíni ñūhun quiquihin ná ndute pozo yáha, áchí ña.

<sup>16</sup> Te ni cahān Jesús jíin ña:

Cuácana ní yii ní te quiji ní jíin de, áchí yá.

<sup>17</sup> Te ni cahān ña:

Tú yii ná íyó.

Te ni cahān Jesús:

Ndaā cahán ni jée tú yii ní íyó. <sup>18</sup> Chi je ni cuu uhūn yii ní, te tēe ndéca ní vjna chi nasūú yii ní cúu de. Yāha cúu jee ni cahān ndaā ní, áchí yá.

<sup>19</sup> Te jeē súcuan ni cahān yā, te ni cahān ña:

Tátā, ñin tēe nácani jnūhun Yaā Dios cúu ní, jení ni ná. <sup>20</sup> Tāca jíi na ñáyuu Samaria, yucu yáha ní cachiñúhún i Yaā Dios. Te máá ní ñayuu hebreo, cácahān ni jée ñuu Jerusalén cúu nuū cánuú chiñúhún yó yā, achí ña.

<sup>21</sup> Te ni cahān Jesús jíin ña:

Nánā, candíje ní jnūhun cáhán na, chi quee quiví jeē ni nasūú yucu yáha ni nasūú ñuu Jerusalén cúu nuū chiñúhún ní máá Yaā cúu Tátá, chi ndíhi-ni lugar te cuu chiñúhún ní yá. <sup>22</sup> Máá ní ñáyuu Samaria tu cájini ni ndé ñin cúu jeē cáchiñúhún ní. Te máá ná jijnáhan ná chi cájini na ndé ñin cúu jeē cáchiñúhún ná. Chi nde nuū maá ná jijnáhan ná ñáyuu hebreo cúu nuū véji Yaā jnama ñayuu. <sup>23</sup> Te je ni quee quiví jeē ñáyuu cáchiñúhún ndaā, vjna te chiñúhún ndije i Yaā cúu Tátá nde jíin ini jíin ánuá i. Chi máá Tátá cúní yā jeē súcuan chiñúhún ñáyuu yā. <sup>24</sup> Yaā Dios cúu Espírítu, te ñayuu jeē cúní i chiñúhún i ya, cánuú jée chiñúhún ndije i ya jíin ini jíin ánuá i, áchí yá.

<sup>25</sup> Te ni cahān ñahan ún:

Jíni na jée quíji Mesías jeē cúu Cristo, Yaā jeē tají Yaā Dios. Te núu ni quee maá yá, te stéén cají yá tāca jnūhun nuū yō.

<sup>26</sup> Te ni cahān Jesús:

Máá ná jeē cahán jíin ní, suu ná cúu Yaā ún.

<sup>27</sup> Te sá cáhán gā yā súcuan, te ni ndecoo-ni tēe cáscuáha jíin yá. Te ni canaa ni de cájito de jeē ndájnūhun yá jíin ñahan yúcu. Te ni ñin de tu ní cájnūhún de ya núu na vé cájnūhun yá ña chí na vé ndájnūhun yá jíin ña. <sup>28</sup> Yūcuán na te ñahan un ní stóo ña quíyi ña, te cuahān ña nde ñuu. Te ni cahān ña jíin ñáyuu ún:

<sup>29</sup> Nehen na quíngoo yó te coto ró ñin tēe jeē ní cachi ndíhi tāca jée ni sáha ri. Sanaa te máá yá cúu Cristo, jeē cándetu yó quiji, áchí ña.

<sup>30</sup> Yūcuán na te ni quendacoo i ñuu ún, te cuangoo i nuū íne Jesús. <sup>31</sup> Te nde ná tu jinūcoco i, te tēe cáscuáha jíin yá ni cacahān ndahú de jíin yá:

Maestro, caji ni stáá víi, achí de.

<sup>32</sup> Te ni cahān yā jíin de:

Iyó stáá caji ri jeē tu cájini rō ndese cúu.

<sup>33</sup> Yūcuán na te tēe cáscuáha jíin yá, ni cacajnūhun jnáhan de:

¿A ní quindeca ñin ñayuu jeē ní yeji yā, chí naún? áchí de.

<sup>34</sup> Te ni cahān Jesús:

Jeē ní cachi ri jeē iyó jée cáji ri cúu jeē cúsiñi ni rí sáha ri jniñu cúní Yaā ní tají rúhū véji ri, jíin jée sínu ri jniñu ún. <sup>35</sup> Te cácahān rō jeē cúmaní cuñ gā yoō te tahndē trigo. Te ruhū chi cáhán ri jíin rō: Condēhe jíjnáhan rō, chi ñayuu cuehē cácuu i nájnūhun trigo jeē jé ni cuaan jeē tahndé, chi je cáhiyo tūhva i candíje i ruhū. <sup>36</sup> Te tēe scándíje ñayuu cácuu de nájnūhun tēe cájehnde trigo, te nihin de yāhu de. Te jeē cánastútú de ñayuu cúu jeē cótecu i ñí cáni andiví. Te tēe cáscuíté núu jnūhun ri, ñuu-ni cusíñi ni de jíin tēe cástéén gā jnūhun ri. <sup>37</sup> Chi ndaā

cúu jnūhun jeē cahán: Īn tēe jéte, te inga tēe nástútú, áchí. <sup>38</sup> Te suu cúu jeē ní tají rí rohó jijnáhan ró jeē scándíje ró ñayuu jeē jé ni canihin jnūhun ya ni casáha inga tēe. Chi inga tēe je ni canacani de jnūhun nuū ñayuu, te máá ró chi nájñuhun cá-nastútú ró i cúu jeē scándíje ró i.

<sup>39</sup> Te cuehē ñayuu Samaria jeē cáyucú ñuu ún, ni cacandíje i Jesús jeē ní jini sōho i jnūhun ni cahān ñahan ún. Chi ni cahān ña: Ni cachi ya ndihí tāca jéē ni sáha ri. <sup>40</sup> Te jeē yúcuan cúu jeē ñayuu Samaria un ní jinūcoo i nuū yā, te ni cacahān ndahú i jín yá jeē na quéndōo ya ñuu i. Te ni ndōo ya yúcuan úu quiví. <sup>41</sup> Te cuehē gā i ni cacandíje i ya jín jnúhun cáhan maá yá. <sup>42</sup> Te ni cacahān i jín ñahan ún:

Tuá niní jéē cahán maá ró te candíje ri yā, chi je ni cajini sōho ri jnūhun cáhan maá yá. Te cájini yō jeē maá yá cúu ndíje Cristo, Yaā jnama ñayuu ñayiví. Achí i.

### Jeē ní nasávāha ya sēhe tēe ndíso jniñu nuū rey

<sup>43</sup> Te nuū ni yáha uū quiví ún, te Jesús ni quenda ya Samaria, te ni quihín tucu ya ichi cuanuhun yā región Galilea. <sup>44</sup> Chi je ni cahān maá yá jeē tēe cánacani jnūhun Yaā Dios, tu cáhiyo yínúhún ñayuu ñuu de jín de, te suni súcuan ni cuu jín máá yá. <sup>45</sup> Te ná ni najinū yā Galilea, te ñayuu un ní cajetáhú i ya, chi suni máá i ni jengoo i vico pascua ñuu Jerusalén, te ni cajito i tācá jniñu ní sáha ya quiví ni íyo vico ún.

<sup>46</sup> Yūcuán na te ni jehēn tucu ya ñuu Caná ndañúu Galilea, nuū ni sáha ya jeē ndúte ni nduu vino. Te ini ñuu Capernaum ni íyo ĩn tēe cújéhu jeē ndíso jniñu nuū rey. Te cúhú sēhe de. <sup>47</sup> Tēe un ní jini jnūhun de jeē ní najinū Jesús región Galilea jeē ni jéhēn yā región Judea. Te ni jecondéhé de ya, te ni cahān ndahú de jín yá jeē na quihín yā jín de

vehe de, te nasávāha ya sēhe de, chi je yajni cuu i. <sup>48</sup> Te ni cahān Jesús jín de:

Núu tú coto ró jniñu jéhu jeē náā ni rō sáha, te ma candíje cuiti rō jijnáhan ró, áchí yá.

<sup>49</sup> Te tēe ndíso jniñu nuū rey, ni cahān de:

Cava vāha ni ní na quihín yō, chi núu cucuéé ní te cuu sēhe ná, áchí de.

<sup>50</sup> Yūcuán na te ni cahān Jesús:

Cuanuhun vehe ró, chi cotecu sēhe rō.

Te tēe un ní candíje de jnūhun ni cahān Jesús, te cuanuhun-ni de. <sup>51</sup> Te níní jíca de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduvāha sēhe ní, áchí i.

<sup>52</sup> Te ni cajñuhún de na hora ni quejéé ndúvāha i. Te ni cacahān i jín de:

Cahiin jeē ícu ni quenda quiji i.

<sup>53</sup> Yūcuán na te máá tátá i ni sáha de cuenta jeē hora un cúu jeē ni cáhan Jesús jín de jeē cótecu sēhe de. Te ni candíje de jín ní vehe de jeē cúu ya Yaā ní tají Yaā Dios.

<sup>54</sup> Yāha cúu vuelta uū jeē ni sáha Jesús jniñu jéhu jeē ni stéén yā poder yā región Galilea, jeē ní najinū yā jeē ni jéhēn yā región Judea.

### Jeē ní nasávāha ya ĩn tēe catú yuhu pila Betesda

**5** Yūcuán na te cuahān tucu Jesús ñuu Jerusalén, chi íyó tucu vico casáha jnáhan ñuu yā hebreo. <sup>2</sup> Te Jerusalén iyó ĩn pila ndute yajni yéhyí jéē naní yéhyí lanchi. Te yuhu hebreo naní Betesda. Te nuū íne pila un íyó úhūn corredor. <sup>3</sup> Te ini tācá corredor un cácaā cuehē ñayuu cácuhū, jeē cuaá, jeē chacuá, jeē ni íjin. Te candetu i jeē canda ndute ún. <sup>4</sup> Chi íyó quíví jeē cúun ĩn ndajéhé yā ini pila un, te scánda ya ndute. Te ñayuu quíví xihna gā ini pila un ná scánda ya ndute, te ndúvāha i na-ni cuehyí ndóho i. <sup>5</sup> Te yúcuan íyó ĩn tēe jeē ní cuu ocó xahūn

unī cuiyā cuhú de. <sup>6</sup>Te ni jito Jesús jeē catú de, te ni jini yā jeē ní cuu cuehē cuiyā cuhú de. Te ni cahān yā jíin de:

¿A cúní rō nduvāha ró? áchí yá.

<sup>7</sup>Te ni cahān tēe cūhú un jíin yá:

Tu níhín na ni ĩn tēe squívī sāñá ini pila hora jeē cánda ndute. Chi tāca jínu jeē cuní na quívī ná, te quívī-ni inga ñayuu xihna gā. Achí de.

<sup>8</sup>Te ni cahān Jesús:

Ndocuñī te naquihin ró camilla rō te caca ró, áchí yá.

<sup>9</sup>Te tēe un ní nduvāha-ni de. Te ni naquihin de camilla de, te ni quejéé de jíca de. Te quívī ndétātu cúu quívī ún.

<sup>10</sup>Yūcuán na te jnāhan de tēe hebreo un ní cacahān jíin de:

Quívī ndétātu cúu vijna. Te áchí ley jeē ma cúu condiso ró camilla rō.

<sup>11</sup>Te ni cahān tēe ni nduvāha ún:

Tēe ni nasāvāha ruhū, ni cahān de jíin rí jeē náquihin ri camilla rí te caca ri, achí de.

<sup>12</sup>Yūcuán na te ni cacajnūhún un de:

¿Nde tēe ni cahān jíin ró jeē náquihin ró camilla rō te caca ró?

<sup>13</sup>Te tēe ni nduvāha ún, tu jíin de ndé ĩn cúu jeē ní nasāvāha de. Chi cáhīn cuehē ñayuu yūcuán, te Jesús je cuahān yā. <sup>14</sup>Te cúcuéé gá te ni najnāhan Jesús jíin de ini templo cáhnu. Te ni cahān yā:

Vijna chí je ni nduvāha ró. Ma sáha ga rō cuēchi, chí núu tuú, te quiji ĩn jnūndóho xeēn gā siquī rō, achí yá.

<sup>15</sup>Yūcuán na te cuahān tēe ún, te ni castūhún de nuū jnāhan de hebreo un jéē Jesús cúu jeē ní nasāvāha ya de. <sup>16</sup>Te siquī jeē ní sáha Jesús jniñu yáha quívī ndétátú, jeē yúcuan cúu jeē tēe hebreo un cájito xeēn de ya, te cácuni de cahni de ya. <sup>17</sup>Te ni cahān Jesús jíin de:

Máá Tátá rí chí ní cáni te nde vijna sáha ya jniñu váha, te suni súcuan ruhū sáha ri jniñu váha.

<sup>18</sup>Te siquī jeē ni cáhān yā súcuan, te tēe hebreo un víhyá gā cácuni de cahni

de ya. Chi nasūu máá ĩn-ni jeē tu squícu ya jeē cahán ley siquī quívī ndétátú, chí suni jeē ni cáhān yā jeē Tátá yā cúu Yāā Dios, te súcuan sáha inuú yá máá yá jíin Yāā Dios.

### **Siquī jeē ndíso jniñu Sēhe Yāā Dios**

<sup>19</sup>Te ni cahān Jesús:

Jendaá cahán rí jíin ró jijnāhan ró: Ruhū jeē cúu Sēhe Yāā Dios, tú na vé cúu sáha ri jeē máá rí, chí máni sáha ri jeē jito ri sáha Tátá rí. Chí tāca jéé sáha Tátá rí, suni sáha ruhū jeē cúu ri Sēhe ya.

<sup>20</sup>Chi máá Tátá rí, maní yā jíin ruhū jeē cúu ri Sēhe ya, te stéén yā nuū ri ndíhi jeē sáha ya. Te jéhnu ga jniñu stéén yā vēsú jeē ní cuu vijna, jeē naa ni rō coto ró jijnāhan ró.

<sup>21</sup>Te nájñuhun jeē nastécu máá Tátá rí ndīyi te cotecu tucu i, suni súcuan ruhū jeē cúu ri Sēhe ya, nástécu rí ndé-ni cúu jeē cuní máá rí.

<sup>22</sup>Te máá Tátá rí, tu sándaā yā siquī ni ĩn ñayuu, chí ni jēhe ya jñuhun jeē sándaā máá rí siquī tāca ñayuu, chí Sēhe ya cúu ri.

<sup>23</sup>Te súcuan te coo yíñuhún ndíhi ñayuu nuū rí, nájñuhun yíñuhún i nuū Tátá rí. Te ñayuu tu íyó yíñuhún núu rí, núu súcuan te suni tu yíñuhún i nuū máá Tátá rí jeē ní tají yá ruhū vēji ri.

<sup>24</sup>Jendaá cahán rí jíin ró: Núu ĩn ñayuu chuhun ni i jñuhun cáhān rí, te candíje i jeē Yāā ndaā cúu Yāā ní tají rúhū vēji ri, ñayuu ún cotecu i ní cáni andívī, te ma jnahnú ndetū i. Chí ma cúu ga i nájñuhun ndīyi, chí sa suhva cotecu i ní cáni.

<sup>25</sup>Jendaá cahán rí jíin ró jeē quiji quívī, te vijna je ni quejéé, jeē tāca ñayuu cácuu nájñuhun ndīyi, cuni nahín i jñuhun cáhān ruhū, Sēhe Yāā Dios. Te ñayuu cuatáhú, chí cotecu i ní cáni.

<sup>26</sup>Chi nájñuhun íyó poder máá Tátá rí jeē sáha ya jeē técu ndíhi-ni, suni súcuan ni jēhe ya poder nuū ruhū jeē sáha ri jeē cotecu ndíhi-ni.

<sup>27</sup>Te suni ni sáha ya jeē ndíso jniñu ri sándaā rí siquī ñayuu, chí cúu ri Yāā ní nduu tēe.

<sup>28</sup>Ma

náa ni rō cani ni rō siquī jnūhun cáhán rī. Chi quee quivī jeē tāca ndíyi cuni sōho i jnūhun cahān rī, <sup>29</sup> te quendacoo i nuū yíndūji i. Te ndíyi jeē ní casáha jniñu váha, natecu i jeē cótecu i níí cáni. Te ndíyi jeē ní casáha jniñu néé, natecu i te quívicoo i nuū jnahnú ndetū i.

### Ndé vé cúu jeē steén jeē ní tají Yaā Dios yā

<sup>30</sup> Tú na vé cúu sáha ri jeē maá rí. Chi nájñuhun ndácu Yaā Dios jniñu nuū rī, súcuan sándaā rī jniñu. Te ndaā sándaā rī, chi tu sáha ri jeē cuní maá rí, chi sáha ri jeē cuní maá Tátá rī, Yaā ní tají rúhū vēji rī. <sup>31</sup> Núu ruhū cahān rī jeē cúu ri Sēhe Yaā Dios, te cachi ñayuu jeē tu jéjñiñu jnūhun cáhán rī. <sup>32</sup> Te íyó inga jeē cahán jeē cúu ri Sēhe ya. Te jíní rī jeē jnūhun un jéē cahán yā, chi níhín jniñu. <sup>33</sup> Máá ró ni catají ró tēe ni cacajñuhún de Juan. Te Juan chi ndaā ni cahān de jnūhun rī. <sup>34</sup> Te vēsú súcuan te nasūu rúhū cúu jeē jíní ñúhún jeē steén iin tēe jeē Sēhe Yaā Dios cúu rī. Chi máá ró cúu jeē jíní ñúhún návāha candíje ró te cācu ró jíjnáhan ró. Jeē yúcuan ní cahān rī jeē iyó ndáā jnūhun rī jeē ní nacani Juan. <sup>35</sup> Máá Juan ni cuu de nájñuhun iin lámpara jeē cayú te cúndi-jin, cúu jeē ní nacani de jnūhun rī. Te máá ró, jecu-ní quivī ní canujnahan ni rō jeē ní steén de nuū rō. <sup>36</sup> Te íyó jéē steén cají gá jeē kujéhnu ri vēsú jeē ní cáhán Juan. Suu jniñu sáha ri, jniñu jeē ní tejníñu Tátá rī ruhū jeē sáha ri, jniñu un steén ndije jeē maá yá ni tají rúhū vēji rī. <sup>37</sup> Te Tátá rī jeē ní tají yá ruhū vēji rī, suni máá yá cahán nuū tútu ií jeē kujéhnu ri, vēsú tu ní cájini sōho cuítí rō jeē cahán yā, ni tu ní cájito ró yá. <sup>38</sup> Te tu ní cáchuhun ni rō jnūhun un jéē ni cáhán Tátá rī, chi tu cácandíje ró rúhū, Yaā ní tají yá vēji. <sup>39</sup> Cánanducú vii rō tāca jnūhun cáhán tutu ií, chi cájeni ni rō jeē yúcuan níhín rō jnūhun jeē cótecu

rō níí cáni sáha. Te jnūhun siquī maá rí cúu jeē cahán tutu ún. <sup>40</sup> Te vēsú súcuan te tu cácuni rō cuatáhú ró ruhū quívicoo ró ndaha ri návāha cotecu rō níí cáni.

<sup>41</sup> Tu chíhi ri cuenta jnūhun jeē cácahān ñayuu jeē kujéhnu ri. <sup>42</sup> Chi je jíní rī ndese cándāa ánuá rō jeē tu cáhíyo maní rō jíin Yaā Dios. <sup>43</sup> Ruhū vēji ri jíin jniñu cuní Tatá rī, te tu cájetáhú ró ruhū. Te núu inga tēe quee de jíin jniñu cuní maá de, sa tēe un yáchi cuatáhú ró de. <sup>44</sup> ¿Ndesee cuu candíje ró jíjnáhan ró? Chi máni cácuni rō jeē kujéhnu ró sáha jnáhan ró, te tu cánducú ró jeē kujéhnu ró sáha Yaā Dios, jeē maá iin-ni ya iyó. <sup>45</sup> Ma cáni ni rō jeē cáquin rī cuēchi siquī rō nuū Tatá rī. Chi íyó iin jeē cáquin cuēchi siquī rō, suu Moisés, tēe jeē cáñuhun ni rō jeē quendōo ndaā rō jíin ley jeē ní tee de. <sup>46</sup> Chi núu ní cácandíje ró jéē ní tee Moisés, te suni candíje ró rúhū nuú, chi jnūhun máá rí ni tee de. <sup>47</sup> Te núu tu cácandíje ró jnūhun ri jeē ní tee de, ¿te ndese candíje ró jnūhun cáhán maá rí núu súcuan? Achí yá jíin de.

### Jeē ni scáji yā uhūn mil tēe

(Mt. 14.13-21; Mr. 6.30-44; Lc. 9.10-17)

**6** Yūcuán na te cuahān Jesús inga lado mar Galilea, jeē cúu mar Tiberias. <sup>2</sup> Te yōhyo cuehē ñayuu ni candiquin i ya, chi ni cajito i táca jniñu jéhnu jeē steén yā poder yā jeē ní nasávāha ya ñayuu cácuñu. <sup>3</sup> Te ni caa ya iin yucu, te ni cucōo ya yúcuan jíin tēe cáscuáha jíin yá. <sup>4</sup> Te je ni cuyajni vico pascua jeē cánucuhun ni jnáhan ñuu yā hebreo jeē ní cacācu i nuū ñayuu nación Egipto. <sup>5</sup> Te ni ndacoto ya, te ni jito ya jeē véjicoo cuehē ndasí ñayuu. Te ni cahān yā jíin Felipe:

¿Ndé nuū cuaan yó jéē cáji ñayuu yáha jíjnáhan i?

<sup>6</sup> Te súcuan ni cahān yā jeē jító ndee yā de núu ndese cahān de. Chi je jíní maá

yá ndese sáha ya. <sup>7</sup>Te ni cahān Felipe jíin yá:

Te ni ma cánda uū ciento denario staā, ni vēsú jeē cáji i jecu jecu jijnáhan i, áchí de.

<sup>8</sup>Yūcuán na te ni cahān Andrés, ñani Simón Pedro, inga tēe scuáha jíin yá un:

<sup>9</sup>Yāha íne ñin sūchi yáí jeē ndíso i uhūn staā cebada jíin uū chācá. ¿Te ndé canda cuiti ún, chí ñayuu cuehē ndasí cúu?

<sup>10</sup>Yūcuán na te ni cahān Jesús:

Cahān jíin ñayuu na cúcōo i, áchí yá.

Te yūcuan cáa cuehē ite, te ni cacucōo i, te nájnūhun uhūn mil tēe cúu. <sup>11</sup>Te ni quihin Jesús staā ún, te ni nacuatáhú yá nuū Yāa Dios. Te ni jēhe ya nuū tēe cáscuáha jíin yá, te máá de ni casaja de nuū ñayuu ní cacucōo ún. Te suni súcuan ni sáha ya jíin cháca, te ni cayeji i nasaa cácuni máá i. <sup>12</sup>Te nuū ní candutú chíji i, te ni cahān yā jíin tēe cáscuáha ún:

Nastútú ró tācá pedazo jeē ni ndóo, návāha tu stívi cuiti yō.

<sup>13</sup>Te ni canastútú de, te ni chitú úxī uū jica pedazo jeē ni ndóo siquī ndihúhún staā cebada un jeē tuá ni ndíhi caji ñayuu. <sup>14</sup>Te ñayuu un ní cajito i jniñu jéhnū ni sáha Jesús jeē ni stéén yā poder yā. Te ni cacahān i:

Jendaá ndije jeē tēe yáha cúu jeē cahān tutu jeē quíji ini ñayívi jēé nácani jnūhun Yāa Dios. Achí i.

<sup>15</sup>Te ni jini Jesús jeē cácuni i sáfuerza i ya jeē cuu ya rey i núú. Te ni cujiyo tucu máá ñin-ni ya, ni caa ya cuahān yā nuū sucún gá yucu.

### Jeē ní jica jéhé yá nuū mar

(Mt. 14.22-27; Mr. 6.45-52)

<sup>16</sup>Te nuū cuácuaa, te tēe cáscuáha jíin yá ni nanuu de cuangoo de nde mar. <sup>17</sup>Te ni ndīvicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de. <sup>18</sup>Yūcuán na te ni jequíhi ñin tachí níhin, te sáha jeē

ndónnda ndute mar un. <sup>19</sup>Te jeē ní cuu nájnūhun uhūn chí íñū kilómetro cájica de jíin barco, te ni cajito de jeē jíca Jesús nuū mar, te ni cuyajni ya vēji ya nuū barco. Te ni cayúhú de. <sup>20</sup>Te máá yá ni cahān yā jíin de:

Máá rí cúu. Ma yūhu ró jijnáhan ró.

<sup>21</sup>Te ni cacusiñ ni de jeē na quívi ya ini barco. Te ni sáha ya jeē yachi-ni ni jinūcoo-ni de ñuhun íchi núú cuángoo de ún.

### Jeē cánanducú ñayuu Jesús

<sup>22</sup>Te inga quívi ún, te ñayuu jeē ní caquendōo inga lado mar, ni cajini i jeē tēe cáscuáha jíin yá cuangoo de jíin máñúhún-ni barco ni íne yūcuán, jíin jēé tu ní quívi Jesús quihin yā jíin de jíin náhan de. <sup>23</sup>Te sava ga barco jeē véjicoo ichi ñúú Tiberias, ni quecoo yajni lugar nuū ní cayeji i staā jeē ní nacuatáhú máá Jítóho yō jehē. <sup>24</sup>Te jeē ní cajito ñayuu un jēé tuá Jesús íne ya yūcuán, ni tēe cáscuáha jíin yá, te ni quívicoo i tāca barco un, te cuangoo i ñuu Capernaum cuananducú i ya.

### Jesús cúu staā jeē cótecu yō níí cáni

<sup>25</sup>Te nuū ni jínūcoo i nde inga lado mar, te ni nanihín jnáhan i jíin Jesús. Te ni cacajnūhún i ya:

Maestro, ¿na hora ní quee ni yáha?

<sup>26</sup>Te ni cahān Jesús:

Jendaá cahān rí jíin ró jeē cánanducú ró ruhū siquī jeē ní cayeji rō nde ni candutú chíji ró, te nasūu síquī jeē ní cajito ró tāca jniñu jéhnū jeē stéén rí poder rí. <sup>27</sup>Ma cóndihvī ni rō máá síquī jeē caji rō jeē yachí nataxín, chí sa suhva cóndihvī ni rō siquī jeē nihín rō jeē cótecu rō níí cáni sáha. Te máá rí, Yāa ní nduu tēe, cuāha ri nájnūhun staā jeē cótecu rō níí cáni sáha. Chi Tátá rí Yāa Dios ni jeni ya ruhū jeē sáha ri súcuan. Achí yá jíin i.

<sup>28</sup>Yūcuán na te ni cacajnūhún i ya:



¿Ndese sáha ná návāha squícu ná jniñu cuní Yaā Dios?

<sup>29</sup> Te ni cahān Jesús:

Jniñu jeē cuní Yaā Dios cúu jeē candíje ró rúhū, Yaā ní tají yá vēji.

<sup>30</sup> Yūcuán na te ni cacahān i:

Núu súcuan ¿te na jniñu jéhu sáha ní coto ná jijnáhan ná te candíje ná jéē ní tají yá nihín? ¿Na jniñu cúu jeē sáha ní? <sup>31</sup> Chi táca jí yō jengahán ni cayejí de maná jeē ní cuun ichi ándiví ndé nuū ñúhun téhé, nájnuhun yósó núu tútu: Yaā Dios ni jéhe ya staā ni cuun ichi ándiví, ni cayejí i, áchí tutu. Achí i jíin yá.

<sup>32</sup> Te ni cahān Jesús:

Jendaá cahán rí jíin ró: Nasūú Moisés ni jéhe staā un núu de jijnáhan de jeē ní cuun ichi ándiví, chi máá Tátá rí ni jéhe. Te máá yá jéhe staā andiví jéē cótecu rō níí cáni sáha. <sup>33</sup> Chi staā jéhe Yaā Dios cúu máá Yaā ní quiji ichi ándiví, te sáha ya jeē ñayuu ñayiví cotecu i níí cáni andiví. Achí yá.

<sup>34</sup> Te ni cacahān i jíin yá:

Níní cuáha ni staā ún caji na núu súcuan.

<sup>35</sup> Te ni cahān Jesús:

Máá rí cúu máá staā jeē cótecu rō níí cáni sáha. Ndé vé quíví ndaha ri, ma cúu cuítí gā sóco. Te ndé vé candíje ruhū, ma jichí cuítí gā. <sup>36</sup> Te nájnuhun je ni cahān rí jíin ró, tu cáandíje ró rúhū, vēsú ni cajito ró núu rí. <sup>37</sup> Táca ñayuu jeē sáha Tátá rí jeē candíje i ruhū, máá i quívicoo ndaha ri. Te jétáhú rí táca jéē cuní quíví ndaha ri, chi ma squéhichí cuítí rí quihín. <sup>38</sup> Chi ni quiji ri ichi ándiví návāha sáha ri jniñu jeē cuní Yaā ní tají rúhū, te nasūu jéē sáha ri jeē cuní maá rí. <sup>39</sup> Te jniñu jeē cuní Tátá rí, Yaā ní tají rúhū, cúu jeē ma scuíta ri ni iin ñayuu ni jéhe ya nuū rí, chi condito ri i te nastécu rí i quíví jínu ñayiví. <sup>40</sup> Te Yaā ní tají rúhū, cuní yá jeē táca ñayuu jeē nihín i jñuhun ruhū, Sēhe Yaā Dios, te candíje i ruhū,

cotecu i níí cáni andiví. Chi nastécu rí i quíví jínu ñayiví. Achí yá.

<sup>41</sup> Yūcuán na te ni caquejéé jnáhan ñuu yā hebreo cácahān de siquí yā, chi ni cahān yá jeē maá yá cúu staā ní quiji ichi ándiví. <sup>42</sup> Te ni cacahān de:

¿A násūu téé yáha cúu Jesús, sēhe José? Te cájini yō tatá de náná de. ¿Te ndese cúu jeē cahán de jeē ni quíji de ichi ándiví núu súcuan?

<sup>43</sup> Te ni cahān Jesús jíin de:

Ma cahán rō siquí rí jijnáhan ró. <sup>44</sup> Ni iin ñayuu ma cúu quíví i ndaha ri núu ma sáha Tátá rí jeē cúu ni i quíví i, chi máá yá ni tají rúhū vēji ri. Te nastécu rí i quíví jínu ñayiví. <sup>45</sup> Te suhva yósó núu tútu ni catee téē ni canacani jñuhun Yaā Dios: Táca i chi stéén Yaā Dios nuū i, áchí. Núu súcuan te táca ñayuu jíni sōho jñuhun cáhan Tátá rí, te jétáhú i jeē steén yā nuū i, ñayuu ún chi quívicoo i ndaha ri.

<sup>46</sup> Te tu ní jíto ni iin ñayuu nuū maá Tátá rí. Chi máñúhún-ni ruhū ni jito ri nuū yā, chi nde nuū maá yá vēji ri.

<sup>47</sup> Jendaá cahán rí jíin ró jijnáhan ró jéē ñayuu jeē candíje i jeē jnáma ri i, máá i cotecu i níí cáni. <sup>48</sup> Máá rí cúu staā jeē cótecu rō níí cáni sáha. <sup>49</sup> Táca jí rō jengahán, ni cayejí de staā maná jeē ní cuun ichi ándiví ndé nuū ñúhun téhé, te tu ní sáha jeē cótecu de níí cáni andiví.

<sup>50</sup> Te staā jeē cahán rí jeē vēji ichi ándiví, chi na-ni ñayuu caji, te cotecu i níí cáni andiví. <sup>51</sup> Te suu máá rí cúu staā un jéē ní quiji ichi ándiví jéē sáha jeē cótecu rō níí cáni. Te ñayuu jeē cáji staā yáha, cotecu i níí cáni andiví. Te staā jeē cuáha ri un cúu yiquí cúñu rí, te cuáha ri návāha ñayuu ñayiví cotecu i níí cáni andiví. Achí yá.

<sup>52</sup> Yūcuán na te jnáhan ñuu yā hebreo ni cacahān de jíin táca jnáhan de:

¿Ndese cuu cuáha téē yáha yiquí cúñu de caji yō? achí de.

<sup>53</sup> Te ni cahān Jesús jíin de:

Jendaá cahán rī jín ró: Núu tú candíje ró jéē yiqui cúñu ruhū, Yaā ní nduu tēe, cúu nájnūhun staā, te niñī rī cúu nájnūhun ndute, núu súcuan te ma cótecu rō níf cáni andiví. <sup>54</sup> Chi ñayuu cacandíje jeē yiqui cúñu rī cúu nájnūhun staā te niñī rī cúu nájnūhun ndute, máá i cotecu i níf cáni. Te nastécu rī i quivī jínu ñayiví. <sup>55</sup> Chi yiqui cúñu rī jín níñī rī cúu ndíje jeē sáha jeē cótecu i níf cáni. <sup>56</sup> Te ñayuu cacandíje jeē yiqui cúñu rī jín níñī rī cúu nájnūhun staā jín ndute jeē cótecu i níf cáni sáha, máá i níf ndúú i jín rí, te ndúú rí jín i. <sup>57</sup> Máá Tátá rī, Yaā técu, ni tají yá ruhū vēji rī, te técu rī sáha máá yá. Te suni súcuan, ñayuu cacandíje jeē cúu rī nájnūhun staā i ndute i, suni súcuan cotecu i níf cáni sáha rī. <sup>58</sup> Máá rí cúu staā ní quiji ichi ándiví. Te staā jeē cahán rī tu cúu nájnūhun staā maná jeē ní cayejí táca jí rō jenahán, chí tu ní sáha jeē cótecu de níf cáni. Te staā jeē cahán rī, chí ñayuu caji, cotecu i níf cáni sáha, áchí yá.

<sup>59</sup> Táca jnúhun yáha ní steén Jesús nuū ñayuu ní candutútú ini vehe i sinagoga ñuu Capernaum.

### Jnúhun cotecu yō níf cáni

<sup>60</sup> Te cuehē ñayuu cascuáha jín yá, ni cajini sōho i jnúhun yáha jéē ní steén yā. Te ni cacahán maá i:

Yōhyo yí jnúhun cáhán yā yāhá. ¿Ndese cuu cuatáhú yó?

<sup>61</sup> Te ni jini Jesús jeē cacahán i jeē yí cúu jnúhun yāhá, te ni cahán yā jín i:

¿A yí sáha jnúhun yáha jín ró jínáhan ró? <sup>62</sup> ¿Te ndese sáha ró núu coto ró jéē ruhū, Yaā ní nduu tēe, ndaa rī nuhun rī nuū ni cóndee rī xihna ñúhún?

<sup>63</sup> Máá ánuá ñayuu cúu jeē sáha jeē técu i. Chi yiqui cúñu i tu jéjñíñu cuiti súcuan. Te táca jnúhun ni cahán rī jín ró cúu jeē quéndō vāha ánuá rō, te cotecu rō níf cáni sáha. <sup>64</sup> Te sava ró chí tu cacandíje ró. Achí yá.

Chi nde xihna ñúhún je jíní Jesús ndé-ni cúu ñayuu jeē ma cándíje, jín ndé iin de cúu jeē nastúu de ya. <sup>65</sup> Te ni cahán gā yá:

Jeē yúcuan ní cahán rī jín ró jeē ma cúu quiví ni iin ñayuu ndaha rī, te núu tu sáha Tátá rī jeē cúu ni i quiví i, áchí yá.

<sup>66</sup> Te nde quiví ún te cuehē ñayuu cascuáha jín yá, ni castóo i ya, te tuá ni cájica i jín yá. <sup>67</sup> Yūcuán na te ni cahán yá jín máá ndihúxí uū tēe cascuáha jín yá:

¿A suni cáconi máá ró quingoo ró, chí naún?

<sup>68</sup> Te ni cahán Simón Pedro:

¿Ndé núu gā quingoo ná? Chi máá ní cúu jeē nácani jnúhun jeē cótecu na níf cáni sáha. <sup>69</sup> Te ni cacandíje ná te cájini na jéē maá ní cúu Cristo, Sēhe Yaā Dios, Yaā técu, achí de.

<sup>70</sup> Te ni cahán Jesús:

Te vésú ni nacāji rī ndihúxí uū rō, te íyó iin ró jeē ní quiví jexeén ini. Achí yá.

<sup>71</sup> Te súcuan ni cahán yā siquī Judas Iscariote, sēhe Simón. Chi máá de nastúu de ya, vésú iin jnáhan jeē uxí uū tēe cascuáha jín yá cúu de.

### Jeē tu ní cacandíje ñani Jesús

**7** Yūcuán na te jíca cuu Jesús región Galilea. Chí tu cúní yā caca cuu ya región Judea, chí jnáhan ñuu yā hebreo jeē cáyūcu yúcuan, cáconi de cahni de ya. <sup>2</sup> Te cuacuyajni vico jeē casáha ñayuu yā hebreo vehe ramadá, cáyūcú i chíji. <sup>3</sup> Te ñani yā ni cacahán de jín yá:

¿Naun máá yáha-ni íne ró? ¿Naun tú quihín rō región Judea, návāha tēe yúcuan jéē cacandíje de róhó, suni coto de jniñu jéhu sáha ró. <sup>4</sup> Chi núu cúní iin tēe jeē cuité núu jnúhun de, te tu sáha yuhu de jniñu. Te núu sáha nde ró táca jniñu jéhu, vāha ga na sáha ró jéē cúní ndivii ñayuu.

<sup>5</sup> Súcuan ni cacahān ñani yā jín yá, chi ni máá de tu cácan díje de ya. <sup>6</sup> Yūcuán na te ni cahān Jesús:

Ná tu quee maá quívi jeē quihín rī. Te máá ró jijnáhan ró chi na-ni quívi-ni te cuu quingoo ró. <sup>7</sup> Chi ma quítí ni ñayuu ñayívi núū rō, te máá rí chi quítí ni i jító i ruhū, chi cáhán rī jeē jíní rī jeē máni jniñu néé cásáha i. <sup>8</sup> Cuángoo máá ró vico ún. Te máá rí chi ma quihín rī vijna, chi ná tu quee maá quívi cánuú quíhin rī. Achí yá.

<sup>9</sup> Súcuan ni cahān yā jñuhun yáha jín de, te ni quendōo ya Galilea.

### Jeē ni jéhēn Jesús vico vehe ramadá

<sup>10</sup> Te nuū ni yáha ñani yā cuangoo de vico ún, te sáá te suni cuahān maá yá. Te tú cuahān ndijin yā, chi tu ní stéén yā maá yá. <sup>11</sup> Te jnáhan ñuu yā hebreo cámanducú i ya nuū vico ún, te cacahān i:

¿Ndé nuū íne tēe ún? áchí i.

<sup>12</sup> Te yōhoyo ni cacahān ñayuu jeē siquí yā, chi sava i cacahān: Tēe vāha cúu de. Te sava ga i cacahān: Tuú chi stáhú de ñayuu.

<sup>13</sup> Te yuhu-ni ni cacahān i jñuhun ya, chi cáyuhú i jeē quítí ni jnáhan i tēe hebreo.

<sup>14</sup> Te jeē ní cuu sava vico, te ni quee Jesús, ni quívi ya templo cáhnu, te ni quejéé yá steén yā jñuhun. <sup>15</sup> Te ni canaa ni jnáhan ñuu yā hebreo cájini sōho i, te ni cacahān i:

¿Ndese jíní tēe yáha cuéhē jñuhun ndíchí, chi tu ní jíca de escuela? áchí i.

<sup>16</sup> Yūcuán na te ni cahān Jesús:

Jñuhun stéén rī chi nasūu jñuhun máá rí cúu, chi jñuhun jeē ni jēhe máá Yaā ní tají rúhū cúu. <sup>17</sup> Núu ñayuu cuní i sáha i jniñu cúní Yaā Dios, ñayuu ún chi jecūhun ni i núu nde nuū Yaā Dios vēji jñuhun stéén rī, chí jñuhun jeē jéni ni maá-ni ri cúu. <sup>18</sup> Tēe cáhán jñuhun jéni ni maá de, tēe un ndúcú de jeē na

sájéhnu ñayuu de. Te núu ñni tēe ndúcú de jeē sajéhnu de Yaā ní tají de, tēe un cúu tēe ndaā, te tú na jñuhun stáhú íyo jín de.

<sup>19</sup> ¿A násūu jēe ni jēhe Moisés ley yā nuū rō jeē squícu ró? Te ni ñni ró tu cásquícu. Chi sa jeē cácani rō cahni rō ruhū, ¿te najehē cúu? Achí yá.

<sup>20</sup> Te ni cacahān ñayuu cuehē ún:

Tachí ndóho ró. ¿Ndé ñni cúní cahni rohó?

<sup>21</sup> Te ni cahān Jesús:

Ni nasávāha ri ñni tēe quívi ndétátú, te ndívii rō ni canaa ni rō ni cajito ró jēe quívi ndétátú ni sáha ri jniñu ún.

<sup>22</sup> Te Moisés ni jēhe de ley jeē cúu circuncidar nuū rō. Te cásáha ró circuncidar sūchi yí núū uná quívi jeē ní cacu i, vēsú quívi ndétātu cúu. (Te nasūu máá Moisés ní jéquin ley un, chi je ni íyo nuū tāca jí de.) <sup>23</sup> Núu súcuan te núu cásáha ró circuncidar vēsú quívi ndétātu cúu, návāha squícu ró ley Moisés, ¿te najehē cáquítí ni rō jeē ní nasávāha ndíhi ri ñni tēe quívi ndétátú? <sup>24</sup> Ma yachí cani ni rō jeē cuéchi cúu jeē sáha ri. Chi sa cani vāha ni rō siquí tāca jniñu vāha. Achí yá.

### Jeē ní cachi Jesús ndé nuū vēji ya

<sup>25</sup> Yūcuán na te sava ñayuu ñuu Jerusalén ni cacajñuhun jnáhan i:

¿A násūu tēe yáha cúu jeē cámanducú tēe cácujeéhnu jeē cáhni de, chí naún?

<sup>26</sup> Te yáha cáhán ndijin de nuū chitú, te tú na jñuhun cacahān jín de. ¿A sanaa te ni cacundaā ni tēe cácujeéhnu jeē tēe yáha cúu Cristo jeē achí tutu jeē quíji, chí naún? <sup>27</sup> Te tuú chi je cájini yō nuū vēji tēe yáha. Te jeē quíji Cristo, chi ni ñni yó má cúní ndé chi quíji ya. Achí i.

<sup>28</sup> Yūcuán na te ni cahān jee Jesús jeē steén yā jñuhun ini templo:

Cájini rō ruhū, te cájini rō ndé ñuu vēji ri. Te vēsú súcuan te máá Yaā ndaā cúu jeē ní tají rúhū vēji ri, te tú vēji ri jeē cuní maá rí. Te tu cájini rō ndese Yaā cúu ya.

<sup>29</sup> Te máá rí chi jíní rī yā, chi nde nuū maá yá vēji ri, te máá yá ni tají rúhū, achí yá.

<sup>30</sup> Yūcuán na te ni canducú de jnií de ya. Te ni iin de tu ní cúu jnií de ya, chi ná tu quee maá quívī jeē jnií de ya. <sup>31</sup> Te cuehē ñayuu chi ni cacandíje i ya, te ni cacahān i:

¿A násūu tée yáha cúu Cristo, Yaā ndétu yó jéē quiji? Chi cuehē ndasí jniñu jéhnu sáha ya jeē steén yā poder yā. Achí i.

### **Jeē ní catajé de policia jeē jnií de Jesús**

<sup>32</sup> Te ni cajini tēe fariseo jeē súcuan cacahān ñayuu jnūhun ya. Te máá de jíín sūtū cácujeñnu, ni catajé de policia cándito templo jeē jnií de ya. <sup>33</sup> Te ni cahān Jesús:

Jecu na quívī condee rí jíín ró jijnáhan ró. Yūcuán na te nuhun rí nuū Yaā ní tají rúhū vēji ri. <sup>34</sup> Te nanducú ró ruhū, te ma nánihīn rō ruhū. Chi ma cúu jinūcoo ró núu cóndee rí. Achí yá.

<sup>35</sup> Yūcuán na te máá tēe un ní cacajñūhun jnáhan de:

¿Te ndé nuū quihín tēe yáha jeē ma nánihīn yō de? ¿A quihīn de nuū jnáhan yó hebreo jeē ní cajitē núu cáyūcu ndé nación Grecia? ¿Te á steén de jnūhun nuū ñayuu Grecia, chí naún? <sup>36</sup> ¿Te na jnūhun cúu jeē ní cahān de jíín yó jeē nanducú yó de te ma nánihīn yō de, chi ma cúu jinūcoo yó núu cóndee de? Achí tēe un jíijnáhan de.

### **Siquí ndute jeē cótecu yō ní cáni sáha**

<sup>37</sup> Te quívī sándihí vico ún te cúu vico cáhnu ga. Te quívī un ní ndocuiñí Jesús, te ni cahān jee ya:

Núu ndé ñayuu jnáa ndasí i tāca jéē váha jeē sáha ri jehē i, nájñūhun jeē jichí i ndute, núu súcuan te na quívī i ndaha ri te coho i ndute, cúu jeē nihín i jeē váha ún. <sup>38</sup> Te ñayuu jeē candíje jeē jnáma ri

i, chi ini anuá i condee Espíritu Santo, te cuu ya nájñūhun yūte cáne ñuhún jeē sáha ya jeē cótecu i ní cáni, nájñūhun cáhán tutu ii. Achí yá.

<sup>39</sup> Te súcuan ni cahān yā jeē ñayuu candíje jeē jnáma ya i, nihín i Espíritu Santo. Chi ná tu quee Espíritu ún, chi ná tu ndaa Jesús quinhun yā nuū ndujéhnu ya.

### **Jeē ní cacusín ñayuu siquí yā**

<sup>40</sup> Te sava ñayuu cuehē ún, ná ni cajini sōho i jnūhun yáha, te ni cacahān i:

Jendaá jeē tēe yáha cúu jeē achí tutu jeē quiji de nacani de jnūhun Yaā Dios, achí i.

<sup>41</sup> Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chi ni cacahān i:

Tuú chi nasūu Galilea quiji Cristo.

<sup>42</sup> Chi cáhán tutu ii jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

<sup>43</sup> Te súcuan te ni cacusín ñayuu jeē siquí yā. <sup>44</sup> Te sava i cácuni i jnií i ya, te ni iin i tu ní jnií i ya.

### **Jeē tu ní cácandíje tēe cácujeñnu**

<sup>45</sup> Yūcuán na te policia cándito templo tu ní cájnií de Jesús, te cuanungoo de nuū tāca tēe fariseo jíín núu sūtū cácujeñnu. Te tēe ún ni cacajñūhún de policia:

¿Najehē tu ní quécoo ró jíín de? áchí.

<sup>46</sup> Te ni cacahān policia un:

Tú cuiti ni iin tēe cáhán váha ndasí nájñūhun cáhán tēe yúcuan, áchí.

<sup>47</sup> Te ni cacahān tēe fariseo:

¿Te á suni nde máá ró jijnáhan ró ní stáhú de naún? <sup>48</sup> Ni iin jnáhan ruhū tēe cácujeñnu jíín tēe fariseo, tu cácandíje ri jnūhun cáhán tēe ún, ¿te naun cácandíje máá ró? <sup>49</sup> Te ñayuu cuehē yáhá jéē tu cájecūhun ni i ley Moisés, chi jnahnú

ndetū i jeē cá candíje i tēe ún, á chí de jíjnáhan de.

<sup>50</sup> Te ni cahān Nicodemo, tēe ni jēhēn nuū yā ĩn jecuáā, te suni ĩn tēe fariseo cúu de:

<sup>51</sup> Cáhán ley yō jeē ma cúu tee yó cuēchi siquí ĩn tēe, te núu tú xihna gā cuni sōho yó ndese cáhán de, návāha cucáhnū ni yō na cuēchi ni sáha de. Achí de.

<sup>52</sup> Te ni cacahān jíin de:

Te róhó, ¿á suni nde Galilea vēji ró jēe cahán rō jehē tēe ún? Nanducú vāha ró núu tútu ĩi te cuni rō jeē ndé Galilea tu quéndā cuiti ni ĩn tēe nácāni jnūhun Yaā Dios. Achí jíin de. <sup>53</sup> Te cuanungoo de ná vehe ná vehe de.

### Jnūhun ñahan ní casíquí ndéē jnāhan

**8** Te ni caa Jesús cuahān yā yucu Olivos. <sup>2</sup> Te jeē cuácundijin inga quiví, te ni ndee tucu ya templo. Te ndíhi ñayuu ni quecoo i nuū yā. Te ni cucōo ya, te ni steén yā jnūhun nuū i. <sup>3</sup> Yūcuán na te tēe cástéén tutu ley Yaā Dios jíin tēe grupo fariseo, ni quecoo de jíin ĩn ñahan jeē ní canihin de ña jeē casíquí ndéē ña. Te ni cajeni de ña mēhñú. <sup>4</sup> Te ni cacahān de jíin yá:

Maestro, ni canihin ná ñahan yáha jēe casíquí ndéē ña. <sup>5</sup> Te ley Moisés ndácu jniñū nuū yō jeē cuáha yó yúu xiní ñahan cásáha súcuan návāha cuu ña. Te máá ní, ¿ndese cáhán ní?

<sup>6</sup> Te súcuan ni cacahān de jeē cájito ndee de ya núu cuatáhu yá jeē cahán ley un, chí núu tuú te caquin de cuēchi siquí yā. Te Jesús ni jíta ndeyi ya, te ni tee ya nuū ñūhun jíin xini ndáha ya. <sup>7</sup> Te jeē cácajnūhun cácajnūhún de ya, te ni ndonehen ya maá yá, te ni cahān yā jíin de:

Núu ndé ĩn máá ró tú na cuēchi ró, te xihna gā máá ró cuáha yuū xiní ña núu súcuan, á chí yá.

<sup>8</sup> Te ni jíta ndeyi tucu ya, te ni tee tucu ya nuū ñūhun. <sup>9</sup> Te nuū ní cajini de jeē

súcuan ni cahān yā, te ni cajecūhun ni de jeē suni cáhiyo cuēchi de. Te ná ĩn ná ĩn de ni quendacoo de cuahān de, xihna gā tēe jēhnu ga te nde nuū ní ndíhi na. Te ni ndōo máá ĩn na Jesús jíin ñahan índichi mēhñú un. <sup>10</sup> Te ni ndonehen tucu ya maá yá, te tuá ni ĩn tēe un ní jíto ya, chí máá na ñahan ún. Te ni cahān yā jíin ña:

¿Ndé chí cuángoo tēe cájequin cuēchi siquí rō? ¿A tú ni ĩn de ní ndónā cahān gā cuēchi siquí rō?

<sup>11</sup> Te ni cahān ña:

Tú ni ĩn de, á chí ña.

Yūcuán na te ni cahān Jesús jíin ña:

Ni ruhū, ma cahán rī cuēchi siquí rō. Cuáhán te ma sáha ga rō cuēchi, á chí yá.

### Jesús cúu máá luz jeē steén ini anuá ñayuu

<sup>12</sup> Te inga jíinu ni cahān Jesús jíin ñayuu:

Máá rí cúu nájnūhun luz jeē steén ini anuá ñayuu ñayiví, jeē sáha jeē jécūhun ni i siquí Yaā Dios. Ñayuu candíje ruhū chí ma cáca i nájnūhun nuū nēe, chí sa suhva coneváha i luz ini anuá i jeē sáha jeē cótecu i ní cáni.

<sup>13</sup> Yūcuán na te ni cacahān tēe fariseo jíin yá:

Róhó chí cáhán rō jnūhun jehē máá ró, te tu jéjnñū jnūhun cáhán rō.

<sup>14</sup> Te ni cahān Jesús jíin de jíjnāhan de:

Vēsú cáhán rī jehē máá rí, te íyó ndáā jnūhun cáhán rī. Chí jíin rī ndé nuū véji rī jíin ndé nuū quihín rī. Te róhó tu cájini rō ndé nuū véji rī ni ndé nuū quihín rī.

<sup>15</sup> Máá ró chí cuenta ñayuu ñayivi cásāndaā rō siquí jnūhun cáhán rī. Te ruhū chí tu sándaā mañúhún rí siquí ni ĩn ñayuu.

<sup>16</sup> Te núu sándaā rī siquí i, te ndaā sáha rī, chí tu sáha mañúhún rí, chí sándaā rī nde jíin máá Tátá rī, Yaā ní tají ruhū vēji rī. <sup>17</sup> Te yósó núu tútu ley cánevāha ró jēe núu ĩnuú cácahān uū testigo, te jíni ñúhún cuatáhu ró jeē cácahān, chí íyó

ndaā jnūhun ún. <sup>18</sup> Nūu súcuan te ruhū cúu iin jeē cahán ndaā rī jehē rī. Te inga jeē cahán ndaā jehē rī cúu máá Tátá rī, Yaā ní tají rúhū. Achí yá.

<sup>19</sup> Te ni cacahān de jíin yá:

¿Nde nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeē cájini rō ruhū, suni cuni rō Tátá rī nuū.

<sup>20</sup> Tāca jnūhun yáha ní cahān Jesús jeē steén yá ini templo nuū cáyūcu yéjñū jeē cāsocō i xūhún. Te tú ni iin de ní jñí de ya, chi ná tu quee máá quívī jeē jñí de ya.

### Jeē ni cahān yā jeē ma cúu jinūcoo de nuū cóndee yā

<sup>21</sup> Te ni cahān tucu Jesús jíin de:

Ruhū chi quihín rī, te nanducú ró rúhū, te ma nánihín rō ruhū, chi quendōo cuēchi ró siquī rō quívī cúu rō. Te jeē yúcuan má cúu jinūcoo ró núu quihín rī, achí yá.

<sup>22</sup> Yūcuán na te tēe hebreo un ní cacahān máá de:

¿A cahni tēe yáha máá de, te jeē yúcuan cahán de jeē ma cúu jinūcoo yó núu quihín de, chí naún? Achí de.

<sup>23</sup> Te ni cahān yā:

Máá ró jijnáhan ró chi ñayīvi yáha véjicoo ró, te ruhū chi nde andiví véji rī. Máá ró cácuu ñayuu ñayīvi yáha, te ruhū chi nasūu tēe ñayīvi yáha cúu rī.

<sup>24</sup> Jeē yúcuan ní cahān rī jeē quendōo cuēchi ró siquī rō quívī cúu rō. Chi núu ma candíje ró jēe máá rí cúu Cristo, te quendōo nahín cuēchi ró siquī rō quívī cúu rō. Achí yá.

<sup>25</sup> Te ni cacajñuhún de ya:

Núu súcuan ¿te ndé iin cúu rō?

Te ni cahān yā:

Je ni cachi rī nuū rō nde xihna ñúhún ndé iin cúu rī. <sup>26</sup> Te íyó cuéhē gā jnūhun cuu cahān rī jíin ró te sándaā rī siquī rō. Te ma cahán rī, chi ini ñayīvi yáha cahán rī máá-ni jnūhun jeē ní jini rī ni cahān

Yaā ní tají rúhū véji rī. Te máni jnūhun ndaā cahán yā. Achí yá.

<sup>27</sup> Te tu ní cájecūhun ni de jeē cahán yā jnūhun Tátá yā andiví jíin de. <sup>28</sup> Jeē yúcuan ní cahān gā yā:

Nde na yáha jeē cáta caa ró rúhū, Yaā ní nduu tēe, jicā cruz, yūcuán na te cuni rō ndé iin cúu rī. Te cuni rō jeē tú na vé sáha rī jeē máá rí, chi cahán rī máá-ni jnūhun ni steén Tátá rī nuū rī. <sup>29</sup> Chi máá Tátá rī, Yaā ní tají rúhū, ndéé yá jíin rí. Te tu stóo máñúhún yá ruhū, chi níni sáha rī jniñu jeē nújnahan ni máá yá. Achí yá.

<sup>30</sup> Te jeē ni cahān yā jnūhun yáha, te cuehē ñayuu ni cacandíje i ya.

### Siquī ndé-ni cúu sēhe Yaā Dios jíin séhe jexeén

<sup>31</sup> Yūcuán na te ni cahān Jesús jíin jnáhan ñuu yā hebreo jeē ní cacandíje i ya:

Te núu cuiñi nihin ró jíin jnúhun steén rī nuū rō, te cuu ndije ró ñayuu scuáha jíin rí. <sup>32</sup> Te jecūhun ni rō jnūhun ndaā, te jnūhun ndaā un sáha jeē nduu libre rō nuū jeē yíhi ró ndaha.

<sup>33</sup> Te ni cacahān i jíin yá:

Sēhe yucūn Abraham cácuu rī, te tu cáyihí cuítī rī ndaha ni iin. ¿Te ndese cúu jeē cahán rō jeē nduu libre rī núu súcuan?

<sup>34</sup> Te ni cahān Jesús:

Jendaá cahán rī jíin ró jeē tāca ñayuu casáha cuēchi, tu íyó libre i, chi yíhi i chíji cuēchi jeē jejníñu cāhá i nuū.

<sup>35</sup> Te ñayuu jejníñu cāhá, chi tu cúu i iin jnáhan ñayuu vehe nuū jejníñu i. Te iin sēhe chí sa suhva cúu ndije i jnáhan ñayuu vehe ún. <sup>36</sup> Núu súcuan te máá rí jeē cúu Sēhe Yaā Dios, núu sáha rī jeē tuá cuajñíñu cāhá ró nuū cuēchi, núu súcuan te nduu libre ndije ró jijnáhan ró, te cuu ró séhe ya. <sup>37</sup> Te jíin rī jeē séhe yucūn Abraham cácuu ró, te vésú súcuan te cá-cuni rō cahni rō ruhū, chi tu cájetáhú

ró jnūhun cáhán rī. <sup>38</sup> Ruhū chi cáhán rī jnūhun jeē ni stéén Tatá rī nuū rī. Te máá ró chi cásáha ró jniñu jeē ni cáhān tatá maá ró jijnáhan ró. Achí yá.

<sup>39</sup> Te ni cacahān i:

Sēhe yucūn Abraham cácuu ri.

Te ni cahān Jesús:

Núu jeē candfje ró nájñuhun ni candfje Abraham návāha cuu ndije ró yúcūn de, yūcuán na te jniñu váha ni sáha de suni sáha máá ró nuú. <sup>40</sup> Te vijna chi cácuu rō cahni rō ruhū, vēsú ni cahān rī jín ró tāca jnūhun ndaā ni steén Tatá rī nuū rī. Te Abraham chi tu ní sáha cuiti de súcuan. <sup>41</sup> Máá ró chi inuú cásáha ró jín tatá maá ró. Achí yá jín i.

Yūcuán na te ni cacahān i:

Máá rí chi tu cácuu ri sēhe ndáhú jéé tu tátá. Chi iyó ñni-tátá rī, te Yaā Dios cúu ya.

<sup>42</sup> Te ni cahān Jesús:

Núu Yaā Dios cúu ndije tátá rō, te coo manī rō jín rí nuú. Chi nde nuū Yaā Dios ni quenda ri vēji ri. Te tú vēji ri jeē cuní máá rí, chi máá yá ni tají rúhū.

<sup>43</sup> ¿Te najehē tu cájecūhun ni rō jnūhun cáhán rī núu súcuan? Suu siquī jeē tu cácuu rō chusóhó ró jnūhun nácani ri.

<sup>44</sup> Máá ró jijnáhan ró chi tátá rō cúu jexeén. Te cácuu rō sáha ró máá jéé cuní tátá rō ún. Máá jéxeén ni jehni ndīyi nde jeē xíhna ñúhún. Te tu ní fín cuiti jín jnūhun ndaā, te tú cuiti na jnūhun ndaā cahán. Te jeē cahán jexeén jnūhun stáhú cúu jeē súcuan cáa máá. Chi máá un cúu jeē ndíso jnūhun stáhú, te máá un cúu jeē ní squéjéé ndihī jnūhun stáhú.

<sup>45</sup> Te ruhū chi cáhán rī jnūhun ndaā, te jeē yúcuan cúu jeē tu cácuu rō rúhū.

<sup>46</sup> Te ni ñni ró ma nihín rō cuēchi siquī rī, chi tú cuiti na cuēchi ri. Te máni jnūhun ndaā cahán rī, ¿te naun tu cácuu rō rúhū? <sup>47</sup> Ñayuu cácuu sēhe Yaā Dios, chi cáchusóhó i jnūhun Yaā Dios. Te nasūu sēhe Yaā Dios cácuu ró, te jeē yúcuan tu cácuu rō chusóhó ró. Achí yá jín de.

### Iyó Jesús nde ná tu coo Abraham

<sup>48</sup> Yūcuán na te ni cacahān jnáhan ñuu yā hebreo un:

Ndaā cacahān rī jeē canéé ró nájñuhun ñayuu Samaria, te ñúhun tachī ini rō.

<sup>49</sup> Te ni cahān Jesús:

Tu ñúhun tachī ini rī, chi yíñúhún rī jín Tatá rī. Te máá ró jijnáhan ró chi tu cáhiyo yíñúhún ró jín rí. <sup>50</sup> Máá rí tu ndúcú rī jeē cujéhu ri. Iyó ñni jeē sáha jeē cujéhu ri, te máá yá sándaā siquī jnūhun cacahān rō. <sup>51</sup> Jendaá cahán rī jín ró, núu ndé ñayuu squícu jnūhun cáhán rī, ma cúu cuiti i. Achí yá.

<sup>52</sup> Te tē hebreo un tu ní cájecūhun ni de, te ni cacahān de:

Vijna te ni cacucáhnu ni rī jeē ñúhun ndije tachī ini rō. Chi Abraham jín táca tēe ni canacani jnūhun Yaā Dios nde jehán, ni cajihī de. Te rōhó cáhán rō, núu ndé vé squícu jnūhun cáhán rō, te ma cúu cuiti i, achí ró. <sup>53</sup> ¿Te chí jéhu ga rō vēsú jí yō Abraham naun? Chi ni jihī de, te suni ni cajihī táca tēe ni canacani jnūhun ya. ¿Te ndé ñni ga sáha ró máá ró núu súcuan? Achí de.

<sup>54</sup> Te ni cahān Jesús:

Núu ruhū sajéhu ri máá rí, te tu níhín jniñu. Máá Tátá rī cúu jeē sajéhu ruhū. Te cacahān rō jeē máá yá cúu Yaā Dios máá ró. <sup>55</sup> Te vēsú súcuan te tu cájini rō ndese Yaā cúu ya. Te ruhū chi jín rī yā. Te núu cahān rī jeē tu jín rī yā, te cuu ri tēe stáhú nájñuhun máá ró jijnáhan ró. Te tuú chi jín ndije ri yā, te squícu ri jnūhun cáhán yā. <sup>56</sup> Te jí rō Abraham ni cusī ni de jeē coto de quivī quéē rī. Te je ni jito de, te ni jito ri jeē ní cusī ndasī ni de. Achí yá.

<sup>57</sup> Yūcuán na te ni cacahān tēe hebreo un jín yá:

Ni ná tu coo ró uū xico uxī cuiyā, ¿te ndese cúu jeē cahán rō jeē ní jito ró núu Abraham? achí de.

<sup>58</sup> Te ni cahān Jesús:

Jendaá cahán rī jín ró jeē nde ná tu cacu Abraham te je íyó rí, achí yá.

<sup>59</sup> Yūcuán na te ni caquihin de yuū jeē cuáha de xini yā. Te Jesús chi ni quenda sāhi yá ni yāha ya mēhñú de, ni quenda ya ini templo cuahān yā.

### **Jeē ní nasávāha ya iin tēe ni cacu cuáá**

**9** Te jeē jíca Jesús cuahān yā, te ni jito ya nuū iin tēe ni cacu cuáá. <sup>2</sup> Te tēe cáscuáha jíin yá ni cacajñuhún de ya:

Maestro, ¿naun ni cacu cuáá tēe yáha? ¿A cuéchi tátá de náná de cúu, chí cuéchi máá de cúu, chí naún?

<sup>3</sup> Te ni cahān Jesús:

Nasūu cuéchi máá de, ni nasūu cuéchi tátá de náná de cúu jeē ní cacu de súcuan, chi sa suhva návāha cuni ñayuu jniñu jéhu sáha Yaā Dios jíin de. <sup>4</sup> Níní jéē cúu nájñuhun nduú ini ñayiví, te cánuú sáha ri jniñu Yaā ní tají rúhū. Chi quee tiempo jeē coo nájñuhun jecuáá, jeē tuá cuu sájñiñu ni iin. <sup>5</sup> Níní jéē iyó rí ini ñayiví te cúu ri luz jeē cúndijin ini anuá ñayuu ñayiví, návāha jecūhun ni i siquī Yaā Dios. Achí yá.

<sup>6</sup> Te ná ni cahān yā súcuan, te ni tesíhi yá nuū ñuhun, te ni sáha ya ndehyū jíin tésíhi yá un, te ni tee ya siquī tñūu tēe cuáá un. <sup>7</sup> Te ni cahān yā jíin de:

Cuáhán nuū pila Siloé te nacate ró tñūu ró, achí yá. Te jñuhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tñūú de, te ni ndundijin-ni, te ni nandicó de vēji de. <sup>8</sup> Yūcuán na te ñayuu yúcu yajni jíin de, jíin ñáyuu jeē ní cajito jeē cúu de tēe cuáá, ni cacajñuhun jnáhan i:

¿A násūu tēe yáha cúu jeē ndeé-ni yáhá te jícan caridad?

<sup>9</sup> Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cúní coto de.

Te máá de chi ni cahān de:

Suu ri cúu.

<sup>10</sup> Yūcuán na te ni cacajñuhún i de:

¿Te ndese cúu jeē ní nanune tñūu ró núu súcuan?

<sup>11</sup> Te ni cahān de:

Tēe nání Jesús ni sáha de ndehyū, te ni tee de tñūu rí, te ni cahān de jíin rí: Cuáhán nuū pila Siloé te nacate ró tñūu ró. Te ni jehēn rí, te ni nacate ri, te ni nanune-ni tñūu rí, achí de.

<sup>12</sup> Yūcuán na te ni cacajñuhún i de:

¿Ndé nuū íne tēe ún? áchí i.

Tu jíin rí, achí de.

### **Jeē ní castíhí tēe fariseo tēe ni cacu cuáá**

<sup>13</sup> Yūcuán na te ni cajendeca i tēe ni íyo cuáá un núu tēe grupo fariseo. <sup>14</sup> Te quiví ndétātu cúu jeē ni sáha Jesús ndehyū jeē ní nanune ya tñūú de. <sup>15</sup> Te tēe fariseo un ní cacajñuhún tucu de tēe ún ndese ni nanune tñūú de. Te ni cahān de:

Ni tee de ndehyū siquī tñūu ná, te ni nacate ná, te ni ndundijin-ni tñūu ná, achí de.

<sup>16</sup> Yūcuán na te ni cacahān sava tēe fariseo:

Tēe ún chi nasūu ndé nuū Yaā Dios vēji de, chí tu née ii de quiví ndétátú.

Te sava ga de chí ni cacahān:

¿Ndese cuu sáha tēe un táca jniñu jéhu yáha te núu tēe íyó cuéchi cúu de?

Te ni cacusín de siquī yā. <sup>17</sup> Te ni cacajñuhún tucu de tēe ni íyo cuáá un:

Róhó, ¿ndese cáhán ró siquī tēe ni nanune tñūu ró núu súcuan?

Te máá de ni cahān de:

Íin tēe nácani jñuhun Yaā Dios cúu de, achí de.

<sup>18</sup> Te tēe hebreo un chi tu ní cácandíje de jeē ní íyo cuáá tēe ún te ni ndundijin tñūú de. Te ni cacana xini tátá de náná de. <sup>19</sup> Te ni cacajñuhún de:



¿A yáha cúu sēhe ro jēē ní cacu cuáá cacahān rō? Núu súcuan ¿te ndese ni ndundijin tinūú de vijna? áchí.

<sup>20</sup> Te ni cacahān tatá de náná de:

Suu sēhe ri cúu tēē yáha jēē ní cacu cuáá. <sup>21</sup> Te tu cájini rī ndese ni ndundijin tinūú de vijna, ni tu cájini rī ndé tēē ni nanune tinūú de. Cajnūhun ró maá de, chí je jéhnú de, te na cáchi máá de.

<sup>22</sup> Súcuan ni cacahān tatá de náná de, chí cáyūhú de cájito de jnáhan de tēē hebreo. Chí je ni casándaā tēē un jēē núu ndé ñayuu cachi i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quīvi i ini vehe i sinagoga. <sup>23</sup> Jeē yúcuan ní cacahān tatá de náná de: Cajnūhun ró maá de, chí je jéhnú de.

<sup>24</sup> Yūcuán na te tēē hebreo un ní cacana tucu de tēē ni iyo cuáá un. Te ni cacahān de jíin:

Cachi cájí ró nuū rī, jíto jínúū Yaā Dios. Chí cájini rī jeē tēē íyó cuéchi cúu tēē ni nanune tinūu ró.

<sup>25</sup> Yūcuán na te ni cahān de:

Tu jíiní na núu íyó cuéchi de, chí naún. Te íyó iin jeē jíiní ná, cúu jeē tēē cuáá ní cuu ná, te vijna chí ni ndundijin tinūu ná. Achí de.

<sup>26</sup> Te ni cacajnūhún tucu de:

¿Ndesē ni sáha de jíin ró? ¿Ndesē ni nanune de tinūu ró núu súcuan?

<sup>27</sup> Te ni cahān de:

Je ni cuu ni castūhun ná nuū ní, te tu ní cáconi ní cuatáhú ní. ¿Te najehē cáconi ni jēē cáchi tucu ná núu ní? ¿Te chí suni cáconi ni jíjnáhan ní candíje ní yá naún?

<sup>28</sup> Yūcuán na te ni cacahān neé jíin de, te áchí:

Máá ró chí cándíje ró tēē ún, te máá rí chí cácandíje ri Moisés. <sup>29</sup> Te cájini rī jeē ní cahān Yaā Dios jíin Moisés. Te tēē yúcuan, ni tu cájini rī ndé nuū véji de.

<sup>30</sup> Te ni cahān tēē ni iyo cuáá:

Náa ni na jēē cacahān ni jēē tu cájini ní jeē véji de nuū Yaā Dios, vesú ni na-

nune de tinūu ná. <sup>31</sup> Te cájini yō jeē Yaā Dios tu jíiní nahín yá jeē cájicān ñayuu íyó cuéchi. Chí jíiní nahín yá nuū maá-ni ñayuu jeē cáchiñūhún i ya te casáha i jeē cuní yā. <sup>32</sup> Te ní véji yó te tu ní jíiní sōho cuítí yō jeē iin tēē nanune de tinūú inga tēē ni cacu cuáá. <sup>33</sup> Te núu nasūu ndé nuū Yaā Dios véji tēē ún, te ma cúu cuítí sáha de iin jniñu súcuan. Achí de.

<sup>34</sup> Te ni cacahān tēē hebreo un:

Róhó chí íyó ndasí cuéchi ró ndé quiví ní cacu ró, ¿te á máá ró steén nuū rī naún? áchí.

Te ni caquenehen tēē un yátā vehe i sinagoga.

### **Siquí ñayuu cáhiyo cuáá ánuá**

<sup>35</sup> Te ni jini jnūhun Jesús jeē ní caquenehen de tēē ún. Te ni nihín jnáhan ya jíin de, te ni cahān yā jíin de:

¿A cándíje ró Séhe Yaā Dios?

<sup>36</sup> Te ni cahān de:

¿Ndé iin cúu ya návāha candíje ná yá?

<sup>37</sup> Te ni cahān Jesús:

Je ni jito ró núu yā, te suu cúu ruhū jeē cahán jíin ró, achí yá.

<sup>38</sup> Yūcuán na te ni jecuiñí yití de nuū yā, te ni cahān de:

Cándíje ná jēē nihín cúu Jitoho ná.

<sup>39</sup> Te ni cahān Jesús:

Véji ri ini ñayiví yáha jēē sándaā rī siquí ñayuu. Chí ñayuu jeē nájnūhun cácuáá ánuá, ndundijin ini anuá i jeē jécūhun ni i siquí rī. Te ñayuu jeē jéni ni i jeē cájecūhun ni i, nájnūhun nducuáá ánuá i. Achí yá.

<sup>40</sup> Te sava tēē fariseo jeē cáhiin jíin yá, ná ni cajini de jnūhun yáha, te ni cacahān de jíin yá:

¿Te chí jéni ni rō jeē suni tēē tu cájecūhun ni cácuu máá rí naún?

<sup>41</sup> Te ni cahān Jesús:

Núu jeē cácuu ró tēē tu jécūhun ni nuú, te ma cóo cuéchi ró. Te siquí jeē ní cacahān rō jeē cájecūhun ni rō, te tu

cájetáhú ró, jeē yúcuán condee cuēchi siquī rō.

### Jnūhun yátá síquī lanchi

**10** Jendaá cahán rī jíin ró, núu yíhi lanchi ini corral cánevāha cáhnu ñayuu, te núu ndé tēe tu quívi de ichi yéhyí corral un, chi sa suhva inga lado cáa de quívi de, tēe un cúu ñacuíhná, chi vēji jeē sacuíhná. <sup>2</sup>Te tēe quívi ichi yéhyí, chi tēe un cúu pastor ndíto lanchi. <sup>3</sup>Te tēe ndíto yéhyí, núne de te quívi tēe ún. Te lanchi de cánacuni tī tachī de. Te cána de síhvī lanchi máá de, te táva de tī. <sup>4</sup>Te núu ni tava de ndíhi lanchi máá de, te yósnúu de nuū tī cuahān de. Te lanchi un cándiquín tī de, chi nácuni tī tachī de. <sup>5</sup>Te ma cóndiquín tī yatā inga tēe, chi sa suhva cunu tī coto tī de, chi nácuni tī jeē nasūu jítoho tī cúu.

<sup>6</sup>Jnūhun yátá yáha ní cahān Jesús jíin ñayuu, te tu ní cájecūhun ni i na jnūhun cúu jeē ni cáhān yā.

### Jesús cúu máá pastor vāha

<sup>7</sup>Yūcuán na te ni cahān gā Jesús jíin i:

Jendaá cahán rī jíin ró: Máá rí cúu nájñūhun yéhyí corral nuū quívicoo ñayuu cácuu nájñūhun lanchi rī. <sup>8</sup>Tāca tēe jeē tu ní tájí Yāā Dios, jeē ní qui-jicoo de nde ná tu quee rī, cácuu de nájñūhun ñacuíhná, chi tu ní cástéén de jnūhun ndaā. Te ñayuu cácuu nájñūhun lanchi rī, tu ní cájetáhú i de. <sup>9</sup>Máá rí cúu nájñūhun yéhyí. Te ñayuu jeē jíin máá rí quívicoo, jnama rī i. Te cuu i nájñūhun lanchi jeē ndívicoo tī nuū yíhi vāha tī, te quéndacoo tī nuū cáji vāha tī.

<sup>10</sup>Tēe cuíhná chi máni vēji de jeē sacuíhná de lanchi, te cahni de, te snāā de. Te ruhū chi vēji rī návāha cotecu ñayuu cácuu lanchi rī, te nde yōhoyo vāha ndetū coo i. <sup>11</sup>Máá rí cúu máá pastor vāha. Te pastor vāha chi ndíto vāha de lanchi de, vēsú nde cuu de jeē siquí tī. <sup>12</sup>Te ñin tēe yíyāhu, nasūu pastor tī cúu

de, chi nasūu lanchi máá de cúu tī. Te núu jíto de jeē vēji yíhī, te stóo de lanchi, te jínu de cuahān de. Te yíhī chi jnī tī lanchi, te sáha tī jeē jité núu lanchi. <sup>13</sup>Te tēe yíyāhu ún chi jínu de cuahān de siquí jeē lanchi tátú cúu jeē ndíto de, te jeē yúcuán tu cúndáhú ni de tī.

<sup>14</sup>Máá rí cúu máá pastor vāha. Te jíin rī tāca ñayuu cácuu nájñūhun lanchi rī, te máá i cájini i ruhū. <sup>15</sup>Te yāha cúu nájñūhun jeē Tatá rī jíin yā ruhū, te máá rí jíin rī Tatá rī. Te cuu rī jeē siquí ñayuu cácuu lanchi rī. <sup>16</sup>Te suni íyó gā ñayuu jeē cácuu lanchi rī, te sīin sīin ñayuu cácuu i. Te cánuú jēe suni condeca rī ñayuu ún. Te cuatáhú i jnūhun cáhān rī. Te coyūcu cáhnu-ni ndíhi ñayuu candíje, te coo ñin-ni pastor i.

<sup>17</sup>Te Tatá rī manī ndasí yá jíin rí siquí jeē jéhe rī máá rí jeē cúu rī jehē ñayuu, te natecu tucu rī. <sup>18</sup>Ni ñin ma cúu cahni ruhū, chi máá rí cúu jeē jéhe jnūhun cuu rī. Jeē cachí máá rí te cuu rī, te jeē cachí máá rí te natecu rī, chi súcuán íyó poder rī. Súcuán ni cahān Tatá rī jeē sáha rī. Achí yá.

<sup>19</sup>Te jeē ní cajini jnāhan ñuu yā hebreo jnūhun yáha, te ni cacusín tucu i. <sup>20</sup>Te cuehē i ni cacahān:

¿Naun cáchusóhó ró jeē cahán de? Chi ñūhun tachī ini de, te ni tīvī xíní de.

<sup>21</sup>Te sava ga i ni cacahān:

Tu súcuán cáhān tēe ñūhun tachī ini, nájñūhun cáhān tēe yáha. Te tēe ñūhun tachī ini, ¿á cuu nanune de tinūu tēe cuáá naún? Achí.

### Jeē ní casquéhichī i Jesús

<sup>22</sup>Te tiempo mójin cúu, te ñuu Jerusalén cánasáha ñayuu vico jeē cánucūhun ni i quívī ní cuhīi templo cáhnu. <sup>23</sup>Te jíca cuu Jesús ini templo, ini corredor jeē naní Salomón. <sup>24</sup>Te jnāhan ñuu yā hebreo ni cacutútú i nuū yā, te ni cacahān i:

¿Nasaa ga quivī sāha ró jéē ma cucáhnū ni rī? Cachi cají núū rī jijnáhan ri núu máá ró cúu Cristo.

<sup>25</sup> Te ni cahān Jesús:

Je ni castūhun rí nuū rō, te tu ní cá-candíje ró. Tācá jniñu jeē ní tejniñu Tátá rī ruhū sāha ri, yūcuan stéén cají jéē maá yá ni tají rúhū. <sup>26</sup> Te tu cá-candíje ró, chi nasūu lanchi ri cácuu ró, nájñūhun je ni cahān rī jíin ró. <sup>27</sup> Ñayuu cácuu lanchi ri, chi nácuni i jeē maá rí cúu jeē cahān jíin i. Te jíin rī i, te cándiquin i ruhū. <sup>28</sup> Te cotecu i níí cáni sāha ri, te ma jnahnú ndetū cuiti i. Te ni iin ma cúu quende i ndaha ri. <sup>29</sup> Máá Tátá rī ni squívī ya i ndaha ri. Te cújéhnū ga maá yá vēsú tāca gá. Te ni iin ma cúu quende i ndaha ya. <sup>30</sup> Máá rí jíin Tátá rī, chi iin-ni cúu ri, achí yá.

<sup>31</sup> Yūcuán na te jnáhan ñuu yā hebreo ni caquihin tucu de yuū jeē cuáha de xinī yā. <sup>32</sup> Te ni cahān yā jíin de:

Ni steén rī cuehē jniñu váha nuū rō jeē ni sāha ri jíin poder Tatá rī. ¿Te á síquī jeē ni sāha ri jniñu váha cúu jeē cuáha ró yūu xinī rī núu sūcuan? Achí yá.

<sup>33</sup> Te ni cacahān de jíin yá:

Nasūu síquī jeē ni sāha ró jniñu váha cúu jeē cuáha ri yuū xinī rō, chi síquī jeē cahān ndevāha ró jéē achí ró jeē inuú cúu ró jíin Yaā Dios. Chi tēe-ni cúu ró, te sāha ró jéē inuú cúu ró jíin Yaā Dios. Achí de jíin yá.

<sup>34</sup> Te ni cahān Jesús:

Yósó núū tútu ley cánevāha ró jéē ni cahān Yaā Dios: Nájñūhun yaā cácuu ró, achí Yaā Dios, achí tutu. <sup>35</sup> Chi ñayuu jeē ní cajetáhú jñūhun ya, ni cahān yā jeē cácuu i nájñūhun yaā. Te cájini yō jeē ma cúu cahān yō jeē tú ndaā jñūhun cáhān tutu i. <sup>36</sup> Núu sūcuan ¿te naun cácahān rō jeē jñūhun ndevāha cúu jeē ni cáhān rī jeē Séhe Yaā Dios cúu ri? Chi máá Yaā Dios ni jeni ya ruhū síquī jniñu i, te ni tají yá ruhū vēji ri ini ñayiví. <sup>37</sup> Núu tu sāha ri jniñu sāha Tátá rī, núu sūcuan te

ma candíje ró rúhū. <sup>38</sup> Te núu sāha ri, te vēsú tu cá-candíje ró rúhū, te na cándíje ró síquī jniñu sāha ri ún. Te sūcuan te cucáhnū ni rō jeē iin-ni cúu Tátá rī jíin rí, te iin-ni cúu ri jíin Tátá rī. Achí yá.

<sup>39</sup> Yūcuán na te cánducú tucu de jniñ de ya. Te ni ndoñúhún-ni ya cuahān yā.

<sup>40</sup> Te cuanuhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán.

<sup>41</sup> Te ni quijicoo cuehē ñayuu nuū yā, te ni cacahān i jíin táca jnáhan i:

Ndaā chi vēsú tu ní sāha Juan ni iin jniñu jéhnū, te ni cundaā ndihi jñūhun ni cahān de síquī ndese sāha tēe yáha. Achí i.

<sup>42</sup> Te cuehē ñayuu jeē ni jéngoo nuū yā yūcuán, ni cacandíje i ya.

### Jeē ni jíihí Lázaro

**11** Te ni iyo iin tēe cúhú, nání de Lázaro. Te máá de jíin cuáha de María jíin Marta, cácuu de ñayuu ñuu Betania. <sup>2</sup> Te María un jéē cúu cuāha Lázaro, suu ña cúu jeē ní chihi aceite perfume jehē Jitoho yō, te ni nasíchí ña jíin ixi xíní ña. <sup>3</sup> Te ndíndúú cuáha de un ní catajé ña jñūhun cuahān nuū Jesús:

Tēe jeē maní ni jíin, cúhú de, achí ña, achí mozo.

<sup>4</sup> Te ná ni jini Jesús jñūhun, te ni cahān yā:

Cuehyī yáha chi nasūu cuéhyī jeē ví cuu de cúu. Chi sa suhva sāha Yaā Dios jeē cuni ñayuu ndese cújéhnū ya. Chi ruhū, Séhe Yaā Dios, jíin cuéhyī yáha te stéén ri jeē suni cújéhnū máá rí. Achí yá.

<sup>5</sup> Te maní Jesús jíin Marta jíin cúhú ña jíin Lázaro. <sup>6</sup> Te vēsú sūcuan te nuū ni níhīn yā jñūhun jeē cuhú de, te ni quendōo ya uū gā quivī nuū ndeé yá un. <sup>7</sup> Yūcuán na te ni cahān yā jíin tēe cáscuáha jíin yá:

Na quíhín tucu yó región Judea.

<sup>8</sup> Te tēe cáscuáha un ní cacahān de jíin yá:

Maestro, ná tu cuu quivī jeē ní canducú jnáhan yó hebreo cuāha de yuū xini ní. ¿Te cúní ni quihīn tucu ní yúcuan naún? Achí de.

<sup>9</sup>Te ni cahān Jesús:

Ma cúu cahni ñayuu ruhū núu ná tu quee maá quivī cuu rī. Chi jeē iyó rí ñayivī yáha cúu nájñuhun jeē iyó úxí uū hora iin nduú. Te jeē sáha ri jeē cuní Yaā Dios, cúu ri nájñuhun tēe jeē jíca nduú, te tu cáchihi de jehē de, chi cúndijin nuū de ñayivī yáha. <sup>10</sup>Te tēe jeē tu sáha jeē cuní Yaā Dios, chi nájñuhun jíca de jecuaā, te nájñuhun cáchihi de jehē de, chi tu cúndijin ini anuá de. Achí yá.

<sup>11</sup>Yūcuán na te ni cahān tucu ya:

Amigo yō Lázaro quixí de, te quihīn rī sáha ri jeē nátahū ni de. Achí yá.

<sup>12</sup>Yūcuán na te tēe cáscuáha un ní cacahān de:

Núu quixí de te jíní yō jeē nduvāha de.

<sup>13</sup>Te Jesús chi súcuan ni cahān yā jeē jé ni jihí de. Te cájeni ni tēe cáscuáha jeē quixí ndije de. <sup>14</sup>Yūcuán na te ni cahān cají yá:

Je ni jihí Lázaro. <sup>15</sup>Te cúsihī ni rī jeē tu ní cóyūcu yó yūcuán, návāha vāha ga candíje ró jéé coto ró jniñu jéñnu sáha ri. Núu súcuan te na quíngoo yó núu ndíyí ún. Achí yá.

<sup>16</sup>Yūcuán na te Tomás, tēe cúu cuatí, ni cahān de jíñ jnáhan de jeē cascuáha jíñ yá:

Suni na quíngoo yó návāha cuu yō jíñ yá, achí de.

### **Jesús cúu jeē sáha jeē nátecu te cotecu ní cání**

<sup>17</sup>Te nuū ní quee Jesús, te jíní yā jeē ní cuu cuūn quivī yíndūji Lázaro.

<sup>18</sup>Te yajni-ni íne ñuu Betania jíñ ñuu Jerusalén, nájñuhun uū kilómetro yosáva. <sup>19</sup>Te Marta jíñ María, ni quecoo cuehē jnáhan ña hebreo jeē cahán i jñuhun ndeyí ni jíñ ña jeē siquí jeē ni jihí cuāha ña. <sup>20</sup>Te nuū ní jini Marta jeē

véji Jesús, te ni quenda ña cuajnanan ña ya. Te María chi ni ndōo ña vehe. <sup>21</sup>Te ni cahān Marta jíñ Jesús:

Núu ní íyo ní yáha, te ma cúu cuāha ná núu. <sup>22</sup>Te vēsú súcuan te jíñí na jéé tāca jéé cacán ni núu Yaā Dios, te sáha ya, achí ña.

<sup>23</sup>Te ni cahān Jesús jíñ ña:

Natecu cuāha ró.

<sup>24</sup>Te ni cahān Marta:

Jíní na jéé nátecu de quivī nátecu tāca ndíyí nde quivī jíñu ñayiví.

<sup>25</sup>Te ni cahān Jesús:

Máá rí cúu Yaā sáha jeē nátecu jíñ jéé cótecu ní cání. Ñayuu candíje jeē jnáma ri i, vēsú na cúu i, te natecu i. <sup>26</sup>Te ñayuu cátecu te cándíje i ruhū, cotecu i ní cání andiví. ¿A cándíje ró jñuhun yáha? Achí yá.

<sup>27</sup>Te ni cahān ña:

Cándíje ná jéé maá ní cúu Cristo, Sēhe Yaā Dios, jeē achí tutu jeē quíji ini ñayiví, áchí ña.

### **Jeē ni ndáhyū Jesús nuū yíndūji Lázaro**

<sup>28</sup>Te ná ni cahān ña súcuan, te cuahān-ni ña, cuacana yuhu ña cuhū ña María:

Máá Maestro ni quee yā, te cána ya rohó, áchí ña.

<sup>29</sup>Te jeē ní jini María jñuhun yáha, te yachí ni ndocuiñī ña, cuahān ña nuū yā. <sup>30</sup>Te ná tu quiví Jesús ñuu, chí ni ndōo-ni ya nuū ni jéjnahan Marta yā. <sup>31</sup>Te ñayuu hebreo un jéé cáyucú ini vehe jíñ María, jeē cacahān i jñuhun ndeyí ni jíñ ña, ni cajito i jeē yachí ni ndocuiñī ña cuahān ña. Te ni candiquin i ña cuangoo i, chi cájeni ni i jeē cuándahyū ña nde nuū yíndūji ndíyí.

<sup>32</sup>Yūcuán na te ni jinū María nuū íne Jesús, te ni jecuiñī yití ña nuū jehé yā, te ni cahān ña:

Núu ní íyo ní yáha, te ma cúu cuāha ná núu, áchí ña.

<sup>33</sup>Te ni jito Jesús jeē ndahyú ña jíin jeē cándahyū ñayuu vējicoo jíin ña. Te yōhyo ni nducuíhyá ni yā, te ni jnahuhū ni yā jeē cundáhú ni yā i. <sup>34</sup>Te ni cajñūhun yá ña:

¿Ndé mí ní cachindūji ró de?

Te ni cacahān ña jíin yá:

Quíhín yō te cuni ní, áchí ña.

<sup>35</sup>Te ni ndahyú Jesús. <sup>36</sup>Yūcuán na te ni cacahān ñayuu hebreo un:

Condēhe náa yōhyo maní de jíin ndíyi ún.

<sup>37</sup>Te sava i chi ni cacahān i:

Tēe yáha jēé ní nanune de tinūu tée cuáá, ¿á tu ní cúu sáha de jeē ma cúu Lázaro nuú? áchí i.

### Jeē ní natecu Lázaro

<sup>38</sup>Te yōhyo ni jnahuhū ni tucu Jesús, te ni quee yā nde nuū yíndūji ndíyi. Te ñin yaū cava cúu, te yuyáú un ndíhyú ñin yuū. <sup>39</sup>Te ni cahān yā:

Tejiyo yuū un jíinánhan ró, áchí yá.

Te Marta, cuāha ndíyi un, ní cahān ña:

Je jéén xicó de, chí je ni cuu cuūn quiví yíndūji de.

<sup>40</sup>Te ni cahān Jesús jíin ña:

¿A násūú je ni cahān rí jíin ró jeē núu candíje ró te coto ró jéé yōhyo cújéhu Yaā Dios jíin poder yā? áchí yá.

<sup>41</sup>Yūcuán na te ni catejiyo i yuū jeē ndési yuyáú ndíyi ún. Te ni ndacoto-ni Jesús ichi ándiví, te ni cahān yā:

Tátā, na cútahū na núu ni jéé sáha ní jeē jicán na. <sup>42</sup>Te jíiní na jéé niní sáha ní jéé jicán na. Te jeē váha ñayuu cáhiin yáha cúu jeē súcuan cáhán na, návāha na cándíje i jeē maá ní ni tají sáña.

<sup>43</sup>Te ná ni cahān yā súcuan, te ni cahān jee ya:

Lázaro, quenda quiji ró, áchí yá.

<sup>44</sup>Te ni quenda-ni tēe ni jihí ún, te ñúsúcún ndaha de síhin de jíin tira sahma. Te nuū de ñúsúcún ñin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yá. Te ni canandají i.

### Jeē ní casquíjnáhan de jñūhun jeē cáhni de Jesús

(Mt. 26.1-5; Mr. 14.1-2; Lc. 22.1-2)

<sup>45</sup>Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chí ni cajito i jniñu ni sáha ya.

<sup>46</sup>Te sava i chí cuangoo i nuū tēe grupo fariseo, te ni cacastuhún i ndese ni sáha Jesús. <sup>47</sup>Yūcuán na te tēe fariseo un jíin sūtū cácujeñhu ni candutútú de junta jíin táca gá tēe cácujeñhu. Te ni cacahān de: ¿Ndese sáha yó? Chí tēe ún yōhyo cuehē jniñu jéñhu sáha de. <sup>48</sup>Te núu condéhé-ni yó, te ndivii ñayuu candíje i de. Te quijicoo táca tēe nación Roma jeē cácujeñhu, te canu de templo cáhnu yó, te scuíté núu de ñayuu nación yō, achí de jíinánhan de.

<sup>49</sup>Te ñin jnánhan de jeē naní Caifás, jeē cúu máá sūtū cujéñhu ga cuiyā ún, ni cahān de:

Róhó chí tu cájini cuiti rō, <sup>50</sup>ni tu cá-jecūhun ni rō jeē váha ga jeē cúu ñin tēe jehē ñayuu nación yō vēsú jeē náa ndivii i, áchí de.

<sup>51</sup>Te tu ní cáhán de jñūhun yáha jéé jéni ni maá de. Chí siquí jeē cúu de sūtū cujéñhu ga cuiyā ún, te ni sáha Yaā Dios jíin de jeē ní nacani de jñūhun jeē cúu Jesús jehē ñayuu nación hebreo.

<sup>52</sup>Te nasūu máá ñin-ni jehē nación hebreo, chí suni jehē ndivii ñayuu cácuu sēhe Yaā Dios jeē ní cajitē núu táca nación, návāha ñin na cuu i jíinánhan i.

<sup>53</sup>Yūcuán na te nde quiví ún te táca tēe hebreo cácujeñhu un, ní casquíjnáhan de jñūhun jeē cáhni de Jesús.

<sup>54</sup>Jeē yúcuan tuá ní jíca ndijin yā nuū jnánhan ñuu yā hebreo un, chí ni quenda ya región Judea, te cuahān yā ñin ñuu naní Efraín, nuū iyó yajni ñuhun téhé. Te ni condee yā yúcuan jíin tēe cáscuáha jíin yá.

<sup>55</sup>Te ni cuyajni vico pascua jeē cānasáha ñayuu hebreo. Te cuehē ñayuu tāca ñuu yūcuán cuángoo i ñuu Jerusalén, návaha squícu i jeē cahán ley jeē cúchi i ndundoo i nuū Yaā Dios, te sáa te quejéé vico pascua. <sup>56</sup>Te cānanducú i Jesús, te cácajnūhun jnáhan i ini templo:

¿Nde se cájeni ni rō? ¿A quiji de vico, chí tuú? Achí i.

<sup>57</sup>Te sutū cácujeñhu jín tée fariseo ni candacu de jniñu jeē núu ndé ñin ñayuu jini ndé nuū íne ya, te na cástūhún i, návaha jni de ya.

### Jeē ní chuhun María perfume jehē Jesús

(Mt. 26.6-13; Mr. 14.3-9)

**12** Te cúmani inū gā quivī te coo vico pascua. Te ni jehēn tucu Jesús ñuu Betania nuū ndeé Lázaro, tē ni jihī te ni nastécu yā de. <sup>2</sup>Te ni casáha i ñin vico xíni jeē yñúhún i jín yá. Te Marta ni jeni ña cohō. Te Lázaro yéji de staā jín yá nuū mesa jín táca gá ñayuu. <sup>3</sup>Yūcuán na te María ni quee ña jín nájñūhun sava litro aceite perfume jeē máni ita nardo cúu, te yōhyo yahu ndeé. Te ni chuhun ña jehē Jesús, te ni nasíchí ña jín íxi ña. Te nñí ini vehe un ní chitú xícō perfume un. <sup>4</sup>Yūcuán na te ni cahān Judas Iscariote sēhe Simón, ñin tē scuáha jín yá un, te suu de cúu jeē nastúu de ya:

<sup>5</sup>¿Najehē tu ní cúyāhu perfume yáha jēé uní ciento denario, te cuāha yó núu ñáyuu ndahú núu. Achí de.

<sup>6</sup>Súcuan ni cahān de, nasūu jēé cundáhú ndije ni de ñayuu ndahú, chí sa suhva jeē cúu de tēe cuíhná. Chí máá de ndíso yijni xūhún, te quíhin cuíhná de jeē cájequin tāca tēe ún. <sup>7</sup>Yūcuán na te ni cahān Jesús:

Ma stáhān rō ña. Chí jeē ni sáha ña yāhá cúu jeē ni sātūhva ña ruhū nde quivī jeē quíndūji ri. <sup>8</sup>Chí níní cáyūcu

ñáyuu ndahú jín ró, te ruhū chí tuá condee rī jín ró. Achí yá.

### Jeē ní casquijnáhan de jñūhun jeē cahni de Lázaro

<sup>9</sup>Te cuehē ñayuu hebreo ni cajini jñūhun i jeē néne ya ñuu Betania. Te ni jinūcoo i, te nasūu máá ñin jeē cumí i coto i nuū Jesús, chí suni jeē cumí i coto i nuū Lázaro, tēe jeē ní nastécu yā. <sup>10</sup>Yūcuán na te sutū cácujeñhu ni casquijnáhan de jñūhun jeē suni cahni de Lázaro. <sup>11</sup>Chí jeē síquí Lázaro te ni cujiyo cuehē jnáhan ñuu de hebreo nuū de, te cácañdije i Jesús.

### Jeē ni quívi Jesús Jerusalén

(Mt. 21.1-11; Mr. 11.1-11; Lc. 19.28-40)

<sup>12</sup>Te inga quivī ún, te ñayuu cuehē jeē ní quecoo vico pascua un, ní cajini jñūhun i jeē véji Jesús ñuu Jerusalén.

<sup>13</sup>Te ni cajehnde i ndaha ñúú, te ni quen-dacoo i cuajnahan i ya. Te cácana jee i:

Yōhyo cújeñhu Yaā Dios. Yōhyo vāha Yaā cúu Yaā jeē véji jín jniñu máá Jí-toho yō Yaā Dios. Yōhyo vāha Yaā cúu Rey nación yō Israel. Achí i.

<sup>14</sup>Te ni nihin Jesús ñin burro, te ni jecosō yā tī, nájñūhun cáhán tutu ii:

<sup>15</sup>Ñayuu ñuu Jerusalén jeē naní ñuu Sion, ma yūhu ró jijnáhan ró.

Yāhá condēhe ró jeē véji Rey rō, te yósó yá ñin burro.

Achí tutu.

<sup>16</sup>Te quivī ún te tēe cáscuáha jín yá, tu ní cájecūhun ni de jeē súcuan squícu tāca jēé yosó núu tútu ii. Te nde ná ni ndujéñhu Jesús jeē cuánuhun yā andiví, te sáa te ni canucūhun ni de tāca jñūhun yósó síquí yā, jín jēé ní casáha de súcuan jín yá.

<sup>17</sup>Te ñayuu ní cahiin jín yá ná ni cana ya xini Lázaro nuū ní yindūji de, te ni nastécu yā de, ni canacani i jñūhun ndese ni sáha ya. <sup>18</sup>Jeē yúcuan ní quen-dacoo ñayuu cuehē un, ní jejnahan i

ya, chi ni cajini jnūhun i jeē ni sāha ya jniñu jéhu un jéē ni steén yā poder yā. <sup>19</sup>Yūcuán na te ni cacahān maá téé fariseo:

Vijna te je ni cajito yó jéē ma cúu cuiti gā casi yō. Chi jíto yó jéē ndivii cuiti ñayuu cuango i jíin de. Achí de jínáhan de.

### Ñayuu nación Grecia nánducú i Jesús

<sup>20</sup>Te sava ñayuu nación Grecia, suni ni quijicoo i ñuu Jerusalén vico pascua un jéē chiñúhún i Yaā Dios. <sup>21</sup>Te ni quecoo i nuū Felipe, téē ñuu Betsaida ndañú Galilea. Te ni cacahān i jíin de:

Tátā, cáconi ná cahān na jíin Jesús, achí i.

<sup>22</sup>Te ni jehēn Felipe, ni castūhún de nuū Andrés. Te ndindúú de cuacastūhún de nuū Jesús. <sup>23</sup>Te ni cahān Jesús jíin de:

Je ni quee quiví jeē ndujéhu Yaā ní nduu téē. <sup>24</sup>Te jendaá cahán rī jíin ró, ñin nuní trigo núu tú ñingava nuū ñúhun te quindūji, núu súcuan te quendōo máá ñin-ni. Te núu quindūji, te nacayā cuehē ndasí. Te suni súcuan cánuú cuu rī quindūji rī, návāha coo cuehē ñayuu jeē ndúu i sēhe Yaā Dios. <sup>25</sup>Te na-ni ñayuu núu tu jéhe i jnūhun ndoho i jeē siquí ruhū, te jnahnū ndetū i. Te ñayuu jeē jéhe i jnūhun ndoho i jeē siquí ruhū ini ñayivi yáha, cotecu i níí cáni andiví. <sup>26</sup>Núu ndé ñáyuu cuní i cuajniñu i nuū rī, na cóndiquin i ruhū. Te nuū cóndee rī, suni yūcuán condee ñayuu jejniñu nuū rī. Te ñayuu jejniñu nuū rī, chi sāha Tátā rī jeē kujéhu i.

### Jeē ni cahān Jesús jeē cuu yā

<sup>27</sup>Te vijna te cúcuíhyá ndasí ni rī sāha jnūndóho quiji siquí rī. ¿Te ndese cahān rī? ¿A cahān rī jíin Tátā rī: Jnama ní sáña núu jnūndóho jeē quíji siquí ná, achi rī?

Ma cúu, chi jeē siquí yúcuán cúu jeē véji rī. <sup>28</sup>Tátā, steén ni jéē kujéhu ndasí ní jíin poder ni, achí yá.

Yūcuán na te ichi ándiví ní cahān ñin jnūhun:

Je ni steén rī jeē kujéhu rī, te sāha tucu rī ñnga jínu, achí yá.

<sup>29</sup>Te ni cajini ñayuu cáhiin yūcuán, te ni cacahān i jeē taja cáhán. Te sava ga i ni cacahān:

Ñin ndajéhe Yaā Dios ni cahān jíin yá.

<sup>30</sup>Te ní cahān Jesús jíin i:

Tu ní cáhán jnūhun yáha jéē siquí ruhū, chi sa suhva návāha cuni rō siquí jnūhun jeē ni cáhán yā jíin rī. <sup>31</sup>Vijna cúu jeē sándaā Yaā Dios siquí cuéchi ñayuu ñayivi yáha. Vijna cúu jeē scínu ya jexeén jeē ndácu jniñu ini ñayivi yáha. <sup>32</sup>Te ruhū, núu na jínu condita caa rī cuu rī ini ñayiví, te sāha rī jeē jnāá tāca ñáyuu quívicoo i ndaha rī, achí yá.

<sup>33</sup>Súcuan ni cahān yā jeē steén yā ndese modo cuu yā. <sup>34</sup>Te ni cacahān ñayuu jíin yá:

Ni cajini sōho ná jéē cahán tutu ley Yaā Dios cánevāha yó, jeē Cristo cotecu yā níí cáni. ¿Te naun cahán ni jéē Yaā ní nduu téē, cánuú condita caa ya cuu yā? ¿Ndé ñin cúu máá Yáá ní nduu téē núu súcuan? Achí i.

<sup>35</sup>Yūcuán na te ni cahān Jesús:

Máá jecu na quiví condee rī jíin ró jeē cúu rī luz cundijin ini anuá rō. Núu súcuan te vijna jeē iyó gá luz rī jíin ró, te caca ró jíin, chi sanaa ni rō te cuahān rī, te nájñūhun quendōo ró núu néē. Chi ñayuu cájica nájñūhun nuū néē, tu cájini i ndé nuū cuángoo i. <sup>36</sup>Núu súcuan te níí ndéé gá rī jíin ró, te candíje ró rúhū jeē cúu rī luz, návāha nduu ró ñáyuu cájica jíin luz, achí yá.

Súcuan ni cahān Jesús tāca jnūhun yáha, te cuahān-ni ya, te tuá ni steén yā maá yá nuū i.

### Jeē tu ní cá candíje ñayuu hebreo jeē cúu ya Cristo

<sup>37</sup> Te vēsú cuehē jniñu jéhnū ni sáha Jesús jeē steén yā poder yā nuū i, te tu ní cá candíje i ya. <sup>38</sup> Chi squícu nahín jnūhun ni cahān Isaías, tēe ni nacani jnūhun Yaā Dios nde jenahán:

Tátā Yaā Dios, tu ní cá candíje ñayuu jnūhun ni canacani ná,  
te tu ní cá candíje i jniñu jéhnū jeē ni steén ni poder ni núu i.

Achí Isaías. <sup>39</sup> Jeē yúcuān tu ní cúu candíje i, chi ni cahān tucu Isaías:

<sup>40</sup> Ni sáha ya jeē nájnūhun cáhīyo cuáá ánuá i,

jiín jēē cácuñihni ni i,  
návāha coo nájnūhun jeē tu cájito i,  
te ni ma jécūhun ni i,  
ni ma násāma ini i quivícoo i nuū rī,  
jeē nasávāha ri anuá i nuū cuēchi i.

Achí Cristo, achí tutu. <sup>41</sup> Jnūhun yáha ní cahān Isaías, chi je ni jito de ndese yōhōyó cújéhnū Jesús, te ni cahān de ndese coo quiví jeē quíji ya.

<sup>42</sup> Te vēsú súcuān te cuehē ñayuu hebreo chi ni cacandíje i ya, te suni nde jiín sava tēe cándacu jniñu. Te tu ní cá cachi de jeē cá candíje de ya, chi squí jeē cáyūhú de táca tēe fariseo. Chi núu súcuān te quenehen ún de ini vehe ii sinagoga jeē ma cuáha ga jnūhun quivícoo de. <sup>43</sup> Chi cácusii gā ni de jeē cújéhnū de sáha ñayuu, vēsú jeē cújéhnū de sáha Yaā Dios.

### Jnūhun cáhán Jesús cúu jeē sándaā squí ñayuu

<sup>44</sup> Te ni cahān jee Jesús:

Ñayuu cá candíje ruhū, nasūu máñúhún-ni ruhū cá candíje i, chi suni cá candíje i nde maá Tátā rī, Yaā ní tají rúhū. <sup>45</sup> Te ñayuu cájito nuū rī, suni cájito i nuū Yaā ní tají rúhū. <sup>46</sup> Máá rí jeē cúu ri luz cúndijin ini anuá ñayuu, ni quíji ri ini ñayiví návāha táca ñayuu

cá candíje ruhū, ma cáca i nájnūhun nuū néē. <sup>47</sup> Te núu iin ñayuu jíni sōho i jnūhun cáhán rī, te núu tu jétáhú i, te nasūu rúhū sándaā squí i. Chi tú vēji ri jeē ndénehen ri cuēchi squí ñayuu ñayiví, chi sa suhva jeē jnáma ri i. <sup>48</sup> Te ñayuu jeē casquéhichí i ruhū te tu cájetáhú i jnūhun cáhán rī, iyó iin jeē sándaā squí i. Suu táca jnūhun jeē ni cáhán rī, jnūhun un cúu jeē ndenehen cuēchi squí i quiví jínu ñayiví. <sup>49</sup> Chi tu cáhán rí jeē cúu ni maá rí, chi Tátā rí, Yaā ní tají rúhū, máá yá ni ndacu jniñu nuū rī ndese cahān rí jíin ndese steén rí. <sup>50</sup> Te jíni rí jeē jniñu ndácu Tátā rí sáha jeē cótecu ñayuu ní cáni. Núu súcuān te jnūhun cáhán rí, chi máni jnūhun jeē ní cachi Tátā rí cúu, áchí yá.

### Jeē ní nacate ya jehē tēe cáscuáha

**13** Te jehíni inga quiví te quejéé vico pascua. Te je jíni Jesús jeē ní quee quiví jeē quénda ya ñayiví yáha quínuhun yā nuū Tátā yā. Te níni cúndáhú ni yā ñayuu maá yá jeē cáyūcú ini ñayiví. Te vijna jeē jínu jeē íne ya ñayiví, te sáha ya iin jniñu jeē steén cají yá jeē cundáhú ni yā i.

<sup>2</sup> Te jexeén je ni squiví ini anuá Judas Iscariote sēhe Simón, jeē vijna nastúu de ya. <sup>3</sup> Te jíni Jesús jeē véji ya nuū Yaā Dios, te nuhūn yā nuū Yaā Dios, jiín jēē ni sáha Tátā yā jeē cújéhnū ya squí ndíhi-ni. <sup>4</sup> Te cúxíni ya jíin tēe cáscuáha jíin yá, te ni ndocuñí yā. Te ni stáa ya sahma ndíi ya, te ni jihni yā iin toalla chíji ya. <sup>5</sup> Te ni chuhun ya ndute ini iin tijeñē. Te ni quejéé yá nácate ya jehē tēe cáscuáha. Te násíchí yā jíin toalla jeē nuhní chíji ya.

<sup>6</sup> Te ni jínu yā nuū Simón Pedro. Te ni cahān Pedro jíin yá:

¿Sa máá ní nacate jehē ná naún?

<sup>7</sup> Te ni cahān Jesús:

Tu jécūhun ni rō jeē sáha ri vijna, te cúcuéé gá te jecūhun ni rō.



<sup>8</sup>Te ni cahān Pedro jíin yá:

Ma nácate cuiti ni jéhē ná.

Te ni cahān Jesús:

Núu tú nacate ri jehē rō, te ma cúu candúú ró jíin rí.

<sup>9</sup>Te ni cahān Simón Pedro:

Núu súcuan cúu te nasūu máá jéhē-ni ná, chi suni nacate ní ndaha ná jíin xíni ná, áchí de.

<sup>10</sup>Te ni cahān Jesús jíin de:

Tēe jeē sa ní jichi, tu jíni nūhún ndundoo ní cáhnu de, chi máá jéhē-ni de, chi je íyó ndoo ní cáhnu de. Te máá ró chi je ni candundoo ró. Te tú ndíhi ró cáhiyo ndoo.

<sup>11</sup>Chi je jíni yā ndé iin de cúu jeē nastúu de ya, te jeē yúcuan ní cahān yā: Tú ndíhi ró cáhiyo ndoo.

<sup>12</sup>Te nuū ni jínu ni nacate ya jehē de jíjnāhan de, te ni naquihin ya sahman ndíi ya, te ni nucōo tucu ya nuū mesa. Te ni cahān yā:

¿A cájecūhun ni rō na vé cuní cahān jeē ni sáha ri jíin ró? <sup>13</sup>Cácahān rō jeē Maestro jíin Jítoho rō cúu ri, te ndaā cácahān rō, chi suu ndije cúu ri. <sup>14</sup>Núu súcuan te vēsú Maestro rō jíin Jítoho rō cúu ri, te ni nacate ri jehē rō jíjnāhan rō, te suni súcuan cánuú jēē nacate máá ró jehē jnāhan rō. <sup>15</sup>Chi jniñu yáha ni sáha ri jeē steén ri nuū rō jeē suni súcuan sa cuajniñu ró núu jnāhan ró, nájnūhun sa máá rí ni jejniñu ri nuū rō. <sup>16</sup>Jendaá cahán rí jíin ró jeē iin mozo tu cújéhnu de nuū patrón de, te tēe jíca jniñu táhú nuū de, te cújéhnu de nuū tēe ni tají de. Te máá ró cácuu mozo rí, te na cuajniñu ró núu jnāhan ró nájnūhun ni steén ri nuū rō. <sup>17</sup>Te núu ni cajecūhun ni rō jnūhun yáha, te yōhyo ndetū rō te núu squícu ró.

<sup>18</sup>Te nasūu jēē cahán rí jeē ndíhi ró ndetū, chi je jíni rí tāca rōhó jēē ní nacāji ri. Te cánuú squícu jnūhun yáha jeē cáhán tutu i: Tēe yéji staā jíin rí, ni ndió cuíñí de siquí rí, achí tutu. <sup>19</sup>Te vi-

jna te je cástūhun rí tāca jēē yáha núu rō nde ná tu coo, návāha núu na cóo, te candíje ró jēē máá rí cúu Yaā ní tají Yaā Dios. <sup>20</sup>Jendaá cahán rí jíin ró jeē na-ni ñayuu jeē cuatáhú i tāca jēē tají rí, te ruhū jetáhú i. Te ñayuu jetáhú rúhū, suni jetáhú i Yaā ní tají rúhū vēji ri, achí yá.

**Jeē ní cachi yā jeē nastúu Judas yā**

(Mt. 26.20-25;

Mr. 14.17-21; Lc. 22.21-23)

<sup>21</sup>Te ná ni cahān Jesús tāca jnūhun yáha, te ni cucuíhyá ndasí ni yā. Te ni cahān cají yá:

Jendaá cahán rí jíin ró jíjnāhan ró jēē iin máá ró nastúu ruhū, achí yá.

<sup>22</sup>Yūcuán na te tēe cáscuáha jíin yá, ni candacoto de nuū jnāhan de, cájeni ni de ndé iin de cúu jeē ni cáhān yā. <sup>23</sup>Te iin máá tēe scuáha jeē maní gā yā jíin, néne de xiin ya mesa jeē cácuixíni de jíin yá. <sup>24</sup>Te ni sáha Simón Pedro seña nuū de jeē na cájnūhún de ya ndé iin de cúu jeē ni cáhān yā. <sup>25</sup>Yūcuán na te tēe un ní scáyí de máá de nuū Jesús, te ni cajnūhún de ya:

¿Ndé iin de cúu? áchí de jíin yá.

<sup>26</sup>Te ni cahān Jesús:

Na chūndaji ri staā te cuāha ri nuū iin de, te suu tēe un cúu, áchí yá.

Te ni chundaji ya staā, te ni jēhe ya nuū Judas Iscariote sēhe Simón. <sup>27</sup>Te jeē ní quihin de staā ún, te ni quívi-ni Satanás ini anuá de. Yūcuán na te ni cahān Jesús jíin de:

Jniñu jeē sáha ró, na sáha yachí rō.

<sup>28</sup>Te ni iin tēe cáyeji staā jíin yá, tu ní cájecūhun ni de naun ni cahān yā súcuan jíin de. <sup>29</sup>Chi sava de cájeni ni de jeē ni cáhān Jesús jíin Judas jeē cuāan de jeē jíni nūhún yá vico ún, chí jēē cuáha de jecu xūhun núu ñayuu ndahú. Chi máá de ndíso yíjni xūhún. <sup>30</sup>Te jeē ní yeji de staā ún, te ni quenda-ni de cuahān de. Te je ni cuaa.

### Jeē ní ndacu ya jniñu jée

<sup>31</sup> Yūcuán na te jeē cuahán Judas te ni cahān Jesús:

Vijna te ruhū, Yaā ní nduu tēe, stéén rī ndese cújéhnu rī, te suni jíin rúhū te cuni ñayuu ndese cújéhnu Yaā Dios. <sup>32</sup> Te núu jíin rúhū cuni ñayuu ndese cújéhnu Yaā Dios, núu súcuan te suni stéén Yaā Dios ndese cújéhnu ruhū jeē cúu rī Sehe ya. Te yachī-ni stéén yā. <sup>33</sup> Séhē, tuá nahān condee rī jíin ró jijnáhan ró. Te nanducú ró ruhū, te nájnūhun ni cahān rī jíin táca jnáhan yó hebreo, suni súcuan cáhán rī jíin ró vijna, jeē ma cúu jinūcoo ró núu quihín rī. <sup>34</sup> Te vijna te ndácu rī ñin jniñu jée núu rō, jeē na cúndáhú ni rō jnáhan ró. Nájnūhun cúndáhú ni rī rohó, suni súcuan na cúndáhú ni rō jnáhan ró. <sup>35</sup> Te núu cúndáhú ni rō jnáhan ró, súcuan te cuni tāca ñayuu jeē cácuu ró tée cás-cuáha jíin rí, achí yá.

### Jeē ní cachi yā jeē yūhu Pedro cahān de jeē jiní de ya

(Mt. 26.31-35;

Mr. 14.27-31; Lc. 22.31-34)

<sup>36</sup> Te ni cahān Simón Pedro jíin yá:

¿Ndé nuū quihín ni núu súcuan?

Te ni cahān Jesús:

Nuū quihín rī chí ma cúu condiquin rō ruhū vijna, te cúcuéé gá te jinū rō.

<sup>37</sup> Te ni cahān Pedro:

¿Najehē ma cúu condiquin na níhín vijna? Tu yúhú ná cuu na jée siquí ni.

<sup>38</sup> Te ni cahān Jesús:

¿A jéni ni rō jeē tu yúhú ró cuu rō jeē siquí rī? Jendaá cahán rī jíin ró jeē nde ná tu cana líhli, te unī jínu yūhu ró te cahān rō jeē tu jíin rō ruhū. Achí yá.

### Jesús cúu ichi jeē jinú yō nuū Tatá yā

**14** Te ni cahān gā yā:

Ma cucuíhyá ni rō siquí tāca jnúndóho. Na cándíje ró jée sáha Yaā Dios jehē rō, te suni na cándíje ró jée

sáha rī jehē rō. <sup>2</sup> Chi nuū ndeé Tátá rī, íyó cuéhē vehe condee rō jijnáhan ró. Te núu jeē tu súcuan íyó, te je ni castūhun rī nuū rō nuú. Núu súcuan te quihín rī quisátūhva rī nuū cóyūcu ró. <sup>3</sup> Te jeē quihín rī sátūhva rī nuū cóyūcu ró, te ndiji rī quinaquihín rī rohó quihín yō, návāha suni cóyūcu ró nuū cóndee maá rí. <sup>4</sup> Te je cájini rō ndé nuū quihín rī, te cájini rō ndese jinū rō yūcuán. Achí yá.

<sup>5</sup> Te ni cahān Tomás jíin yá:

Tu cájini na ndé nuū quihín ni, ¿te ndese cuni ná ichi jíin yūcuán núu súcuan?

<sup>6</sup> Te ni cahān Jesús jíin de:

Maá rí cúu ichi jinū rō andiví, te maá rí cúu jnūhun ndaá jíin jnúhun cotecu rō níí cáni. Te ni ñin ma jinú nuū Tatá rī te núu tú ruhū. <sup>7</sup> Te núu je ni cajini rō ruhū, te suni je ni cajini rō Tatá rī núu súcuan. Te ndé vijna je cájini rō yā, chí je ni cajito ró núu rī, achí yá.

<sup>8</sup> Te ni cahān Felipe jíin yá:

Stéén ni Tátá ni núu ná, te na cúvāha ni na jijnáhan ná, áchí de.

<sup>9</sup> Te ni cahān Jesús:

Felipe, je ni cuu cuehē quiví jíca rī jíin ró jijnáhan ró, ¿te á ná tu cuni rō ndé ñin cúu rī naún? Tēe jeē jíto ruhū, suu Tátá rī jíto de. Núu súcuan ¿te najehē cahán rō jeē steén rī Tatá rī nuū rō? <sup>10</sup> ¿A tu cándíje ró jée ñin-ni cúu rī jíin Tátá rī, te Tátá rī ñin-ni cúu ya jíin rí? Tāca jnúhun cáhán rī jíin ró, nasūu jnúhun maá rí cúu. Chí Tátá rī jeē ñin-ni cúu ya jíin rí, maá yá sáha tācá jniñu jeē sáha rī. <sup>11</sup> Candíje ró jijnáhan ró jée ñin-ni cúu rī jíin maá Tátá rī, te Tátá rī ñin-ni cúu ya jíin rí. Te núu tu cájecūhun ni rō, te cándíje ró rúhū siquí tācá jniñu sáha rī. <sup>12</sup> Jendaá cahán rī jíin ró, núu ndé ñayuu cándíje ruhū, jniñu jénu jeē sáha rī yāhá, suni sáha i. Te jénu ga jniñu sáha i vesú yāhá, chí quinhun rī nuū ndeé Tatá rī. <sup>13</sup> Te tācá na-ni vé cacán rō nuū Tatá rī siquí jeē cáncandíje ró jée

cúu ri Sēhe ya, te sáha ri jeē cacán rō, te súcuan stéén rī jeē yóhoyo cújéhnū Tátá rī. <sup>14</sup> Chi tācá na-ni vé cacán rō siquī jeē cácadnje rō rúhū, te sáha nahín rī.

### Jeē ni jéjnūhun ya jeē tají yá Espíritu Santo

<sup>15</sup> Te núu manī rō jíin rí jijnáhan rō, te na squícu rō jniñu ndácu rī nuū rō. <sup>16</sup> Te cacān tahú rī nuū Tátá rī, te tají yá inga Yaā chindéé ñáhán rōhó, te sáha ya jeē cóo sīi ni rō jijnáhan rō. Te Yaā un cúu máa Espíritu jeē steén jnūhun ndaā, te condee yā jíin rō níí cáni. <sup>17</sup> Te ñayuu ñayīvi má cúu cuatáhú i ya, chi tu cúu coto i nuū yā, ni tu cúu cuni i ndese Yaā cúu ya. Te máa rō chi je cájini rō ndese Yaā cúu ya, chi ndéé yá jíin rō, te condee yā ini anuá rō níí cáni. <sup>18</sup> Ma stóo uun ri rohó, chi ndiji ri nuū rō. <sup>19</sup> Jecu na quivī te ma cóto ga ñayuu ñayīvi núu rī. Te máa rō jijnáhan rō chi coto rō núu rī, chi cotecu rī níí cáni, te jeē yúcuan suni cotecu máa rō. <sup>20</sup> Te quivī ún te cuni rō jeē ñin-ni cúu ri jíin Tátá rī, te máa rō ñin-ni cúu rō jíin rí jeē ndeé rí ini anuá rō jijnáhan rō. <sup>21</sup> Te na-ni ñayuu núu ñūhun ni i jniñu ní ndacu ri, te squícu i, ñayuu un cúu jeē maní ndije jíin rí. Te ñayuu jeē maní jíin rí, suni coo maní Tátá rī jíin i. Te suni ruhū coo maní rī jíin i, te stéén rī nuū i jeē nduú rí jíin i. Achí yá.

<sup>22</sup> Te ni cahān Judas jíin yá (te nasūu tée cúu Iscariote):

Najehē cúu jeē steén ni máa ní nuū ná, te nuū ñayuu ñayīvi chi tuú?

<sup>23</sup> Te ni cahān Jesús:

Ñayuu jeē maní jíin rí, chi cásquícu i jeē cahán rī. Te coo maní Tátá rī jíin i. Te Tátá rī jíin máa rí quijicoo ri cundúú rí jíin i. <sup>24</sup> Te ñayuu jeē tú maní jíin rí, tu cásquícu i jeē cahán rī. Te jnūhun cájini sōho rō cáhán rī, nasūu jnúhun máa rí cúu, chi jnūhun máa Tátá rī jeē níí tají rúhū cúu.

<sup>25</sup> Tāca jnúhun yáha cáhán rī jíin rō níni íne ga rī jíin rō. <sup>26</sup> Te Tátá rī chi tají yá Espíritu Santo, quiji nucuiñi nuū rī. Te máa yá chindéé ñáhán yá rohó, te sáha ya jeē cóo sīi ni rō. Te stéén yā tāca jnúhun nuū rō, te nacachi tucu ya tāca jéé ni cáhán rī jíin rō.

<sup>27</sup> Te jeē quihín rī, te sáha ri jeē cóo ndeyí coo sīi ni rō. Nájñūhun íyó ndeyí sīi ni máa rí, suni súcuan coo ndeyí sīi ni rō sáha ri. Te jeē sáha ri jeē cóo ndeyí sīi ni rō, tu quíjnáhan jíin jnúhun ndeyí cácahān ñayuu ñayīvi. Ma cucufhyá ni rō siquī tāca jnúndóho, te ni ma yūhu rō. <sup>28</sup> Je ni cajini sōho rō jéé ni cáhán rī jeē quihín rī, te ndiji ri cundúú rí jíin rō. Te núu cáhiyo maní vāha rō jíin rí, te cusīi ni rō jeē ni cáhán rī jeē nuhún rī nuū Tátá rī. Chi cújéhnū ga Tátá rī vija vēsú ruhū. <sup>29</sup> Je ni castūhun rí nuū rō tāca jnúhun yáha nde ná tu coo, návāha núu je ni cuu, te candije rō rúhū jijnáhan rō.

<sup>30</sup> Ma cahán rī cuehē gā jnūhun jíin rō, chi je vēji jexeén jeē ndácu jniñu ini ñayīvi yáha. Te tú na vé cúu sáha siquī rī nuú. <sup>31</sup> Te na cóo nájñūhun ni ndacu Tátá rī jniñu nuū rī, návāha cuni ñayuu ñayīvi jéé maní rī jíin Tátá rī, te sáha ri jniñu ní ndacu ya. Ndocuiñi jijnáhan rō na quíngoo yó. Achí yá.

### Jesús cúu nájñūhun yoyúcu uva

**15** Máa rí cúu nájñūhun yoyúcu uva váha ndaā, te Tátá rī cúu nájñūhun tēe ndíto yoyúcu uva un. <sup>2</sup> Te máa rō chi cácuu rō nájñūhun ndaha, te núu tu jéhe rō ndéhē te quende yā rohó. Te núu cácuu rō nájñūhun ndaha jeē jéhe ndehē, te nasándoo ya nacahnde yā rohó nájñūhun jeē cúu rō ndaha ún, návāha cuāha rō cuehē gā ndehē. <sup>3</sup> Te máa rō chi je ni candundoo ánuá rō jíin jnúhun ni steén rī nuū rō, nájñūhun ndúndoo ndaha uva. <sup>4</sup> Na cundúú rō jíin rí, te suni máa rí cundúú rí jíin rō. ñin

ndaha uva ma cúu cuáha ndehē jeē maá, te núu tu yíjnī jicā yóho. Te suni súcuan maá ró, ma cúu sáha ró jniñu váha te núu tu cúndúú ró jíin rí.

<sup>5</sup>Maá rí cúu yoyúcu un, te maá ró cácuu ndaha rí. Ñayuu jeē nduú jíin rí, te ruhū ndúú rí jíin i, maá i cúu nájnūhun ndaha jeē jēhe cuehē ndehē. Chi núu tú cundúú ró jíin rí, te tú cuíti na jniñu váha cuu sáha ró. <sup>6</sup>Ñayuu jeē tu cúndúú jíin rí, quende yā i nájnūhun ñi ndaha uva, te ichi. Te ndoho i nájnūhun ndaha uva un jēē ndutútú te cayū nuū ñuhún.

<sup>7</sup>Núu ndúú ró jíin rí, te cáñuhun ni rō jñūhun cáhān rī, yūcuán na te cacān rō na-ni vé cácuu rō, te sáha ri jeē cácahān rō. <sup>8</sup>Te núu cásáha ró cuéhē jniñu váha, súcuan cástéén rō jeē cúu ndije ró ñáyuu cascuáha jíin rí, te súcuan nácuni ñayuu jeē yóhyo cújéhu Tátá rī. <sup>9</sup>Nájnūhun manī Tátá rī jíin rí, suni súcuan manī rī jíin ró jijnáhan ró. Núu súcuan te ma siaá rō jñūhun manī rī jíin ró. <sup>10</sup>Núu squícu ró jniñu ní ndacu ri nuū rō, te níni coo manī rī jíin ró, nájnūhun maá rí squícu ri jniñu ní ndacu Tátá rī nuū rī, te níni íyó mání yā jíin rí.

<sup>11</sup>Súcuan ni cahān rī jíin ró návāha coo sī ni rō nájnūhun íyó sī ni rī, chi nde cusī teyí ni rō. <sup>12</sup>Te yāha cúu jniñu ndácu ri nuū rō jijnáhan ró: jeē na cúndáhú ni rō jnáhan ró nájnūhun cúndáhú ni rī rohó. <sup>13</sup>Núu ñi tēe cuu de jehē amigo de, te tuá na vé cúmani gā sáha de jeē cundáhú ni de amigo de. <sup>14</sup>Te maá ró cácuu amigo rī núu squícu ró jniñu ndácu ri nuū rō. <sup>15</sup>Ma cahān gā rī mozo jíin ró, chi ñi mozo tu cástūhún patrón nuū i ndese jéni ni de sáha de. Chi sa suhva amigo cahān rī jíin ró, chi je ni castūhun rí nuū rō tāca jñūhun ni cahān Tátá rī jíin rí. <sup>16</sup>Maá rí ni nacāji rōhó jēē jnáma ri rohó, te nasūu maá ró ni cá-nacani ni xīhna gā jeē cóndiquin rō ruhū. Te ni jeni ri rohó jēē caca ndaā rō te scándije ró cuéhē ñayuu jeē cuu i sēhe ri

ní cáni. Te súcuan te ndīhi jeē cacán rō nuū Tátá rī siquí jeē cácaandije ró rúhū, sáha ya jeē jicán rō. <sup>17</sup>Te yāha cúu jniñu ndácu ri nuū rō: jeē na cúndáhú ni rō jnáhan ró.

### Jeē cáquitī ni ñayuu ñayīvi núu Jesús jíin núu ñáyuu cácaandije

<sup>18</sup>Te núu cáquitī ni ñayuu ñayīvi núu rō jijnáhan ró, te je cájini rō jeē xīhna gā nuū maá rí ni caquitī ni i. <sup>19</sup>Te núu jeē iyó gā rō jíin modo ñayuu ñayīvi, te coo manī ñayuu ñayīvi jíin ró nuú, nájnūhun manī i jíin jnáhan i. Te ni nacāji ri rohó jēē tuá coo ró jíin modo ñayuu ñayīvi. Te jeē yúcuan cáquitī ni i nuū rō, chi tuá cácuu ró cuenta ñayīvi. <sup>20</sup>Nucūhun ni rō jñūhun ni cahān rī jíin ró: Núu tu íyó yíñúhún ñáyuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i rōhó jēē cácuu ró mozo rī. Te núu jeē ni cájetáhú i jñūhun ni steén rī, te suni cuatáhú i jñūhun cástéén rō. <sup>21</sup>Te tācá jniñu yāha sáha i jíin ró jeē siquí ruhū, chi tu cájini i Yaā ní tají rúhū vēji ri.

<sup>22</sup>Núu jeē tu ní quíji ri nacani ri jñūhun nuū i, te ma cóo cuēchi i núu. Te vijna chi ma cúu ga cahān i jeē tu jíin i jeē iyó cuēchi i. <sup>23</sup>Ñayuu jeē cáquitī ni nuū rī, suni nuū Tátá rī cáquitī ni i. <sup>24</sup>Núu jeē tu ní sáha ri jniñu jéhu nuū i jeē ní ñi tēe tu ní sáha de súcuan, te ma cóo cuēchi i núu. Te vijna je ni cajito i jniñu ún, te vēsú súcuan te cáquitī ni i nuū rī jíin núu Tátá rī. <sup>25</sup>Te súcuan cásáha i návāha squícu jñūhun yósó núu tútu ley Yaā Dios jeē cánevāha i: Ni caquitī ni i nuū rī, vēsú tú na cuēchi ri, achí.

<sup>26</sup>Te tají rí maá Yaā chindéē ñáhán rōhó te sáha ya jeē cóo sī ni rō. Te Yaā un cúu maá Espíritu jeē steén jñūhun ndaā, te quíji ya nde nuū Tátá rī, te nacani cáji yá jñūhun ri. <sup>27</sup>Te suni maá ró nacani ró jñūhun ri, chi je cáhiin

ro jíin rí nde ná ni quejéé rí nácani ri jnūhun.

**16** <sup>1</sup>Tāca jnūhun yáha ní cahān rī jíin ró nāvāha ma náyūhu ró jeē quíji jnūndóho. <sup>2</sup>Chi quenehen i róhó jéé ma cuáha ga i jnūhun cone ró táca vehe i sinagoga. Te quee quivī jeē cahni i róhó, te cani ni i jeē iin jniñu váha ni sáha i nuū Yaā Dios. <sup>3</sup>Te súcuan sáha i jíin ró, chi tu cájini cuítī i máá Tátá rī ni máá rí. <sup>4</sup>Te ní cahān rī jnūhun yáha jíin ró nāvāha núu je ni quee quivī jeē súcuan coo, te nucūhun ni rō jeē jé ni cahān rī jíin ró.

### Jniñu sáha Espíritu Santo

<sup>1</sup>Te tu ní cáhān rī jnūhun yáha jíin ró nde xihna nūhún, chi íne máá rí jíin ró jijnáhan ró. <sup>5</sup>Te vijna chi nuhūn rī condee rī jíin Yaā ní tají rúhū vēji ri. Te ni iin ró tu cájnūhun ró ndé nuū quihín rī. <sup>6</sup>Chi máá jéé cácuuífhyá ndasí ni rō jeē ni cáhān rī súcuan jíin ró. <sup>7</sup>Jendaá cahán rī jíin ró: Jeē váha máá ró jijnáhan ró cúu jeē quihín rī. Chi núu tú quihín rī, te ma quíji Yaā chindéé nāhán róhó te sáha ya jeē cóo sī ni rō. Te núu cuahān rī, te tají rí yā quíji ya nuū rō. <sup>8</sup>Te jeē quéé yā, te stéén yā nuū ñayuu ñayivī jéé iyó cuéchi i, jíin ndese quivīcoo i ichi ndaā, jíin jéé sándaā Yaā Dios siquī cuéchi i. <sup>9</sup>Stéén yā jeē iyó cuéchi i, chi tu cácandíje i ruhū. <sup>10</sup>Te stéén yā siquī ichi ndaā, chi máá rí nuhūn rī nuū Tátá rī, te ma cóto ga rō nuū rī. <sup>11</sup>Te stéén yā siquī jeē sándaā Yaā Dios cuéchi ñayuu, chi je ni cundaā jeē jnahnú ndetū máá jéxeén jeē cujéhu ini ñayivī yáha.

<sup>12</sup>Te iyó cuéhē gā jnūhun cúní rī cahān rī jíin ró, te ma cúu jecūhun ni rō vijna. <sup>13</sup>Te jeē quéé máá Espíritu jeē steén jnūhun ndaā, te máá yá steén tāca jnūhun ndaā un núu rō. Chi ma cahán yā jeē máá yá, chi cahān yā tāca jéé jíini sōho ya cahán Yaā Dios. Te stéén yā siquī tāca jniñu jeē coo. <sup>14</sup>Te stéén yā

jeē cujéhu ri, chi nacastūhun yá nuū rō tāca jnūhun jeē jé ni cahān rī, te sáha ya jeē jécūhun ni rō. <sup>15</sup>Ndihī ndese cújéhu Tátá rī, suni súcuan cújéhu máá rí. Jeē yúcuan ní cahān rī jeē Espíritu Santo nacastūhun yá nuū rō tāca jnūhun jeē jé ni cahān rī, te sáha ya jeē jécūhun ni rō jijnáhan ró.

### Vēsú cácuuífhyá ni rō, te ndusiī ni rō

<sup>16</sup>Jecu na te ma cóto ga rō nuū rī. Te jecu tucu quivī te coto tucu ró núu rī, chi quinhun rī nuū ndeé Tátá rī. Achí yá.

<sup>17</sup>Yūcuán na te sava tēe cácuáha jíin yá, ni cacajnūhun jnāhan de:

¿Na jnūhun cúu jeē yáha jeē cahán yā jíin yó? Chi áchí yá jeē jecu na te ma cóto ga yō nuū yā, te jecu tucu quivī te coto tucu yó núu yā, chi siquī jeē quinhun yā nuū ndeé Tátá yā. <sup>18</sup>¿Na jnūhun cúu jeē yáha jeē cahán yā, jecu na? Tu cá-jecūhun ni yō na vé cúu jeē cahán yā. Achí de.

<sup>19</sup>Te ni jini Jesús jeē cácuni de cacjnūhún de ya. Te ni cahān yā jíin de:

¿A cacajnūhun jnāhan ró na vé cúu jeē ni cáhān rī jíin ró jeē jecu na te ma cóto ga rō nuū rī, te jecu tucu quivī te coto tucu ró núu rī? <sup>20</sup>Jendaá cahán rī jíin ró jeē ndahyū rō jijnáhan ró te cucuífhyá ni rō, te ñayuu ñayivī chi sa cusī ni i. Te vēsú cucuífhyá ni rō, te sa ndusiī ni rō jeē cóto tucu ró núu rī. <sup>21</sup>Ín ñahan núu cuacuyajni scácu ña, te jéhnde chíji ña, chi je ni quee hora jeē scácu ña. Te núu je ni scácu ña sūchi lúlí, te tuá nahán ña jeē ní ndoho ña, chi cúsi ni ña jeē ní cacu sēhe ña. <sup>22</sup>Te suni súcuan cúu jeē cándoho ró vijna, chi cácuuífhyá ni rō jíin rí. Te jecu-ni quivī te coto jnāhan tucu yó, te cusī ndasí ni rō. Te ni iin ma cúu casi jeē cúsi ni rō.

<sup>23</sup>Te quivī ún chi tú na vé cacān gā rō nuū rī. Chi jendaá cahán rī jíin ró jeē nuū máá Tátá rī cacān rō, te sáha ya ndihī jeē cájicān rō, siquī jeē cácandíje ró rúhū.

<sup>24</sup>Nde vijna te ná tu cacān rō nuū Tatá rī jeē jíin síhví rí. Te vijna te na quéjéé rō cacān rō jíin síhví rí, te nihin rō, návāha cusih ndasí ni rō.

**Je ni quende yā poder ndihi  
jeneé cáhiyo ini ñayiví**

<sup>25</sup>Tāca jnúhun yáha ní cahān yatá rí jíin rō. Te quee quiví jeē ma cahān yatá gá rí jíin rō, chi sa suhva castūhun cájī rí nuū rō siquī Tatá rī. <sup>26</sup>Te quiví ún chi cacān rō nuū Tatá rī siquī jeē cácanďje rō rúhū. Te tu cáhān rí jíin rō jeē cacān tahú rí jehē rō nuū Tatá rī. <sup>27</sup>Chi máá Tatá rí je cúndáhú ni yā rohó siquī jeē cáhiyo maní rō jíin rí, te ni cacandíje rō jeē ndé nuū máá yá vēji rí. <sup>28</sup>Ni quenda rí nde nuū Tatá rí, te ni quee rí ini ñayiví. Te vijna te quenda rí ini ñayiví, te nuhūn tucu rí nuū Tatá rí. Achí yá.

<sup>29</sup>Te ni cacahān tēe cáscuáha jíin yá:

Vijna te cáhān cájī ní, te tuá cahān yatá ní. <sup>30</sup>Vijna te cájini na jéē jiní ni ndivii cuiti, te tuá jini nūhún jéē cájnūhún ni iin ná nihín. Jeē yúcuan cá-candíje ná jéē vēji ní ndé nuū Yaā Dios. Achí de.

<sup>31</sup>Te ni cahān Jesús jíin de:

¿A ndé vijna te cácanďje rō naún?

<sup>32</sup>Te quiji quiví, te je ni quee, jeē cuité núu rō quínungoo rō ná vehe ná vehe rō, te stóo máñúhún rō ruhū. Te nasūu jéē quéndōo máñúhún rí, chi Tatá rí íne ya jíin rí. <sup>33</sup>Tāca jnúhun yáha ní cahān rí jíin rō návāha coo ndeyí coo sīh ni rō siquī jeē cácanďje rō rúhū. Ini ñayiví chi cánuú coto rō jnúndóho. Te vēsú súcuan te na cóo sīh ni rō, chi je ni quende rí poder tāca jeneé cáhiyo ini ñayiví. Achí yá.

**Jeē ni jícān tahú Jesús  
jehē ñayuu cácanďje**

**17** Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátā, je ni quee quiví jeē ndóho ná. Vijna te steén ni jéē cújéhu máá ná jeē cúu ná Séhe ní, návāha suni máá ná steén na jéē cújéhu máá ní. <sup>2</sup>Chi ni sáha ní jéē ndiso jniñu ná síquī tāca ñayuu, návāha tāca ñayuu jeē ni jéhe ní núu ná, cotecu i níf cáni sáha ná. <sup>3</sup>Te suhva cúu jnúhun cotecu i níf cáni: suu jeē na cúni i nihín jéē mañúhún-ni ní cúu Yaā ndaā, jíin jéē cúni i sāñá jeē cúu ná Jesucristo, Yaā ní tají ní.

<sup>4</sup>Je ni steén na núu ñayuu ñayiví jéē cújéhu ní, te je sínu ná jniñu ní ndacu ní núu ná. <sup>5</sup>Te vijna, Tátā, sáha ní jéē ndu-jéhu tucu ná ndé nuū néne ní, nájnūhun cújéhu ná jíin ní nde ná tu jecōo ñayiví.

<sup>6</sup>Ñayuu jeē ní nacāji ní ini ñayiví, ni jéhe ní i nuū ná, te ni steén na núu i ndese Yaā cúu ní. Cuenta máá ní cúu i, te ni jéhe ní i nuū ná. Te ni cajetáhú i jnúhun ní, te ni casquícu i. <sup>7</sup>Te vijna te cájini i jeē ndé nuū máá ní vēji tāca jéē iyó jíin ná. <sup>8</sup>Chi tāca jnúhun ni cahān ni jíin ná, ní castūhun ná núu i, te ni cajetáhú i. Te ni cajini i jeē ní quenda ndije ná ndé nuū máá ní, te ni cacandíje i jeē máá ní ni tají sáña.

<sup>9</sup>Te jícān tahú na jéhē máá i jíjnāhan i. Tu jícān tahú na jéhē ñayuu ñayiví jéē tu cácanďje, chi sa jehē máá ñayuu ni jéhe ni núu ná, chi cuenta máá ní cácuu i. <sup>10</sup>Te tācá i jeē yíhi i ndaha máá ná, suni cuenta máá ní cúu. Te tācá i jeē cúu i cuenta máá ní, suni cuenta máá ná cúu i. Te cástéén i ndese cújéhu ná.

<sup>11</sup>Te tuá condee ná ini ñayiví. Te máá i chi quéndōo i ini ñayiví, te máá ná chi najeē ná condee na jíin ní. Yaā ii Yaā ndoo cúu ní, Tátā. Te jíin poder ní condito ní tāca ñayuu ni jéhe ni núu ná, návāha inuú na cóo ni i jíjnāhan i, nájnūhun cúu máá yó. <sup>12</sup>Te jeē ní condee na jíin i ini ñayiví, te jíin poder ni ní condito ná i. Tāca ñayuu ni jéhe ni núu ná, ni condito yúcun ná i. Te tu ní jéhe na jnúhun naa i jíjnāhan i, chi máá

ñin-ni tēe jeē je cúu de tēe jnahnū ndetū, návāha squícu jnūhun yósó núū tútu ii.

<sup>13</sup>Te vijna te najeē na núū ní, te cáhán na táca jnūhun yáha jíin i níni jēē íne ga ná ini ñayíví, návāha na cóo sīñ ndasí ni i nájñūhun cúsiñ ni maá ná. <sup>14</sup>Ni castūhun ná jnūhun ní núū i. Te ni caquítī ni ñayuu ñayívi núū i, chí tuá cácuu i cuenta ñayívi, nájñūhun maá ná tu cúu ná cuenta ñayívi. <sup>15</sup>Te tu jícan tahú na jēē quénehen ní i ini ñayívi, chí sa suhva jeē cóndito ní i nuū jexeén. <sup>16</sup>Nasūu cuenta ñayívi cácuu i, nájñūhun maá ná jēē násūu cuenta ñayívi cúu ná. <sup>17</sup>Jíin jnūhun ndaā ní te sáha ní jēē coo ndoo coo ii i nuū ní. Tāca jnūhun cáhán maá ní cúu jnūhun ndaā. <sup>18</sup>Te nájñūhun ni tají ní sãña ní quiji ná ini ñayívi, suni súcuan tají ná i nacani i jnūhun ní núū ñayuu ñayívi. <sup>19</sup>Te jehē maá i cúu jeē jēhe ná maá ná cuu ná, návāha suni maá i coo ndoo coo ii i nuū ni jēē jíin jnūhun ndaā.

<sup>20</sup>Te nasūu maá ñin-ni jehē ñayuu yáha jícan tahú na, chí suni jehē táca gá ñayuu jeē candíje i sãña núu na cúni sōho i jnūhun jeē nácani maá i jíin náhan i. <sup>21</sup>Te jícan tahú na jēē inuú na cóo ni i jíin náhan i. Nájñūhun ñin-ni cúu ní jíin ná, Tátā, te ñin-ni cúu ná jíin maá ní, suni súcuan na cóo inuú i jíin yó. Te cúni na jēē inuú na cóo ni i, návāha na cándíje ñayuu ñayívi jēē maá ní ni tají ní sãña. <sup>22</sup>Ni sajhēnu ná i nájñūhun ni sajhēnu ní sãña, návāha inuú na cóo ni i, nájñūhun inuú-ni cúu yó. <sup>23</sup>Te ndúú ná jíin i, te ndúú ní jíin ná, te súcuan te inuú cuítī coo ni i jíin náhan i. Yūcuán na te cuni ñayuu ñayívi jēē maá ní ni tají ní sãña, jíin jēē maní ndasí ní jíin i nájñūhun maní ni jíin ná.

<sup>24</sup>Tátā, maá ní ni jēhe ní i nuū ná. Te cúni na jēē cóyúcú i jíin ná nuū cóndee ná, návāha coto i ndese luu cújēhnu ná ni sáha ní. Chí íyó maní ndasí ní jíin ná nde ná tu jecōo ñayívi te nde vijna.

<sup>25</sup>Yaā ndaā cúu ní, Tátā, te ñayuu ñayívi tu jíin i níhín, te maá ná chí jíin na níhín. Te ñayuu yáha chí cájini i jeē maá ní ni tají sãña. <sup>26</sup>Ni steén na núū i jíin náhan i ndese Yaā cúu ní. Te steén gā na súcuan nuū i, návāha na cóo maní ndasí i jíin náhan i, nájñūhun íyó maní ndasí ní jíin ná, te návāha condee ná ini anuá i. Achí yá.

### Jeē ní cajni de Jesús

(Mt. 26.47-56;

Mr. 14.43-50; Lc. 22.47-53)

**18** Te nuū ní cuu ni cahān Jesús táca jnūhun yáha, te ni quenda ya jíin tēe cáscuáha jíin yá, cuahān yā inga lado yuu Cedrón. Te yūcuan íyó ñin huerto nuū ní quívi ya jíin tēe cáscuáha jíin yá. <sup>2</sup>Te Judas, tēe jeē nastúu de ya, suni jíin de lugar un, chí cuehē jínu ni nat-aca Jesús yūcuan jíin tēe cáscuáha jíin yá. <sup>3</sup>Te ni jinū de yūcuan jíin ñin grupo soldado jíin jecu policía cándito templo, jeē ní catajé sutū cácujeñnu jíin tēe grupo fariseo. Te cándiso de machete, te cájni de linterna jíin yiti. <sup>4</sup>Te Jesús je jíin yā táca jnúndóho jeē véji siquí yā. Te ni quenda ya ichi núu de, te ni cahān yā:

¿Ndé ñin cámanducú ró?

<sup>5</sup>Te ni cacahān de jíin yá:

Jesús tēe ñuu Nazaret cámanducú rí.

Te ni cahān yā:

Maá rí cúu.

Te Judas, tēe jeē nastúu de ya, suni íne de jíin tēe ún. <sup>6</sup>Te jeē súcuan ni cahān yā, maá rí cúu, te ni cajica yátá de, te ni cacotúu-ni de. <sup>7</sup>Yūcuán na te ni cajñūhún tucu ya de:

¿Ndé ñin cámanducú ró?

Te ni cacahān de:

Jesús tēe ñuu Nazaret.

<sup>8</sup>Te ni cahān Jesús:

Je ni cachi rí jeē maá rí cúu. Te núu ruhū cámanducú ró, te maá-ni rí jniñ rí, te tēe yáha na quíngoo de. Achí yá.

<sup>9</sup>Súcuan ni cuu návāha na squícu jnūhun jeē ni cāhān yā jíin Tátá yā: Tu ní jéhe na jnūhun naa ni iin tēe jeē ni jéhe ni núu na, achí yá. <sup>10</sup>Te Simón Pedro ndíso de iin espada. Te ni tava de, te ni jehnde de sōho lado váha iin tēe nání Malco. Te tēe un cúu de mozo maá sūtū cujéhnu. <sup>11</sup>Te ni cahān Jesús jíin Pedro:

Nachuvāha espada rō ini cubierta. ¿A tu cánuú jéē ndóho ri jnūndóho yáha jeē ni sándaā Tátá rī jeē ndóho ri? Achí yá.

**Jeē ní indichi Jesús nuū sutū cujéhnu**  
(Mt. 26.57-58; Mr. 14.53-54; Lc. 22.54)

<sup>12</sup>Yūcuán na te tēcá soldado un, jíin capitán de, jíin táca policía tēe hebreo un, ni cajnií de Jesús, te ni cajihni de ya. <sup>13</sup>Te xihna gā vehe Anás cuangoo de jíin yá. Te tátá chíso Caifás cúu Anás. Te Caifás cúu maá sūtū cujéhnu ga cuiyā ún. <sup>14</sup>Te suu de ni cachi nuū jnāhan de hebreo jeē cánuú jéē cúu iin tēe jehē nación de.

**Jeē ní cachi Pedro jeē tu jíní de ya**

(Mt. 26.69-70;

Mr. 14.66-68; Lc. 22.55-57)

<sup>15</sup>Te Simón Pedro jíin inga tēe scuáha, cándiquin de Jesús cuangoo de yatā yā. Te inga tēe scuáha ún chí jíní jnāhan de jíin sūtū cujéhnu. Jeē yúcuan ní quívi de jíin Jesús ini patio vehe sutū cujéhnu ún. <sup>16</sup>Te Pedro ni quendōo de yatā yehyí. Te maá tēe scuáha jéē jíní jnāhan jíin sūtū cujéhnu ún, ni quenda de ni cahān de jíin ñahan ndíto yéhyí, te ni squívi de Pedro ini patio. <sup>17</sup>Yūcuán na te ñahan ndíto yéhyí un ní cajnūhún ña Pedro:

¿A násūú iin tēe scuáha jíin tēe índichi nuū sutū un cúu ró?

Te ni cahān de:

Nasūu cúu ri, achí de.

<sup>18</sup>Te tāca mozo jíin policía un ní cascáyú de ñuhūn jíin tícāyí, chí mijin sáha. Te cáhiin de cánasaā de. Te suni índichi Pedro, násaā de jíin táca tēe ún.

**Jeē ni stíchí sutū cujéhnu ún Jesús**

(Mt. 26.59-66;

Mr. 14.55-64; Lc. 22.66-71)

<sup>19</sup>Te sutū cujéhnu un ní stíchí de Jesús ndé-ni cúu tēe cáscuáha jíin yá, jíin na jnūhun cúu jeē steén yā. <sup>20</sup>Te ni cahān Jesús:

Níní ní cahān rī nuū chitú ñayuu, ni cajini sōho ndihí ñayuu. Te níní ní steén rī jnūhun ini tēcá vehe i sinagoga jíin ini templo cáhnu nuū ndutútú ndívii jnāhan yó hebreo. Te tú ni iin jnūhun ní cāhán sāhi rí. <sup>21</sup>¿Te naun cájnūhun ró ruhū? Cajnūhun ñayuu ní cajini sōho jnūhun ni cahān rī, te maá i cachi ndese ni cahān rī. Chi cájini i ndese ni cahān rī.

<sup>22</sup>Te jeē ni cāhān Jesús súcuan, te iin policía ndíto templo jeē índichi de yūcuán, ní cani-ni de nuū yā. Te ni cahān de jíin yá:

¿A súcuan cāhán rō jíin sūtū cujéhnu naún?

<sup>23</sup>Te ni cahān Jesús:

Núu ni cahān rī iin jnūhun néé, cachi na jnūhun néé ní cahān rī. Te núu tu ní cāhán rī iin jnūhun néé, ¿te naun cáni ró ruhū? achí yá.

<sup>24</sup>Yūcuán na te Anás, sutū cujéhnu un, ní tají de ya, núhni yā cuahān yā nuū Caifás, tēe cúu maá sūtū cujéhnu ga.

**Jeē ní cachi tucu Pedro  
jeē tu jíní de ya**

(Mt. 26.71-75;

Mr. 14.69-72; Lc. 22.58-62)

<sup>25</sup>Te níní jéē súcuan cúu, te índichi-ni Pedro, násaā de yuñhún. Te ni cacahān jíin de:

¿A násūú iin tēe scuáha jíin tēe un cúu ró, chí naún?

Te maá de tu ní cachi de:

Nasūu cúu ri, achí de.

<sup>26</sup>Yūcuán na te iin mozo sutū cujéhnu, jnāhan tēe jeē ní jehnde Pedro sōho, ni cahān jíin de:



¿A násūu máá ró cúu jeē ní jito ri jíin de ini huerto?

<sup>27</sup> Te Pedro tu ní cáchi tucu de. Te ni cana-ni líhli.

### Jeē ní indichi Jesús nuū Pilato

(Mt. 27.1-2, 11-14;

Mr. 15.1-5; Lc. 23.1-5)

<sup>28</sup> Yūcuán na te ni quendacoo de jíin Jesús vehe Caifás, cuangoo de jíin yá nde palacio tēe nación Roma jeē cúu gobernador. Te je cuacundijin. Te ñayuu hebreo tu ní quívicoo i ini palacio, návāha tu stívi i ley i jeē cahán jeē ma quívi i ini vehe iin ñayuu jeē násūu hebreo cúu. Chi núu súcuan te ma cúu cuxíni i vico pas-cua jeē cóo inga quivī ún. <sup>29</sup> Yūcuán na te ni quenda Pilato, tēe cúu gobernador, ni cahān de jíin i jíjnāhan i:

¿Na cuēchi cájicān rō siquī tēe yáha?

<sup>30</sup> Te ni cacahān i:

Núu jeē násūu tēe cúnée cúu tēe yáha, te ma jñí ná de jeē quíndeca ná de nuū ni núu, áchí i.

<sup>31</sup> Te ni cahān Pilato:

Cuángoo jíjnāhan ró, te sándaā rō siquī de jíin ley cánevāha máá ró.

Te ni cacahān ñayuu hebreo un:

Máá ná jeē cácuu ná ñayuu hebreo, tú na permiso cánevāha ná jēe cáhni ná ni iin ñayuu.

<sup>32</sup> Súcuan ni cacahān i návāha squícu jnūhun jeē ní cachí Jesús jeē quívi ya ndaha tēe Roma te cahni de ya jicā cruz.

<sup>33</sup> Te ni ndívi Pilato ini palacio, te ni cana de jeē na quíji Jesús. Te ni cajnúhún de ya:

¿A máá ró cúu Rey ñayuu hebreo naún?

<sup>34</sup> Te ni cahān Jesús jíin de:

¿A cájnūhun ró ruhū jeē súcuan jéni ni máá ró, chí jēe ní cacastūhun ñayuu hebreo nuū rō?

<sup>35</sup> Te ni cahān Pilato:

¿Chí tēe hebreo cúu ri jeē cúni rī? Ñayuu nación máá ró jíin sūtū cácujuhnu

ni cachihi rōhó ndaha ri. ¿Na vé ni sáha ró núu súcuan? Achí de.

<sup>36</sup> Te ni cahān Jesús:

Nasūu jēe ndácu ri jniñu nájñūhun cándacu táca rey ñayívi yáha. Chi núu jeē ñayuu ñayívi ní casáha jeē cúu ri rey, yūcuán na te tēe cándiquín ruhū, cuajnáhan de návāha ma quívi ri ndaha jnāhan ri hebreo nuú. Te nasūu núu ñayívi yáha cúu jeē ndácu ri jniñu vijna. Achí yá.

<sup>37</sup> Yūcuán na te ni cahān Pilato jíin yá:

¿Te á iin rey cúu ró jēe súcuan?

Te ni cahān Jesús:

Rey cúu ri, nájñūhun cáhán rō. Ni quiji ri ni cacu ri ini ñayívi yáha návāha nacani ri jnūhun ndaā. Te ndíhi ñayuu cájetáhú jnūhun ndaā, cájini nahín i jnūhun cáhán rī. Achí yá.

<sup>38</sup> Te ni cahān Pilato:

¿Ndese cuni yō ndé iin cúu máá jnūhun ndaā?

### Jeē ní cundaā jeē cúu yā

(Mt. 27.15-31;

Mr. 15.6-20; Lc. 23.13-25)

Te jeē ni cahān de jnūhun yáha, te ni quenda tucu de nuū ñayuu hebreo. Te ni cahān de jíin i:

Tú cuítì na cuēchi níhín rī siquī de.

<sup>39</sup> Te íyó costumbre maá ró jíjnāhan ró jēe vico pascua te siaá rī iin tēe íne vecāa nuū rō. ¿Te á tu cácu ni rō jeē siaá rī Rey rō nuū rō? Achí de.

<sup>40</sup> Yūcuán na te ndívi i ni cacana jee tucu i:

Ma siaá ni tēe jíiná, chi Barrabás siaá ni, áchí i.

Te tēe cuíhná cúu Barrabás.

**19** Yūcuán na te ni cahān Pilato jeē na jñí soldado Jesús, te caní de ya jíin cuarta ñíi. <sup>2</sup> Te ni casáha de iin corona iñu, ni cachuhun de xiní yā. Te ni cachuhun de ya iin sahma cuehé ndíhí jēe cúu sahma rey. <sup>3</sup> Te ni jecondichi de nuū yā, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yā.

<sup>4</sup>Yūcuán na te ni quenda Pilato inga jínu, te ni cahān de jíin ñáyuu:

Yáhá condēhe ró tava rī de, návāha na cúni rō jeē tú na cuēchi níhín rī síquī de.

<sup>5</sup>Te ni quenda Jesús, ñúhun ya corona iñu jíin sahma cuehé ndíhí un. Te ni cahān Pilato jíin i:

Yáhá condēhe ró de jíjnáhan ró.

<sup>6</sup>Te nuū ní cajito sutū cácujeñnu jíin táca policia nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuan te najnií máá ró de te cahni rō de. Chi ruhū, tú na cuēchi níhín rī síquī de.

<sup>7</sup>Te ni cacahān ñayuu hebreo un:

Cáneváha ná iin ley, te jeē síquí ley un cánuú jéé cúu de, chi sáha de máá de jeē Séhe Yaā Dios cúu de.

<sup>8</sup>Te jeē ní jini sōho Pilato jnūhun yáha, te víhyá gā ni yūhú de. <sup>9</sup>Te ni ndivicoo tucu de ini palacio, te ni ca-jnūhún de Jesús:

¿Ndé nuū véji ró?

Te tu ní cáhán cuiti Jesús jíin de.

<sup>10</sup>Yūcuán na te ni cahān de jíin yá:

¿Naun tu cáhán rō jeē cahán rī? ¿A tu jíin rō jeē ndíso jníñu ri jeē cáhni rī rohó jicā cruz, te suni ndíso jníñu ri jeē siaá ri rohó qufhín rō?

<sup>11</sup>Te ni cahān Jesús:

Núu tu ní sáha Yaā Dios jeē ndíso jníñu rō, te tú na vé cúu sáha ró síquī rī. Jeē yúcuan tēe jeē ní nacuaaha ruhū ndaha ró, cuēchi xeēn gā condee síquī de vēsú maá ró. Achí yá.

<sup>12</sup>Yūcuán na te nde hora un ndúcu ndéyí Pilato ndese siaá de ya. Te ñayuu hebreo chi cácana jee i:

Núu siaá ni tēe jíñā, te tu cúu ní amigo rey Roma jeē cujéñnu ndácu jniñu núu súcuan. Chi táca tēe jeē sáha de rey maá

de, núu súcuan te cúu de enemigo síquī rey un. Achí i.

<sup>13</sup>Te jeē ní jini sōho Pilato jnūhun yáha, te ni ndacu de jniñu jeē na quenda Jesús ini vehe quiji ya. Te ni cucōo de silla nuū cúndaā jniñu, nuū máni máá yútu ni jecáva, te lugar un nání Gabata nuū yúhu hebreo. <sup>14</sup>Te cuacuu cahuxí uū, te jehíni quiví ún quejéé vico pascua. Te ni cahān Pilato jíin ñáyuu hebreo:

Yāha índichi maá rey rō.

<sup>15</sup>Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíin i:

¿A jéé cata caa ri rey rō jicā cruz naún?

Te sutū cácujeñnu un ní cacahān de:

Tuá na inga rey cánevāha ná jíjnáhan ná, chi máá-ni rey Roma jeē cujéñnu ndácu jniñu nuū ná.

<sup>16</sup>Yūcuán na te Pilato ni nacuaaha de ya nuū i jeē na cúu yā jicā cruz. Te ni cajnií i ya cuangoo i jíin yá.

### Jeē ní cacata caa de ya jicā cruz

(Mt. 27.32-44;

Mr. 15.21-32; Lc. 23.26-43)

<sup>17</sup>Te ni quenda Jesús, ndíso ya cruz yā, cuangoo de jíin yá iin lugar nuū naní Yiquí Xíní, te nuū yúhu hebreo naní Gól-gota. <sup>18</sup>Te yúcuan ní cacata caa de ya jicā cruz. Te suni ni cacata caa de uū tēe nuū uū gā cruz, iin iin de iin lado yā, te máá Jesús mēhñú. <sup>19</sup>Te suni ni ndacu Pilato jniñu jeē na cóndee jnūhun xiní cruz yā, jeē cahán: Tēe yáha cúu Jesús ñuu Nazaret, Rey ñayuu hebreo, achí. <sup>20</sup>Te cuehē ñayuu hebreo ni cacahu i jnūhun yáha, chi máá yajni yuñúu cúu nuū ní cacata caa de ya. Te jnūhun un yósó jíin yuhu hebreo jíin griego jíin latín. <sup>21</sup>Te táca sūtū cácujeñnu nuū ñáyuu hebreo, ni cacahān de jíin Pilato:

Ma tēe ní jéé cúu de Rey ñayuu hebreo, chi sa suhva tee ní jéé maá de ni cahān jeē cúu de Rey ñayuu hebreo.

<sup>22</sup>Te ni cahān Pilato:

Ma násama ri jeē jé ni ndacu ri jniñu ni jecondee.

<sup>23</sup>Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuñin parte, te iin iin parte ni cuu iin iin soldado un. Te suni ni caquihin de camisa yā. Te camisa un tu ní quícu, chi ni cunu náf. <sup>24</sup>Te ni cacahān maá de:

Ma cáhnde yō, chi vāha ga na sāha yó sorteo, te na cóndēhe yó ndé iin yó nñhin, achí de.

Te súcuan ni squícu jñuhun yósó núū títu iin nde jenahán jéé cahān Jesús: Ni caquihin de sahma ri cuu maá de. Te ni casáha de sorteo siquī camisa rī. Achí. Súcuan ni casáha soldado un.

<sup>25</sup>Te yajni cruz nuū ndíta caa Jesús íne náná yā, jíin cūhū ña María ñasihí Cleofas, jíin María ñuu Magdala. <sup>26</sup>Te ni jito Jesús nuū naná yā jíin núū téé scuáha jeē maní gā yā jíin, suni índichi de yūcuán. Te ni cahān yā jíin náná yā:

Nánā, nde vijna te maá de nucuñi de cuu de sēhe ní.

<sup>27</sup>Yūcuán na te ni cahān yā jíin téé scuáha ún:

Nde vijna te cuu ña nájñuhun náná rō, achí yá.

Te nde hora un ní cana de ña cuacondee ña vehe de condito de ña.

### Jeē ni jíhi Jesús

(Mt. 27.45-56;

Mr. 15.33-41; Lc. 23.44-49)

<sup>28</sup>Yūcuán na te ni jini Jesús jeē jé ni jinu tācá jniñu jeē cánuú ndoho ya. Te nāvāha squícu jñuhun cáhán tutu iin, te ni cahān yā:

Jíchí rī ndute, achí yá.

<sup>29</sup>Te yūcuán iin iin tñdohō ñuhun chítú vinagre iyá. Te ni cachundaji de iin cachí nuū vinagre un, te ni catee de xini iin ndaha yújnu hisopo, te ni catee de

yuhu ya jeē cóho ya. <sup>30</sup>Te ná ni jihí ya vinagre un, te ni cahān yā:

Je ni jinu, achí yá.

Te ni cāyí-ni xini yā, te ni jihí-ni ya.

### Jeē ní cují soldado lanza xiin ya

<sup>31</sup>Te inga quiví ún coo vico pascua. Te tēe hebreo tu cáconi de jeē cóndita caa ndiyi ún jicā cruz quiví ndétátú un. Chi quiví ndétátú jeē cúu vico pascua, iin ndasí gā vésú tāca gā quiví ndétátú. Te ni cacahān de jíin Pilato jeē na ndácu de jniñu jeē jñahnú sñhin tēe cándita caa, te na cújiyo de jicā cruz. <sup>32</sup>Te ni quecoo soldado, te ni cajehnú de sñhin iin tēe jeē ndíta caa jíin yá, te suni súcuan inga de. <sup>33</sup>Te nuū ní quecoo de nuū Jesús, te ni cajito de jeē jé ni jihí yā. Jeē yúcuan tu ní cájehnú de sñhin ya.

<sup>34</sup>Te iin soldado chi ni cují de lanza xiin ya, te ni cane-ni niñí jíin ndute.

<sup>35</sup>Te maá rí jeē téé tutu yáha, ni jito ri jeē súcuan ni cuu, te nácani ndaā rī jñuhun ndese ni cuu. Te jíin rī jeē iyó ndáa jñuhun cáhán rī, nāvāha suni candíje maá ró jijnáhan ró. <sup>36</sup>Chi súcuan ni cuu nāvāha squícu jñuhun cáhán tutu iin: Ma cahnú de ni iin yiqui ya, achí. <sup>37</sup>Te suni inga jñuhun cáhán tutu iin: ñn quiví te coto i nuū Yaā jeē ní cují i lanza, achí.

### Jeē ní quindūji Jesús

(Mt. 27.57-61;

Mr. 15.42-47; Lc. 23.50-56)

<sup>38</sup>Te ni cuu tāca jéé yáha. Te íyó iin tēe ñuu Arimatea jeē naní José, te cúu de tēe cándíje Jesús. Te yuhu-ni cándíje de, chi yúhú de jñáhan de hebreo. Te ni cahān ndahú de jíin Pilato jeē na cuáha jñuhun quihin de yiqui cúñu Jesús. Te ni jēhe Pilato jñuhun. Yūcuán na te cuahān José, ni snúu de yiqui cúñu Jesús. <sup>39</sup>Te suni ni jinū Nicodemo, tēe ni quiji nuū Jesús iin jecuáa. Te ndíso de nájñuhun ocō uxí kilo sūje uvuā jeē ní saca jñáhan jíin yúcū áloe. <sup>40</sup>Te ndindúú

de ni caquihin de yiqui cúñu Jesús, te ni cachusúcun de jíin tira sahma jeē ni quívi yucū jeē jeēn asīn ún, nájñuhun íyó costumbre maá ñáyuu hebreo jeē cáchindūji i ndīyi. <sup>41</sup>Te yajni nuū ni jíhi Jesús íyó iin huerto. Te nuū huerto un ndéé iin yaū jeē ní caan jeé jícā iin cava, nuū ná tu quindūji ndīyi. <sup>42</sup>Te yūcuan ní cachindūji de Jesús, chi íne yajni yaū ndīyi ún. Chi je yajni quejéé quívi ndétátú de jeē cácuu de ñayuu hebreo, te tú na ley chindūji de ndīyi núu je ni quejéé quívi ún.

### Jeē ní natecu Jesús

(Mt. 28.1-10; Mr. 16.1-8; Lc. 24.1-12)

**20** Te jenéhen quívi domingo ni jinū María ñuu Magdala nuū ní yindūji Jesús, te yínee gā cúu. Te ni jito ña jeē ní cujiyo yuū ndihyú yuyáú ndīyi. <sup>2</sup>Yūcuán na te jínu ña cuahān ña nuū Simón Pedro jíin núu inga tēe scuáha ún jeē maní gā Jesús jíin. Te ni cahān ña jíin de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

<sup>3</sup>Te ni quendacoo Pedro jíin inga tēe scuáha ún, cuácondēhé de yaū ndīyi. <sup>4</sup>Te cájino tayí ndindúú de. Te inga tēe scuáha ún, nihin ga ni jinu de vésú Pedro. Te xihna gā de ni jinū yaū ndīyi. <sup>5</sup>Te ni scáyí de máá de, te ni jito nihni de ini yaū. Te ni jito de jeē tira sahma un cáyūcu máá na. Te tu ní quívi de. <sup>6</sup>Te sáá te ni jinū Simón Pedro jeē ndiquín jnáhan de vēji de jíin inga tēe ún. Te ni quívi de nuū ní yindūji Jesús. Te suni ni jito de jeē tira sahma cáyūcu máá na. <sup>7</sup>Te ni jito de sahma jeē ni ñúsúcun xíní Jesús, tu cátu jíin tira sahma, chi ni natuu te cátu sñin. <sup>8</sup>Yūcuán na te suni ni quívi inga tēe scuáha jeē ni jínu xihna gā nuū ní yindūji ya. Te ni jito de ndese íyó, te ni candíje de jeē ní natecu yā. <sup>9</sup>Chi nde ná tu jinūcoco de yaū ndīyi, te tu ní

jécūhun ni de jñuhun cáhán tutu ií, jeē jíni ññuhun natecu yā núu je ni jíhi yā. <sup>10</sup>Yūcuán na te ndindúú tēe cáscuáha ún cuanungoo de vehe de.

### Jeē ní nane ya nuū

### María ñuu Magdala

(Mr. 16.9-11)

<sup>11</sup>Te María índichi ña ndáhyú ña nuū ní yindūji ya. Te níní ndáhyú ña, te ni scáyí ña máá ña, ni jito nihni ña ini yaū ún. <sup>12</sup>Te ni jito ña uū ndajéhé andiví, cáñuhun ya sahma cuijín. Te iin ya néne ichi xíní, te inga ya néne ichi núu jehé nuū ni cátu yiqui cúñu Jesús. <sup>13</sup>Te ni cacahān yā jíin ña:

¿Najehē ndahyú rō?

Te ni cahān ña:

Ni catava de Jitoho ná, te tu jíin na ndé nuū ní cachune de ya.

<sup>14</sup>Te jeē ni cáhān ña súcuan, te ni ndió cóto ña, te ni jito ña nuū Jesús jeē índichi yā yūcuán. Te tu ní nácuni ña jeē máá yá cúu. <sup>15</sup>Te ni cahān yā jíin ña:

¿Najehē ndahyú rō? ¿Ndé iin nánducú rō? achí yá.

Te máá ña jéni ni ña jeē tēe ndíto huerto cúu ya. Te ni cahān ña jíin yá:

Núu máá ní ni quenehen ní yá, te cachi ní ndé nuū ni jéchune ní yá, te na quínuquihin ná yá, achí ña.

<sup>16</sup>Te ni cahān Jesús jíin ña:

María, achí yá.

Te jeē ni cáhān yā súcuan, te ni nacuni ña ya, te ni ndió cóto ña, te ni cahān ña jíin yuhu hebreo:

Raboni, achí ña. Te jñuhun un cúní cahān, Maestro.

<sup>17</sup>Te ni cahān Jesús jíin ña:

Ma quehé ró rúhū, chi ná tu ndaa ri quinuhun rī nuū Tatá rī. Te cuáhán núu tēcá hermano rī, tēe ni cascuáha jíin rī, te cachi rō nuū de jeē ndaa ri quinuhun rī nuū Tatá rī, jeē suni Tátá máá ró jijnáhan ró cúu. Te cúu ya Yāā Dios máá rí jíin Yāā Dios máá ró jijnáhan ró. Achí yá.

<sup>18</sup>Yūcuán na te María ñuu Magdala un, cuáhān ña, te ni castūhūn ña nuū tée cáscuáha un jéē ní jito ña nuū maá Jítóho yō jíin jéē ni cáhān yā jnūhun yáha jíin ña.

**Jeē ní nane ya nuū  
tée cáscuáha jíin yá**

(Mt. 28.16-20;

Mr. 16.14-18; Lc. 24.36-49)

<sup>19</sup>Te jeē ní cuaa maá quíivī domingo un, te cáhiin tūtú tée cáscuáha ún ini iin vehe. Te cándihyū yehyí, chi cáyūhú de jnáhan de hebreo jeē coto xeēn i de. Te ni quee-ni Jesús, ni jecuiñī yā mēhñú de vēsū ndihyú yehyí, te ni cahān yā jíin de:

Ndeyí sñ coo ni rō jijnáhan ró, áchí yá.

<sup>20</sup>Te ná ni cahān yā súcuan, te ni steén yā ndaha ya jíin xiin ya nuū de. Te ni cacusiñi ni tēe cáscuáha un jéē ní cajito de nuū maá Jítóho yō. <sup>21</sup>Yūcuán na te ni cahān tucu Jesús:

Ndeyí sñ coo ni rō jijnáhan ró. Te nájñūhun ni tájī Tátá rī ruhū ini ñayiví, suni súcuan tájī rī rohó nacani ró jnūhun ri nuū ñáyuu. Achí yá.

<sup>22</sup>Yūcuán na te ni tivī tachī yā nuū de jíjnáhan de. Te ni cahān yā:

Vijna te ni canihin rō Espírītu Santo.

<sup>23</sup>Te tāca ñáyuu jeē cone cáhnu ni rō nuū cuéchi i, núu súcuan te coo jnūhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jnūhun cáhnu ni nuū cuéchi i. Achí yá.

**Jeē ní nane ya nuū Tomás**

<sup>24</sup>Te Tomás, tēe ni cacu cuátí, iin jnáhan jeē uxí uū tēe cáscuáha jíin yá, tu ní íne de quíivī jeē ní nane Jesús nuū tāca gá tēe cáscuáha. <sup>25</sup>Yūcuán na te sava ga tēe cáscuáha un, ní cacahān de jíin Tomás:

Ní cajito ri nuū maá Jítóho yō.

Te ni cahān Tomás:

Núu tú coto ri nuū ni túji ndaha ya ní sáha ndūyu cāa, te núu tú chune ri xini

ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuítī rī, achí de.

<sup>26</sup>Te nuū uná quíivī, te tēe cáscuáha un cáhiin tūtú tucu de ini iin vehe. Te íne Tomás jíin de. Yūcuán na te ni quee-ni tucu Jesús, ni jecuiñī yā mēhñú de, vēsū cándihyū yehyí. Te ni cahān yā jíin de:

Ndeyí sñ coo ni rō jijnáhan ró.

<sup>27</sup>Te ni cahān-ni ya jíin Tomás:

Chune xini ndáha ró ini ndaha ri yāhā te coto ró. Te scáá ndaha ró, te chune ró xiin ri nuū ni túji. Te ma cáni siquí gá ni rō, chi sa suhva na cándíje ró.

<sup>28</sup>Yūcuán na te ni cahān Tomás jíin yá:

Aí, Jítóho maá ná jíin Yaā Dios maá ná cúu ní, áchí de.

<sup>29</sup>Te ni cahān Jesús jíin de:

Tomás, nde ni jito ró núu rī, te ni candíje ró. Te yōhyo ndetū tāca ñáyuu jeē candíje ruhū vēsú tu ní jito i nuū rī, achí yá.

**Najehē ni tee Juan libro yáha**

<sup>30</sup>Te suni ní sáha Jesús cuehē gā jniñu jéhnu jeē ni stéén yā poder yā nuū tēe cáscuáha jíin yá, jeē tu yósó núu tūtú yáha. <sup>31</sup>Te tāca jniñu yáha ní tee ri návāha candíje ró jijnáhan ró jéē Jesús cúu Cristo, maá Séhe Yaā Dios. Chi jeē candíje ró yá, te cotecu rō níí cáni sáha ya.

**Jeē ní nane ya nuū uxá  
tēe cáscuáha jíin yá**

**21** Te ni cuu jecu quíivī, te inga jíinu ni nane Jesús nuū tēe cáscuáha jíin yá, jeē cáhiin de yumar Tiberias. Te suhva ni steén yā maá yá nuū de: <sup>2</sup>Cáhiin tūtú Simón Pedro, jíin Tomás, tēe ni cacu cuátí, jíin Natanael, tēe ñuu Caná ndañúú Galilea, jíin ndíndúú séhe Zebedeo, jíin úu gā tēe cáscuáha. <sup>3</sup>Te ni cahān Simón Pedro jíin de jíjnáhan de:

Quíjñi ri chācá.

Te ni cacahān de:

Suni quingoo ri jíin ró.

Te cuangoo de, te ni quívicoo de ñin barco. Te tu ní cánihin cuíti de tí jecuáa yúcuán. <sup>4</sup>Te jeē cuácundijin, te ñne Jesús yumar. Te tēe cáscuáha ún, tu ní cána-cuni de jeē maá yá cúu. <sup>5</sup>Yúcuán na te ni cahān yā jíin de:

Aá rō jijnáhan ró, ¿á ní canihin rō chācá caji yō?

Te ni cacahān de:

Tú cuíti, achí de.

<sup>6</sup>Yúcuán na te ni cahān yā jíin de:

Síngava ñunu ró ichi lado váha barco, te nihin rō tī.

Te ni casíngava de ñunu, te tuá ní cúu cuíti natava de, jeē ni quívicoo cuehē ndasí cháca. <sup>7</sup>Yúcuán na te tēe scuáha jeē maní gā Jesús jíin, ní cahān de jíin Pedro:

Maá Jítóho yō cúu, achí de.

Te jeē ní jini sōho Simón Pedro jeē maá Jítóho yō cúu, te ni nachuhun de sahma de, chi ni tava de jeē sájniñu de. Te ni ndava-ni de nuū mar cuahān de nuū yā. <sup>8</sup>Te tāca gá tēe cáscuáha ún, vendicoo de jíin barco yundúte, cástaa de ñunu ñúhun chitú cháca. Chi tu jícá cáhiin de jíin ñuhun íchi, chi nájnūhun ciento-ni metro cúu. <sup>9</sup>Te nuū ní quen-dacoo de ini barco, te ni cajito de jeē nduhvá tīcua ñuhūn, te ñne staā jíin ñin chācá chíhyó. <sup>10</sup>Te ni cahān Jesús jíin de:

Cuáquihin jecu chācá jēe sa ní cajnií ró, na táu yó, achí yá.

<sup>11</sup>Te ni quívi Simón Pedro ini barco, te ni staa de ñunu, ni quee de jíin ndé nuū ñúhun íchi. Te ñúhun chitú cháca náhnu, ñin ciento uū xico uxí uní tī cúu. Te vésú ñin súcuán tí ñúhun, te tu ní táh-ndé ñunu. <sup>12</sup>Te ni cahān Jesús jíin de:

Nehen jijnáhan ró na cási ni yō.

Te ni ñin tēe cáscuáha ún tu ní cúndeyí ni de cajnúhún de ya núu ndé ñin cúu ya. Chi je cájini de jeē maá Jítóho yō cúu ya. <sup>13</sup>Te ni quindēhe Jesús yuñúhún, te ni

quihin ya staā ún, te ni jēhe ya nuū de, te suni súcuán chācá un.

<sup>14</sup>Yáha cúu vuelta uní jeē ní nane Jesús nuū tēe cáscuáha jíin yá, ná ni natecu yā.

### Jeē ní ndajnúhún Jesús jíin Simón Pedro

<sup>15</sup>Te nuū ní cuu ni cajesi ni de, te Jesús ni cajnúhun yá Simón Pedro:

Simón sēhe Jonás, ¿á mání gā rō jíin rí vésú tāca gá tēe yáha?

Te ni cahān de:

Je jíiní ni jēe maní na jíin ní, achí de.

Te ni cahān yā jíin de:

Núu súcuán te stéén rō jnúhun ri nuū ñáyuu cácuu nájnūhun londe ri.

<sup>16</sup>Te ni cajnúhun yá de vuelta uū:

Simón sēhe Jonás, ¿á mání rō jíin rí?

Te ni cahān de jíin yá:

Je jíiní ni jēe maní na jíin ní, achí de.

Te ni cahān yā:

Condito ró ñáyuu cácuu nájnūhun lanchi ri núu súcuán.

<sup>17</sup>Te ni cajnúhún tucu ya de vuelta uní:

Simón sēhe Jonás, ¿á mání rō jíin rí?

Te ni cucufhyá ní Pedro jeē ní cajnúhun yá de vuelta uní núu maní de jíin yá. Te ni cahān de:

Maá ní jiní ni ndihi, te jíiní ni jēe maní na jíin ní.

Te ni cahān yā:

Núu súcuán te stéén rō jnúhun ri nuū ñáyuu cácuu nájnūhun lanchi ri. <sup>18</sup>Te jendaá cahán rí jíin ró jeē nde ná suchí ró, te ni quihin maá ró sahma ró, te ni jica ró ndé nuū cuní maá ró. Te núu na yí ró, te nasūu jēe cuní maá ró, chi ñnga ñáyuu quindēca i róhó nuū tu cuní rō quihin rō. Te scáá rō ndíndúú ndaha ró jēe cuu rō.

<sup>19</sup>Jnúhun yáha ní cahān yā jeē ní stéén yā jeē cóndita caa de jicā cruz cuu de, te jeē súcuán cuatáhú de cúu jeē

steén de jeē yóhyo cújéhnū Yaā Dios. Yūcuán na te ni cahān gā yā:

Condiquīn rō ruhū jeē sáha ró jniñu ní ndacu ri nuū rō, achí yá.

**Jnūhun tēe scuáha jeē maní gā yā jíin**

<sup>20</sup>Te ni ndió cóto Pedro, te ni jito de tēe scuáha jeē maní gā Jesús jíin, ndíquín de vēji de yatā. Tēe un cúu jeē ní conene xiin Jesús ná ni cacuxíni de jíin yá, te ni cajnūhún de ya: ¿Ndé iin de cúu jeē nastúu nínín? <sup>21</sup>Te jeē ní jito Pedro nuū tēe ún, te ni cajnūhún de Jesús:

Te tēe yáha, ¿ndese coo jíin de?

<sup>22</sup>Te ni cahān Jesús:

Núu cúní rī jeē cótecu de nde quivī ndíji ri, ¿te naun ndíhví ni rō? Máá ró

chí condiquīn rō ruhū jeē sáha ró jniñu ní ndacu ri nuū rō, achí yá.

<sup>23</sup>Yūcuán na te jnūhun yáha ní jité núu nuū tācá hermano, jeē tēe scuáha un má cúu de. Te tu ní cáhán Jesús jeē ma cúu de, chí sa suhva ni cahān yā: Núu cúní rī jeē cótecu de nde quivī ndíji ri, ¿te naun ndíhví ni rō?

<sup>24</sup>Te tēe scuáha un jēe maní gā Jesús jíin, suu cúu ruhū jeē nácani jnūhun tācá jniñu yáha, te suu ri tēe tāca jnūhun yáha. Te cájini rō jijnáhan ró jéē iyó ndáā jnūhun nácani ri.

<sup>25</sup>Te suni íyó cuéhē ndasí gá jniñu ní sáha Jesús. Te núu tee yó ná iin ná iin, te ma cánda nń náyiví cuhun tutu jeē cóso jnūhun ún, jéni ni rī. Te ni cuu. Amén.

## JNIÑU JEHNU JEE NI CASAHA TEE APOSTOL

### Jeē ni jéjnūhun ya quiji Espíritu Santo

**1** Amigo Teófilo, nuū tútu jeē ní tee ná xfhna gā ni castūhun ná nuū ni táca jniñu ní sáha Jesús, jíin táca jnúhun ni steén yā nde quiví ní quejéé yá ni sáha ya <sup>2</sup>te nde quiví ní ndaa ya cuanuhun yā andiví. Te nde ná tu ndaa ya quihin yā, te ni sáha Espíritu Santo jeē ní ndacu ya jniñu nuū táca apóstol, tēe ni nacāji ya. <sup>3</sup>Te nuū ni jínu ni ndoho ya jeē ní jíhi yā, te uū xico quiví te tijní jínu ni steén ndijin yā maá yá nuū tēe un jíjnáhan de, te súcuan ni cajini de jeē iyó ndáa jeē ní natecu yā. Te ni cahān yā jíin de siquī ndese ndácu Yaā Dios jniñu.

<sup>4</sup>Te ná cáhiin tútu de jíin yá, te ni cahān yā jíin ndihi de jeē ma quéndacoo de ini ñuu Jerusalén, chí áchí yá:

Condetu ró ndé quee Espíritu Santo jeē ni jéjnūhun maá Tátá rī Yaā Dios. Chí je ni cachi rī nuū rō jeē ni jéjnūhun ya quiji Espíritu Santo. <sup>5</sup>Chí Juan, jendaá jeē maá ndute-ni ni scuándute de ñayuu. Te rōhó jíjnáhan ró, jecu na quiví te nájnūhun cuandute ró jíin Espíritu Santo, cúu jeē condee yā ini anuá rō, achí yá.

### Jeē ní ndaa Jesús cuanuhun yā andiví

<sup>6</sup>Yūcuán na te tēe cáhiin tútu jíin yá, ni cacajnūhún de ya:

¿A vijna te nasáha ní jéē ñáyuu ñuu yō Israel ndujéhnu i ndacu i jniñu nuū nación yō chí naún? áchí de.

<sup>7</sup>Te ni cahān yā:

Ma cúu cuni rō quiví chí cuíyā jeē cóo jeē ni sándaā maá Tátá rī, chí maá ñin-ni maá yá jiní yā na quiví sáha ya. <sup>8</sup>Te jeē cúni rō cúu jeē quee Espíritu Santo te condee yā ini anuá rō jíjnáhan ró.

Yūcuán na te nihin rō poder te nacani ró jnúhun ri ní ini ñuu Jerusalén, ní Judea, ní Samaria, nde ní cáhnu ñayiví, áchí yá jíin de.

<sup>9</sup>Te ni ndihi ni cahān yā táca jnúhun yáha. Te níni cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahān yā, te tuá ni cájito de ya. <sup>10</sup>Te níni cáhiin de cájito ndaa de ichi ándiví núu ní ndaa ya cuahān yā, te uū jnáhan ndajéhé yā cáñūhun ya sahna cuijín ní cajecuiñi yā xiin de jíjnáhan de, te cájito ya nájnūhun tēe. <sup>11</sup>Te ni cacahān yā jíin de:

Róhó tēe Galilea, ¿najehe cájito ndaa ró ichi ándiví? Chí maá Yáa Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuahān yā andiví, áchí yá.

### Jeē ní canacāji de Matías jeē nucuiñi de nuū Judas

<sup>12</sup>Yūcuán na te ni nanungoo de yucu jeē naní Olivos, cuanungoo de ñuu Jerusalén. Te yajni-ni íne yucu un jíin ñuu Jerusalén, nájnūhun ñin kilómetro-ni, cūhva jeē ni jéhe ley permiso caca ñayuu quiví ndétátú. <sup>13</sup>Te ni ndivícoo de ini ñuu. Te ni ndacoo de cuarto xiní véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnáhan grupo cananista, jíin Judas ñani Jacobo. <sup>14</sup>Tāca tēe yáha, níni cándututú inuú de cájicān tahu de jíin táca ñani Jesús jíin náná yā María jíin sava ga ñahan.

<sup>15</sup>Te ñin quiví te ni jecondichi Pedro nuū táca hermano cácandíje. Te cáhiin nájnūhun ciento ocō ñayuu. Te ni cahān de:

<sup>16</sup>Hermano jíjnáhan ní, ni squícu nahín jnúhun cáhán tutu ñi jeē ni cahān David nde jenahán ní sáha Espíritu Santo. Te jnúhun un ní cuu siquī Judas jeē ní yosnúu núu tēe ni cajniñi Ji-



toho yō Jesús. <sup>17</sup>Te suu tēe un ní jica de jíin yó, te ni chindéé ñáhán jnáhan de jíin yó siquī jniñu ní jeni ya yohó. <sup>18</sup>Te ni cajeen iin ñuhun jíin xúhun ní nihin tēe un siquī jniñu neé ní sáha de. Te ni ñinga ndeyi de, te ni ndatā sáva chíji de, te ndihi yiti de ní jitē. <sup>19</sup>Te ni jitē jnūhun yáha núu táca ñáyuu cáyūcú ñuu Jerusalén, te jeē yúcuan cúu jeē ní casnání i ñuhun ún Acéldama nuū yúhu máá i, jeē cuní cahán ñuhun jeē cúu cuenta niñi. <sup>20</sup>Chi súcuan je yósó núu tútu Salmo siquī Judas:  
 Vehe de na quéndōo iyú,  
 te ma cóndee ni iin ga ñayuu ini vehe ún.  
 Te suni cáhán:  
 Jniñu ní condiso de na cóndiso inga tēe.  
 Achí.

<sup>21</sup>Núu súcuan te jini ñúhún jéé nucuiñi iin tēe lugar máá de jíin yó. Te tēe nucuiñi jíin yó un, nacāji yó de mēhñu táca tēe ni cajica jíin yó táca quiví jeē ní jica máá Jítoho yō Jesús jíin yó. <sup>22</sup>Te tēe nacāji yó un cúu tēe jeē ni íyo de jíin yó nde quiví ní jendute ya ni sáha Juan, te nde quiví ní ndaa ya cuanuhun yā andiví. Te tēe nucuiñi jíin yó na cúu de testigo jíin yó jeē jé ni natecu yā, achí de.

<sup>23</sup>Te ni catee nuū de uū jnáhan tēe: Matías jíin José jeē naní de Barsabás te suni nání de Justo. <sup>24</sup>Te ni cajicān tahú de:

Tátā Yaā Dios, máá ní chi jíní ni ndese cáa ánuá táca ñáyuu. Núu súcuan te jeē ndindúú tēe yáha, stéén ni ndé iin de cúu jeē ní nacāji ní. <sup>25</sup>Te condiso jniñu de cuu de apóstol. Te naquihin de jniñu ní stóo Judas, chi ni sáha de cuēchi te cuahán de lugar xeēn nuū cánuú quíhín de, achí de.

<sup>26</sup>Yūcuán na te ni casáha de iin sorteo te ni jinū Matías, te ni nucuiñi de ni nduu de jnáhan ndihúxí iin apóstol.

## Jeē ní quee Espíritu Santo

**2** Te máá quiví víco Pentecostés ni cahiin tútu ñáyuu cácandíje ñuu Jerusalén. <sup>2</sup>Te sanaa-ni te ni quejéé ñihin vēji nde andiví nájñuhun tachí ñihin quée, te táca ñáyuu jeē cáyūcú ini vehe un ní cajini sōho i jeē ñihin ún. <sup>3</sup>Te ni cajito i nájñuhun yáñuhun jeē ní cajitē núu te ni cacucōo xini ná iin ná iin i. <sup>4</sup>Te ndihi i, ni cunuú Espíritu Santo jíin i, te ni quejéé i cácahán i sáin sáin yuhu, ndese ni steén maá Espíritu nuū ná iin ná iin i cahán i.

<sup>5</sup>Te ñuu Jerusalén, suni cáhiin ñayuu hebreo, yiñúhún núu Yaā Dios, jeē ní quiijicoo i nde táca nación ní cáhnu ñayiví. <sup>6</sup>Te jeē ni ñihin súcuan te ni cacutútú cuéhē ñayuu ún. Te ni cunéé í ni i jíjnáhan i, chi ná iin ná iin i ni cajini sōho i jeē tēe ni canihín Espíritu Santo cácahán de jñuhun yuhu núu jicá nuū vēji i. <sup>7</sup>Te ni canaa ni i cajito i te ni cacahán i:

¿A násūu tēe Galilea cácuu táca tēe yáha jéé cácahán de táca yuhu núu nuū vējicoo yó? <sup>8</sup>¿Na vé ni cuu yáha núu súcuan? Chi ná iin ná iin yó cajini sōho yó cácahán de jñuhun yuhu núu nuū ní cacacu yó. <sup>9</sup>Chi vējicoo yó ndé táca ñuu jicá. Sava yó vēji nde Partia jíin Media jíin Elam. Te sava ga yō vēji yó ndé Mesopotamia jíin Judea jíin Capadocia jíin Ponto jíin Asia. <sup>10</sup>Suni nde Frigia jíin Panfilia jíin Egipto jíin tijni ñuu jeē íne nde yatā gā ñuu Cirene ñuhun Africa vējicoo yó. Te sava ga yō nde ñuu Roma vējicoo yó, te cáyūcu jínu-ni yó yáha. Te máá yó jeē vējicoo ñuu Roma, sava yó cácuu máá ñáyuu hebreo te sava ga yō cácuu ñayuu sáin ñuu, ni cacandíje yó ndíquin yō ley ñayuu hebreo. <sup>11</sup>Suni nde Creta jíin Arabia vējicoo sava yó. Te cajini sōho yó jéé jíin jnúhun yuhu núu ná iin ná iin máá yó cácahán de táca jniñu jéhnu ní sáha Yaā Dios, achí i.

<sup>12</sup>Te ndihi i chi ni canaa iĩ ni i cájini nahín i. Te ni candajñuhún i jíin jnáhan i:

¿Na vé cúu jeē ní cuu núu súcuan jeē cácahān de yuhu ñúu yō? achí i.

<sup>13</sup>Te sava i ni cacahān catá i:

Tuú chi jeē cánaĵini de, áchí i.

### Jeē ní nacani Pedro jnūhun nuū ñáyuu

<sup>14</sup>Yūcuán na te ni candocuñĩ Pedro jíin ndihúxí iin ga apóstol, te ni cahān jee Pedro jíin ñáyuu ún:

Nihín jnáhan ñuu yō hebreo, jíin ndihi nihín jéē cáyūcu ní Jerusalén, jnūhun yáha na chúhun ni ni jíjnáhan ní, chi cuni nahín ní cahān na jíin ní. <sup>15</sup>Chi máá ná jijnáhan ná, nasūu jéē cájini ná nájnūhun cájeni ni ní, chi sáá cahĩin jenéhen cúu, te nasūu hora cánaĵini ñáyuu cúu. <sup>16</sup>Chi sa suhva squícu jniñu yáha nájnūhun ni cahān Joel, tēe ni nacani jnūhun Yaā Dios nde jenahán, chi súcuan ni cahān de:

<sup>17</sup>Achí Yáā Dios: Quivĩ sándihí na

te tají rí Espíritu rí cunuú yá jíin táca ñáyuu,

te sēhe yíí ró jíin sēhe síhí ró, nacani i jnūhun ri,

te táca tēe lulí chi coto ndijin de jeē steén rí nuū de,

te táca tēe jéhnú chi sáha ri jeē scóto jēni de.

<sup>18</sup>Te quivĩ ún chi tají rí Espíritu rí cunuú yá jíin táca mozo rí, cúu tēe cúu ñahan,

te nacani i jnūhun ri.

<sup>19</sup>Te ichi ándiví sáha ri jniñu jéhnú jeē náā ni ñáyuu coto i,

te sáha ri jniñu jéhnú ini ñayiví jéē steén jeē cujéhnú ri,

chi coo ñiñĩ jíin ñúhūn jíin ñúhmā nájnūhun vicō.

Yúcuan cúu jeē sáha ri jeē cóo jnūndóho xeēn.

<sup>20</sup>Te nduu jnúú níandii te ma cúndijin gā,

te yoō coto cuéhé nájnūhun niñĩ.

Yūcuán na te quee quivĩ jeē ndíji máá Jítóho rō Jesús.

Quivĩ ún coo cuehē jniñu jéhnú, te cuni ndihi ñáyuu jeē quiví máá Jítóho rō cúu.

<sup>21</sup>Te táca ñáyuu jeē cahān ndahú i jíin yá te jnama ya i, áchí Yáā Dios.

Achí Joel ni nacani de jnūhun ya.

<sup>22</sup>Jeē yúcuan nihín tēe ñuu yō Israel, cuni nahín gá ni jnúhun yáha jíjnáhan ní. Ni steén Yaā Dios jeē ní tají yá máá Jesús, Yaā ní jéhnú ñuu Nazaret, chi máá Yáā Dios ni jēhe ya jeē ni sáha Jesús jniñu jéhnú mēhñu máá ní, jíin jniñu jeē steén jeē cujéhnú ya, te jniñu un ní canaa ni ni ní cajito ní. Te je cájini vāha ní jéē súcuan ni cuu. <sup>23</sup>Te máá ní ni cajniñĩ ní yá, te ni cajendēca ní yá nuū tēe xeēn ni cajehni de ya jicā cruz ni casáha ní. Te nde jíin tiempo je ni jini Yaā Dios jeē súcuan sáha ní jíjnáhan ní, chi súcuan je ni sándaā yā. <sup>24</sup>Te ni nastécu Yaā Dios Jesús te tuá ni cúu ya ndiyi, chi jnūhun xeēn jeē jihí ñáyuu, tuá na vé cúu ga sáha jíin yá. <sup>25</sup>Chi nde jenahán suhva ni tee David jnūhun ndese ni cahān Jesús jíin Yáā Dios:

Jíní na núu máá ní jeē cúu ní Jítóho ná, chi níí cáni ndéé ní jíin ná,

chi ndéé ní ichi ndávāha ná, cúu jeē chindéé ñahán ní sãña návāha coo ndeyí ni ná.

<sup>26</sup>Jeē yúcuan cúsiĩ ni ná te cáhan na jnūhun siĩ ni.

Jeē yúcuan ma nácani uhū ni na síquĩ jnūhun cuu ná.

<sup>27</sup>Chi ma cuáha ni jnūhun quendōo ánuá na lugar nuū cáyūcu ánuá ndiyi,

ni ma cuáha ni jnūhun tehyū ná, chi jéjníñu ná núu ní te manĩ ni jíin ná.

<sup>28</sup>Te ni steén ni núu na jéē nátecu ná, te sáha ní jéē cusĩĩ teyí ni ná condee na jíin ní niĩ cáni.

Achí Jesús, ni achí David.

<sup>29</sup> Tāca nǎhín jǎjnáhan ní, na cástūhun cájǎ ná nuū ni jnúhun jí yō David, chí tu ní cáhán de jnúhun yáha síquī maá de. Chí ni jihí de te ni quindūji de, te jíní yō nuū yíndūji de nde vijna. <sup>30</sup> Chí ni cuu de tēe ni nacani jnúhun Yaā Dios nde jehahán. Te ni jini de jeē váha ni jejnūhun ya nuū de jeē chíji yucūn maá de quiji Cristo, te condee yā mesa de ndacu ya jniñu nájnūhun ni ndacu de jniñu jeē ní cuu de rey. <sup>31</sup> Te nde jíin tiempo ni jini de jeē nátecu Cristo, te ni cahān de jeē anuá yā, ma ndóo lugar nuū cáyūcu ánuá ndīyí, ni yiqui cúnu yā ma tehyú. <sup>32</sup> Chí Yaā Dios ni nastēcu yā Jesús, te maá ná cácuu ná testigo jeē ní natecu yā. <sup>33</sup> Te ni ndujéhnu tucu ya ni sáha Yaā Dios jíin poder yā. Te nde nuū maá Yáa Dios, Yaā cúu Tátá yā, ni nihín Jesús Espiritu Santo, chí súcuan ni jejnūhun ya. Te ni tajǎ Jesús Espiritu Santo, te suu ya sáha jniñu jeē cájito ní te cájini sōho ní vijna. <sup>34</sup> Te David, nasūu síquī maá de ní cáhán de tāca jnúhun yáha, chí tu ní ndáa yiqui cúnu de andiví. Chí síquī Cristo cúu jeē ní cahān de suhva:

Maá Yáa Dios ni cahān yā jíin Jítóho ri Cristo:

Cucōo ró ichi ndáváha ri jeē steén jeē cujéhnu ró.

<sup>35</sup> Te na sáha ri jeē quende rō poder tāca jeē cájito uhū rohó, áchí yá.

Achí David.

<sup>36</sup> Nūu súcuan te ndihí ní jeē cácuu yō ñayuu Israel, na cúni vāha ní jeē vēsú ni cajehni ni yá jicā cruz, te Yaā Dios ni jeni ya maá Jesús jeē cúu ya Jítóho yō te suni cúu ya Cristo, Yaā jnáma yóhó, áchí Pedro jíin i.

<sup>37</sup> Te jeē súcuan ni cajini sōho i jnúhun yáha, te ni cajnahuhū ni anuá i. Te ni cacajnūhún i Pedro jíin tāca gá apóstol:

¿Te ndese sáha ná jǎjnáhan ná nūu súcuan? áchí i.

<sup>38</sup> Te ni cahān Pedro jíin i:

Nacani ni ní jeē stóo ni cuéchi ní jǎjnáhan ní, te cuandute ní jeē ní cacandíje ní Jesucristo, náváha cone cáhnu ni Yaā Dios nuū cuéchi ní, te cuáha Yaā Dios Espiritu Santo yā condee yā ini anuá ni. <sup>39</sup> Chí súcuan ni jejnūhun máa Tátá yō Yaā Dios nuū yō jíin nūu séhe yó, te suni súcuan ni jejnūhun ya nuū ñayuu tāca gá nación, tāca i jeē cána ya i candíje i.

<sup>40</sup> Te jíin cuéhē gā jnúhun súcuan ni cahān cajǎ Pedro, te ni stihví ni de i:

Nducú ndéyí ní jeē na cácu ní, chí jnahnu ndetū ñayuu casáha jniñu néé, áchí de.

<sup>41</sup> Yūcuán na te tācá i jeē ní cajetáhú jnúhun ni cahān de, ni cajendute i. Te quiví un ní nducuehē gā ñayuu cácan-díje, nájnūhun uní mil gā ñayuu. <sup>42</sup> Te ni cahiin nihín i síquī jnúhun cástéén apóstol. Te inuú-ni cándajnūhun mání i te cájicān tahu i, te in cáhnu-ni cáyeji i pan, nájnūhun ni steén maá Jítóho yō jeē núcūhun ni yō síquī yā.

### **Ndese ni coyūcu ñayuu jeē ní cacandíje jeē xíhna nūhún**

<sup>43</sup> Te ndihí ñayuu ni cayūhú i ni cajito i, chí cuehē jniñu jéhnu jeē steén jeē cujéhnu ya ni casáha tēe apóstol. <sup>44</sup> Te inuú ní cahíyo ni ñayuu cácan-díje, te ni cacuu inuú i tāca jeē cánevāha i. <sup>45</sup> Te ni caxícó i na-ni na vé cánevāha i, te ni casaja i xūhún un nūu tāca jnáhan i, nūu ndese jíni nūhún in in i. <sup>46</sup> Te ndijnahan quiví ni candutútú i ini templo. Te maní ni cayeji cáhnu i pan tācá vehe jnáhan i nájnūhun ni steén yā, te ni cahíyo sīi ni i. <sup>47</sup> Te ni cacahān i jeē yóhoyo cújéhnu Yaā Dios. Te ndihí ñayuu ñuu un ní cajejnūhún i ñayuu cácan-díje. Te ndijnahan quiví ni jnama Jítóho yō sava ga ñayuu, te ni nduu inuú i jíin ñayuu cácan-díje.

### Jeē ní nduvāha tēe ríngo

**3** Te iin quivī te máá cáhuni jehíni ni caa Pedro jíin Juan cuango de templo, chi hora un cájicān tahu jnāhan de hebreo. <sup>2</sup>Te cájendēca ñayuu iin tēe cáringo nde quivī ní cacu de. Te tēe un ndéē de ndijnahan quivī yehyí templo jeē naní Hermosa, jicān de caridad nuū tāca ñayuu quívicoo ini templo. <sup>3</sup>Te tēe un ní jito de nuū Pedro jíin Juan jeē véji de quívicoo de ini templo, te ni jicān de caridad nuū Pedro jíin Juan. <sup>4</sup>Te Pedro jíin Juan ni cajito vāha de nuū tēe ún. Te ni cahān Pedro jíin de:

Condēhe núu ri jijnáhan ri, achí de.

<sup>5</sup>Te máá tēe un ndétu tūhva de, ni jeni ni de jeē cuáha Pedro jíin Juan jecu xūhun núu de. <sup>6</sup>Te ni cahān Pedro:

Tú na xūhun plata ni xūhun oro cánevāha ri. Te íyó iin jeē vāha ga sáha ri jíin ró: jíin poder máá Jesucristo, Yaā ní jehnu ñuu Nazaret, cáhān rī jíin ró, ndocuiñī te caca ró, áchí de.

<sup>7</sup>Te ni jniī de ndavāha tēe ún, te ni ndonehen de. Te jehē de jíin súcūn jehé de ni nduvāha-ni. <sup>8</sup>Te iin ni scānda de máá de ni ndocuiñī de, te ni quejéē de jica de. Te ni quivī de jíin Pedro jíin Juan ini templo, jica de, cánda de, te nácutáthú de nuū Yaā Dios. <sup>9</sup>Te ni cajini tāca ñayuu jeē jica de te nácutáthú de nuū yā. <sup>10</sup>Te ni canacuni i de jeē máá de cúu tēe ni condee yehyí templo jeē naní Hermosa, ni jicān de caridad. Te ni canaa ni i ni cajito i, te ni cayūhú i cájito i jeē ní nduvāha tēe ún.

### Jeē ní nacani Pedro jnūhun ini corredor jeē naní Salomón

<sup>11</sup>Te tēe ni nduvāha ún, tu siaá de Pedro jíin Juan. Te ni cacutútú-ni cuehē ñayuu nuū de ini corredor jeē naní Salomón, te ni canaa ni i cájito i. <sup>12</sup>Te ni jito Pedro jeē ní cutútú ñayuu ún, te ni cahān de jíin i:

Níhín tēe ñuu yō Israel jijnáhan ní, ¿najahē cánaa ni ni cájito ní jniñu yáha? ¿Najahē cájito ní núu ná te cájeni ni ni jēe máá ná jijnáhan ná íyó poder na jēe sáha ná jēe nácaca tēe yáha? ¿Chí ní nduvāha de siquī jeē tēe cájica ndaā cácuu ná cájeni ni ní? <sup>13</sup>Tuú chi máá Yāā Dios jíi yō Abraham jíin Isaac jíin Jacob jíin táca gá jíi yō, ni sáha ya jniñu yáha návāha cuni ñayuu jeē cujéhu Sēhe ya Jesús, Yaā jeē ní cajendēca ní núu tēe cácujuhnu. Te ná ni cuni Pilato jeē siaá de ya, te tu ní cájēhe ni jnūhun. <sup>14</sup>Te ni casquéhichí ni yá vēsú cúu ya Yaā ndaā, Yaā iī. Te sa suhva iin tēe jéhni ndīyi ni cacahān ni jíin Pilato jeē na siaá de. <sup>15</sup>Te ni cacahān ni jēe na cúu Yaā jeē sáha jeē técu ndiñi-ni. Te Yaā Dios ni nastécu yā Jesús jeē ní cuu ya ndīyi, te máá ná cácuu testigo jeē ní natecu yā. <sup>16</sup>Te tēe yáha jēe cájito ní te cánacuni ní de, ni candíje de jíin ná jeē iyó poder Jesús nasávāha ya de, te jeē yúcuan ní nasávāha ya de. Te jeē súcuan ni cacandíje ná ní sáha ya, jeē yúcuan ní nduvāha vāha de nájnūhun cájito ndiñi ní.

<sup>17</sup>Te na cástūhun ná nuū ni jijnáhan ní, je jíní na jēe máá ní jijnáhan ní jíin tēe cácujuhnu nuū yō, tu ní cájecūhun ni ní, te jeē yúcuan ní cajehni ni yá. <sup>18</sup>Te súcuan ni squícu jnūhun ni cahān Yaā Dios nde jenahán jēe cánuú ndoho Cristo siquī cuéchi ñayuu, chi ni sáha ya jeē súcuan ni cacahān tēe ni canacani jnūhun ya nde jenahán. <sup>19</sup>Te na nácani ni ni jēe stóo ni cuéchi ní, te nasāma ini ní, te quívicoo ní ndaha Yaā Dios návāha ndahva yā cuéchi ní. Te quee quivī jeē ndúsī ni ni sáha máá Jítoho yō. <sup>20</sup>Te natají yá Jesús ndiji ya, chi cúu ya Cristo, Yaā ní jeni Yaā Dios jeē jnáma ya yohó. <sup>21</sup>Te jini nūhún jēe cóo ya andiví nde nasájeé yá tāca jēe iyó, nájnūhun ni cacahān tēe ndoo ni canacani jnūhun nde jenahán ní sáha Yaā Dios. <sup>22</sup>Chi suhva ni nacani jíi yō Moisés jnūhun nuū tāca

jíí yō: Máá Jítóho yō Yaā Dios cani ya Yaā nacani jñūhun nuū rō jijnáhan ró, nájñūhun ni jeni ya ruhū. Te cuu ya ñin jnáhan ñuu yō. Te na chūhun ni rō tāca jñūhun jeē nácani ya ún. <sup>23</sup>Te núu ndé téé tú chuhun ni de jñūhun cahān yā, jñahnū ndetū de, te ma cúu ga de jnáhan ñayuu yā Israel, áchí Moisés.

<sup>24</sup>Te tāca téé ni canacani jñūhun nde jenahán, nde tiempo ni quiji Samuel te níí gá nde vijna, suni ni canacani de jñūhun siquī tācá jñiñu cúu quivī yáha. <sup>25</sup>Yucūn maá téé ni canacani jñūhun ya nde jenahán cácuu yó, te suni siquī maá yó jijnáhan yó cúu jeē ni sáha Yaā Dios contrato jíin jíí yō. Chi ni cahān yā jíin Abraham: Yucūn maá ró cane Yaā sáha jeē quéndōo ndetū tāca ñáyuu níí cáhnu ñayīvi, áchí yá. <sup>26</sup>Te jeē ní nastécu Yaā Dios Sēhe ya, te ni quiji ya nuū maá yó xíhna gā, návāha quendōo ndetū yō sáha ya, chi sama ya anuá yō jeē ma sáha ga yō jñiñu neé, áchí Pedro.

### Jeē ní cajendēca de Pedro jíin Juan nuū téé cácujeñnu

**4** Te Pedro jíin Juan níiní cácahān gā de jíin ñáyuu ún te ni quecoo tāca sūtū jíin téé grupo saduceo, jíin téé cácujeñnu nuū téé cándito templo. <sup>2</sup>Te yōhyo ni caquitī ni de siquī jeē castéén Pedro jíin Juan nuū ñáyuu, jíin jéé cácanani de jñūhun jeē nátecu ndīyī chi je ni natecu Jesús. <sup>3</sup>Te ni cajnií ún de, te ni cachuhun ún de vecāa cone de nde cundijin inga quivī, chi je ni ini. <sup>4</sup>Te cuehē ñayuu jeē ní cajini sōho jñūhun ni cacahān Pedro jíin Juan ni cacandíje i. Te ni nduu nájñūhun uhūn mil jeē maá nene téé jeē ní cacandíje.

<sup>5</sup>Te jeē ní cundijin inga quivī ún, te téé cácujeñnu nuū ñáyuu hebreo jíin téé jéñnu cándiso jñiñu jíin téé cástéén jñūhun tutu ley yā, ni candutútú de ini ñuu Jerusalén. <sup>6</sup>Te suni ni candutútú de jíin Anás jeē cúu sutū cujeñnu ga, jíin

Caifás jíin Juan jíin Alejandro jíin táca gá jeē cácuu jnáhan sutū cujeñnu ga ún. <sup>7</sup>Te ni candacu jñiñu jeē na quíjicoo Pedro jíin Juan condichi de mēhñú, te ni cacajñūhún de:

¿Nde ñin ni tejníñu rōhó te ndese ni ñihñ jñiñu ró ní sáha ró jéé ndúvāha téé yáha? áchí.

<sup>8</sup>Yūcuán na te Pedro chi ni cunuú maá Espíritu Santo jíin de, te jíin poder yā ni cahān de jíin táca téé ún:

Tāca ñhín téé cácujeñnu nuū ñúu yō Israel jíin táca ñhín téé jéñnu cándiso jñiñu, <sup>9</sup>vijna te cástíhí ni sáña siquī ñin jñiñu váha ní casáha ná jéé ní nduvāha téé cúhú yāhá. <sup>10</sup>Te na cástūhun ná nuū ñihín jéé cácujeñnu ní, návāha suni cuni ndihí jnáhan ñuu yō Israel jeē jíin poder maá Jesucristo, Yaā ní jehnu ñuu Nazaret, ni nduvāha téé índichi nuū ni yáha. Te suu ya cúu Yaā jeē ní cajehni ni jíicā cruz, te ni sáha Yaā Dios jeē ní natecu yā. <sup>11</sup>Jesús cúu nájñūhun yuū cimientu jeē quítuu vehe. Te máá ní jijnáhan ní cácuu nájñūhun téé casáha vehe, te ni casquéhichí ni yá nájñūhun jeē cátejiyo ní yúu, chi tu ní cácandíje ní yá. Te ni sáha Yaā Dios jeē cúu ya nájñūhun yuū cánuú gá jeē quítuu vehe. <sup>12</sup>Te tú cuítī inga jeē cúu jnama yóhó, chi tuá na inga jeē cujeñnu ní jéni Yaā Dios ini ñayīvi yáha jéé cúu jnama yóhó, áchí Pedro.

<sup>13</sup>Yūcuán na te ni cajini un jéé Pedro jíin Juan jéñnu-ni cácahān de. Te je cajini jeē tú túhva de, chi téé súcuan-ni cácuu de. Te ni canaa ni cájito nuū de, te ni casáha cuenta jeē ní cajica de jíin Jesús. <sup>14</sup>Te cándēhe núu téé ni nduvāha un, índichi de jíin Pedro jíin Juan, te tu ní cánihñ gā modo ndese ga cahān. <sup>15</sup>Yūcuán na te ni candacu jñiñu jeē na quéndacoo síin de yatā véhe juzgado te ndajñūhun máá jíijnáhan. <sup>16</sup>Te ni cacahān:

¿Ndese sáha yó jíin tée yáha núu súcuan? Chi ní jitē jnūhun yáha núu tāca ñayuu ñuu Jerusalén jeē súcuan ni casáha de iin jniñu jéhu, te ma cúu cahān yō jeē tu íyó ndáa. <sup>17</sup> Te návāha ma cuité ga jnūhun yáha, na cúxeēn yō nuū de jeē ma cahān cuiti gā de jnūhun Jesús nuū ní iin ñayuu, áhí.

<sup>18</sup> Te ní cacana ún de, te ní cacahān nihin jíin de jeē ma cahān cuiti gā de jnūhun Jesús ni ma steén gā de jnūhun un núu ní iin ñayuu. <sup>19</sup> Yūcuán na te ní cacahān Pedro jíin Juan:

Cani vāha ni ní te núu núnahan ni Yaā Dios jeē stóo ná jniñu ní ndacu ya jeē sáha ná te cuandije ná máa na jniñu nándacu ní. <sup>20</sup> Chi ma cúu stóo ná jniñu jeē nácani ná jnūhun ní cajini sōho ná jíin jniñu ní cajito ná, áhí de.

<sup>21</sup> Yūcuán na te tēe ni cacutútú un ní cacuxeēn tucu de nuū Pedro jíin Juan. Te ni casiáa de cuango de, chi tú cuiti na modo stóho de chi cáyūhu cájito ñayuu, chi siquī jniñu jéhu ni cuu ún te ndíhi i cacahān i jeē yóhoyo cújéhu Yaā Dios.

<sup>22</sup> Chi tēe jeē ní sáha ya jniñu jéhu jíin de jeē ní nduvāha de, víhyá gā uū xico cuiyā de.

### Jeē ní cajicān tahú ñayuu cá candíje

<sup>23</sup> Te ná ni casiáa un Pedro jíin Juan cuango de, te ni najinūcoo de nuū tāca gá jnāhan de, te ni cacachi de ndese ní cacahān sutū cácujeéhu jíin tēe jéhu cándiso jniñu. <sup>24</sup> Te jeē ní cajini sōho de jnūhun yúcuan, te inuú-ni ní cajicān tahú de nuū Yaā Dios:

Tātā Yaā Dios jeē cujéhu ní núu ndíhi, máa ní cúu Yaā Dios ni sáha andiví jíin ñáyivi jíin mar jíin tāca ndíhi jeē íyó. <sup>25</sup> Te jeē jíin Espíritu Santo te ni sáha ní jeē ní cáhān mozo ní David nde jenahān: ¿Najehē cáquitī ndevāha ni ñayuu sīn nación?

¿Te najehē cájeni sáa ni i jeē ndóna i siquī ní?

<sup>26</sup> Ni cacutútú jeē cácuu rey ñáyivi jíināhan,

te tēe cácujeéhu ni cacutútú de, te inuú-ni ní candonda de siquī maá ní jeē cúu ní Jitoho ná,

jíin siquī Cristo, Yaā jeē ní jeni ní. Achí David.

<sup>27</sup> Te jendaá chi Herodes jíin Poncio Pilato jíin tāca tēe ñuu yō Israel jíin tēe tāca gá nación, ni cacutútú de ini ñuu yáha ní candonda de siquī Séhe i ní Jesús, Yaā ní jeni ní. <sup>28</sup> Te súcuan ni cuu návāha squícu tāca jniñu jeē jíin poder ni ní cundaā ni ní ndé jenahān jeē súcuan coo. <sup>29</sup> Te vijna, Tātā, coto ní ndese cácahān xeēn de nuū na jíināhan ná, te cuāha ni fuerza ni núu na jeē cácuu ná mozo ni, návāha jéhu-ni nacani ná jnūhun máa ní. <sup>30</sup> Te jíin poder ní nasávāha ni ñayuu cácuhu, te sáha ní jniñu jéhu jeē steén jeē cujéhu ní. Te tāca jeē yáha sáha ní jíin poder Séhe i ní Jesús, áhí i jíināhan i.

<sup>31</sup> Te nuū ní ndíhi ni cajicān tahú i, te nuū cáyūcu tútú i un ní sáha ya jeē ní jnáa. Te ndíhi i ni cunuú Espíritu Santo jíin i, te ni jēhe ya fuerza te jéhu-ni ní canacani i jnūhun Yaā Dios.

### Jeē ní cane vāha cáhnu i ndajniñu

<sup>32</sup> Te ñayuu cuehē jeē ní cacandíje chi inuú cáhiyo ni i jíināhan i. Te tú ni iin i ní cáhān jeē ndajniñu jeē névāha máa i cuu máa-ni i, chi tāca ndajniñu ni cane vāha cáhnu i. <sup>33</sup> Te nihin cácanani apóstol jnūhun jeē ní cajito de jeē ní natecu Jitoho yō Jesús. Te yóhoyo ni chindéé ñahān yá ñayuu cá candíje. <sup>34</sup> Chi tú cuiti ni iin i ní ndóho jeē cumaní nuū i, chi tāca ñayuu cánevāha cuehē ñuhun chí vehe, ni caxíco i sava te ni caquindeca i xūhún un. <sup>35</sup> Te ni cajēhe i xūhún un núu tēe apóstol, te ni casaja tēe apóstol nuū ñayuu cá candíje núu ndese jíni ñūhún iin iin i. <sup>36</sup> Te íyó iin tēe nání José jeē cúu yucūn Leví, ni cacu de Chipre, ñuhun jeē

ine s̄in nuū ndúte. Te tēe apóstol ni cas-nání de tēe ún Bernabé, jeē cuní cahān: tēe cáhán jnūhun ndeyí ni. <sup>37</sup> Te ni x̄ico de iin ñuhun de, te ndáhá de xūhún un ní jēhe de nuū tēe apóstol.

### Siquī cuēchi jeē ní casáha Ananías jíin Safira

**5** Te suni inga tēe nání Ananías jíin ñasihí de Safira, ni caxicó de iin ñuhun de. <sup>2</sup> Te ni chuvāha de sava xūhún un cuu máá de jíin ña, chi súcuan ni candajnūhún de jíin ña, te ndáhá de inga sava nájñuhun jeē ndíhi cúu, te ni jēhe de nuū tēe cácuu apóstol. <sup>3</sup> Te ni cahān Pedro:

Ananías, ¿naun ni jēhe ro jnúhun jeē quīvi jexeén, jeē cúu Satanás, ini anuá rō te stáhú ró Espiritu Santo cuní rō? Chi jeē ní caxico ró ñuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cuajñiñu máá ró, chi ni sáha ró nájñuhun jeē ndíhi xūhun ní jēhe ró. <sup>4</sup> ¿Te á násūu cuenta máá ró cúu ñuhun un ndé ná tu x̄ico ró? Te ná ni x̄ico ró ¿te á násūu cuenta máá ró cúu xūhun jēe cuajñiñu ró ndé nuū cuní máá ró? ¿Te naun ni jeni ni rō jeē stahú ró súcuan? Te nasūu máni máá tēe cúu jeē jícu ró stáhú ró, chi suni Yaā Dios, áchí Pedro.

<sup>5</sup> Te ná ni jini sōho Ananías tāca jnúhun yáha, te ni cotúú-ni de ni jihí de. Te tāca ñayuu ní canihin jnūhun ún, yōhyo ni cayūhú i. <sup>6</sup> Te ni candocuiñi tēe suchí, te ni cachusúcún de ndīyi un cuáchindūji de.

<sup>7</sup> Te ni cunúu nájñuhun uní hora. Te ni jinū ñasihí ndíyi un ní quīvi ña ini vehe ún, te tú na vé jiní cuiti ña. <sup>8</sup> Te Pedro ni cajñuhún de ña:

Cachi nuū rī, ¿á iin súcuan-ni ni caxico ró ñuhun ró chí tuú? áchí de.

Te ni cachi ña:

Suu súcuan-ni ni caxico ná, áchí ña.

<sup>9</sup> Te ni cahān Pedro jíin ña:

¿Naun ni casquijnáhan jnūhun ró jēe cóto ndee rō Espiritu Santo máá Jítóho yō? Chi ni nducú ró stahú ró yā. Cuni nahín jēe cáhma nanecoo tēe cuachindūji yí ró, te suni súcuan quichindūji de rōhó, áchí de.

<sup>10</sup> Te ni cotúú-ni ña nuū jehé Pedro te ni jihí-ni ña. Te ni ndivicoo tēe suchí un te ni cajito de jeē jé ni jihí ña, te ni caquenehen de ña, te ni jechindūji de ña xiin yí ña. <sup>11</sup> Te yōhyo ni cayūhú ndivii ñayuu cáchandje jíin táca gá ñayuu jeē ní cajini jnūhun jeē súcuan ni cuu.

### Cuehē jniñu jéhnun ni casáha apóstol

<sup>12</sup> Te cuehē jniñu jéhnun jeē steén jeē cujéhnun Yaā Dios ni casáha tēe apóstol nuū ñayuu. Te tāca ñayuu cáchandje, inuú-ni cándutútú i ini corredor jeē naní Salomón. <sup>13</sup> Te tu ní cáchundeyí ni inga ñayuu quijnáhan jíin i. Te cájejnūhún i ñayuu cáchandje. <sup>14</sup> Te ni nducuehē gā i, chi cúu tēe cúu ñahan ni cacandje i máá Jítóho yō. <sup>15</sup> Te cáquindeca ñayuu jnáhan i jeē cácuhū, te cájequin i ini calle cácaa i nuū camilla jíin núu yúu, chi cá-cuni i vésú ste cuándahū Pedro na yáha siquī i te nduvāha i. <sup>16</sup> Te suni cuehē ñayuu táca ñuu cáhiyo yajni yūcuan ní quijicoo i ñuu Jerusalén ni caquindeca i jnáhan i jeē cácuhū jíin jēe cándoho tachí, te ndíhi i ni canduvāha i.

### Jeē ní cajito xeēn i tēe cácuu apóstol

<sup>17</sup> Yūcuán na te sutū cujéhnun ga jíin táca gá jnáhan jeē cáchandje sahān saduceo, ni cacucuésun ni jeē siquí tēe cácuu apóstol. <sup>18</sup> Te ni cajñi de tēe cácuu apóstol ni cachuhun de vecāa. <sup>19</sup> Te iin ndajéhé máá Jítóho yō ni nune ya yehyí vecāa ún jecuáa, te ni quenehen ya de jíjnáhan de. Te ni cahān yā jíin de:

<sup>20</sup> Cuáhán te cuiñi ró ini templo, te yūcuán nacani cájí ró jnūhun nuū ñayuu siquí ndese nihin tahú i cotecu i ní cáni, áchí ndajéhé yā.

<sup>21</sup> Te ni cajini sōho de jnūhun yáha. Te nuū ní cundijin te nehen ni quivicoo de ini templo, te cástéén de jnūhun ya nuū ñáyu.

Te níní cástéén de te sutū kujéhu ga jíin táca jnáhan de ni canastútú de tēe junta kujéhu ga, jeē cúu ndihi tēe jéhu cándiso jniñu nuū ñáyu nación Israel. Te ni catajé de policia cuaquenehen tēe apóstol ini vecāa. <sup>22</sup> Te nuū ni jínūcoo te tuá gā tēe apóstol. Te ni canandió cóo te ni cacachi:

<sup>23</sup> Jendaá cúu jeē ní cajito ná ndési vāha vecāa, te cáhiin tēe cándito yéhyí un. Te nuū ní canune ná, te tú cuítí gā tēe un cáhiin ini vecāa ún, áchí de.

<sup>24</sup> Te sutū kujéhu ga jíin tēe cújéhu nuū tēe cándito templo jíin sūtū cácu-jéhu, nuū ní cajini sōho de jnūhun yáha, te ni cajeni ni de ndese ga cúu un núu súcuan. <sup>25</sup> Te ni quee-ni iin tēe te ni cachi:

Tēe jeē ní cachuhun ní vecāa, cáhiin de ini templo, te cástéén de jnūhun nuū ñáyu, áchí de.

<sup>26</sup> Yūcuán na te tēe cácu-jéhu nuū tēe cándito templo, jíin tēe cácu policia de, ni jengoo de, te yúcún ní nacueca de táca tēe apóstol vendicoo de jíin, chi cáyühú de jeē sanaa te cuáha ñayuu yuū xiní de núu sáha xeēn de jíin táca tēe apóstol. <sup>27</sup> Te nuū ní najinūcoo de jíin tēe apóstol, te ni cajecuiñí de nuū tēe casáha junta. Te sutū kujéhu ga ni cahān:

<sup>28</sup> Ni cacahān nihin ri jíin ró jeē ma steén cuítí gā rō jnūhun tēe nání Jesús. ¿Te naun ní casáha ró jéé ní ndecāva jnūhun un ní ñuu Jerusalén yāhá? Te cácuni rō staú yáhu ró rúhū jijnáhan ri siquí jeē ni jíihí tēe ún, áchí.

<sup>29</sup> Te Pedro jíin táca gā apóstol ni cacahān de:

Cánuú jéé squícu ná jniñu ní ndacu Yaā Dios nuū ná te nasūú jniñu nándacu tēe. <sup>30</sup> Máá Yáā Dios jíí yō ni nastécu yā Jesús, Yaā ní cajehni maá ní jeē ní cata

caa ní yá jicā cruz. <sup>31</sup> Te ni sáha Yaā Dios jeē ní ndujéhu tucu Jesús néne ya ichi ndáváha Yaā Dios, te cúu ya Yaā ndácu jniñu, Yaā jnáma ñayuu. Te súcuan ni sáha Yaā Dios náváha yóhó, jéé cácuu yó ñáyuu Israel, na nácani ni yō jeē stóo yó cuéchi yó, te cone cáhu ni yā nuū táca cuéchi yó. <sup>32</sup> Te máá ná ni cajito ná táca jniñu yáha, te suni máá Espiritu Santo steén cají yá jeē súcuan cúu, chi jéhe Yaā Dios Espiritu Santo yā condee ini anuá táca ñayuu jeē cájendetū nuū yā, áchí de.

<sup>33</sup> Te ná ni cajini sōho un jnūhun yáha, te yōhyo ni caquití ni, te cahni de cá-cuni nuú. <sup>34</sup> Te mēhñú un jíjnáhan néne iin tēe grupo fariseo nání de Gamaliel, te cúu de maestro jeē steén ley yā, te táca ñáyuu cájeynúhún i de. Te ni ndocuiñí de, te ni ndacu de jniñu jeē na cújiyo núu tēe apóstol. <sup>35</sup> Te ni cahān de:

Róhó jnáhan ñuu yō Israel, cani vāha ni rō núu na vé cácuni rō sáha ró jíin táca tēe yáha. <sup>36</sup> Chi nucūhun ni rō jeē iin cuiyā ni ndonda Teudas siquí gobierno, te ni cahān de jeē tēe téyí cúu de, te ni cacutútú nájnūhun cuūn ciento tēe jíin de. Yūcuán na te ni cajehni ñayuu Teudas, te táca jéé ní caquijnáhan jíin de ni cajitē núu cuangoo sáá-ni, te ni jecuiñí-ni jniñu ún. <sup>37</sup> Yūcuán na te quiví ni íyo censo te Judas, iin tēe Galilea, ni ndonda de siquí gobierno, te ni cacutútú cuéhē tēe jíin de. Te suni ni cajehni ñayuu Judas, te táca tēe jeē ní caquijnáhan jíin de ni cajitē núu cuangoo. <sup>38</sup> Te vijna na cuáha ri consejo rohó. Ma stáhān gā rō tēe yáha. Siáá de na quingoo de. Chi núu ñayuu-ni ni squejéé jniñu yáha, te jecuiñí ii. <sup>39</sup> Te núu Yaā Dios ni squejéé, te ma cúu casi rō, chi sanaa te siquí Yaā Dios cándonda ró, áchí de.

<sup>40</sup> Te ni cachusóhó jéé ni cahān Gamaliel. Te ni canacana tēe cácuu apóstol, te ni cacani de jíin cuarta ñii te ni cacahān xeēn jíin de jeē ma cahān gā de jnūhun Jesús, te ni casiáá de cuan-



goo de. <sup>41</sup>Te máá apóstol ni quendacoo de nuū junta cuango de, cácusī ni de jeē ni jéhe ya jnūhun ndoho de jeē cuáha ñayuu jnūhun canu de siquī jeē cácan-díje de ya. <sup>42</sup>Te ndiquivī castéén de jnūhun vāha Jesucristo, te cánacani de jnūhun ún ini templo jíin táca-ni vehe.

### Jeē ní cajeni de uxā tēe cuajníñu mēhñu ñayuu cácandíje

**6** Te ni cucuehē ñayuu cácandíje. Te tiempo un te tēe hebreo jeē cácahān yuhu griego, ni quejéé de cácahñu de nuū jnáhan hebreo de, áchí de jeē ñahan viuda jeē cácahān yuhu griego tu cáni-hīn vāha ña staā jeē cása de tāca quívī cuu ña. <sup>2</sup>Yūcuán na te máá ndihúxí uū apóstol ni canastútú de tāca ñayuu cácan-díje, te ni cacahān de:

Tú vāha jeē jécuiñī jniñu jeē cánacani ri jnūhun Yaā Dios siquī jeē cása rī staā. <sup>3</sup>Núu súcuan te róhó, hermano, nacāji ró úxā jnáhan máá yó, te na cóndiso jniñu de saja de staā. Te nacāji ró tēe jeē cájejnūhún ñayuu de, tēe ndíchí jēé ní cunuú Espíritu Santo jíin de. <sup>4</sup>Te ruhū jijnáhan ri, mání cacān tahu rī jíin jēé nácani ri jnūhun ya, achí de.

<sup>5</sup>Te ndíhi ñayuu ni canujnahan ni i jnūhun ni cacahān de. Te ni canacāji i Esteban, tēe cándíje vāha jeē ní cunuú Espíritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cándíje sahān ñayuu hebreo nde ná tu cándíje de jnūhun Cristo. <sup>6</sup>Te ni cajeni i tāca tēe yáha núu tēe cácuu apóstol, te tēe apóstol un ní casoó de ndaha de xinī tāca tēe un ní cajicān tahu de nuū Yaā Dios siquī jniñu condiso de.

<sup>7</sup>Te jnūhun Yaā Dios ni jītē gā cuahān, te ni nducuehē teyí ñayuu cácan-díje i jnūhun ya ini ñuu Jerusalén. Te suni cuehē sutú ni cacandíje de jnūhun ya.

### Jeē ní cajni de Esteban

<sup>8</sup>Te ni chindéé ñáhán yá Esteban ni jéhe ya poder nuū de, te ni sáha de táca jniñu jéhnu nuū ñayuu, jniñu jeē steén jeē kujéhnu Yaā Dios. <sup>9</sup>Te ñayuu hebreo jeē ní cacuyāhu i te ni canduu libre i, íyó vehe i sinagoga i. Te tēe un cácuu tēe ñuu Cirene jíin tēe ñuu Alejandría jíin tēe Cilicia jíin tēe Asia. Te sava tēe un ní caquejéé de cástáhān jnáhan de jíin Esteban. <sup>10</sup>Te tu ní cácundeyí jíin de, chi ndíchí ní cahān de ni sáha máá Espíritu Santo. <sup>11</sup>Yūcuán na te ni cascáhān sava tēe jeē na cáhān jnūhun stáhú síquī Esteban. Te ni cacahān jeē ní cajini sōho cáhān ndevāha Esteban siquī Moisés jíin síquī Yaā Dios. <sup>12</sup>Te jeē súcuan ni cacahān te ni caquitī ni tāca ñayuu jíin tēe jéhnu cándiso jniñu jíin tēe cástéén jnūhun tutu ley yā. Te ndíhi de ni candonda siquī Esteban, te ni cajni de cuango jíin de nde nuū junta kujéhnu ga. <sup>13</sup>Te ni cajeni de tēe cahān jnūhun yáá síquī Esteban, te suhva ni cacahān:

Tēe yáha tu ndé jécuiñī de jeē cahān ndevāha de siquī templo i yáha jíin síquī ley yā. <sup>14</sup>Chi ni cajini sōho ná cáhān de jeē Jesús, tēe ni jehnu ñuu Nazaret, canu de templo yáha te nasama de jeē tajnúni ley yā jeē ni jéhe Moisés nuū yō, áchí.

<sup>15</sup>Yūcuán na te ndíhi tēe cáyūcu núu junta un ní candacoto vāha nuū Esteban, te ni cajini jeē jító nuū de ná jító nuū iñ ndajéhé Yaā Dios.

### Jnūhun ni nacani Esteban

**7** Te máá sūtú kujéhnu ga ni cajnūhún Esteban:

¿A ndáa jeē súcuan ni sáha ró nájñūhun cácahān de yáhá? áchí.

<sup>2</sup>Te ni cahān Esteban:

Ndíhi níhín jēé cácuu ní jnáhan ñuu yō, jíin ndíhi níhín jēé cácujuhnu ní núu ñúu yō, cuni nahín ní jnūhun cahān ná: Máá Yáa Dios jeē yóhyo cújéhnu ya, ni

steén yā maá yá nuū jíí yō Abraham nde na néne ga de región Mesopotamia, nde ná tu quihín de condee de ñuu Harán. <sup>3</sup>Te ni cahān yā jíín de: Stóo ñuu rō jíín táca jnāhan ró te quihín rō nuū cuáha ri condee rō, chí máá rí steén ichi nuū quihín rō, achí yá. <sup>4</sup>Yūcuán na te ni quenda de región Caldea, te ni jinū de ni condee de ñuu Harán. Te yūcuan ní jihí tatá de. Yūcuán na te ni sáha Yaā Dios jeē ní quee de ñuu yáha núū cáyūcu yó vjna. <sup>5</sup>Te tu ní jéhe ya ni iin tihlí ñuhun yáha cuu tahū de. Te vēsú súcuan te ni jejnūhun ya jeē cuáha ya ñuhun un núū de nde jíín núū tāca séhe de, vēsú ná tu coo séhe de sáá. <sup>6</sup>Te súcuan ni cahān Yaā Dios jíín de: Sēhe ró coyūcu jíca i inga ñuu, te cuūn ciento cuiyā sājniñu sáá-ni i te stóho ñayuu yúcuán i. <sup>7</sup>Te siquī jeē súcuan sáha i jíín séhe ró, te máá rí chí stóho ri ñayuu ñuu ún. Te sáá te quenda-coo séhe ró yúcuán, te nucoyūcú i yāhá chiñúhún i ruhū, achí yá. <sup>8</sup>Te ni cahān yā jíín Abraham jeē na cúu de circuncidar, jeē cúu iin jnuni jeē ni sáha ya contrato jíín de. Te ná ni cacu séhe de Isaac te ni sáha de circuncidar i nuū uná quivī. Te suni súcuan ni sáha Isaac jíín séhe de Jacob, te Jacob jíín séhe yíí de jeē cácuu ndihúxí uū yucūn ñayuu Israel.

<sup>9</sup>Te tāca séhe Jacob ni cacucuésún ni de jíín ñani maá de José, te ni caxicó de i nuū téé jeē ní cajendēca i nde nación Egipto. Te Yaā Dios chí ni ndito ya José. <sup>10</sup>Te ni jnama ya i nuū tāca jnúndóho ní jito i, te ni cundichí i ni sáha ya. Te Faraón, tēe cúu rey nación Egipto, ni cusihí ni de jíín i ni sáha ya, te ni tejniñu de José jeē cúu de gobernador te ndacu de jniñu nación Egipto jíín núū ñayuu cáyūcú vehe Faraón.

<sup>11</sup>Te ni quiji quivī jeē ni íyo iin jnamā xeēn, te ni ndoho ñayuu ñí cáhnu nación Egipto jíín ndé ñuu Canaán. Te tāca jíí yō ún, tuá ni cánihin de jeē cáji de. <sup>12</sup>Te ni nihín Jacob jnūhun jeē iyó

trigo nde nación Egipto, te ni tají de séhe de ni jengoo de ni cajeen de trigo vuelta iin. <sup>13</sup>Te jeē cuángoo de vuelta uū te ni nastúu José jeē maá de cúu ñani de jijnáhan de. Yūcuán na te ni jini rey Faraón ndé iin jnāhan cúu José. <sup>14</sup>Te ni cahān José jíín táca ñani de jeē na cóndeca de tátá de Jacob jíín ndihí jnāhan vehe de. Te ni íyo uní xico xahūn i. <sup>15</sup>Te súcuan ni cuu jeē ni jínū Jacob ni condee de nación Egipto nde ni jihí de. Te suni yūcuan ní coyūcu séhe de jeē cácuu jíí yō un ndé ni cajihí maá de. <sup>16</sup>Te ná ni quee quivī jeē ndénehen ya tāca yúcūn de jeē cáyūcu tátú de nación Egipto, te ni cacondiso de yiqui ndihúxí uū ndiyi jíí un jéé ndíji ñuu Siquem, te ni cachindūji de ini yaū ndiyi ndeé jíca cáva jeē ní jeen jíí yō Abraham nuū tāca séhe Hamor ñuu Siquem.

<sup>17</sup>Te nde ná cáyūcu gá de nación Egipto, te cuacuyajni quivī jeē squícu jnūhun ni cahān Yaā Dios jíín Abraham jeē quéndacoo séhe de nucoyūcú i ñuu ni jéjnūhun ya nuū i, te ñayuu un ní tahū cuehē i ini nación Egipto. <sup>18</sup>Yūcuán na te ni nucuiñí inga rey ñuu Egipto jeē tu ní jíín de jeē váha ni sáha ndiyi José. <sup>19</sup>Te rey un ní stahú de tāca jíí yō te ni sáha ndevāha de jíín i, chí ni sáha fuerza de i jeē ma cóto ga i séhe yiquín i te na cúu. <sup>20</sup>Te tiempo un ní cacu Moisés, te ni cusihí ni Yaā Dios jíín i. Te uní yoō ni condito sāhi náná i tátá i. <sup>21</sup>Te tuá ni cúu condito sāhí de i, te ni cachune de i nuū nanihin séhe síhí Faraón i, te ni naquihin séhe ña i ni scuéhnu ña i nájñuhun séhe máá ña. <sup>22</sup>Te ni cutūhva Moisés tāca jnúhun ndichí ñuu Egipto, te ni cujéhnu de jíín jnúhun cáhán de jíín jniñu sáha de.

<sup>23</sup>Te nuū uú xico cuiyā de te ni jecondéhé de jnāhan de jeē cácuu ñayuu Israel. <sup>24</sup>Te ni jito de nuū iin tēe nación Egipto jeē sáha ndevāha jíín iin tēe Israel. Te Moisés ni jnama de jnāhan de

Israel ún, chí ni jehni de tēe Egipto un. Te súcuan ni ndutahū jeē ni sáha ndevāha jíin jnāhan de ún. <sup>25</sup> Te máá Moisés jéni ni de jeē jécūhun ni tāca jnāhan de jeē Yáa Dios ni tají yá de jeē jnáma de jnāhan de ún ini nación Egipto nuú, te tu ní cájecūhun cuiti ni jnāhan de ún. <sup>26</sup> Te inga quivī suni ni jito de nuū uú tēe Israel jeē cájejnāhan, te cúní de jeē na jécuiñi. Te jeē yúcuan ní cahān de jíin: ¿Najehē casáha ndevāha ró jíin jnāhan ró? Chí nájñūhun iin ñani-ni cácuu ró, áchí de. <sup>27</sup> Te máá tēe cáni tahū jnāhan un ní chundahá de Moisés te ni cahān de: ¿Ndé iin ni jeni róhó jéē cujéhnu ró núu rí te sándaā ró jniñu ri jijnāhan ri? <sup>28</sup> ¿Chí suni cúní ró cahni ró ruhū nájñūhun ni jehni ró tēe Egipto icu chí naún? áchí de jíin Moisés. <sup>29</sup> Te nuū ní jini sōho Moisés jñūhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yúcuan ní scácu ñasihí de uū sehe yí de.

<sup>30</sup> Te ni jinu uū xico cuiyā jeē néne de yūcuán. Yūcuán na te iin ndajéhé Yáa Dios ni quenda ya nuū de nde nuū ñūhun téhé nuū iin yucu súcún Sinaí. Te ni quenda ya nuū de xiní iin yucū cuí cáhnu cándahá yáñuhūn, te tu ní cáyú yucū ún. <sup>31</sup> Yūcuán na te Moisés ni naa ni de jító de ún, te ni jehēn de nde nuū, návāha coto vāha de. Te ni jini sōho de jeē cahán maá Jítóho yō jíin de: <sup>32</sup> Máá rí cúu Yáa Dios tāca jíi ró jenahán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yúcuan tuá ni cúndeyí ni de coto de nuū. <sup>33</sup> Te máá Jítóho yō ni cahān yā jíin de: Quenehen ndijēn ró chí nuū iin ró, ñūhun íi cúu. <sup>34</sup> Je ni jini rí ñayuu maá rí jeē yóhyo cándoho i nación Egipto, te suni jíni sōho ri jeē cájnana uhū i, te ni cuun ri vēji ri jeē jnáma ri i jíjnāhan i. Núu súcuan te vijna chí tají rí rohó ndicó

ró quihīn ró nde nación Egipto, achí yá jíin de.

<sup>35</sup> Te nde ná tu quenda Moisés Egipto, te tāca jnāhan de ni casquéhichí i de jeē ní cacahān i jíin de: ¿Ndé iin ni jeni róhó jéē cujéhnu ró núu rí te sándaā ró jniñu ri? ni cacahān i jíin de. Te vēsú súcuan te máá ndajéhé Yáa Dios ni quenda nuū Moisés un jéē cándahá cáyú yucū cuí ún. Te súcuan ni cuu jeē ní natají yá de cuanuhun de nde Egipto jeē ndácu de jniñu nuū i te jnama de i. <sup>36</sup> Te máá Moisés ni sáha de jeē ní quendacoo jnāhan ñuu de ini nación yúcuan, te ni cayāha de Mar Rojo, te ni cajica cuu de ñūhun téhé úu xico cuiyā. Te ñí tiempo un ní sáha de cuehē jniñu jéhnu jeē steēn jeē cujéhnu Yáa Dios. <sup>37</sup> Te máá Moisés cúu jeē suhva ni cahān de jñūhun yáha jíin jnāhan ñuu yō Israel: Máá Yáa Dios cani ya Yáa nacani jñūhun nuū ró jijnāhan ró nájñūhun ni jeni ya ruhū. Te cuu ya iin jnāhan ñuu yō. Te na chúhun ni ró jñūhun cahān Yáa ún, áchí. <sup>38</sup> Te suni nde ná ni cajica cuu jíi yō nde nuū ñūhun téhé, te ni cahān ndajéhé yā jíin Moisés xiní yúcu súcún Sinaí, te ni nihīn de jñūhun jeē cahán ndese nihīn tahú yō cotecu yō, te ni nacani de jñūhun un núu tāca jíi yō, te ni quendōo jñūhun un núu yō.

<sup>39</sup> Te tāca jíi yō ún tu ní cácu ni cuandetū de nuū Moisés, chí sa suhva ni cacuni de squéhichí ni de Moisés, te ni cacuni de nandicó de nungoo de Egipto nuú. <sup>40</sup> Te ni cacahān de jíin Aarón: Sáha ní tijni yaā na cósnūu núu yō. Chí Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéē jeē cuahán de xiní yucu Sinaí, achí. <sup>41</sup> Yūcuán na te ni cajēhe de oro ni cuvāha iin becerro oro, te nuū becerro ídolo un ní casocō de quití, te ni cacusi ni de jíin ídolo ni casáha de ún. <sup>42</sup> Te Yáa Dios ni cujiyo ya cuahān yā, te ni stóo ya de na chíñūhún de nuū tāca

jeē jíto yó ñin andiví, nájñuhun yósó núū tútu tēe ni canacani jñuhun Yaā Dios nde jenahán:

Ni cahān yā: Róhó ñáyuu Israel, ¿á cájeni ni rō jeē nuū ruhū ni casocō rō quiti ná ni cajica cuu rō úū xico cuiyā nde nuū ñúhun téhé?

<sup>43</sup> Tuú, chí sa suhva ni cacondiso rō nicho jeē íne ídolo jeē naní Moloc jíñ figura quími jeē naní Renfán, ídolo jeē ní casáha máá rō ni cachíñuhún rō.

Jeē yúcuan cúu jeē siáha ri rohó quíhin jicá rō nde yatā ñúū Babilonia, achí yá.

<sup>44</sup> Te ni ndacu ya jñiñu nuū Moisés jeē na sáha de vehe ññi nuū chíñuhún de ya, nájñuhun cáa jeē ní steén yā nuū de. Te táca jíí yō, nde nuū ñúhun téhé ní canevāha de vehe ñi un núū ní cachuvāha de tabla yuū jeē yosó jñuhun ley yā.

<sup>45</sup> Te ni castóo de vehe un núū ndihi sēhe de jeē cúu jíí yō. Te ni quívi Josué jíñ jíí yō ini nación yáha, te ni sáha ya jeē ní cacundeyí de jíñ táca ñáyuu jeē ní cacoyūcu yáha ní cajinu i cuangoo i. Te ni quívicoo de táca ñuu i jíñ vehe ñi ún, te ni quendōo nde quívi ní cuu David rey.

<sup>46</sup> Te ni cusí ni Yaā Dios jíñ rey David. Te ni jicān de nuū yā jeē sáha de ñin vehe ñi yā nuú, chí máá yá cúu Yaā Dios jíí de Jacob. <sup>47</sup> Te ni cuu jeē nde sēhe yíí de Salomón ni sáha vehe ñi yā. <sup>48</sup> Te vésú súcuan ni cuu te Yaā cujéñu téyí, tu ndéé yá máá vehe jeē casáha ñayuu, nájñuhun ni cahān tēe ni nacani jñuhun ya nde jenahán:

<sup>49</sup> Ni cahān yā: Andiví cúu nájñuhun mesa nuū ndácu ri jñiñu te ñayívi cúu nájñuhun ñin nuū yítuu jehē rí.

Núu súcuan ¿te ndese cuu sáha rō vehe jeē cóndee rí, te ndese cuu sáha rō núū ndétātu rí?

<sup>50</sup> ¿A násūu máá rí ní sáha ndihi jeē iyó? áchí máá Jítoho yō Yaā Dios.

<sup>51</sup> Te cáhán gā Esteban:

Yōhyo cáacunihni ni ní, te tu cácuni ní chusóhó ní, te cácuu ní nájñuhun ñayuu táca nación jeē tu cájini i jñuhun ya ni tu cácandíje i ya. Chí níni cájesi ní núū Espíritu Santo, te nájñuhun ni casáha jíí yō jenahán, suni súcuan casáha ní vjna. <sup>52</sup> ¿A ní iyo tēe nácani jñuhun ya nde jenahán jeē tu ní sáha ndevāha jíí yō jíñ de? Chí jíí yō ni cajehni de tēe ni canacani jñuhun jeē quíji máá Yáā ndaā. Te je ni quíji Yaā ún, te máá ní ni canastúu ni yá nuū tēe ni cajehni de ya. <sup>53</sup> Te vésú nde jíñ táca ndajéhé yā ni jēhe ya ley yā nuū yō, te máá ní chí tu cásquícu ní, áchí Esteban.

### Jeē ní cajehni de Esteban

<sup>54</sup> Táca jñuhun yáha ní cajini sōho, te yōhyo ni caquíti ni, te cánacayíñi yuhu cájito nuū Esteban. <sup>55</sup> Te máá Esteban chí ni cunuú Espíritu Santo jíñ de. Te ni jito de ichi ándiví, te ni jini de jeē ndíndēe núū néne Yaā Dios, te índichi Jesús ichi ndávāha ya. <sup>56</sup> Te ni cahān de:

Vijna te jíto ri jeē núne andiví, te jíto ri nuū máá Yáā ní nduu tēe, índichi yā nuū cujéñu ya lado váha Yaā Dios, áchí de.

<sup>57</sup> Yūcuán na te ni cajesi un sōho, te ni cacana cóhó, te inuú-ni ni candonda siquí Esteban. <sup>58</sup> Te ni caquenehen Esteban cuangoo jíñ de nde yatā ñúū. Te tēe ni cacahān yaá un jíñ ndihi jñáhan de ni cachucú de ticāchí de ndíto ñin tēe suchí nání Saulo, te ni cacani de yuū xiní Esteban. <sup>59</sup> Te níni jēe cácani táca tēe un yúú xiní de te ni jicān tahú de nuū yā:

Tátā Jesús jeē cúu ní Jítoho ná, naquihin ní ánuá na vijna, áchí de.

<sup>60</sup> Te ni jecuíñi yítí de te ni cahān jee de:

Tátā Yaā Dios, ma quénehen ní cuéchi siquí i jeē casáha i jíñ ná, áchí de.

Súcuan ni cahān de te ni jihí-ni de.

### Jeē ní jito xeēn Saulo ñayuu cácadnje

**8** Te Saulo, ni nujnahan ni de jeē ni jíhi Esteban.

Te quívi un ní caquejéé de cájito xeēn ndasí de ñayuu cácadnje Jesús ini ñuu Jerusalén, te jeē yúcuan cúu jeē ní cajitē núu ñayuu cácadnje cuango i ní Judea jíin ní Samaria. Te tēe apóstol chi tu ní cájitē núu de. <sup>2</sup>Te sava tēe yíñúhún núu Yaā Dios, ni cachindúji de Esteban. Te yōhyo ni candahyū de jeē ni jíhi Esteban. <sup>3</sup>Te Saulo chi jíto xeēn de ñayuu cácadnje, te quívi de ndijnahan vehe te jñí de tēe, ñahan, chúhun de i vecāa.

### Jeē ní canacani i jñuhun Yaā Dios ndañúu Samaria

<sup>4</sup>Te tācá ñuu nuū cuángoo tāca ñayuu ní cajitē núu un ní canacani i jñuhun ndese jnáma Yaā Dios ñayuu. <sup>5</sup>Te ni jinū Felipe iin ñuu ndañúu Samaria, te nuū ñayuu yúcuan ní nacani de jñuhun Cristo, Yaā ní jeni Yaā Dios jeē jnáma ya yohó. <sup>6</sup>Te tāca ñayuu ní cacutútú un ní cajini nahín váha i tāca jñuhun ni nacani Felipe, te ni cajito i tācá jniñu jéhu ni sáha de. <sup>7</sup>Chi cuehē ñayuu cándoho tachī ni canduváha i, te cácana cóhó táchi un ní caquendacoo. Te cuehē ñayuu ni íjin jíin ñayuu ríngo ni canduváha. <sup>8</sup>Te jeē yúcuan ní cacusiñ teyí ni ñayuu nuu ún.

<sup>9</sup>Te ini ñuu un néne iin tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cájito i jeē sáha Simón, te ni stahú de i ni cahān de jeē iin tēe cújéhu téyí cúu máá de. <sup>10</sup>Te nde tēe cácujeñu jíin ndívií cuítí ñayuu, cájetáhú ndasí i jñuhun cáhán de, te ni cajeni ni máá i te ni cacahān i:

Tēe yáha ní jēhe Yaā Dios cuehē poder nuū de, áchí i.

<sup>11</sup>Te cájetáhú váha i jñuhun cáhán de, chi cuehē tiempo ni sáha de jniñu stáhú

ní canaa ni i ni cajito i. <sup>12</sup>Te nuū ni jíin Felipe, ni nacani de jñuhun váha ndese ndácu Yaā Dios jniñu, jíin jñuhun Jesucristo, te ni cacandje i te ni cajendute i, cúu tēe cúu ñahan. <sup>13</sup>Te suni máá Simón ni candje de te ni jendute de, te ni jica cuu de jíin Felipe. Te ni naa ni de jíto de tācá jniñu jéhu jeē sáha Felipe jeē steén jeē cujéhu Yaā Dios.

<sup>14</sup>Te cáyūcu tēe apóstol ñuu Jerusalén, te ni canihin de jñuhun jeē ñayuu Samaria ni cacandje i jñuhun Yaā Dios. Te ni catají de Pedro jíin Juan cuango de yūcuán. <sup>15</sup>Te ni jinūcoo de, te ni cajicān tahu de jehē ñayuu un návāha na quívi Espíritu Santo ini anuá i jíjnahan i. <sup>16</sup>Chi ná tu quívi ya ini anuá ni iin i, chi máá-ni jeē ní cajendute i jeē ní cacandje i Jitoho yō Jesús. <sup>17</sup>Yūcuán na te Pedro jíin Juan ni casoó de ndaha de xiní i jíjnahan i, te ni quívi Espíritu Santo ini anuá i.

<sup>18</sup>Te ni jito Simón jeē súcuan cásoó apóstol ndaha de xiní ñayuu ún te súcuan quívi Espíritu Santo ini anuá i, te cúní de cuāha de xūhun núu tēe apóstol návāha nihin de poder un núu. <sup>19</sup>Chi ni cahān de:

Cúní na jēe cuāha ní poder yáha núu na, návāha núu ndé ñayuu soó ná ndaha ná xíní i te quívi Espíritu Santo ini anuá i, áchí de.

<sup>20</sup>Yūcuán na te ni cahān Pedro jíin de:

Na náa xūhun ró je jñahnū ndetū rō siquí jeē jéni ni rō jeē jíin xūhun te cuu cuaan ró táhū jeē véji nuū Yaā Dios. <sup>21</sup>Ma nihín tahu rō jeē sáha ró jniñu yáha, chi tu íyó ndāa anuá rō nuū Yaā Dios. <sup>22</sup>Núu súcuan te jíni núhún jéé stóo rō jñuhun jeē jéni néé ni rō súcuan te cahān ndahú ró jíin Yáa Dios, te máá yá sanaa te cone cáhnu ni yā siquí jeē jéni néé ni rō súcuan. <sup>23</sup>Chi jíin rí jeē cuquésún ni rō siquí jeē sáha rí jniñu yáha. Te tāca jéé neé jéni ni rō ni cunuú un jíin ró, achí Pedro jíin de.

24 Yūcuán na te ni cahān Simón jíin de:

Cacān tahú ni jéhē na jíinahan ní núū maá Jítóho yō návāha tú jnahnú ndetū na nájnūhun ni cahān ní, áchí de.

25 Te Pedro jíin Juan ni cacahān cají de ndese cácanđíje de jnūhun Yaā Dios. Te jeē cuānungoo de ichi núū Jerusalén, te tíjní ndañúū Samaria ni canacani de jnūhun jeē jnáma ya ñayuu.

### Felipe jíin tēe nación Etiopía

26 Yūcuán na te ni cahān ndajéhé maá Jítóho yō jíin Felipe:

Quihin ichi te quihin rō ichi sur, ichi jeē quenda Jerusalén cuahān nde ñuu Gaza, áchí yá.

Te ichi chúcuan chi máá ñuhun téhé cúu. 27 Te ni quihin Felipe ichi cuahān de. Te nde nación Etiopía ni quiji ñin tēe eunuco jeē ndíso jníñu de cúu de tesorero nuū ñáhan cúu reina ndácu jniñu nación Etiopía, nání ña Candace. Tēe un ní quichiñuhún de Yaā Dios ñuu Jerusalén. 28 Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jnūhun Yaā Dios nde jenahán. 29 Te máá Espíritu ni cahān yā jíin Felipe:

Cuáhán quíjnahan rō tēe cuahān jíin carreta un.

30 Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajnúhún de tēe ún:

¿A jécūhun ni ni jnúhun jeē cáhu ní chí tuú? áchí de.

31 Te ni cahān maá tēe un jíin Felipe:

¿Te ndese jecūhun ni ná? Chi tú na tēe castūhun núū ná ndese cúu ún, áchí de.

Te ni cahān de jíin Felipe jeē na cáa de conēne ndúú de jíin de ini carreta.

32 Te jnūhun cáhu de tutu ii un cáhán suhva:

Nájnūhun lanchi jeē cuahán tī nuū cúū tī, súcuan ni casáha ñayuu jíin yá.

Te nájnūhun ñin londe quití sáte jeē tu ndáhyú tī, súcuan ni sáha ya,

chi tú na vé ni cáhán cuítí yā ná ni cajicān i cuēchi síquī yā.

33 Te hora jeē ní cajēhe i jnūhun canu yā, tu ní casáha ndaā i síquī yā jíin jnūhun ndaā,

te ni cajehni i ya ini ñayivi yáha.

Te coo cuehē ñayuu candíje nuū yā jeē ma cánda ni ñin ñayuu cahu i ñayuu ún.

Achí.

34 Yūcuán na te ni cahān tēe Etiopía un:

Cava vāha ni ní cachi ni núū ná, ¿ndé síquī cahān tēe ni nacani jnūhun yáha? ¿A síquī maá de chí síquī ñnga tēe? áchí de jíin Felipe.

35 Yūcuán na te ni nacani Felipe jnūhun vāha Jesús nuū tēe ún, chi ni quejéé de ni castūhún de jnūhun jeē ní cahu tēe ún, jíin táca gá jnūhun jeē yosó núū tútu yā. 36 Te níni cuángoo de ichi ún te ni jinūcoo de nuū ñuhun ndute, te ni cahān tēe Etiopía:

Yáha ñuhun ndute ¿te á tú cuu cuan-dute ná? áchí de.

37 Te ni cahān Felipe:

Cuu te núu cándíje ñihin ni ndé jíin ini jíin ánuá ni táca jéé ni sáha Jítóho yō Jesús jehē yō, áchí de.

Te ni cahān tēe Etiopía:

Cándíje ná jéé Jesucristo cúu máá Séhe Yaā Dios, áchí de.

38 Te ni sáha de jeē na jécuiñī carreta de, te ni nuu ndíndúú de cuangoo de ichi véyí núū ñuhun ndute ún, te ni scuándute Felipe tēe Etiopía. 39 Te nuū ní quendacoo de nuū ndúte, te Espíritu maá Jítóho yō ni sáha ya jeē ní ndoñuhún-ni Felipe. Te tēe Etiopía vésú tuá ni jíto de nuū Felipe, te cúsiñi ni de cuahān de. 40 Te ni nane Felipe ñuu Azoto. Te nácani de jnūhun ndese jnáma ya ñayuu, cuahān de táca ñuu nde ni jinū de Cesarea.

**Jeē ní nasāma ini Saulo  
ni sáha Jesucristo**

(Hch. 22.6-16; 26.12-18)

**9** Te Saulo chi máni cáhán de jeē cáhni de tāca ñáyuu cácanđije i máá Jítóho yō, te jeē yúcuán ní jehēn de nuū sutú cujéhnu ga. <sup>2</sup>Te ni jicān de carta jeē cahán jeē quihín de tāca vehe ii sinagoga ñuu Damasco te cuhni de tēe ñahan jeē cácanđije i Jesús, quiji de jíin i ñuu Jerusalén nuú. <sup>3</sup>Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēé iin luz nuū de. <sup>4</sup>Te ni cotúú-ni de nuū ñúhun, te ni jini sōho de iin jnūhun cáhán jíin de:

Saulo, Saulo, ¿najehē jíto xeēn rō ruhū? achí.

<sup>5</sup>Te ni cahān maá de:

¿Na nihín cúu jeē cahán, Tátā?

Te ni cahān yā jíin de:

Máá rí cúu Jesús, te jeē jíto xeēn rō ñayuu cácanđije i ruhū cúu jeē jíto xeēn rō ruhū. Te jeē sáha ró súcuán cúu nájñūhun stiquí jeē tu jéndije ti te jéñú yatá tí xiní pulla, te súcuán stóho ti maá tí, achí yá.

<sup>6</sup>Te máá de chi quísi i de jeē yūhú de, te ni cahān de:

Tátā, ¿na vé cuní ní jēē sáha ná núu súcuán? achí de.

Te ni cahān maá Jítóho yō jíin de:

Ndocuñī, quívi ró ini ñuu, te yúcuán íyó iin tēe jeē cachi nuū rō na vé cúu jeē cánuú sáha ró, achí yá.

<sup>7</sup>Te tēe cuangoo jíin Saulo, ni canaa ndasí ni de cájini sōho de ndusu jeē cahán, te tu ní cájito cuiti de nuū jeē cahán un. <sup>8</sup>Yúcuán na te ni ndocuñī Saulo. Te ni nducú de coto de, te tuá cúu coto de, te ni cajñi tēe ún ndaha de ni jinūcoo jíin de nde ini ñuu Damasco. <sup>9</sup>Te yúcuán ní condee de uní quívi. Te tu ní cúu cuiti coto de, ni tú na vé ni yéji de, ni tú na vé ni jíhi de.

<sup>10</sup>Te ñuu Damasco néne iin tēe cándije, nání de Ananías. Te máá Jítóho yō ni steén ndijin ya maá yá nuū de te ni cahān yā jíin de:

Ananías, achí yá.

Te máá de ni cahān de jíin yá:

Naun ní sáña, Tátā, achí de.

<sup>11</sup>Te ni cahān maá Jítóho yō jíin de:

Quihin ichi te quihin rō calle jeē naní Calle Derecha, te vehe Judas cajñūhun rō iin tēe nání Saulo ñuu Tarso, chi jícán tahu de. <sup>12</sup>Te nájñūhun ni jito ndijin de jeē maá ró, Ananías, ni jinú rō, te ni soó ró ndaha ró xiní de, te ni nanune tinūú de, achí yá.

<sup>13</sup>Yúcuán na te ni cahān Ananías:

Tátā, cuehē ñayuu cácahān jeē tēe yúcuán yōhyo jíto xeēn de ñayuu cácanđije i nihín ñuu Jerusalén. <sup>14</sup>Te vijna ni quee de yāhá, chi sutú cácuajéhnu ni catejñiñu de vėji de jñi de tāca ñáyuu cácahān ndahú i jíin ní, achí de.

<sup>15</sup>Te ni cahān maá Jítóho yō jíin de:

Cuáhán, chi máá rí ni nacaji tēe un jéē quihin de nacani de jñūhun ri nuū tāca ñáyuu nación Israel jíin núu ñáyuu tāca gá nación nde jíin núu tāca rey. <sup>16</sup>Chi stéén rí nuū de jeē cánuú ndoho de cuehē jñūndóho jeē siquí rí, achí yá.

<sup>17</sup>Yúcuán na te cuahān Ananías. Te ni quívi de ini vehe nuū néne Saulo, te ni soó de ndaha de xiní Saulo, te ni cahān de:

Hermano Saulo, máá Jítóho yō Jesús, Yaā ní quenda ndijin nuū ní ichi jeē véji ní, ni tají yá sáña véji ná núu ni návaha na nánune tinūu ní, te návaha na cúnuú Espíritu Santo yā jíin ní, achí de.

<sup>18</sup>Te ni nanune-ni tinūu Saulo, chi ni nungoo-ni nájñūhun soó chācá ní condihyū tinūú de ún. Te ni ndocuñī de ni jendute de. <sup>19</sup>Yúcuán na te ni nacaji de staā, te ni nanihin ni de. Te ni condee de jecu quívi jíin tēe cácanđije jeē cáyūcú ini ñuu Damasco.

### Jeē ní nacani Saulo jnūhun ini űuu Damasco

<sup>20</sup> Te ni quejéé-ni de nácani de jnūhun Jesús ini tǎcǎ vehe iī sinagoga, áchí de jeē Jesús cúu Sēhe Yaā Dios. <sup>21</sup> Te tǎca űáyuu ni cajini sōho jnūhun cáhán de ni canaa ni i, te ni cacahān i:

¿A násūu tée yáha cúu jeē yóhyo jíto xeēn de tǎca űáyuu Jerusalén jeē cájicǎn tahú nuū Jesús? Te siqūi yúcuan ní quee de yáha jéē cúhni de űáyuu cácanđíje, te quihīn de jíin i nuū sutú cácujéhnu núú, áchí i.

<sup>22</sup> Te v́hyǎ gǎ ni nacani Saulo jnūhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cáyūcú űuu Damasco, tu ní cánihīn de modo cahān de jeē tu íyó ndǎǎ jeē cahán Saulo.

### Jeē ni cácu Saulo nuū jnáhan de hebreo

<sup>23</sup> Te ni yáha cuehē quivī. Te jnáhan de hebreo ni casquíjnáhan jnūhun de jeē cáhni de Saulo. <sup>24</sup> Te ni nihīn Saulo jnūhun jeē cándito de nduú űuú tǎca yéhyí pared jeē ní condúu ndihyú űuu ún. <sup>25</sup> Yūcuán na te iin jecuáǎ te tēe cácanđíje ni caquihīn de Saulo, te ini iin jíca cáhnu ni cascúun de Saulo jíca pared ún, te súcuan ni cácu de.

### Jeē ní najinū Saulo űuu Jerusalén

<sup>26</sup> Te nuū ní najinū de űuu Jerusalén, te cúni de najnáhan de jíin tēe cácanđíje. Te ni cayūhu tēe un ní cajito de Saulo, chi tu ní cácanđíje de jeē ní nduu Saulo tēe cándíje nuū Jesús. <sup>27</sup> Te Bernabé cuahān de jíin Saulo nuū cáyūcu tēe apóstol, te ni nacani de jnūhun nuū tēe ún ndese ni jini Saulo nuū maá Jítóho yō ichi nuū cuahán de, jíin jéē ni cáhān yā jíin de, jíin jéē jé́hnu-ni ni nacani de jnūhun Jesús ini űuu Damasco. <sup>28</sup> Te ni condee Saulo űuu Jerusalén ni jica

de jíin tǎca tēe apóstol. <sup>29</sup> Te jé́hnu-ni ni nacani de jnūhun maá Jítóho yō. Te jnáhan űuu de hebreo jeē cácahān yuhu griego, ni castáhān jnáhan jíin de, te maá tēe un cácu ni de cahni de Saulo. <sup>30</sup> Te ni cajini tǎcǎ hermano cácanđíje, te ni cajendēca de Saulo nde űuu Cesarea. Te yūcuan ní canatajǎ de Saulo cuanuhun de nde űuu de Tarso.

<sup>31</sup> Te űáyuu cácanđíje Jesús jeē cáyūcú Judea jíin Galilea jíin Samaria, tuá ni cájito xeēn űáyuu i. Te ni ije ga i jíin jnūhun ya, te cándiso iyo i nuū maá Jítóho yō. Te Espíritu Santo ni chindéé űáhán yá i te ni nducuehē gǎ i.

### Jeē ní nduváha Eneas

<sup>32</sup> Te tǎca lado jécondēhe Pedro űáyuu cácanđíje, te suni ni jécondēhē de űáyuu cácanđíje cáyūcú űuu Lida. <sup>33</sup> Te yūcuan ní jini de nuū iin tēe nání Eneas jeē ní cuu unǎ cuiyǎ cáa de chi ni ijin de. <sup>34</sup> Te ni cahān Pedro jíin de:

Eneas, Jesucristo cúu Yaā nasávāha ya rohó. Ndocuīñi te natuu rō yuu ró, áchí de.

Te ni ndocuīñi-ni tēe ún. <sup>35</sup> Te tǎca űáyuu cáyūcú űuu Lida jíin ndúhvä Sarón ni cajito i jeē ní nacaca Eneas, te ni casquéndōo i tǎca jnūhun jeē tu íyó ndǎǎ te ni cacandíje i maá Jítóho yō.

### Jeē ní natecu Dorcas

<sup>36</sup> Te nde űuu Jope ni iyo iin űahan cándíje, nání űa Tabita, te nuū yúhu griego nání űa Dorcas. Te űahan yáha máni jniñu v́aha ni sáha űa, te ni sáha űa caridad ni chindéé űáhán űa űáyuu cúmaní nuū. <sup>37</sup> Te tiempo yúcuan ní quejéé cuéhyī jíin űa, te ni jihī űa. Te ni cascúchi i ndíyi ún, te ni cajequin i ndíyi un ndé ini cuarto xinī véhe. <sup>38</sup> Te yajni íne űuu Lida jíin űuu Jope, te tēe cácanđíje űuu Jope ni cajini jnūhun de jeē néne Pedro űuu Lida, te ni catajǎ de uū tēe cuacana de Pedro, te ni cacahān de:



Ma cucuéé ní na quíhín yachí yō ñuu Jope, achí de.

<sup>39</sup> Yūcuán na te ni quihin Pedro ichi cuahān de jíin tée ún. Te nuū ni jíin de, te ni cacao tēe un jíin de nde xiní véhe nuū catú ndíyí ún. Te tācá ñahan viuda ni candicó ndúū ña de cándahyū ña, te cástéén ña tācá sahma jíin tícāchi jéé ni sáha Durcas te ni saja ña nde na tēcu ña. <sup>40</sup> Yūcuán na te ni ndacu Pedro jniñu jeé na quéndacoo ndíhi ñayuu ún quingoo i nde yatā véhe. Te ni jecuiñí yití de ni jicān tahú de, te ni nandió cóto de nuū catú ndíyí ún, te ni cahān de:

Tabita, ndocuiñí ní, áchí de.

Te máá ña ni ndacoto-ni ña te ni jito ña nuū Pedro, te ni nucōo-ni ña. <sup>41</sup> Te ni jniñ de ndaha ña, te ni ndonehen de ña. Yūcuán na te ni nacana de xiní ñayuu cá-candíje nde jíin ñahan viuda ni ndīvicoo i, te ni steén de ña nuū i jeé ní natecu ña. <sup>42</sup> Te ni jité jñūhun jniñu yáha ní ñuu Jope cuahān, te cuehē ñayuu ni cacandíje i jñūhun máá Jítoho yō. <sup>43</sup> Te cuehē quiví ni ndōo Pedro ini ñuu Jope, néne de vehe iin tēe sáha curtir ñiñi, nání de Simón.

### Pedro jíin Cornelio

**10** Te ini ñuu Cesarea ni iyo iin tēe nání Cornelio, ni cuu de capitán grupo soldado jeé naní Italiano. <sup>2</sup> Te cúu de tēe ndíso iyo nuū Yaā Dios nde jíin ndíhi ñayuu vehe de, te yōhyo caridad ni tēe cúu de, chi jéhe de xūhun núu ñayuu hebreo cándoho ndáhú, vēsú nasūu tēe hebreo cúu de. Te níní jicān tahú de nuū Yaā Dios. <sup>3</sup> Te iin quiví ni steén ndijin yā nuū tēe yáha nájñūhun cahuní jehíní, te ni jito de jeé iin ndajéhé máá Yáā Dios ni quiví ya nuū néne de. Te ni cahān yā jíin de:

Cornelio, achí yá.

<sup>4</sup> Te máá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátā? achí de.

Te ni cahān yā jíin de:

Je chíhi Yaā Dios cuenta jeé jicān tahú rō jíin jéé sáha ró caridad. <sup>5</sup> Vijnā te tají ró jecu tēe na quíngoo de nde ñuu Jope, quicana de Simón jeé suni nání de Pedro, na quíji de. <sup>6</sup> Chi néne núu de vehe tocayo de Simón, tēe sáha curtir ñiñi, te ndéé vehe ún yajni yumar. Te máá de castūhun núu rō na vé cúu inga jeé cánuú sáhá ró, áchí ndajéhé yā.

<sup>7</sup> Te ndajéhé yā jeé ni cáhān jíin Cornelio, cuahān-ni ya. Te ni cana de uū mozo de jíin iin soldado jeé yíñuhún núu Yaā Dios, chi cúcāhnu ni de jeé squícu vāha tēe ún. <sup>8</sup> Te ni nacani ndíhi de jñūhun nuū tāca tēe ún, te ni tají de cuangoo nde ñuu Jope.

<sup>9</sup> Te inga quiví un cájica de ichi cuangoo de, te cuacuyajni de ñuu Jope. Te je yajni cahuxí uū cúu, te suu hora un ní caa Pedro siquí véhe chí cándaā, te yūcuan cácan tahú de. <sup>10</sup> Te ni quee sōco chíji de, te ni cuni de caji de staā. Te sáá cásaña ña ndeyu te ni steén ndijin yā nuū de. <sup>11</sup> Te ni jito de jeé núne andiví. Te ni jito de nájñūhun iin sahma manta jité cáhnu te núhni jnáhan ndicúun punta, te ni cuun vēji nuū de. <sup>12</sup> Te chíji un cáñūhun ndinuū quití, tācá quití cúun ndaha jíin táca cóo jíin táca quití cándava. <sup>13</sup> Te ni jini sōho de iin jñūhun ni cahān:

Pedro, ndocuiñí te cahni rō tācá quití jíñā, te caji rō tí, áchí.

<sup>14</sup> Te ni cahān Pedro:

Ma cáji na, Tátā, chi tu yéji cuití na táca quití jeé cahán ley ni jéé tú vāha caji na tí, chí nájñūhun jeé tu cáhiyo ndoo tí nuū ní, áchí de.

<sup>15</sup> Te ni cahān tucu jñūhun un jíin de:

Achí rí jeé iyó vāha caji rō tācá quití jíñā, chí ni sándoo ri, te ma cahán máá ró jeé tu cáhiyo ndoo tí, áchí. Te súcuan ni steén caji yá nuū de jeé cúu quihin de nuū ñayuu vēsú násūu jnáhan ñuu de hebreo cúu.

<sup>16</sup> Te unī jínu ni cahān súcuan jíin de. Te sahma un ní ndaa cuanuhun andiví. <sup>17</sup> Te níní nácani ndasí ni Pedro na vé cuní cahān jeē ní jito ndijin de ún, te ni jinūcoo-ni tēe ni tají Cornelio, cáca-jnūhún de vehe Simón nde ni jinūcoo de yéhyí tēe ún. <sup>18</sup> Te cácahān jee de cáca-jnūhún de núu yūcuan ndéé Simón jeē suni nání de Pedro. <sup>19</sup> Te níní nácani ga ni Pedro siquī jeē ní jito ndijin de ún, te Espírítu Santo ni cahān yā jíin de:

Ni quecoo unī tēe cánanducú róhó. <sup>20</sup> Ndocuñī te nanuu ró, te ma cáni ni rō jeē tú vāha quihīn rō jíin de, vēsú nasūu jnāhan űuu rō hebreo cácuu de, chi máá rí ni tají rí de vējicoo de, áchí yá.

<sup>21</sup> Yūcuán na te ni nanuu Pedro nuū tēe ni tají Cornelio, te ni cahān de:

Máá ná cúu tēe cánanducú ní. ¿Te na siquī vējicoo ní núu na núu súcuan? áchí de.

<sup>22</sup> Te ni cacahān mozo un:

Cornelio, tēe cúu capitán, ni tají de sñá. Te tēe ndaā, tēe ndíso iyo nuū Yaā Dios cúu de, te tāca űayuu hebreo suni cácahān i jeē tēe vāha cúu de. Te ni cahān ĩn ndajéhé yā jíin de jeē na cána de nĥín jēé ní vehe de te chusóhó de jnūhun cahān ni jíin de.

<sup>23</sup> Yūcuán na te ni cahān Pedro jíin mozo un jēé na cúcōo de ini vehe ún, te ni candōo de yūcuán. Te nuū ní cundi-jin, te ni quihīn Pedro ichi cuahān de jíin mozo un. Te suni cuango jecu hermano cácañdije űuu Jope jíin de.

<sup>24</sup> Te nde inga quivī ni jinūcoo de űuu Cesarea. Te Cornelio ndétu de jinūcoo Pedro, chi ni nastútú de tāca jnāhan de jíin táca amigo de jeē quijnāhan vāha ga de jíin. <sup>25</sup> Te nuū ní jínū Pedro jijnāhan de, te ni quenda Cornelio ni cahān de jíin Pedro, te ni jecuiñī yití de jeē chiñúhún de Pedro nuú. <sup>26</sup> Te Pedro ni ndonehen de Cornelio, te ni cahān de:

Ndocuñī ní, chi sñá suni ĩn tēe-ni cúu ná, áchí de.

<sup>27</sup> Te cándaajnūhún de ni quivicoo de ini vehe. Te ni jito Pedro jeē cáyūcu cuéhē űayuu ini vehe de. <sup>28</sup> Te ni cahān Pedro jíin űayuu ún:

Je cájini vāha ni jijnāhan ní jēé ley jeē cánevāha sñā űayuu hebreo, cáhán jeē tú vāha jeē quijnāhan ná jíin ní quivicoo ná vehe ní síquī jeē cúu ní űayuu sñn nación. Te Yaā Dios chi ní steén yā nuū na jēé ma kujéé ni na núu ní ĩn űayuu. <sup>29</sup> Jeē yūcuan cúu jeē vēji-ni ná, chi ni cana ní sñā, te tu ní sájéé ni ná. Te na cájnūhun ná nihín, ¿na siquī ni cana ní sñā? áchí Pedro.

<sup>30</sup> Yūcuán na te ni cahān Cornelio:

Vijna íyó cúun quivī nájñūhun máá hora yāha jēé cúu cahuní jehíni, te ndite ni ná chi súcuan chíñúhún ná nuū yā, te jícán tahu na ini vehe ná. Te ni quiji ĩn ndajéhé yā nuū ná, te ndíndēé sahma űūhun ya. <sup>31</sup> Te ni cahān yā jíin ná: Cornelio, je ni jini sōho Yaā Dios jeē jicán tahu rō, te chíhi ya cuenta jeē sáha ró caridad. <sup>32</sup> Núu súcuan te tají ró mozo na quíngoo de űuu Jope quicana de Simón jeē suni nání de Pedro, na quíji de nuū rō. Chi tēe un néne de vehe tocayo de Simón, tēe sáha curtir ĩñi, te yajni yumar ndeé vehe de. Te quee tēe ún te castúhún de nuū rō jñūhun cánuú, áchí yá jíin ná. <sup>33</sup> Súcuan ni cuu te ni tají-ni ná mozo na cuajēcoo de cana de nĥín, te na cútahū ná, chi vāha ni sáha ní jēé vēji ní. Te vijna ni candutútú ná yāha návāha tāca ná cuni sōho ná ndihī jñūhun Jitoho yō Yaā Dios jeē ni jéhe ya cahān ní, áchí de.

### Jeē ní nacani Pedro jnūhun ya vehe Cornelio

<sup>34</sup> Yūcuán na te ni cahān Pedro:

Vijna te ni jini vāha ná jēé Yaā Dios inuú-ni sáha ya jíin táca űayuu, cúu űayuu hebreo jíin űayuu tāca gá nación. <sup>35</sup> Chi cúsiñi ni yā jíin űayuu tāca-ni nación núu cándiso iyo i nuū ya te cásáha i jñiñu ndaā. <sup>36</sup> Chi ni cahān yā

jiín ñáyuu Israel jeē ndávicoo tāca ñáyuu nuū jnūhun manī yā jiín i sáha Jesucristo. Te máá yá cúu Jitoho tāca yóhó. <sup>37</sup> Máá ní je cájini ní ndese ni cuu. Chi ná ni jínu ni nacani Juan jnūhun jiín jéē ni scuándute de ñayuu, te ni quejéé Jesús nácani ya jnūhun nde Galilea, te ni jitē jnūhun un nń cáhnu Judea. <sup>38</sup> Te cájini ni jéē Yaā Dios ni jēhe ya Espiritu Santo jiín poder nuū Jesús, Yaā ní jehnu ñuu Nazaret. Te cájini ni jéē ní jica cuu ya ni sáha ya jniñu váha, te ni nasávāha ya tāca ñáyuu jeē cándoho i sáha jexeén, chi Yaā Dios ni chindéé ñáhán yá Jesús. <sup>39</sup> Chi máá ná canacani cájí ná jnūhun tācá jniñu ní cajito ná ní sáha ya ní cáhnu Judea jiín ini ñuu Jerusalén. Yūcuán na te ni cajehni i ya, chi ni cata caa i ya jicā cruz. <sup>40</sup> Te Yaā Dios ni nastécu yā maá Jesús nuū uní quiví, te ni ndiji ya nuū na ní cajito ná núu yā ni sáha Yaā Dios. <sup>41</sup> Te tu ní quíji ya nuū tācá inga ñayuu, chi nuū maá-ni tāca ná jeē jé ni nacāji Yaā Dios sāña jéē nácani ná jnūhun tācá jniñu jeē ní cajito ná. Chi ni cayeji na stāá ni cajihí ná ndute jiín yá ná ni nane ya jeē ní natecu yā. <sup>42</sup> Te ni ndacu ya jniñu nuū na jíjnáhan ná jéē na nácani ná jnūhun ya nuū tāca ñáyuu te cahān cájí ná jeē maá Yāā Dios ni jeni ya Jesús jeē sándaā yā jniñu ñayuu cátecu jiín ñáyuu ní cajihí. <sup>43</sup> Chi jnūhun Jesús cúu jeē ní cacahān tāca téē ni canacani jnūhun Yaā Dios nde jenahán. Chi ni cacahān de jeē tāca ñáyuu jeē candíje i Jesús, cone cáhnu ni yā nuū cuéchi i, áchí Pedro.

### **Jeē ni quiví Espiritu Santo ini anuá ñayuu jeē násūú hebreo cácuu**

<sup>44</sup> Te níní cáhán gā Pedro tāca jnūhun yáha te ni quiví-ni Espiritu Santo ini anuá tāca ñáyuu cájini nahín jnūhun ya jeē cahán de. <sup>45</sup> Te tēē hebreo jeē ni jínucuu jiín Pedro jeē suni cacandíje de Jesús, nahán ní canaa ni de ni ca-

jito de jeē suni ni quiví Espiritu Santo ini anuá ñayuu jeē násūú hebreo cácuu. <sup>46</sup> Chi ni cajini sōho de cacahān ñayuu un sñn yuhu, te cacahān i jeē yōhoyo cújéhnu Yaā Dios. <sup>47</sup> Yūcuán na te ni cahān Pedro:

¿Ndé iin casi jeē ma cuándute ñayuu yáha? Chi ni quiví Espiritu Santo ini anuá maá i, nájñuhun ni quiví ya ini anuá maá yó, áchí de.

<sup>48</sup> Te ni cahān de jíín i jeē na cuándute i siquí jeē ní cacandíje i Jesucristo. Yūcuán na te ni cacahān ndahú i jíín Pedro jeē na quéndōo de jecu quiví jíín i.

### **Jeē ní nacuāha Pedro cuenta nuū ñayuu cacandíje ini ñuu Jerusalén**

**11** Te tēē apóstol jíín táca hermano cáyucú Judea, ni canihín de jnūhun jeē súni ñayuu sñn nación ni cacandíje i jnūhun Yaā Dios. <sup>2</sup> Te cuanuhun Pedro ñuu Jerusalén. Te sava tēē hebreo jeē cacandíje de ya ni cacahān de nuū Pedro:

<sup>3</sup> ¿Najehē ni condee ní vehe ñayuu jeē násūú ñayuu nación yō cúu? Te ni yeji ni jíín i, áchí.

<sup>4</sup> Yūcuán na te ni nacani cájí Pedro jnūhun nuū téē ún ndihí ndese ni cuu siquí téē sñn nación:

<sup>5</sup> Néne ná ñuu Jope. Te níní jícán tahú na, te ni steén ndijin yā nuū ná, te ni jito ná nájñuhun iin sahma manta jité cáhnu jeē nuhní jnáhan ndicúún punta, te nde ichi ándiví ní cuun ni quiji nuū ná. <sup>6</sup> Te ni jito váha ná, te ni jini na jéē chíji un cáñuhun quití cúun ndaha jíín quití xéén jíín cóo jíín quití cándava. <sup>7</sup> Te ni jini sōho ná iin jnūhun ni cahān jíín ná: Pedro, ndocuñí te cahni rō tācá quití jíñā, te caji rō tī, áchí jíini ná. <sup>8</sup> Te ni cahān ná: Ma cájí na, Tātā, chi tu yéji cuiti na tāca quití jeē cahán ley ni jéē tu cáhiyo ndoo tī nuū ní, áchí ná. <sup>9</sup> Yūcuán na te jnūhun jeē véji nde ándiví ní cahān tucu jíín ná: Ni sándoo máá rí tī, te ma cahán gā rō

jeē tu cáhiyo ndoo ti, áchí jíni ná. <sup>10</sup>Te uní jínu ni cahān súcuan. Yūcuán na te ni ndaa sahma un cuánuhun andiví. <sup>11</sup>Te hora un ní jinūcoo uní tēe vehe nuū ni cóndee ná un, cánanducú de sãñá, te iin jnāhan űnu de Cesarea ni tají de vējicoo de. <sup>12</sup>Te máá Espíritu ni cahān yā jíin ná jeē ma cáni ni na jēē tú vāha quihīn na jíin de. Te suni iññ hermano yāha ní jengoo jíin ná, te ni quivícoo ná ini vehe tēe nání Cornelio. <sup>13</sup>Te tēe un ní nacani de jnūhun nuū na jíjnāhan ná jēē ní jito de iin ndajéhé Yaā Dios, índichi yā ini vehe de, te ni cahān yā jíin de: Tají ró jecu tēe na quíngoo de űnu Jope, quicana de Simón jeē suni nání de Pedro, na quíji de. <sup>14</sup>Te tēe ún cachi de nuū rō ndese jnama Yaā Dios rohó jíin ndihī űayuu cáyūcú vehe ró, áchí yá. Achí Cornelio jíin ná. <sup>15</sup>Te nuū ní quejéé ná cahán na, te ni quiví-ni Espíritu Santo ini anuá i jíjnāhan i, nájñūhun ni quiví ya ini anuá máá yó xīhna gā. <sup>16</sup>Yūcuán na te ni nucūhun ni na jnūhun ni cahān máá Jítóho yō: Jendaá jeē máá ndute-ni ni scuándute Juan űayuu. Te róhó jíjnāhan ró chi nájñūhun cuandute ró jíin Espíritu Santo, cúu jeē cóndee yā ini anuá rō, achí yá. <sup>17</sup>Te suni ni jēhe Yaā Dios Espíritu yā nuū máá i nájñūhun ni jēhe ya nuū máá yó jeē cáandíje yó Jítóho yō Jesucristo. Núu súcuan ¿te ndé iin cúu ná jēē cási ná jniñu jeē sáha Yaā Dios? áchí Pedro.

<sup>18</sup>Súcuan ni cajini sōho de jnūhun yāha, te tuá ni cácahān de nuū Pedro, chí sa suhva ni cacahān de jeē yóhyo cújéhnū Yaā Dios. Te ni cacahān de:

Suni ni jēhe Yaā Dios jnūhun jeē na nácani ni űayuu tāca gá nación jeē stóo i cuēchi i návāha cotecu i níí cáni núu súcuan, áchí de.

### Ñayuu cáandíje ini űnu Antioquía

<sup>19</sup>Te quiví ní cajehni de Esteban ni quejéé de cájito xeēn de űayuu cácan-

díje, te jeē yúcuan ní cajitē núu űayuu un tāca űnu cuangoo i, te ni jinūcoo i Fenicia jíin Chipre jíin űnu Antioquía. Te ni canacani i jnūhun vāha ya nuū máni jnāhan hebreo i jeē cáyūcu yúcuan, te tu ní cánacani i jnūhun ya nuū ínga űayuu. <sup>20</sup>Te jecu tēe cáandíje jeē cáyūcu Chipre jíin űnu Cirene ni jinūcoo de űnu Antioquía, te suni nuū űayuu tāca nación jeē tu cájini i jnūhun ya ni canacani de jnūhun máá Jítóho yō Jesús jeē jnáma ya i. <sup>21</sup>Te máá Jítóho yō ni chindéé ñáhán yá de, te cuehē űayuu ni castóo i jniñu jeē tu íyó ndáa te ni cacandíje i máá Jítóho yō.

<sup>22</sup>Te űayuu cáandíje ini űnu Jerusalén ni cajini jnūhun i, te ni catají i Bernabé cuahān de nde űnu Antioquía. <sup>23</sup>Te nuū ni jínū Bernabé yūcuán, te ni jini de jeē yóhyo vāha ni sáha Yaā Dios jíin i, te ni cusíi ndasí ni de. Te ni stíhví ni de tāca űayuu un jēē jíin ini jíin ánuá i na cóndíhví ni i squícu vāha i nuū máá Jítóho yō, te ma náyūhú i. <sup>24</sup>Chi tēe vāha cúu Bernabé, te ni cunuú Espíritu Santo jíin de, te cáandíje nihin de. Te ni cacandíje cuehē űayuu nuū máá Jítóho yō ni sáha de.

<sup>25</sup>Yūcuán na te cuahān de nde űnu Tarso cuananducú de Saulo. Te ni nanihīn jnāhan de jíin Saulo, te ndéca de tēe un ní ndee de űnu Antioquía. <sup>26</sup>Te níí iin cuiyā ni candutútú de jíin űayuu cáandíje yūcuán, te ni castéén de jnūhun ya nuū cuehē űayuu. Te űnu Antioquía cúu nuū xīhna ñúhún gá ni caconaní űayuu cristiano siquí jeē ní cacandíje i Cristo.

<sup>27</sup>Te suni tiempo un ní quendacoo tēe cánacani jnūhun Yaā Dios űnu Jerusalén cuangoo de nde űnu Antioquía. <sup>28</sup>Te iin jnāhan de jeē naní Agabo ni ndocuiñi nuū hermano cáandíje. Te ni steén Espíritu Santo nuū de, te ni castūhún de jeē cóo iin jnamā xeēn níí cáhnu. Te ni cuu jnamā ún iin parte tiempo jeē ní ndacu Claudio jniñu jeē ní cuu de rey.

<sup>29</sup>Yūcuán na te ni candajnūhun tée cá-candíje ñuu Antioquía jeē cuáha iin iin de nasaa canda de cuáha de te tají de quihín cotecu hermano cáyucú Judea. <sup>30</sup>Te súcuan ni casáha de. Te ni catajé de Bernabé jíin Saulo ni cajendēca de nuū tée jéhu cándiso jníñu nuū ñáyuu cácan-díje cáyucú Judea.

### Jeē ní jehni Herodes Jacobo, te ni chune de Pedro vecāa

**12** Te suu tiempo un ní quejéé rey Herodes jíto xeēn de sava ñayuu cácan-díje. <sup>2</sup>Te ni ndacu de jniñu jeē jíin espada na cáhni i Jacobo ñani Juan. <sup>3</sup>Te ni jini de jeē ní cacusiñi ni tēe hebreo jeē ni sáha de súcuan, te jeē yúcuan suni ni jniñi de Pedro. Te máá quíivī un ní cuu vico jeē yéji ñayuu pan jeē tu yñhi levadura. <sup>4</sup>Te nuū ní jniñi de Pedro, te ni chune de vecāa, te ni jeni de cuñn grupo soldado jeē cóndito Pedro, cuñn cuñn soldado cúu jeē iin iin grupo. Chi cúni Herodes jeē na yáha vico un jéē cúu vico pascua te quenehen de Pedro vecāa un stéén de nuū ñáyuu cuehē. <sup>5</sup>Te súcuan íne Pedro vecāa, te cándito soldado un de. Te ñayuu cácan-díje chi nihin ni cajicān tahú i jehē Pedro nuū Yaā Dios jeē na cácu de.

### Jeē ní quenehen Yaā Dios Pedro vecāa

<sup>6</sup>Te jéni ni Herodes jeē na cúndijin inga quíivī te quenehen de Pedro vecāa, te stéén de nuū ñáyuu un núu. Te núhni Pedro jíin úu cadena, cáttu de quíxí de mēhñu úu soldado jecuáa ún, te suni cáhiin ga soldado cándito yéhyí vécaā ún. <sup>7</sup>Te suu jecuáa ún te sanaa-ni te ni jinū iin ndajéhé máá Jítóho yō, te ni ndindēé ini vecāa. Te ni squíhi ya Pedro, te ni natahū ni de. Te ni cahān yā:

Yachī ndocuiñī rō, achí yá.

Te cadena nuhni ndaha de un ní canandají-ni. <sup>8</sup>Te ni cahān ndajéhé yā jíin de:

Nacuhni nihin chiji ró, te nuquíhi ró ndíjēn rō, achí yá.

Te súcuan ni sáha de. Te ni cahān tucu ndajéhé yā jíin de:

Condii ticāchi ró, te condiquin rō ruhū na quihín yō, achí yá.

<sup>9</sup>Te ni quenda de ndíquín de ya cuahān de jíin yá, te jéni ni de jeē násūu jéndaá cúu jeē sáha ndajéhé yā jíin de, chi jéni ni de jeē iin jeē ni stéén yā jíto ndijin de cúu. <sup>10</sup>Te ni yáha ya jíin de uū nuū cándito soldado. Te ni jinū yā jíin de yéhyí cáa nuū quēnda de caca de calle, te yéhyí un ní nune ii-ni máá. Te ni quenda ya jíin de, te ni yáha de iin calle cuahān de. Yūcuán na te ni cujiyo-ni ndajéhé yā nuū de cuahān yā. <sup>11</sup>Te ni nducájí ni Pedro te ni cahān maá ní cahān iin de:

Vijna te ni jini ndaā rī jeē ní tají máá Jítóho rī ndajéhé yā ni quiji, te ni jnama ya ruhū nuū Herodes jíin núu tāca ñayuu hebreo jeē cácuni i sáha xeēn i jíin rí nuú, achí de.

<sup>12</sup>Te nuū ní jini de jeē ni cácu ndije de, te ni quihín de ichi cuahān de vehe María naná Juan jeē suni nání de Marcos. Te yúcuan cáhiin túttú cuehē ñayuu cájicān tahú i jehē Pedro. <sup>13</sup>Te cáhān Pedro ni jinū de yéhyí fuera, te iin sūchi síhí nání Rode cuahān i jeē cúni i núu ndé iin cúu jeē cahán. <sup>14</sup>Te ni nacuni i tachī Pedro, te jeē ní cusñi ni i te tu ní núne i yéhyí un, chi ni nandió cóo i te jínu i ni ndíivī i ini cuarto. Te ni castühún i jeē ní quee Pedro índichi de yéhyí fuera. <sup>15</sup>Te ni cacahān jíin i:

Jeē cahán neé ró, achí.

Te máá i nihin cáhān i jeē maá de cúu. Yūcuán na te ni cacahān:

Ndajéhé yā jeē ndíto Pedro cúu núu súcuan, achí.

<sup>16</sup>Te víhyá gā cahán Pedro. Yūcuán na te ni canune i yéhyí, te ni canacuni i nuū de, te nahán ní canaa ni i cájito i. <sup>17</sup>Te máá de ni sáha de ndaha de jeē ma cúvaā

gā i, te ni castūhún de ndese ni quenehen máá Jítóho yō de vecāa. Te ni cahān de:

Castūhun nūū Jacobo jíin nūū tāca gá hermano jeē ní quenehen ya ruhū vecāa, áchí de.

Te ni quenda de cuahān de inga lugar.

<sup>18</sup>Te nuū ní cundijin, te ni cacuvaā teyí soldado jeē tuá Pedro. <sup>19</sup>Te ni ndacu Herodes jniñu jeē na nānducú váha i Pedro. Te tu ní cánanihin i de, te nuū ní cuu ni stichí de soldado jijnáhan, te ni ndacu de jniñu jeē na cúū. Yūcuán na te ni quenda Herodes Judea cuahān de ñuu Cesarea, te ni condee de yūcuán.

### Jeē ni jíhi Herodes

<sup>20</sup>Te yōhyo ni quitī ni rey Herodes nuū ñáyuu ñuu Tiro jíin ñuu Sidón. Te ñayuu un ní candajñuhún i jeē inuū-ni quivicoo ndíhi i nuū rey un. Te ni casáha i amigo i jíin Blasto, tēe cújéhnu jéjníñu nuū rey un. Te ni cacahān ndahú i jíin de jeē na cáhán ndahú de jíin rey un jéē na ndéē ni de jíin i. Chi nde ñuu maá rey un cájeen i jeē cáyeji i. <sup>21</sup>Te ni jeni Herodes iin quiví. Te ni nucūhun de sahma yínúhún de, te ni cucōo de mesa nuū ndácu de jniñu, te ni cahān de iin jñuhun jehū ni cajini sōho i. <sup>22</sup>Te ñayuu un ní caquejéé i cácahān jee i jñuhun yínúhún jíin de:

Nasūu tēe-ni cúu ní, chí iin yaā cúu ní, áchí i jijnáhan i.

<sup>23</sup>Te máá hora un ní sáha-ni iin ndajéhe máá Jítóho yō jeē ní jniñi iin cuehyí xeēn rey Herodes, te ni cayeji tindácú de, te ni jihí de, chí ni sandúxí-ni de máá de te tu ní cáhán de jeē Yaā Dios cúu jeē cújéhnu.

<sup>24</sup>Te ni jitē gā jñuhun máá Jítóho yō, te cuehē ndasí ñáyuu ni cacandíje i táca-ni lugar.

<sup>25</sup>Te ni jinu jniñu jeē ní quindecia Bernabé jíin Saulo jeē cótecu ñayuu Judea. Te ni quendacoo de Jerusalén cuanungoo de Antioquía, te cándēca de

Juan jeē suni nání de Marcos cuahān jíin de.

### Jeē ní caquejéé Bernabé jíin Saulo caca cuu de nacani de jñuhun ya

**13** Te mēhñu grupo ñayuu cácan-díje ini ñuu Antioquía ni cahíyo tēe cástéén jíin tēe cácanani jñuhun Yaā Dios, te cácaní de Bernabé, Simón jeē suni nání de Negro, Lucio ñuu Cirene, Saulo, jíin Manaén tēe ni jehnu jíin inga Herodes jeē ní cuu gobernador Galilea. <sup>2</sup>Te iin quiví jeē cáhiyo ndite ni tēe yáha cáchiñúhún de nuū maá Jítóho yō, te ni cahān maá Espíritu Santo jíin de:

Cúni rí jeē sasíin ró Bernabé jíin Saulo na quíngoo de jniñu jeē ní jeni ri de, áchí yá.

<sup>3</sup>Yūcuán na te ni cajicān tahu ndite ni de, te ni casoó de ndaha de xiní Bernabé jíin Saulo, te súcuan ni catajé de ndindúú tēe ún cuanacani de jñuhun nuū tāca ñáyuu.

### Jeē ní canacani Bernabé jíin Saulo jñuhun ya nde Chipre

<sup>4</sup>Te ni sáha Espíritu Santo jeē íchi nūū Seleucia cuangoo de. Te yūcuan ní quivicoo de iin barco cuangoo de nde Chipre, ñuhun jeē íne sín nuū ndúte. <sup>5</sup>Te ni jinūcoo de ñuu Salamina nuū cájecuññi barco, te ni canacani de jñuhun Yaā Dios ini táca vehe i sinagoga jnáhan hebreo de. Te suni cuahān Juan chindéé ñáhán jíin de. <sup>6</sup>Te ni cajica nuu de ní-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū iin tēe hebreo nání Barjesús. Te tēe tási cúu de, te cáhán stahú de jeē iin tēe nácani jñuhun Yaā Dios cúu de. <sup>7</sup>Te tēe tási un jéjníñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúni nahín de jñuhun Yaā Dios. <sup>8</sup>Te tēe tási un suni nání de Elimas. Te ndúcú ndéyí de casi de jeē ma cándíje gober-

nador ún. <sup>9</sup>Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū tée tásí un. <sup>10</sup>Te ni cahān de:

Tēe sāha jniñu nēe stáhú ñáhán cúu ró, chi sēhe jexeén cúu ró te jési rō nuū tēcá jniñu ndaā. Te tu jécuiñi rō jeē sāca núu rō síquī jnúhun ndaā maá Jítoho yō nāvāha ma candíje ñayuu nuū yā. <sup>11</sup>Te maá Jítoho yō stóho ya rohó vijna, te cucuáá rō jeē ma cóto ga rō niāndii jecu quivī, achí Pablo.

Te ni cunee-ni nuū tée tásí un, te quéndāha quéhiyú de cuahān de ndúcú de ndé vé jñí ndaha de stéén ichi nuū de quinuhun de. <sup>12</sup>Yūcuán na te ni jini gobernador jeē súcuan ni cuu, te ni candíje de jnúhun máá Jítoho yō, te nāā ni de jíni sōho de jnúhun ya.

### Jeē ní coyūcu Pablo jíin Bernabé Antioquía ndañū Pisidia

<sup>13</sup>Yūcuán na te ni quendacoo Pablo jíin Bernabé jíin Juan ñuu Pafos, te ni quivícoo de barco te cuangoo de ñuu Perge ndañū Panfilia. Te yūcuan ní cusñ Juan, te cuanuhun de ñuu Jerusalén. <sup>14</sup>Te ni quendacoo Pablo jíin Bernabé ñuu Perge cuangoo de, te ni jinūcoo de ñuu Antioquía ndañū Pisidia. Te quivī ndétātu ní quivícoo de ini vehe ii sinagoga, te ni cacucōo de. <sup>15</sup>Te ni cahu tutu ley yā jíin tutu ní catee tēe ni canacani jnúhun ya nde jenahán. Yūcuán na te tēe cácujeñhu ini vehe ii sinagoga, vii-ni ni catajī de tēe cahān jíin Pablo jíin Bernabé:

Amigo, núu íyó jnúhun cahān ni jēe stihví ni ni ñáyuu yāha, te cahān ní na cúni nahín i núu súcuan, áchí de.

<sup>16</sup>Yūcuán na te ni ndocuiñi Pablo te ni sāha de seña jíin ndaha de jeē nahín-ni coo ñayuu ún, te ni cahān de:

Níhín jnáhan ñuu yō Israel jíin níhín tēe jeē suni cáchiñhún ní Yāā Dios, cuni nahín ní jijnáhan ní. <sup>17</sup>Máá Yāā Dios

yohó ñáyuu Israel, ni nacāji ya jíi yō jijnáhan de. Te níhí jēe cáyūcu tátú de ñuu Egipto, te ni sāha ya jeē ní nducuehē de. Yūcuán na te jíin poder maá yá ni quenehen ya de nación Egipto. <sup>18</sup>Te uū xico cuiyā ni cajica de nuū ñúhun téhé, te ni jendeyí ni yā jíin de jeē ní caství de. <sup>19</sup>Te ni snāā yā uxā nación Canaán, te ni jēhe ya ñuhun un núu tēca jíi yō cúu tahū de. <sup>20</sup>Yūcuán na te ni jeni ya tāca tēe ni candacu jniñu nuū de nájñuhun cuñ ciento uū xico uxí cuiyā, nde quivī ní cotecu Samuel, tēe ni nacani jnúhun ya. <sup>21</sup>Yūcuán na te maá ñáyuu un ní cajicān i ñin rey, te ni jeni Yāā Dios Saúl ni ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl. <sup>22</sup>Te ni quenehen ya jniñu Saúl, te ni jeni ya David ni cuu de rey nuū i. Te ni cahān cají yá jnúhun de: Cúsí ni rī jíin David sēhe Isaí, chi sāha de tāca jēe cumí rī, achí yá.

<sup>23</sup>Te cáhán gā Pablo:

Te sēhe yucūn David ni cacu Jesús, Yāā ní jeni Yāā Dios jeē jnáma ya yohó ñáyuu Israel, chi súcuan ni jejnúhun ya. <sup>24</sup>Te nde ná tu quejéé Jesús nacani ya jnúhun nuū ñáyuu, te ni nacani Juan jnúhun nuū tāca jnáhan ñuu yō Israel jeē na nácani ni i jeē stóo i cuēchi i, te cuandute i. <sup>25</sup>Te nuū cuácuyajni jeē cúu Juan, te ni cahān de: Cándētu ró jēe quíji Cristo, te jéni ni rō jeē ruhū cúu, te nasúu rí cúu. Chi quiji ya, te cújéñhu ndasí yá jeē ni ndijēn yā tu cújéñhu ri tava rī, achí de.

<sup>26</sup>Amigo jijnáhan ní, tāca níhín jēe cácuu yó sēhe yucūn Abraham jíin tāca níhín jēe suni cándiso íyo ní núu Yāā Dios, chi cúni Yāā Dios jeē na cúni yō jnúhun yāha jeē cáhán ndese jnáma ya yohó. <sup>27</sup>Chi tāca ñáyuu ñuu Jerusalén jíin tāca tēe cácujeñhu nuū i, tu ní cájecūhun ni i jeē Jesús cúu Cristo, Yāā ní jeni Yāā Dios jeē jnáma ya yohó. Te ndijnahan quivī ndétātu ní cajini sōho

i jñuhun ni cacahu jeē ní catee tēe ni canacani jñuhun Yaā Dios nde jenahán. Te vēsú súcuan te tu ní cájecūhun ni i, te ni candonda i ni cacahān i jeē na cúu yā. Te súcuan ni casquícu i siquī tāca jñuhun jeē ní cacahān tēe ni canacani jñuhun ya nde jenahán. <sup>28</sup> Vēsú tu ní cánihin i ni iin cuēchi siquī yā jeē cúu yā, te ni cacahān nihin i jín Pilato jeē na cúu yā. <sup>29</sup> Te ná ni jinu ni squícu siquī yā tāca jñuhun cáhān nuū tútu i, te ni casnúu de ya jicā cruz, te ni cachindūji de ya iin yaū ní jete jicā cáva. <sup>30</sup> Te ní sáha Yaā Dios jeē ní natecu yā. <sup>31</sup> Te ñayuu Galilea jeē ni jéngoo jín yá nde Jerusalén nde na técu yā, nuū maá i ni steén ndijin yā maá yá cuehē quivī ná ni natecu yā, te ñayuu un cácuu jeē cánacani cáji jñuhun ya nuū tāca gá jñáhan yó hebreo vijna.

<sup>32</sup> Te maá ná jijnáhan ná cánacani ná jñuhun vāha yáha núu ni jijnáhan ní jéē súcuan ni jejnūhun ya nuū tāca jí yō. <sup>33</sup> Te jñuhun yáha ní squícu Yaā Dios nuū maá yó jeē cácuu yó séhe yucūn de, chi ni nastécu yā Jesús. Chi suhva cáhān salmo uū jeē cahán yā jín Séhe ya Jesús: Máá ró cúu Séhe ri, te vijna ni sajhēnu ri rohó jéē cúu ri Tatá rō, achí yá. <sup>34</sup> Te ni nastécu yā Séhe ya Jesús návāha ma tehyú cuítí yā, chi suhva cáhān tutu i jeē ni cáhān Yaā Dios nde jenahán: Te nihin maá ró tāca jéē váha ni jejnūhun ri nuū David, achí. <sup>35</sup> Te suni súcuan cáhān inga salmo jeē ní tee David jñuhun jeē cahán Jesús jín Yāā Dios: Ma cuáha ni jñuhun tehyū ná, chi jéjñū ná núu ní te maní ni jín ná, achí. <sup>36</sup> Te David chi jín yō jeē ní jejñū de nuū ñayuu ní cotecu de jín, nájñuhun ni cuni Yaā Dios. Te ni jihí de, te ni quindūji de nájñuhun ni quindūji tāca jí yō, te ni tehyū de. <sup>37</sup> Te Jesús, Yaā ní nastécu Yaā Dios, chi tu ní téhyú cuítí yā. <sup>38</sup> Jeē yúcuan jíní ñhún jecūhun ni ní, amigo, jeē Jesús cúu Yaā cóne cáhnu ni nuū tāca cuéchi yó. <sup>39</sup> Chi ni canducú ní ndahva ni cuéchi ní jéē

squícu ní ley jeē ni jéhe ya nuū Moisés, te tu ní cúu ndahvā cuéchi ní súcuan. Te Jesús cúu Yaā ndáhva ndihí cuéchi ñayuu jeē cácandíje i tāca jéē ni sáha ya jehē i. <sup>40</sup> Núu súcuan te coto ní jijnáhan ní jéē ma ndóho ní tāca castigo jeē ní cacahān tēe ni canacani jñuhun Yaā Dios nde jenahán, chi suhva ni cahān Yaā Dios:

<sup>41</sup> Tāca rōhó ñayuu jeē casácata, na cóto ró na castigo xeēn quiji siquī rō, te naa ni rō coto ró, te cuu rō. Chi tiempo maá ró te sáha ri jñūu xeēn jeē ma cándíje cuítí rō jeē súcuan sáha ri vēsú nacani ñayuu jñuhun un núu rō, achí yá.

Achí Pablo.

<sup>42</sup> Te ni quendacoo Pablo jín tāca jñáhan de vehe i sinagoga jñáhan hebreo de. Te ñayuu sñn nación ni cacahān ndahú i jín de jeē inga quivī ndétátú nacani tucu de jñuhun yáha núu i. <sup>43</sup> Te ni jitē ñayuu un cuángoo i. Te cuehē ñayuu hebreo jín ñayuu sñn nación jeē ní cacandíje sahān hebreo te cáchiñuhún i nuū Yaā Dios, cuangoo i jín Pablo jín Bernabé. Te ni cacahān nihin de jín i jeē na cuñi nihin i jín jñuhun jeē maní Yaā Dios jín i.

<sup>44</sup> Te quivī ndétátú inga semana te je yajni ndihí ñayuu ñuu un ní candutútú i jeē cúni nahín i jñuhun Yaā Dios. <sup>45</sup> Te nuū ní cajini tēe hebreo jeē ní candutútú cuéhē ñayuu, te ni cacucuésún ni de, te ni cacahān de jeē násuu jñuhun vāha cúu jeē steén Pablo, te ni cacahān neé de nuū Pablo. <sup>46</sup> Yūcuán na te jéhnu-ni ni cacahān Pablo jín Bernabé, achí de:

Cánuú jéē xíhna gā nuū maá ní jeē cácuu ní jñáhan ñuu yō hebreo nacani ná jñuhun Yaā Dios, te tu ní cájetáhú ní. Núu súcuan te cuéchi maá ní cúu jeē ma nihín tahu ni cotecu ni ní cáni. Te vijna te quinacani ná jñuhun ya nuū ñayuu tāca nación jeē tu cájini i jñuhun



ya. <sup>47</sup> Chi suhva ni ndacu máá Jítóho yō jniñu nuū na jijnáhan ná:

Ni jeni ri rohó jée cúu ró nájñuhun luz jeē steén ini anuá ñayuu táca nación,

chi ní ñayivi steén rō jñuhun ri nuū ñayuu jeē jnáma ri i, áchí yá.

Achí de.

<sup>48</sup> Te ñayuu sñin nación, nuū ní cajini sōho i jñuhun yáha te ni cacusiñ teyí ni i. Te ni cacahān i jeē yōhyo vāha jñuhun cúu jñuhun máá Jítóho yō, te táca ñayuu jeē ní nacāji Yaā Dios i jeē cótecu i ní cāni, ni cacandíje i. <sup>49</sup> Te ni jitē jñuhun máá Jítóho yō cuahān ní región yūcuán.

<sup>50</sup> Te ñuu Antioquía cáyūcú ñahan cácuu nuū te cáchiñúhún ña Yaā Dios. Te tēe hebreo ni cascáhán de ña, te suni ni cascáhán de tēe cácujeñhu ñuu ún, te ni cajito xeēn i Pablo jíin Bernabé te nde ni cascúnu i de cuango de. <sup>51</sup> Te ni cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio. <sup>52</sup> Te vēsú súcuan te ñayuu cácandíje un ní cunuú Espíritu Santo jíin i, te cácusí teyí ni i.

### Jeē ní coyūcu Pablo jíin Bernabé ñuu Iconio

**14** Te ñuu Iconio ni quivícoo Pablo jíin Bernabé ini vehe i sinagoga jnáhan de hebreo. Te jíin jñuhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sñin nación ni cacandíje i. <sup>2</sup> Te jnáhan de hebreo jeē tu ní cácandíje, ni cascáhán de ñayuu sñin nación, te ni cajeni ni i jeē násūu ñayuu vāha cácuu ñayuu cácandíje. <sup>3</sup> Te ni caquendōo Pablo jíin Bernabé yūcuan cuehē gā quiví. Te jéñhu-ni ni canacani de jñuhun Jítóho yō, chi cácuahnu ni de ya jeē vāha quihñ jniñu un sáha ya. Te máá yá chi ni steén yā jeē iyó ndāá jñuhun jeē yóhyo vāha ni yā jíin i jeē cánacani de, chi ni jēhe ya jeē sáha de jniñu jéñhu jeē steén jeē cu-

jéñhu ya. <sup>4</sup> Te ñayuu ñuu un ní cacusiñ ni i jijnáhan i, sava i jíin tēe hebreo jeē tu cácandíje de Jesús, te sava ga i jíin tēe apóstol. <sup>5</sup> Te ñayuu hebreo jíin ñayuu sñin nación jíin tēe cácuu tohō ni casquijnáhan jñuhun jeē sáha xeēn jíin Pablo jíin Bernabé, jíin jée cuáha yuū xiní de núu. <sup>6</sup> Te ni cajini de jeē súcuan cácuu sáha, te ni cajinu de cuango de nde ñuu Lистра jíin ñuu Derbe ndañúu Licaonia jíin táca ñuu yajni yūcuán. <sup>7</sup> Te yūcuan ní canacani de jñuhun jeē jnáma ya yohó.

### Jeē ní cajēhe i yuū xiní Pablo ini ñuu Lистра

<sup>8</sup> Te ñuu Lистра néne iñ tēe jeē tu cúu caca, te tu jíca cuiti de chi nde quiví ní cacu de cácójó de. <sup>9</sup> Tēe un ní jini sōho de jñuhun jeē cahán Pablo, te ni jito vāha Pablo nuū de, te ni jini de jeē candíje vāha tēe un jée ndúvāha de. <sup>10</sup> Te ni cahán jee Pablo jíin de:

Ndocuññi, condichi rō, achí de.

Te ni scánda tēe un máá de ni nucōndichi-ni de, te ni quejée de caca de. <sup>11</sup> Te ni cajini ñayuu ún jniñu jéñhu jeē ni sáha Pablo, te ni cacahān jee i jíin yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájñuhun cájica tēe, achí i.

<sup>12</sup> Te ni cacahān i jeē Bernabé cúu yaā Júpiter, te Pablo cúu yaā Mercurio chi Pablo cúu tēe nácani jñuhun. <sup>13</sup> Te yajni yuñúu un néne veñuhun yaā Júpiter. Te máá sūtū jeññu ini veñuhun un ní quihin de stiquí jijnáhan ti te ni scutú de ti ita te vēji de nde nuū quiví i yuñúu, te máá de jíin ñayuu ñuu un cácuu de cahni de stiquí un sócō de nuū Bernabé jíin Pablo nuú. <sup>14</sup> Te Bernabé jíin Pablo, tēe cácuu apóstol, ni cajito de jeē súcuan cácuu ñayuu un sáha i, te ni candatá de sahna de jeē steén de jeē castívi ndasí i jeē casáha i súcuan. Te ni quenendava de

ni quivicoo de mēhñu ñáyuu cuehē ún, te ni cacana jee de:

<sup>15</sup>Tátā jijnáhan ní, ma sáha cuiti ni súcuan, chi sãhá suni tēe-ni cácuu ná nájñuhun máá ní jijnáhan ní. Te vējicoo ná nacani ná jñuhun váha Yaā Dios nuū ní, chi cahān na jíin ní jeē ma sáha ga ni táca jniñu yáha jéē tu ndé jéjñiñu cuiti, chi sa suhva na chíñúhún ní maá Yáa Dios, Yaā técu, Yaā ní sáha andiví jíin ñáyiví jíin ndute mar jíin táca gá jeē iyó níf cáhnu. <sup>16</sup>Te nde jenahán ní jēhe ya jñuhun jeē na sáha táca ñáyuu modo cácuu maá i. <sup>17</sup>Te vēsú súcuan te níni stéén yā ndese Yaā cúu ya, chi máni sáha ya jniñu váha jíin yó, chi scúun ya saū, te sáha ya jeē cúu váha itu yō, te jēhe ya jeē jíni ñúhún yó návāha caji yō te coo sñi ni yō, achí ndindúú de.

<sup>18</sup>Te vēsú súcuan ni cacahān de, te yōhyo uhū ni cajesi de nuū ñáyuu un návāha tú socō i stiquī un núu de jeē chíñúhún i ndindúú de.

<sup>19</sup>Yūcuán na te ni quecoo jecu tēe hebreo ñuu Antioquía jíin ñuu Iconio, te ni cascáhán de ñáyuu cuehē ún, te ni cajēhe i yuū xinī Pablo. Te ni caquenehen i de yatā núu ún, chi ni cajeni ni i jeē jé ni jihí de. <sup>20</sup>Te tēe cácuandíje ni cacondúú de Pablo, te ni ndonda Pablo, te ni ndívi de ini ñuu. Te inga quiví ni quihín de ichi cuahān de jíin Bernabé nde ñuu Derbe.

<sup>21</sup>Te ini ñuu un ní canacani de jñuhun jeē jnáma ya ñáyuu, te ni candíje cuehē ñáyuu ni casáha de. Te ni canandicó de cuanuhun de ñuu Litra jíin ñuu Iconio jíin ñuu Antioquía. <sup>22</sup>Te ni cahije ga ni ñáyuu cácuandíje yūcuan ní casáha de. Te ni castíhví ni de i jeē na cuñi nihin i jíin jñuhun ya, chi ni cacahān de jeē níni quiji cuehē jñundóho siquī yō te yūcuán na te jinū yō ñuu nuū ndácu Yaā Dios jniñu. <sup>23</sup>Te táca ñuu ni cajeni de tēe jéhnu cándiso jniñu condito de ñáyuu cácuandíje. Te ni cahíyo ndite ni Pablo jíin Bernabé nuū yā, te ni cajicān

tahú de, te ni cacahān de jíin máá Jítoho yō jeē na cóto ya ñáyuu ún chi cácuandíje i máá yá.

### Jeē cuanuhun tucu Pablo jíin Bernabé ñuu Antioquía ndañúú Siria

<sup>24</sup>Te ni cayāha de cuango de región Pisidia, te ni najinūcoo de región Panfilia. <sup>25</sup>Te ni canacani de jñuhun ya ini ñuu Perge región Panfilia, te sáa te cuango de ñuu Atalia. <sup>26</sup>Te yūcuan ní quivicoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahú ñáyuu nuū Yaā Dios jehē de jeē na chindéé ñáhán yá de jeē quíngoo de nacani de jñuhun. Te ni jinū jniñu, te ni najinūcoo de ñuu ún. <sup>27</sup>Te nuū ní najinūcoo de yūcuán, te ni casáha de junta jíin ñáyuu cácuandíje, te ni canacani de jñuhun táca ndese cuehē jeē váha ni sáha Yaā Dios jíin de, chi ni jēhe ya jñuhun jeē suni candíje ñáyuu táca nación jeē tu ní cájini i jñuhun ya. <sup>28</sup>Te ni caquendōo de yūcuan cuéhē quiví jíin ñáyuu cácuandíje.

### Siquī junta ñuu Jerusalén

**15** Yūcuán na te jecu tēe Judea ni quijicoo de ñuu Antioquía, te ni castéén de nuū táca hermano jeē núu tu sáha i circuncidar, nájñuhun cáhán ley jeē ni jēhe ya nuū Moisés, te tú na modo cácu i. <sup>2</sup>Te Pablo jíin Bernabé ni catejñáhan de jíin tēe ún, te tu ní cúndaā. Te jeē yūcuan ní candajñuhún de jeē quíngoo Pablo jíin Bernabé jíin jecu gā tēe cácuandíje un ndé ñuu Jerusalén, te yūcuán ndajñuhún de siquī jñuhun yáha jíin tēe cácuu apóstol jíin tēe jéhnu cándiso jniñu nuū ñáyuu cácuandíje yūcuán.

<sup>3</sup>Te ñáyuu cácuandíje un ní canachuhun íchí i de. Te ni cayāha de ichi Fenicia jíin Samaria, te canacani de jñuhun jeē suni ñáyuu táca gá nación jeē tu ní cájini i jñuhun ya, ni castóo i jniñu jeē tu íyó ndáa te ni cacandíje i Yaā Dios. Te yōhyo ni cacusñi ni táca

hermano jeē ní canihîn de jnūhun jeē súcuan ni cacandíje ñayuu ún.

<sup>4</sup>Te ni najinūcoo de ñuu Jerusalén, te ñayuu cácandíje yūcuan jíin tée apóstol jíin tée jéhnū cándiso jniñū nuū ñáyuu un, ní cacusiñi ni de jeē ní najinūcoo jnánhan de ún. Te Pablo jíin Bernabé ni canacani de tāca jnūhun ndese cuehē jeē váha ni sáha ya siquī jniñū jeē ní canacani de jnūhun ya. <sup>5</sup>Te sava tēe grupo fariseo jeē cácandíje ni candocuiñi te ni cacahān:

Ñayuu sīn nación jeē cácandíje i Jesús, jíni ñúhún jéē sáha i circuncidar nájñūhun casáha máá yó, te cánuú ndacu yó jniñū nuū i jeē na squícu i ley jeē ni jéhe ya nuū Moisés, áchí.

<sup>6</sup>Te tāca tēe apóstol jíin tāca tēe jéhnū cándiso jniñū nuū ñáyuu cácandíje, ni candutútú de junta návāha ndajnūhún de te sándaā de siquī jnūhun yáha. <sup>7</sup>Te tācá de ni cacahān de ndese cájeni ni de. Yūcuán na te ni ndocuiñi Pedro, te ni cahān de:

Hermano jijnáhan ní, je cájini váha ni jéē je íyó tiempo jeē ní nacáji Yaā Dios sāña jéē quihín na núú ñáyuu sīn nación te nacani ná jnūhun nuū i jeē jnáma ya i, návāha candíje i Jesucristo. <sup>8</sup>Te Yaā Dios chí jíni yā ndese cáa ánuá ndihi ñayuu, te ni steén yā jeē jetáhú yá i, chí suni ni jéhe ya Espíritu Santo nuū i jíjnáhan i, nájñūhun ni jéhe ya nuū maá yó. <sup>9</sup>Te inuú-ni sáha ya jíin yó jíin máá i, chí siquī jeē suni ni cacandíje i jnūhun jeē jnáma ya i, te jeē yūcuan ní sándoo ya anuá i nuū tāca cuéchi i. <sup>10</sup>Te vijnāna ¿naun cácuni ní ndacu ní jniñū jeē na squícu i ley un? Chí tu nújnahan ni Yaā Dios jeē súcuan. Chí cácuni ní tee ní jniñū yí yáha siquī ñáyuu cácandíje ún, te ni tāca jíi yō tu ní cácundeyí de squícu de, te ni máá yó. <sup>11</sup>Chí sa suhva cácandíje yó jéē jnáma ya yohó súcuan-ni siquī jeē yóhyo váha ni maá Jítoho yō Jesús

jíin yó, te suni súcuan-ni jnáma ya maá i, nasūu síquī jeē squícu i ley un, áchí de.

<sup>12</sup>Yūcuán na te tēe cuehē un ní cacuu nayúú de, te ni cajini nahín de jnūhun cácahān Bernabé jíin Pablo. Chí ni castūhún de jeē ni jéhe ya poder jeē ní casáha de tācá jniñū jéhnū jeē steén jeē cujéhnū ya, ni cajito ñayuu tācá nación jeē tu cájini i jnūhun ya. <sup>13</sup>Te nuū ní jínu ni cacahān Pablo jíin Bernabé, te ni cahān Jacobo:

Hermano jijnáhan ní, cuni sōho ní na cáhán na. <sup>14</sup>Ni nacani Simón Pedro jnūhun ndese ni quejéé nuú jniñū jeē jnáma Yaā Dios ñayuu tācá nación jeē tu cájini i jnūhun ya, chí suni mēhñu máá i nacáji ya ñayuu jeē ndúu i ñayuu maá yá. <sup>15</sup>Te quíjnáhan jnūhun ni cahān de yáha jíin jnūhun ni catee tēe ni canacani jnūhun Yaā Dios nde jenahán jeē yosó núú tútu ii:

<sup>16</sup>Achí Yáā Dios:

Nájñūhun ni cotúú vehe David cúu jeē tuá ndácu sēhe yucūn de jniñū, nájñūhun ni ndacu máá de jniñū nde jenahán.

Te iin quiví te ndee rí

te jeē nasáha ri vehe de cúu jeē sáha ri jeē nandacu Sēhe yucūn de jniñū.

<sup>17</sup>Súcuan sáha ri návāha tāca gá ñayuu na nánducú i ruhū

nde jíin ñáyuu tācá nación jeē tu cájini jnūhun ri, tācá i jeē cána ri i candíje i ruhū.

<sup>18</sup>Súcuan cáhán máá Jítoho yō, te nde jenahán ní steén yā jnūhun yáha núú ñáyuu.

Achí tutu ii.

<sup>19</sup>Jeē yūcuan jéni ni na jéē ñáyuu tāca gá nación jeē ní castóo i jniñū jeē tu íyó ndáa te ni cacandíje i máá Yáā Dios, ma stáhān yō i jeē ndácu yó jniñū jeē squícu i ley Moisés. <sup>20</sup>Chí sa suhva na tēe yó carta quihín nuū i jeē ma cáji i ndeyu jeē ni sócō nuū ídolo, te ma cáca jnéni i, te ma cáji i cūñu quití jeē jihí jeē tu jéti ñiñi

tī, te ni ma cáji i niñī. <sup>21</sup> Jnūhun yáha-ni tee yó quíhīn nuū i nájnūhun je cástéén nde jenahán. Chi nde jenahán je íyó tée cástéén jnūhun ley jeē ni jéhe ya nuū Moisés, te ndijnahan quivī ndétātu cácahu de ley un ini vehe īi sinagoga tācá űuu, áchí Jacobo.

<sup>22</sup> Yūcuán na te tēe apóstol, jíin tēe jéhnū cándiso jníñū, jíin ndivii űayuu cácañdije, ni cacundaā ni de jeē nácāji de tēe quingoo jíin Pablo jíin Bernabé nde űuu Antioquía. Te tēe ni canacāji de un cácuu Silas jíin Judas, te inga síhvī de cúu Barsabás. Te cándiso jníñū de nuū tācá hermano cácañdije. <sup>23</sup> Te ni cajendēca de carta jeē cahán suhva:

Máá ná cácuu tēe apóstol, jíin táca tēe jéhnū cándiso jníñū nuū űayuu cácañdije, jíin táca gá hermano yō. Te cátee ná carta yáha cuájeē nuū ni jíjnáhan ní, hermano, jeē cácuu ní űayuu síin nación jeē cáyūcu ní űuu Antioquía jíin Siria jíin Cilicia. Cuandeyí ni ni jíjnáhan ní. <sup>24</sup> Ni cajini jnūhun ná jéē ní quendacoo sava jnáhan ná yáha ní jengoo nuū ní, te jíin jnúhun jeē ní cacahān de te ni casáha jeē ní canacani ndasí ni ní, te ni cacuxí ni ní, chi cándacu de jniñū jeē sáha ní circuncidar jíin jéē squícu ní jniñū cáhán ley jenahán jéē ni jéhe ya nuū Moisés. Te nasūu sáña ní cátají tēe un jéē jeē de nuū ní. <sup>25</sup> Jeē yúcuán ní cajeni ní ná, te inuú-ni ni cacundaā ni ná, te ni nacāji ná tēe cuajēcoo nuū ni jíin űū hermano yō jeē maní yō jíin, cúu Bernabé jíin Pablo. <sup>26</sup> Te ndindúú de je ni catana de máá de nuū jnúndóho vēsú na cúu de jeē siquí jnūhun Jitoho yō Jesucristo. <sup>27</sup> Núu súcuán te cátají ná Judas jíin Silas jeē nuū ní, te suni nájnūhun cáhán carta yáha suni súcuán castūhún de nuū ni jíjnáhan ní. <sup>28</sup> Chi máá Espiritu Santo ni steén yā ĩin modo jeē ní cacundaā ni na jéē ma tēe ná táca jniñū yíí ley Moisés siquí ní, chi máá-ni jniñū yáha jéē cánuú gá: <sup>29</sup> Ma cáji ni táca jéē

ní casocō nuū ídolo, ni ma cáji ni níñī ni quiti jeē jihí jeē tu jéti níñī tī, te ma cáca jnéni ní. Te vāha squícu ní núu tuá sáha ní táca jéē yáha. Súcuán na cóo te sándeýí ni ní, áchí carta.

<sup>30</sup> Yūcuán na te tēe quingoo un cuāngoo de nde űuu Antioquía. Te ni cacana de xiní űayuu cácañdije ni candutútú de junta, te ni cajēhe de carta un núu i. <sup>31</sup> Te ni cacahu i, te ni candusiñi ni i jeē ni níhīn i jnūhun ndeyí ni nuū carta ún. <sup>32</sup> Te suni tēe cácanani jnūhun Yaā Dios cácuu Judas jíin Silas, te jíin cuéhē jnūhun ni cacahān de te ni candundeyí ni tācá hermano un, te ni cahije ga ni i jíin jnúhun ya. <sup>33</sup> Te ni coyūcú de yūcuán jecu quivī. Yūcuán na te hermano yúcuán ní canacuatahú i nuū de jeē quínūhun de nuū tēe jeē ní catají de. <sup>34</sup> Te Silas ni nujnahan ni de ni quendōo de yūcuán. <sup>35</sup> Te suni ni caquendōo Pablo jíin Bernabé űuu Antioquía, te máá de jíin sava ga tēe ni castéén de te ni canacani de jnūhun vāha máá Jítoho yō.

### Jeē quihín Pablo inga jínu nacani de jnūhun ya

<sup>36</sup> Te ni cuu ga quivī, te ni cahān Pablo jíin Bernabé:

Vijna te na quícondēhe yó tācá hermano yō ndijnahan űuu nuū ní nacani yó jnúhun máá Jítoho yō, na cóndēhe yó ndese cáhiyo i, áchí de.

<sup>37</sup> Te Juan jeē suni nání de Marcos, cúni Bernabé jeē quihín tēe un jíin de. <sup>38</sup> Te tu ní cúni Pablo jeē quihín tēe un jíin de, chi nde Panfilia ni cusñin Marcos nuū Pablo jíin Bernabé, chi tuá ni chindéé űáhán de ndindúú tēe un siquí jniñū ya nde saá. <sup>39</sup> Te nahán ní candajnūhun Pablo jíin Bernabé, te tu ní cácuundaā ni de siquí Marcos, te ni cacusiñin de. Te Bernabé ni jeca de Marcos, te ni quívicoo de barco cuangoo de nde Chipe, űuhun jeē íne síin nuū ndúte.

<sup>40</sup> Te Pablo ni nacāji de Silas quihñ jín de. Te tǎcǎ hermano cǎcandǎje ni cajicǎn tahú de nuú maá Jítóho yō jeē siquǎ jeē váha ni yā te na chǎndéé ñáhán yá Pablo. Te cuahǎn Silas jín Pablo. <sup>41</sup> Te ni cajica cuu de nǎí Siria jín Cilicia. Te tǎca grupo ñayuu cǎcandǎje ni cahije ga ni i jín jnúhun ya ni casáha de.

### Jeē cuahán Timoteo jín Pablo jín Silas

**16** Yūcuán na te sáa te ni jinū Pablo jín Silas ñuu Derbe jín ñuu Lистра. Te yūcuan néne ñn tēe suchí cándǎje, nání i Timoteo. Sēhe yǎ ñn ñahan hebreá cúa i, te ñahan cándǎje cúa ña. Te tǎtá i chi tēe griego cúa de. <sup>2</sup> Te tǎcǎ hermano ñuu Lистра jín ñuu Iconio cǎje-jnúhún de Timoteo. <sup>3</sup> Te cúní Pablo condeca de Timoteo quihñ de jín i. Te ni cahǎn Pablo jeē quihñ i cuu i circuncidar, chi tu cúní Pablo jeē cahǎn ñayuu hebreo jeē tu ní squǎcu Timoteo costumbre un, chi ndihñ ñayuu cǎjini i jeē tēe griego cúa tǎtá i. <sup>4</sup> Te tǎcǎ ñuu nuú cuángoo de te ni cacastühún de nuú ñáyuu cǎcandǎje jeē na squǎcu i máá jniñu jeē ní casándaá tēe apóstol jín tǎca tēe jéhnu cáyūcú ñuu Jerusalén jeē cándiso jniñu nuú ñáyuu cǎcandǎje. <sup>5</sup> Te ñayuu cǎcandǎje ni cahije ga ni i. Te ndijnahan quivǎ ni cacandǎje cuehē gǎ ñayuu.

### Jeē ní jito ndijin Pablo ñn tēe ñuu Macedonia

<sup>6</sup> Te tu ní jéhe Espírítu Santo yā jnúhun jeē nǎcani de jnúhun ya nǎí Asia. Jeē yūcuan ní cayáha de ichi Frigia jín Galacia cuangoo de. <sup>7</sup> Te ni jinūcoo de nuú quijnáhan Misia jín Bitinia. Te cǎcuni de quingoo de Bitinia, te máá Espírítu Jesús tu ní jéhe ya jnúhun quingoo de. <sup>8</sup> Te ni cayáha de ñn lado Misia cuangoo de ñuu Troas jeē ñne yajni yumar. <sup>9</sup> Te ñn jecuáa te nájnúhun ñn jēni ni jito ndijin Pablo, te ni jito de jeē índichi ñn

tēe ñuu Macedonia nuú de cǎhán ndahú jín de: Nehen ní ñuu ná Macedonia te chindéé ñáhán ní sǎña jijnáhan ná, áchí. <sup>10</sup> Te súcuan ni jito ndijin de. Yūcuán na te sǎña, Lucas, ni quijnáhan ná jín de. Te ni casátühva ná jín de jijnáhan de jeē quingoo ná Macedonia, chi ni cajini cají ná jeē maá Yáa Dios tǎjǎ yá sǎña jijnáhan ná jēe castühun ná nuú ñáyuu yūcuan jnúhun jnama ya i.

### Jeē ní coyūcu Pablo jín Silas ñuu Filipos

<sup>11</sup> Te jín barco ni quendacoo ná ñuu Troas, te cuangoo ndaā-ni ná ndé Samotracia, ñuhun jeē ñne sñn nuú ndúte. Te ñnga quivǎ ni jinūcoo ná ñuu Neápolis. <sup>12</sup> Te yūcuan ní quendacoo ná, te ni jinūcoo ná ñuu Filipos jeē cúa ñuu cujéhnu ga ñne Macedonia, chi máá ñáyuu ñuu Roma ni casáha i ñuu i ún. Te ni coyūcu ná ñuu Filipos jecu quivǎ. <sup>13</sup> Te ñn quivǎ ndétātu ní quendacoo ná ñuu ún, te ni jengoo ná ñn yuyúte, chi yūcuan cúa ñn lugar nuú cǎjicǎn tahú ñayuu. Te ni cacucōo ná, te ni canacani ná jnúhun ya nuú tǎcǎ ñahan ní canataca yūcuán. <sup>14</sup> Te ñn ña nání Lidia jeē véji ña ñuu Tiatira, xico ña sahma ndihí jēe yáhu ga ndeé. Te máá ña níní chíñúhún ña Yáa Dios. Te ni jini sōho ña jnúhun cǎnacani ná, te máá Jítóho yō Jesús ni sáha ya jeē ní candǎje ña jnúhun jnáma ya ña jeē ní cǎhán Pablo. <sup>15</sup> Te ni jendute ña nde jín ñáyuu cáyūcú vehe ña, te ni cahǎn ndahú ña jín ná:

Núu cǎcucáhnu ni ni jēe candǎje ndije ná máá Jítóho yō, te cuajeē ní coyūcu ní vehe ná, áchí ña.

Te ni cana fuerza ña sǎña jijnáhan ná.

<sup>16</sup> Te ñn quivǎ te cuangoo tucu ná suu lugar nuú jéngoo ñayuu cǎjicǎn tahú. Te ni canajnáhan ná jín ñn sūchi shíh jēe ñúhun tachí ini i, te máá un sáha jeē cǎhán i tǎcǎ ndese coo te cúndaá jeē cǎhán i. Te sūchí un ní cajeen patrón i,

návāha nihin de cuehē xūhun síquī jeē cástūhún i nuū iin iin ñayuu ndese coo ichi núú. <sup>17</sup> Te sūchí ni ndíquin i sãña jíjnáhan ná cána jee i:

Tēe yáha cájejnínu de nuū Yaā Dios, Yaā cujéhnū téyí, te cácastūhún de ndese cácu ní núú cuéchi ní jíjnáhan ná, áchí i.

<sup>18</sup> Te cuehē quiví ni cuu súcuan te nde ni jnaniní ni Pablo. Te ni ndió cóto de nuū i, te ni cahān de jíin táchí ún:

Jíin poder maá Jesucristo ndácu ri jniñu nuū rō jeē na quéndā rō ini i quihin rō, achí de.

Te hora un ní quenda-ni cuahān.

<sup>19</sup> Yūcuán na te ni cajini patrón i jeē ma nhín gā i xūhún cuu de, te jeē yúcuan ní cajini de Pablo jíin Silas cuangoo jíin de nde vehe juzgado nuū cáyūcu tóhō. <sup>20</sup> Te ni cajeni ún de nuū juez, tēe cáśandaā jniñu, te ni cacahān:

Tēe hebreo cácuu tēe yáha, te cástónā de ñayuu ñuu yō cúvaā i. <sup>21</sup> Te cájequin de inga costumbre jeē ma cúu cuatáhú cuiti yō, ni ma cúu sáha yó, chi tu jéhe ley nación yō jnūhun, chi ñayuu nación Roma cácuu yó, áchí.

<sup>22</sup> Te suni ni candonda ñayuu síquī Pablo jíin Silas. Te tēe cácuu juez ni candacu de jniñu jeē na quéndā sahma ndindúú de te cani yujnu síquī de. <sup>23</sup> Te nuū ni jñu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndindúú tēe ún. <sup>24</sup> Te jeē súcuan ni tahū jniñu nuū tēe ndíto vecāa te ni squíví de Pablo jíin Silas nde ichi íni gā, te ni squíví jehē de t̄isin yujnu ndéé yaū te ni cajihni de.

<sup>25</sup> Te nuū ní cuu sava ñuú, te cájicān tahu Pablo jíin Silas, te cájita de yaa iñ nuū maá Yáā Dios. Te ñayuu cáhiin jíin de vecāa un ní cajini nahín i. <sup>26</sup> Te sanaa-ni te ni jnāa nihin téyí, te nde nuū cimientō vecāa un ní canda. Te ni canune-ni yéhyí vecāa ún, te ni canandajī-ni cadena jeē cánuhni táca

ñáyuu ún. <sup>27</sup> Te ni natahū ni tēe ndíto vecāa, te ni jito de jeē núne yéhyí vecāa ún. Te ni tava de espada jeē cáhni de máá de núú, chi ni jeni ni de jeē ndivii cuiti ñayuu cáhiin vecāa un cuángoo i. <sup>28</sup> Te ni cana jee Pablo:

Ma cáhni ni máá ní, chi cáhiin ndihi ná, áchí de.

<sup>29</sup> Yūcuán na te máá tēe ndíto vecāa ni cana de jeē na quíndeca i ñuhūn, te yachí ni quíví de ini vecāa. Te ni jecuiñi yití de nuū Pablo jíin Silas, te quísi i de jeē yūhú de. <sup>30</sup> Te ni quenehen de Pablo jíin Silas, te ni cajnūhún de:

Tátā, ¿na vé cánuú sáha ná te jnama ya sãñá? áchí de.

<sup>31</sup> Te ni cacahān de jíin tēe ún:

Candíje ní táca jēē ni sáha Jitoho yō Jesucristo jehē ní te cácu ní, te suni súcuan cácu ndihi ñayuu cáyūcú vehe ní, áchí de.

<sup>32</sup> Te ni canacani de jnūhun máá Jítoho yō nuū tēe un jíin núú táca ñáyuu cáyūcú vehe de. <sup>33</sup> Te suu máá jecuaā yúcuan ní nacate tēe ndíto vecāa un núú ní catují Pablo jíin Silas jeē ní cacani yujnu síquī de. Yūcuán na te ni jendute de jíin ndihi ñayuu cáyūcú vehe de. <sup>34</sup> Te ni jeca de Pablo jíin Silas cuahān de jíin vehe de, te ni jēhe de staā ni cayejí de, te cácusī ni ndihi de vehe de jeē ní candíje de Yaā Dios.

<sup>35</sup> Te nuū ní cundijin, te tēe cácuu juez ni catají de policía cuangoo jíin jnūhun jeē na siáá tēe ndíto vecāa un Pablo jíin Silas quingoo de. <sup>36</sup> Te tēe ndíto vecāa un ní castūhún de jnūhun yáha núú Pablo:

Tēe cácuu juez ni catají de jnūhun vēji jeē na siáá na nhín quíngoo ní. Núu súcuan te quendacoo ní quihin ní, te cuandeyí ni ní, áchí de.

<sup>37</sup> Te ni cahān Pablo jíin policía:

Cuehē ñayuu ni cajito i jeē ní cacani de sãñá, te ni tu ní cáśandaā de xihna gā núu ndaā jeē iyó cuéchi ná. Te ni cachuhun de sãñá vecāa, vēsú cácuu ná

séhe nación Roma, te íyó ley jeē ma cúu sáha súcuan jíin ñáyuu cácuu séhe nación Roma. Te vijna ¿á quenehen sáhi de sãña cácuu de naún? Ma cúu cuiti. Na quícoo máá de quenehen de sãña jíinánhan ná, áchí Pablo.

<sup>38</sup>Te ni canandió cóo policia ni castühún de jñuhun yáha núu tée cácuu juez, te ni cayühú de jeē ní cajini sōho de jñuhun jeē séhe nación Roma cácuu Pablo jíin Silas. <sup>39</sup>Te ni quecoo tée cácuu juez ún, te yōhyo ni cacahān ndahú jíin Pablo jíin Silas jeē na cóne cáhu ni de. Te ni caquenehen de vecāa ún, te ni cacahān ndahú jíin de jeē na quéndacoo de ñuu un quíngoo de. <sup>40</sup>Yūcuán na te ni quendacoo de vecāa, te ni jengoo tucu de vehe Lidia, te ni cacahān de jñuhun ndeyí ni jíin táca hermano. Te ni caquihín de ichi cuangoo de.

### Jeē ní cacuvaā ñayuu Tesalónica

**17** Te Pablo jíin Silas ni cayāha de ñuu Anfípolis jíin ñuu Apolonia cuangoo de, te ni jinūcoo de ñuu Tesalónica nuū iyó iin vehe ii sinagoga jnāhan de hebreo. <sup>2</sup>Te ni coyūcú de yūcuan únī semana, te tāca quívī ndétātu jéhén Pablo vehe ii sinagoga, nájñuhun sáha sáha de, te ni nacani de jñuhun ya nuū tée un. <sup>3</sup>Te jíin jñuhun cáhán tutu ii ní steén de jeē súcuan ni jini ñuhún ndoho Cristo jeē cúu yā te natecu yā. Te ni cahān de:

Jñuhun nácani ná núu ni cúu jñuhun Jesús, te máá yá cúu Cristo, Yaā ní jeni Yaā Dios jeē jnáma ya yohó, áchí de.

<sup>4</sup>Te ni cacandíje sava jnāhan de hebreo jíin cuéhē ñayuu griego jeē cáchiñuhún i Yaā Dios, jíin cuéhē ñahan cácuu nuū, te ni nduu inuú ni i jíin Pablo jíin Silas. <sup>5</sup>Yūcuán na te yōhyo ni cacucuésún ni jnāhan de hebreo jeē tu cacandíje, te ni castútú tée cunéé jéé cájica cúxí-ni, te ni quejéé cácana ndee cuangoo. Te súcuan ni casaca núu de

xinī ñáyuu ñuu ún. Te ni jengoo de vehe Jasón cánanducú de Pablo jíin Silas jeē jñí de tée un quíndeca de nuū ñáyuu cuéhē. <sup>6</sup>Te tu ní cánanihín de, te ni cañuhun de Jasón jíin sava ga hermano cuangoo de jíin núu tohó ñuu ún. Te jeē síquí Pablo jíin Silas ni cacana jee de:

Téee jeē castfvi xínī ñáyuu niñ ñáyiví, je ni quecoo de nde yāhá. <sup>7</sup>Te máá Jasón ni jēhe núu vehe cáyūcu tée ún. Te tée ún tu cájetáhú de ley máá rey yohó ñáyuu Roma, chí sa suhva cácahān de jeē cá-jetáhú de nuū inga rey jeē naní Jesús, áchí de jíinánhan de.

<sup>8</sup>Te ñayuu jíin tée cácuu tohó ni cajini sōho i jñuhun yáha, te ni cacuvaā i síquí. <sup>9</sup>Te Jasón jíin táca gá hermano ni castóo de xūhún de, chí ni cacahān tohó un jíin de jeē nde núu tají de Pablo jíin Silas quingoo de inga ñuu, yūcuán na te nacuāha tohó un xūhún de. Te súcuan te ni casiáá de Jasón jíin táca gá hermano cuangoo de.

### Jeē ní coyūcu Pablo jíin Silas ñuu Berea

<sup>10</sup>Yūcuán na te tācá hermano un, yachī-ni ni cascáca de Pablo jíin Silas jecuaā un, cuángoo de nde ñuu Berea. Te nuū ni jínūcoo de yūcuán, te ni quívicoo de vehe ii sinagoga jnāhan ñuu de hebreo. <sup>11</sup>Te jnāhan ñuu de hebreo cáyūcu yūcuan, vāha ga ni máá de vēsú jnāhan ñuu de hebreo cáyūcú ñuu Tesalónica, chí vāha ni cacusií ni de jíin jñuhun ni cacahān Pablo jíin Silas. Te ndijnahan quívī cánanducú yúcún de nuū tútu ii núu súcuan cáhán chí tuú. <sup>12</sup>Jeē yūcuan ní cacandíje cuéhē jnāhan ñuu de hebreo te suni nde jíin cuéhē ñayuu griego, cúu téee cúu ñahan cácuu nuū. <sup>13</sup>Te jnāhan ñuu de hebreo cáyūcú ñuu Tesalónica ni cajini jñuhun de jeē suni nde ñuu Berea nácani Pablo jñuhun Yaā Dios, te ni caquihín de ichi cuangoo de Berea, te suni yūcuan ní castónnda de ñayuu síquí

Pablo. <sup>14</sup>Yücuán na te t̄acá hermano ni cataj̄-ni de Pablo cuahān de nde yumar. Te ni ndōo Silas j̄ín Timoteo ñuu Berea. <sup>15</sup>Te jecu hermano ni cajendēca de Pablo nde ñuu Atenas. Te ni cahān Pablo j̄ín de jeē cahān de j̄ín Silas j̄ín Timoteo jeē na quíngoo yach̄i de nuū Pablo. Te vendicoo de ñuu Berea.

### Jeē ni íne Pablo ñuu Atenas

<sup>16</sup>Te níní ndētu Pablo jeē jinúcoo Silas j̄ín Timoteo nuū de ñuu Atenas, te ni jini de jeē ñáyuu ñuu ún yōhyo cáchiñúhún i ídolo, te ni nacani cuhyá ni de. <sup>17</sup>Te ini vehe i sinagoga ni cahān de jnūhun ya j̄ín jnāhan ñuu de hebreo j̄ín táca gá tēe cáchiñúhún Yāa Dios. Te suni táca quiv̄i ni nacani de jnūhun ya nuū táca ñáyuu cáhiin nuū yáhu. <sup>18</sup>Te sava tēe cáscuáha jnūhun jeē castéén grupo epicúreo, j̄ín inga sava tēe cáscuáha jnūhun jeē castéén grupo estoico, ni caquejéé cácahān j̄ín Pablo. Te sava ni cacahān:

¿Na jnūhun cáhán tēe t̄lólhlé yāha? áchí.

Te sava ga de ni cacahān:

Tēe nácani jnūhun táca yāa jeē tu cánevāha yó cúu de, áchí.

Súcuan ni cacahān de, chí nácani Pablo jnūhun vāha Jesús jeē ní natecu yā mēhñu ndíyí. <sup>19</sup>Te ni cajeca de Pablo cuangoo de, te ni jinúcoo de nde lugar nuū naní Areópago nuū cándutútú ñáyuu cándacu jniñu, te ni cacahān de:

Cácuni ná cachi ni núu na jnūhun jeē jēe steén ni. <sup>20</sup>Chi cáhán ni jnūhun jeē ná tu cuni cuiti na j̄ijnáhan ná, te jeē yúcuan cácuni ná jecūhun ni na síquī táca jnūhun yáha, áchí j̄ín de.

<sup>21</sup>Chi táca ñáyuu ñuu Atenas j̄ín táca ñáyuu inga ñuu jeē cáyūcu núu i yücuán, tuá na inga jniñu cácusī gā ni i j̄ín chí máa-ni jeē cuni nahín i jnūhun jeē chí jēe cahán i jnūhun jeé.

<sup>22</sup>Te índichi Pablo mēhñu ñáyuu ní cándutútú núu naní Areópago, te ni cahān de:

Tēe ñuu Atenas j̄ijnáhan ní, j̄ito ná jēe yóhyo cáchiñúhún ní yāa máa ní. <sup>23</sup>Chi ni jica nuu ná, te ni jecondēhe ná nuū jeē cáchiñúhún ní, te ni jito ná iin altar jeē yosó jnūhun yáha: Yāha cúu altar yāa jeē ná tu cuni yō jnūhun ya, áchí. Te máa Yāa un jēe cáchiñúhún ní, vesú ná tu cuni ni jnūhun ya, suu jnūhun Yāa un cúu jeē nácani ná núu ní vijna.

<sup>24</sup>Chi Yāa un cúu Yāa jeē ni sáha ñayiv̄i j̄ín táca ndih̄i jeē iyó, te máa yá cúu Jitoho andiv̄i j̄ín ñayiv̄i, te tu ndéé yá ini veñūhun cásaña ñayuu. <sup>25</sup>Te ni tu cúmani ni iin nuū yā jeē cuáha ñayuu nuū yā, chí máa yá sáha jeē técu ñayuu, j̄ín jēe stáa i tach̄i i, j̄ín jēe nihín i ndih̄i jeē j̄íní nūhún i.

<sup>26</sup>Te ni sáha ya jeē chíj̄i iin-ni yucūn ni tahū táca ñáyuu jeē ní nduu táca nación, návāha coyūcú i ní cáhnu ñayiv̄i, te ni tana yā cuiyā cotecu ñayuu j̄ín lugar coyūcú i j̄ijnáhan i. <sup>27</sup>Te súcuan ni sáha ya chí cúní yā jeē nanducú yó yā, chí núu nanducú yó yā te cuni yō jeē iyó yá, chí yajni-ni cúu ya j̄ín iin yó. <sup>28</sup>Chi máa yá sáha jeē iyó yó j̄ín jēe cátecu yō j̄ín jēe cácanda yō. Chí suni súcuan ni cacahān sava tēe ñuu ni jēe cátava yaa: Suni nde yucūn máa yá cácuu yó, áchí. <sup>29</sup>Te núu yucūn Yāa Dios cácuu yó, te ma cáni ni yō jeē ídolo oro chí plata chí yūu cúu ya, chí cájeni ni ñayuu jeē súcuan cáa ya, te súcuan cásvāha i ídolo. <sup>30</sup>Te ni jendeyí ni yā síquī jeē tu ní cájecūhun ni i ní ndé saá, te vijna chí ndácu ya jniñu jeē ñáyuu ní cáhnu ñayiv̄i na nácani ni i jeē stóo i cuēchi i. <sup>31</sup>Chi Yāa Dios, je ni jeni ya quiv̄i jeē ndaā sándaā yā síquī ñayuu ñayiv̄i, te ni jeni ya Jesús jeē máa yá sándaā. Te je ni steén cají Yāa Dios nuū táca ñáyuu jeē máa yá ni jeni Jesús, chí ni nastécu yā Jesús, áchí Pablo.



<sup>32</sup>Te jeē ní cajini sōho i jnūhun jeē nátecu ndīyi te sava i ni cacahān catá i, te sava ga i ni cacahān i:

Vāha te núu cuu cuni sōho na jnūhun cáhān ni ndé inga jínu, áchí i.

<sup>33</sup>Te ni quenda Pablo mēhñu ñáyuu un cuahān de. <sup>34</sup>Te cuahān jecu ñayuu jínu Pablo, te ni cacandíje. Te iin de cúu Dionisio, tēe ndútútú jínu tēe cácujeñhu cásaħa junta nuū naní Areópago, jínu iin ñahan naní Dámaris, jínu jecu ga i.

### Jeē ni íne Pablo ñuu Corinto

**18** Yūcuán na te ni quenda Pablo ñuu Atenas, te cuahān de nde ñuu Corinto. <sup>2</sup>Te yūcuan ní jito de nuū iin jnáhan ñuu de hebreo, naní Aquila, te tēe región Ponto cúu de. Te sáá jecu-ni tiempo ni quee de jínu ñasihí de Priscila jeē ní quenda de Italia, chi rey Claudio ni ndacu de jniñu jeē na quéndacoo tāca ñáyuu hebreo ñuu Roma, jeē cúu capital Italia. Te ni jinū Pablo vehe Aquila jínu Priscila jeē cáyucú de ñuu Corinto. <sup>3</sup>Te suni jniñu sáħa tēe un sáħa Pablo, chi cáquicu de ñii cuu vehe. Te ni quendō Pablo jínu tēe ún, te ni casájniñu de. <sup>4</sup>Te tāca quívī ndétātu ní jehēn Pablo vehe iī sinagoga ni nacani de jnūhun ya, te ni nducú ndéyí de jeē na cándíje ñayuu jnūhun Jesús, cúu jnáhan ñuu de hebreo jínu ñáyuu tācá nación jeē tu ní cajini i jnūhun ya.

<sup>5</sup>Te ni jinūcoo Silas jínu Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáħa Pablo, chi máni jnūhun ya nacani cájí de nuū ñáyuu cácuu jnáhan de hebreo, jeē maá Jesús cúu ya Cristo, Yaā jeē cáñūhun ni i quiji ya. <sup>6</sup>Te ni caquejéé i ni cacahān i siquī jnūhun ún, te ni cacahān xeēn i nuū Pablo. Te maá de ni caja de sahma de jeē cúu seña jeē stóo de i jínu cuéchi i, te ni cahān de jínu i:

Cuēchi maá ní cúu jeē jnahñu ndetū ni núu súcuan, te nasūu cuéchi maá ná

cúu. Nde vijna te quihīn na núu ñáyuu tācá nación jeē tu cájini i jnūhun ya, te nacani ná jnūhun ya nuū i, áchí de.

<sup>7</sup>Te ni quenda de ini vehe iī sinagoga, te ni jinū de vehe iin tēe naní Justo ni condee de. Te chíñúhún tēe un Yáā Dios, te vehe tēe un néne yajni xiin vehe iī sinagoga. <sup>8</sup>Te Crispo, tēe cújéñhu ini vehe iī sinagoga, ni candíje de maá Jítoho yō nde jínu ndihí ñayuu vehe de. Te cuehē ñayuu ñuu Corinto ni cajini nahín i jnūhun nacani Pablo, te ni cacandíje i, te ni cajendute i. <sup>9</sup>Te iin jecuáā ni sáħa maá Jítoho yō jeē ní jito ndijin Pablo yā ni cahān yā jínu de:

Ma yūhu ró ni ma cási rō yuhu ró, chi níní nacani ró jnūhun ri. <sup>10</sup>Chi ndíto ri rohó, te ma cúu sáħa xeēn ni iin ñayuu jínu ró. Nacani ró jnūhun ri, chi coo cuehē ñayuu candíje jnūhun ri ñuu yáħa, áchí yá.

<sup>11</sup>Te ni condee Pablo yūcuán iin cuiyā yosáva ni steén de jnūhun Yaā Dios nuū ñáyuu ún.

<sup>12</sup>Te ná cúu Galión gobernador Acaya, te ñayuu hebreo jeē cúu jnáhan ñuu Pablo, iin cáħnu-ni ni candonda i siquī Pablo. Te ni cajeca i de cuango i jínu de nde vehe juzgado. <sup>13</sup>Te ni cacahān i jínu Galión:

Tēe yáħa yōhyo scáhān de tāca ñáyuu jeē inga modo chíñúhún i Yaā Dios, suu iin modo jeē cúu contra siquī ley, achí i.

<sup>14</sup>Te quejéé Pablo cahān de núu, te ni cahān-ni Galión jínu ñáyuu hebreo un:

Ñayuu hebreo jijnáhan ró, núu iin cuēchi xeēn cúu, te cánuú cuni nahín rí jnūhun cácaħān rō núu. <sup>15</sup>Te tuú, chi máni siquī jnūhun-ni jínu siquī ley maá ró jínu siquī tēe cástéén cúu. Te na sán-daā maá ró siquī jniñu yáħa, chi tu sán-daā rí siquī maá iin jeē súcuan-ni, áchí de.

<sup>16</sup>Te ni cahān de nuū i jeē na quíngoo i fuera. <sup>17</sup>Yūcuán na te ñayuu griego ni cajni i Sóstenes, tēe cújéñhu ini vehe iī

sinagoga, te máá fuera yehyí vehe juzgado ni cacani i de, te Galión chi tu ní sáha cuiiti de cuenta.

**Jeē ní najinū Pablo ñuu Antioquía,  
te cuahān de vuelta unī jeē  
nacani de jnūhun ya**

<sup>18</sup>Te cuehē gā quivī ni condee Pablo ñuu Corinto. Yūcuán na te ni nacuatáhú de nuū tācá hermano yúcuan, te Aquila jíin ñasihí de Priscila cuango de jíin Pablo, te ni jinūcoo de ñuu Cencrea. Te yúcuan ní saté lii Pablo xini de, te súcuan stéén de jeē squícu de nuū Yaā Dios jeē ni jéjñuhun de. Te ni quivicoo de barco jíin Aquila jíin Priscila quihīn de región Siria. <sup>19</sup>Te ni jinūcoo de ñuu Efeso, te yúcuan ní caquendōo Aquila jíin Priscila. Te ni jehēn-ni Pablo vehe iī sinagoga, te ni cahān de jnūhun ya jíin jnāhan ñuu de hebreo jeē cándutútú yúcuan. <sup>20</sup>Te ni cacahān ndahú i jíin de jeē na cōnēne de jecu gā quivī jíin i, te tu ní jéhe de jnūhun. <sup>21</sup>Chi ni nacuatáhú de nuū i, te ni cahān de:

Cánuú jéé nuhūn ná ñuu Jerusalén cone ná vico. Te núu cúní Yaā Dios te ndee tucu ná núu ní, áchí de.

Te ni quenda de ñuu Efeso, te ni quiví de barco cuahān de. <sup>22</sup>Te ni jinū de ñuu Cesarea, te ni jehēn de ñuu Jerusalén. Te nuū ní ndihí ni cahān de jíin grupo ñayuu cácanđije yūcuán, te cuanuhun de ñuu Antioquía. <sup>23</sup>Te ni coyūcú de yūcuán jecu quivī, te sáá te ni quenda tucu de cuahān de ni jica cuu de ní Galacia jíin Frigia. Te ñayuu cácanđije ni cahije ga ni i jíin jnūhun ya ni sáha de.

**Jeē ní nacani Apolos  
jnūhun Jesús ñuu Efeso**

<sup>24</sup>Te ñuu Efeso ni quee iin tēe hebreo nání Apolos, te tēe ñuu Alejandría cúu de. Te vāha nācani de jnūhun ya, chi vāha jíin de jnūhun jeē cahán tutu

iī. <sup>25</sup>Te je ni cutūhva vāha tēe un jíin jnūhun máá Jítóho yō Jesús, vēsú jíin de máni máá jnūhun ya jeē ni stéén Juan ná ni scuándute de ñayuu, te ndihví ni de stéén cají de jnūhun ya nuū ñayuu. <sup>26</sup>Te jéhnū-ni ni nacani de jnūhun ya ini vehe iī sinagoga. Te ni cajini sōho Aquila jíin Priscila jnūhun nācani de, te ni cajeca de Apolos cuango sīin de, te ni castūhun yúcún ndindúú de jnūhun ya jeē ná tu cuni Apolos. <sup>27</sup>Te cúní Apolos quihīn de nde región Acaya. Te je cácanđije sava ñayuu yúcuan ní sáha Yaā Dios siquī jeē vāha ni yā. Te tācá hermano ñuu Efeso ni cachindéé ñāhán i de, chi ni catee i carta quihīn de jíin núu ñayuu cácanđije cáyūcú Acaya jeē na cuátáhú i Apolos. Te nuū ni jíin de yūcuán, te vāha ni chindéé ñāhán de tāca ñayuu cácanđije un jíin jnūhun ya. <sup>28</sup>Te nuū tāca ñayuu ñuu un ndé jíin jnāhan ñuu de hebreo jeē cáyūcu yúcuan, ní steén cají de ndese cástívi tāca jnāhan hebreo de siquī jnūhun ya. Te tu ní canihīn jnāhan de un jnūhun cahān siquī jeē ni stéén de, chi jíin jéé cahán tutu iī ni steén de jeē Jesús cúu Cristo, Yaā jeē cáñuhun ni de quiji ya.

**Jeē ni íne Pablo ñuu Efeso**

**19** Te níní néne Apolos ñuu Corinto, te ni yāha Pablo ichi síquí ñuu Efeso, te ni nanuu de ni jinū de máá ñuu ún. Te yúcuan ní nijnāhan de jíin tijni tēe cácanđije. <sup>2</sup>Te ni cajnūhún de tēe ún:

¿A ní canihīn ní Espíritu Santo ná ni cacandije ní, chí ná tuú? áchí de.

Te ni cacahān de jíin Pablo:

Tuú, chi ni ná tu nihīn na jnūhun jeē iyó Espíritu Santo, achí de.

<sup>3</sup>Yūcuán na te ni cahān Pablo:

¿Na siquī ni cajendute ní núu súcuan? áchí de.

Te ni cacahān de:

Ni cajendute ná síquí jnūhun ni steén Juan, achí de.

<sup>4</sup>Te ni cahān Pablo:

Jeē ní scuándute Juan ñayuu cúu jeē ni stéén de jeē na nácani ni i jeē stóo i cuēchi i, te ni cahān de jeē na cándíje i máá Yáa quiji jeē cúu Cristo Jesús, áchí Pablo.

<sup>5</sup>Te nuū ní cajini sōho tēe un jnūhun yáha, te ni cajendute de jeē ní cacandíje de máá Jítóho yō Jesús. <sup>6</sup>Te ni soó Pablo ndindúú ndaha de xinī tāca tēe ún, te ni quivī ni Espírítu Santo ini anuá de jínáhan de, te ni cacahān de sīn sīn yuhu te ni canacani de jnūhun ya. <sup>7</sup>Te ni iyo nájnūhun uxī uū jnahán tēe.

<sup>8</sup>Te unī yoō ni jehēn jehēn Pablo vehe i sinagoga. Te jéhu ni nacani de jnūhun ya, te ni nducú ndéyí de jeē na cándíje ñayuu jnūhun ndese ndácu Yaā Dios jniñu. <sup>9</sup>Yūcuán na te sava i ni cacunihni ni i te tu ní cácaandíje i, chi sa ni cacahān neé i siquī jnūhun vāha Yaā Dios jíin ñayuu cánataca. Jeē yúcuan ní cujiyo-ni Pablo nuū ñayuu ún, te ñayuu cácaandíje cuango i jíin de. Te ndijnahan quivī ni steén de nuū ñayuu ún ini escuela iin tēe nání Tiranno. <sup>10</sup>Te súcuan ni sáha de uū cuiyā, te tāca ñayuu cáyūcu Asia, cúu ñayuu hebreo cúu ñayuu tāca gá nación, ni cajini sōho i jnūhun máá Jítóho yō Jesús. <sup>11</sup>Te ni jēhe Yaā Dios poder nuū Pablo jeē sáha de cuehē jniñu jéhu téyí. <sup>12</sup>Te nde pañú jíin sahma jeē ní jniñ de ni cajengoo jíin núú ñayuu cácuñu, te ni canduvāha-ni i cuehyī cándoho i, te ni quendacoo tachī ini i cuango.

<sup>13</sup>Te jecu tēe hebreo cájica cuu de jeē quénehen de tachī ini ñayuu, te ni cajeni siquí ni de jeē suni jíin poder máá Jítóho yō Jesús quenehen de tachī, te suhva ni cacahān de jíin tāca táchi:

Jíin poder Jesús jeē nácani Pablo jnūhun ya, cáhán nihin ri jíin ró jeē na quénda ró quíhñ rō, achí de.

<sup>14</sup>Te súcuan ni casáha uxā sēhe yí iin tēe hebreo nání Esceva, cúu de iin

sutū cujéhu. <sup>15</sup>Te ná ni casáha de, te ni cahān-ni tachī ún:

Je jíin rī Jesús, te suni jíin rī Pablo. Te róhó jíináhan ró ¿ndé tēe cácuu ró jéé cuatáhú rí rohó? áchí jíin de.

<sup>16</sup>Te tēe ndóho tachī un ní ndonda de, te ni cundeyí de siquī ndihúxá tēe ún. Te ni sáha xeēn ndasí de jíin ndé ni catují te ni cacuvichí lí ni quendacoo vehe un ní cajinu cuango. <sup>17</sup>Te jnūhun yáha ní cajini tāca ñayuu cáyūcu ini ñuu Efeso, cúu ñayuu hebreo cúu ñayuu tāca gá nación, te yóhyo ni cayūhú i, te ni cacahān i jeé yóhyo cújéhu máá Jítóho yō Jesús.

<sup>18</sup>Te cuehē ñayuu jeē ní cacandíje ni quijicoo i nuū Pablo ni nacani ndaā i jnūhun tāca jniñu neé ní casáha i. <sup>19</sup>Te cuehē i jeē ní casáha jniñu tásí ní jinūcoo i cándiso i tutu i, te ni cajehmu i tutu un jíto nuū tāca ñayuu. Te ni catava i cuenta nasaa ndéé tutu ni cáyū ún, te ni cajini i jeé uú xico uxī mil xūhun plata cúu. <sup>20</sup>Te ni jitē jnūhun máá Jítóho yō cuahān, te ndihí ñayuu ni cajini i jeé cujéhu ndasí jnūhun ya.

<sup>21</sup>Te nuū ní ndihí tāca jniñu yáha, te jéni téyí ni Pablo jeé quihñ de Macedonia jíin Acaya, te sáá te najinū de ñuu Jerusalén. Te ni cahān de jeē na najinū de ñuu Jerusalén, yūcuán na te jíni ñúhún quíhñ de nde ñuu Roma. <sup>22</sup>Te uū tēe jeé cáchindéé ñáhán jíin Pablo cúu Timoteo jíin Erasto, te ni scāndu de ndindúú tēe yāhá cuango de nde Macedonia, te ni quendōo máá de Asia jecu gā quivī.

### Jeē ní cacuvaā ñayuu ñuu Efeso

<sup>23</sup>Te suu quivī ún yóhyo ni candonda ñayuu siquī jnūhun ya. <sup>24</sup>Chi ni iyo iin tēe sájniñu siquī plata, nání de Demetrio. Te máá de jíin ndihí tēe cásájniñu jíin de, cánihñ de cuehē xūhún, chi jíin plata casáha de vehe lulí jéé modo veñūhun ídolo i jeé cúu yaā Diana. <sup>25</sup>Te Demetrio ni nastútú de tēe cásájniñu jíin de jíin

táca gá tēe jeē suni jniñu yúcuan cásáha, te ni cahān de:

Tátā, cājini ni jēē siquí jniñu cásáha yó yáha vāha cániñiñ yō xūhún. <sup>26</sup> Te cājito ní te cājini sōho ní jēē iñ tēe nání Pablo chi cáhān de jeē násūu yāā cácuu jeē casáha ñayuu. Te je ni scandíje de cuehē ñayuu, nasūu máá iñ-ni ñuu Efeso yáhá chi ní cáhnu Asia. <sup>27</sup> Te quíyūhú ni na jēē cahān ñayuu jeē tu ndé jéjñiñu jeē casáha yó. Te sanaa te suni súcuan cahān i coto i máá veñūhun yaā síhí Diana jeē cujéñnu, te suni sájéē ni i nuū yaā Diana, te ma cúu ga cujéñnu ya vēsū ndívii ñayuu Asia jíñ ñayuu ní cáhnu ñayīví cáchiñūhún i ya vijna, áchí de.

<sup>28</sup> Súcuan ni cajini sōho de jñūhun yáha te yōhyo ni caquitiñi de, te ni cacana jee de:

Cujéñnu téyí Diana, yaā cúu patrona ñuu yō Efeso, achí de.

<sup>29</sup> Te ñayuu ñuu Efeso ni cacuvaā i, te iñ cáhnu-ni ni candonda i ni cajini i Gayo jíñ Aristarco cuango i jíñ de nde vehe nuū cándutútú ñayuu casáha i junta. Te ndíndúú tēe un cácuu tēe Macedonia, te cājica de jíñ Pablo. <sup>30</sup> Te cúní Pablo quívi de nuū ñayuu cuehē un cáhān de jíñ i, te ñayuu cácandíje tu ní cájehe i jñūhun quihín de. <sup>31</sup> Te suni sava tohō jeē cácuu amígo de cáyūcu Asia, ni catají jñūhun cuahān nuū de, cácahān ndahú jíñ de jeē ma quihín de nuū ní cacutútú ñayuu ún. <sup>32</sup> Te ñayuu ní cacutútú un, sava i ni cacana jee i iñ jñūhun te sava ga i inga jñūhun, te súcuan ni cacuvaā teyí i, te cuehē i ni tu cājini cuiti i na siquí cúu jeē ní cacutútú i. <sup>33</sup> Te sava tēe hebreo ni cajeni de iñ jnáhan de jeē naní Alejandro nuū ñayuu cuehē ún, te ni cacastūhún de nuū tēe ún na siquí cúu jeē cacuvaā i. Yūcuán na te Alejandro ni sáha de seña jíñ ndaha de jeē na cúnayúú ñayuu, chi cúní de cahān de jíñ i jeē násūu cuēchi tāca ñayuu hebreo cúu. <sup>34</sup> Te ni canacuni ñayuu un jēē tēe he-

breo cúu de, te jeē yúcuan ní cacana jee téyí gá i nájnūhun uū hora:

Cujéñnu téyí Diana, yaā cúu patrona ñuu yō Efeso, achí i.

<sup>35</sup> Yūcuán na te ni cacunahín ñayuu ni sáha tēe cúu secretario ñuu ún, te ni cahān de:

Nihín ñayuu ñuu yō Efeso, ndihí ñayuu chi je cājini i jeē cándito vāha yó veñūhun yaā Diana jíñ imagen Diana jeē ní ninga nde andíví. <sup>36</sup> Te ni iñ chi ma cúu cahān jeē tú ndaā jñūhun yáha. Núu súcuan te vāha ga na cási ní yuhu ní, te ma sáha yachí ní iñ jeē tu ní nácani vāha ni ni síquí. <sup>37</sup> Chi tēe yáha ní caquindeca ní de yáhá vēsū tu ní cásáha de ni iñ cuēchi siquí Diana yō, ni tu ní cácahān ndevāha de ni iñ jñūhun siquí. <sup>38</sup> Te Demetrio jíñ táca gá tēe jeē iñ-ni jniñu cásáha jíñ de, núu cácuu de cahān de cuēchi siquí iñ tēe, te na quíngo de nde vehe juzgado nuū cáyūcu juez, tēe cásandaā jniñu, te yūcuán cundaā siquí de jíjnáhan de. <sup>39</sup> Te núu íyó jñūhun jeē ma cúu cundaā yūcuán, te jíñi ñūhún cundaā nuū iñ junta nájnūhun tájñúní ley. <sup>40</sup> Chi yúhú ná jeē sanaa te cahān tāca tóhō Roma jeē siquí gobierno de ni candonda yó, chi ma nihín yō jñūhun castūhun yó na siquí cúu jeē ní cacutútú yó ni cacuvaā yō vijna, áchí de.

<sup>41</sup> Te nuū ní ndihí ni cahān secretario jñūhun yáha, te ni cajitē ñayuu un cuángo.

### Jeē ni jéhēn Pablo Macedonia jíñ Grecia

**20** Te ná ni yáha jēē ní cacuvaā ñayuu, te ni cana Pablo ñayuu cácandíje, te ni jeni ichí de i. Te ni cañunundee jnáhan de jíñ Pablo jeē ní nacu-atáhú de, te cuahān de Macedonia. <sup>2</sup> Te ni jica cuu de tācá ñuu yúcuan. Te jíñ cuéhē jñūhun ni stihví ni de tācá hermano cácandíje. Te ni jinū de Grecia. <sup>3</sup> Te ni condee de yūcuán úní yoō. Te je

yajni quih̄n de jíin barco nde Siria nuú, te máá quíiv̄i ún te ni nih̄n de jnūhun jeē jnánhan ñuu de hebreo ni casquíjnánhan jnūhun jeē ndonda siquī de ichi nuū quih̄n de, te jeē yúcuan ní nacani ni de te cuahān tucu de ichi Macedonia. <sup>4</sup>Te ni cah̄yo sava tēe cájica jíin Pablo, te cánaní de Sópater ñuu Berea, Aristarco jíin tēe nání Segundo nde ñuu Tesalónica, Gayo ñuu Derbe, Tíquico jíin Trófimo nde Asia, jíin Timoteo. <sup>5</sup>Te ni cacandu tēe yáha, te cándētu de Pablo jíin sáña, Lucas, nde ñuu Troas. <sup>6</sup>Te nuū ni yáha vico jeē cáyeji i pan jeē tu yíhi levadura, te jíin barco ni quendacoo ná ñuu Filipos, te nde nuū uhún quiv̄i te ni canajnáhan ná jíin de nde ñuu Troas. Te ñuu yúcuan ní coyūcu ná uxā quiv̄i.

### Jeē ni íne Pablo ñuu Troas

<sup>7</sup>Te máá quíiv̄i domingo ni candutútú ñáyuu cávandíje jeē cáji i pan, nájñuhun ni steén máá Jítóho yō jeē núcūhun ni yō siquī yā. Te ni steén Pablo jnūhun nuū ñáyuu ún. Te siquī jeē inga quiv̄i un jíini ñúhún quenda de quih̄n de, te nahán ní nacani de jnūhun nde ni cuñuú. <sup>8</sup>Te vehe yósó jnánhan cúu vehe ún. Te nde cuarto xin̄i nuū ní candutútú ná un ní iyo cuehē lámpara ni cundijin. <sup>9</sup>Te ñin sūchi yí nání i Eutico, néne i yuhu ventana. Te jeē ní cunahán nácani Pablo jnūhun, te yōhyo jíi i mahná, te ni quixi-ni i. Te nde piso un̄i un ní ñinga i nde nuū ñúhún. Te je ni jih̄i i ni candonehen de i. <sup>10</sup>Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jíjnánhan ní, chi ni natecu i, áchí de.

<sup>11</sup>Te ni ndaa Pablo, te ni yeji de pan jíin i jíjnánhan i jeē cánucūhun ni de siquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de. <sup>12</sup>Te Eutico chi íyó váha i

cuanuhun i jíin de jíjnánhan de, te ndiv̄ii ñayuu ún yōhyo cácus̄i ni i.

### Jeē ní quenda Pablo ñuu Troas cuahān de ñuu Mileto

<sup>13</sup>Te ni quívicoo ná ini barco cuangoo ná. Te Pablo chi cúní de caca jéhé de, te ni cundaā jeē najnáhan ná jíin de nde ñuu Asón. <sup>14</sup>Te nuū ní canajnáhan ná jíin de ñuu Asón, te ni quív̄i de barco te cuangoo ná jíin de nde ñuu Mitilene. <sup>15</sup>Te yúcuan ní quendacoo tucu ná jíin barco te inga quiv̄i ni jinūcoo ná xiin Quío, ñuhun jeē íne s̄ín nuū ndúte. Te quiv̄i un̄i ni jinūcoo ná Samos jeē súni nuū ndúte íne, te ni caquendōo ná Trogilio. Te quiv̄i cuún ni jinūcoo ná ñuu Mileto. <sup>16</sup>Te tu ní jéngoo ná ñuu Efeso, chi jéni ni Pablo jeē yáha-ni de ñuu un quih̄n de, návāha ma cucuéé de Asia te naa tiempo nuú, chi núú de jinū yach̄i de ñuu Jerusalén cone de máá quíiv̄i Pentecostés núu na cúu.

### Jeē ní jeni ichí Pablo tēe jéhn̄u cándiso jn̄íñu nuū ñáyuu cávandíje ñuu Efeso

<sup>17</sup>Te ná íne ga Pablo ñuu Mileto, te ni tají de jnūhun cuahān nde ñuu Efeso jeē na quíjicoo tēe jéhn̄u cándiso jn̄íñu nuū ñáyuu cávandíje yūcuán. <sup>18</sup>Te nuū ní quecoo tēe ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna. <sup>19</sup>Chi níí tiempo jeē ni íne ná jíin ní te nde vijna, jéjn̄íñu vāha na siquī jnūhun máá Jítóho yō, te tu ní sándúxí ná maá ná. Te íyó jínu ni ndahyū na jéhē ñáyuu. Te ni ndoho ná jn̄úndóho ni casáha jnánhan ñuu ná hebreo, chi ni casquíjnánhan jnūhun i siquī ná. <sup>20</sup>Te cájini ni jéé tu ní tánúhún ná ni ñin, vēsú ndese ga cácahān ñayuu siquī ná, chi ni nacani ná nd̄ih̄i jnūhun ya jeē quéndōo vāha ní sáha. Te ni steén na jnūhun ya nuū ni jíjnánhan ní, cúu nuū chitú cúu

tācá vehe ní. <sup>21</sup> Te inuú-ni jnūhun ni nacani ná núū ndihí ní, cúu jnáhan űuu ná hebreo cúu űayuu tāca gá nación, chi ni cahān na jēe na nācani ni ni jēe stóo ni cuéchi ní te na cándíje ní máá Jítóho yō Jesucristo. <sup>22</sup> Te vijna chi űūhun ichí ná quihín ná űuu Jerusalén, chi stāhví ni Espíritu Santo sāña quihín ná. Te tu jíní ná ndese ga coo jíní ná yūcuán. <sup>23</sup> Te iyó ĩn jeē jíní na, cúu jeē chune i sāñá vecāa te quiji jnūndóho siquī ná, chi Espíritu Santo súcuan cáhan jíní ná ndijnahan űuu nuū jíca ná. <sup>24</sup> Te ni tu sáha ná cuenta vēsú na cáhni i sāñá, chi jeē cuní na cúu jeē na sínu vāha ná jniū jeē ní tee máá Jítóho yō Jesús siquī ná, te súcuan cusī ni ná. Te jniū un cúu jeē nācani ná jnūhun vāha ya nuū tāca űayuu ndese vāha ni Yaā Dios jíní yó.

<sup>25</sup> Te je ni jica cuu ná, ní nacani ná jnūhun ya nuū ní ndese ndácu Yaā Dios jniū. Te vijna chi jíní na jēe ni ĩn ní ma najnáhan ga yō nuū űáyiví yáha. <sup>26</sup> Jeē yúcuan cástūhun cájí ná nuū ni jínáhan ní vijna jeē násūu cuéchi ná cúu núu ndé ĩn ní stívi. <sup>27</sup> Chi ni nacani ná núū ní ndihí jnūhun Yaā Dios jeē ni sándaā yā ndese coo, te tu ní quēndōo ni ĩn jnūhun. <sup>28</sup> Núu súcuan te coto vāha ní máá ní jíní ndihí űayuu cácandíje, chi Espíritu Santo ni jeni ya nihín jēe cóndito ní űayuu maá Jítóho yō, chi ni nacuaan ya i jíní nāñí yā. <sup>29</sup> Chi jeē quihín na te jíní na jēe quijicoo tēe cástáhú quívicoo mēhñu ní, te nducú de snāá de jnūhun ni cajetáhú űayuu cácandíje, te xeēn sáha jnūhun stáhú de nájñūhun xeēn sáha yihí jeē cájehni tī lanchí. <sup>30</sup> Te suni nuū grupo maá ní quejéé sava de cahān de jnūhun stáhú, te stáhú de sava űayuu cácandíje jeē na cóndiquin i jnūhun stáhú stéén de. <sup>31</sup> Jeē yúcuan condito ní jēe ma cóo súcuan. Te ma náā ni ni jēe uní cuiyā ndiquiví ndíñuu ni condíhví ndasí ni na ndé ndahyú na jéhé ni, ní jeni ichí ná ĩn ĩn ní jínáhan ní.

<sup>32</sup> Te vijna, hermano, jícān tahú na núū Yaā Dios jeē coto ya nihín. Chi jnūhun jeē vāha ni yā ndíso poder sáha jeē ĩje ga ni jíní, te suu sáha jeē ĩn quiví te cuāha ya tahū jeē ndujéhnu luu ní ndé jíní ndihí űayuu ní nacāji ya jeē cóo ndoo coo ĩi i nuū yā. <sup>33</sup> Tu ní ndúcú ná jeē nihín na xūhun chí sahna nuū ní ĩn i. <sup>34</sup> Chi je cájini vāha ni jēe sa suhva ni sájñiū nihín ná návāha nihín na jēe cótecu na ndé jíní tāca tēe cájica jíní ná. <sup>35</sup> Te níní ní steén na núū ni jēe súcuan jíní nūhún sájñiū yó návāha nihín yō jeē cuāha yó núū űayuu cúmani nuū. Te ma náā ni ni jnūhun jeē ni cáhān maá Jítóho yō Jesús, chi suhva ni cahān yā: Ndetū gā quēndōo yó jēe cuāha yó vēsú jeē nihín yō, achí yá. Achí Pablo.

<sup>36</sup> Te ni ndihí ni cahān de tāca jnūhun yáha, te ni jecuiñí yití de, te ni jicān tahú de jíní ndihí tēe ún. <sup>37</sup> Yūcuán na te ndihí de ni cajecunundee jnáhan de jíní Pablo ni catechuhú de jeē cánacuatáhú de, te ni candahyū de. <sup>38</sup> Chi cácuquíhyá ndasí ni de jíní jnūhun ni cahān Pablo jeē ma ndácoto jnáhan ga de. Te cuangoo-ni de jíní Pablo nde núū ĩn barco.

### Jeē cuánuhun Pablo űuu Jerusalén

**21** Yūcuán na te ni caquēndōo tācá hermano űuu Efeso, te ni quiví-coo ná barco, te cuangoo ndāā-ni ná ndé Cos. Te ĩnga quiví ni jinūcoo ná Rodas, te yúcuan ní quēndacoo ná te ni jinūcoo ná űuu Pátara. <sup>2</sup> Te ni cane ĩn barco jeē quihín Fenicia, te ni quívicoo ná cuángoo ná. <sup>3</sup> Te nuū ní cajito ná núū Chipre jeē ĩne sñin nuū ndúte, te ni quēndōo ichi lado jecó barco, chi ni cayāha ná cuángoo ná nde Siria. Te ni jinūcoo ná űuu Tiro, chi yúcuan ndóo jeē ndíso barco ún. <sup>4</sup> Te ni jenanducú ná űayuu cácandíje, te ni caquēndōo ná jíní i uxā quiví. Te máá Espíritu Santo ni steén nuū i jeē quíji jnūndóho siquī Pablo űuu Jerusalén, te jeē yúcuan ní

cacahān i jín de jeē ma quihín de. <sup>5</sup>Te ni yāha uxā quivī ún, te ni quendacoo ná. Te tāca tēe cācandíje jín nāsihí de jín séhe de ni cachuhun ichí de sāna ní jengoo de jín ná nde yatā nūū, te ni cajecuiñi yití ná jín de yumar te ni cajicān tahu ná. <sup>6</sup>Te ni cañunundee jnāhan ná ní canacuatáhu ná yūcuán, te ni quivicoo ná barco cuangoo ná. Te ni canandió cóo de canungoo de vehe de.

<sup>7</sup>Te ni quendacoo ná ñuu Tiro cuangoo ná jín barco, te ni jinūcoo ná ñuu Tolemaida ni quendacoo ná ini barco. Te yūcuan ní jengoo ná ní cacahān na jín táca hermano, te ni caquendōo ná jín de ñin quivī. <sup>8</sup>Te inga quivī un ní cajica jéhe ná jín Pablo, te ni jinūcoo ná ñuu Cesarea, te ni quivicoo ná vehe Felipe, tēe nācani jnūhun vāha ya. Tēe un cúu jnāhan jeē ndihúxá tēe jeē ní casaja staā nuū nāhan viuda. Te ni caquendōo ná jín de. <sup>9</sup>Te tēe un íyó cúun séhe síhí de jeē cáhiyo máá i, te cānacani i jnūhun Yaā Dios. <sup>10</sup>Te ni coyūcu ná yūcuán tijni quivī. Te ichi Judea ni quiji ñin tēe nācani jnūhun Yaā Dios, nání de Agabo. <sup>11</sup>Te ni quee de nuū ná. Te ni quihin de sanchí Pablo, te ni jihni de ndaha de jín jéhē de, te ni cahān de:

Suhva cáhān Espíritu Santo. Jnāhan yó hebreo súcuan cuhni i tēe chí sanchí yāha ini ñuu Jerusalén, te nastúu i de nuū ñáyuu sín nación, áchí de.

<sup>12</sup>Te jeē ní cajini sōho na jnūhun yāha te máá ná jín táca tēe cācandíje cáyūcú ñuu Cesarea ni cacahān ndahú ná jín Pablo jeē ma quihín de ñuu Jerusalén.

<sup>13</sup>Yūcuán na te ni cahān Pablo:

¿Najehē cāndahyū ni jínāhan ní, te cāsáha ní jēe cucuíhyá ni ná? Chi sāñá je íyó túhva ná jēe násūu máá jēe cónuhni ná ini ñuu Jerusalén, chi suni jeē vēsú na cúu na jēe siquí maá Jítóho yō Jesús, áchí de.

<sup>14</sup>Te jeē tu ní cúu cuiti casicoo ná, yūcuán na te sa suhva ni cacahān ná:

Na cóo ndese cúní maá Jítóho yō nuu súcuan, áchí ná.

<sup>15</sup>Yūcuan na te sáá te ni casátūhva ná, te cuangoo ná ñuu Jerusalén. <sup>16</sup>Te suni jecu tēe ñuu Cesarea jeē cācandíje cuangoo de jín ná. Suni cuahān ñin tēe Chipre nání de Mnasón, te je ni cuu cuehē cuiyā candíje de. Te ná ni jinūcoo ná ñuu Jerusalén, te ni cacoyūcu ná vehe de.

### Jeē ni jécondēhe Pablo Jacobo

<sup>17</sup>Te nuū ni jinūcoo ná ñuu Jerusalén, te hermano cáyūcú ñuu ún yōhoyo ni casusī ni de jeē ni jinūcoo ná. <sup>18</sup>Te inga quivī un ní cajengoo ná jínāhan ná jín Pablo vehe Jacobo, te yūcuan ní candutútú táca tēe jēhnu cāndiso jniñu nuū ñáyuu cācandíje. <sup>19</sup>Te Pablo ni sáha de saludar tēe ún jínāhan de. Yūcuán na te ni castūhún de ndihi jniñu ní sáha Yaā Dios ná ni nacani de jnūhun ya nuū ñáyuu táca nación jeē tu cájini i jnūhun ya. <sup>20</sup>Te ni cajini sōho de jnūhun yāha, te ni cacahān de jeē yōhoyo cújēhnu Yaā Dios. Te ni cacahān de jín Pablo:

Hermano, vijna te jíní ni náa cuehē mil jnāhan ñuu yō hebreo ni cacandíje i Jesús, te cācāhān nihin i jeē cánuú squícu yó ley jeē ní jēhe ya nuū Moisés. <sup>21</sup>Te ni canihin i jnūhun cācāhān jeē stívi ní steén ni núu táca jnāhan yó ñáyuu hebreo cáyūcu jíca i táca gá nación, chi ni steén ni núu i jeē ma cuatáhu gá i nuū ley Moisés, ni ma sáha ga i circuncidar séhe i, ni ma cuatáhu gá i táca gá jeē tajnúni jenahán. <sup>22</sup>¿Ndesé sáha ní núu súcuan? Chi cuni ñayuu un jēe ní ndee ní te cutútú cuehē i. <sup>23</sup>Suhva sáha ní núu súcuan. Yāha íyó cúun tēe jeē ní cajejnūhun de ñin jeē squícu de nuū Yaā Dios. <sup>24</sup>Cueca ní tēe yāha quihín ni jín de templo, te cuchi ní nasándoo ní máá ní jín de nuū yā, te cuaan ní jeē socó de nuū Yaā Dios jijnāhan de. Yūcuán na te cuu sāté de xiní de, te

suu stéén jeē ní casquícu de ndíhi jeē ní cajejnūhun de nuū yā. Yūcuán na te cuni ndíhi ñayuu jeē tú ndaā tāca jnúhun ni cajini sōho i siquī ní, chi coto i jeē suni máá ní sa squícu ní ley yā. <sup>25</sup>Te ñayuu tācá nación jeē násūu ñayuu hebreo cácuu i te ni cacandíje i ya, je ni cateo ná carta cuahān nuū i jeē tu cánuú squícu i ley un, chi máá-ni jeē ma cáji i cūñu jeē ni sóco nuū ídolo ni niñī ni quití jeē jihí jeē tu jéti niñī tī, te ni ma cáca jnéni i, áchí de.

### Jeē ní cajnií de Pablo ini templo

<sup>26</sup>Yūcuán na te ni jeca Pablo tēe ún, te inga quivī un ní cajichi de ni canasándoo de máá de nuū yā. Te ni quivī Pablo ini templo ni cachi de nuū sutú na quivī jínu jeē nasándoo tēe un máá de nuū yā, te quindeca de quití jeē socó de nuū yā.

<sup>27</sup>Yūcuán na te cácuu de jeē sínu de ndíhuxá quivī jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ni cascáhán de ndíhi ñayuu, te ni cajnií i Pablo. <sup>28</sup>Te ni cacana jee i:

Tēe ñuu yō Israel, cuāha núu ní ndaha jijnáhan ní na jnií yó tēe yáha. Chi máá de cúu tēe jica cuu ní cáhnu stéén de nuū tāca ñayuu, te cáhán de siquī nación yō jín siquī ley jeē ni jéhe ya nuū Moisés jín siquī templo yáha. Te suni je ni quivícoo de jín jecu tēe griego ini templo i yāhá, te sícuán stíví de jnúhun i jeē cahán jeē ma cúu quiví ñayuu ini templo te núu nasūu ñayuu hebreo cúu i, áchí.

<sup>29</sup>Chi nde na íne Pablo ini ñuu un ní cajini tēe hebreo jeē jica de jín Trófimo, tēe ñuu Efeso jeē násūu hebreo cúu de, te cájeni ni de jeē ni quiví tēe un jín Pablo ini templo.

<sup>30</sup>Te ndíhi ñayuu ñuu un ní cuvaā, te ni cacutútú-ni i, te ni cajnií i Pablo, te ni castáa i de ni quenehen i de ini templo un, te ni canacasi-ni i yéhyí. <sup>31</sup>Te ni

cacuni i cahni i de núu. Te general, tēe cújéhnu nuū ndíhi soldado, ni nihñ de jnúhun jeē ndíhi ñayuu ñuu Jerusalén ni candonda i cácuvaā i. <sup>32</sup>Te ni jeca general tācá soldado jín capitán, te cájinu de cuangoo de nde nuū cáhiin ñayuu cuehē ún. Te ná ni cajito ñayuu jeē ni jínūcoo general jín soldado, te ni cajecuiñī i jeē cácani i Pablo. <sup>33</sup>Yūcuán na te ni quiví general mēhñu ñayuu, te ni jnií de Pablo, te ni ndacu de jniñu jeē conuhní de jín úu cadena. Yūcuán na te ni cajnūhún general ndé tēe cúu Pablo te na cuēchi ni sáha de. <sup>34</sup>Te ni cacana ñayuu cuehē ún, sava i iin jnúhun te sava ga i inga jnúhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jniñu cuahān Pablo nde cuartel. <sup>35</sup>Te nuū ni jínū Pablo escalera cuartel ún, te soldado ni cajnií de Pablo cándiso de siquī jeē cácuu ñayuu ún jnií i Pablo sáha xeēn i jín de. <sup>36</sup>Chi ndíhi i véjicoo i ichi yátá soldado, te cácana jee i:

Cahni ni tēe jíná, áchí i.

### Jeē ni cáhán Pablo jehē maá de nuū ñayuu

<sup>37</sup>Te cásquíví de Pablo ini cuartel núu, te jín jnúhun griego ni cahán Pablo jín general:

¿A cuāha ni jnúhun cahán ná iin jnúhun jín ní? áchí de.

Te ni cahán general jín de:

Te jíní rō cahán rō yuhu griego jeē sícuán. <sup>38</sup>Núu sícuán te nasūu róhó cúu tēe Egipto jeē jé ni cuu quiví ni ndonda siquī gobierno te ni quenehen cuñ mil tēe jéni ndíyi cuangoo jín de nde nuū ñúhun téhé, áchí.

<sup>39</sup>Yūcuán na te ni cahán Pablo:

Tuú, chi tēe hebreo cúu ná, te ni cacu ná ñuu Tarso, iin ñuu jeē cujéhnu ndañúu Cilicia. Te quiñūhun ni ni cuāha ní jnúhun na cáhán na jín ñayuu yáha jijnáhan i, áchí de.



<sup>40</sup>Te general ni jēhe de jnūhun jeē cahān de. Te ni jecondichi Pablo nuū escalera, te ni sáha de seña jíin ndaha de jeē na cúu nayúú ñáyyuu ún. Te nuū ní cuu nayúú-ni i, te jíin jnúhun yuhu ñúú de hebreo ni cahān de:

**22** Ndihi nínín jeē cácuu ní jnáhan ñuu yō jíin ndihi nínín jeē cácu-jéhu ní núú ñúú yō, cuni sōho ní jnúhun cahān na jéhē maá ná, achí de.

<sup>2</sup>Te ni cajini sōho i jeē cahān Pablo yuhu hebreo jeē cúu yuhu ñúú i, te víhyá gā ni cacunahín i. Te ni cahān Pablo:

<sup>3</sup>Maá ná cúu jnáhan ñuu yō hebreo, te ni cacu ná ini ñuu Tarso ndañúú Cili-cia. Te ini ñuu Jerusalén yāha ní jehnu ná, te ni cutūhva ná núú Gamaliel, te ni steén de nuū ná ndihi siquí ley jeē ni jéhe ya nuū jíí yō. Te nde jíin ini jíin ánuá na ní nducú ndéyí ná squícu ná súcuan nuū Yaā Dios, nájñūhun cásáha maá ní vijna. <sup>4</sup>Te ni jito xeēn na ñáyyuu cácan-díje i jnūhun Jesús te nde cuní na jéē na cúu ndihi i núú. Chi cúu tēe cúu ñahan ni jnií ná ni chuhun ná vecāa. <sup>5</sup>Te sutū cujéhu ga jíin táca tēe jéhu cándiso jníñu nuū ñúú yō, cácuu de testigo jeē súcuan ni sáha ná, te suni maá de ni cajēhe de tijni carta cuahān na jíin jéē cuáha na núú táca jnáhan yó cáyúcu ñuu Damasco. Chi cuahān ná ñuu un jéē jnií ná ñáyyuu cácan-díje i Jesús te quin-deca ná i ñuu Jerusalén yāha, návāha ndoho i núú.

**Jeē ní cachi Pablo ndese ni sama ya de**

(Hch. 9.1-19; 26.12-18)

<sup>6</sup>Te ni quihin ná ichi cuahān ná, te cuacuyajni ná ñuu Damasco, te nájñūhun caxū cúu. Te ichi ándiví ní quiji ñn nduva ní ndindéé ndaxín núú ná. <sup>7</sup>Te ni cotúú-ni ná núú ñūhun, te ni jini sōho ná ñn jnūhun cáhán jíin ná: Saulo, Saulo, ¿najehe jíto xeēn rō ruhū? achí. <sup>8</sup>Yūcuán na te ni cahān ná: ¿Na nínín cúu jeē cahán, Tátā? achí ná. Te ni

cahān yā jíin ná: Maá rí cúu Jesús jeē ní jehnu ñuu Nazaret, te jeē jíto xeēn rō ñayuu cácan-díje i ruhū cúu jeē jíto xeēn rō ruhū, achí yá. <sup>9</sup>Te tēe cuango jíin ná ni cajini ndije de jeē ndindéé, te ni cayūhú de, te tu ní cájini sōho de ndese ni cahān yā jíin ná. <sup>10</sup>Yūcuán na te ni cahān ná: Tátā, ¿na vé cuní ni jéē sáha ná? achí ná. Te ni cahān maá Jítóho yō jíin ná: Ndocuññ te quihin rō ñuu Damasco, te yūcuan íyō ñn tēe jeē cachi nuū rō na vé cúu jeē cánuú sáha rō, achí yá jíin ná. <sup>11</sup>Te jeē ní ndindéé un ní sacuáá núú ná, te tēe cuango jíin ná un ní cajni de ndaha ná cuango de jíin ná ní jinūcoo ná ndé ñuu Damasco.

<sup>12</sup>Te yūcuan ní condee ñn tēe nání Ananías, te táca jnáhan yó hebreo yūcuan cácahān jeē tēe vāha cúu Ananías, chi vāha squícu de ley jeē ni jéhe ya nuū Moisés. <sup>13</sup>Te ni quee tēe un núú néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná núú de. <sup>14</sup>Te ni cahān Ananías: Maá Yáa Dios táca jíí yō, je ni nacāji ya nihín návāha cuni ní na vé cuní yā jeē sáha ní, te coto ní núú maá Cristo, Yaā ndaā, te cuni sōho ni jnúhun jeē cahán yā. <sup>15</sup>Te nacani ní jnúhun ya nuū ndivii ñayuu táca jéē ní jito ní jíin jéē ní jini sōho ní. <sup>16</sup>Ma cúhuun ni ní núú súcuan. Ndocuññ ní, te cuandute ní te cahān ndahú ní jíin maá Jítóho yō, návāha nacate ya anuá ní núú cuéchi, achí de jíin ná.

**Jeē ní cachi Pablo ndese ni tají Yaā Dios de nuū ñáyyuu táca gá nación**

<sup>17</sup>Te ni nandió cóo na ní ndee ná ñuu Jerusalén. Te jícán tahu na ini templo, te ni sáha maá Jítóho yō jeē ní jito ndijin ná. <sup>18</sup>Te ni jini na núú yā ni cahān yā jíin ná: Yachí quenda rō ñuu Jerusalén yāhá, chi ma cuatáhu ñáyyuu yāha jéē nacani rō jnúhun ri nuū i, achí yá. <sup>19</sup>Te ni cahān na jíin yá: Tuú, chi cuatáhu i, Tátā, chi je

cájini i jeē ni quívi ná ndijnahan vehe ii sinagoga ni jni ná táca ñáyyu cácanđíje i níhín, te ni caní ná i, te ni chuhun ná i vecāa. <sup>20</sup> Te je cájini i jeē quívi ní cajehni i Esteban, tēe ni nacani cájí jnúhun ní, suni ni indichi na yúcuán, te ni jejnúhún ná jeē na cúu de, chi ni condito ná sahma tēe ni cajehni Esteban, áchí ná jíin yá. <sup>21</sup> Te ni cahān yā jíin ná: Cuáhán, chi máá rí tají rí rohó quhín jicá ró nde nuū ñáyyu táca nación jeē tu cájini i jnúhun ri, achí yá jíin ná. Achí Pablo.

### Jeē ni íne Pablo nuū general

<sup>22</sup> Te táca ñáyyu ún vāha-ni ni cajini sōho i te nde jnúhun sandíhi yáha jēe ní tají yá de nuū ñáyyu táca gá nación. Yūcuán na te ni cacuvaā i, te ni cacahān jee i:

Na cúu tēe jíiná, chi tú vāha jeē cótecu gā de, áchí i.

<sup>23</sup> Te súcuán cácana jee i, te ni cascán-doó i ticāchí i, te ni cascánda i ticachā. Te súcuán cástéén i jeē cáquiti xēen ni i. <sup>24</sup> Te ni ndacu general jniñu jeē na quívi Pablo ini cuartel, te ni cahān de jeē na stíchí soldado Pablo nde jíin cuarta ñi, návāha cujnúní ni general na siquī cúu jeē ní candonda ñayuu un síquī de. <sup>25</sup> Te ni cajihni de Pablo návāha súcuán te caní de. Te ni cahān Pablo jíin capitán jeē índichi tūhva:

¿A jéhe ley jnúhun jeē caní ní cuarta tēe cúu sēhe nación Roma núu ná tu sándāá ní núu íyó cuēchi de? áchí de.

<sup>26</sup> Te ni jíin sōho capitán jnúhun yáha, te ni jecahān jíin general:

Coto vāha ní jēe ma stívi ní sáha ní jíin tēe yáha, chi cúu de sēhe nación Roma, achí.

<sup>27</sup> Yūcuán na te ni jinū general nuū Pablo, te ni cajnúhún de:

Cachí núu jendaá cúu jeē sēhe nación Roma cúu ró, áchí.

Te ni cahān Pablo:

Suu cúu ndije ná, áchí de.

<sup>28</sup> Te ni cahān general:

Ruhū chi nde jeē ni jéhe ri cuehē xūhún te ni nduu ri sēhe nación Roma, áchí.

Te ni cahān Pablo:

Te sāná chi nde quívi ní cacu ná cúu ná sēhe nación yō Roma, achí de.

<sup>29</sup> Yūcuán na te táca tēe jeē cácuoni caní Pablo nuū, ni cacujiyo-ni cuango, te suni nde general ni yūhú de, chi ni stívi de jeē ní jihni de Pablo, chi tu íyó vāha sáha súcuán jíin sēhe nación Roma.

### Jeē ni índichi Pablo nuū junta cujéhnu ga jnáhan ñuu de hebreo

<sup>30</sup> Te inga quívi un cúni general cundā vāha ni de na siquī cúu jeē ní candonda tēe hebreo siquī Pablo. Te ni ndají de cadena jeē nuhni Pablo, te ni ndacu de jniñu ni cacutútú táca sūtú cácujeñnu jíin táca tēe cásáha junta cujéhnu ga, te ni quenehen de Pablo, te ni jeni de nuū tēe ni candutútú un.

**23** Yūcuán na te ni ndacoto Pablo nuū tēe ni candutútú junta un, te ni cahān de:

Tátā jijnáhan ní, ní ndé vijna vāha íyó ni anuá na jēe tú na cuēchi ná, jíto jínúu Yaā Dios, áchí de.

<sup>2</sup> Yūcuán na te Ananías, sutú cujéhnu ga, ni cahān jíin tēe cáhiin yajni nuū de jeē na cátu máá yuhu de. <sup>3</sup> Te ni cahān Pablo jíin sūtú cujéhnu ga ún:

Yaā Dios stóho ya nihín chi tēe stáhú-ni cúu ní, chi néne ní jēe sándāá ni núu ni stívi ná ley yā, ¿te naun stívi máá ní ley jeē ndácu ní jniñu jeē cáni de sāná? áchí de.

<sup>4</sup> Te ni cacahān tēe cáhiin nuū de ún:

¿Naun cáhán rō súcuán jíin sūtú cujéhnu ga? Chi nuū Yaā Dios jejnú de, achí jíin de.

<sup>5</sup> Te ni cahān Pablo:

Tátā jijnáhan ní, tu ní jíiní na jēe sutú cujéhnu ga cúu de, chi núu ní jíiní na te ma cahán na súcuán núu, chi yósó núu

tútu ii jeē ni cáhān yā jeē ma cahán neé yó coto yó táca téē cácujuhnu nuū yō, áchí Pablo.

<sup>6</sup>Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, máá ná cúu iin jnáhan grupo fariseo, te suni súcuan ni iyo tátā na. Chi suni máá ná ñúhun ni na jéē nastécu yā ndiyi, te siquī yúcuan cúu jeē cácahān ni cuéchi siquī ná, áchí de.

<sup>7</sup>Te jeē súcuan ni cahān de te ni cacusín ni tēe junta jeē cácuu grupo fariseo jíin grupo saduceo, te ni cacahān nihin. <sup>8</sup>Chi cácahān tēe grupo saduceo jeē ma nátecu ndiyi, ni tu cáhīyo ndajéhé yā ni ánuá, te tēe grupo fariseo cá-jejnúhún de ndínúni jnúhun yáha. <sup>9</sup>Te yōhoyo ni cuvaā. Te sava tēe cástéén jnúhun cáhán tutu ley yā jeē cácuu jnáhan grupo fariseo, ni candocuiñi de, te ni cacahān de:

Tú ni iin cuéchi cánihin na síquī téē yáha. Sanaa te ni cahān ndije iin ánuá jíin de chí iin ndajéhé yā. Ma sáníhni ni yō nuū Yaā Dios nuu súcuan, áchí.

<sup>10</sup>Te yōhoyo ni catejnéhan, te yúhú general jeē quende i chíyō Pablo, te ni ndacu de jniñu jeē na quívi soldado te quenehen de Pablo sava mēhñú i, te na ndívi de ini cuartel.

<sup>11</sup>Te jecuaā un ní quee-ni máá Jítoho yō nuū de, te ni cahān yā jíin de:

Pablo, cuandeyí ni rō, chi nájnūhun ni nacani ró jnúhun ri ini ñuu Jerusalén yáhá, suni súcuan nacani nahín ró jnúhun ri ini ñuu Roma, achí yá.

### **Jeē ní casquijnáhan jnúhun cahni Pablo**

<sup>12</sup>Te nuū ní cundijin te ni cacutútú sava ñayuu hebreo, te ni casquijnáhan jnúhun, te ni cacahān teyí i jeē ma cáji cuíti i ni iin ni ma cóho cuíti i nde núu tu cahni i Pablo. <sup>13</sup>Te víhyá gā uū xico tēe hebreo ni cacahān teyí jnúhun yáha.

<sup>14</sup>Te ni jengoo nuū sutú cácujuhnu jíin núu téē jéhu cándiso jniñu nuū ñáyuu hebreo, te ni cacahān jíin téē ún:

Ni cacahān teyí ná jeē ma cáji cuíti ná ni iin níni nde ná tu cahni na Pablo.

<sup>15</sup>Núu súcuan te máá ní jijnáhan ní jíin táca gá tēe cásáha junta cujéhu ga, cuácáhān ni jíin general jeē quenehen de Pablo na jéē de nuū junta sajnē, chi cachi ni jéē cácuu ni stíchí váha ga ní de. Te máá ná jijnáhan ná cotúhva ná cahni ná de nde ná tu quee de nuū cáhiin tútú ní, achí.

<sup>16</sup>Te sēhe yí cuáha Pablo ni nihin i jnúhun jeē súcuan ni cacahān, te ni jehēn i cuartel, te ni castúhún i nuū Pablo. <sup>17</sup>Te ni cana Pablo xiní iin jnáhan capitán, te ni cahān de:

Condeca ní súchi yáha quíhín ni jíin i nuū general, chi íyó iin jnúhun castúhún i nuū de, áchí de.

<sup>18</sup>Te capitán un ní jeca de i cuahān i jíin de nuū general, te ni cahān de:

Pablo, tēe íne vecāa, ni cana de sáná, te ni cahān de jíin ná jeē quíndeca ná súchi yáha núu ní, chi íyó iin jnúhun cahān i jíin ní, áchí de.

<sup>19</sup>Te ni jniñ general ndaha i cuahān de jíin i iin lado, te yuhu-ni ni cajnúhún de i:

Na jnúhun cúni rō cahān rō jíin rí, áchí de.

<sup>20</sup>Te ni cahān i:

Tēe hebreo ni casquijnáhan jnúhun de jeē cahān ndahú de jíin ní quenehen ní Pablo sajnē quihín de nuū táca téē cásáha junta cujéhu ga, chi cahān-ni de jíin ní jeē cácuu de jeē stíchí váha ga de Pablo. <sup>21</sup>Te ma cuáha ni jnúhun, chi víhyá gā uū xico de cándētu sáhí de ichi, te ni cacahān teyí de jeē ma cáji cuíti de ni iin ni ma cóho cuíti de nde núu tú cahni de Pablo, te vijna je cándētu túhva de jeē cuáha ni jnúhun quihín Pablo nuū junta, áchí i.

<sup>22</sup>Te ni cahān general jíin i jeē ma cáchi i nuū ní ĩn ñayuu jeē ni cáhān i jnūhun yáha jíin de, te ni tají de i cuanuhun i.

### Jeē ní tají general Pablo cuahān de nuū Félix, tēe cúu gobernador

<sup>23</sup>Yūcuán na te ni cana general uū capitán de, te ni ndacu de jniñu jeē sátūhva de uū ciento soldado cájica jéhe jíin úní xico uxí jeē cáyōsō caballo jíin úu ciento jeē cándāha lanza, chi cahīn jecuāá ún quendacoo de jíin Pablo quingoo de nde ñuu Cesarea. <sup>24</sup>Te suni ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador. <sup>25</sup>Te ni tee de ĩn carta jeē cahán jnūhun yáha:

<sup>26</sup>Máá ná cúu Claudio Lisias, te tēe ná carta yáha cuájeē nuū ní, señor Félix, gobernador kujéhu. Nde se tahū cúu ní. <sup>27</sup>Ñayuu hebreo ni cajni i tēe yáha, te je yajni cahni i de núú, te ni jnama ná de jíin soldado, chi ni jini na jéē séhe nación Roma cúu de. <sup>28</sup>Te ni jendeca ná de nuū junta maá i jíin náhan i jeē sándaā i núu na cuēchi ni sáha de. <sup>29</sup>Te ni jini na jéē síquí ley maá i cúu cuēchi cácahān i síquí de, te tu níhín na ni ĩn cuēchi síquí de jeē cúu de ni jeē cóne de vecāa. <sup>30</sup>Te ni nihīn na jnúhun jeē sava tēe hebreo ni casquijnáhan jnūhun de jeē cahni de tēe yáha, te jeē yúcuan cúu jeē yachi ni tají ná de cuajeē de nuū ní. Te suni je ni cahān na jíin ñayuu cájicān cuēchi síquí de jecoo i nuū ní, te jíin cahān i jíin ní na cuēchi ni sáha de. Je ni cahān yō, achí carta.

<sup>31</sup>Te ni cajeca ñuú-ni soldado Pablo cuangoo jíin de nde ñuu Antípatris, nájnūhun ni tahū jniñu nuū de. <sup>32</sup>Te ĩnga quiví ni canandió cóo-ni soldado cájica jéhe cuánungoo nde cuartel, te soldado cáyōsō caballo cuangoo de jíin Pablo. <sup>33</sup>Te ni jinūcoo ñuu Cesarea, te

ni cachihí carta ndaha gobernador, te suni ni cajeni Pablo nuū de. <sup>34</sup>Te ni cahu gobernador carta un. Te ni cajnūhún de ndé ñuu cúu Pablo, te ni jini de jeē tēe ndañū Cilicia cúu Pablo. <sup>35</sup>Te ni cahān de:

Nde na quécōo tēe cájequin cuēchi síquí rō te cuni nahín rí jnūhun cahān rō, achí de.

Te ni cahān de jeē na quíndihyū Pablo ini palacio ndiyi Herodes.

### Jeē ni cáhān Pablo jehe maá de nuū Félix

**24** Te nuū uhún quiví te Ananías, sutū kujéhu ga, ni quee de ñuu ún. Te suni ni quecoo sava tēe jéhu cándiso jniñu nuū jnáhan ñuu de hebreo jíin ĩn tēe cúu abogado, nání de Tértulo. Te ni quívicoo de nuū gobernador jeē cahān de cuēchi síquí Pablo. <sup>2</sup>Te ni cana gobernador Pablo ni quee de. Te ni quejé Tértulo cahán de cuēchi síquí Pablo, chi suhva ni cahān de jíin Félix:

Tátā gobernador, síquí jeē cúu ní tóhō jeē váha ndíchí ndácu ní jniñu, te jeē yúcuan tú na jnūhun cájejnáhan íyó, chi cáyūcu váha yó. <sup>3</sup>Te na cútahū ná, chi tāca quíví váha cúu tāca núú ndácu ní jniñu jeē váha sáha ní, tátā Félix. <sup>4</sup>Te tu cúní na snāa na cuéhē tiempo ni, te cáhān ndahú ná jíin ní cuni nahín ní jecu-ni jnūhun cahān na jíin ní. <sup>5</sup>Chi ni cajini na tēe yáha jéē cúu de ĩn tēe tíxín, te sáha de jeē cánacuajnáhan máá jnáhan ñuu ná hebreo ní cáhnu-ni tāca lado, te cúu de tēe cújéhu nuū ñayuu cascuáha jnūhun tēe nání Jesús jeē ní jehnu ñuu Nazaret. <sup>6</sup>Te suni je ndúcú de jeē ství de tācá jniñu ini templo ĩi, te ni cajni ná de. Te cácuni na sándaā na síquí de núú, nájnūhun cáhān ley ñuu ná. <sup>7</sup>Te ni jinū-ni general Lisias, te ni quende fuerza de tēe yáha núu na jíin ná. <sup>8</sup>Te ni ndacu de jniñu jeē tāca ná jeē cácahān na cuēchi síquí tēe yáha quijicoo ná

ndé nuū ní. Te vijna cuu stíchí maá ní de, te jíin jnúhun cahān maá de te cuni ni jéē ni sáha de cuēchi jeē cácahān na jíin ní, áchí Tértulo.

<sup>9</sup>Te suni ni cacahān tēe hebreo jeē ni jíinúcoo jíin de jeē iyó ndáā jeē súcuan cúu cuēchi Pablo. <sup>10</sup>Yūcuán na te ni sáha gobernador seña nuū Pablo jeē na cáhán de, te ni cahān Pablo:

Je jíiní na jéē cuehē cuiyā cúu ní gobernador űuu yáha, te jeē yúcuau núnjahan ni na jéē sándaā ni síquī ná. <sup>11</sup>Chi máá ní cuu nanducú ní te cuni ni jéē sáá máá úxí uū quiví ni cuu jeē ni jéhēn ná űuu Jerusalén jeē chiñúhún ná Yaā Dios. <sup>12</sup>Te tu ní stáhān jnáhan ná jíin ni ĩn űayuu, ni tu ní stóna ná űayuu ini templo ni ini vehe ĩ sinagoga ni ini maá űuu. <sup>13</sup>Ni tú na jíin stéén de jeē iyó ndáā jnúhun cácahān de síquī ná. <sup>14</sup>Te jnúhun cáhán cají ná jíin ní cúu jeē chiñúhún ná Yaā Dios táca jíi na, te suu cúu jeē chiñúhún ná maá Jesucristo, te máá jnúhun yáha-ni cúu jeē cácahān de jeē stívi ná. Te cándíje ná táca jnúhun yósó núu tútu ley yā jíin núu tútu jeē ní catee tēe ni canacani jnúhun ya nde jenahán. <sup>15</sup>Te ĩnuú űúhun ni na jíin de jeē sáha Yaā Dios jeē nátecu táca ndíyí, cúu űayuu ní casáha vāha jíin űayuu ní casáha néé. <sup>16</sup>Te jeē yúcuau máni jeē vāha ndíhví ni na sáha ná. Súcuan te vāha íyó ní anuá na jéē tú na cuēchi ndéé síquī na núu Yaā Dios ni nuū űayuu.

<sup>17</sup>Te ni jica cuu ná táca űuu jicá jecu cuiyā, te sáá te ni ndee na jíin xúhun jéē ní cajēhe táca űayuu jeē chindéé űáhán ĩ jnáhan űuu na cáyucú Jerusalén. Te suni ni ndee na jéē socó na quití nuū Yaā Dios. <sup>18</sup>Te íne ná ini templo síquī jeē cuchi ná ndundoo ná núu Yaā Dios te socó ná. Te jecu jnáhan űuu ná hebreo jeē véjicoo Asia ni cajito de sāñá ini templo, te tú na űayuu cuehē ní cóyūcu jíin ná jeē sávaā ĩ. <sup>19</sup>Te núu ni stívi ná ꞥte naun tu ní quíjicoo tēe Asia un návāha

suni cahān de ndese ni stívi ná? <sup>20</sup>Chí tēe ni quecoo yāhá na cáhán maá de núu na cuēchi ni canihín de síquī na ná ni indichi na núu junta tēe cácujeñnu ini űuu ná. <sup>21</sup>¿Te chí cájequin de cuēchi síquī na jéē ni cáhán jee ná suhva ná ni ĩyo ná nuū junta naún? Chí ni achi na jéē cándíje ná jéē nátecu táca ndíyí, te jeē yúcuau cájequin ni cuēchi síquī ná, ni achi na jíin de. Achí Pablo.

<sup>22</sup>Te Félix chi je jíiní vāha de ndese cácañdíje űayuu Cristo. Te jeē ní jini sōho de jnúhun yáha te ni stétu de un jíinánhan, te ni cahān de:

Nde na quée general Lisias te cajnúhun gá rí síquī jnínu yáha, áchí de.

<sup>23</sup>Te ni ndacu de jniñu nuū capitán jeē na cóne ga Pablo vecāa, te ma cási jeē sáha de jeē cuní de, te ni ma cási jeē quíjicoo jnáhan de jeē chindéé űáhán ĩ de.

<sup>24</sup>Te ni cuu jecu quiví, te ni quiji tucu Félix jíin űasihí de Drusila, te űahan hebreo cúu űa. Te ni ndacu de jniñu jeē na quíji Pablo návāha nacani de jnúhun ndese cándíje yó Jesucristo. <sup>25</sup>Te ni cahān Pablo jíin de jeē cánuú sáha yó jniñu ndaā, te cánuú coto yó máá yó jeē ma sáha yó jniñu stívi, chí quiví sándíhí te sándaā Yaā Dios jniñu ndívi űayuu ndese ni casáha ĩ. Te ni yūhu Félix te ni cahān de:

Vijna te cuáhán, te inga quiví jeē núne ri te cana ri rohó quiji ró, áchí de.

<sup>26</sup>Te űúhun ni de jeē cuāha Pablo xúhun núu de te siáá de quenda de vecāa. Jeē yúcuau tĳni jínu ni cana de Pablo ni candajnúhún de. <sup>27</sup>Te súcuan ni cuu uū cuiyā, te sáá te ni nucuiñí Porcio Festo nuū Félix. Te cuní Félix jeē na cúsi ĩ ni űayuu hebreo jíin de, te jeē yúcuau ní squéndoo de Pablo vecāa.

### Jeē ni índichi Pablo nuū Festo

**25** Te sáá úni quiví jeē ni quívi Festo cuu de gobernador Judea, te ni

quenda de ñuu Cesarea cuahān de ñuu Jerusalén. <sup>2</sup>Te tāca sūtū cácujuhnu jíin tēe cácujuhnu nuū ñáyyuu hebreo ni jinūcoo nuū Festo, te ni cajicān cuēchi siquī Pablo. <sup>3</sup>Te ni cacahān ndahú jíin Festo jeē núu vāha ni de te na nátají de Pablo ndiji ñuu Jerusalén. Súcuan ni cacahān, chí je ni casquínáhan jnūhun jeē cahni Pablo ichi. <sup>4</sup>Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quivī te nuhūn maá de ñuu Cesarea. <sup>5</sup>Te jeē yúcuan ní cahān de jíin táca tēe ún:

Tāca nhín jeē cándiso jníñu, na quín-goo yó nde Cesarea, te yúcuan cácan ni cuēchi siquī de te núu íyó cuēchi de, áchí de.

<sup>6</sup>Te ni ine de yúcuan únā chí úxi-ni quivī, te ni ndee de ñuu Cesarea, te inga quivī ni cucōo de mesa nuū sándaā de jniñu, te ni cahān de jeē na quíji Pablo. <sup>7</sup>Te je cáhiin tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndúu nuū de, te ni caquejéé-ni cásájnúhún téyí siquī de, te tú na jíin ní cástéén jeē iyó ndáā jnūhun cacahān. <sup>8</sup>Te ni cahān Pablo jehē maá de:

Tu ní sáha ná ni iin cuēchi siquī ley ñuu na jéē cácuu ná ñayuu hebreo, ni siquī templo, ni siquī rey nación Roma, achí de.

<sup>9</sup>Te Festo chí cúní de jeē cusī ni ñayuu hebreo jíin de, te ni cajnūhún de Pablo:

¿A tu cúní rō quinhun rō Jerusalén te yúcuan sándaā rí siquī rō? achí de.

<sup>10</sup>Te ni cahān Pablo:

Je índichi na núu cúndaā jniñu jeē ndácu máá tēe cúu rey nación Roma, te yāha cúu nuū cánuú cundaā jniñu ná. Máá ní je jíin vāha ni jéē tú na cuēchi ní sáha ná siquī tāca jnáhan ñuu ná hebreo. <sup>11</sup>Chi núu ni sáha ná iin cuēchi xeēn jeē jíin nūhún cuu ná, te íyó vāha jeē cúu na núu súcuan. Te núu tu íyó ndáā jnūhun jeē casájnúhún tēe yāha siquī ná, te ni iin tēe ma cúu chihi de sāná ndaha tēe

yāha jíjnáhan de. Núu súcuan te cúní na quihín na núu maá rey nación Roma sándaā de siquī na, áchí de.

<sup>12</sup>Te ni cajnūhun Festo ndese cájeni ni tēe cándiso jníñu jíin de. Yúcuán na te ni cahān de jíin Pablo:

Je ni cahān rō jeē cúní rō quihín rō nuū maá rey nación Roma sándaā de siquī rō. Núu súcuan te quihín nahín rō nuū de, áchí de.

### Jeē ni índichi Pablo nuū rey Agripa

<sup>13</sup>Te ni cuu jecu quivī, te rey Agripa jíin Berenice ni jecondéhé de Festo nde ñuu Cesarea. <sup>14</sup>Te tijni quivī ni coyūcú de yúcuán. Te ni nacani Festo jnūhun siquī Pablo nuū rey un. Te suhva ni cahān de:

Félix jeē ní cuu de gobernador, ni stóo de iin tēe íne vecāa yāhá. <sup>15</sup>Te ná ni jehēn ná ñuu Jerusalén, te sutū cácujuhnu jíin ñáyyuu jénu cándiso jníñu nuū ñáyyuu hebreo ni jinūcoo i nuū na cájequin i cuēchi siquī tēe ún, te cácuni i jeē na cúu de. <sup>16</sup>Te ni cahān na jíin i jeē tu íyó costumbre tāca tóhō Roma jeē cahni de iin tēe súcuan-ni, chí jíni nūhún condichi de jíin ñáyyuu cájequin cuēchi siquī de, návāha cahān de jehē maá de te cundaā núu íyó cuēchi de. <sup>17</sup>Yúcuán na te ni quecoo tútú i yāhá. Te inga quivī ún tu ní cúcuéé ná, chí ni cucōo na mesa nuū sándaā na siquī cuēchi, te ni ndacu ná jniñu jeē na quíji tēe ún. <sup>18</sup>Te cáhiin ñayuu cájequin cuēchi siquī de. Te ni jeni ni na jéē iyó cuēchi xeēn cahān de siquī tēe un núu, te tú cuiti. <sup>19</sup>Chi jeē cacahān de cúu máni siquī jnūhun cácañdije-ni máá de, jíin siquī iin tēe nání Jesús jeē jé ni jihí de, te Pablo cahán nihin de jeē ní natecu ndije tēe ún. <sup>20</sup>Te tu ní cújnúní cuiti ni ná ndese sándaā ná, te ni cajnūhun ná de núu cúní de quihín de ñuu Jerusalén te yúcuán cundaā siquī de. <sup>21</sup>Te máá Pablo ni cahān de jeē cuní de quihín de nuū Augusto, rey yō nación

Roma, te yūcuan sándaā rey cuēchi de, ni achi de. Te ni cahān na jēē na cóne de vecāa nde tají ná de quihīn de nuū rey un, áchí Festo.

<sup>22</sup> Yūcuán na te ni cahān Agripa jíin Festo:

Suni cúní maá ná cuni sōho ná jēē cahān tēe un, áchí de.

Te ni cahān Festo:

Sajnē te cuni sōho ní jēē cahán de núu súcuan, áchí de.

<sup>23</sup> Te inga quivī un ní quecoo Agripa jíin Berenice. Te cáñūhun de sahma cújēhnu de, ni quīvicoo de ini vehe juzgado jíin táca general jíin tēe cácujuhnu ini űuu ún. Te ni ndacu Festo jniñu jeē na quíji Pablo. <sup>24</sup> Te ni cahān Festo:

Cahán na jíin ní, tátā rey Agripa, jíin ndīhi nihín jēē cáyūcu jíin yó yāhá vijna. Yāha cúu tēe jeē siquī de ni candonda ndivii jnāhan de hebreo űuu Jerusalén jíin ndé űuu Cesarea yāhá, te máni cácahān i jeē tú vāha jeē cótecu gā de. <sup>25</sup> Te jēni ni maá ná jēē tú na cuēchi xeēn ni sáha de jeē cúu de. Te je ni cahān de jeē cuní de quihīn de nuū rey Augusto jeē sándaā rey un síquī de, te jeē yūcuan ní cahān na jēē tají ná de quihīn de nuū rey un. <sup>26</sup> Te tu cúcāhnu ni ná na jnūhun tee ná núu tútu quihīn jíin de nuū rey yō. Jeē yūcuan ní ndacu ná jniñu ni quee de nuū yō jijnāhan yó, te cánuú gá nuū maá ní, tátā rey Agripa. Te stíchí ni de návāha nihīn na jnūhun tee ná síquī de, te quihīn jnūhun un jíin de nuū rey. <sup>27</sup> Chi tu jéjníñu cuiti jeē tají ná iin preso quihīn te núu tú castūhun ná nuū tútu na cuēchi ni sáha de, áchí Festo.

### Jeē ni cahān Pablo jehé maá de nuū rey Agripa

**26** Yūcuán na te ni cahān rey Agripa jíin Pablo:

Vijna te jéhe ri jnūhun cahān rō jehē maá ró, achí de.

Te Pablo ni sáha de ndaha de jeē ní quejéé de cáhán de, te suhva ni cahān de:

<sup>2</sup> Tátā rey Agripa, cúsiī ni ná vijna jeē cúu cahān na jíin ní siquī ndīhi jeē casájñuhún ñayuu űuu yō hebreo siquī ná. <sup>3</sup> Chi je jíiní vāha máá ní táca jēē ní tajnúní ñayuu űuu yō hebreo jíin táca jnūhun jeē tu cáhiin inuú i jíin. Jeē yūcuan cáhán ndahú ná jíin ní jeē coo paciencia ni cuni sōho ní jnūhun cahān na jíin ní.

### Jeē ní cachi Pablo ndese ni sáha de nde ná tu sama ya ini de

<sup>4</sup> Je cájini táca jnāhan űuu yō hebreo ndese ni sáha ná ini űuu nuū ní cacu ná jíin ini űuu Jerusalén nde ná lulí ná. <sup>5</sup> Te núu cácuni maá de cahān ndaā de, te je cájini de sāna jēē ndé lulí ná ni quīvi ná nuū grupo fariseo, te grupo un nihīn ga cánducú ndéyí de squícu de ley yā vēsú táca gá grupo tēe nación yō. <sup>6</sup> Te űūhun ni na jnūhun ni jejnūhun Yaā Dios nuū táca jíi yō jeē nastécu yā ndīyi, te máá síquī táca jnūhun yāha-ni cúu jeē cájequin de cuēchi siquī ná. <sup>7</sup> Chi máá yó jeē cácuu yó jnāhan ndihúxí uū yucūn ñayuu Israel, cáñūhun ni yō jnūhun ni jejnūhun ya jeē nastécu yā ndīyi, te jeē yūcuan nduú űuú cáchiñuhún yó Yaā Dios te cájejníñu yó núu yā. Te suni súcuan űūhun ni maá ná, tátā rey Agripa, te siquī jeē nácani ná jnūhun jeē natecu ndīyi cúu jeē cájicān jnāhan űuu yō hebreo cuēchi siquī ná. <sup>8</sup> ¿Te chí má nastécu Yaā Dios táca ndīyi cájeni ni ní naún?

### Jeē ní cachi Pablo ndese ni jito xeēn de ñayuu cácadíje

<sup>9</sup> Te máá ná chí ni jeni ni na jēē jíini ñūhún ndonda ná síquī ñayuu cácadíje i Jesús, Yaā ní jehnu űuu Nazaret. <sup>10</sup> Te súcuan ni sáha ná ini űuu Jerusalén, chí táca sūtū cácujuhnu ni cajēhe de jnūhun

jeē cóndiso jniñu ná chuhun ná cuéhē ñayuu vecāa siquī jeē cácadnje i Jesús, te íyó váha ni na núu cájehni de i. <sup>11</sup> Te tijní jínu ni sáha ndevāha na jíin i ini táca vehe ii sinagoga jeē ni sáha fuerza na i jeē na stóo i jñuhun cácadnje i. Te xeēn ni quitī ni na núu i, chi nde ñuu jicá ní jehēn ná ni sáha xeēn na jíin i.

**Jeē ní cachi tucu Pablo ndese ni sama ya ini de**

(Hch. 9.1-19; 22.6-16)

<sup>12</sup> Te sutū cácujeñhu ni cajēhe de jñuhun jeē cóndiso jniñu ná quñin na sáha xeēn na jíin ñayuu cácadnje cáyūcú ñuu Damasco nuú. <sup>13</sup> Te cuahān ná ichi ún, tátā rey, te caxū cúu, te ichi ándiví ní quiiji ñin nduva ni ndindēé ndaxín núu na jíin núu té cuangoó jíin ná, te víhyá gā ndíi vēsú niāndii. <sup>14</sup> Te ndíhi ná ní cacotúú ná nuū ñúhun. Te ni jini sōho ná ñin jñuhun ni cahān jíin ná jíin jñuhun yuhu yó hebreo: Saulo, Saulo, ¿najehē jíto xeēn rō ruhū? Chi jeē sáha ró súcuan cúu nájnūhun stiquī jeē tu jéndije tí, te jéñú yatá tí xinī pulla, te súcuan stóho tí maá tí, áchí. <sup>15</sup> Yūcuán na te ni cahān ná: ¿Na nihín cúu jeē cahán, Tátā? achí ná. Te maá Jítoho na ní cahān yā jíin ná: Máá rí cúu Jesús, te jeē jíto xeēn rō ñayuu cácadnje i ruhū cúu jeē jíto xeēn rō ruhū. <sup>16</sup> Ndongda condichi rō, chi vēji ri nuū rō jeē tejñíñu rí rohó sáha ró jniñu cúní rí, te nacani cájí ró jñuhun táca jēé ní jito ró vijna, jíin jēé steén gā rí nuū rō táca quívi quíji. <sup>17</sup> Te jnama rí rohó núu táca jnáhan ñuu rō jíin núu ñayuu táca gá nación, chi nuū ñayuu un tájí rí rohó quñin rō. <sup>18</sup> Te tájí rí rohó quñin rō nuū i, chi nájnūhun nanune ró tñnúu i cúu jeē steén rō jñuhun rí nuū i te jecūhun ni i. Chi ñayuu ná tu candje i ruhū, nájnūhun cájica i nuū nēé. Te jeē candje i ruhū, quívi i nuū luz rí, te tuá quíhi i chíji jniñu jeē cuní jex- eēn jeē cúu Satanás, chi sa suhva quíhi

i chíji jniñu cúní maá rí. Te tájí rí rohó quñin rō nuū i, návāha candje i ruhū te cone cáhnu ni rí nuū cuéchi i. Yūcuán na te inuú níhin tahú i jíin táca gá ñayuu jeē ni sándoo ri anuá i, áchí yá jíin ná.

**Jeē ní cachi Pablo ndese ni jetáhú de jñuhun ni cahān yā**

<sup>19</sup> Jeē yúcuán tu ní sáníhni ni na núu jñuhun ni cahān yā ichi ándiví jíin ná, tátā rey Agripa. <sup>20</sup> Chi ni jetáhú ná, te ni nacani ná jñuhun ya xihna gā nuū ñayuu ñuu Damasco, te sáá te ni nacani ná jñuhun ya nuū ñayuu ñuu Jerusalén jíin ní región Judea jíin núu ñayuu táca gá nación. Te jñuhun ni nacani ná núu i cúu jeē na nácani ni i jeē stóo i cuéchi i te nasāma ini i sáha Yaā Dios, te na sáha i jniñu váha jeē steén jeē ní nasāma ini i. <sup>21</sup> Te siquī jeē súcuan ni nacani ná jñuhun te ni cajñi jnáhan ñuu yō hebreo sāñá ini templo, te ni cacuni i cahni i sāña núu. <sup>22</sup> Te ni chindéé ñáhán Yáā Dios sāñá, te jeē yúcuán índichi níhin na ndé vijna nácani cájí ná jñuhun ya nuū ñayuu cácujeñhu jíin núu táca-ni ñayuu. Chi tu chíso gá na jñuhun siquī jñuhun jeē ní nacani Moisés jíin táca gá tēe ni canacani jñuhun Yaā Dios nde jenahán. <sup>23</sup> Te ni cundaā jñuhun ni canacani de un jēé cánuú ndoho Cristo nde cuu yā, te xihna gā maá yá natecu vēsú táca gá ndīyi, te súcuan steén cají yá nuū ñayuu jeē jnáma ya i, cúu ñayuu nación yō Israel jíin ñayuu táca gá nación, áchí Pablo.

**Jeē ní nducú ndéyí Pablo scandje de Agripa jñuhun Jesús**

<sup>24</sup> Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siquī jeē ni scuáha ndasí ró te jeē yúcuán ní tñvi xíní rō, áchí de.

<sup>25</sup> Te ni cahān Pablo:



Tu ní tívi xíní na, tátā Festo, chí sa suhva íyó cájí ndáá jnúhun cáhán na. <sup>26</sup>Te máá rey Agripa je jíní vāha de tācá jniñu ní íyo jeē ní nacani ná, te tu yúhú ná cahān na táca jnúhun yáha, chí je jíní vāha na jéē jíní de tāca jnúhun yáha, chí tú sāhi ní cúu tācá jniñu yáha. <sup>27</sup>Tátā rey Agripa, ¿á cándíje ní jnúhun jeē ní cacahān tēe ní canacani jnúhun ya nde jenahán? Jéni ní na jéē cándíje ní, áchí Pablo.

<sup>28</sup>Yūcuán na te ní cahān Agripa jíin Pablo:

Va jéni ní rō jeē jíin jecu jnúhun ní cahān rō te sāha ró jeē cándíje ri Cristo, achí de.

<sup>29</sup>Te ní cahān Pablo:

Vésú jíin jecu-ni jnúhun chí jíin cuéhē, te jícán tahu na jéē maá ní jíin táca gá tēe cájini sōho jnúhun cáhán na vijna, na cándíje ní nájnúhun cándíje máá ná, te tu cúní na jéē cónuhni ní nájnúhun núhni na.

<sup>30</sup>Te ní ndihi ní cahān Pablo tāca jnúhun yáha. Te ní ndocuiñi rey jíin gobernador jíin Berenice jíin táca gá tēe cácujeñu cáyūcu jíin de. <sup>31</sup>Te ní cacujiyo de, te ní candajnúhun síin máá de:

Tú ní iin cuēchi ní sāha tēe yáha jéē cúu de ní jeē cóne ga de vecāa.

<sup>32</sup>Te ní cahān Agripa jíin Festo:

Cuu siáá ní tēe yáha núu jeē tu ní cáhán maá de jeē quihín de nde nuū rey yō nación Roma nuú, áchí de.

### Jeē ní catají de Pablo cuahān de ñuu Roma

**27** Te ní cundaā jeē quihín Pablo jíin barco nde Italia, te suni quingoo ná jíin de. Te Pablo jíin sava ga tēe cáhiin vecāa ní quivicoo de ndaha iin capitán naní Julio jeē quíndēca de tēe un ndé Italia. Te Julio cúu iin jnáhan grupo soldado naní Augusto. <sup>2</sup>Te nde ñuu Adramitio nuū cájecuiñi barco ní quenda iin barco ní quee, te ní quivi-

coo ná, te quihín barco un táca ñuu jeē yíhi chíji Asia jeē yúcu yumar. Te suni cuahān Aristarco jíin ná, te máá de cúu tēe ñuu Tesalónica región Macedonia. <sup>3</sup>Te inga quiví ní jinūcoo ná ñuu Sidón nuū cájecuiñi barco. Te Julio ní cundáhú ní de Pablo, te ní jēhe de jnúhun ní jecondēhe Pablo táca amigo de, te ní cachindéē ñáhán i de. <sup>4</sup>Te ñuu yúcuan ní quenda barco cuahān jíin ná. Te siquí jeē níhin yíhi tachí te tu ní cúu quihín yohó barco, te ní tee xín barco cuahān jíin ná xiin isla Chipre, ñuhun jeē íne síin nuū ndúte, te lado jecó barco ní quendōo Chipre. <sup>5</sup>Te ní cayāha ná yumar Cilicia jíin Panfilia cuahān ná, te ní jinūcoo ná ñuu Mira ndañúu Licia.

<sup>6</sup>Te ñuu yúcuan ní nihín capitán iin barco jeē véji ñuu Alejandría te quihín ichi Italia, te ní cahān de jíin ná ní quivicoo ná barco un. <sup>7</sup>Te cuéhē quiví ní cahíin na núu ndúte jíin barco, chí cuéé ní jica, te fuerza-ni ní jinūcoo ná yuñúu Gnido. Te tuá ní jēhe tachí un jnúhun quihín yohó barco, te ní cayāha ná núu jnúhma tachí xiin núu Salmón jeē íne nuū isla Creta. <sup>8</sup>Te yōhyo ní canducú ndéyí tēe cáscaca barco un, ní yáha jíin ná níf yumar xiin Creta. Te ní jinūcoo ná iin lugar naní Buenos Puertos nuū cájecuiñi barco, te yajni un íne ñuu Lasea.

<sup>9</sup>Te je ní cuu cuéhē quiví ní cajica ná jíin barco. Te je yajni quejéé vico míjin, te yúcuan cúu tiempo jeē yáí jica barco te sanaa te coo jnúndóho nuū mar. Te ní cahān níhin Pablo jíin de:

<sup>10</sup>Tátā jijnáhan ní, jíin na jéē yóhyo yáí coo viaje yáha, te quiji jnúndóho siquí barco, te naa barco jíin ndajniñu, te nde maá yó sanaa te cuu yō, achí de.

<sup>11</sup>Te tu ní chúsóhó capitán jeē cahán Pablo, chí sa suhva jeē cahán tēe scāca barco un jíin tēe chíí barco. <sup>12</sup>Te siquí jeē tu íyó vāha lugar nuū ní jécuiñi barco un jéē cóyucú de níí vico míjin, te ní cajeni ní cuéhē gā de jeē vāha ga núu

quendacoo de yūcuán. Chi cájeni ni de jeē núu cuu te jinūcoo de ñuu Fenice te yūcuán coyūcú de vico mǐjin. Chi Fenice suni íne yundúte isla Creta nuū cáje-cuiñi barco, te ndijin ichi noroeste jíin suroeste.

**Jeē ni jequǐhi ñin tachī ñihin  
jeē stóna ndute mar**

<sup>13</sup>Te ni jequǐhi vīta táchī ichi sur, te ni cajeni ni de jeē jinú de Fenice núu, te ni cascáca ga de barco jíca jíin de xiin Creta. <sup>14</sup>Te ni cunúu jecu gā, te ni quejéé-ñi ñin tachī ñihin ndasí jeē naní táchī nordeste. <sup>15</sup>Te tuá ni cúu ga qui-hñ yohó barco, chi ni chundahá-ñi tachī cuahān jíin, te ni casiáá-ñi de jeē cascáca de, te cháha chúcuan cuahān barco jíin ndihi ná sáha tachī. <sup>16</sup>Te ni yáha jíin ná xiin isla lulí jeē naní Claudia, nuū jnúhma tachī. Te vēsú súcuan te yōhyo uhū ni cascáca ná barco lulí jeē ndiquín yatā barco cáhnu. <sup>17</sup>Te ni casquívī ná ini barco cáhnu. Te ni casucun núu de barco cáhnu jíin yoho. Te cáyühú de jeē quihín barco nuū yaxín ndute nuū naní Sirte te jññ nuū ññti, te jeē yúcuan ní cas-núu de sahma cóquin jeē stehí te jíca barco. Te ni casiáá de jeē na quihín ndé chi chundahá táchī. <sup>18</sup>Te tu jécuiñi cuiti jeē yñhi tachī ñihin. Te inga quivī un ní caquejéé de cájete de ndajññi ndíso barco, návāha nduñama gā barco te ma queé chiji ndute. <sup>19</sup>Te quivī uní ni cajēhe núu ná ndaha ni cajete ná máá ndajññi jéjññi barco. <sup>20</sup>Te cuehē quivī tu ní cájito ná níandii ni quǐmi siquǐ jeē ín vicō, ni tu jécuiñi cuiti tachī ñihin ún, te tuá cáñuhun ni na cácu ná.

<sup>21</sup>Te ni cuu quivī jeē tuá cáyeji cuiti na stāa. Te ni jecondichi Pablo sava mēhñu téé ún, te ni cahān de:

Tátā jijnáhan ní, núu ní cájetáhú ní jnúhun jeē ni cáhān ná te ma quéndacoo yó Creta nuú, te ni ma cóto yó jnúndóho

yáha ni ma náa ndajññi núu. <sup>22</sup>Te vijna cáhān ñihin na jíin ní jeē cuandeyí ni ni jijnáhan ní, chi ni ñin ní má cúu ní, vēsú naa barco. <sup>23</sup>Chi jeē cúni ni quiji ñin ndajéhe jeē ní tají máá Yáa Dios nuū ná. Chi máá yá cúu Jitoho ná, te jéjññi ná núu yā. <sup>24</sup>Te ndajéhe yā ún suhva ni cahān yā jíin ná: Pablo, ma yūhu ró, chi vāha-ñi jinū rō nuū rey nación Roma, te jeē siquǐ rohó te sáha Yáa Dios jeē cácu ndihi téé cáhiin jíin ró ini barco yáhá, áchí yá jíin ná. <sup>25</sup>Tátā jijnáhan ní, ma yūhu ní núu súcuan, chi máá ná cúcāhnu ni na Yáa Dios jeē coo nájnūhun ni cahān ndajéhe yā jíin ná. <sup>26</sup>Te jinū nahín yó ñin isla, te ma jinú yachī yō nuū quíngoo yó, áchí de.

<sup>27</sup>Te ni cuu uxí cuñ jecuáa nde jeē ní quejéé táchī, te jíca barco nuū mar Adria, te cháha chúcuan cuahān barco sáha tachī. Te máá jecuáa ún te jeē ní cuu sava ñuú te cájeni ni téé cascáca barco jeē jé cuacuyajni jinū barco ñuhun íchi. <sup>28</sup>Te ni casínga de ñin jeē cáchicuāhá de nasaa cúnu ndute, te ni cajini de jeē iyó ócō xahūn ñin metro. Te ni jica barco jecu gā te ni casínga tucu de, te ni cajini de jeē iyó ócō uxā na metro. <sup>29</sup>Te cáyühú de jeē jécujnáhan barco jíin toto, te ni cajihni de cuñ cāa gancho náhnu yatā barco un, te ni cascāne de nde jehē ndute návāha chituu te jécuiñi barco. Te yōhyo jnāa de jeē na cúndijin yachī. <sup>30</sup>Te téé cascáca barco un ní canducú de cunu de quíngoo de jíin barco lulí te cácu de nuū jnúndóho quiji siquǐ barco cáhnu núu. Jeē yúcuan ní casnúu de barco lulí un núu ndúte, te casáha-ñi de nájnūhun jeē snúu de inga cāa gancho ichi núu barco návāha tú cuni ñayuu jeē cácuni de cunu de quíngoo de. <sup>31</sup>Te ni cahān Pablo jíin capitán jíin táca soldado:

Núu tú coyūcu téé yáha ini barco cáhnu jíin yó, te ma cácu cuiti maá ní jijnáhan ní, áchí de.

<sup>32</sup>Yūcuán na te soldado ni cajehnde de yoho núhní barco lulí, te ni jneni-ni cuahān.

<sup>33</sup>Te nuū cuácundijin te ni cahān Pablo jíin táca tée un jéē na cáji de staā. Te suhva ni cahān de:

Vijna íyó úxī cuūn quivī jeē cándīto ní te tu cáyeji cuiṭi ní staā. <sup>34</sup>Te cáhān ndahū ná jíin ní jeē na cáji ní staā, návāha nanihin ní ní te cācu ní, chí ní iin yó má cúū, ní ma tují cuiṭi yō, achí de.

<sup>35</sup>Te ni ndihi ni cahān de jnūhun yáha, te ni quihin de iin staā, te mēhñu táca ñáyuu un ní nacuatáhú de nuū Yaā Dios, te ni tahu sáva de staā ún, te ni quejéé de yéji de. <sup>36</sup>Yūcuán na te ni candusī ní ndihi de, te suni ni cayejí de staā. <sup>37</sup>Te ndivii na jéē cáñūhun ná ini barco cúu uū ciento unī xico xahūn iin ná. <sup>38</sup>Te ni cayejí vāha ndihi ná. Yūcuán na te ni cajete de trigo cuahān nuū ndúte un, návāha na ndūñama gā barco.

### Jeē ni quée barco chíji ndute

<sup>39</sup>Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū íne cuiñi ndute, te suni máá ñfti cúu, te cájeni ní de jinū de yūcuan jíin barco núu na cúu núú. <sup>40</sup>Te ni cajehnde de yoho núhní cāa gancho yūcuan, te ni caquendōo cāa un núú mar. Te ni canandají de yujnu jeē scotú chíf barco, te ni nacata caa de sahma cóquin ichi núú návāha chundahá táchi barco, te ni quejéé caca quihin jíin de ichi núú iyó ñfti. <sup>41</sup>Te ni jinū barco nuú níhin náquijnáhan ndute. Te ni quée barco nuū ñfti ñuhun chíji ndute, te ni jñi-ni ichi núú te tuá ní jíca cuiṭi, te yatā barco un ní cahya-ni jeē níhin ní cani suhmā ndute mar. <sup>42</sup>Yūcuán na te ni canda-jnūhún soldado jeē cáhni de táca preso návāha ma súde i te cunu i quingoo i. <sup>43</sup>Te cúní capitán un jéē cācu Pablo, te ni jesicoo de. Chí sa ni cahān de núu ndé

ñáyuu jíin súde te xihna gā i na núngoo i súde i nuū ndúte, te na quenda-ni i quihin i nuū ñuhun íchi. <sup>44</sup>Te suni súcuan na quécōo ndihi i quihin i, sava i coso candá i jíin yujnu cúnu te sava ga i jíin pedazo yujnu barco. Te súcuan ní cacācu ndihi ná ní jinūcōo ná ñuhun íchi.

### Jeē ni íne Pablo isla Malta

**28** Te nuū ní cacācu ná te ñayuu cáyūcu yūcuan ní cacachi i nuū na jéē isla un nání Malta. <sup>2</sup>Te ñayuu un ní cacundáhú ni i sāña jíjnáhan ná, te ni cascáyú i iin ñuhūn cáhnu, te ni cacahān i jíin ná jeē nasaā ná, chí mijin sáha jeē cúun saū. <sup>3</sup>Te ni stutú Pablo jecu tujnu íchi. Te jeē jnāá de tujnu un núú ñuhún te iin coō xeén jínu tí ní quenda tí tujnu un jéē ní cujihní, te ni chiyuhú-ni tí ndaha de. <sup>4</sup>Te ñayuu cáyūcu yūcuan ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndīyi núu súcuan, te vēsú je ní cācu de nuū mar, te máá yáá sándaā jniñu ñayuu tu jéhe ga yā jnūhun jeē cótecu de, achí i.

<sup>5</sup>Te ni caja Pablo ndaha de, te ni ñinga coō un núú ñuhún, te tú na vé ní ndóho de. <sup>6</sup>Te cándētu táca ñáyuu jeē chúhun i cuiñi de chí cotúú-ni de te cuu de. Te ni cunahán téyí cándētu i, te ni cajito i jeē tú na vé ní ndóho de. Yūcuán na te ni nasāma cájeni ní i, te ni cacahān i jeē iin yaā cúu Pablo.

<sup>7</sup>Te yajni yūcuan íyó ñuhun tēe cújéhnu ga Malta un, nání de Publio. Te ní cana tēe un sāña jíjnáhan ná, te ni jéhe núu de vehe de ní coyūcu ná jíin de unī quivī, te ní jito yúcún de sāñá. <sup>8</sup>Te tátá Publio cāa de, chí ndóho de cuehyī quiji jíin cuéhyī niñi. Te ní jecondēhe Pablo tēe ún, te ní jicān tahu de te ní soó de ndaha de siquī tēe ún, te ní nduvāha-ni de. <sup>9</sup>Yūcuán na te ní quijicoo ndihi ga ñayuu cacuhū yūcuán, te suni súcuan ní canduvāha-ni i. <sup>10</sup>Te ñayuu un ní cajéhe

i cuehē ndajniñu ni cacutahū ná. Te nuū ni jínū quivī jeē quíngoo tucu ná jíin barco, te ni cajēhe i tācá ndajniñu cuu ná ichi.

### Jeē ni jínū Pablo ñuu Roma

<sup>11</sup> Te unī yoō ni coyūcu ná Malta. Te iin barco jeē véji ñuu Alejandría ni ine Malta nií vico míjin, te ichi núú barco un ndéé uū figura ídolo ñuu de nání Cás-tor jíin Pólux. Te ni quivícoo ná barco un cuángoo ná. <sup>12</sup> Te ni jinūcoo ná ñuu Siracusa, te yūcuan ní coyūcu ná unī quivī. <sup>13</sup> Te ni quenda barco cuahān jíin ná nduu nduu yundúte, te ni jinūcoo ná ñuu Regio. Te inga quivī ún vāha ni quiji tachī ichi sur, te ni quendacoo ná ñuu Regio, te uū quivī te ni jinūcoo ná ñuu Puteoli. <sup>14</sup> Te yūcuan ní caquijnáhan ná jíin jecu hermano cácandíje, te ni cacana de sãña ní coyūcu ná jíin de iin semana. Yūcuán na te ni quendacoo ná jéē quihīn ná ñuu Roma. <sup>15</sup> Te hermano cáyūcú ini ñuu Roma, je ni canihīn de jñūhun jeē jinūcoo ná, te ni quendacoo de, te sava de ni caquijnahan de sãña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíjnáhan de, te ni nacuatáhú de nuū Yaā Dios, te ni ndundeyí ni de. <sup>16</sup> Te sáá te ni jinūcoo ná ini ñuu Roma, te capitán ni squívi de tāca preso ndaha tēe cújéhu nuū tācá soldado ñuu Roma. Te ni cajēhe de jñūhun jeē cone sīin Pablo te condito iin soldado de.

### Jeē ní nacani Pablo jñūhun ya ini ñuu Roma

<sup>17</sup> Te nuū unī quivī te ni cana Pablo tāca tēe cácujeñhu nuū jñáhan ñuu de hebreo cáyūcú ini ñuu Roma. Te ni cacutútú de, te ni cahān Pablo jíin de:

Tátā jíjnáhan ní, tú cuítī na vé ni sáha ná síquī jñáhan yó hebreo ni síquī tācá jniñu ní catajnúní jíi yō. Te vēsú súcuan te ni cajniī i sãña ndé ñuu Jerusalén

ni casquívi i sãñá ndaha tēe ñuu Roma jíjnáhan de. <sup>18</sup> Te tēe ñuu Roma jeē cácujeñhu cáyūcú Cesarea ni castíchi de sãñá, te cácuni de siáá de sãña núú, chi ni cajini de jeē tú na cuéchi ná jéē cúu ná. <sup>19</sup> Te jñáhan ñuu yō hebreo tu ní cájēhe de jñūhun. Jeē yúcuán ní cahān na jéē quiji ná núú maá rey cujéhu ga nde ñuu Roma yāhá te sándaā maá de síquī ná. Te tú véji ná jéē cáquin na cuéchi síquī ñayuu nación yō. <sup>20</sup> Jeē yúcuán ní cana ná níhín jíjnáhan ní, návāha cuni na táca ní te ndajñūhun yó. Chi yóhó ñayuu Israel cáñūhun ni yō jeē nátecu ndíyī, te suu jñūhun un nácani ná, te jeē yúcuán cúu jeē nuhni na jíin cadena yáha, áchí de.

<sup>21</sup> Te ni cacahān tēe un jíin Pablo:

Tú ni iin carta ni cátají ñayuu cáyūcú Judea nuū na jéē cástūhún de jñūhun ní, te tāca jñáhan yó Judea jeē ní quijicoo yāhá, tú ni iin jñūhun néé ní cácahān de síquī ní. <sup>22</sup> Te cánujnahan ni ná cuni sōho ná ndese cúu jñūhun jeē cahán ni, chi je cájini na jéē tācá-ni lado cácahān ñayuu contra síquī jñūhun jeé jéē steén ni, áchí de.

<sup>23</sup> Te ni cajeni de iin quivī, te ni quijicoo cuehē de vehe nuū néne Pablo. Te ni nacani de jñūhun ndese ndácu Yaā Dios jniñu, te ni steén cají de jñūhun nde jenéhen te nde ni ini. Te súcuan ni nducú ndéyí de scándíje de tāca tēe un jñūhun Jesús, te ni steén de jeē suni súcuan cáhán ley jeē ní jéhe ya nuū Moisés jíin jñūhun jeē ní catee tēe ni canacani jñūhun Yaā Dios nde jenahán. <sup>24</sup> Te ni cacandíje sava de jñūhun ni cahān Pablo, te sava ga de tu ní cá-jetáhú de. <sup>25</sup> Chi tú inuú cáhiyo ni de. Te sáá cánducú de quíngoo de te ni cahān Pablo:

Ndaā cahán jñūhun jeē ní cáhān Isaías, tēe ni nacani jñūhun Yaā Dios nde jenahán, chi suhva ni cahān de jíin tāca jíi yō ni sáha Espíritu Santo:

<sup>26</sup>Ni cahān Yaā Dios:

Cuáhán núū jnáhan ñuu rō yāhá te cahān  
rō jíin i:

Vēsú cuni nahín váha ró te ma jécūhun  
ni rō,

te vēsú coto vāha ró te ma cúni rō.

<sup>27</sup>Chi yōhyo nihni ni rō,

chi tu cācuni rō cuatáhú ró.

Te yōhyo uhū cājini sōho ró,

chi tu cánujnahan ni rō cuni sōho ró  
jnūhun ri.

Te nájnūhun cájesi rō tinūu ró

cúu jeē tu cācuni rō nanducú ró ndese  
cúu,

te tu cācuni rō jeē násāma ini rō

návāha nasávāha ri anuá rō nuū cuéchi  
ró, ní achi Yaā Dios.

Achí tutu. <sup>28</sup>Núu súcuan te na cástūhun  
ná nuū ni jēē jnūhun ni tají Yāā Dios  
jeē jnáma ya yohó, nde vijna te tájí  
yá jnūhun yáha quíhīn nuū ñáyuu tācá  
nación jeē tu cājini i jnūhun ya, te máá i  
chí cuni sōho i, áchí de.

<sup>29</sup>Te ni jinu ni cahān de jnūhun yáha,  
te cuangoo jnáhan de hebreo, te yōhyo  
ni cacahān de siquī jnūhun yáha jíjnáhan  
de.

<sup>30</sup>Te ni condee Pablo uū cuiyā vehe  
jeē ní quihin núu de ún. Te ni cusīi ni de  
cahān de jíin táca ñáyuu ní quiijcoo nuū  
de. <sup>31</sup>Te jéhnū-ni ni nacani de jnūhun  
ndese ndácu Yaā Dios jniñu, te ni steén  
de jnūhun máá Jítóho yō Jesucristo, te  
tú ni ñn ní jési jeē nácani de jnūhun.

## CARTA JEE NI TEE SAN PABLO APOSTOL NUU ÑAYUU ÑUU ROMA

**1** Máá rí cúu Pablo, mozo Jesucristo, chi ni cana Yaā Dios ruhū cúu ri apóstol yā, ni jeni ya ruhū te ni tají yá ruhū jeē nácani ri jnūhun jeē jnáma ya ñayuu.

<sup>2</sup>Te jnūhun un ní jejnūhun ya nde jehán ndasí, te yósó núu tútu ii jeē ní catee tēe ni canacani jnūhun ya. <sup>3</sup>Te jnūhun un cáhán siquī Jitoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucūn rey David. <sup>4</sup>Te ni natecu yā mēhñu ndíyi ni sáha Espírítu ii, te súcuan ni steén Yaā Dios jeē cúu ya Sēhe ya jeē ndíso poder. <sup>5</sup>Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnūhun Cristo, návāha coo ñayuu tācá nación jeē candíje i jeē sáha ya jehē i, te cuatáhú i nuū yā. <sup>6</sup>Te suni máá ró jijnáhan ró, suni ni cana ya rohó ní quívi-coo ró ndaha Jesucristo.

<sup>7</sup>Te tēe ri carta yáha cuajeē nuū rohó ñáyuu ñuu Roma. Chi ni cundáhú ni Yaā Dios rohó, te ni cana ya rohó jēe coo ndoo coo ii rō nuū yā. Te ñūhun ni rí jeē máá Tátá yō Yaā Dios jíin Jitoho yō Jesucristo sáha ga yā jeē váha rōhó, te sáha ya jeē coo ndeyí coo sñi ni rō.

### Jeē cuní Pablo quihñ de ñuu Roma

<sup>8</sup>Te xihna gā cástūhun rí nuū rō jeē nácuatáhú rí nuū Yaā Dios jeē siquí rohó jijnáhan ró, chi ni sáha Jesucristo jeē váha rōhó. Chi ní ñáyívi jíte núu jnūhun cuahān ndese váha cá candíje ró yá. <sup>9</sup>Te máá Yaā Dios jiní yā jeē niní jíicán tahu rí jehē rō jijnáhan ró nuū jíicán tahu rí. Chi yōhyo ndíhví ni rí jejníñu ri nuū yā jeē nácani ri jnūhun Sēhe ya. <sup>10</sup>Te níni jíicán tahu rí nuū yā jeē núu cúní yā te nde vijna te cuu jecondēhe rí rohó. <sup>11</sup>Chi cúu

ni rí coto ri nuū rō jijnáhan ró, te steén gā ri jnūhun ya nuū rō, návāha quendōo váha ga anuá rō te cuiñi ñihin ga rō jíin. <sup>12</sup>Súcuan cúní rí návāha sáha yó jēe inuú coo ndeyí ni yō jijnáhan yó siquí jeē ínuú cá candíje yó yá.

<sup>13</sup>Hermano jijnáhan ró, cúní rí jeē na jécūhun ni rō jeē tíjni jínu ni cuu ni rí jecondēhe rí rohó, te nde vijna ná tu cuu. Chi cúní rí scuité núu ga ri jnūhun ya mēhñu ró, nájnūhun ni sáha ri mēhñu ñáyuu tāca gá nación. <sup>14</sup>Chi cúu ri tēe táu siquí jnūhun ya, chi táu rí nacuāha ri jnūhun ya nuū ndíhi ñayuu, cúu ñayuu jiní gā siquí ndíhi jeē iyó ñayívi jíin jēe tu jíni cuítí, cúu ñayuu tūhva jíin jēe tú tūhva. <sup>15</sup>Jeē yúcuan cúu jeē ndíhví ni rí jeē suni nuū rohó ñáyuu ñuu Roma nacani ri jnūhun jnáma ya yohó.

### Jeē ndíso jnūhun váha ya poder

<sup>16</sup>Chi tu cúcanu rí siquí jnūhun váha ya, chi yúcuan cúu poder Yaā Dios jeē jnáma ya tāca ñáyuu cá candíje, xihna gā ñáyuu hebreo te suni tāca gá ñayuu. <sup>17</sup>Chi jnūhun váha ya un steén nuū yō jeē ndáhva Yaā Dios cuēchi yó síquí jeē candíje yó jēe sáha ya jehē yō, te máá jēe candíje yó ní cuahān yō. Chi súcuan cáhán nuū tútu ii: Ñayuu jeē ní ndahva yā cuēchi i, técu i jeē candíje i jeē sáha ya jehē i, áchí.

### Siquí jeē iyó ndasí cuēchi ñayuu

<sup>18</sup>Chi jíni váha yó jēe Yaā Dios andiví, cuāha ya castigo xeēn nuū tāca ñáyuu tu cá candíje te máni cuēchi cásáha. Chi jíin jniñu née cásáha i te cájesi i nuū jnūhun ndaā. <sup>19</sup>Te ma cúu cahān i jeē tu jécūhun ni i siquí ndese Yaā cúu Yaā Dios, chi máá yá ni steén nuū i. <sup>20</sup>Chi jíin táca jeē ni sáha ya te cúu jécūhun ni ñayuu ndese Yaā cúu máá Yaā tu jíto i nuū. Chi nde ni jecōo ñayívi jíin ndé vijna te cúu jécūhun váha ni i jeē máá yá cúu Yaā Dios te íyo poder yā ní cání. Te jeē yúcuan má cúu

cuítì cahān i jeē tu jíni i jeē iyó yá. <sup>21</sup> Chi vēsú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cāhá ni, chi ni candunéé í i, te ni quendōo nee ini anuá i. <sup>22</sup> Cácahān i jeē ndichí i, te sa suhva cáacunéé i. <sup>23</sup> Chi ni castóo i Yaā Dios jeē yóhoyo luu cújéhu, jeē ma cúu cuítì. Te ni cajetáhú i táca imagen jeē casáha i, jeē cáa nájnūhun tēe cájilhi, te suni nde imagen saa jíin cóo jíin quitì cájica ndicúun ndaha.

<sup>24</sup> Te jeē yúcuan ní siaá Yaā Dios i jeē na sáha i táca jniñu jnéhen jniñu néé jéé cuní i. Te casáha i jniñu néé jíin jnáhan i jeē cúu máa jnúhun canu. <sup>25</sup> Chi tu ní cácañdije i jnúhun ndaā Yaā Dios, chi sa ni cacañdije i jnúhun stáhú. Te cáhīyo yíñúhún i te cáchiñúhún i nuū táca jéé ni sáha ya, lugar jeē chiñúhún i máa Yaā ni sáha ún, Yaā jeē cánuú cahān yō jeē cujéhu ya ní cáni. Amén.

<sup>26</sup> Jeē yúcuan ní siaá Yaā Dios i jeē na sáha i táca jniñu néé jéé cándiyo ni i jeē cúu máa jnúhun canu. Chi nde ñahan ni casama ña modo síhí, te ni quívi ña jíin modo neé. <sup>27</sup> Te suni súcuan tēe ni casiáá de modo chíjniñu jíin ñahan. Te nde ni nduquijí de ni casáha ndīyí de jíin jnáhan yí de, te tēe jíin tēe ni casáha de jniñu jnúhun canu. Te cándoho de castigo siquī jniñu néé ní casáha de.

<sup>28</sup> Te jeē tu ní cáconi i cuajnúhún i Yaā Dios, jeē yúcuan ní siaá yā i jeē na cáni néé ni i, te sáha i táca jniñu jeē tu íyó váha. <sup>29</sup> Te máni máa na jniñu jeē tu íyó ndāa cándihvi ni, te cájica jnéni, casáha jniñu néé, cándiyo ni, cájito uhū jnáhan. Te máni jeē cácu-cuésún ni, cájehni ndīyí, cájehjáhan, cástáhú, cáśáhuhū jnáhan, cáśájnúhún siquī jnáhan. <sup>30</sup> Cácahān jnúhun néé síquī jnáhan, cájito uhū Yaā Dios, cácu-jéé ni, cáśándúxí máa, cáśátéyí máa, cájequin costumbre neé, te cájendetū nuū

tatá nuū naná. <sup>31</sup> Te tu cájecūhun cuítì ni, tu squícu jnúhun jéjnúhun, tu íyó máni jíin jnáhan, tu íne cáhnu ni nuū jnáhan, tu cúndáhú ni jnáhan. <sup>32</sup> Te je cajini váha i jeē ni sándaā Yaā Dios jeē ñayuu casáha súcuan, cánuú jnahnú ndetū i. Te vēsú súcuan cájini i, te níni casáha i jniñu néé un, te suni cánujnahhan ni i jeē casáha jnáhan i súcuan.

### Ndaā sándaā Yaā Dios siquī cuéchi

**2** Núu súcuan te róhó jéé cahán cuéchi siquī jnáhan, núu na-ni ñayuu cúu ró, ma cúu cahān rō jeē tú na cuéchi máá ró. Chi jeē cahán rō cuéchi siquī jnáhan ró cúu jeē ndénehen ró cuéchi siquī máá ró. Chi róhó jéé cahán cuéchi, suni súcuan sáha máá ró cuéchi. <sup>2</sup> Chi jíni yō jeē Yaā Dios, ndaā sáha ya jeē ndónda ya siquī cuéchi ñayuu casáha súcuan. <sup>3</sup> Te róhó jéé cahán cuéchi siquī ñayuu casáha cuéchi, te suni súcuan sáha máá ró, ¿te á jéni ni rō jeē cácu máá ró quívi ndónda Yaā Dios siquī cuéchi, chí naún? <sup>4</sup> ¿A cújéé ni rō nuū jnúhun jeē yóhoyo váha ni Yaā Dios jíin ró, jíin jéé iyó paciencia yā jeē tú yachí cuāha ya castigo nuū rō? ¿Te á tu jécūhun ni rō jeē jnúhun jeē yóhoyo váha ni yā sáha jeē nácani ni rō siquī cuéchi ró? <sup>5</sup> Chi níhni ni rō te tu nácani ni rō siquī cuéchi ró. Te jeē yúcuan cáyā gā rō castigo siquī rō quívi sáha Yaā Dios juicio, máa quívi jeē cóo ndijin jeē ndaā sándaā yā siquī cuéchi. <sup>6</sup> Chi chunaa yā nuū ná íin ná íin ñayuu núu ndese jniñu ni casáha i. <sup>7</sup> Te ñayuu jeē tu jécuiñi i jeē sáha i jniñu váha, cuāha ya jnúhun jeē cótecu i ní cáni. Chi ndúcú i quívi i nuū ndujéhu yíñúhún i, nuū ní cáni cotecu i. <sup>8</sup> Te quitì ni yā te cuāha ya castigo nuū ñayuu cujéé ni nuū yā, te cúniñni ni nuū jnúhun ndaā, chi sa nuū jnúhun yacuá yóho jetáhú i. <sup>9</sup> Te táca ñayuu casáha jniñu néé, chi níhni i jnúndóho xeēn te cucuíhyá ndasí ni i, xíhna gā ñayuu hebreo te suni súcuan

ñayuu tāca gá nación. <sup>10</sup>Te sa suhva tāca ñáyuu casáha jniñu váha, chi quívi i nuū ndujéhnú yíñúhún i, te coo ndeyí coo siñ ni i, xihna gā ñayuu hebreo te suni súcuan ñayuu tāca gá nación.

<sup>11</sup>Chi Yaā Dios tu sáha ya cuenta ndese cúu iin iin ñayuu, chi inuú sáha ya jín i. <sup>12</sup>Chi tāca ñáyuu jeē casáha cuēchi, vésú tu cáyihí i chíji ley jeē ní jéhe ya nuū Moisés, te tu níni ley un te jnahnū ndetū i. Te tāca ñáyuu cáyihí chíji ley Moisés te casáha cuēchi, jín ley un sándaā yā cuēchi i. <sup>13</sup>Chi tu ndáhva Yaā Dios cuēchi ñayuu jeē maá jéē cúni nahín-ni i jñuhun cáhán ley yā. Chi sa suhva ñayuu squícu jeē cahán ley yā cúu jeē ndáhva yā cuēchi i. <sup>14</sup>Chi ñayuu tācá nación jeē tu cánevāha tutu ley jeē ní jéhe ya nuū ñáyuu hebreo, te núu cásquícu maá i ley yā, suu cúu jeē cánevāha i ley yā ini anuá i, vésú tu cánevāha i tutu ley un. <sup>15</sup>Te súcuan cástéén i jeē jnúhun ndácu ley un chi ñúhun ini anuá i. Te tāca jéē cájeni ni i jín anuá i, suu cúu jeē steén nuū i siquí núu ni sáha i cuēchi chí váha ni sáha i. <sup>16</sup>Te súcuan coo maá quívi jeē jín Jesucristo sándaā Yaā Dios siquí tāca jéē tu iyó váha jeē ní cajeni sáhi ní tāca ñáyuu. Súcuan cáhán jñuhun váha ya jeē nácani ri.

### Siquí jeē tu cásquícu ñayuu hebreo ley Moisés

<sup>17</sup>Te róhó cácahān rō jeē téé hebreo cácuu rō, te cátenuū rō maá ley Moisés, te cácutéyí rō jeē siquí Yaā Dios. <sup>18</sup>Te cájeni ni rō jeē jiní rō ndese nújnahan ni yā, jín jéē cúu nácāji váha rō ndé-ni cúu jniñu váha, chi ni cacutúhva rō ley un. <sup>19</sup>Te cájeni ni rō jeē maá rō cácuu téé steén ichi Yaā Dios nuū ñayuu tu cájini cuítí, jín jéē cúu sáha rō jéē cúndi-jin ini anuá ñayuu cájica nájnūhun nuū néé. <sup>20</sup>Te cájeni ni rō jeē cúu steén rō nuū ñayuu tú túhva jñuhun ya, jín

jeē maá rō cácuu maestro nuū ñáyuu tu jécūhun ni. Chi jín tutu ley yā te cájini rō ndese cúu jñuhun ndíchí jñuhun ndaā, cájeni ni rō. <sup>21</sup>Núu súcuan te maá rō jeē castéén nuū ñayuu, ¿te naun tu cástéén rō nuū maá rō? Te maá rō jeē cácahān jeē ma sácúfná i, ¿te naun cásácúfná maá rō? <sup>22</sup>Te maá rō jeē cácahān jeē ma cósíquí ndéé i, ¿te naun cásíquí ndéé maá rō? Te maá rō jeē cácahān jeē cácuquini ni rō ídolo, ¿te naun cásácúfná rō ndajniñu jeē yúcu ini vehe ídolo? <sup>23</sup>Te cácutéyí rō jín ley Yaā Dios, te vésú súcuan te casáha rō jéē cácahān ñayuu siquí yā, chi tu cásquícu maá rō jñuhun ndácu ley yā ún. <sup>24</sup>Chi súcuan yósó núu tútu i: Ñayuu tāca gá nación, máni cácahān ndevāha i siquí Yaā Dios, jeē siquí cuēchi róhó ñayuu hebreo.

<sup>25</sup>Te núu cásquícu rō ley Moisés, yūcuán na te níhín jniñu ndije jeē ní canihín rō jnuní circuncidar. Te núu tu cásquícu rō ley un, te vésú ni cuu rō circuncidar, te nájnūhun jeē tu ní cúu rō. <sup>26</sup>Te téé tācá nación, núu cásquícu de jniñu ndácu ley un, vésú tu ní cáni-hín de jnuní circuncidar, núu súcuan te nájnūhun ni canihín de jnuní circuncidar. <sup>27</sup>Te téé jeē tu ní cúu circuncidar yiquí cúñu de, te cásquícu de ley yā, maá de cahān cuēchi siquí rō. Chi tu cásquícu rō, vésú cánevāha rō tutu ley un, te ni cuu rō circuncidar. <sup>28</sup>Chi nasūu jéē cáca ichi síquí iin téé sáha jeē cúu ndije de téé hebreo. Te ni nasūu jéē cúu circuncidar yiquí cúñu iin téé sáha jeē cúu de téé ndaā. <sup>29</sup>Chi sa suhva téé cúu hebreo ndije, cúu jeē ini anuá de ñúhun jñuhun ndaā. Te téé cúu circuncidar ndije, chi nde jín ini jín anuá de sáha de jniñu ndaā te nasūu jéē ndíso de jnuní circuncidar jeē cahán ley un cúu. Téé cándaā súcuan, nasūu ñayuu cájijnúhún i de, chi maá Yaā Dios.

**3** ¿Núu súcuan te na vé iyó gá nuū ñáyuu hebreo jeē quéndōo váha ga i?



¿Te ndé níhín jníñu jeē casáha i circuncidar? <sup>2</sup>Váha ndasí níhín jníñu. Xihna gā nihín jníñu jeē ni jéhe Yaā Dios jñūhun ya nuū maá i. <sup>3</sup>Te vēsú sava i tu ní cá-candíje, ¿te á suu sáha jeē ma squícu ga Yaā Dios jñūhun ni jejnūhun ya, chí naún? <sup>4</sup>Tú cuiti jeē súcuan, chí vēsú núu ndíhi ñayuu castáhú i, te Yaā Dios chí íyó ndáa yā. Chí suhva yósó nuū tútu ii jeē ni cáhān ñin tēe jíñ yá:

Cahān ñayuu jeē íyó ndáa ni jíñ táca jñūhun cáhān ni, te cuni i jeē íyó ndáa ní vēsú núu cácahān i siquī ní.

Achí tutu.

<sup>5</sup>Te cácahān sava ñayuu jeē íyó váha jeē sáha yó cuēchi, chí cuēchi yó jéjníñu stéén jeē íyó ndáa Yaā Dios. Núu súcuan ¿te á cuu cahān yō jeē tú váha sáha Yaā Dios jeē jéhe ya castigo núu jéjníñu cuēchi yó súcuan? (Va cáhān-ni nde ri nájñūhun cácahān ñayuu ñayiví.) <sup>6</sup>Tú cuiti jeē súcuan. Chí núu jeē tú váha sáha Yaā Dios, ¿te ndese cuu sándaā yā cuēchi ñayuu ñayiví?

<sup>7</sup>Te núu jñūhun stáhú cácahān ñayuu jéjníñu stéén jeē yóhoyo cújéñu Yaā Dios siquī jeē máni cáhān ndaā yā, ¿te á cuu cahān yō jeē tú váha jeē cahān yā jeē cuēchi cúu jeē castáhú i? <sup>8</sup>Tuú, chí núu jeē súcuan cúu, te cuu cahān yō jeē vetū-ni sáha yó jéé neé návāha quee jeē váha núu. Te sava ñayuu cácahān ndevāha i siquī ri jeē súcuan cástéén ri, te tú ndaā. Ñayuu ún chí íyó váha jeē ndénehen ya cuēchi siquī i.

### Ndivii yō íyó cuēchi

<sup>9</sup>Núu súcuan ¿te á váha ga ñayuu cácuu yóhó ñayuu hebreo vēsú inga ñayuu naún? Tú cuiti jeē súcuan. Chí je ni cacahān yō jeē vēsú ñayuu hebreo chí ñayuu táca gá nación, ndivii yō yíhi chíji cuēchi. <sup>10</sup>Chí suhva cáhān tutu ii:

Tú cuiti na ñayuu ndaā íyó, ni ñin i.

<sup>11</sup>Te tú cuiti ñayuu jécūhun ni íyó,

te tú ni ñin i nánducú i Yaā Dios.

<sup>12</sup>Ndíhi i ni cascuíta i jñūhun ya, te ñuú-ni ni castíví ndíhi i maá i.

Te tú cuiti ñayuu sáha jniñu váha íyó, ni ñin i.

<sup>13</sup>Yaū sucūn i cúu nájñūhun yaū ndíyi jeē núne,

chí máni jñūhun stáhú cácahān i.

Te nájñūhun veneno coó yíhi yuhu i,

<sup>14</sup>chí máni maá jñūhun ndevāha jñūhun uvuā cácahān i.

<sup>15</sup>Te yóhoyo ñama jehē i jeē cáhni i ndíyi.

<sup>16</sup>Te ndé-ni cúu-ni nuū cájica i te squíví i jñūndóho jeē jnahnú ndetū ñayuu.

<sup>17</sup>Te tu cájica cuiti i jíñ jñūhun coyūcu máni i,

<sup>18</sup>te ni tu cácanani ni i jeē cónso íyo i nuū Yaā Dios.

Achí tutu.

<sup>19</sup>Te jíñ yō jeē táca jñūhun cáhān ley jenahán, chí cáhān nuū ñayuu yíhi chíji ley un, návāha ndíhi i ma cúu cahān i jehē i. Chí ndenehen Yaā Dios cuēchi siquī i nde jíñ ñayuu ní ñayiví. <sup>20</sup>Chí tú ni ñin ñayuu quendōo ndaā i nuū yā jeē nducú i squícu i jniñu ndácu ley un. Chí ley un jéjníñu máni návāha cuni yō jeē íyó cuēchi yó.

### Jeē jnáma ya yohó siquī jeē candíje yó jéé sáha ya jehē yō

<sup>21</sup>Te vijna te je cájini váha yó ndese ndáhva Yaā Dios cuēchi yó. Te nasūu ley un sáha jeē quendōo ndaā yō, vēsú maá tutu ley jíñ tēe ni canacani jñūhun ya, ni cacahān ndese ndáhva yā cuēchi ñayuu. <sup>22</sup>Chí táca ñayuu jeē cácaandíje i jeē ni jíhi Jesucristo jeē chúnaa yā cuēchi i, chí ndahva Yaā Dios cuēchi i siquī jeē súcuan cácaandíje i. Chí ñuú-ni cúu táca ndíhi ñayuu. <sup>23</sup>Chí ndíhi yó ni casáha cuēchi, te jeē yúcuan tu ní cúu quendōo ndaā yō nuū Yaā Dios. <sup>24</sup>Te siquī jeē yóhoyo váha ni Yaā Dios, jeē yúcuan ndáhva yā cuēchi yó súcuan-ni. Chí siquī jeē ni jíhi Cristo Jesús cúu jeē

jnáma ya yohó. <sup>25</sup> Chi Yaā Dios ni jeni ya Cristo návāha socō yā maá yá chunaa yā cuēchi yó jéē ni jíhi yā. Te jnáma ya yohó núu súcuan cándíje yó. Te súcuan ni sáha Yaā Dios návāha stéén yā jeē Yaā ndaā cúu ya. Chi ichi yátá ni iyo paciencia yā, te tu ní chíhi ya cuenta cuēchi ñayuu. <sup>26</sup> Te tiempo yáha stéén yā jeē Yaā ndaā cúu ya, chi ndaā sáha ya jeē squéndōo ndaā yā ñayuu candíje vésú íyó cuēchi i, chí cáncandíje i jeē ní chunaa Jesús cuēchi i ni ndahva ya.

<sup>27</sup> Núu súcuan ¿te á cuu cutéyí gá yō síquī maá yó? Ma cúu cuiṭi, chí ma cúu cutéyí yó cani ni yō jeē vāha squícu yó ley yā. Chi jnáma ya yohó máá síquī jeē candíje yó jéē sáha ya jehē yō. <sup>28</sup> Núu súcuan te je jíni yō jeē ndáhva Yaā Dios cuēchi yó síquī jeē súcuan cándíje yó, te nasūu jéē nducú yó squícu yó jéē ndácu ley.

<sup>29</sup> ¿Te á núu maá-ni ñayuu hebreo cúu ya Yaā Dios, chí naún? Tuú, chí suni cúu ya Yaā Dios jeē jnáma ñayuu tāca gá nación. <sup>30</sup> Chi ñin-ni Yaā Dios iyó, te ndáhva yā cuēchi ñayuu cáncandíje jeē ni sáha ya jehē i, cúu ñayuu ndíso jnuni circuncidar, cúu ñayuu jeē tuú. <sup>31</sup> Te jeē candíje yó jéē jnáma ya yohó, ¿á sáha jeē tuá jíni ñúhún squícu yó ley yā, chí naún? Tú cuiṭi, chí sa suhva sáha jeē vāha ga cuu squícu yó ley yā.

### Abraham cúu ñin ejemplo nuū yō

**4** Núu súcuan ¿te ndese cahān yō síquī tāca jéē ní cuu jíni jíni yō Abraham? ¿Ndese ni ndahvā cuēchi de? <sup>2</sup> Nasūu jéē ni sáha máá de cúu jeē ní ndahva Yaā Dios cuēchi de. Chi núu jeē súcuan cúu núu, te cuu cutéyí de jeē vāha ni sáha de. Te tu ní cutéyí de, chí nasūu síquī jeē ni sáha máá de cúu jeē ní ndahva Yaā Dios cuēchi de. <sup>3</sup> ¿Chi ndese cáhán tutu ii? Cáhán jeē ní candíje Abraham jeē sáha ya jeē ni jéjnūhun ya nuū de, te jeē yúcuan ní ndahva yā cuēchi de. <sup>4</sup> Te

ñin ñayuu sájniñu, te yāhu i chí nasūu jéē cútahū i cúu, chí jeē chúnaa yō nuū i cúu. <sup>5</sup> Te jeē jnáma Yaā Dios ñayuu, chí jeē cútahū i cúu. Chi vésú tu cúu squícu i tāca jniñu vāha, te núu candíje i jeē jnáma ya i nuū cuēchi i, yūcuán na te ndahva yā cuēchi i. <sup>6</sup> Te David suni ni cahān de ndese yōhyo ndetū ñayuu jeē ndáhva Yaā Dios cuēchi i, vésú tu cúu sáha i ni ñin jniñu jeē quéndōo ndaā i nuū yā. <sup>7</sup> Chi ni cahān de:

Nacā ndetū ñayuu jeē íne cáhnu ni yā nuū jniñu néé ni sáha i, te tu ndénehen ya cuēchi síquī i.

<sup>8</sup> Te nacā ndetū tēe jeē tuá chíhi máá Jí-toho yō cuenta cuēchi de.

Achí tutu.

<sup>9</sup> ¿Te á máni máá ñayuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi je ni cahān yō jeē ní candíje Abraham jeē sáha ya jeē ni jéjnūhun ya, te jeē yúcuan ní ndahva yā cuēchi de.

<sup>10</sup> Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu jéē jé ni cuu de circuncidar, chí nde ná tuú. <sup>11</sup> Te cuéé gá te ni nihin de jnuni circuncidar. Te suu ni cuu ñin seña, nájnūhun ñin sello jeē ní ndahva yā cuēchi de síquī jeē súcuan ni candíje de. Te jeē yúcuan ní cahān yā jeē cuu de jíni nuū tāca ñayuu jeē candíje i jeē sáha ya jehē i, suni nuū ñayuu tu ní cúu circuncidar, chí suni ndahva yā cuēchi máá i. <sup>12</sup> Te suni cúu de jíni nuū ñayuu ní cuu circuncidar, te nasūu máni jeē ní cuu i circuncidar, chí suni jeē ní jniñi i ejemplo de. Chi cáncandíje i jeē sáha ya jehē i, nájnūhun ni candíje máá de nde ná tuu cuu de circuncidar.

### Núu candíje yó te sáha Yaā Dios jeē ni jéjnūhun ya

<sup>13</sup> Chi ni jéjnūhun Yaā Dios nuū Abraham jíni núu tāca yúcun de jeē cuāha ya

ní ñáyíví cuu tahū de. Te nasūu síquī jeē ní nducú de squícu de ley yā cúu jeē ní jejnūhun ya un núū de, chí sa suhva síquī jeē ní candíje de jeē ní jéjnūhun ya, te ní ndahva yā cuēchi de. <sup>14</sup>Chí núu jeē máni máá ñayuu nducú squícu ley cúu jeē nihín jeē ní jéjnūhun ya, núu súcuan te cándíje cáha yó nuú, te ma nihín jnínū jeē ní jéjnūhun ya ún. <sup>15</sup>Te ley chí sáha jeē nihín ñayuu castigo síquī jeē tu cúu squícu i. Te núu jeē tu ley, te suni tú na jnūhun stívi ñayuu síquī ley coo núú.

<sup>16</sup>Núu súcuan te ní jejnūhun ya jeē sáha ya jeē váha jíín ñayuu síquī jeē candíje i jeē súcuan sáha ya, te jeē cú-tahū i súcuan-ni cúu. Te jeē ní jéjnūhun ya ún, íyó cutú nuū tāca yúcūn Abraham, te nasūu núū maá-ni ñayuu jeē nducú squícu ley jenahán, chí suni nuū tāca ñayuu cáncandíje nájñūhun ni candíje Abraham. Te súcuan cúu de jíí nuū tāca yó jeē cáncandíje yó. <sup>17</sup>Súcuan ni sáha Yaā Dios chí ni candíje de jeē sáha ya. Chí súcuan cáhán tutu íi: Ní jeni ri rohó cuu ró jíí nuū cuehē ndasí ñayuu. Súcuan ni cahān maá Yaā jeē nastécu ndíyi te cáhán yā ndese coo tāca jéé ná tu coo.

<sup>18</sup>Te ní candíje de, te ní cocuhun teyí ní de jeē ní jéjnūhun ya jeē coo cuehē yucūn de, vēsú tuá na modo coo sēhe de núú. Te jeē yúcuan ní nduu de jíí nuū cuehē ndasí ñayuu, nájñūhun ní cahān Yaā Dios: Súcuan nducuehē yucūn rō, achí yá jíín de. <sup>19</sup>Te ye jajni jinū de ciento cuiyā, te vēsú súcuan te tu ní quénda de nuū jnūhun cándíje de, vēsú jíín de jeē maá de jíín ñasihí de Sara je jéhnu ndasí ndíndúú de jeē ma cúu ga coo sēhe de. <sup>20</sup>Te tu ní nácani síquī ní de jeē ma cándíje ga de jnūhun ní jejnūhun Yaā Dios jeē coo sēhe de. Chí sa suhva ní candíje nihín ga de, te ní nacuatáhú de nuū Yaā Dios. <sup>21</sup>Chí ní cucáhnu váha ní de jeē cúu squícu Yaā Dios ndíhi jeē ní jéjnūhun ya. <sup>22</sup>Te jeē yúcuan ní ndahva

yā cuēchi de síquī jeē súcuan ní candíje de.

<sup>23</sup>Te nasūu máá-ni síquī Abraham cúu jeē yosó núu tútu jeē ní ndahva yā cuēchi de jeē ní candíje de. <sup>24</sup>Chí suni yosó jéé síquī yohó jíínáhan yó. Chí suni ndáhva yā cuēchi máá yó jéé candíje yó jéé cúu ya Yaā ní nastécu Jitoho yō Jesús. <sup>25</sup>Chí ní jihí Jesús jeē chúnaa yā cuēchi yó, te ní natecu yā návāha ndahva Yaā Dios cuēchi yó.

### Ndese quéndōo ñayuu jeē ndáhva yā cuēchi

**5** Núu súcuan te je ní ndahva Yaā Dios cuēchi yó síquī jeē ní candíje yó jéé sáha ya jehē yō. Te jeē yúcuan ní sáha ya jeē ní ndívi yó núu jnūhun maní yā jíín yó, síquī jeē ní jihí Jitoho yō Jesucristo jehē yō. <sup>2</sup>Chí máá Cristo ní sáha jeē ní quívicoo yó núu Yaā Dios, chí ní sáha ya jeē váha yóhó síquī jeē súcuan cándíje yó. Te cáhiin nihín yó jíín jnūhun jeē sáha ya jeē váha yóhó. Te cúsií ní yō chí ñūhun ní yō jeē jinú yō nuū lúu cu-jéhnu yó jíín Yaā Dios. <sup>3</sup>Te nasūu máá yáha-ni, chí suni cúsií ní yō jeē ndóho yó jnúndóho. Chí jíín yō jeē maá jnúndóho sáha jeē jéndeýí ní yō. <sup>4</sup>Te jeē jéndeýí ní yō sáha jeē íje váha yó cuu yó ñayuu ndaā. Te jeē íje váha yó sáha jeē ñūhun ní yō tāca jéé váha jeē cóo. <sup>5</sup>Te tāca jéé ñūhun ní yō, chí nihín nahín yó. Chí jnūhun cúndáhú ní Yaā Dios yohó, ní cunuú ini anuá yō, sáha Yaā Dios jeē jíín Espíritu Santo jeē ní jéhe ya nuū yō.

<sup>6</sup>Chí náa ndóho yó jéé ma cúu cuíti jnama yó máá yó, te ní jihí Cristo jehē yohó jéé cúu yó ñayuu íyó cuēchi. Te ní jihí yā maá quíví jeē jé ní jeni Yaā Dios. <sup>7</sup>Te yíí cúu jeē cúu ññ ñayuu jehé inga ñayuu, vēsú jehé ññ ñayuu ndaā. Chí sanaa te íyó jíinu jeē chúndeýí ní ññ tēe cuu de jehé ññ tēe ndaā váha. <sup>8</sup>Te máá Cristo chí ní jihí yā jehé yō náa máni cuēchi sáha yó, te súcuan ní steén Yaā

Dios jeē cundáhú ni yā yohó. <sup>9</sup>Te vijna je ni ndahva Yaā Dios cuēchi yó síquī jeē ni jíhī Cristo jehē yō. Núu súcuan te suni jíni vāha yó jēē jnama Cristo yohó núu castigo quiiji quívi sáha Yaā Dios juicio. <sup>10</sup>Chi náa cúu ga yō enemigo Yaā Dios, te síquī jeē ni jíhī Sēhe ya jehē yō, te ni sáha ya jeē ndívi yó núu jnúhun maní yā jíin yó. Te jeē súcuan ní ndívi yó nuū jnúhun maní yā jíin yó, te suni jíni vāha yó jēē cácu yó síquī jeē técu Cristo, nduú yá jíin yó. <sup>11</sup>Te nasūu máá yáha-ni, chi suni cúsiī ndasí ni yō jíin Yaā Dios síquī jeē ni sáha Jitoho yō Jesucristo jehē yō, chi máá yá ni sáha jeē ní ndívi yó núu jnúhun maní Yaā Dios jíin yó.

### Jnúhun Adán jíin jnúhun Cristo

<sup>12</sup>Núu súcuan te jíni yō jeē ni quívi cuēchi ini ñayívi ní sáha máá iin-ni tēe Adán. Te jeē síquī cuēchi yúcuan te ni jecōo cuehyī jéhni ñayuu. Te jeē yúcuan cúu jeē jíhī ndíhi ñayuu, chi ndíhi i yíhi cuēchi. <sup>13</sup>Te nde ná tu cuāha ya ley nuū Moisés, te je íyó cuēchi ini ñayívi. Te síquī jeē ná tu coo ley yā, te tu ní chíhi ya cuenta jeē castívi i. <sup>14</sup>Te vésú súcuan te nde tiempo Adán te nde tiempo Moisés ni yíhi ñayuu chíhi cuehyī jeē jéhni i síquī jeē iyó cuēchi i. Chi ni jíhi i síquī cuēchi ni casáha máá i, vésú tu ní sáha i jnáhan cuēchi jeē ni sáha Adán jeē ní cuniñhi ni de nuū iin jniñu ní ndacu ya. Te Adán ni cuu de iin muestra máá Yaā ní quiiji cuéé gá.

<sup>15</sup>Te jnúhun jeē ni sáha Adán cuēchi, tu quíjnáhan cuiti jíin táhū jeē jnáma Yaā Dios yohó. Chi jeē ni stívi máá iin-ni tēe ún, jeē yúcuan cúu jeē jíhī ndíhi yó. Te jnúhun jeē jnáma Yaā Dios yohó cújéhnu ndasí gá, chi síquī jeē ni sáha máá iin-ni tēe Jesucristo cúu jeē súcuan-ni jnáma ya ndíhi ñayuu candíje. <sup>16</sup>Te cuēchi jeē ni sáha máá iin-ni Adán, tu quíjnáhan cuiti jíin jnúhun jeē jnáma Yaā Dios yohó. Chi síquī máá

iin-ni cuēchi ún te ni quívicoo ñayuu chíhi jnúhun jnahnū ndetū i. Te jnúhun jeē jnáma ya ñayuu, sa suhva sáha jeē súcuan-ni ndáhva yā cuēchi i, vésú yōhyo cuehē cuēchi ni casáha i. <sup>17</sup>Chi síquī jeē ni sáha máá iin-ni tēe Adán cuēchi, te ni nihin poder cuehyī jéhni ñayuu. Te sa suhva síquī jeē ni jíhī máá iin-ni tēe Jesucristo, te víhyá gā ni nihin ñayuu máá yá poder jeē cótecu i caca ndaā i jíin yá. Chi ni ndahva yā cuēchi i síquī jeē yóhyo vāha ni yā.

<sup>18</sup>Núu súcuan te síquī jeē ni sáha máá iin-ni tēe Adán cuēchi, te ni quívicoo ndíhi ñayuu chíhi jnúhun jnahnū ndetū i. Te sa suhva síquī jeē ni sáha máá iin-ni tēe Jesucristo iin jniñu vāha ndasí, te ndáhva Yaā Dios cuēchi ndíhi ñayuu te cotecu i ní cání. <sup>19</sup>Chi síquī jeē tu ní jéndije máá iin-ni tēe, te ni quívicoo cuehē ndasí ñayuu chíhi cuēchi. Te suni súcuan síquī jeē ní jéndije máá iin-ni tēe Jesucristo, te ndáhva Yaā Dios cuēchi cuehē ndasí ñayuu.

<sup>20</sup>Te ni jēhe ya ley yā návāha cuni yō jeē cuehē cuēchi casáha yó. Te jeē ní nducuehē cuēchi yó, te víhyá gā cuehē cúu jnúhun jeē vāha ni yā jeē íne cáhnu ni yā nuū yō. <sup>21</sup>Núu súcuan te nájnúhun ni nihin poder cuehyī jéhni ñayuu síquī jeē iyó cuēchi i, suni súcuan íyó poder jnúhun jeē vāha ni yā jíin yó. Chi ndáhva yā cuēchi yó te cotecu yō ní cání síquī jeē ni jíhī Jitoho yō Jesucristo jehē yō.

### Jeē tuá yíhi yó chíji cuēchi chi yíhi yó ndaha Cristo

**6** Núu súcuan ¿te ndese cahān yō? <sup>1</sup>¿A caca ga yō jíin cuēchi návāha víhyá gā sáha ya jeē vāha yóhó jēē cóne cáhnu ni yā nuū yō? <sup>2</sup>Ma cúu cuiti. Chi nájnúhun je ni jíhi yō jeē tuá yíhi yó chíji cuēchi, te ma cúu ga caca yó jíin cuēchi núu súcuan. <sup>3</sup>¿A tu cájecūhun ni rō jeē tāca yó jeē ní jendute yó síquī jeē ni quívi yó ndaha Cristo Jesús, suni ni jendute yó

síquī jeē ni quívi yó chíji jnūhun jeē ni jíhi yō jíin yá? <sup>4</sup> Chi jeē ní jendute yó cúu nájñūhun ni quindūji yó jéē ni jíhi yō jíin yá. Te vijna te cuu caca yó jíin vida jeē jeē ni jéhe ya nuū yō, chi nájñūhun suni ni natecu yō jíin yá. Chi ni natecu yā ni sáha Tátá yā jíin poder jeē cujéhu ndasí yá.

<sup>5</sup> Chi núu ni cundúú yó jíin yá síquī jnúhun jeē ni jíhi yō jíin yá, te suni súcuan cúndúú yó jíin yá síquī jnúhun jeē ní natecu yō jíin yá. <sup>6</sup> Chi jíni yō jeē ní naa modo maá yó jeē ni jíca yó jíin ichi yátá, chi ni quívi yó núu jnúhun jeē ni jíhi yō jíin Cristo jicā cruz. Te súcuan ni naa modo yō jeē cúu yó mozo nuū cuéchi, návāha tuá cuajñíñu yó núu táca jniñu jeē máni cuéchi cúu. <sup>7</sup> Chi ñayuu jeē jé ni cajihí, je ni quendacoo i chíji táca cuéchi. <sup>8</sup> Te núu je ni jíhi yō jíin Cristo, te cándíje yó jéē suni súcuan ni natecu yō jíin yá. <sup>9</sup> Chi jíni yō jeē ní natecu Cristo, te ma cúu cuiti ga yā, chi cuehyī jéhi yóhó, tuá na vé cúu sáha jíin yá. <sup>10</sup> Chi jeē ni jíhi yā, te iin jínu-ni ni jíhi yā jeē síquí cuéchi ñayuu. Te jeē técu yā vijna, chi sáha ya jeē cuní Yaā Dios. <sup>11</sup> Te suni súcuan róhó jíinánhan ró, sáha ró cuenta jeē nájñūhun ni cajihí ró jeē ní quendacoo ró chíji cuéchi. Te cátecu ró návāha sáha ró jéē cuní Yaā Dios, chi ndúú ró jíin Jítóho yō Cristo Jesús.

<sup>12</sup> Núu súcuan te ma cuáha ga ró jnūhun quíhi ró chíji cuéchi jíin yiqui cúñu ró jeē cúu. Chi cuéchi ún stfhví ni rohó jéē na sáha ró táca jéē ndíyo néé ni ró. <sup>13</sup> Te ma cuáha ró máá ró cuajñíñu ró núu cuéchi jeē cócuu ró jíin jniñu néé. Chi sa suhva cuáha ró máá ró nuū Yaā Dios, te sáha ró cuenta jeē nájñūhun je ni cajihí ró te ni canatecu ró nuū yā. Te cuáha ndíhi ró máá ró nuū yā jeē cuajñíñu ró núu jniñu ndaā. <sup>14</sup> Chi tuá na poder cuéchi jeē cundeyí jíin ró, chi tuá

cáyihí ró chíji ley jenahán, chi sa cáyihí ró chíji jnūhun jeē váha ni yā jíin ró.

### **Jnūhun mozo jeē steén ndese quéndōo ñayuu cácaandíje**

<sup>15</sup> ¿Ndese sáha yó núu súcuan? ¿A caca ga yō jíin cuéchi síquī jeē tuá yíhi yó chíji ley jenahán, chi sa yíhi yó chíji jnūhun jeē váha ni yā jíin yó? Ma cúu cuiti. <sup>16</sup> Chi cájini ró jeē núu cuáha ró máá ró jeē cuatáhu ró sájñíñu ró núu iin tée, núu súcuan te cácuu ró mozo nuū tée ún, te cánúu cuandíje ró núu de. Te suni súcuan núu cuáha ró máá ró jeē sáha ró cuéchi, te mozo cuéchi cácuu ró, te cuu ró. Te núu cuatáhu ró nuū maá yá, te mozo yā cácuu ró jéē cáca ndaā ró. <sup>17</sup> Te na cútahū yō nuū Yaā Dios, chi vésú ni cacuu ró mozo nuū cuéchi, te vijna chi nde jíin ini jíin ánuá ró ni cajetáhu ró nuū jnúhun ya jeē ni quívicoo ró núu. <sup>18</sup> Te vijna te je ni nduu libre ró jeē tuá cácuu ró mozo nuū cuéchi, te cájejniñu ró núu jniñu ndaā. <sup>19</sup> (Ni cahān rī iin jnūhun ndese cúu síquī mozo ini ñayívi yáha, chi tu cájecūhun yachí ni ró síquī jnúhun ya.) Núu súcuan te nájñūhun ni cajéhe ró máá ró nde saá jeē ní cajejniñu ró núu táca jniñu jnéhén jniñu néé, suni súcuan cuáha ró máá ró vijna jeē cuajñíñu ró núu jniñu ndaā, návāha coo ndoo coo i ró nuū Yaā Dios.

<sup>20</sup> Chi nde náa cácuu ró mozo nuū cuéchi, te tu ní cájejniñu ró núu jniñu ndaā. <sup>21</sup> ¿Te na vé ni canihín ró síquī cuéchi ni casáha ró un jéē cácuu ró vijna sáha? Tú cuiti, chi máá jéē jnahnú ndetū ró ní cáni sáha. <sup>22</sup> Te vijna te je ni canduu libre ró jeē tuá cácuu ró mozo nuū cuéchi, te cájejniñu ró núu Yaā Dios. Te suu sáha jeē quéndōo váha ró, chi cáhíyo ndoo cáhíyo i ró nuū yā, te nde sandíhi te cotecu ró ní cáni. <sup>23</sup> Chi yāhu jeē nihín ñayuu síquī cuéchi cúu jeē jnahnú ndetū i. Te sa tahū jeē jéhe Yaā Dios cúu jeē cótecu yō ní cáni

andiví, siquī jeē nduú yó jíin Jítóho yō Cristo Jesús.

**Jnūhun ñasihí jíin yii jeē steén ndese quéndō ñayuu cá candíje**

**7** Hermano, je cájini rō ndese cáhán ley yā, te cájini rō jeē yíhi ñayuu chíji ley maá-ni núu técu i ñayivi yáha. <sup>2</sup>Te yáha cúu nájñūhun iin ñahan jeē ní quiñáhan, chí cáhán ley jeē yíhi ña ndaha yii ña maá-ni núu técu de. Te núu ni jihí yii ña, te je ni quenda ña chíji ley jeē ní quiñáhan ña jíin de. <sup>3</sup>Núu súcuan te núu quiñáhan ña jíin inga tēe níni técu gā yii ña, te casíquí ndéē ña de. Te núu je ni jihí yii ña, te je ni quenda ña chíji ley un. Te cuu quiñáhan ña jíin inga tēe, chí nasūu jéé casíquí ndéē ña núu súcuan.

<sup>4</sup>Te suni súcuan róhó jíin áhan ró, ñānī mánī, chí ndúú ró jíin Cristo. Chí nájñūhun ni cajihí rō jíin Cristo, te ni quendacoo ró chíji ley jenahán. Te vijna chí nájñūhun ni quiñáhan ró jíin inga, cúu jeē ní quívicoo ró ndaha Cristo, Yaā ni natecu mēñū ndíyi, návāha cuu sáha ró jniñū váha jeē cuní Yaā Dios. <sup>5</sup>Chí ná ni cajica yó jíin modo maá yó nde saá, te ley un ní sáha jeē ní ndiyo néé ni yō tāca jéé cuní yiquí cúñu yō jeē sáha yó. Te yūcuan ní sáha jeē jnahnú ndetū yō nuú. <sup>6</sup>Te vijna te je ni quenda yó chíji ley jenahán, chí nájñūhun je ni jihí yō jeē ma nihín gā poder siquī yō. Te súcuan te íyó libre yō jeē cuajniñū yó núu Yaā Dios. Te jíca yó jíin modo jeé jéé cuní maá Espíritu, chí tuá yíhi yó chíji ley jeē ní tee Moisés jenahán.

**Siquī cuēchi jeē ñūhun ini anuá yō**

<sup>7</sup>¿Ndese cahān yō núu súcuan? ¿A ley ndíso cuēchi? Tú cuiti jeē súcuan. Te núu jeē tú ley yā, te ma cuní cuiti rī jeē iyó cuēchi rī. Chí ma cuní rī jeē cuēchi cúu jeē ndíyo ni rī ndajniñū jnāhan rī núu tu ní cáhán ley jeē ma ndíyo ni yō. <sup>8</sup>Te

súcuan ni nihín cuēchi modo cocuu jíin rí. Chí siquī jeē ndácu ley jniñū jeē ma sáha yó cuēchi, te ni quejéé ndíyo ni rī sáha rī tāca jéé neé. Te núu jeē tu ley, te suni tú na jnūhun stávi yó siquī ley nuú. <sup>9</sup>Chí ni iyo tiempo jeē técu rī jeē ná tu jecūhun ni rī jeē cahán ley. Te ná ni quejéé rí jécūhun ni rī jniñū jeē ndácu ley, te ni jecūhun ni rī jeē iyó cuēchi rī, te ni nduu rī nájñūhun ndíyi. <sup>10</sup>Chí ni jini rī jeē ley jeē sáha jeē cótecu anuá rī nuú, te tuú chí sa ni sáha jeē jnahnú ndetū rī nuú. <sup>11</sup>Chí jíin jéé ndácu ley un jniñū, te ni nihín cuēchi modo cocuu jíin rí, te ni stahú ruhū. Chí jíin jéé ndácu ley jniñū, te cuēchi ni sáha jeē ní quenda jnūhun jeē jnahnū ndetū rī.

<sup>12</sup>Núu súcuan te íyó ndāā maá ley, te tācā jniñū ndácu chí íyó ndoo íyó ndāā váha. <sup>13</sup>Núu súcuan te ley jeē iyó váha ún, ¿á suu sáha jeē jnahnú ndetū rī naún? Tú cuiti. Chí sa suhva maá cuēchi cúu jeē sáha jeē jnahnú ndetū rī, te súcuan stúu cuēchi ndese íyó máá. Chí jíin jniñū váha jeē ndácu ley te ni natūu jniñū neé jéé cúu cuēchi.

<sup>14</sup>Chí jíin yō jeē nuú maá Espíritu vēji ley. Te ruhū chí sa névāha rī iin modo neé máá rí jeē ni squívi ruhū jejniñū cáha rí nuú cuēchi. <sup>15</sup>Chí tāca jéé sáha rī, tu jécūhun ni rī najehē cúu jeē sáha rī. Chí jniñū váha jeē cuní rī sáha rī, tu ndé nihín rī fuerza sáha rī, chí sa suhva sáha rī jniñū neé jéé tu cúvāha ni rī sáha rī. <sup>16</sup>Te náa sáha rī jniñū neé jéé tu cuní rī sáha rī, núu súcuan te nácuni rī jeē iyó ndāā ley. <sup>17</sup>Núu súcuan te nasūu rúhū cúu jeē sáha jniñū neé un, chí modo neé jéé ñūhun ini anuá rī cúu jeē sáha cuēchi. <sup>18</sup>Chí jíin rī jeē modo maá rí jeē névāha rī ini anuá rī, tú cuiti na vé jeē váha íyó. Chí cuní rī sáha rī jniñū váha, te tu ndé nihín rī fuerza sáha rī. <sup>19</sup>Chí jniñū váha jeē cuní rī sáha rī, tu sáha rī. Te jniñū neé jéé tu cuní rī, sa yūcuan sáha rī. <sup>20</sup>Te náa sáha rī jniñū jeē tu cuní rī sáha rī, te

nasū rúhū cúu jeē sáha, chi modo neé jéē ñúhun ini anuá rī cúu jeē sáha.

<sup>21</sup>Núu súcuan te ni jini rī jeē súcuan cúu jíin rí: Vēsú cuní rī sáha ri jniñu váha, te sa máni modo neé cúu jeē ñúhun ini anuá rī. <sup>22</sup>Chi cúsiñi ni rī jíin ley Yaā Dios nde jíin ini anuá rī. <sup>23</sup>Te ni nacuni rī jeē iyó inga modo neé máá rí jeē jési nuū jeē cuní rī sáha ri jeē váha. Te cúu ri nájnūhun preso nuū cuéchi jeē jícú jíin rí.

<sup>24</sup>Nacā jeē ndahú gá cúu ri núu súcuan. ¿Ndé ñin jnama ruhū nuū modo neé máá rí jeē jícú jíin rí jeē jnahnú ndetū rī? <sup>25</sup>Na cútahū ndasí rí nuū Yaā Dios, chi máá yá cúu jeē jnáma ruhū nuū modo neé rí siquī jeē ni jíhi Jitoho rī Jesucristo jehē rī. Núu súcuan te vēsú cuní yō squícu yó ley Yaā Dios, te jeē jíin fuerza maá yó ma cúu, chi modo neé máá yó sáha jeē jejniñu cāha yó nuū cuéchi.

### **Siquī jeē jíca yó jíin modo cuní Espíritu Yaā Dios**

**8** Núu súcuan te ma ndénehen Yaā Dios cuéchi siquī ñayuu cáyihí ndaha Cristo. Chi tuá cájica i jíin modo neé máá i, chi sa suhva cájica i nájnūhun cuní maá Espíritu yā. <sup>2</sup>Chi modo jeē sáha Espíritu cúu jeē técu yō siquī jeē yíhi yó ndaha Cristo Jesús. Te yúcuan ní sáha jeē ní nduu libre yō nuū jnūhun jeē ni yíhi yó chíji cuéchi jeē jnahnú ndetū yō nuú. <sup>3</sup>Chi ni sáha Yaā Dios jeē quéndōo vāha ñayuu jeē tu ní cúu quendōo vāha jíin ley Moisés, siquī jeē tú na fuerza i jíin modo maá i jeē squícu i ley un. Chi ni tají yá Sēhe ya ni quiji, te ni nduu ya nájnūhun ñayuu cáhīyo cuéchi, návāha socō yā maá yá siquī cuéchi, vēsú tú na cuéchi ya. Te súcuan ni ndonda Yaā Dios siquī cuéchi jeē ní casáha ñayuu jíin modo neé máá i. <sup>4</sup>Súcuan ni cuu návāha cuu squícu yó táca jniñu ndaā jeē ndácu ley, chi tuá

jíca yó jíin modo neé máá yó, chi jíca yó nájnūhun cuní maá Espíritu.

<sup>5</sup>Chi ñayuu jeē cájica jíin modo neé máá, chi máni ndíhví ni i siquī jeē cuní maá i. Te ñayuu jeē cájica nájnūhun cuní Espíritu, chi máni ndíhví ni i siquī jniñu cuní maá Espíritu. <sup>6</sup>Te jeē ndíhví ni yō siquī modo cuní maá yó sáha jeē jnahnú ndetū yō. Te jeē ndíhví ni yō siquī jniñu cuní maá Espíritu, sa suhva sáha jeē cotecu yō níí cáni te coo ndeyí coo siñi ni yō. <sup>7</sup>Chi ñayuu jeē ndíhví ni siquī modo neé cuní maá i, chi jíto uhū i Yaā Dios, chi tu cuní i cuatáhú i ley Yaā Dios, te ni ma cúu squícu i. <sup>8</sup>Jeē yúcuan, ñayuu jíca jíin modo cuní maá, tu cúu sáha i jeē cúsiñi ni Yaā Dios jíin i.

<sup>9</sup>Te máá ró jijnáhan ró, chi tuá cájica ró jíin modo cuní maá ró, chi cájica ró nájnūhun cuní Espíritu, chi ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihí i ndaha ya. <sup>10</sup>Te núu ndéé Cristo ini rō, te vēsú ñin quiví te cuu yiquí cúñu rō jeē siquí cuéchi, te cotecu anuá rō siquí jeē ní ndahva Yaā Dios cuéchi ró. <sup>11</sup>Te núu ini rō jijnáhan ró ndéé Espíritu maá Yaā jeē ní nastécu Cristo Jesús mēhñu ndíyí, yūcuán na te máá yá suni sáha ya jeē natecu yiquí cúñu rō jeē cúu. Te sáha ya súcuan jeē jíin maá Espíritu yā jeē ndeé ini rō.

<sup>12</sup>Núu súcuan, hermano jijnáhan ró, ndéé jniñu yó jéé caca ndaā yō, te nasū jéé sáha yó modo neé cuní maá yó. <sup>13</sup>Chi núu caca ró jíin modo neé máá ró, te jnahnū ndetū rō. Te núu jíin fuerza maá Espíritu snāā rō táca jniñu casáha ró jíin modo neé máá ró, te cotecu rō níí cáni.

<sup>14</sup>Chi táca ñayuu jeē cándiquín modo jeē steén Espíritu Yaā Dios, máá i cácuu sēhe Yaā Dios. <sup>15</sup>Chi Espíritu jeē ní canihīn rō, tu ní sáha ya rohó jéé cuu ró nájnūhun mozo nuū yā jeē yūhú tucu ró núu yā, chi sa ni sáha ya jeē cúu yó sēhe ya. Te jeē yúcuan cúu jeē cahán jee yó:

Tátá maá ná. <sup>16</sup> Te máá Espiritu steén yā ini anuá yō jeē cúu ndije yó séhe Yaā Dios. <sup>17</sup> Te núu séhe ya cácuu yó, te suni nihin yō maá táhū jeē ni jéjnūhun ya, te iin cáhnu-ni coo tahū yō jíin Cristo. Chi núu ndóho yó jíin yá vijna, suni cujéhnu yó jíin yá andiví.

<sup>18</sup> Núu súcuan te sáha ri cuenta jeē táca jnúndóho jeē ndóho yó vijna, lúli ndasí cúu nuū jnúhun jeē cujéhnu luu yó jíin yá cucuéé gá. <sup>19</sup> Chi ndihi jeē ni jécōo, yōhyo cándētu jeē na sáha Yaā Dios jeē nduvāha, quiví quenda ndijin jeē cujéhnu séhe Yaā Dios jijnáhan i. <sup>20</sup> Chi táca jéē ni jécōo, chí ni quívi chíji jnúhun jeē tu quéndōo vāha. Te nasūu jéē ní castívi máá, chí ñayuu ni casáha cuēchi, te jeē yúcuan ní squéndōo Yaā Dios súcuan. Te máni cándētu jeē ndúvāha. <sup>21</sup> Chi iin quiví te táca jéē ni jécōo, chí quenda chíji jnúhun jeē tívi jíin jéē tehyú. Te nduluu ndasí nájñūhun coo táca séhe Yaā Dios, chí cácu nuū jnúhun jeē tu quéndōo vāha. <sup>22</sup> Chi jíin yō jeē táca jéē ni jécōo, chí nde vijna te nájñūhun inuú-ni cándoho te cájitū ni jeē na ndúvāha ndihi. <sup>23</sup> Te nasūu máá-ni táca jéē ni jécōo cúu jeē ndóho, chí suni nde maá yó ndóho yó, vésú je névāha yó Espiritu jeē cúu seña jeē iin quiví te nihin yō ndihi tahū yō. Chi yōhyo ndóho yó jnúndóho, te ndétu yó jéē náquihin séhe ya yohó te jnama ya yiquí cúñu yō jeē tuá ndoho yó jíin. <sup>24</sup> Chi ni jnama ya yohó síquī jeē ñūhun ni yō jeē súcuan coo. Te núu je ni sáha ya nájñūhun ñūhun ni yō, yūcuán na te tuá ñūhun ni yō jeē sáha ya súcuan jíin yó. Chi tuá ndétu yó te núu je ni cuu súcuan. <sup>25</sup> Te núu ná tu coto yó jéē sáha ya jeē ñūhun ni yō, yūcuán na te jíin paciencia ndétu yó jéē sáha ya.

<sup>26</sup> Te suni súcuan máá Espiritu chindéé ñáhán yá yohó jéē tú na fuerza ini yō. Chi tu jíin yō cacán tahú yō nájñūhun cánuú. Te máá Espiritu cahán ndahú

yá jíin Yaā Dios jehē yō síquī táca jéē jítu ndasí ni yō te tu níhin yō jnúhun ndese cacán tahú yō. <sup>27</sup> Te máá Yaā Dios jeē jíto ndee anuá yō, chí jíin yā táca jéē cuní máá Espiritu cahán yā jehē yō. Chi ñayuu cáyihí ndaha Yaā Dios, cáhán ndahú Espiritu jehē i nájñūhun cuní Yaā Dios.

### Vāha-ni cúndeyí yó síquī ndihi jeneé

<sup>28</sup> Te jíin yō jeē táca-ni jeē quíji nuū ñayuu maní jíin Yaā Dios, jeē váha chí jéē uhú, chí quéndōo vāha ga i nuū yā, sáha ya jíin táca jéē yúcuan. Chi cácuu i ñayuu jeē ní cana ya i ni quívicoo i ndaha ya síquī jeē súcuan ni tee ni yā nde jenahán. <sup>29</sup> Chi nde ná tu coo i te je jíin yā i, te je ni jeni ya i jeē ndoo ndaā nduu ánuá i ndacu i máá Séhe ya, návāha na cúu Séhe ya ñani jéhnu nuū cuehē ñayuu cácuu ñani cácañdije. <sup>30</sup> Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē cujéhnu i.

<sup>31</sup> ¿Te ndese ga cahán yō síquī jnúhun jéhnu yáha núu súcuan? Chi núu íne Yaā Dios jíin yó, ¿te ndé iin cuu cahán síquī yó? Tú ni iin. <sup>32</sup> Chi máá yá tu ní jnáma ya Séhe ya jeē ma cúu yā, chí sa suhva ni jéhe ya Séhe ya ni jihí yā jehē ndihi yó. Te núu súcuan ni jéhe ya Séhe ya, te nagā ni cuu jeē ma cuáha ya táca gá jeē jíin ñúhún yó. <sup>33</sup> ¿Te ndé iin cuu cahán cuēchi síquī ñayuu jeē ní nacáji Yaā Dios? Tú ni iin. Chi máá yá ni ndahva yā cuēchi i. <sup>34</sup> ¿Te ndé iin cuu ndenehen cuēchi síquī yō núu súcuan? Tú ni iin. Chi máá Cristo cúu jeē ni jíin yā jehē yō, te suni ni natecu yā. Te vijna te ndéé yá lado váha Yaā Dios nuū cujéhnu ya, te cáhán ndahú yá jíin Yaā Dios jehē yō. <sup>35</sup> ¿Te ndé iin cuu quenehen yohó núu jnúhun cúndahú ni Cristo yohó? ¿A jnúndóho, chí táca jéē yíi sáha, chí jéē cájito xeē ñayuu yohó, chí jnáma, chí



jéē cúmanī sahma, chí jnúhun yúhú, chí jéē cáhni i yóhó naún? Ni ìn tāca jéē yáha. <sup>36</sup> Chi súcuan yósó núú tútu ìi jéē cácahān ñayuu cácañdije jíín Yaā Dios: Jeē siquí maá ní te ndíhi-ni hora cácuñi i cahni i sãhá.

Te cásáha i jíín ná nájñuhun cásáha i jíín lanchi, quití cūú.

Achí tutu. <sup>37</sup> Te tuú chí vēsú cándoho yó tāca jéē yáha, te vāha-ni cūndeyí yó siquí ndíhi-ni, sáha máá Yaā jéē ní cundáhú ni yohó. <sup>38</sup> Jeē yúcuan cúcáhnu ni rí jéē tú ni ìn cuu quenehen yóhó núú jnúhun cundáhú ni Yaā Dios yohó. Ni núu cuu yō, ni núu cotecu yō, ni tācá ndajéhé andiví, ni tāca jéē neé jéē cácujuhnu jñí poder, ni jéē iyó vijna, ni jéē cóo, <sup>39</sup> ni jéē iyó núú sūcún, ni jéē iyó núú cūnú, ni tāca gá jéē ní jecōo, ma cúu cuití quenehen yóhó núú Yaā Dios, jéē jíín Jítóho yō Cristo Jesús ni cundáhú ni yā yohó.

### Siquí ndese ni nacāji ya yucūn Israel

**9** Te cáhán ndaā rí chí cúu ri tēe cáñdije Cristo, te tu stáhú rí, te jíín rí ini anuá rí jéē cáhán ndaā rí sáha Espíritu Santo. <sup>2</sup> Yōhyo cúcuíhyá ni rí, te níní jnáhuhū ni anuá rí <sup>3</sup> jéē siquí tāca jnáhan ri ñayuu nación hebreo, chí ìn-ni yucūn rí jijnáhan ri. Chí jéē siquí máá i te cúu ni rí jéē núu na cúu te cujiyo ri nuú Cristo te jnahnū ndetū ri, návāha jíín yúcuan te cuu cácu ánuá maá i núú.

<sup>4</sup> Chí cácuu i yucūn ñayuu Israel, te nde jenahán ni sáha Yaā Dios jéē cúu i sēhe ya, te mēhñu vícō jéē ndíndéé ní condee yā jíín i sáa. Te jíín máá i ni sáha ya tācá contrato, te ni jēhe ya ley yā nuú Moisés jéē cúu máá i, te ni steén yā ndese chiñúhún i ya ini templo, te nuú maá i ni jejnūhun ya cuehē jñuhun. <sup>5</sup> Te máá i cácuu yucūn tāca jíí yō jéē ní cacujéhnu, te suni yucūn maá i ni cacu Cristo jéē ní nduu ya tēe. Te máá yá cúu Yaā Dios jéē jñí ndíhi-ni, te ní cáni cahān ñayuu jéē cujéhnu ya. Amén.

<sup>6</sup> Te nasūu jéē tu ní quée ndaā tāca jnúhun jéē ni jéjnūhun Yaā Dios nuú ñayuu Israel. Chí ni quee ndaā nahín núú vēsú jecu-ni i, chí tú ndíhi-ni yucūn Israel cúu jéē cácañdije. <sup>7</sup> Chí nasūú ndíhi yucūn Abraham cácuu ndije sēhe de jéē ni jéjnūhun ya. Chí ni cahān Yaā Dios jíín de: Nuú maá-ni sēhe ró Isaac cúu nuú coo yucūn rō jéē ni jéjnūhun ri nuú rō. <sup>8</sup> Te jñuhun yáha cúní cahān jéē ni ìn ñayuu tu cúu i sēhe Yaā Dios siquí jéē ní cacu i ìn yucūn jéē jení ni i jéē vāha ga cúu. Chí sa suhva máni yucūn jéē ni jéjnūhun ya cúu ndije yucūn jéē chíhi ya cuenta. <sup>9</sup> Chí yáha cúu jñuhun jéē ni jéjnūhun ya nuú Abraham: Máá tiempo jéē ní jeni ri te quiji ri, te cacu ìn sēhe yí ñasihí ró Sara, achí yá.

<sup>10</sup> Te nasūu máá yáha-ni, chí suni Rebeca ni cacu uū sēhe yí ña, te ìn-ni tátá ndíndúú i, jéē ní cuu jíí yō Isaac. <sup>11-13</sup> Te nde ná tu cacu ndíndúú i, te ná tu sáha i jéē vāha jéē uhú, te je ni cahān yā jíín Rebeca: Sūchi ní cacu xihna gā cua-jñíñu i nuú sūchi sándíhí, áchí yá. Chí suni súcuan cáhán tutu ìi: Ni jito maní rí Jacob, te Esaú chí tuú, áchí Yaā Dios. Te súcuan jíín yō jéē maá Yaā Dios cuu nacāji ya ñayuu núu ndese tēe ni máá yá, te nasūu síquí jñíñu jéē sáha i, chí sa suhva siquí ndese cúní maá yá nacāji ya i.

<sup>14</sup> ¿Ndesse cahān yō núu súcuan? ¿A jéē tu íyó ndaā Yaā Dios jéē sáha ya súcuan, chí naún? Tú cuití. <sup>15</sup> Chí nde jenahán ní cahān yā jíín Moisés: Ndé-ni cúu jéē cuní rí cundáhú ni rí, te cundáhú ni rí. Te ndé-ni cúu jéē cuní rí sáha ri jéē vāha jíín, te sáha ri jíín, áchí yá. <sup>16</sup> Núu súcuan te nasūu síquí jéē cuní maá ñayuu, ni nasūu jéē nducú ndeyí máá i cúu, chí siquí ndese cúní maá yá cundáhú ni yā i. <sup>17</sup> Chí suni súcuan yósó núú tútu ìi jéē ni cáhán yā jíín rey ñuu Egipto: Ni jeni ri rohó jéē cúu ró rey, návāha jíín rohó te stéén rí poder rí, te návāha cuitē núu

síhví rí ní ñáyíví, áchí yá. <sup>18</sup> Núu súcuan te núu ndé ìn cúní yā cundáhú ni yā, te cundáhú ni yā. Te núu ndé ìn cúní yā jeē cunihni ni, te sáha ya jeē cúnihni ni.

<sup>19</sup> Te sanaa te cahān ìn ró jíín rí: Núu súcuan cúu ¿te najehē cahán gā yā jeē cuēchi sáha yó? Chi ma cúu casi yō nuū yā jeē ndese cúní maá yá sáha ya. Achí rō. <sup>20</sup> Te sa suhva cáhán rí jíín ró: Róhó, ¿ndé ìn cúu ró jéé jéni ni rō stió cuñí rō nuū Yaā Dios? ¿A cuu cahān quísi ñuhun jíín téé ni sáha: Najehē ni sáha ró rúhū súcuan? achi. <sup>21</sup> Chi tēe sáha quísi, cuu sáha de ndese cúní maá de, chi ìn-ni ñuhun cuu sáha de ìn quísi fino te inga quísi corriente.

<sup>22</sup> ¿Te á tu jétáhú ró jeē suni súcuan sáha Yaā Dios jíín ñáyuu? Chi cúní yā steén yā ndese sáha ya juicio siquī ñáyuu, te súcuan te cuni i poder yā. Te vēsú súcuan te ni ìyo paciencia ni yā jeē tu ní ndóna yachí yā siquī ñáyuu jeē jnahnú ndetū. <sup>23</sup> Te sáha ya súcuan návāha steén yā ndese yōhoyo luu cújéhnú ya siquī jniñu sáha ya jíín yóhó ñáyuu cundáhú ni yā. Chi nde jenahán je ni sátühva ya yohó jéé luu cújéhnú yó jíín yá. <sup>24</sup> Chi ni cana ya yohó jéé candíje yó, te sava yó cúu ñayuu hebreo te sava yó cúu ñayuu tāca gá nación. <sup>25</sup> Chi suni súcuan ni cahān yā, yósó núu tútu Oseas:

Ñayuu jeē tu ní cúu ñayuu maá rí, vijna te cahān rí jeē cácuu i ñayuu maá rí. Te ñayuu jeē tu ní ìyo maní rí jíín, vijna te cahān rí jeē cácuu i ñayuu jeē maní rí jíín.

<sup>26</sup> Te máá lugar nuū ni cáhán rí jeē násūu ñáyuu rí cácuu i, suu yūcuan cáhán ñayuu jeē cácuu i sēhe Yaā Dios, Yaā técu níí cáni.

Achí yá. <sup>27</sup> Te Isaías sa suhva ni cahān de jñūhun ñayuu Israel: Vēsú ni cayā yucūn Israel nájnūhun ñítí yumar, te jecu-ni i jnama ya. <sup>28</sup> Chi Jitoho yō Yaā Dios, yachí sínu ya jniñu jeē sándaā yā cuēchi

ñayuu ñayíví. Achí tutu. <sup>29</sup> Chi nájnūhun ni cahān tucu Isaías:

Máá Yāā cúu Jitoho nuū tācá ndajéhé andíví, núu tu ní jnáma ya jecu yucūn yō nuú,

te je ni ndoho yó nájnūhun ñayuu ñuu Sodoma jíín ñuu Gomorra, jeē ní naa ndihi.

Achí tutu.

### Jeē tu cájetáhú ñayuu hebreo jñūhun jnama ya i

<sup>30</sup> ¿Ndese cahān yō núu súcuan? Suu jeē ñáyuu tāca gá nación, vēsú tu ní cánducú i quendōo ndaā i nuū Yaā Dios, te ni ndahva yā cuēchi i. Chi siquī jeē ní candíje i jeē ni jííhí Cristo jehē i cúu jeē ní ndahva yā cuēchi i. <sup>31</sup> Te sa suhva ñayuu Israel, vēsú cánducú i quendōo ndaā i nuū Yaā Dios sáha ley yā, te tu cúndeyí i quendōo ndaā i. <sup>32</sup> ¿Te najehē? Siquī jeē tu cánducú i jeē ndahva yā cuēchi i jeē candíje i jeē ni jííhí Cristo jehē i, chi sa jéni ni i jeē squícu máá i ley te quendōo ndaā i. Te jeē stívi i súcuan cúu nájnūhun cácotúú i siquī maá yúú jeē cácachihí jehē, te suu cúu Cristo. <sup>33</sup> Chi súcuan cáhán nuū tútu ìi:

Nde ñuu rí Sion sáha rí jeē cóne maá Yāā jeē cúu nájnūhun yuū jeē cácachihí i jehē i.

Te cúu ya nájnūhun toto jeē cotúú i sáha. Te sa suhva ñayuu cáncandíje Yāā ún, chi jnama nahín yá i.

Achí Yāā Dios.

**10** Hermano jijnáhan ró, cúu ndasí ni rí te jécán tahu rí nuū Yaā Dios jehē ñayuu nación rí Israel, jeē na jnáma ya i jíjnáhan i. <sup>2</sup> Chi cáhán rí jeē vāha cásáha i jeē ndíhví ni i cáchiñúhún i Yaā Dios. Te vēsú súcuan te cáchiñúhún cáhá i. <sup>3</sup> Chi tu cájecūhun ni i ndese ndáhva Yāā Dios cuēchi ñayuu, te ndúcú i quendōo ndaā i máá-ni jeē squícu i ley. Te tu cájetáhú i máá modo jeē ndáhva Yāā Dios cuēchi i. <sup>4</sup> Chi siquī jeē ni sáha

Cristo te cuu quenda ñayuu chíji ley Moisés. Te ndáhva Yaā Dios cuēchi tāca ñayuu jeē candíje i jeē ni sáha Cristo jehē i.

<sup>5</sup> Chi súcuan ni tee Moisés jñuhun ñayuu jeē cánducú quendōo ndaā jíin ley: Núu iin ñayuu cuu squícu i tācá jniñu ndácu ley, te cotecu i núú, áchí. <sup>6</sup> Te jñuhun jeē ndáhva Yaā Dios cuēchi ñayuu siquí jeē candíje i jeē sáha ya jehē i, chi sa suhva cáhán: Ma cáni ni rō jeē jíni ñúhún caa rō andiví nasnúu rō Cristo jeē ndahva yā cuēchi rō. <sup>7</sup> Ni ma cáni ni rō jeē jíni ñúhún cuun rō ndé nuū cūnú ndonehen rō Cristo mēhñu ndíyi, nájñuhun jeē tu ní nátecu yā. <sup>8</sup> ¿Te ndese cáhán jñuhun un núu súcuan? Yajni íyó jñuhun ya jíin rō, chi ñúhun ini yuhu rō jíin ini anuá rō, achí tutu. Te suu cúu jñuhun jeē na cándíje yó jéé jnáma ya yohó. Te jñuhun yáha cúu jeē cánacani ri. <sup>9</sup> Chi núu cahān rō jeē Jítóho rō cúu Jesús, te núu candíje rō jíin ini jíin ánuá rō jeē ní natecu yā mēhñu ndíyi ni sáha Yaā Dios, yūcuán na te jnama ya rohó. <sup>10</sup> Chi jíin ini jíin ánuá yō cándíje yó jéé ni jíhi yā jehē yō, te súcuan te ndáhva Yaā Dios cuēchi yó. Te jeē cahán yō jeē Jítóho yō cúu Jesucristo, te súcuan te jnama ya yohó.

<sup>11</sup> Chi cáhán tutu i: Tāca ñayuu jeē candíje i ya, chí jnama nahín yá i, áchí. <sup>12</sup> Chi inuú-ni cúu ñayuu hebreo jíin táca gá ñayuu, chí máá yá cúu Jítóho nuū ndíhi yó, te cuehē jeē váha sáha ya jíin ñayuu cácahān ndahú jíin yá. <sup>13</sup> Chi súcuan cáhán jñuhun ya: Ndíhi ñayuu cácahān ndahú jíin máá Jítóho yō, chí jnama ya i, áchí. <sup>14</sup> ¿Te ndese cahān ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jñuhun ya? ¿Te ndese cuni sōho i te núu tú na ñayuu nacani jñuhun nuū i? <sup>15</sup> ¿Te ndese nacani ñayuu jñuhun ya te núu jeē tu tájí yá i quihín i? Chi nájñuhun cáhán tutu i: Yōhoyo luu jniñu

casáha ñayuu cájica jíin jñuhun ndeyí sñ ni jeē cánacani i jñuhun vāha ya, achí.

<sup>16</sup> Te nasúu ndíhi i jétáhú nuū jñuhun jnama ya i. Chi ni cahān Isaías nde jenamehán: Tátā Yaā Dios, ¿ndé ñayuu ni candíje jñuhun jeē cánacani ná víi? áchí de. <sup>17</sup> Núu súcuan te núu cuni nahín ñayuu te cuu candíje i. Te jñuhun cuni nahín i cúu jñuhun Cristo.

<sup>18</sup> Te cájnñuhun rí: ¿A tu ní cájini sōho i jñuhun un núu súcuan? Tuú chí ni cajini sōho i, chí cáhán tutu i: Níí ñáyivi ní cajini sōho ñayuu jñuhun jeē ní canacani de.

Te nde nuū jicá gá tāca lado ni jinū jñuhun ún.

Achí tutu. <sup>19</sup> Te suni cájnñuhun rí: ¿A tu ní cájecūhun ni ñayuu Israel jñuhun ún? Tuú chí ni cajecūhun ni i, te tu ní cá-jetáhú i. Chi xihna gā Moisés ni cachi de jeē ni cáhān Yaā Dios:

Cucuñí rō jijnáhan rō, chí cuāha ri jñuhun ri nuū inga ñayuu jeē násúu iin nación cúu.

Te quití ni rō coto rō jéé cuāha ri jñuhun ri nuū iin nación jeē tu jécūhun ni.

<sup>20</sup> Te suni Isaías ni chundeyí ni de ni cachi cájí de jeē ni cáhān Yaā Dios: Ñayuu jeē tu ní cánanducú rúhū, ni cajini i ruhū.

Te nuū ñayuu jeē tu ní cácajnñuhún, ni steén ri nuū i ndese Yaā cúu ri.

<sup>21</sup> Te siquí ñayuu Israel sa ni cahān de jeē ni cáhān yā: Ndíquiví ni cana ri i jeē quívicoo i nuū rí, te tu ní cácu ni i, chí ñayuu nihni ni, ñayuu jéé ni cácuu i. Achí yá, achí Isaías.

### Jeē iyó jecu na ñayuu Israel jeē jnáma ya

**11** Núu súcuan te cájnñuhun rí: ¿A ní stóo Yaā Dios ñayuu maá yá Israel, chí naún? Tú cuiti. Chi ruhū suni tēe Israel cúu ri, te yucūn Abraham cúu ri, te Benjamín cúu jíi ri jenamehán. <sup>2</sup> Tu ní stóo Yaā Dios ñayuu maá yá, chí je ni

nacāji ya i nde jenahán. ¿A tu cájini rō ndese cáhán tutu iī jñūhun Elías, tēe ni nacani jñūhun ya jenahán? Chi náa jícan tahú de, te ni cahán de siquī ñáyuu Israel: <sup>3</sup>Tátā Yaā Dios, ni cajehni i tāca tēe cánacani jñūhun ní, te ni cajenu i tācá altar ní. Te máñhún na sāña ní quendō, te vijna suni cáculi i cahni i sāña, áchí de. <sup>4</sup>Te Yaā Dios ni nastió cuñí yā: Iyó nahín úxā mil ñáyuu cáculíje ruhú jeē tu ní cájecuñí yití i nuū ídolo naní Baal, achí yá. <sup>5</sup>Te suni súcuan vijna, chí íyó jecu na ñáyuu jeē ní nacāji ya siquī jeē váha ni yā jíin i. <sup>6</sup>Te núu ni nacāji ya i siquī jeē váha ni yā jíin i, te nasūu síquī jeē ni sáha i jniñu váha cúu. Chi núu siquī jeē ni sáha i jniñu váha cúu, yūcuán na te nasūu síquī jeē váha ni yā cúu.

<sup>7</sup>¿Te ndese cúu núu súcuan? Cúu jeē ñáyuu Israel tu ní cúndeyí i quendō ndaā i nájnūhun ni canducú i. Te sava i jeē ní nacāji ya, chí máá i ni ndahva yā cuēchi i. Te sava ga i ni ndunihni ni i, <sup>8</sup>nájnūhun cáhán tutu iī: Ni sáha Yaā Dios jeē tu jécūhun cuiti ni i siquī yā, ni tu jíin i jíin tñūú i, ni tu jíin nahín i jñūhun ya, te súcuan cúu nde vijna. Achí tutu. <sup>9</sup>Te suni ni cahán David:

Vico jeē casáha i, na cóo nájnūhun iin trampa chí iin xeyū,  
návaha nihín i castigo xeēn siquī jeē castívi i casáha i cuēchi.

<sup>10</sup>Te ánuá i na ndúnee, nájnūhun jeē tuá cúu coto i,  
te na jécosthí jñūndóho siquī i ní caní. Achí tutu.

### Siquī jeē jnáma ya ñáyuu tāca gá nación

<sup>11</sup>Núu súcuan te cájnūhun rí: ¿A tuá cúu cuiti ndívi ñáyuu Israel nuū Yaā Dios jeē súcuan ni castívi i? Tú cuiti. Chi sa suhva jeē ní cacunihni ni i, te sa ñáyuu tāca gá nación ni canihín tahú máá i jñūhun jeē jnáma ya i. Te yūcuán sáha tucu jeē ñáyuu Israel condíhvī ni i jeē

suní candíje máá i. <sup>12</sup>Chi jeē ní castívi i, te sa ñáyuu ní cáhnu ñayívi ní canihín maá i jñūhun ya. Te jeē ní cajica yátá i, suu ni sáha jeē ní canihín ñáyuu tācá nación jñūhun ya. Núu súcuan te quívi jeē ndívicoo tucu ndíhi ñáyuu Israel ndaha ya, te ñáyuu ñayívi víhyá gá quendō ndetū i sáha ún.

<sup>13</sup>Te vijna te cáhán rí jíin róló ñáyuu tācá nación jeē tu ní jíin jñūhun ya. Chi ni tají Yaā Dios ruhú jeē scáca rí jñūhun nuū rohó ñáyuu tācá nación. Te ndúcú rí jeē na cuájñhún ró jijnáhan ró jniñu sáha rí jeē nácani rí jñūhun ya.

<sup>14</sup>Chi cúni rí jeē jíin yúcuán te nacani ni sava jnáhan rí ñáyuu Israel jeē suni candíje máá i, te jnama ya i. <sup>15</sup>Chi jeē ni stóo ya ñáyuu Israel, jeē yúcuán cúu jeē sa ñáyuu ñayívi ní sáha ya jeē ndívicoo i nuū jñūhun maní yā jíin i. Núu súcuan te quívi naquihín tucu ya ñáyuu Israel, quívi ún suni váha ndasí sáha ya jíin ñáyuu ní cáhnu ñayívi. Chi coo nájnūhun jeē natecu i jeē cúu i nájnūhun ndívi. <sup>16</sup>Te ñáyuu Israel cásocō i nuū Yaā Dios pan jeē quénda xihna gá nuū ñujen, te súcuan stéén i jeē ndíhi un cúu cuenta yā. Te iin yujnu, núu yíhi jeē cuenta yā cúu, te suu cúu nde yoho jíin ndé ndíhi ndaha. Te suni súcuan ñáyuu Israel, yíhi cuenta i nuū yā, siquī jeē jíi i xihna ñhún, ni quívicoo de ndaha ya.

<sup>17</sup>Chi ñáyuu Israel cácuu i nájnūhun ndayújnu olivo váha, te sava ndaha un ní quendē. Te róló ñáyuu tācá nación jeē tu jíin jñūhun ya, cácuu ró nájnūhun ndayújnu olivo yucú, te ni nachuhun ya rohó núu ni quendē ñáyuu cácuu ndayújnu váha ún. Te nájnūhun inuú-ni cástáa ró ndúxi jíin cajin jeē véji nde yoho yújnu ún. <sup>18</sup>Núu súcuan te ma sáha téyí ró maá ró nuū ñáyuu Israel jeē cácuu nájnūhun ndayújnu jeē ni quendē. Ma cutéyí ró, chí nucūhun ni rō jeē násúú jéé yoho stáa cajin nuū maá ró, chí sa máá ró stáa cajin jeē véji nde yoho.

<sup>19</sup>Te sanaa te cahān rō: Tú chi sava ndaha ni quendē návāha nachuhun ya ruhū nuū ni quendē ún, achi rō. <sup>20</sup>Ndaā, te ni quendē i siquī jeē tu ní cácanđje i Cristo. Te rōhó chi máni siquī jeē cácanđje rō, jeē yúcuan cúu jeē ni quívicoo rō lugar i. Te ma sándúxí rō maá rō núu súcuan, chi sa suhva conso iyo rō núu Yaā Dios. <sup>21</sup>Chi tu ní íne cáhnu ni yā nuū maá ndaha jeē chíjniñu, te suni súcuan ma cóne cáhnu ni yā nuū rō jijnáhan rō te núu stívi rō. <sup>22</sup>Núu súcuan te sáha vāha ro cuenta ndese vāha ni Yaā Dios jíin ndese xeēn ni yā. Chi ni nduxeēn ni yā jíin ñayuu hebreo jeē ní castívi ún, te sa cúndáhú ni yā rohó. Te cánuú cuiñi nihin ro jíin jnúhun jeē váha ni yā jíin rō. Chi núu tuú, te suni quende yā rohó. <sup>23</sup>Te máá i, núu candíje tucu i, te nucōndee tucu i, chi máá Yaā Dios cuu nachuhun tucu ya i. <sup>24</sup>Núu súcuan te rōhó ñayuu tācá nación jeē tu ní jíin jnúhun ya, ni quendē rō xiní yújnu olivo yucú, te ni nachuhun ya rohó xiní yujnu olivo váha, vēsú nasūú ndaha máá yujnu un cácuu rō. Te nagā ni cuu ñayuu hebreo jeē ma náchuhun ya i nuū ni quendē i, chi cácuu i máá ndayújnu váha ún.

### **Íin quivī te jnama ya ndihi ñayuu nación Israel**

<sup>25</sup>Hermano, cúní ri jeē na jécúhun ni rō jijnáhan rō ndese íyó jnúhun yáha jéē ní yisāhí, návāha ma cutéyí rō cani ni rō jeē ndichí xiní maá rō: Chi sava ñayuu Israel ni ndunihni ni i, te súcuan coo máá-ni nde quivī jíinu candíje ñayuu tācá nación jeē tu jíin jnúhun ya. <sup>26</sup>Te sáá te jnama ya ndihi ñayuu nación Israel, chi cáhán tutu ii:

Ichi ñuu ri Sión quiji Yaā jnáma ñayuu, te sáha ya jeē tuá coo cuēchi nuū tāca yúcūn Jacob.

<sup>27</sup>Te yāha cúu contrato jeē sándaā ri jíin i,

quivī jeē quénde ri cuēchi i jijnáhan i, áchí Yaā Dios.

Achí tutu.

<sup>28</sup>Chi ñayuu hebreo un ní nduu i nájnūhun enemigo Yaā Dios siquī jeē tu ní cácanđje i jnúhun jnáma ya i. Te jeē yúcuan te cuu cuitē núu jnúhun un núu tāca rōhó. Te vēsú súcuan te siquī jeē ní nacāji ya tāca jíi i jenahán, te cúndáhú gá ni yā i jeē ma stóo ya i níf cáni. <sup>29</sup>Chi tu nácani yátá ni yā jeē cána ya ñayuu jíin jéē jéhe ya tahu i. <sup>30</sup>Te rōhó jijnáhan rō, suni ni cahíyo nihni ni rō nuū Yaā Dios nde saá. Te vijna jeē ní cacunihni ni maá ñayuu hebreo, te cúndáhú ni yā rohó. <sup>31</sup>Te suni súcuan máá i, chi vēsú cácanihni ni i vijna, te cúndáhú tucu ni yā i, nájnūhun cúndáhú ni yā maá rō jijnáhan rō. <sup>32</sup>Chi Yaā Dios ni sáha ya jeē ní quendōo ndívi ñayuu chíji jnúhun cúnihni ni i, návāha suni cuu cúndáhú ni yā ndívi i.

<sup>33</sup>Núu súcuan te náhán náa ni yō jeē yóhoyo cuehē jnúhun ndíchí íyó jíin Yaā Dios, te ndíhi cuiti jíin yā. Te ni ma cúu cuiti castúhun yó ndese téé ni yā sáha ya tācá-ni, te ma cánda cuiti yō jecúhun ni yō ndese cúu tāca jéē sáha máá yá. <sup>34</sup>Chi cáhán tutu ii: ¿Ndé íin ni jecúhun ni ndese jéni ni maá Jítóho yō? ¿Chí ndé íin ni steén nuū yā? <sup>35</sup>¿Ndé íin ni jéhe xihna gā nuū maá yá, návāha nachunaa yā nuū i? <sup>36</sup>Chi nde nuū maá yá vēji tāca jéē iyó, te máá yá ni sáha ndíhi, te jeē cúu máá yá cúu. Te na cáhán yō jeē yóhoyo luu cújéhnu Yaā Dios níf cáni. Amén.

### **Jeē na cóo ndoo ánuá yō cuajníñu yó núu Yaā Dios**

**12** Núu súcuan te cáhán ndahú rí jíin rō jijnáhan rō, hermano, jeē siquī jeē cúndáhú ni Yaā Dios yohó. Na sócō rō maá rō núu yā, coo ndoo coo íi rō cuajníñu rō núu yā, nájnūhun cúsiñi ni yā. Chi yāha cúu jeē chíñúhún rō yā nde jíin

ini jíin ánuá rō. <sup>2</sup>Te ma cáca ró jíin táca modo casáha ñayuu ñayīvi yáha, chi sa na sáma ró modo cani ni rō, te ndujeé jéé nájñuní rō. Te súcuan te cuu nacāji ró ndé-ni cúu jeé váha jeé nújnahan ni Yaā Dios, jeé cúsiī ni yā, jíin jéé íje ni rō jíin jnúhun ya.

<sup>3</sup>Te siquī jeé váha ni yā ni jēhe ya jniñu nácani ri jnúhun ya, jeé yúcuan cáhán rī jíin ndihí ró jéé ma cáni ni rō jeé váha ga ñayuu cúu ró núu cūhva jeé iyó ró. Chi ná ĩin ná ĩin ró na cáni ndaā ni rō siquī maá ró, te ma scáa ga rō cani ni rō jeé váha ga ñayuu cúu ró vēsú nuū cūhva jeé ni jēhe Yaā Dios fuerza ini rō cándíje ró. <sup>4</sup>Chi cácuu yó nájñuhun ĩin yiqui cúñu jeé iyó cuéhē parte, te sĩin sĩin jéjñiñu ĩin ĩin. <sup>5</sup>Chi vēsú iyó cuéhē yō, te nájñuhun ĩin-ni yiqui cúñu cúu yó jéé yĩhi yó ndaha Cristo, chi ĩin-ni ni nduu yó jíjnáhan yó.

<sup>6</sup>Te sĩin sĩin tahū ni jēhe Yaā Dios nuū yō jeé cuajñiñu yó núu yā, núu ndese ni nujnahan ni yā ni jēhe ya nuū ĩin ĩin yó. Núu súcuan te na cuajñiñu váha yó jíin táhū ún. Núu ni nihĩn yō tahū jeé nácani yó jnúhun ya, te cánuú sáha yó ndé maá cūhva ni jēhe ya cándíje yó. <sup>7</sup>Te núu ni nihĩn yō tahū jeé chindéé ñáhán yó jnáhan yó, te na sáha yúcún yó. Te núu ni nihĩn yō tahū jeé steén yō, te na cóndihvī ni yō steén yō. <sup>8</sup>Te ñayuu jeé stĩhvī ni ĩnga ñayuu, suni na sáha yúcún i. Te ñayuu jēhe nuū jnáhan, na cuáha i súcuan-ni. Te ñayuu ndíso jñiñu, na ndácu váha i jniñu. Te ñayuu jíto ndáhú ñayuu ndahú, na cúsiī ni i sáha i.

### **Ndese cánuú squícu ñayuu cácandíje**

<sup>9</sup>Te na cúndáhú ndije ni rō jnáhan ró, nasūu maá jéé cahán-ni ró. Te coto uhū rō jniñu néé, te condiquĩn rō jniñu váha. <sup>10</sup>Te cánuú coo manī rō jíin jnáhan ró nájñuhun jéé manī rō jíin ñani rō. Te nducú ró jeé quéndōo yĩñúhún gá jnáhan ró vēsú maá ró.

<sup>11</sup>Te ma cucúxí ró jíin jniñu casáha ró. Chi jíin ini jíin ánuá rō condihvī ni rō cuajñiñu ró núu maá Jítoho yō.

<sup>12</sup>Te na cúsiī ni rō jeé cáñuhun ni rō táca jéé váha jeé cóo. Te na cuándeýí ni rō núu ndóho ró jnúndóho. Te níni na cácan tahú rō.

<sup>13</sup>Te coto ndáhú ró ñayuu cácandíje núu cúmanī nuū i. Te cuáha núu ró vehe nuū ñayuu cájica.

<sup>14</sup>Te cacān tahú rō jehē ñayuu cájito xeēn rohó. Ma cahán ndeváha ro síquī i, chi sa cacān tahú rō jehē i.

<sup>15</sup>Te núu cúsiī ni ñayuu, te suni na cúsiī ni rō jíin i. Te núu cúcuíhyá ni ñayuu, te suni na cúcuíhyá ni rō jíin i.

<sup>16</sup>Na cóo inuú ni rō jíin táca jnáhan ró. Te ma cundúxí ró, chi sa quijnáhan ró jíin ñayuu núu ga. Ma cáni ni rō jeé ndichí xíní rō.

<sup>17</sup>Te ma nasáha ndeváha ró jíin ni ĩin ñayuu, núu ni sáha ndeváha i jíin ró. Na cóndihvī ni rō sáha ró jniñu váha, jíto jínúu táca ñayuu. <sup>18</sup>Te na cóndihvī ni rō coyūcu mání rō jíin táca ñayuu, vēsú ndese cándāa maá i. <sup>19</sup>Ñáni mání jíjnáhan ró, ma nácuáha ró jéé ndútahū ñayuu casáha ndeváha jíin ró, chi sa cuáha ró jnúhun jeé maá Yaā Dios cuáha ya castigo i. Chi cáhán tutu ii: Máá rí cuáha castigo i, máá rí nacuáha yáhu i, áchí Jítoho yō. <sup>20</sup>Te suni cáhán tutu: Tēe jíto uhū rohó, núu jí de sóco, te cuáha ró jéé cáji de. Te núu jíchí de, te cuáha ró jéé cóho de. Chi núu sáha ró súcuan, te cucanu de te nacani uhū ni de jeé ni jíto uhū de róho. <sup>21</sup>Ma cuáha ró jnúhun jeé cúndeýí jniñu néé jíin ró, chi sa jniñu váha na sáha ró náváha ndahvā jniñu néé.

**13** Tāca ñayuu na cuátáhú i nuū tohō cándiso jniñu ñuu. Chi ma cóo tēe cándiso jniñu te núu tu ní sáha maá Yaā Dios. Te tēe cándiso jniñu chi Yaā Dios ni tee jniñu siquī de. <sup>2</sup>Te ñayuu jeé tu jétáhú núu tēe cándiso jniñu, núu

súcuan te cúnihni ni i nuū jeē ní jeni Yaā Dios. Te ñayuu jeē cúnihni ni, chi cuēchi sáha i, te nihin i castigo. <sup>3</sup> Chi táca té ndiso jniñu, nasūu jeē ndiso jniñu de jeē yūhú ñayuu casáha jniñu váha, chi sa jeē yūhú ñayuu casáha jniñu neé. Te núu cúní rō jeē ma cúxeen tēe cándiso jniñu nuū rō, na sáha rō jniñu váha núu súcuan. Yūcuán na te cuajnúhún de rōhó. <sup>4</sup> Chi jéjniñu Yaā Dios de jíjnáhan de, návaha coyūcu váha rō jíjnáhan rō. Te núu sáha rō jniñu neé, te sa yūhu rō, chi nasūu cáha-ni cúu jeē cándiso jniñu de stóho de ñayuu. Chi jéjniñu Yaā Dios de, návaha cuáha de castigo ñayuu casáha jniñu neé. <sup>5</sup> Jeē yúcuan cánuú jéē cuatáhú rō núu tēe cándiso jniñu, te nasūu máni jeē ma níhín rō castigo, chi suni jeē tú na cuēchi coo ánuá rō.

<sup>6</sup> Te jeē yúcuan cúu jeē suni cájēhe rō xúhun núu tēe cándiso jniñu cuu jniñu ñuu. Chi jéjniñu Yaā Dios de, te máni jniñu yúcuan casáha de.

<sup>7</sup> Te chunaa rō ndihí jeē cátaū rō nuū táca ñayuu. Cuáha rō xúhun ñuu nuū tée stútú xúhun ñuu, te cuáha rō xúhun renta nuū tée stútú renta. Te na cóo respeto rō nuū ñayuu cánuú coo respeto rō. Te na cóo yñúhún rō nuū ñayuu cánuú coo yñúhún rō. <sup>8</sup> Ma cótaū rō nuū ní iin. Te íyó iin jeē taú rō jeē ma tahndé cuítí, suu jeē ni cáhān Yaā Dios jeē cundáhú ni rō jnáhan rō. Chi ñayuu cundáhú ni jnáhan, je ni squícu i ndihí jeē ndácu ley yā. <sup>9</sup> Chi súcuan ndácu ley jniñu: Ma cosíquí ndēē rō jnáhan rō, ma cáhni rō ndiyí, ma sacuíhná rō, ma sajnúhún rō, ma ndíyo ni rō jeē névaha jnáhan rō. Te táca jnúhun yáha jíin táca gá jniñu ndácu ley, ndihí-ni yñi chíji jnúhun yáha: Cundáhú ni rō jnáhan rō nájnúhun cundáhú ni rō maá rō, áchí tutu. <sup>10</sup> Te núu cundáhú ni yō jnáhan yó, te tu sáha yó ni iin jeē tu íyó váha nuū i. Núu súcuan te jeē cundáhú ni yō jnáhan yó, yúcuan cúu jeē squícu yó ní ley yā.

<sup>11</sup> Súcuan sáha rō jíjnáhan rō, chi sáha rō cuenta jeē cuácuyajni quiví ndjí ya. Te ma cóo ga rō nájnúhun ñayuu quixí, jeē cúhuun ni rō. Chi vijna je ni cuyajni ga quiví jnáma ya yohó vésú quiví ní candíje yó jnúhun ya. <sup>12</sup> Chi nájnúhun je yajni yáha jecuáa, te cuacundijin quiví jnáma ya yohó. Núu súcuan te na stóo yó jniñu jeē ni sáha yó núu neé, te na cúcutú yó jíin táca jniñu ndaā jeē caca yó jíin luz yā. <sup>13</sup> Na cáca yñúhún yó nájnúhun cánuú caca yó jíin luz yā. Ma nájini rō, ma sáha rō táca vico neé, ma cáca jnéni rō, ma sáha rō jniñu neé, ma cuajnáhan rō, ma cucuésún ni rō. <sup>14</sup> Chi sa suhva cuiñi cutú rō jíin fuerza maá Jítoho yō Jesucristo, jeē ma cuáha ga rō jnúhun sáha rō jniñu cúní modo neé maá rō.

### Ma cahán neé yó coto yó jnáhan yó

**14** Cuatáhú rō ñayuu jeē ná tu ije jíin jnúhun ya, te ma tejnáhan rō jíin i siquí táca jnúhun jeē sñin jéni ni i jíin maá rō. <sup>2</sup> Chi íyó ñayuu jeē jéni ni i jeē cúu caji i ndinuū-ni. Te íyó ñayuu jeē ná tu ije jíin jnúhun ya, te cájeni ni i jeē tú váha caji i cūñu, chi jeē ní casocō ñayuu nuū ídolo cúu. <sup>3</sup> Te rōhó tée jeē yéji ndinuū-ni, ma cahán rō coto rō tée jeē tu yéji ndinuū. Te rōhó tée jeē tu yéji ndinuū, ma cahán rō coto rō tée jeē yéji ndinuū. Chi Yaā Dios ni jetáhú yá tée ún. <sup>4</sup> Te rōhó, ¿ndé iin cúu rō jéē cahán neé rō jíto rō mozo Yaā Dios? Chi núu váha chí neé sáha de, te maá yá cúu jeē sándaā jíin de, nasūu maá rō. Te tuú chi cuiñi váha de, chi mozo maá Jítoho yō cúu de, te cuu sáha ya jeē ma stívi de.

<sup>5</sup> Te suni íyó ñayuu jeē jéni ni jeē íi gā iin quiví vésú inga quiví. Te inga ñayuu chí jéni ni i jeē inuú-ni cúu táca quiví. Te táca i na cúndaā váha ni maá i siquí jeē jéni ni i. <sup>6</sup> Chí tēe jeē neé íi quiví, chíñúhún de maá Jítoho yō jeē sáha de súcuan. Te tēe jeē tu neé íi quiví, suni chíñúhún de Jítoho yō jeē

sáha de súcuan. Te tēe jeē yéji ndinuū-ni, chíñúhún de máá Jítóho yō jeē sáha de súcuan, chí nácuatáhú de nuū Yaā Dios. Te tēe jeē tu yéji ndinuū, suni chíñúhún de Jítóho yō jeē sáha de súcuan, te suni nácuatáhú de nuū yā.

<sup>7</sup> Chi ni iin yó tu técu yō jeē váha máá-ni yó, te ni iin yó tu jíhí yō jeē cuní maá yó. <sup>8</sup> Chi núu técu yō, te técu yō jeē cuajñíu yó núu maá Jítóho yō. Te núu cuu yō, te suni cuu yō síquī jeē cuní maá Jítóho yō. Núu súcuan te núu jeē cótecu yō chí jēe cuu yō, te yáhi yó ndaha Jítóho yō. <sup>9</sup> Chi ni jihí Cristo te ni natecu yā, návaha cuu ya Jítóho nuū ñáyuu ni jíhí jíin ñáyuu técu.

<sup>10</sup> Te róhó, ¿naun jéni néé ni rō jíto rō jnáhan rō núu súcuan? ¿Te naun cújéé ni rō jíto rō de? Chi táca yó cuiñi yó yuhu mesa Cristo jeē sándaā yā jniñu yó.

<sup>11</sup> Chi suhva yósó núu tútu ii:

Jendaá ndije chí nuū maá rí cuiñi yítí táca ñáyuu,  
te ndíhi i cahān jeē maá rí cúu Yaā Dios,  
áchí máá Jítóho yō.

<sup>12</sup> Núu súcuan te ná iin ná iin yó nacuāha yo cuenta nuū Yaā Dios ndese jniñu ni casáha yó.

### Ma sáha yó jéé quívi jnáhan yó cuéchi

<sup>13</sup> Te jeē yúcuan ma cahán neé gá yō coto yó jnáhan yó. Chi sa tee ni rō jeē ma sáha rō ni iin jniñu jeē sáha jeē stívi jnáhan rō te quívi i cuéchi. <sup>14</sup> Te jíni ri jeē ni iin jeē ni sáha Yaā Dios, tu stívi ánuá yō. Chi súcuan ni cucáhu vāha ni rí síquī jeē candíje ri Jítóho yō Jesús. Te núu iin ñáyuu jéni ni i jeē iyó jéé stívi ánuá i, yūcuán na te súcuan sáha un jíin máá i. <sup>15</sup> Te núu jnáhan rō tu cúvāha ni de jeē yéji rō cūñu ni casocō ñáyuu nuū ídolo, chí jéni ni de jeē stívi un ánuá rō, núu súcuan te tu cundáhú ni rō de jeē sáha rō súcuan. Coto má snāā rō anuá jnáhan rō síquī jeē yéji rō iin jeē jéni ni de jeē cuéchi cúu. Chi suni jehē maá

de ni jihí Cristo. <sup>16</sup> Ma sáha rō jniñu jeē cahán i síquī, vésú jíni maá rō jeē iyó váha. <sup>17</sup> Chi jeē ndácu Yaā Dios jniñu nuū yō, nasūu síquī ndese caji yō coho yó cúu, chí sa suhva síquī jeē na sáha yó jniñu ndaā, te coyūcu mánī yō jíin jnáhan yó, te cusī ni yō sáha Espíritu Santo. <sup>18</sup> Te ñayuu jeē súcuan jéjñíu nuū Cristo, chí cúsi ni Yaā Dios jíin i, te suni cájejnúhún ñáyuu i.

<sup>19</sup> Núu súcuan te na cóndihvī ni yō coyūcu mánī yō, návaha jíin yúcuan chindéé ñájnáhan yó ije yó jíin jnúhun ya. <sup>20</sup> Te ma cuáha rō jnúhun jeē ndeyu yéji rō snāā jniñu ni sáha Yaā Dios jíin jnáhan rō. Chi iyó ndoo ndije ndíhi jeē yéji yō, te vésú súcuan te tú vāha jeē yéji rō ndeyu jeē sáha jíin jnáhan rō jéé caji de jeē jéni ni de jeē cuéchi cúu. <sup>21</sup> Vāha ga ma caji rō cūñu, ni ma cóho rō vino, te ni iin ma sáha rō jéé stívi ánuá jnáhan rō, te quívi de cuéchi, te caca yátá de nuū jnúhun cándíje de. <sup>22</sup> Te núu cándíje rō jéé tú na vé sáha jeē yéji rō, te súcuan na cándíje máá-ni rō núu Yaā Dios. Te nacā ndetū tēe jeē tu sáha jíin ánuá de jeē cuéchi cúu núu caji de coho de. <sup>23</sup> Te tēe yéji iin jeē jéni ni de sanaa te stívi ánuá de, núu súcuan te sáha de cuéchi, chí tu cándíje de jeē iyó váha jeē yéji de. Chi táca jéé sáha yó, núu tu cándíje yó jéé iyó váha, te cuéchi cúu.

### Jeē na sáha yó jéé cúsi ni jnáhan yó

**15** Te yóhó jéé ni íje yó jíin jnúhun ya, cánuú condito yó ñáyuu jeē ná tu ije jíin jnúhun ya, návaha candíje vāha i. Te ma sáha yó jéé máá-ni yó cusī ni. <sup>2</sup> Chi ná iin ná iin yó na sáha yó jéé cúsi ni jnáhan yó, návaha quendōo vāha i te ije i jíin jnúhun cándíje i. <sup>3</sup> Chi ni Cristo, tu ní sáha ya jeē cúsi ni maá yá, chí sa suhva jeē cúsi ni Tatá yā. Chi suhva cáhán tutu ii: Táca jnúhun ndevāha jeē cácahān ndevāha ñáyuu síquī ní, ni ndívi síquī maá ná, áchí Cristo jíin



Tátá yā. <sup>4</sup>Chi tāca jnúhun jeē ni jécōsō nuū tútu ii nde jenahán, chi ni jecosō návāha stéén nuū yō, te nihin yō jnúhun jeē sāha jeē cuandeyí ni yō te ndusiī ni yō. Te súcuan te cocuhun ni yō tāca jéē váha jeē cóo. <sup>5</sup>Te máá Yaā Dios jeē jéhe jnúhun cuandeyí ni jíin jnúhun ndúsiī ni, na sāha ya jeē cóo inuú ni rō, nájnúhun cúní Cristo Jesús. <sup>6</sup>Te súcuan te iin-ni coo ró te inuú-ni cuu cahān rō jeē yóhō yāha Yaā cúu Yaā Dios, Tátá Jitohō yō Jesucristo.

### **Jeē ni jítē jnúhun váha ya nuū ñáyuu tācá nación**

<sup>7</sup>Núu súcuan te cuatáhú ró tāca jnáhan ró, nájnúhun ni jetáhú Cristo yohó, návāha cuni ñayuu jeē luu cújéhnū Yaā Dios. <sup>8</sup>Chi cáhán rī jeē ní quiji Cristo Jesús, ni sāha ya tācá jniñu jeē quéndōo váha ñayuu hebreo, návāha cundaā tāca jnúhun jeē ni jéjnúhun Yaā Dios nuū tāca jí i. Te súcuan ni steén Cristo jeē squícu Yaā Dios tāca jéē ni jéjnúhun ya. <sup>9</sup>Te suni ni quiji ya návāha ñayuu tācá nación jeē tu jíin jnúhun ya, cahān i jeē yóhō váha ni Yaā Dios jeē cundáhú ni yā i. Chi suhva cáhán tutu ii:

Núu súcuan te cahān na jéē yóhō váha ni ní, cuni ñayuu tācá nación, te cata ná yaa jeē chiniñhún ná nihín.

<sup>10</sup>Te cáhán tucu tutu ii:

Róhó ñáyuu tācá nación, inuú na cúsiī ni rō jíin ñáyuu maá yá.

<sup>11</sup>Te cáhán tucu:

Róhó ñáyuu tācá nación, na cáhán rō jeē yóhō váha ni Jitohō yō Yaā Dios, te róhó ñáyuu tācá-ni ñuu, suni na cáhán rō jeē yóhō cújéhnū ya.

<sup>12</sup>Te suni ni tee Isaías jnúhun yáha:

Nuū yúcūn Isaí quiji iin jeē cujéhnū, te ndacu ya jniñu nuū ñáyuu tācá nación. Te ñayuu ún chi cocuhun ni i tāca jéē sāha ya.

Achí tutu.

<sup>13</sup>Te máá Yaā Dios jeē sāha jeē cáñuhun ni yō tāca jéē váha jeē coo, na sāha ya jeē cóo siī ndasí ni rō jíin jéē cóo ndeyí ni rō siquī jeē cácanđije nihin ró yá. Te súcuan te cocuhun teyí gá ni rō tāca jéē váha jeē coo, sāha poder maá Espiritu Santo.

<sup>14</sup>Náni máni, cúcáhnū ni rī jeē váha ndasí cándihvī ni rō jíin jniñu váha, te váha ndasí cájecuhun ni rō, te cúu stfhvī jnáhan ni rō. <sup>15</sup>Te ni jeni ni rī jeē tee ri carta yáha cáhán cají rí jíin ró jijnáhan ró, návāha víhyá gā na cócuhun ni rō tāca jnúhun yáha. Chi súcuan sāha ri siquī jeē váha ni Yaā Dios te ni jéhe ya jniñu nuū rī <sup>16</sup>jeē jejniñu ri nuū Jesucristo, jeē nácani ri jnúhun nuū ñáyuu tācá nación jeē tu jíin jnúhun ya. Te nácani ri jnúhun váha Yaā Dios nuū i jeē jnáma ya i. Súcuan sāha ri návāha ñayuu tācá nación, cuu squívi ri i ndaha ya jeē cúu i nájnúhun iin jeē socó rī nuū yā jeē cúsiī ni yā jíin. Chi ni sāha Espiritu Santo jeē iyó ndoo íyó íi i nuū yā.

<sup>17</sup>Núu súcuan te siquī jeē candíje ri Cristo Jesús, te cúsiī ni rī jeē jejniñu váha ri nuū Yaā Dios. <sup>18</sup>Chi ma cúu cahān rī siquī jniñu cásáha inga tēe, chi máá-ni siquī ndese ni jejniñu Cristo ruhū jeē sāha ri jeē ñáyuu tācá nación tu ní jíin jnúhun Yaā Dios, vijna jétáhú i nuū yā. Chi súcuan ni cuu jíin jnúhun ni cahān rī jíin jniñu ni sāha ri. <sup>19</sup>Chi ni sāha ri jniñu jéhnū ndíso poder jeē steén jeē cujéhnū ya, te ni iyo poder Espiritu Santo jíin rí. Te súcuan ni nacani ndihi ri jnúhun ndese jnáma Cristo ñayuu. Te ni nacani ri nde ñuu Jerusalén, jíin ndihi tācá ñuu, jíin nde ní región Ilírico. <sup>20</sup>Súcuan cúu jeē ní condihvī ni rī ni nacani ri jnúhun jeē jnáma ya ñayuu. Te ni jehēn rī nuū ñáyuu jeē ná tu cuni jnúhun Cristo, chi tu ní cúní rī nacani ri nuū ñáyuu jeē jé ni jini i ni canacani inga tēe. <sup>21</sup>Chi sa suhva ni sāha ri nájnúhun cáhán tutu ii:

Tāca ñáyuu jeē tu ní quíji jnūhun ya nuū i, vijna chi cuni i jnūhun ya, te tāca ñáyuu jeē tu ní jíní cuiṭi jnūhun ya, vijna chi jecūhun ni i. Achí tutu.

### Jeē ñúhun ni Pablo jeē quihín de Roma

<sup>22</sup> Te jeē yúcuan cúu jeē cuehē jínu ni cujnēnu ri, te tu ní cúu jecondēhe rí rohó jíjnáhan ró. <sup>23</sup> Te vijna chi ni ndihi jniñu ri ní cáhnu tācá región ndañúu yáha. Te je ni cuu cuehē cuiyā jeē cuní rí jeē rí nuū rō. <sup>24</sup> Núu súcuan te ñúhun ni rí jecondēhe rí rohó jíjnáhan ró núu na yáha rí quihín rí España. Te ñúhun ni rí jeē núu je ni cusí ni rí jeē ní jito jnáhan yó, yūcuán na te chindéé ñáhán ró ruhū jeē quihín gā rí. <sup>25</sup> Te xihna gā na quihín rí ñuu Jerusalén quindēca rí xūhún cuu hermano cáyūcu yúcuan. <sup>26</sup> Chi ñayuu Macedonia jíin Acaya ni cajeni ni i jeē cáquin i xūhun quihín nuū hermano cándoho ndáhú ñuu Jerusalén. <sup>27</sup> Chi súcuan ni cacusí ni i ni casáha i. Te íyó váha jeē súcuan, chi máá i jeē cácuu i ñayuu tāca gá nación, táu i jeē sáha váha i nuū ñáyuu hebreo un. Chi ñayuu hebreo ni casáha jeē ní quiji jnūhun Yaā Dios nuū i jeē quéndōo váha ánuá i sáha. Jeē yúcuan cánuú jéē chindéé ñáhán i ñayuu hebreo cácondíje jíin ndajniñu ñayivi yáha. <sup>28</sup> Núu súcuan te jeē jínu jniñu yáha jéē quindēca rí xūhun yáha nuū i, yūcuán na te jecondēhe rí rohó jíjnáhan ró jéē yáha rí quihín rí España. <sup>29</sup> Te jíní váha rí jeē quiví jínú rí nuū rō, te váha ndasí quendōo ró jéē nacani ga rí jnūhun váha Cristo nuū rō.

<sup>30</sup> Hermano jijnáhan ró, cáhán ndahú rí jíin ró jeē chindéé ñáhán ró ruhū cacān tahú rō jehē rí nuū Yaā Dios siquī jniñu ndúcú ndéyí rí. Súcuan sáha ró síquī jeē candíje yó Jítoho yō Jesucristo, jíin síquī jeē cundáhú ni yō jnáhan yó sáha máá Espíritu. <sup>31</sup> Te cacān tahú rō jeē na cácu

ri nuū téé región Judea jeē tu cácondíje, jíin jéē na cusí ni tācá hermano ñuu Jerusalén jeē quindēca rí xūhun yáha cuu de. <sup>32</sup> Te súcuan te núu cuní Yaā Dios te jecondēhe rí rohó jíjnáhan ró, te cusí ni yō, te nanihín ni rí jeē condee rí jíin ró. <sup>33</sup> Te máá Yaā Dios jeē jéhe jnūhun ndeyí sfi ni, na cóo ya jíin ró jijnáhan ró. Amén.

### Jeē cahán Pablo jeē sándeýí ni i

**16** Te vijna te cáhán rí jíin ró jijnáhan ró jéē na chindéé ñáhán ró hermana Febe, chi cúu ña ñahan jéjñiñu jeē siquī jnúhun ya nuū ñáyuu cácondíje ñuu Cencrea. <sup>2</sup> Te cuatáhú ró ña ñajnūhun cuní máá Jítoho yō, chi súcuan cánuú sáha hermano cácondíje. Te chindéé ñáhán ró ña na-ni vé cúu jeē jíní ñúhún ña, chi súcuan ni chindéé ñáhán máá ña cuehē ñayuu, te suni nde ruhū.

<sup>3</sup> Cahán rō jíin Priscila jíin Aquila jeē sándeýí ni ndindúú de, áchí rí, chi cáchindéé ñajnáhan de jíin rí siquī jniñu Cristo Jesús. <sup>4</sup> Chi ná ni iyo jnündóho jeē cuu rí nuú, te ni cachundeyí ni de ni canducú de scácu de ruhū, vēsú suni cuu máá de núú. Te nácuatáhú rí nuū ndindúú de, te nasūu máá-ni ruhū, chi suni tāca grupo ñayuu cácondíje tācá nación. <sup>5</sup> Te suni cahán rō jíin ñáyuu cácondíje ndútútú vehe de, sándeýí ni i, áchí rí. Te cahán rō jeē sándeýí ni Epeneto, téé maní rí jíin. Chi ñuu Acaya, máá de cúu jeē ní candíje xihna gā nuū Cristo. <sup>6</sup> Suni cahán rō jeē sándeýí ni María, ñahan jeē ní jejniñu ndasí jeē siquī jnúhun ya mēhñu ró jijnáhan ró. <sup>7</sup> Te cahán rō jeē sándeýí ni Andrónico jíin Junias, téé cácuu jnáhan ñuu rí jeē ní cahiin jíin rí vecā. Te tācá apóstol chi cájejnúhún de ndindúú téé jíin, te xihna gā de ni cacandíje Cristo vēsú máá rí.

<sup>8</sup> Cahán rō jeē sándeýí ni Amplias, téé maní rí jíin, chi cándíje de Jítoho yō.

<sup>9</sup>Te cahān rō jeē sándeyí ni Urbano, tēe chindéé nájnaħan jín yó siquī jniñu Cristo Jesús, te suni súcuan Estaquis, tēe jeē maní rí jín. <sup>10</sup>Suni cahān rō jeē sándeyí ni Apeles, tēe jeē ni steén jeē candíje vāha de Cristo, te suni súcuan cahān rō jín náyuu vehe Aristóbulo. <sup>11</sup>Cahān rō jeē sándeyí ni Herodión, tēe cúu jnaħan ñuu rí. Te suni súcuan náyuu vehe Narciso jeē cá-candíje maá Jítóho yō. <sup>12</sup>Te suni cahān rō jeē sándeyí ni Trifena jín Trifosa, ñahan cá-sájniñu siquī jnúhun maá Jítóho yō. Te suni sándeyí ni Pérsida, hermana jeē maní yō jín, chi suni ni sájniñu ndasí ña siquī jnúhun Jítóho yō. <sup>13</sup>Te cahān rō jeē sándeyí ni Rufo, tēe cájejnúhún náyuu jeē vāha cándíje de maá Jítóho yō. Te suni súcuan cahān rō jín náná de, te maá ña suni ni jito ña ruhū nájnuñhun jeē naná rí cúu ña. <sup>14</sup>Te cahān rō jeē sándeyí ni Asíncrito jín Flegonte jín Hermas jín Patrobas jín Hermes jín táca hermano jeē cá-yūcu jín de. <sup>15</sup>Te suni súcuan Filólogo jín Julia jín Nereo jín cuáha de, jín Olimpas jín ndíhi hermano cá-candíje cá-yūcu jín de jijnáħan de.

<sup>16</sup>Te jeē cahán táca rō jín jnaħan rō, te yíñúhún techūhu rō ndaha i. Te táca grupo náyuu cá-candíje nuū Cristo, cáħán i jeē na sándeyí ni rō.

<sup>17</sup>Te cáħán ndahú rí jín rō, hermano jijnáħan rō, jéé cóto rō maá rō nuū náyuu cútuucu ni te ndúcú stívi jnaħan jín jnúhun tu quíjnaħan jín jéé ní cacutúhva rō. Te cujiyo rō núu i jijnáħan i. <sup>18</sup>Chi náyuu súcuan, tu jéjníñu i nuū Jítóho yō Jesucristo, chi máni ndíhvi ni i siquī jeē cáji i. Te yóhyo ndúxí i jín jnúhun cácaħán i, te súcuan stáhú i náyuu jeē tu jíní vāha. <sup>19</sup>Te maá rō jijnáħan rō, chi je cájini ndíhi náyuu ndese vāha cájetáhú rō nuū yā, te jeē yúcuan cúsiñi ni rí. Te cúní rí jeē cóo listo vāha rō sáha rō jniñu vāha, te ma sáha

ró jniñu néé. <sup>20</sup>Te maá Yaā Dios jeē jéhe jnúhun ndeyí síñi ni, yachí sáha ya jeē cúndeyí rō siquī jexeén jeē cúu Satanás. Te ñúhun ni rí jeē Jítóho yō Jesucristo na sáha ya jeē vāha rōhó jijnáħan rō.

<sup>21</sup>Sándeyí ni rō jijnáħan rō, áchí Timoteo, tēe chindéé ñáħán jín rí siquī jnúhun ya. Te suni súcuan cácaħán jnaħan ñuu rí Lucio jín Jason jín Sosípater.

<sup>22</sup>Te ruhū jeē naní Tercio, jeē tēe rí carta yáha jéé cahán Pablo, suni cáħán rí jeē sándeyí ni rō jeē cá-candíje rō Jítóho yō.

<sup>23</sup>Te Gayo, tēe ni jéhe núu vehe ndéé rúhú Pablo, cáħán de jeē sándeyí ni rō jijnáħan rō. Te suni jéhe núu de vehe nuū táca náyuu cá-candíje. Te suni súcuan cáħán Erasto, tēe cúu tesorero ñuu yáha, te suni súcuan cáħán hermano Cuarto.

<sup>24</sup>Te ñúhun ni rí jeē maá Jítóho yō Jesucristo, na sáha ya jeē vāha rōhó jijnáħan rō. Amén.

### **Jnúhun sándíhi jéé cahán jeé yóhyo cújéħnu ya**

<sup>25</sup>Te vijna na cáħán yō jeē yóhyo cújéħnu Yaā Dios. Chi maá yá cuu sáha jeē cuñi ñihin ga rō jijnáħan rō jín jnúhun jnáma ya rohó jeē nácani rí, jín jnúhun Jesucristo jeē steén rí. Chi súcuan ni steén Yaā Dios jnúhun sáhi yá, jeē ní yisáhi ní cáni nde ná tu jecóo ñayívi. <sup>26</sup>Te vijna te je ni nane cáji. Chi jín tútu i jeē ní catee tēe ni canacani jnúhun ya, ni jité núu jnúhun sáhi yáha nuū náyuu táca nación, návāha candíje i te cuatáhú i. Chi Yaā Dios jeē técu ní cáni, súcuan ni ndacu ya jniñu.

<sup>27</sup>Te ní cáni na cáħán yō jeē yóhyo cújéħnu Yaā Dios siquī jniñu ní sáha ya jeē jín Jesucristo. Chi maá ñin-ni ya iyó te yóhyo ndíchí yá. Súcuan na cóo. Amén.

**CARTA HN JEE NI TEE SAN  
PABLO APOSTOL NUU  
ÑAYUU ÑUU CORINTO**

**1** Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jñuhun ya. Te ndindúú rí jín hermano yō Sóstenes <sup>2</sup> cátee ri carta yáha cuájeē nuū rohó ñayuu ñuu Corinto jeē cácañdíje ró Yaā Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaā Dios rohó jínáhan ró jéē coo ndoo coo íi ró nuū yā. Te ni cana ya rohó ndé jín táca gá ñayuu jeē ndácunehen i máá Jítóho yō Jesucristo, ndé-ni cúu nuū cáhiyo i. Chi Jítóho táca yó jín i cúu ya. <sup>3</sup> Te cáñuhun ni rí jeē Tatá yō Yaā Dios jín Jítóho yō Jesucristo na sáha ga yā jeē váha róhó, te sáha ya jeē coo ndeyí coo síi ni rō.

**Cristo sáha ya táca jéē váha yóhó**

<sup>4</sup> Te níní nácuatáhú rí nuū Yaā Dios jeē siquí rohó jijnáhan ró, chi jeē jín Cristo Jesús ni sáha ya jeē váha róhó. <sup>5</sup> Chi cáyihí ró ndaha Cristo, te jeē yúcuan ní sáha Yaā Dios jeē cáhiyo cúca ró jín táca jñuhun ya, chi cájecūhun váha ni rō te cúu nácani ró. <sup>6</sup> Chi súcuan cúu jeē cáhiin nihin ró jín jñuhun Cristo jeē ní canacani ri nuū rō. <sup>7</sup> Te súcuan te tu cúmaní ni ñin tahū jeē jéhe ya cuu ánuá rō níní jéē cándetu ró quiví jeē quénda ndijin Jítóho yō Jesucristo. <sup>8</sup> Te máá yá chi sáha ya jeē cuiñi nihin ró nde na jínu quiví, návaha ma cóo cuéchi siquí rō quiví ndíji Jítóho yō Jesucristo. <sup>9</sup> Te squícu Yaā Dios táca jéē ni jéjñuhun ya, te ni cana ya rohó jínáhan ró návaha cuni jnáhan ró jín Séhe ya, Yaā cúu Jítóho yō Jesucristo.

**Siquí jeē ma cóo síin ni i jín jnáhan i**

<sup>10</sup> Hermano, nde jín síhví Jítóho yō Jesucristo cahán ndahú rí jín ró jeē inuú-ni na ndájnūhun ró jijnáhan ró, te ma cóo síin ni rō. Chi váha inuú na cóo ni rō jín táca jéē cájeni ni rō. <sup>11</sup> Súcuan cáhán rí, ñání máni, chi ni cacastūhun ñayuu vehe Cloé nuū rí jeē cátejñáhan ró. <sup>12</sup> Chi táca ñin ñin ró síin síin cácahán ró: Ruhū chi jín Pablo índichi rí, cácahán sava ró. Te sava ga rō: Ruhū chi jín Apolos. Ruhū chi jín Pedro. Ruhū chi jín Cristo. Cácahán rō. <sup>13</sup> Te jeē cácahán ró súcuan ¿te á cájeni ni rō jeē síin síin Cristo iyó jéē cánacani ri jñuhun? ¿Te á rúhú Pablo ni jihí jicā cruz jehē rō? ¿Chí jín síhví rúhú ni cajendute ró, chí naún? <sup>14</sup> Tú cuítí. Te na cútahū rí nuū Yaā Dios jeē tú cuehē rō ni scuándute ri, chi máá Crispo jín Gayo-ni, <sup>15</sup> návaha ma cahán ni ñin ró jéē jín síhví rí ni jendute ró. <sup>16</sup> Te sá núcūhun ni rí jeē suni ni scuándute ri Estéfanas jín ñayuu vehe de. Te sanaa te súcuan-ni cúu ñayuu ni scuándute ri, jéni ni rí. <sup>17</sup> Chi tu ní téjñíñu Cristo ruhū jeē scuándute ri, chi sa suhva jeē nácani ri jñuhun jeē jnáma ya ñayuu. Te tu ní ndúcú rí jeē steén rí nuū rō ñin modo ndichí jéē ma jécūhun ni rō, chi núu súcuan te ma cúu jecūhun váha ni rō jñuhun jeē ni jíhí Cristo jicā cruz.

**Jín Cristo ni steén Yaā Dios poder yā jín jñuhun ndichí yá**

<sup>18</sup> Te jñuhun jeē ni jíhí yā jicā cruz jeē jnáma ya ñayuu, chi jñuhun cánéé íi cúu nuū ñayuu cuango nuū jnahnú ndetū. Te máá yó jeē cuahán yō nuū cácu yó, chi jíní yō jeē jñuhun Yaā Dios jeē ndíso poder cúu. <sup>19</sup> Chi suhva yósó núu tútu íi jeē ni cáhán Yaā Dios: Na snáa rí jñuhun ndichí cácahán ñayuu ndichí cuenta ñayívi yáha, te ma cuatáhú rí jñuhun cácahán ñayuu jeē jéni ni jeē jíní váha.

Achí yá.

<sup>20</sup>Núu súcuan ¿te ndé cuajníñu tēe ndíchí cuenta ñayívi yáha, jíin tēe cástéén tutu, jíin tēe cánanducú yúcún síquī jeē steén ñayuu ñayívi yáha? Chi táca jnúhun ndíchí cuenta ñayívi yáha, ni cahān Yaā Dios jeē jnúhun cánéé íi cúu. <sup>21</sup>Te yōhyo ndíchí sáha Yaā Dios. Chi táca jnúhun ndíchí cájini ñayuu ñayívi, ni cachi ya jeē tu jéjníñu jeē cūni i ndese Yaā cúu ya. Yūcuán na te ni nu-jnahan ni yā jeē jíin jnúhun ya jeē cá-nacani ri te jnama ya ñayuu cá-candíje, vēsú cájini ni ñayuu ñayívi jēē jnúhun cánéé íi cúu.

<sup>22</sup>Chi ñayuu hebreo, máni cá-cuni i jeē sáha Yaā Dios cuehē jníñu jéñu jeē steén poder yā. Te ñayuu griego chi máni síquī jnúhun ndíchí cándihvī ni i. <sup>23</sup>Te máá rí chi sa suhva cá-nacani ri jnúhun jeē ni jíihī Cristo jíicā cruz jeē jnáma ya ñayuu. Te jnúhun yáha sáha jeē jnániní ni ñayuu hebreo, te ñayuu táca gá nación chi cájini ni i jeē jnúhun cánéé íi cúu. <sup>24</sup>Te ñayuu jeē ní cana ya ni quívicoo ndaha ya, vēsú ñayuu hebreo chí ñayuu griego, chi jíiní i jeē jíin Cristo ni steén Yaā Dios poder yā jíin jnúhun ndíchí yá. <sup>25</sup>Chi jnúhun Yaā Dios jeē cácahān ñayuu jeē jnúhun cánéé íi cúu, yōhyo ndíchí gá vēsú jnúhun ndíchí ñayuu. Te cájini ni ñayuu jeē tú na poder yā ná ni jíihī Jesús jeē jnáma ya yohó, te tuú chi níhin téyí gá poder yā ún vēsú poder ñayuu. <sup>26</sup>Hermano, máá ró cá-cuu jeē ní cana ya ni quívicoo ró ndaha ya. Te condēhe ró jeē tú cuehē rō ndichí jíin jnúhun ñayívi, ni tú cuehē rō cá-cu-dacu jniñu, ni tú cuehē rō cá-cuu sēhe ñayuu cujéñu. <sup>27</sup>Chi sa suhva ni nacāji Yaā Dios táca jēē cácahān ñayuu ñayívi jēē tu ndíchí cuítí, návāha coo jnúhun canu nuū táca jēē ndichí. Te ni nacāji ya ñayuu tu téyí ini ñayívi, návāha coo jnúhun canu nuū ñayuu teyí. <sup>28</sup>Te suni ni nacāji Yaā Dios táca jēē tu cújéñu

ini ñayívi, jíin táca jēē sajēē ni i nuū, nde jíin táca jēē tú jniñu cájini ni i, návāha snúu ya táca jēē cujéñu ini ñayívi. <sup>29</sup>Súcuan ni sáha ya návāha ni iin ñayuu ma cúu sátéyí i máá i nuū yā. <sup>30</sup>Te máá ró jijnáhan ró chi ni sáha Yaā Dios jeē nduú ró jíin Cristo Jesús. Chi nde nuū maá yá ni canihin yō jnúhun ndíchí, te ni ndahva yā cuēchi yó, te ni sáha ya jeē iyó ndoo iyó íi yō nuū yā, chí ni jnama ya yohó. <sup>31</sup>Te jeē yúcuan na cóo nájnūhun cáhán tutu ii: Núu iin ñayuu cuní i cutéyí i, te na cutéyí i síquī jeē ni sáha máá Jítóho yō jehē i, áchí.

### Jeē nácani Pablo jnúhun jeē ni jíihī Cristo

**2** Te ruhū, hermano, ná ni jeē rí nuū rō jijnáhan ró jēē nácani ndaā rí jnúhun Yaā Dios, te tu ní nácani ri jnúhun ndíchí jēē ma jécūhun ni rō. <sup>2</sup>Chi ná ni iyo ri jíin ró te tú na inga jnúhun ní ndúcú rí castūhun rí nuū rō, chí máni máá jnúhun Jesucristo jeē ni jíihī yā jíicā cruz jeē jnáma ya yohó. <sup>3</sup>Te ná ni jinū rí nuū rō jijnáhan ró, chí tú na fuerza rí, te yúhú rí, te quísi i ruhū. <sup>4</sup>Te ná ni nacani ri jnúhun nuū rō, chí nasūu jíin jnúhun ndíchí ñayuu ñayívi ní scándíje ri rohó, chí sa suhva jíin máá poder Espíritu yā ni steén rí nuū rō jijnáhan ró, <sup>5</sup>návāha ma cuíñi ró síquī jnúhun ndíchí cácahān ñayuu, chí cuiñi ró síquī poder Yaā Dios.

### Jíin Espíritu te steén Yaā Dios ndese Yaā cúu ya

<sup>6</sup>Te ndaā chi ndíchí cácahān rí jíin ñayuu jeē jé ni ije jíin jnúhun cándíje i ya. Te nasūu jnúhun ndíchí jēē iyó ini ñayívi yáha, ni nasūu jnúhun ndíchí cácahān tēe cá-cujéñu ñayívi yáha, chí tēe ún yāha-ni jeē cá-cujéñu de. <sup>7</sup>Chi jnúhun cácahān rí cúu jnúhun ndíchí máá Yaā Dios jeē ní yisāhí. Chi jnúhun ndíchí un jēē ní yisāhí, ni jequin Yaā Dios nde ná tu jecóo ñayívi, návāha cá-cu

yó jéé cótecu yō ní cáni sáha jnūhun ún.

<sup>8</sup> Chi ni ìn tēe cújéhu nuū ñáyívi yáha, tu ní jécūhun ni de jnūhun ndíchí un. Chi núu ni jecūhun ni de núú, te ma cáhni cuiṭi de máá Jítóho yō, Yaā cújéhu luu.

<sup>9</sup> Chi cúu nájnūhun cáhán tutu:

Tāca jéé ni sátūhva Yaā Dios jeē cúu ñayuu jeē maní jíin yá,  
ni ìn ún tu ní jíto jínúú ñayuu, ni tu ní jíni sōho i,

ni tu ní qují jeē súcuan cani ni i.

Achí tutu. <sup>10</sup> Te máá yó jíjnáhan yó chi ni steén Yaā Dios tāca un núú yō jeē jíin Espíritu yā. Chi máá Espíritu jíni vāha ya te steén yā ndíhi, chi nde ndíhi jeē ndichí gá máá Yaā Dios.

<sup>11</sup> Chi ni ìn ñayuu ma cúu cuni i ndese jéni ni inga ñayuu, chi máá-ni i jíin ánuá i cúu jeē jíni. Te suni súcuan ni ìn ñayuu tu jíni i ndese jéni ni Yaā Dios, chi máá-ni Espíritu Yaā Dios cúu jeē jíni.

<sup>12</sup> Te máá yó chi ni nihin yō Espíritu un jéé véji nuū Yaā Dios, te tu cájeni ni yō nájnūhun cájeni ni ñayuu ñáyívi. Te jeē yúcuan cúu jeē cájecūhun ni yō ndese ni sáha Yaā Dios jeē váha yóhó síquī jeē váha ni yā. <sup>13</sup> Te suu síquī tāca jéé yáha cúu jeē cácahān rī, te nasūu jíin jnūhun jeē castéén ñayuu ndíchí, chi jíin jnūhun jeē steén maá Espíritu. Chi cástéén rī jnūhun Espíritu nuū ñáyuu cánevāha Espíritu.

<sup>14</sup> Te ñayuu ñáyívi tu cájetáhu i tāca jnūhun jeē véji nuū Espíritu Yaā Dios, chi cájeni ni i jeē jnūhun cánéé íi cúu. Te ma cúu jecūhun ni i, chi tu cánevāha i máá Espíritu jeē sáha jeē jécūhun ni i. <sup>15</sup> Te ñayuu cánevāha Espíritu, chi cájecūhun ni i ndese íyó ndíhi-ni. Te ñayuu ñáyívi ma cúu jecūhun ni i ndese ñayuu cácuu ñayuu ún. <sup>16</sup> Chi suhva cáhán tutu íi: ¿Ndé ìn cuu cuni ndese jéni ni máá Jítóho yō? ¿Te ndé ìn cuu steén nuū yā? Ni ìn ma cúu. Achí tutu. Te vésú súcuan te máá yó chi cájeni ni yō nájnūhun jéni ni Cristo.

### Jeē cáchindéé ñájnaḥan de cájejníḥu de nuū Yaā Dios

**3** Te ruhū, hermano, tu ní cúu cahān rī jíin ró jíjnáhan ró nájnūhun cáhán rī jíin ñayuu jíca jíin Espíritu. Chi ni cahān rī jíin ró nájnūhun jíin ñayuu cájica jíin modo maá, chi cácuu ró nájnūhun sūchi lúli jéé ná tu ije ró jíin jnūhun Cristo.

<sup>2</sup> Ni steén rī nuū rō jeē tú yí, chi cácuu ró nájnūhun sūchi lúli jéé jéxin gā. Te tu ní cáhán rī jíin ró jnūhun yí jeē cúu nájnūhun jeē ndáva jeē véji ñayuu ni ije, chi ná tu canda ró jíin ndé saá. Te ni vjna ná tu canda ró jíin. <sup>3</sup> Chi cájica ga rō jíin modo neé máá ró. Chi cácuuésin ni rō, te cácajnáhan ró, te cácusín ni rō. Núu súcuan te cácuu ró nájnūhun ñayuu ñáyívi jéé cájica jíin modo neé máá. <sup>4</sup> Chi ìn ró cáhán: Ruhū chi jíin Pablo índichi rī. Te inga rō cahán: Ruhū chi jíin Apolos. Te súcuan cúu jeē cájica ró jíin modo neé máá ró

<sup>5</sup> ¿Te ndé ìn cúu ruhū, te ndé ìn cúu Apolos núu súcuan? Chi máá mozo-ni Yaā Dios cácuu ri, te ni jejníḥu ya ruhū návāha candíje ró máá Jítóho yō. Chi ná ìn ná ìn ri ni sáha jniḥu ndese ni jēhe máá Jítóho yō nuū rī. <sup>6</sup> Ruhū, nájnūhun ni taji ri jnūhun ya ini anuá rō, te Apolos, nájnūhun ni chuhun de ndute cúu jeē ní steén gā de nuū rō. Te máá Yaā Dios cúu jeē ni scuéhu jnūhun ini anuá rō. <sup>7</sup> Núu súcuan te tú na vé cúu sáha tēe táji ni tēe chúhun ndute, chi sa suhva máá Yaā Dios cúu jeē scuéhu. <sup>8</sup> Te tēe táji jíin tēe chúhun ndute, ìn-ni cácuu de. Te tāca de chi cuāha ya yāhu nuū de ndese jniḥu ni casáha ìn ìn de. <sup>9</sup> Chi ruhū jíjnáhan ri chi tēe chindéé ñájnaḥan cájejníḥu nuū Yaā Dios cácuu ri. Te máá ró jíjnáhan ró cácuu nájnūhun itu Yaā Dios jeē jícu ya jíin.

Te suni nájnūhun ìn vehe jeē sáha Yaā Dios cácuu ró. <sup>10</sup> Te ruhū chi cúu ri nájnūhun ìn maestro albañil jeē ní

jequin rī cimientu vehe ún, cúu jeē ni scándíje ri rohó. Te inga de cásama de siquī, cúu jeē castéén gā de nuū rō. Núu súcuan te ná ñin ná ñin de na cóo cuidado de ndese sáma de siquī. <sup>11</sup> Te Jesucristo cúu cimientu vehe ún, te ni ñin ma cúu caquin inga cimientu, chi máá yá cúu jeē ní ndahva cuēchi rō. <sup>12</sup> Te tāca ñayuu cá-candíje, chi sáha i vehe siquī cimientu un, núu jíin ndajníñu vāha nájñuhun oro chí plata chí yúu luu, chí jíin jéē yachí naa, nájñuhun yujnu chí ite chí ndayóhō. <sup>13</sup> Te natūu jniñu un jéē ní sáha ñin ñin i, te suu cúu ndese ni condihvī ni i siquī maá yá. Chi máá quívī juicio jeē sán-daā yā jniñu ñayuu, quívī ún natūu cájji jniñu i. Chi jíin ññuhūn quiji quívī ún, te nájñuhun sáha ññuhūn jeē jéñmu tāca jéē cúu cayū, súcuan coto ndee ya jniñu ñin ñin i. <sup>14</sup> Te núu tú cayū jniñu ní sáha i siquī cimientu un, te nihīn i tahū i. <sup>15</sup> Te núu tu ní cóndihvī ni i jíin jniñu ya, te ma nihín i tahū i, chi nájñuhun cayū jniñu i. Te máá i chi cācu ánuá i, vēsú nájñuhun je yajni cayū i nuū yáññuhūn.

<sup>16</sup> ¿A tu cájini rō jeē cácuu rō nájñuhun templo Yaā Dios, chi ndéé Espíritu Yaā Dios ini anuá rō? <sup>17</sup> Te núu ñin tēe stfvi de templo Yaā Dios, te snáhnú ndetū yā tēe ún. Chi ndoo ndasí cúu templo yā, te suu cácuu máá rō.

<sup>18</sup> Ni ñin rō ma stahú rō máá rō jíin jéē jéni ni rō. Núu ñin ñayuu jéni ni i jeē ndíchí i jíin jñuhun ñayiví yáha, vāha ga na siáā i ún, návāha coo ndíchí ndije i jíin jñuhun máá yá. <sup>19</sup> Chi jñuhun ndíchí jéē iyó ini ñayiví yáha, jñuhun cánéé íi cúu nuū Yaā Dios. Chi cáhán nuū tútu íi: Ñayuu ndíchí cuenta ñayiví, chi nájñii ya i siquī jñuhun ndíchí i jeē jési i jñuhun ya, achí. <sup>20</sup> Te cáhán tucu tutu: Máá Jítoho yō jíin yā tāca jéē jéni ni ñayuu ndíchí, chi máni jeē jéni cāhá ni i, achí. <sup>21</sup> Núu súcuan te ni ñin rō má cutéyí rō jeē siquī ni ñin tēe ndíchí. Chi cuenta maá rō cúu ndíhi-ni. <sup>22</sup> Cúu Pablo, cúu

Apolos, cúu Pedro jeē castéén nuū rō. Cúu ndíhi jeē iyó ini ñayiví, jeē iyó vija jíin jéē quíji. Te vēsú núu cotecu rō chí cuu rō, te ndíhi-ni chí cuenta maá rō cúu. <sup>23</sup> Te máá rō cácuu cuenta Cristo, te Cristo cúu cuenta Yaā Dios.

### Jeē casájniñu apóstol siquī jñuhun ya

**4** Núu súcuan te na cáni ni rō jijnáhan rō jeē mozo-ni nuū Cristo cácuu ri, jeē ní tejññu ya ruhū jeē steén rī jñuhun Yaā Dios jeē ní yisāhi ndé jenahán. <sup>2</sup> Te ndaā chí tēe jeē sájniñu siquī ún, iyó responsable ná ñin ná ñin de jeē squícu vāha de. <sup>3</sup> Te ruhū tu sáha ri cuenta núu cá-nanducú rō siquī ri ndese sáha ri, chí núu cá-nanducú ñayuu cácuujéñnu ini ñayiví. Te ni máá rí tu chíhi ri cuenta siquī maá rí. <sup>4</sup> Chi vēsú jíin rī jíin ánuá rī jeē tú na cuēchi ri, te nasūu yúcuan cúu jeē quéndōo ndaā rī, chí máá Jítoho yō cúu jeē jito ndee ruhū. <sup>5</sup> Jeē yúcuan ma nánducú rō siquī jññu jnáhan rō, chí nde na quéē maá quívī te cuni rō. Chi nde na ndíji máá Jítoho yō te nastúu ndijin yā tāca jniñu jeē yisāhi núu néē, te steén ndijin yā tāca jéē jéni ni ñayuu jíin ánuá i. Yūcuán na te máá Yaā Dios cuajñuhún yá ná ñin ná ñin i ndese ni casáha i.

<sup>6</sup> Hermano, tāca jñuhun yáha ní cahán rī návāha quendōo vāha rō jíjñáhan rō. Te ni cachi rī jeē máá rí jíin Apolos cácuu ri mozo-ni nuū yā, te súcuan cácuu ri ñin ejemplo nuū rō. Te cáhán ri jeē súcuan cácuu ri, návāha cutūhva rō caní ni rō maá-ni nájñuhun cáhán tutu íi. Chi ma sandúxi rō jeē cuajñuhún rō ñin tēe steén, te inga de tuú. <sup>7</sup> ¿Te naun cácutéyí rō nuū jnáhan rō núu súcuan? ¿Te na vé cúu jeē iyó núu rō jeē tu ní cácutahū rō nuū yā? Te núu ni cacutahū rō nuū yā, ¿te naun casátéyí rō máá rō jeē nájñuhun jeē nasūu jéē ní cacutahū rō cúu?

<sup>8</sup> Va je ni cacucúca rō, chí je cánevāha rō ndíhi, cájini ni rō. Te je cándacu máá rō jniñu, te ni tuá cájini ññuhún rō

ruhū, cájeni ni rō. Tú vāha jeē súcuan cácutéyí ró. Te nacā jeē váha núu jeē cándacu ndije nde ró jniñu núu, návāha suni cuāha ró jnúhun jeē ndacu nde ri jniñu jíin ró jijnáhan ri. <sup>9</sup>Te íyó jéni ni rī jeē ruhū tēe cácuu apóstol, ni sáha Yaā Dios jeē cácuu ri nájñuhun tēe núu ga nuū ñáyuu, nájñuhun tēe jeē jé ni cundaā jeē cúu. Te níí ñáyiví jíin andiví cándēhe váha nuū rī, cúu ndajéhé Yaā Dios jíin ñáyuu. <sup>10</sup>Chi jeē siquī Cristo te cácahān i jeē tēe cánéé cácuu ri. Te tāca rōhó va ndíchí ró jíin jnúhun Cristo, cájeni ni rō. Te tāca rúhū chi tu fuerza rī, te rōhó va íyó fuerza rō, cájeni ni rō. Te rōhó chi cáhiyo yínúhún ñáyuu nuū rō, te nuū rī chi casájéé ni i. <sup>11</sup>Níí véjicoo ri cájiū rī sōco te nde vijna. Te cájichī rī ndute, te cúmanī sahma ri, te tu casáha vāha ñayuu jíin rí, te ni tu cánevāha ri vehe. <sup>12</sup>Te nihin casájniñu ri jíin ndaha ri. Cácahān neé i nuū rī, te cácahān vāha ri jíin i. Cájito xeēn i ruhū, te cájendeyí ni rī. <sup>13</sup>Cácahān neé i siquī rī, te sa cácahān manī rī jíin i. Te cácuu ri nájñuhun yacá ini ñayiví, te casquéhichī i ruhū nde vijna.

<sup>14</sup>Te nasūu jéé tēe ri yāha jéé cúcanu rō, chi sa suhva jeē stihví ni rī rohó, chi cácuu ró nájñuhun sēhe ri chi manī rī jíin ró. <sup>15</sup>Chi vēsú na cóo uxī mil tēe stéén jñuhun Cristo nuū rō, te iin-ni tátá rō iyó. Te máá rí cúu nájñuhun tátá rō, chi ni scandíje ri rohó jéé ní nacani ri jñuhun vāha Cristo Jesús jeē jnáma ya yohó. <sup>16</sup>Núu súcuan te cáhān ndahú rí jíin ró jeē na ndácu ró rúhū jijnáhan ró.

<sup>17</sup>Te jeē yúcuu cúu jeē tají rí Timoteo cuajeé de nuū rō. Chi cúu de nájñuhun sēhe ri jeē manī rī jíin de, te squícu vāha de nuū maá Jítoho yō. Te máá de nacachi tucu de nuū rō ndese jíca ri jeē candíje ri Cristo, jíin ndese stéén rī nuū tāca grupo ñayuu cáncandíje tāca lado. <sup>18</sup>Te sava ró chi casátéyí ró maá ró, chi cájeni ni rō jeē ma jéé cuiti gā rī nuū rō.

<sup>19</sup>Te tuú chi yachī jeē rī nuū rō te núu súcuan cúni maá Jítoho yō. Yūcuán na te nanducú rí siquī tēe cácutéyí, te ma sáha ri cuenta jñuhun cácahān-ni de, chi sa coto ndee rī de núu cuu squícu nde de. <sup>20</sup>Chi jeē ndácu Yaā Dios jniñu nuū yō, nasūu máá jéé cahān i-ni yó cúu, chi jíni ñúhún condiso poder jñuhun cáhān yō jíin jniñu sáha yó. <sup>21</sup>Núu súcuan ¿te ndese cáculi rō? ¿A jéé cuxeēn rī nuū rō núu na jéé rī, siquī jeē tu cáncani ni rō, chí nacani ni rō te jeē rī jíin jnúhun cundáhú ni jíin jnúhun vitá ni?

### Jeē sándaā Pablo siquī iin cuēchi

**5** Te ni nihin rī jñuhun jeē jíca jnéni iin tēe jeē íne mēhñu ró, chi ndéca de naná uū de. Te xeēn ndasí sáha tēe ún, chi ni ñayuu jeē tu cájini jñuhun Yaā Dios, tu casáha i súcuan. <sup>2</sup>Te vēsú súcuan te casátéyí ró maá ró jijnáhan ró. Vāha ga jeē na cúcuíhyá ndasí ni rō. Te cánuú jéé na quénehen ró tēe sáha cuēchi ún na quénda de mēhñu ró. <sup>3</sup>Te ruhū, vēsú tu íyó rí jíin ró, te nájñuhun jeē íyó rí jíin ró cúu jeē ñúhún ni rī rohó. Te je ni sándaā rī siquī tēe ni sáha cuēchi ún, chi nájñuhun jeē íyó rí jíin ró cúu. <sup>4</sup>Núu súcuan te na ndútútú ró jijnáhan ró, te máá Jítoho yō Jesucristo coo ya jíin ró. Te máá rí chi nájñuhun cone ri jíin ró, chi ñúhún ni rī rohó. Te poder maá Jítoho yō Jesús suni coo jíin ró. <sup>5</sup>Te na chíhi yó tēe ún ndaha Satanás, návāha na ndóho yiqui cúñu de, te nacani ni de te cācu ánuá de quivī ndiji Jítoho yō Jesús.

<sup>6</sup>Tuú vāha jeē casátéyí ró maá ró. ¿A tu cájini rō jñuhun cáhān suhva? Vēsú jecu-ni levadura te ndáa níí ñujen sáha, áchí. <sup>7</sup>Núu súcuan te quenehen ró tēe un nájñuhun scāne ró levadura jeē ni tíví. Te súcuan te cuu ró nájñuhun pan jeē cúvāha jíin ñujen jéé jéé tú na levadura yíhi, jeē cáyeji i vico pascua. Te ndaā jeē súcuan cácuu ró. Chi je ni jihí Cristo jeē



ni sócō yā maá yá jehē yō, chi cúu ya nájñuhun londe pascua jeē ni jíhī. <sup>8</sup>Núu súcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájñuhun pan jeē tú na levadura yíhi. Te ma sáha yó jniñu néé jíñ jniñu jnéhén, jeē cúu nájñuhun levadura jeē ni tívī.

<sup>9</sup>Nuū inga carta jeē ní tee ri nuū rō jijnáhan rō ni cahān rī jeē ma quívi nduu rō jíñ ñáyuu cájica jnéni. <sup>10</sup>Te tu ní cáchi rī jeē ma quíjñáhan cuitī rō jíñ ñáyuu tu cáchandíje jeē cájica jnéni, jeē ndíyo ni, jeē sácuhná, jeē chiñúhún ídolo. Chi núu súcuan te jíni ñúhún jeē quénda rō ini ñayívi núu, chi tuá na inga modo jeē cújiyo rō núu i chi ndéé yó ñayívi jíñ i. <sup>11</sup>Chi sa suhva ni cachi rī jeē ma quívi nduu rō jíñ máá ñáyuu jeē cácahān i jeē cúu i hermano, te núu jíca jnéni i, chí ndíyo ni i, chí chiñúhún i ídolo, chí chísó jnúhun i siquī jnáhan i, chí nájini i, chí cuíhná i. Te ni ma cáji cuitī rō staā jíñ ñáyuu casáha súcuan. <sup>12-13</sup>Chi nasūú jniñu ri cúu jeē sándaā rī siquī ñáyuu jeē tu cáhiin jíñ yó. Yaā Dios cúu jeē sándaā siquī i. Te ñayuu cáhiin jíñ rō chi cánuú jéé sándaā rō siquī i. Núu súcuan te cánuú jéé quénehen rō téé ni sáha cuēchi un jéé íne de mēhñu rō, na quénda de.

### Jeē ma cáquin i cuēchi siquī jnáhan i nuū tohó tu cáchandíje

**6** Te núu jnáhan rō jéé candíje ni sáha cuēchi siquī rō, ¿te naun jéngoo rō jíñ de nuū tohó jeē tu cáchandíje jíñ yó? ¿Te naun tu casándaā rō nuū jnáhan rō cáchandíje Yaā Dios? <sup>2</sup>¿A tu cájini rō jeē ñáyuu cáchandíje Yaā Dios chi iin quivī te sándaā i jniñu ñayuu ñayívi? Te núu iin quivī sándaā rō jniñu ñayuu ñayívi, ¿te á má cúu sándaā rō vijna siquī táca cuéchi lúlí casáha jnáhan rō? <sup>3</sup>¿A tu cájini rō jeē iin quivī te sándaā yō nde jniñu táca ndajéhé andiví? Te nagā ni cuu jniñu

ñayívi yáha jeē ma cúu sándaā yō. <sup>4</sup>Núu súcuan te núu jnáhan rō sáha de iin cuēchi siquī rō, ¿te naun jéngoo rō sa nuū táca téé jeē tu cúu de jnáhan ñayuu cáchandíje jeē sándaā de siquī cuéchi ún? <sup>5</sup>Súcuan cáhán rī návāha na cúcanu rō jijnáhan rō. ¿A tu íyó ni iin téé jécūhun ni mēhñu rō jeē cuu sándaā de siquī rō? <sup>6</sup>Tú vāha jeē iin hermano caquin cuēchi siquī inga hermano nuū tohó jeē tu cáchandíje.

<sup>7</sup>Te jeē cájequin rō cuēchi siquī jnáhan rō, chi jeē castívi í rō cúu. ¿A tú vāha ga cuandeyí ni rō na sáha i cuēchi siquī rō chí quende i ndajñíu rō? <sup>8</sup>Te tuú chi sa máá rō casáha cuēchi te cáquende rō ndajñíu, te nuū táca hermano rō cúu jeē casáha rō.

<sup>9-10</sup>¿A tu cájini rō jeē ñáyuu tu íyó ndáá, ma nihín tahú i quívi i ñuu nuū ndácu Yaā Dios jniñu? Ma stahú rō maá rō caní ni rō jeē nihín tahú rō, chí ni ñayuu jeē jíca jnéni, ni ñayuu chiñúhún ídolo, ni ñayuu casíquí ndéé jnáhan, ni téé sáha ndíyī jíñ jnáhan yí, ni ñayuu cuíhná, ni ñayuu ndíyo ni, ni ñayuu nájini, ni ñayuu chísó jnúhun siquī jnáhan, ni ñayuu stahú jnáhan siquī xúhun, ma nihín tahú i quívicoo i ñuu nuū ndácu Yaā Dios jniñu. <sup>11</sup>Te súcuan ni candāa sava rō núu, te vijna chí je ni nacate ya rohó, te cáhiyo ndoo cáhiyo ii rō nuū yā. Chí je ni ndahva yā cuēchi rō jéé jíñ máá Jítoho yō Jesús jíñ Espíritu Yaā Dios.

### Jeē iyó ndoo íyó íi yiqui cúñu ñayuu cáchandíje

<sup>12</sup>Te ndaā cúu jeē cácahān jeē ndihi ni jniñu íyó váha sáha yó núu ndese cúni yō. Te vésú súcuan te nasūú ndihi sáha jeē quéndōo vāha ánuá yō. Ndihi chi cuu sáha yó, te vésú súcuan te tu íyó váha jeē quívi yó núu jniñu jeē stávi ánuá yō. <sup>13</sup>Te ndaā cúu jeē cácahān jeē ndeyu cúu jeē cúhun chíji, te chíji cúu jeē cúhun

ndeyu. Te ñin quivĩ te tuá coo súcuan, chi naa ndĩndúú un sáha Yaā Dios. Te nasūu síquĩ jeē cáca jnení yó cúu jeē iyó yiquĩ cúñu yō, chi sa suhva jeē sáha yó jēe cuní maá Jítóho yō. Te Jítóho yō chi ndító ya yiquĩ cúñu yō. <sup>14</sup>Te nájñuhun jeē ní nastécu Yaā Dios Jítóho yō, suni súcuan nastécu yā yohó jíin poder yā.

<sup>15</sup>¿A tu cájini rō jeē yiquĩ cúñu tācá ñin ñin rō cúu nájñuhun tāca parte yiquĩ cúñu Cristo? Núu súcuan ¿te á cuu quende yó ñin parte yiquĩ cúñu Cristo te squíjnáhan yó jíin ñin ñahan jíca jnení? Ma cúu cuiti súcuan. <sup>16</sup>¿A tu cájini rō jeē tēe quíjnáhan jíin ñahan jíca jnení, ñin na yiquĩ cúñu ni nduu de jíin ña? Chi cáhán tutu ii: Jeē ndĩndúú chi ñin na yiquĩ cúñu cuu, áchí. <sup>17</sup>Te ñayuu jeē quíjnáhan jíin maá Jítóho yō, chi suni súcuan ñin na cúu i jíin yá síquĩ jeē candíje i ya.

<sup>18</sup>Núu súcuan te cunu rō jēe ma quívĩ rō núu jnúhun jíca jnení. Chi tāca gá cuēchi jeē sáha ñayuu, chi nasūu yiquĩ cúñu i stívi i. Te núu jíca jnení i, te síquĩ yiquĩ cúñu i cúu jeē sáha i cuēchi. <sup>19</sup>¿A tu cájini rō jeē yiquĩ cúñu rō cúu templo Espíritu Santo jeē ni jéhe Yaā Dios nuū rō, te ndéé yá ini rō? Te nasūu cuenta maá rō cácuu rō. <sup>20</sup>Chi Yaā Dios yahu ni cuu jeē ní nacuaan ya rohó jíjnáhan rō. Te jeē yúcuan cánuú jēe cáca yfñúhún rō nuū Yaā Dios jeē sáha rō jniñu vāha nde jíin yiquĩ cúñu rō jíin ini jíin ánuá rō, chi máni cuenta Yaā Dios cúu.

### Jñuhun cástūhun síquĩ tēe jíin ñasihí

**7** Vijna te na cáchi rī síquĩ tāca jnúhun jeē ní cacajñuhun rō ruhū nuū carta. Jendaá jeē vāha ga quendōo ñin tēe núu tú condeca de ñahan. <sup>2</sup>Te síquĩ jeē iyó jnúhun jnení, te vāha ga jeē tāca tēe na cóo ñasihí maá de, te suni tācá ñahan coo yñi maá ña. <sup>3</sup>Te yñi na squícu vāha de nuū ñasihí de jeē cúu de yñi ña. Te suni súcuan ñasihí na squícu vāha ña nuū yñi ña. <sup>4</sup>Chi ñasihí chi tu cúu sáha ña jeē

cuní ña jíin yiquĩ cúñu ña, chi suni jeē cuní yñi ña. Te suni súcuan yñi tu cúu sáha de jeē cuní de jíin yiquĩ cúñu de, chi suni jeē cuní ñasihí de. <sup>5</sup>Te ma sasáhán rō maá rō nuū jnáhan rō. Te núu cá-cuni rō jeē vihyá gā cacān tahú rō jecu tiempo, te núu cáhiyo conforme ndĩndúú rō, te cuu sásáhán rō maá rō nuū jnáhan rō. Te yūcuán na te vāha ga naquijnáhan tucu rō, návaha ma cóto ndee Satanás rohó síquĩ jñuhun jnení.

<sup>6</sup>Te nasūu jēe ndácu ri jniñu jeē cánuú quijnáhan rō, chi jeē jéhe ri jñuhun cúu. <sup>7</sup>Chi nújnahan ni ri jeē tāca tēe na cóo máá ñin-ni de, nájñuhun íyó máá rí. Te sñin sñin ni sáha Yaā Dios jíin ñin ñin de ndese cúu máá de, chi sava de cuu quendōo máá ñin-ni de, te inga de chi tuú chi sñin ni sáha ya jíin de.

<sup>8</sup>Núu súcuan te cáhán rī jíin ñayuu cáhiyo máá ñin-ni, jíin ñahan ní caque-ndōo ndáhú, jeē vāha ga te núu quendōo máá ñin-ni i, nájñuhun íyó máá rí. <sup>9</sup>Te núu jíin i jeē ma cánda i quendōo máá ñin-ni i, te na quíjnáhan i núu súcuan. Chi vāha ga jeē quíjnáhan i vēsú jeē ndúquiji i.

<sup>10</sup>Te nuū ñayuu jeē jé ni quijnáhan chi ndácu ri jniñu jeē ñahan ma ndusñin ña jíin yñi ña. Te nasūu rúhū cúu jeē ndácu jniñu, chi máá Jítóho yō. <sup>11</sup>Te núu ñin ñahan ndusñin ña jíin yñi ña, te na quendōo máá ñin-ni ña, chí cuu naquijnáhan ña jíin yñi ña. Te yñi suni ma ndusñin de jíin ñasihí de.

<sup>12</sup>Te jíin sava ga ñayuu chi cahān rī yāha jēe jeni ni maá rí, te nasūu jēe ní cachi maá Jítóho yō cúu. Núu ñin hermano ndéca de ñahan jeē tu cándíje, te núu nújnahan ni ña condee ña jíin de, te ma ndusñin de jíin ña. <sup>13</sup>Te núu ñin ñahan ndéca ña tēe jeē tu cándíje, te núu nújnahan ni de condee de jíin ña, te ma ndusñin ña jíin de. <sup>14</sup>Chi tēe tu cándíje, yñi cuenta de nuū Yaā Dios síquĩ jeē ní quijnáhan de jíin ñahan cándíje. Te ña-

han tu cándíje, yíhi cuenta ña nuū Yaā Dios siquī jeē ní quijnáhan ña jíin tée cúu hermano candíje. Chi núu tu súcuan te sēhe i ma quíhi cuenta i nuū Yaā Dios, te vijna chi yíhi cuenta i nuū yā. <sup>15</sup> Te yíi chí ñasihí tu cándíje, núu fuerza cuní i ndusíin i jíin jnánhan i, te na ndúsíin i. Chi núu súcuan cuní i, te hermano chí hermana candíje tu cánuú casi i jeē ndusíin jnánhan i jeē tu cándíje. Chi ni cana Yaā Dios yohó jéē condee mani yō jíin jnánhan yō. <sup>16</sup> Te rōhó jéē cácuu ñasihí, tu cájini rō, sanaa te candíje yíi rō sáha rō, te cácu de. Te suni súcuan rōhó jéē cácuu yíi, tu cájini rō, sanaa te candíje ñasihí rō sáha rō, te cácu ña.

<sup>17</sup> Te ná iin ná iin rō na quéndōo rō ndese ni sáha Jitoho yō jeē cúu rō, jíin ndese íyó rō ná ni cana ya rohó ní candíje rō. Te súcuan ndácu ri nuū tāca grupo ñayuu cácandíje. <sup>18</sup> Núu ni cana ya iin tēe jeē ní cuu circuncidar, te súcuan na quéndōo de. Núu ni cana ya iin tēe jeē tu ní cúu circuncidar, te ma cúu de circuncidar. <sup>19</sup> Chi tú na vé sáha núu cúu yó circuncidar chí tuú, chí jeē cánuú gá cúu jeē na squícu vāha yó jniñu cuní Yaā Dios. <sup>20</sup> Ná iin ná iin rō na quéndōo rō ndese íyó rō ná ni cana ya rohó ní candíje rō. <sup>21</sup> Núu mozo jeē ní jeen ñayuu cúu rō ná ni cana ya rohó, te ma cóndihvī ni rō jeē quénda rō. Te núu íyó modo jeē quénda rō nduu libre rō, te íyó vāha jeē sáha rō. <sup>22</sup> Chi tēe cúu mozo jeē ní jeen ñayuu, te núu ni cana Jitoho yō de, te vijna chi ni nduu libre de nuū cuéchi de, jéjníñu de nuū maá Jitoho yō. Te suni súcuan tēe sájniñu cuenta maá, te núu ni cana ya de, te vijna chi ni nduu de mozo jejníñu nuū Cristo jeē ní nacuaan ya de. <sup>23</sup> Chi yahu ni cuu jeē ní nacuaan Yaā Dios rohó jijnáhan rō, cúu jeē ni jíhi Sēhe ya jehē rō. Núu súcuan te ma cuajníñu rō núu jniñu cāhā-ni jeē ndácu ñayuu ñayíví. <sup>24</sup> Núu súcuan her-

mano, ná iin ná iin rō na quéndōo rō núu Yaā Dios ndese íyó rō ná ni cana ya rohó.

<sup>25</sup> Te vijna te siquī ñayuu jeē íyó máa-ni, tú na jnūhun ní ndácu Jitoho yō nuū rī. Te na cāhán rī jeē jéni ni maá rī, chí ni cundáhú ni Jitoho yō ruhū, te ni sáha ya jeē cúu cahān ndaā rī. <sup>26</sup> Jéni ni rī jeē vāha-ni núu quendōo-ni tēe ndese cáhiyo de, jeē siquí jeē íyó jnúndóho tiempo yáha. <sup>27</sup> Núu íyó ñasihí rō, te ma ndusíin rō jíin ña. Te núu tu íyó ñasihí rō, te ma nducú rō ña. <sup>28</sup> Te núu quijnáhan rō, te nasūu cuéchi cúu. Te núu quijnáhan sūchi síhí, te suni nasūu cuéchi cúu. Te ñayuu quijnáhan, chí nihīn i jnúndóho ñayívi yáha, te cuní rī jeē ma nihín rō jnúndóho.

<sup>29</sup> Hermano jijnáhan rō, jnūhun jeē cahán rī yāha cúu jeē yachī-ni ndíhi tiempo jeē sáha yó jniñu ya. Núu súcuan te nde vijna te tēe íyó ñasihí, na cóndihvī gā ni de siquī jniñu máa yá vésú siquī ña. <sup>30</sup> Te ñayuu jeē ni jíhi jnánhan vehe i, na sáha i nájnūhun jeē tu cúcuíhyá ni i. Te ñayuu cúsi ni, na sáha i nájnūhun jeē tu cúsi ni i. Te ñayuu jéen, na sáha i nájnūhun jeē nasūu ndajniñu i cúu. Ma cuáha i jnūhun jeē cási tācá un jéē ma cúu cóndihvī ni i jniñu máa yá. <sup>31</sup> Te ñayuu jeē ní cacondihvī ni siquī ndajniñu ñayívi yáha, ma cujnéñu ga i jíin. Chi je yajni naa tāca jéē íyó ñayívi yáha.

<sup>32</sup> Cuní rī jeē ma nácani ndasí ni rō siquī tāca jéē íyó ini ñayívi. Chi tēe cúu soltero, ndíhvī ni de jniñu máa Jitoho yō, ndese cusí ni Jitoho yō sáha de. <sup>33</sup> Te tēe íyó ñasihí chí ndíhvī ni de jniñu íyó ñayívi, ndese cusí ni ñasihí de sáha de. <sup>34</sup> Te suni súcuan síin síin jéni ni ñahan íyó yíi jíin ñahan íyó máa. Chi ñahan íyó máa, ndíhvī ni ña jniñu máa Jitoho yō, chí cuní ña jeē coo ndoo coo i anuá ña jíin yiqui cúñu ña cuajniñu ña nuū yā. Te ñahan íyó yíi chí ndíhvī ni ña jniñu íyó ñayívi, ndese cusí ni yíi ña sáha ña.

<sup>35</sup> Jeē váha máá ró jijnáhan ró cúu jeē ni cáhān rī súcuan. Chi nasūu jēē nducú rī casi rī jeē quijnáhan ró, chi sa suhva cúní rī jeē caca yínúhún ró te nune ró cuajnínu cutú ró núu máá Jítóho yō.

<sup>36</sup> Te núu iin tēe iyó sēhe sǎhí de, te núu cuayǎi i, te núu jéni ni de jeē váha ga jeē quijnáhan i, núu súcuan te na sáha de jeē jéni ni de, te cuáha de jnūhun quijnáhan i, chi nasūu cuéchi cúu. <sup>37</sup> Te núu iin tēe ni cundaā ni de jeē cóndee sēhe sǎhí de súcuan-ni, jeē ma cuáha de i vēsú fuerza jícán ñayuu i, núu súcuan te cuu quendōo i nájñuhun cúní de, chi jeē váha sáha de. <sup>38</sup> Núu súcuan te tēe jéhe jnūhun quijnáhan i, váha sáha de. Te tēe tu jéhe jnūhun, chi váha ga sáha de.

<sup>39</sup> Te ñahan ní quijnáhan, chi yǎhi ña ndaha yǎi ña níní jeē técu de. Te núu je ni jihí yǎi ña, yūcuán na te je ni cuu libre ña jeē quijnáhan tucu ña jín na-ni tēe cúu ni ña, te núu tēe cándíje nuū Jítóho yō cúu de. <sup>40</sup> Te jéni ni rī jeē ndetū gā coo ña te núu quendōo ña súcuan-ni. Te suni jéni ni rī jeē jín Espíritu Yaā Dios cúu jeē cahán rī.

### Siquí cūñu ni sócō nuū ídolo

**8** Te vijna te na cáchi rī siquí cūñu ni sócō nuū ídolo. Ndaā chi tāca yó jéni ni yō jeē máá yó cúu jeē jiní ndese cúu. Te tāca jēē jiní yō ún, chi ndúcú sáha jeē cundúxí yó. Te sa suhva jeē cundáhú ni yō jnáhan yó, sáha un jéē íje i jín jnúhun ya. <sup>2</sup> Núu na-ni ñayuu jéni ni i jeē jiní váha i, te tuú chi ná tu cuni cuiti i nájñuhun cánuú cuni i. <sup>3</sup> Te sa suhva ñayuu jeē maní i jín Yaā Dios, máá i cúu jeē jetáhú yá.

<sup>4</sup> Núu súcuan te na cástūhun rī siquí cūñu jeē ní casocō ñayuu nuū ídolo. Ndaā chi jiní yō jeē tāca ídolo ñayǎiví, tú ndaā cuiti. Te tú na inga yaā iyó, chi máá iin-ni Yaā Dios. <sup>5</sup> Te ñayuu chi cájeni ni i

jeē iyó táca yaā ini andiví jín ñayǎiví, chi cácahān i jeē iyó ndije cuehē yaā i jín jítóho i. <sup>6</sup> Te nuū máá yó chi iin-ni Yaā iyó, jeē cúu Tátá yō Yaā Dios. Te máá yá ni sáha tāca jēē iyó, te cuenta máá yá cúu yó jijnáhan yó. Te suni iyó iin-ni Jítóho yō Jesucristo, te nde nuū máá yá vēji tāca jēē iyó, te suni máá yá ni sáha yóhó.

<sup>7</sup> Te ñayuu cácaandíje, chi tú ndihi i jín jnūhun yáha. Chi sava i ni cacāan i ni chiñúhún i ídolo nde ná tu cándíje i. Te nde vijna núu cáyeji i cūñu ún te sáha i cuenta jeē ni sócō nuū ídolo cúu. Te siquí jeē ná tu ije i jín jnúhun Yaā Dios, te jéni ni i jeē cujnéhén ánuá i sáha cūñu jeē ni sócō nuū ídolo ún. <sup>8</sup> Te ndaā chi nasūu jēē yéji yō cúu jeē sáha jeē cuatáhú Yaā Dios yohó. Chi núu yéji yō, nasūu yúcuan sáha jeē quéndōo váha ga yō nuū Yaā Dios. Te núu tu yéji yō, ni tu sáha jeē quéndōo ndáhú gá yō nuū yā.

<sup>9</sup> Te vēsú tú ni iin jési jeē ma cúu caji rō cūñu ún, te coto ró jnáhan ró jēē ná tu ije jín jnúhun ya, te ma sáha ró jēē suni caji i jeē jéni ni i jeē cuéchi cúu.

<sup>10</sup> Váha ga ma cáji rō núu súcuan, chi sanaa te hermano rō jeē ná tu ije jín jnúhun ya, coto de róhó jēē yéji rō ini vehe ídolo, chi jiní váha ró jēē tú na vé sáha. Te súcuan te sáha ró jēē cájni ni de jeē suni caji máá de cūñu jeē ni sócō nuū ídolo, vēsú jéni ni de jeē cuéchi cúu.

<sup>11</sup> Te súcuan stívi ró anuá hermano rō jeē ná tu ije jín jnúhun ya, vēsú jiní váha máá ró jeē tú na vé sáha jeē cáji rō. Te tú váha sáha ró, chi suni jehē máá de ni jihí Cristo. <sup>12</sup> Te núu súcuan stívi ró anuá hermano rō jeē ná tu ije jín jnúhun ya, núu súcuan te siquí Cristo cúu jeē sáha ró cuéchi. <sup>13</sup> Núu súcuan te núu cūñu un sáha jeē quívi hermano rī cuéchi, te ma cáji cuiti ga rī cūñu ún, náváha ma sáha rī jeē quívi de cuéchi.

### Siquī jeē iyó derecho tēe cácuu apóstol

**9** Te máá rí chi jíca libre rī, te iyó derecho rī siquī jeē cúu ri apóstol, tēe ni tají yá scáca jnūhun ya. Chi ni jito ri nuū maá Jítoho yō Jesús, te máá ró jijnáhan ró cácuu jniñu jeē ni sáha ri jeē ni squívi ri rohó ndaha Jítoho yō. <sup>2</sup>Te núu sava ga ñayuu tu jétáhú i jeē cúu ri apóstol, te nuū maá ró chi suu cúu ndije ri. Chi siquī jeē ní scandíje ri rohó jijnáhan ró, te jeē yúcuu cácuu ró prueba jeē steén jeē ndiso jniñu ri cúu ri apóstol nuū maá Jítoho yō.

<sup>3</sup>Te jnūhun yáha cáhán rī jehē maá rí nuū ñáyuu cácahān siquī rī. <sup>4</sup>Achí rí: Iyó derecho rī caji rī coho ri jeē cájehe ñayuu núu cúní rī. <sup>5</sup>Te suni iyó derecho rī núu jeē cuní rī condeca ri iin hermana candíje cuu ñasihí rí, caca ña jíin rí, nájnūhun iyó ñasihí Pedro jíin táca gá apóstol jíin tēe cácuu ñani maá Jítoho yō. <sup>6</sup>¿Chí cájeni ni rō jeē maá rúhū-ni jíin Bernabé tú na derecho rī jeē stóo ri jniñu cásáha ri jeē cótecu rī, návāha nune ga rī nacani ri jnūhun vāha ya, chí naún? <sup>7</sup>¿A iyó soldado jeē técu de xūhún vehe de? ¿A iyó tēe jeē jítu uva te tu yéji de ndehē ún? ¿A iyó tēe jeē ndító lanchi te tu jñhi de leche tí? Tú cuití. ¿Te á suni tu iyó derecho rī cotecu rī siquī jnúhun ya naún? <sup>8</sup>Te ma cáni ni rō jeē táca jéē cahán rī yāhá, máni máá jéē cácahān ñayuu ñayívi cúu. Chi nde maá ley yā jeē ni jéhe ya nuū Moisés, cáhán súcuu. <sup>9</sup>Chi cáhán nuū tútu ley yā: Ma chūhun ró ñunu yuhu stíquī, quití jéxín trigo, achí. Te ndaā chi nasūu máni siquī stíquī cúu jeē ni cáhān yā súcuu. <sup>10</sup>Chi suni siquī maá yó ní cahān yā. Chi ley un ní jéhe ya jeē váha máá yó, chi stéén jeē tēe jítu jíin tēe jéxín trigo cánuú jeē nihín de sava un quívi ndutútú. <sup>11</sup>Te suni súcuu ruhū jijnáhan ri jeē ní cataji ri jnūhun Espíritu ini anuá rō, ¿te á véyi

cúu jíin ró núu nastútú rí jeē cótecu rī nuū rō? <sup>12</sup>Te núu sava ga tēe cástéén nuū rō, iyó derecho de cacān de nuū rō, te nagā ni cuu ruhū jijnáhan ri jeē ma cóo derecho rī cacān rī.

Te tu ní cájicān rī derecho un, chi sa suhva ni jendeyí ni rī coto máá rí jeē cáji rī, návāha ma cási rī jeē cáca jnūhun vāha Cristo. <sup>13</sup>Te cájini rō jeē sutú ni cajejniñu ini templo, ni cacotecu de siquī jeē ní casocō ñayuu ini templo. Chi sutú ni cajejniñu nuū altar nuū ní casocō i quití, suni ni cayeji de sava quití ún. <sup>14</sup>Te suni súcuu ni ndacu máá Jítoho yō jniñu jeē tēe cánacani jnūhun jeē jnáma ya yohó, siquī jniñu un níhin de jeē cótecu de. <sup>15</sup>Te ruhū tu ní jícan cuiti rī derecho rī yāhá, te suni nasūu jéē tēe ri jnūhun yáha návāha cuāha ró núu rī jijnáhan ró. Chi jéni ni rī jeē vāha ga núu na cúu rī nasūu jéē quíhin ri jeē cuāha ró, chi casi jeē cúsiñi ni rī scáca ri jnūhun ya súcuu-ni.

<sup>16</sup>Te tú vāha núu sátéyí rí maá rí siquī jeē nácani ri jnūhun jeē jnáma ya yohó. Chi iin jeē ní tejniñu ya ruhū cúu, te cánuú squícu rī. Chi nacā ndahú cúu ri te núu tú nacani ri jnūhun ya. <sup>17</sup>Te núu jeē cúu ni maá rí sáha ri nuú, yūcuán na te cuu cacān ri yāhu ri. Te tuú chi cánuú sáha ri, chí máá Yā Dios ni tee ya jniñu siquī rī. <sup>18</sup>Núu súcuu te yāhu ri cúu jeē cúsiñi ni rī jeē súcuu-ni nácani ri jnūhun jeē jnáma ya yohó, te tu jícan rī derecho ri jeē cotecu rī siquī jeē nácani ri jnūhun ya.

<sup>19</sup>Chi vēsú tú ni iin ñayuu ndácu jniñu nuū rī, te ni sáha ri maá rí mozo nuū tēcá i jeē nácani ri jnūhun nuū i, návāha nihín rī cuehē i candíje i Cristo. <sup>20</sup>Núu íne ri jíin jnáhan ri hebreo te sáha ri nájnūhun cásáha i, návāha cuu scándíje ri i. Chi násáha ri maá rí nájnūhun tēe cáyihí chíji ley Moisés, návāha cuu scándíje ri i jeē cáyihí i chíji ley un, vēsú tuá yñhi ri chíji ley un. <sup>21</sup>Te suni násáha ri maá

rí nájñuhun ñayuu tu cáyihí chíji ley Moisés, návāha cuu scándíje ri ñayuu ún. Te vésú súcuan te yíhi ri chíji ley Yaā Dios, chí suu cúu ley Cristo jeē squícu ri. <sup>22</sup>Te núu íne ri jíin ñayuu jeē ná tu ije jíin jñuhun ya, te sáha ri maá rí nájñuhun jeē ná tu ije ri jíin jñuhun ya, návāha cuu scándíje ga rí i. Núu súcuan te násáha ri maá rí núu ndese cándāa táca ñayuu, návāha táca-ni modo un te cuu scándíje ri sava i. <sup>23</sup>Tāca yáha sáha ri jeē síquí jñuhun jeē jnáma ya yohó, návāha suni nihin rí tahú jeē ndíso jñuhun ya.

<sup>24</sup>Je cájini rō jeē tée cájину carrera, jendaá chí ndíhi de cájину, te ñin-ni de cúndeyí nihin premio. Te suni súcuan nducú ndéyí máá ró squícu ró, návāha nihin rō premio nuū yā. <sup>25</sup>Te tāca tée cúní cundeyí síquí ñin deporte, chí cás-cuáha de te cándito de máá de. Súcuan cásáha de návāha nihin de ñin premio jeē cúu corona ndaha yújnu jeē nāā yachí. Te máá yó chí sa suhva cánducú ndéyí yó návāha nihin yō ñin premio jeē ma nāā cuití. <sup>26</sup>Te máá rí suni nducú ndéyí rí nájñuhun tée cájину, te tu nducú ndéyí cāha rí. Te sáha ri nájñuhun tée cáca-jnáhan juego jeē tu jéhe iyú de, chí quée jniñu sáha ri. <sup>27</sup>Chí sa suhva stóho ri yiquí cúñu rí, te stfhví ni rí maá rí squícu ri. Chí vésú ni stfhví ni rí inga ñayuu jeē nducú ndéyí i, te núu tu nducú ndéyí máá rí te snáā rí premio rí.

### Siquí jeē ma chíñúhún i ídolo

**10** Hermano jijnáhan ró, cúní rí jeē na jécūhun ni rō ndese ni cajica jíi yō jenahán. Chí ndíhi de ni cajica chíji vicō jeē ni steén ichi nuū de, te ndíhi de ni cayāha mēhñú ndute Mar Rojo jeē ní cusíin, ni nune ichi. <sup>2</sup>Súcuan cúu jeē ní canduu ñnuú ndíhi i jíin Moisés, chí ni candiquín i de chíji vicō jíin mēhñu mar. <sup>3</sup>Te ndíhi i chí ñnuú-ni ni cayejí i alimento jeē ni jéhe máá Espíritu. <sup>4</sup>Te

suní ndíhi i ni cajihí ndute jeē ni jéhe Espíritu. Chí ni cajihí i ndute jeē ní cane jíicā cáva nuū ní cajica cuu i. Te Cristo cúu nájñuhun cava un jéē jéhe ya ndute cotecu yō ní cáni. <sup>5</sup>Te vésú súcuan te cuehē i ni cuníhni ni i, te tu ní cúsiñ ni Yaā Dios jíin i, te jeē yúcuan ní cajihí i nuū ñuhun téhé.

<sup>6</sup>Te tāca jéē ní cuu ún, ñin ejemplo cúu nuū yō, návāha ma ndíyo ni yō táca jéē neé, nájñuhun ni candiyo ni ñayuu ún. <sup>7</sup>Te ma chíñúhún ró ídolo, nájñuhun ni casáha sava i. Chí súcuan cáhán nuū tútu ñi: Ni cacucōo ñayuu ún, ni cayejí i ni cajihí i vico ídolo, te ni ndocuiñí i ni cajita jéhe i, áchí. <sup>8</sup>Te ni ma cáca jnéni ró nájñuhun ni casáha sava i, te ni cajihí ocō uní mil i jeē ñin quiví-ni. <sup>9</sup>Te ni ma sáha ró jniñu jeē squítí ni rō Jitoho yō, nájñuhun ni casáha sava i, te ni cajihí i jeē ní catuu coō i, ni sáha ya. <sup>10</sup>Te ni ma cahán sōó ró síquí Yaā Dios, nájñuhun ni cacahán sōó sava i, te ni cajihí i jeē ní jehni ndajéhe yā i.

<sup>11</sup>Te tāca jéē ní cuu ún, chí ñin ejemplo cúu nuū yō. Te súcuan yósó núu tútu návāha na chúhun vāha ni maá yó. Chí cácuu yó ñayuu cátecu quiví cuándíhi ñayíví. <sup>12</sup>Núu súcuan te róhó jéē cájeni ni rō jeē cáhiin nihin ró jéē ma sáha ró cuéchi, coto má quiví ró cuéchi. <sup>13</sup>Chí máni íyó jéē nducú squíví róhó cuéchi, te ñnuú-ni cándoho ró súcuan nde jíin táca gá ñayuu. Te cuu cucáhnú ni rō Yaā Dios jeē ma cuáha ya jñuhun jeē vihyá gā coto ndee jexeén róhó vésú jeē cúu cundeyí ró jíin. Chí sa suhva núu vēji jeē nducú squíví róhó cuéchi, te chindéé ñáhán yá rohó quenda ró te cundeyí ró squí.

<sup>14</sup>Ñāni máni, ma chíñúhún cuití rō ídolo núu súcuan. <sup>15</sup>Cáhán rí jíin ró jéē cúu ró ñayuu cájecūhun ni, te na sáha ró cuenta núu ndaā jñuhun cáhán rí. <sup>16</sup>Máá copa ñi jeē cájicān tahú yō jehē, suu cájihí cáhnú yó jéē steén yō jeē ñnuú cúu ndíhi yó, chí ni jeti níñi Cristo jeē

siquí yō ná ni jihí yā jicā cruz. Te pan jeē sacuéchí yó cáyeji cáhnu yó, stéén jeē inuú cúu ndihí yó siquí jeē ni jéhe Cristo yiquí cūñu yā ni jihí yā jehē yō. <sup>17</sup> Te vēsú cuehē yō iyó, te ñni-ñi ñayuu cácuu yó, chí ñni-ñi pan un cáyeji cáhnu yó siquí jeē cácandíje yó.

<sup>18</sup> Condēhe rō ndese cásáha ñayuu Israel. Tāca tēe jeē yéji quití jeē ni sócō nuū yā, chí inuú-ñi cúu ndihí de siquí jeē cáyeji de jeē ni sócō ún. <sup>19</sup> Núu súcuan te cáhán rí jeē tu ndé jéññu ídolo, ni tu jéññu cūñu jeē ni sócō nuū ídolo, chí inuú cúu jíñ tāca gá cūñu. <sup>20</sup> Te suni cáhán rí jeē ñayuu tu cájini jñuhun Yaā Dios, núu cásocō i, te nuū tachí cásocō i, nasūu núu Yaā Dios. Te tu cúní rí jeē cuajññu ró núu tachí. <sup>21</sup> Ma cúu coho ró copa maá Jítoho yō te núu cájihu ró jéē ni sócō nuū tachí. Te ma cúu caji rō nuū mesa Jítoho yō te núu cáyeji rō jeē ni sócō nuū tachí. <sup>22</sup> Ma quívi nduu yō súcuan jíñ táchí, náváha ma cucuñí Jítoho yō jíñ yó. ¿Chí téyí gá maá yó vēsú maá yá jeē ma cúu stóho ya yohó, cájeni ni rō, chí naún?

### Ndihí chí sáha yó jíñ jñuhun cúndáhú ni

<sup>23</sup> Te ndaā cúu jeē cácahān jeē ndihí-ñi jññu íyó váha sáha yó núu ndese cúní yō. Te tuú chí nasúu ndihí sáha jeē quéndōo váha ánuá yō. Ndihí chí cuu sáha yó, te vēsú súcuan te nasúu ndihí sáha jeē ije jñáhan yó jíñ jñuhun ya. <sup>24</sup> Chí cánuu sáha yó jéē váha jñáhan yó, nasūu máni máá jéē váha máá yó.

<sup>25</sup> Cuu caji rō ndihí-ñi cūñu cýáhu nuū yáhu, te ma cájñuhun ró ni ma cáni ni rō núu jeē ni sócō nuū ídolo cúu. <sup>26</sup> Chí cuenta maá Jítoho yō cúu ñayívi jíñ ndívi jeē iyó ini, te cuu cuajññu yó.

<sup>27</sup> Te núu ñni tēe tu cándíje, cana de róhó caji rō jíñ de, te núu cácuñi rō quihñ rō, núu súcuan te caji rō tāca jéē cáni de nuū rō. Te ma cájñuhun ró ni ma cáni

ni rō núu jeē ni sócō nuū ídolo cúu. <sup>28</sup> Te núu cachi ñni i nuū rō jeē cūñu ni sócō nuū ídolo cúu, yūcuán na te ma cáji rō, chí siquí jeē jéni ni i jeē cuéchi cúu, te tu cúní rō sáha ró jéē quívi i cuéchi. <sup>29</sup> Te súcuan cáhán rí siquí jeē ñnga i cájeni ni i jeē cuéchi cúu, te nasūu jéē súcuan cájeni ni maá rō.

Te sanaa te cahān ñni ró: ¿A tu íyó libre rí caji rí jeē cúní maá rí, vēsú cájeni ni ñnga i jeē cuéchi cúu? <sup>30</sup> ¿Te núu nácuatáhú rí nuū Yaā Dios te yéji rí, te najehē cácahān i siquí rí jeē yéji rí? achi rō. <sup>31</sup> Tuú chí ndihí jeē sáha ró, vēsú jeē caji rō chí jéē coho ró, chí na-ñi jññu sáha ró, ndihí na sáha yíññuhún ró jíñ Yaā Dios, náváha cuni ñayuu jeē luu cújéhu ya. <sup>32</sup> Te ma sáha ró jññu jeē squívi ró ñayuu nuū cuéchi, cúu ñayuu hebreo, cúu ñayuu tācá nación jeē tu jíñ jñuhun ya, cúu ñayuu cácandíje Yaā Dios. <sup>33</sup> Te ruhū chí ndúcú rí jeē na cúsiñ ni tāca ñayuu jíñ táca jññu sáha rí. Tu ndúcú rí jeē váha máa-ñi rí, chí sa ndúcú rí sáha rí jeē váha cuehē ñayuu, náváha cácu i.

**11** Te na ndácu ró rúhú jijnáhan ró, nájñuhun ndácu máá rí Cristo.

### Siquí ndese cánuu sáha ñahan cándutútú

<sup>2</sup> Váha cásáha ró, hermano, jeē niní cánucūhun ni rō ruhū, te cándíhví ni rō jíñ táca jññu jeē ni steén rí nuū rō. <sup>3</sup> Te cúní rí jeē na jécūhun ni rō jeē Cristo cúnúu yá nuū tāca tēe. Te tēe cúnúu de nuū ñasihí de. Te Yaā Dios cúnúu yá nuū Cristo. <sup>4</sup> Núu ñni tēe ññuhun de lélú te jícán tahú de chí nácani de jñuhun nuū ndutútú ñayuu cácandíje, núu súcuan te jéhe de jñuhun canu máá de. <sup>5</sup> Te sa núu ñni ñahan tu ndési xiní ña te jícán tahú ña chí nácani ña jñuhun, núu súcuan te jéhe ña jñuhun canu máá ña, chí ñni-ñi cúu un núu ní sáte xiní ña. <sup>6</sup> Chí núu tú casi ña xiní ña, váha ga na sáte ña ixi ña núu súcuan. Te núu cúcanu ña jeē sáte ña

ixi ña chí jéé sáte lii ña, te na cási ña núu súcuan. <sup>7</sup>Te tēe chi ma cási de xiní de, chí máá de cúu muestra jeē steén ndese cúu Yaā Dios jeē kujéñu ya. Te ñahan chí stéén ña jeē kujéñu tēe. <sup>8</sup>Chi ná ni sáha ya tēe, te nasūu jíin yiquí ñahan ni sáha ya, chí sa suhva jíin yiquí tēe ni sáha ya ñahan. <sup>9</sup>Te ñahan chí ni cuvāha ña jeē siquí tēe, nasūu tēe jeē siquí ñahan. <sup>10</sup>Te jeē yúcuan cánuú jéé cóndesi xiní ñahan, te suu stéén jeē kujéñu tēe, chí suni cándehé ndajéhé yā ndese sáha ña. <sup>11</sup>Te vēsú súcuan te yóhó jéé candíje yó, chí jíiní yō jeē tu íyó tēe núu jeē tu íyó ñahan, te tu íyó ñahan núu jeē tu íyó tēe. <sup>12</sup>Chi vēsú ni sáha ya ñahan jíin yiquí tēe, te vijna cácu tēe chíji ñahan, te máá Yaā Dios cúu jeē sáha tācá-ni.

<sup>13</sup>Na sáha máá ró cuenta ¿á íyó váha núu tu ndési xiní ñahan te jíicán tahú ña nuū Yaā Dios? <sup>14</sup>Chi sáha yó cuenta jeē ini ñayívi yáha, núu cáni xixi tēe te cúcanu de sáha. <sup>15</sup>Te ñahan chí sa váha jíto ña te núu cáni xixi ña, chí suu ni jēhe ya jeē cóndesi xiní ña. <sup>16</sup>Te núu ndé ñin ñayuu cuní i cahān i siquí jnúhun yáha, te ruhū jíin táca grupo ñayuu cácandíje nuū Yaā Dios, tú na inga costumbre je-jnúhún rí siquí jnúhun yáha.

### Jeē castívi i siquí Cena Jitoho yō

<sup>17</sup>Te íyó inga jnúhun cánuú cahān rí jíin ró, chí tu cúu cahān rí jeē váha cásáha ró. Chí nuū cándutútú ró te tu sáha jeē quéndōo váha ga rō, chí sa jeē castívi ró. <sup>18</sup>Xihna jnúhun yáha cáhán rí, jeē nihín rí jnúhun jeē nuū cándutútú ró te cácusín ni rō. Te jéni ni rí jeē ndaā cúu. <sup>19</sup>Chi níni coo sava ró jéé cusín ni, návāha natūu ndé-ni cúu jeē cácandíje váha mēhñu ró. <sup>20</sup>Te jeē cácusín ró súcuan nuū cándutútú ró, te nasūu cena máá Jitoho yō cúu jeē cáyeji rō núu súcuan. <sup>21</sup>Chi núu cáyeji rō, te tācá ñin ñin ró cúní caji xihna gā vēsú jnáhan ró. Te súcuan te sava ró tu cáni-

hín, te cájii sōco, te sava ró cáñajini jeē cájii cuehē. <sup>22</sup>¿A tu cánevāha ró vehe nuū cáji rō coho ró, chí naún? Chí jeē casáha ró súcuan cúu jeē tu íyó yíñuhún ró ini vehe nuū cándutútú ñayuu cácandíje Yaā Dios, chí cásáha ró jéé cácucañu ñayuu jeē tú na vé névāha. ¿Ndesi cahān rí jíin ró núu súcuan? ¿A cáhán rí jeē váha cásáha ró? Tuú chí nasūu jéé váha cúu jeē casáha ró súcuan.

### Siquí jeē ní jequin Jitoho yō Cena yā

(Mt. 26.26-29;

Mr. 14.22-25; Lc. 22.14-20)

<sup>23</sup>Chi jnúhun yáha jéé ní nastéén rí nuū rō, chí nuū máá Jitoho yō ni nihín rí: Jeē máá jecuáá jeē ní nastúu de Jitoho yō Jesús, te ni quihin ya pan. <sup>24</sup>Te ni nacuatáhú yá, te ni tahú cuéchi yá, te ni cahān yā jíin tēe cácuáha jíin yá: Quihin te caji rō jijnáhan ró, chí yáha cúu yiquí cúñu rí jeē ni sōcō rí jeē siquí rō. Te níni caji rō súcuan jeē cáñuhun ni rō ruhū jeē ni jíhi rí jehē rō. Achí yá. <sup>25</sup>Te suni súcuan ni quihin ya copa ná ni cuu ni cuxíni ya jíin de, te ni cahān yā: Jeē ñuhun copa yáha cúu niñí rí jeē sácútú contrato jeé jeé jnáma rí ñayuu. Te tāca jínu jeē cájii ró, te nucūhun ni rō ruhū. Achí yá. <sup>26</sup>Chi tāca jínu jeē cáyeji rō pan un te cájii ró copa un, súcuan cástéén rō jeē ni jíhi Jitoho yō jehē yō. Te súcuan na sáha ró ndé quiví ndíji ya.

### Ndesi caji yíñuhún i Cena yā

<sup>27</sup>Te núu na-ni ñayuu caji i pan un chí coho i copa Jitoho yō ún, te núu tu sáha yíñuhún i nuū Yaā Dios, núu súcuan te sáha i cuéchi jeē tu íyó yíñuhún i siquí yiquí cúñu máá Jitoho yō jíin síquí niñí yā. <sup>28</sup>Núu súcuan te coto ndee rō máá ró núu íyó ndoo ánuá rō jeē tú cuéchi ró. Te sáá te cuu caji rō pan un te coho ró copa un. <sup>29</sup>Chi núu ñin ñayuu tu yéji tu jíhi yíñuhún i te tu nucūhun ni i jeē yiquí cúñu yā cúu, ñayuu ún chí nihín i



castigo núu na cáji i coho i. <sup>30</sup> Jeē yúcuan cúu jeē iyó cuéhē ñayuu cácuñu jíin jéé ní cacuxíí, cáhiyo mēñu ró. Te sava i je ni cajihí. <sup>31</sup> Te núu coto ndee yō maá yó nde ná tu caji yō, te Jitoho yō ma cuáha ya castigo yohó. <sup>32</sup> Te núu Jitoho yō jéhe ya castigo yohó, te súcuan stóho ya yohó návaha ma jahnú ndetū yō jíin ñayuu ñayíví.

<sup>33</sup> Náni mání, núu súcuan te jeē cándutútú ró jeē cáji rō Cena yā, te condetu ró te caji inuú ró. <sup>34</sup> Te núu ñin ñayuu jíi i sōco, te xihna gā na cáji i vehe i návaha ma stívi i nuū cándutútú ró. Te súcuan te ma cuáha ya castigo i. Te quiví jécondéhe rí rohó te cachi rí ndese coo sava ga jniñu.

### Siquí tāca táhū jeē jéhe Espíritu

**12** Hermano, cúní rí jeē na jécūhun ni rō siquí tāca táhū jeē jéhe Espíritu nuū yō, suu tāca modo jejniñu ñin ñin yó núu Yaā Dios.

<sup>2</sup> Te cájini rō jeē ná ni cuu ró ñayuu ná tu candíje, te ni cacondíhvī ni rō ni cachiñúhún ró ídolo ñihín. <sup>3</sup> Te vijna te na jécūhun ni rō jeē núu ndé ñayuu cahán ndevāha i siquí Jesús, te nasūu jíin poder Espíritu Yaā Dios cúu jeē cahán i súcuan. Te ni ñin i ma cúu cahán i jeē Jitoho i cúu Jesús, te núu tu ndéé poder Espíritu Santo ini i.

<sup>4</sup> Te sñin sñin tahū jéhe ya jeē cuajniñu ñin ñin yó núu yā, te ñin-ni máá Espíritu cúu jeē jéhe. <sup>5</sup> Te sñin sñin jéjniñu yó, te nuū maá ñin-ni Jitoho yō jejniñu yó. <sup>6</sup> Te sñin sñin modo sáha yó jniñu ya, te ñin-ni Yaā Dios cúu jeē sáha jniñu un jíin yó. <sup>7</sup> Te nuū ná ñin ná ñin yó ní jéhe Yaā Dios tahū jeē sáha Espíritu yā jíin yó, návaha na sáha yó jéé ije jnáhan yó jíin jnúhun ya. <sup>8</sup> Chi sava yó ní canihín tahū jeē ndichí cáhán yō jnúhun ya, sáha máá Espíritu. Te sava ga yō ni canihín yō jeē cúu jécūhun vāha ni yō te castūhun yó, te suni máá Espíritu sáha. <sup>9</sup> Te nuū sava

ga yō ni jéhe ya tahū jeē cúu cándíje nihin yó jéé sáha ya jeē jicán yō, te sava ga yō cúu sáha yó jéé ndúvāha ñayuu cácuñu, te suni máá Espíritu sáha. <sup>10</sup> Te sava ga yō cúu sáha jniñu jénu jíin fuerza Yaā Dios. Te sava ga yō cúu nácani jnúhun ya. Te sava ga yō ni sáha ya jeē nácani yō tāca jnúhun, núu vēji nuū Espíritu yā chí tuú. Te sava ga yō ni nihin tahū jeē cahán yō tijni yuhu jeē tu jécūhun ni yō. Te sava ga yō cúu nacastūhun yó jnúhun ni cahán jnáhan yó jíin inga yuhu ún. <sup>11</sup> Te tāca táhū yáha, chi ñin-ni máá Espíritu sája, te sñin sñin jéhe ya nuū ñin ñin yó, ndese nájna-han ni maá yá.

### Ndihí yó cúu nájñūhun ñin na yiquí cúñu

<sup>12</sup> Chi nájñūhun ñin yiquí cúñu iyó cuéhē parte, súcuan cúu yó jíin Cristo jeē cúu yó nájñūhun yiquí cúñu yā, chi ñin na cúu yó jíin yá. Te vēsú cuehē parte cácuu yó te ñin-ni cúu yó, nájñūhun ñin yiquí cúñu jeē iyó cuéhē parte. <sup>13</sup> Chi ñin na ni canduu yó jíin yá ni sáha ñin-ni máá Espíritu ná ni cajendute yó. Súcuan cúu vēsú cúu yó ñayuu hebreo chí ñayuu griego, vēsú mozo jeē ní jeen ñayuu chí téé sájniñu cuenta maá. Te ndihí yó chí ñin-ni Espíritu ni canihín yō.

<sup>14</sup> Te ñin yiquí cúñu chí nasūú ñin-ni parte cúu, chí sa cuehē parte cúu. <sup>15</sup> Te núu jehē cahán: Nasūu cuenta yiquí cúñu cúu ri, chí nasūú ndaha cúu ri, te tuú chí parte yiquí cúñu cúu nahín. <sup>16</sup> Te núu sōho cahán: Nasūu cuenta yiquí cúñu cúu ri, chí nasūu tñūu cúu ri, te tuú chí parte yiquí cúñu cúu nahín. <sup>17</sup> Núu ní yiquí cúñu yō cúu tñūú, ¿te ndese cuni sōho yó núu súcuan? Te núu ní yiquí cúñu yō cúu sōho, ¿te ndese cuaan yó xícō núu súcuan? <sup>18</sup> Te Yaā Dios ni chujnáhan ya ñin ñin parte yiquí cúñu, nájñūhun cúní yā jeē coo. <sup>19</sup> Chi núu ñin-ni parte cúu ndihí, te nasūú ñin ní

yiqui cúñu cúu núu súcuan. <sup>20</sup> Te tuú chi cuehē parte iyó, te iin-ni yiqui cúñu cúu.

<sup>21</sup> Te ni ma cúu cahān tññu jíin ndaha: Tu jíni ññhún rí rohó. Te ni xiní ma cúu cahān jíin jéhē: Tu jíni ññhún rí rohó.

<sup>22</sup> Chi sa suhva tāca parte yiqui cúñu jeē jéni ni yō jeē núu ga fuerza, suu cúu jeē cánuú gá. <sup>23</sup> Te tāca parte yiqui cúñu jeē jéni ni yō jeē tu cáa vāha, suu cúu jeē yucún gá chūhun yó sahma. Te parte jeē tú-ni luu cáa, sa vāha ga jési yō. <sup>24</sup> Chi parte jeē lúu cáa, tu cánuú jéē condihyū. Chi súcuan ni chujnáhan Yaā Dios yiqui cúñu, jeē yucún gá ndíto yó jéē tu cáa luu. <sup>25</sup> Súcuan ni sáha ya návāha ma cusñn tāca parte yiqui cúñu, chi sa chindéé ñájnáhan vāha jíin jnáhan. <sup>26</sup> Te núu jétú iin parte yiqui cúñu, te suni ññí cáhnu-ni jétú. Te núu iin parte ndíto yucún yó, te suni ndihi-ni parte quéndō vāha.

<sup>27</sup> Te róhó jíjnáhan ró chi nájnūhun yiqui cúñu Cristo cácuu ró, chi iin na cúu yó jíin yá. Te ná iin ná iin ró cúu iin iin parte yā. <sup>28</sup> Núu súcuan te sñn sñn jniñu ni jēhe Yaā Dios nuū tāca ñayuu cácañje jeē cácuu i nájnūhun iin iin parte yā: Te suu iin parte yā cúu tācá apóstol jeē ní jeni ya xihna gā jeē scáca de jnūhun ya. Yūcuán na te jeē uú, tēe cánacani jnūhun ya, te jeē uní, tēe cástéén. Yūcuán na te ñayuu casáha jniñu jéñu jíin fuerza yā, jíin ñayuu casáha jeē ndúvāha ñayuu cácuu, jíin ñayuu cachíndéé ñájnáhan, jíin ñayuu cándiso jniñu, jíin ñayuu cácahān sñn sñn yuhu jeē tu cájecūhun ni. <sup>29</sup> ¿A ndihi yó cácuu apóstol, chí naún? ¿A ndihi yó cánacani jnūhun? ¿A ndihi yó cástéén? ¿A ndihi yó cuu sáha jniñu jéñu? <sup>30</sup> ¿A ndihi yó cuu sáha jeē ndúvāha ñayuu cácuu? ¿A ndihi yó cuu cahān sñn sñn yuhu? ¿A ndihi yó cuu nacastūhún yuhu ún, chí naún? Tuú chi sñn sñn tahū ni canihñn yō. <sup>31</sup> Núu súcuan te na cóndihvī ni rō cacān rō jeē cuáha Yaā Dios tahū

cánuú gá nuū rō. Te vijna te na stéén rí nuū rō iin jeē vāha ga nuū tāca gá tahū ún, suu jnūhun cúndáhú ni jnáhan.

### Jnūhun jeē cundáhú ni jnáhan

**13** Vēsú núu cuu cahān yō tijni yuhu jeē cácahān ñayuu chí jéē cácahān ndajéhé Yaā Dios, te núu tu cúndáhú ni yō jnáhan yó, te jnūhun cahān yō un cúu nájnūhun iin tambor jeē ndaxín cáján chí iin platillo jeē ndaxín cáxín sánee sōho ñayuu. <sup>2</sup> Te vēsú cuu nacani vāha yó jnūhun ya, te cuu jecūhun ni yō tāca jnūhun sáhi yá jíin tāca jnūhun ndíhí, te núu tu cúndáhú ni yō jnáhan yó, te tu ndé jéjññu cuiti yō núu súcuan. Te vēsú cuu candíje téyí yó jeē nde cuu cahān yō jeē cújiyo yucu, te núu tu cúndáhú ni yō jnáhan yó, te tu ndé jéjññu cuiti. <sup>3</sup> Te vēsú na sája yó ndihi jeē névāha yó cuu ñayuu ndahú, te vēsú núu cuāha yó jnūhun cahmu ñayuu yohó jéē siquí jnūhun ya, te núu tu cúndáhú ni yō jnáhan yó, te tu ndé jéjññu cuiti.

<sup>4</sup> Ñayuu cundáhú ni chí íyó paciencia jíin jnáhan, te íyó mání ni, te tu cúcuésún ni. Te tu sándúxí, te tu sátéyí máá. <sup>5</sup> Tu sájéē ni, tu ndúcú jéē cúu máá-ni, tu quítí ni, tu ñūhun ni jnūhun quítí ni. <sup>6</sup> Tu cúsiñ ni jíto jniñu néé casáha jnáhan, chí sa cúsiñ ni jíin jniñu vāha. <sup>7</sup> Ñayuu cundáhú ni chí ndihi jéñde ni ndoho jehē jnáhan, te tu jécuiññi jeē candíje jnáhan, jíin jéē ñūhun ni jeē squícu jnáhan, jíin jéē jéñdeyí ni jíin jnáhan.

<sup>8</sup> Jnūhun cúndáhú ni chí ma náā cuiti. Te quiji quivī jeē tuá nacani i jnūhun, ni tuá cahān i tijni yuhu, ni tuá jíni ññhún jnūhun ndíhí. <sup>9</sup> Chi tu jíni vāha vāha yó vijna, te jnūhun cánacani yó suni jecu-ni cúu. <sup>10</sup> Te núu na quíji quivī jeē cúni yō ndihi, yūcuán na te tuá coo jeē jiní yó jecu-ni.

<sup>11</sup> Ná ni cuu yó súchi lúlí te ni cahān yō, ni jeni ni yō, ni jecūhun ni yō nájñuhun súchi lúlí. Te ná ni jehnu yó te ni stóo yó modo súchi lúlí. <sup>12</sup> Te suni súcuan, jecu-ni jécūhun ni yō vijna, nájñuhun jeē jító yó núū ñin espejo jeē tú ndijin vāha. Te cúcuéé gá te jecūhun cájǐ ni yō ndíhi. Te vijna chí jecu-ni jíni yō, te cúcuéé gá te cuni vāha yó ndese Yaā cúu ya, nájñuhun jíni vāha ya yohó ndese ñayuu cúu yó. <sup>13</sup> Núu súcuan te íyó únǐ jñuhun jeē quéndōo cutú níí cáni: Jeē candíje nihin yó jéē squícu ya jeē ni jéjñuhun ya, jeē cócuhun ni yō tāca jéē váha coo, jíni jéē cundáhú ni yō jnáhan yó. Te jñuhun cúndáhú ni chí jéhnu ndasí gá cúu nuū tāca jéē yáha.

### Siquí jeē cácahān i tijni yuhu

**14** Na cóndihvǐ ni rō cundáhú ni rō jnáhan ró, te suni cóndihvǐ ni rō cacān rō tāca táhū jeē jéhe Espírítu. Te tahū jeē cánuú gá cúu jeē nácani ró jnúhun ya. <sup>2</sup> Chí tēe névāha tahū jeē cahán de tijni yuhu jeē tu jécūhun ni de, chí máá-ni Yaā Dios jíni jeē cahán de, nasūu ñayuu. Chí ni ñin i ma jécūhun ni jeē cahán de. Chí sáha Espírítu jeē cahán de tāca jnúhun yśahí. <sup>3</sup> Te sa suhva tēe nácani jñuhun ya, chí jíni ñayuu cahán de návāha ije i jíni jnúhun ya, te stǐhvǐ ni de i, te cáhān ndeyí ni de jíni i. <sup>4</sup> Te tēe jeē cahán tijni yuhu, chí máá-ni de íje jíni jnúhun ya. Te tēe jeē nácani jñuhun ya, chí sa suhva sáha de jeē ñayuu cá-candíje íje i jíni jnúhun ya.

<sup>5</sup> Nújnahan ni rǐ jeē ndíhi ró cuu cahān rō tijni yuhu jeē tu jécūhun ni rō, te jeē cánuú ndasí gá cúu jeē nácani ró jnúhun ya. Chí jéhnu ga jniñu sáha tēe nácani jñuhun ya vēsú tēe cáhān tijni yuhu. Chí núu tú tēe castūhun jñuhun cáhān de, te ma cuajniñu jeē íje ñayuu cá-candíje. <sup>6</sup> Jeē yúcuan hermano jijnáhan ró, núu na jéé rǐ nuū rō, te núu cahān rǐ tijni yuhu jeē tu jécūhun ni rō, ¿te ndé cua-

jniñu ún? Te núu na cáhān rǐ ñin jeē ni stéén yā, chí ñin jeē cútūhva ró jñuhun ndaā, chí ñin jeē nácani rǐ jñuhun ya, chí ñin jeē steén rǐ nuū rō, yúcuan cúu jeē cuajniñu.

<sup>7</sup> Sáha yó cuenta jeē nájñuhun instrumento música, vēsú tu técu, te cuu cata, nájñuhun flauta jíni arpa. Te núu tu jíta sǐin sǐin nota, ¿te ndese cuni yō na yaa jíta? <sup>8</sup> Te núu corneta tu jécú cájǐ, te ni ñin tēe ma sátūhva de quihín de guerra. <sup>9</sup> Te suni súcuan róhó jijnáhan ró, núu tu cáhān cájǐ ró jñuhun jecūhun ni ñayuu, ¿te ndese cuni i na vé cahán rō? Chí jñuhun cáhān rō ndíso tachǐ cuahān jíni. <sup>10</sup> Te ndaā chí íyó cuéhē yuhu ini ñayǐvǐ, te tācá yuhu chí íyó ñayuu jécūhun ni. <sup>11</sup> Te núu tu jécūhun ni yō yuhu cáhān ñin tēe, te cúu yó nájñuhun tēe ñuu jicá núu tēe cáhān, te suni nájñuhun tēe ñuu jicá cúu de nuū maá yó. <sup>12</sup> Jeē yúcuan róhó jéé cá-cuni ndasí ró nihín rō tahū jeē jéhe Espírítu, na cá-cán rō tahū jeē sáha jeē íje ñayuu cá-candíje jíni jnúhun ya.

<sup>13</sup> Núu súcuan te ñayuu jeē cahán inga yuhu jeē tu jécūhun ni i, na cá-cán tahú i jeē cuu nacastūhún i yuhu ún. <sup>14</sup> Chí núu jícán tahú yō jíni inga yuhu, te máá ánuá-ni yó cúu jeē jicán tahú, te tu ndé jéjñiñu nuū jeē níjñuní yō. <sup>15</sup> ¿Nde-se sáha yó núu súcuan? Na cá-cán tahú yō jíni ánuá yō, te suni jíni jéē níjñuní yō. Na cáta yó yaa ñi jíni ánuá yō, te suni jíni jéē níjñuní yō. <sup>16</sup> Chí núu nácuatáhú ró máni jñuhun jeē ní quiji nuū anuá rō te tu jécūhun ni rō, núu súcuan te tēe jíni sōho te tu jécūhun ni, ma cúu nacuatáhú de jíni ró. Chí tu jíni cuiti de na jñuhun cáhān rō. <sup>17</sup> Ndaā chí vāha nácuatáhú máá ró, te inga de chí tú na vé nihín de jeē íje de jíni jnúhun ya. <sup>18</sup> Na cú-tahú rǐ nuū Yaā Dios jeē cahán gā rǐ jíni tijni yuhu vēsú maá ró jijnáhan ró. <sup>19</sup> Te vēsú súcuan te núu íne rǐ nuū cáyūcu tútú ñayuu cá-candíje, te nújnahan gā ni rǐ cahān rǐ uhūn-ni jñuhun jeē jécūhun

ni i te steén nuū i, vēsú jeē cahán rī uxī mil jñuhun jíin inga yuhu jeē tu jíni cuiti i.

<sup>20</sup> Hermano jijnáhan ró, ma cáni ni rō nájnūhun sūchi lúlí, chi sa suhva na íje ró jéē jecūhun vāha ni rō. Te coo ró nájnūhun sūchi lúlí jéē tu jíni i jniñu néé. <sup>21</sup> Te yósó núū tútu ley yā jenahán: Jíin jñuhun cácahān tēe inga yuhu, jíin jñuhun cácahān tēe ñuu jicá, sáha ri jeē cúni sōho ñayuu yáha jñuhun ri. Te ni jíin sūcuan ma sáha i cuenta jñuhun cahān rī, achí máá Jítóho yō. <sup>22</sup> Núu sūcuan te tahū jeē cahán yō tijni yuhu, yūcuan cúu iin jeē steén poder Yaā Dios nuū ñayuu tu cácañdije, nasūu núū ñayuu cácañdije. Te jeē nácani yó jñuhun ya, yūcuan cúu jeē steén nuū ñayuu cácañdije, nasūu núū ñayuu tu cácañdije. <sup>23</sup> Núu sūcuan te núu ndihí ró ñayuu cácañdije cáhiyo tútú, te tāca ró cácahān sīin sīin yuhu, te quīvi-coo ñayuu tu jécūhun ni jíin ñayuu tu cáñdije, ¿te á má cahán i jeē ní canduu loco rō? <sup>24</sup> Te núu tāca ró cácanani jñuhun ya, te núu quīvi iin tēe tu cáñdije chí iin tēe tu jécūhun ni, yūcuán na te nacuni de jeē tēe íyó cuéchi cúu de, te coto ndee de máá de jíin jñuhun cácanani ró. <sup>25</sup> Te nucūhun ni de tāca jéē ní jeni yuhu ni de jíin ánuá de. Yūcuán na te jecuiñi yití de te chiñúhún de Yaā Dios. Te cahān de jeē íne ndije Yaā Dios jíin ró jijnáhan ró.

### **Siquī jeē yucún yíñúhún na cóo nuū ndutútú yó**

<sup>26</sup> Núu sūcuan hermano jijnáhan ró: Nuū cándutútú ró te tāca ró coo iin yaa iī cata ró, chí iin jñuhun steén rō, chí iin jñuhun jeē ni sáha Yaā Dios jeē jecūhun ni rō, chí inga yuhu jeē cahán rō, chí jéē nacastūhun ró jñuhun inga yuhu ún. Te ndihí ún na sáha ró návāha íje ñayuu cácañdije jíin jñuhun ya. <sup>27</sup> Te núu cáhiyo tēe cahān inga yuhu, te na cahán uū de

chí úní-ni de, te ná iin ná iin de na cáhán. Te suni jíni ñúhún jéē nacastūhún iin tēe jñuhun ún. <sup>28</sup> Te núu tu íyó tēe jeē cúu nacastūhun jñuhun ún, te tēe cácahān inga yuhu, vāha ga ma cahán de nuū cándutútú ró, te na cahán maá-ni de jíin Yaā Dios. <sup>29</sup> Te suni sūcuan tēe cácanani jñuhun, na cahán uū de chí úní de, te sava ga rō nacani ni rō núu íyó ndáā jeē cácahān tēe ún. <sup>30</sup> Te núu inga tēe néne ni nihin de iin jñuhun jeē ni steén yā nuū de, núu sūcuan te tēe cahán na jécuiñi jeē cahán de, návāha cahān inga tēe ún. <sup>31</sup> Te sūcuan te ná iin ná iin ró cuu nacani ró jñuhun jeē steén yā nuū rō, návāha cutūhva ró te coo ndeyí ni rō. <sup>32</sup> Te tēe cácanani jñuhun, jíni ñúhún cuatáhú de jeē nácani inga tēe jñuhun te jecuiñi jeē cahán maá de. <sup>33</sup> Chi Yaā Dios cuní yā jeē coo nayúú méhñu ró, násūu jéē sacā núu cuvaā rō.

Te nájnūhun cásáha tāca grupo hermano cácañdije, <sup>34</sup> suni sūcuan tāca ñahan cándutútú jíin ñayuu cácañdije, na cóo nayúú ña. Chi tú vāha jeē cahán ña, chí sa cuatáhú ña nájnūhun cahán tutu ley yā. <sup>35</sup> Te núu cúni ña cucáhnu ni ña iin jñuhun, te nde vehe na cájnúhún ña yí ña. Chi jñuhun canu cúu jeē cahán iin ñahan méhñu núu cándutútú ró.

<sup>36</sup> Te na sáha ró cuenta jeē tu ní quénda jñuhun Yaā Dios nuū maá ró jijnáhan ró, te nasūu máá iin máá ró ní cánihin jñuhun ya. <sup>37</sup> Núu iin tēe jeni ni de jeē tēe nácani jñuhun ya jíin tēe névāha Espíritu cúu de, núu sūcuan te na cuájñúhún de jeē jniñu ní ndacu Jítóho yō cúu jeē tēe ri yāhá. <sup>38</sup> Te núu tu jétáhú de jñuhun yáha, suni ma cuatáhú yó de.

<sup>39</sup> Núu sūcuan, ñáni máni jijnáhan ró, na cóndihvi ni rō nacani ró jñuhun ya, te ma cási rō nuū tēe cácahān sīin sīin yuhu. <sup>40</sup> Te yucún yíñúhún na sáha ró tāca jniñu.

### Jnūhun jeē ní natecu Cristo

**15** Hermano jijnáhan ró, vijna te nucūhun ni rō jnūhun jnáma ya yohó jeē ní nacani ri nuū rō. Te jnūhun ún chi je ni cajetáhú ró, te suni cáhiin nihin ró jíin. <sup>2</sup>Te suni jíin jnūhun ún te ni jnama ya rohó, te núu cáhiin nihin ró jíin jnūhun ni nacani ri nuū rō, te núu tu ní cácanđije cāha ró.

<sup>3</sup>Chi jnūhun cánuú gá jeē ni nhin maá rí ni nastéén ri nuū rō: Jeē ni jíhi Cristo siquī cuéchi yó, nájñūhun je cáhán tutu ii nde jenahán. <sup>4</sup>Te ni quindūji ya, te ni natecu yā nuū uní quivī, nájñūhun cáhán tutu ii. <sup>5</sup>Te ni nane ya nuū Pedro. Te sáa te ni nane ya nuū ndihúxí gā apóstol. <sup>6</sup>Te sáa te ni nane ya nuū vihyá gā uhūn ciento hermano jeē cáyūcu tūtú. Te sava i técu gā nde vijna, te sava i je ni jihī. <sup>7</sup>Te sáa te ni nane ya nuū Jacobo, yūcuán na te nuū ndihi ga apóstol.

<sup>8</sup>Te jeē sándihí na te ni nane ya nuū maá rí. Te nájñūhun iin jeē ní cacu yúte, súcuán cúu jeē iin sanaa-ni te ni nduu ri apóstol. <sup>9</sup>Chi tēe núu ga nuū tāca gá apóstol cúu ri, te ni nasūu tēe vāha cúu ri jeē cónaní rí apóstol, chi ni jito xeēn rī ñayuu cácanđije nuū Yaā Dios. <sup>10</sup>Te siquī jeē ni sáha Yaā Dios jeē vāha ruhū, jeē yúcuán cúu ri apóstol vijna. Te jeē ni sáha ya jeē vāha ruhū, chi tú cāha ní cúu, chi sa ni scáca ga rī jnūhun ya vēsú tāca gá tēe apóstol. Te nasūu maá rí ni sáha, chi Yaā Dios ni sáha ya jeē vāha un jíin rí. <sup>11</sup>Núu súcuán te vēsú ruhū chí tāca gá tēe ún, súcuán cánacani ri jnūhun, te súcuán ni cacandije ró.

### Jnūhun jeē natecu ndīyi

<sup>12</sup>Te jeē cánacani ri jnūhun Cristo jeē ní natecu yā mēhñu ndīyi, ¿te naun cácahān sava ró jēē ma nátecu ndīyi? <sup>13</sup>Chi núu jeē tú natecu ndīyi, te suni tu ní nátecu Cristo nuú. <sup>14</sup>Te núu jeē tu ní nátecu Cristo, te cánacani cāha rí jnūhun

ya nuú, te suni cácanđije cāha ró núu. <sup>15</sup>Chi núu jeē súcuán cúu núu, te cácuu ri tēe jeē tu cácahān ndaā jnūhun Yaā Dios, chi ni cacachi rī jeē ní nastécu Yaā Dios Cristo. Te núu jeē tú natecu ndije ndīyi, núu súcuán te tú ndaā jeē ní nastécu Yaā Dios Cristo. <sup>16</sup>Chi núu tú natecu ndīyi, te ni Cristo suni tu ní nátecu yā nuú. <sup>17</sup>Te núu tu ní nátecu Cristo, te cácanđije cāha ró te cándiso ii gā rō cuéchi ró núu. <sup>18</sup>Te núu jeē súcuán cúu núu, te suni je ni cajnahnū ndetū ñayuu ni cacandije Cristo. <sup>19</sup>Chi núu tú natecu ndīyi, te núu máá iin-ni siquī vida yáha ñūhun ni yō jeē sáha Cristo jeē vāha yohó, núu súcuán te ndahú ndasí gá cácuu yó vēsú tāca gá ñayuu, chi cácanđije cāha yó núu.

<sup>20</sup>Te tuú chi íyó ndaā jeē ní natecu Cristo mēhñu ndīyi. Te máá yá cúu jeē xihna gā ni natecu nuū tāca gá ndīyi jeē natecu. <sup>21</sup>Chi siquī jeē ni stívi iin-ni tēe Adán, te ni quejéé jíhí ñayuu. Te suni súcuán siquī jeē ni sáha iin-ni tēe Cristo, te natecu ñayuu. <sup>22</sup>Chi nájñūhun cájihī ndihi yó siquī jeē cácuu yó yúcūn Adán, suni súcuán natecu ndihi yó siquī jeē yíhi yó ndaha Cristo. <sup>23</sup>Te ná iin ná iin ndese ndíquín jnáhan máá: Xihna gā Cristo ni natecu yā, te sáa te quivī ndíji ya te natecu tāca ñayuu yíhi ndaha ya. <sup>24</sup>Yūcuán na te jinu tiempo, te snáa yā poder táca enemigo jeē cujéhnu jíin jēe ndácu jniñu jíin jēe iyó poder. Te ndihi jeē ndácu ya jniñu nuū, nacūaha ya nuū Tatá yā Yaā Dios. <sup>25</sup>Chi cánuú jēe ndacu Cristo jniñu nde quiji quivī jeē quénde Yaā Dios poder tāca jēe jíto uhū nuū Cristo, te stóho ya. <sup>26</sup>Te jeē sándihí na te snáa yā cuehyi jéhni ñayuu. <sup>27</sup>Chi cáhán tutu ii jeē sáha Yaā Dios jeē cujéhnu Cristo siquī ndihi, te cuatáhú núu yā. Te jeē cahán jeē cujéhnu ya nuū ndihi-ni, te jíiní vāha yó jēē maá Yaā Dios ma quíhi ya ndaha Cristo, chi Yaā Dios cúu jeē ni chíhi táca un ndaha Cristo. <sup>28</sup>Te ná ni

quīvi ndīhi ún ndaha Cristo, yūcuán na te suni máá Cristo jeē cúu ya Sēhe, quīvi ya ndaha Tátá yā, Yaā jeē ní chihi tācá un ndaha ya. Te súcuan te máá Yaā Dios jniī ya ndīhi-ni.

<sup>29</sup> Te íyó ñáyuu cájendute jehē ndīyi. Te núu tú natecu cuiiti ndīyi, ¿te najehē cájendute i jehē ndīyi núu súcuan?

<sup>30</sup> Te ruhū jijnáhan ri, ¿najehē cúu jeē ndiquivī cájendeyí ni rī jító ri jnūndóho cuu rī, te núu tú natecu ndīyi? <sup>31</sup> Hermano, nájñuhun íyó ndāā jeē cúsiī ni rī siquī jeē cácandije ró Jítóho yō Jesucristo, suni súcuan íyó ndāā jeē ndiquivī nducú ñáyuu cahni ruhū siquī jniīnu ya. <sup>32</sup> Te jeē ní ndoho ri ni casáha tēe xeēn ñuu Efeso, jeē cácuu de nájñuhun quití xéén, ¿te na vé nihín rī siquī un núu súcuan? Chi núu tú natecu ndīyi, te cuu cahān yō nájñuhun áchí iin jñuhun: Na cúsiī ni yō caji yō coho yó, chi sanaa te sajnē te cuu yō, achi yō nuú.

<sup>33</sup> Ma cuáha ró jñuhun stáhú ñáyuu rohó. Chi áchí iin jñuhun: Núu cájica ró jín ñáyuu neé, te stívi i róhó jeē tuá caca ndāā rō. <sup>34</sup> Nachuhun ni rō jijnáhan ró, te sáha ró jniīnu ndāā, te ma sáha ga rō cuēchi. Chi sava ró tu cájini cuiiti rō ndese Yaā cúu Yaā Dios. Súcuan cáhán rī návāha na cúcanu rō.

### Ndese natecu ndīyi

<sup>35</sup> Te sanaa te cahān iin ró: ¿Ndese natecu ndīyi? ¿Ndese coo yiqui cúñu i? achi rō. <sup>36</sup> Tu jécuhun cuiiti ni rō núu súcuan. Chi cúu nájñuhun jeē cátají ró táca tata chíji ñuhun návāha nane yucū i. <sup>37</sup> Te tata jeē quívi chíji ñuhun, núu trigo chí inga tata, chi nasūu yúcū cúu, chi máá núnī-ni cúu. <sup>38</sup> Te cuéé gá te cane, chi Yaā Dios ni jēhe ya yucū tata ún, ndese ni nujnahan ni maá yá, te ná iin ná iin tata chí sñn sñn cáa yucū ni sáha ya. <sup>39</sup> Te suni súcuan tācá yiqui cúñu, chí tú inuú cándāa. Chi sñn cáa ñayuu, te sñn cáa quití, te sñn cáa saa, te sñn cáa

chācá. <sup>40</sup> Te suni súcuan cúu tāca jéē iin andiví jín táca jéē iyó ñáyiví. Te sñn luu cáa jeē iin andiví, te sñn luu cáa jeē iyó ñáyiví. <sup>41</sup> Te sñn ndíndēe níandii, te sñn ndíndēe yóō, te sñn ndíndēe táca quími. Te tācá iin iin quími chí suni sñn sñn ndíndēé. <sup>42</sup> Te suni súcuan coo jín ndīyi jeē natecu. Ndīyi jeē chíndūji yó chí téhyū, te jeē nastécu yā chí ma cúu gā. <sup>43</sup> Jeē chíndūji yó chí ndáhú cáa, te jeē nastécu yā chí luu cujéhu. Jeē chíndūji yó chí tú na fuerza, te jeē nastécu yā chí coo fuerza. <sup>44</sup> Jeē chíndūji yó chí iin yiqui cúñu cuenta ñayiví cúu, te jeē nastécu yā chí iin yiqui cúñu cuenta Espíritu yā cúu. Chi íyó yiqui cúñu cuenta ñayiví, te suni íyó yiqui cúñu cuenta Espíritu.

<sup>45</sup> Chi súcuan yósó núu tútu ii: Adán, tēe xihna ñúhún, ni cuvāha de jín vida cuenta ñayiví, áchí. Te Cristo cúu nájñuhun inga Adán uū, te máá yá cúu Espíritu jeē jéhe vida. <sup>46</sup> Te nasūu yiqui cúñu cuenta Espíritu cúu jeē ní cuvāha xihna gā, chí sa suhva yiqui cúñu cuenta ñayiví, te sáá te nduu cuenta Espíritu. <sup>47</sup> Te cuenta ñayiví cúu tēe xihna ñúhún, chí ni cuvāha de jín tícachā ñuhun. Te Adán uū jeē cúu máá Jítóho yō, chí nde andiví ní quiji ya. <sup>48</sup> Te ñayuu ñayiví yáha, chí cúu i jñáhan Adán jeē ní cuvāha jín tícachā ñuhun. Te ñayuu jeē quívicoo andiví, chí ndúu i nájñuhun máá Yaā ní quiji nde andiví. <sup>49</sup> Chi jeē cáa yó nájñuhun tēe ni cuvāha jín tícachā ñuhun, suni súcuan coo yó nájñuhun cáa máá Yaā ní quiji nde andiví.

<sup>50</sup> Jñuhun yáha cástuhun rí nuū rō jijnáhan ró, hermano, jeē yiqui cúñu yó cuenta ñayiví yáha, ma cúu quívi ñuu nuū ndácu Yaā Dios jniīnu. Chi jeē jihí cúu, te ma cúu quívi nuū cótecu níf cáni. <sup>51</sup> Te cúni rī jeē na jécuhun ni rō jñuhun yáha jeē ní yisāhí: Nasūu ndīhi yó cuu, te ndīhi yó chí nasāma yiqui

cúñu yō. <sup>52</sup>Chi quivī jeē cuécu sandīhí na trompeta, te ñin yachī-ni, nájñuhun ñin jeē nácuenī-ni yó, te nasama ya yohó. Chi cuecu trompeta un, te natecu tāca ndíyī jeē ma cúū gā i. Te tāca yó jeē cátecu yō quivī ún, chi nasama ya yiqui cúñu yō. <sup>53</sup>Chi jeē tehyú yāhá, cánuú nucūhun jeē ma téhyú gā. Te jeē jihí cánuú nucūhun jeē ma cúū cuiti gā. <sup>54</sup>Chi jeē jihí jeē tehyú, chi quiji quivī jeē nucūhun jeē ma cúū gā ma tehyú gā. Yūcuán na te cundaā jñuhun yósó núu tútu ii: Jín poder yā ni snáā yā cuehyī jéñni ñayuu. <sup>55</sup>Cuehyī jéñni yóhó ¿ndese ga cuu sáha xeēn jín yó? Chi natecu yō. ¿Te ndese ga cundeyí jín yó? Chi snáā yā. Achí tutu. <sup>56</sup>Chi cuēchi cúu jeē sáha jeē cundeyí cuehyī jéñni ñayuu. Te ley yā jenahán sáha jeē náne cuēchi siquī yō. <sup>57</sup>Te na cútahū yō nuū Yaā Dios, chi jín máá Jítoho yō Jesucristo sáha ya jeē cundeyí yó siquī cuēchi jín siquī jñuhun cuu yō.

<sup>58</sup>Jeē yúcuán, ñáni maní, cuiñi nihin ró te ma cáca yátá ró jijnáhan ró. Te níni na sájñiñu vāha ró jín jñiñu máá Jítoho yō. Chi je cájini ró jeē tu casájñiñu cāha ró jín máá Jítoho yō.

### Siquī jeē cáquin i xūhún cuu tācá hermano

**16** Te vijna te cahān ri siquī xūhun jéē cáquin ró cuu hermano cácan-díje cándoho ndáhú. Suni na sáha máá ró jijnáhan ró nájñuhun ni ndacu ri nuū tāca grupo ñayuu cácan-díje ichi Galacia. <sup>2</sup>Tācá domingo te ná ñin ná ñin ró chu-vāha sñin ró jecu xūhún, núu ndese ni nihin maá ró, návāha quivī jeē jinú ri nuū ró te je íyó túhva. <sup>3</sup>Te jeē jeé ri, te cuāha ri carta nuū tāca tée jeē nácāji ró, te tají rí de quingoo de nuū tācá hermano cáyūcú Jerusalén, quisiáha de xūhun jéē ní casocō ró. <sup>4</sup>Te núu íyó váha jeē quihín ri, te suni quihín ri jín de jijnáhan de.

### Jeē cahán Pablo siquī jeē quícondéhé de ñayuu cácan-díje

<sup>5</sup>Te jeē jeé ri nuū ró jijnáhan ró, te jini núhún jeē xíhna gā jeē ri región Macedonia, yūcuán na te jeē ri ñuu ró Corinto. <sup>6</sup>Te sanaa te quendōo ri jín ró jijnáhan ró jecu tiempo, chí sanaa te coyūcu yó ní tiempo mijin. Yūcuán na te cuu chindéé ñáhán ró ruhū, núu ndé chi quihín tucu ri. <sup>7</sup>Chi tu cúní ri jeē ri nuū ró vijna te yāha yachí ri quihín ri, chi núhún ni ri jeē quendōo ri jín ró jecu tiempo, te núu cuāha Jítoho yō jñuhun. <sup>8</sup>Te cone ri ñuu Efeso yāhá nde na yāha quivī Pentecostés. <sup>9</sup>Chi coo cuehē ñayuu scandíje ri, te vāha quihín jñiñu Jítoho yō. Te suni íyó cuéhē ñayuu cácuu contra.

<sup>10</sup>Te núu na jéé Timoteo, te sáha ró jéé coo sñi ni de mēñu ró, te ni ñin ma cáni ni de siquī. Chi suni jñiñu máá Jítoho yó sáha de, nájñuhun máá rí. <sup>11</sup>Núu súcuán te ni ñin ró má sajeé ni ró nuū de. Chi sa suhva chindéé ñájñáhan ró jín de jeē na quihín gā de, te coo ndeyí coo sñi ni de, návāha ndiji de coto jnáhan ri jín de. Chi ruhū jín sava ga hermano cándetu ri de.

<sup>12</sup>Te hermano Apolos chi ni cahān ndahú rí jín de jeē na jéé de jín sava ga hermano, condéhé de róhó. Te ni jeni ni de jeē ma cúu jeē de vijna. Te núu na núne de te jeē de.

### Saludo jeē sándihí

<sup>13</sup>Ndito coo ni ró jijnáhan ró, te cuiñi nihin ro jín jñuhun cácan-díje ró. Te téyí na cóo ni ró, te na cóo fuerza ini ró. <sup>14</sup>Te tāca jéé casáha ró, na sáha ró jín jñuhun cúndáhú ni jnáhan.

<sup>15</sup>Hermano, cájini ró jeē xíhna gā ñayuu vehe Estéfanos ni cacandíje ichi Acaya. Te ni cajēhe i máá i nuū jñiñu jeē chindéé ñáhán i tācá hermano cácan-díje. <sup>16</sup>Te cúní ri jeē suni máá ró jijnáhan ró,

cuatáhú váha ró ñáyyu casáha súcuan, jíin táca ñáyyu cachindéé ñájnáhan te cásájniñu siquī jniñu ya. <sup>17</sup> Cúsiñi ni rī jeē ní quiijicoo Estéfanas jíin Fortunato jíin Acaico, chi tēe yáha ni cajejniñu de nuū rī jehē rō jeē tu ní cáhiyo ró jíin rí. <sup>18</sup> Chi ní ndundeyí ni rī, te suni súcuan máá ró jijnáhan ró, ni casáha de. Te cánúu cuajnúhún ró táca tēe cándāa súcuan.

<sup>19</sup> Sándeyí ni rō jijnáhan ró, áchí táca grupo ñayuu cácandíje cáyūcu Asia. Aquila jíin Priscila jíin ñáyyu cácandíje jeē cándutútú vehe de, cácahān i jeē sándeyí ndasí ni rō jíin jnúhun máá Jítoho yō. <sup>20</sup> Te tācá hermano cácahān i

jeē sándeyí ni rō. Te jeē cahán rō jíin táca jnáhan ró, te yíñúhún techūhu ró ndaha i.

<sup>21</sup> Ruhū Pablo, jíin ndaha máá rí tēe rī jnúhun yáha jeē na sándeyí ni rō jijnáhan ró.

<sup>22</sup> Te núu ndé iin tu íyó mánī jíin Jítoho yō Jesucristo, te na jnáhnú ndetū i núu súcuan. Te na cáhán yō: Jítoho ná, cúní na jēē yachi ndiji ní.

<sup>23</sup> Te ñúhun ni rī jeē máá Jítoho yō Jesucristo na sáha ga yā jeē váha róhó jíjnáhan ró. <sup>24</sup> Te manī rī jíin ró jijnáhan ró jēē cácandíje ró Cristo Jesús. Súcuan na cóo. Amén.



## CARTA UU JEE NI TEE SAN PABLO APOSTOL NUU ÑAYUU ÑUU CORINTO

**1** Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jñūhun ya. Te ndindúú rí jíín hermano yō Timoteo cátee ri carta yáha cuájeē nuū rohó hermano ñuu Corinto jeē cácanđíje ró Yaā Dios, jíín núū ndíhi róhó jéē cáyíhi ndaha Yaā Dios jeē cáyūcu níí cáhnu Acaya. <sup>2</sup>Te cáñuhun ni ri jeē Tatá yō Yaā Dios jíín Jítóho yō Jesucristo na sáha ga yā jeē váha róhó te sáha ya jeē coo ndeyí coo sīi ni rō.

### Siquī jeē ní ndoho Pablo jñúndóho

<sup>3</sup>Na cáhán yō jeē yóhoyo cújéhnu Yaā Dios, Yaā cúu Tátá máá Jítóho yō Jesucristo. Chi máá yá cúu Tátá yō jeē cundáhú ni yohó, te níí sáha ya jeē ndúsīi ni yō. <sup>4</sup>Chi sáha ya jeē ndúsīi ni yō siquī tāca jñúndóho ndóho yó, návaha suni cuu sáha máá yó jeē ndúsīi ni jnáhan yó jéē cándoho jñúndóho. Chi nájnūhun ni sáha ya jeē ndúsīi ni máá yó, suni súcuan sáha yó jéē ndúsīi ni i. <sup>5</sup>Chi jeē ndóho yó cuehē jñúndóho nájnūhun ni ndoho Cristo, suni súcuan nihīn yō cuehē jñūhun ndusīi ni, sáha Cristo. <sup>6</sup>Jeē yúcuan núu cándoho ri jñúndóho te súcuan te cuu sáha ri jeē ndúsīi ni rō te quendō vāha ga anuá rō. Te jeē sáha Yaā Dios jeē ndúsīi ni rī, suu sáha tucu jeē ndúsīi ni máá ró, te quéndō vāha ga anuá rō. Te súcuan te nihīn rō fuerza jeē cuándeýí ni rō jíín tāca jñúndóho nájnūhun cándoho ri. <sup>7</sup>Te cáñuhun ndasí ni rī jeē cúu róhó, chi cájini rī jeē nájnūhun cándoho ró jñúndóho jíín rí, suni súcuan ndusīi ni rō jíín rí sáha máá Yaā Dios.

<sup>8</sup>Hermano, cácuni rī jeē na cúni rō jinnáhan ró ndese ni candoho ri ichi Asia.

Chi yóhoyo xeēn jñúndóho ni cajito ri, nde je yajni tuá canda ri, te ni jeni ni rī jeē cuu rī nuú. <sup>9</sup>Te siquī jeē ní cajehnde ni rī cuu rī, te yúcuan ní sáha jeē ní cajecūhun ni rī jeē ma ténuū rī máá rí chi tú jniñu ri, chi sa suhva Yaā Dios jeē nastécu ndíyi tenuū rī. <sup>10</sup>Chi máá yá ni scácu ruhū jijnáhan ri nuú jñúndóho xeēn jeē jé yajni cuu rī nuú, te suni súcuan scácu ya ruhū vijna. Te ñúhun ni ri jeē suni scácu tucu ya ruhū ichi núú gā. <sup>11</sup>Te suni na chíndéé ñáhán ró rúhū jijnáhan ri jeē cacān tahú rō jehē rī. Chi núu cuehē ñayuu cacān tahú jehē rī, te suni cuehē i cuu nacuatáhú jehē rī jeē ni sáha ya jeē váha ruhū.

### Jeē ní cucuéé Pablo quihīn de ñuu Corinto

<sup>12</sup>Iyó iin jeē sáha jeē cácusīi ni rī: Chi vāha íyó ni anuá rī jeē váha ndoo te ndaā ni cajica ri nuú ñayuu ñayiví, te víhyá gā nuú máá ró jijnáhan ró. Chi siquī jeē váha ni Yaā Dios, te ni chindéé ñáhán yá ruhū, te nasūu siquī jéē ndichí máá rí cúu jeē ní cajica ri súcuan. <sup>13</sup>Te jñūhun cátee ri nuú tāca carta rī, chi máni jeē cúu cahu ró te jecūhun ni rō cúu. Te ñúhun ni ri jeē jecūhun vāha ga ni rō, <sup>14</sup>nájñūhun je cájecūhun ni rō jecu. Te súcuan te cuu cusīi ni rō siquī rī quiví ndíji Jítóho yō Jesús, nájnūhun cácusīi ni rī siquī máá ró.

<sup>15</sup>Te siquī jeē súcuan ni cucáhnu ni rī, te jeē yúcuan ní jeni ni rī jeē núu na quihīn rī Macedonia te jeē rī nuú máá ró xihna gā, návaha cusīi ni rō jeē jécondēhe rí rohó úū jínu núú. <sup>16</sup>Chi ni jeni ni rī jeē jécondēhe rí rohó, te yāha ri quihīn rī Macedonia, te jeē nándicó rí Macedonia te ndíji tucu ri nuú rō. Yūcuán na te cuu chindéé ñáhán ró ruhū jeē quihīn rī ichi Judea nuú. <sup>17</sup>Te jeē súcuan ni jeni ni rī, ¿te á tée tu nácani vāha ni cúu ri jeē tu ní jéé rī nuú rō, chí naún? ¿A cájini ni rō jeē cúu ri nájnūhun

ñayuu ñayivi jéē yachi cahán jeē cuu, yūcuán na te tuú, chí naún? <sup>18</sup>Tuú chi máá Yaā Dios jíni yā jeē tu cáhán ri jíin ró jeē cuu, te yachi nácahān ri jeē ma cúu. <sup>19</sup>Chi ruhū jíin Silvano jíin Timoteo ni canacani ri jnūhun Jesucristo Séhe Yaā Dios nuū rō jijnáhan ró. Te máá yá tu cáhán yā jeē cuu te nacahān tucu ya jeē ma cúu. Chi squícu ya jeē cahán yā. <sup>20</sup>Chi ndihi jeē ni jéjnūhun Yaā Dios, squícu máá Cristo. Te jeē yúcuán cácahān yō jeē yóhoyo luu cújéhnū Yaā Dios, te cácahān yō Amén, chi ndihi squícu Cristo Jesús. <sup>21</sup>Te Yaā Dios cúu jeē sáha jeē ruhū jijnáhan ri jíin róhó jíjnáhan ró, cáhiin nihin yó jíin Cristo, te ni sándoo ya yohó jéē cuajniñu yó núu yā. <sup>22</sup>Te suni ni jēhe ya Espiritu yā jeē cóndee ini anuá yō, te cúu ya nájnūhun iin sello jeē steén jeē cúu yó séhe Yaā Dios. Te sáha Espiritu jeē iyó ndāā ni yō jeē cuāha Yaā Dios tahū yō.

<sup>23</sup>Te jeē ná tu jeē ri nuū rō ñuu Corinto, nájnūhun ni jeni ni ri, suu cúu siquī jeē tu ní cúní ri cuxeēn ri nuū rō jeē tu cásáha vāha ró. Te máá Yaā Dios cúu Yaā jíni jeē cahán ndaā ri. Te íyó vāha jeē na cúu ri te núu tu cáhán ndaā ri. <sup>24</sup>Te nasūu jéē cáconi ri ndacu nihin ri jniñu nuū rō siquī jnūhun cácañdije ró yá, chi je cáhiin nihin ro jíin jnūhun ún. Chi sa suhva cáconi ri chindéē ñáhán rí rohó jéē na cúsiī gā ni rō.

**2** Núu súcuan te ni jeni ni ri jeē ma jéé ri inga jínu nuū rō jíin jnūhun cuxeēn ri te cucuíhyá ni rō sáha ri. <sup>2</sup>Chi núu cucuíhyá ni rō sáha ri, ¿te ndé ñayuu sáha jeē cusī ni maá rí? Tuá na inga ñayuu, chi máni máá róhó, te ndese cuu te núu ni sáha ri jeē cucuíhyá ni rō. <sup>3</sup>Te jeē yúcuán cúu jeē ní tee ri carta un núu rō, návāha nacani ni rō siquī cuéchi ró sáha, te ma cucuíhyá ni rō sáha cuéchi ró quívi jeē ri nuū rō. Chi sa suhva sáha ró jéē cúsiī ni ri. Te jíni vāha ri jeē núu cusī ni ri, te suni ndihi ró jíjnáhan ró

cusiī ni rō. <sup>4</sup>Te jeē ní tee ri carta un núu rō, te yóhoyo ni nacani ni ri siquī rō, te ni jnahuhū ni ri, te nde ndahyú ri ni tee ri. Te tu ní téē ri jeē sáha ri jeē cucuíhyá ni rō, chi sa suhva návāha cuni rō ndese yóhoyo maní ri jíin ró.

### Jeē íne cáhnu ni Pablo nuū téē ni sáha cuéchi

<sup>5</sup>Te jeē ní cucuíhyá ni ri ni sáha téē jeē ni sáha cuéchi ún, te nasūu máa-ni ri, chi suni nde máá ró jijnáhan ró ni sáha de jeē ní cacucuíhyá ni rō jecu. Te cáhán ri jeē jecu-ni, chi tu cúní ri cuxeēn ndasí rí. <sup>6</sup>Te jíin jéē ní cacuxeēn rō nuū de ná ni candutútú ró, te jíin yúcuán-ni te ni cuu-ni. <sup>7</sup>Te vijna chi jíni ñúhún jeē cóne cáhnu ni rō nuū de, te sáha ró jéē ndúsiī ni de, chi sanaa te caa ga cucuíhyá ni de, te ma ndúsiī gā ni de. <sup>8</sup>Núu súcuan te cáhán ndahú rí jíin ró jijnáhan ró jéē steén tucu ró jéē iyó máni rō jíin de. <sup>9</sup>Chi jeē siquī jniñu yáha cúu jeē ní tee ri carta un núu rō, návāha coto ndee ri rohó núu cuatáhú vāha ró jniñu ndácu ri nuū rō. <sup>10</sup>Núu súcuan te núu íne cáhnu ni rō nuū ñayuu, te suni súcuan ruhū. Chi jeē íne cáhnu ni ri nuū ñayuu núu ni sáha i cuéchi, te sáha ri súcuan siquī jeē maní ri jíin ró jíto jínúu Cristo. <sup>11</sup>Chi cánuú cone cáhnu ni yō, chi tu cúní yō jeē nihín Satanás cuéchi siquī yō, chi je jíni vāha yó ndese ndúcu un stáhú yóhó sáha yó cuéchi.

### Jeē tu ní íyo nayúu ni Pablo ini ñuu Troas

<sup>12</sup>Ná ni jehēn ri ñuu Troas jeē nacani ri jnūhun Jitoho yō Cristo, te vāha ni sáha ya jeē ni íyo modo jeē nacani ri jnūhun ya. <sup>13</sup>Te vésú súcuan te tu ní íyo nayúu ni anuá ri, chi tu ní níjnáhan ri jíin hermano yō Tito. Yūcuán na te ni nacuatáhú rí nuū ñayuu yūcuán, te cuanan-ducú rí de ichi Macedonia.

### Jnūhun jeē cujéhnū ndúú yó jíin Cristo

<sup>14</sup>Te na cútahū yō nuū Yaā Dios, chi níní ndéca vāha ya yohó cuángoo yó jíin Cristo Jesús, te ndúú yó jíin yá jeē cujéhnū ndasí yá snāā yā poder ndihi enemigo yā. Te jéjníñū ya yohó jéē scuité núu yó jnūhun ya tācá-ni lugar, nájñūhun jíté núu ñin xicō asín. <sup>15</sup>Te cúu yó nájñūhun ñin sije jeē jeén asín nuū Yaā Dios sáha Cristo. Te nájñūhun jeē jinú xicō un núu ñayuu cācu ánuá jíin núu ñayuu jnahnū ndetū. <sup>16</sup>Nuū ñayuu jnahnū ndetū chi cúu yó nájñūhun ñin xicō jeē cúu i sáha, te nuū ñayuu cācu ánuá chi cúu yó nájñūhun ñin xicō vāha jeē cótecu i sáha. Te ni ñin yó ma cánda yó sáha yó jniñū yáha, te núu ma chindéé ñáhán yá yohó. <sup>17</sup>Te ruhū jijnáhan ri, tu cásáha ri nájñūhun cásáha cuehē tēe jeē cánducú de nihin de xūhun síquī jnūhun Yaā Dios. Chi sa cánacani ndaā ri jnūhun ya, chi máá Yaā Dios ni tají ruhū, te máá yá jiní jeē cánacani ndaā ri síquī jeē cáncandíje ri Cristo.

### Jnūhun síquī contrato jeē

**3** Te jeē cácahān rī súcuan, ¿te á cá-jeni ni rō jeē cánducú tucu ri cahān rī jeē vāha ga tēe cácuu ri, chí naún? ¿Te chí jíni ñūhūn jéē steén rī carta recomendación nuū rō, chí jéē cacán rī cuāha ró núu ri jijnáhan ri, nájñūhun cásáha sava i? <sup>2</sup>Tuú chi máá-ni ró cácuu nájñūhun ñin carta recomendación rī. Te jeē ñūhun ni rī jeē ní cacandíje vāha ró ni sáha ri, suu cúu nájñūhun jeē yosó jnūhun carta un ini anuá rī. Te ndihi ñayuu chi nájñūhun cáhu i, cúu jeē jiní i ndese ni nasāma ró. <sup>3</sup>Chi máá ró cácuu nájñūhun ñin carta jeē ní tee Cristo te cáscaca ri. Te nasūu jíin tinta ni tee ya, chi sa suhva jíin Espíritu Yaā Dios, Yaā técu. Te nasūu núu tabla yuū nájñūhun ni tee ya ley yā, chi sa suhva nuū anuá ñayuu ni tee ya.

<sup>4</sup>Te cácahān rī súcuan, chi cácucahūni rī rī Yaā Dios síquī jeē ni sáha Cristo. <sup>5</sup>Te nasūu jéē cájeni ni rī jeē cúu canda máá rī sáha ri jniñū ún. Chi sa suhva máá Yaā Dios sáha jeē cuu síquī ri. <sup>6</sup>Te máá yá ni sáha jeē cuu cuajniñū vāha ri síquī contrato jeé yá. Te contrato yáha tu cáhán jeē síquī yó ley jeē ní tee jíin letra, chi sa suhva jeē caca yó jíin vida jeé, suu jeē ni jéhe Espíritu yā. Chi contrato ley jeē yosó jíin letra, jnahnū ndetū ñayuu sáha. Te jeē sáha máá Espíritu cúu jeē cótecu yō níí cáni.

<sup>7</sup>Te ley jenahán jeē ni jéhe ya nuū Moisés, ni yosó letra nuū tabla yuū. Te yōhoyo ni cujéhnū, te ni ndindéé ndasí ni sáha, te nde Moisés ndíi nuū de ni sáha. Te tu ní cúu coto vāha ñayuu Israel nuū de ni sáha. Te vēsú súcuan te cuéé-ni cuéé-ni ni ndahvā jeē ndíndéé núu de. Te núu súcuan ni cujéhnū ndasí ley jeē sáha jeē cuu ñayuu te jnahnū ndetū i, <sup>8</sup>te sa víhyá gā cujéhnū ndasí gá jnūhun cotecu yō jeē jéhe Espíritu nuū yō. <sup>9</sup>Chi núu yōhoyo ni cujéhnū ley un jéē jnahnū ndetū ñayuu sáha, te sa víhyá gā cujéhnū jnūhun jeē ndáhva Yaā Dios cuéchi yó. <sup>10</sup>Chi ley un jéē ní cujéhnū nde saá, tuá cujéhnū cuítí, síquī jeē cujéhnū ndasí gá jnūhun Espíritu jeē iyó vijna. <sup>11</sup>Te núu súcuan ni cujéhnū ley jeē ní fyó jecu-ni tiempo, te sa cujéhnū ndasí gá jnūhun jeē coo níí cáni.

<sup>12</sup>Te jeē súcuan cáñuhun ni rī, jeē yúcuan cáhiyo téyí ni rī nácani ri jnūhun yáha. <sup>13</sup>Chi tu cásáha ri nájñūhun ni sáha Moisés jeē ní jesi de ñin sahma nuū de, návāha tú coto ñayuu Israel ndese cuandahvā jeē ní ndindéé núu de. <sup>14</sup>Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chi nájñūhun jési sahma un núu jeē níjnūmí i, te tu cújiyo cuítí. Chi nde jeē candíje i Cristo, yūcuán na te cujiyo. <sup>15</sup>Te suni súcuan nde vijna núu cácahu i

tutu ley Moisés, te nájñuhun jeē jési ñin sahma nuū jeē nǎjnūnǎi i. <sup>16</sup>Te jeē násāma ini ñin ñayuu quǎvi i nuū maá Jítóho yō Cristo, yūcuán na te cújiyo-ni jeē jési ún. <sup>17</sup>Chi Jítóho yō cúu maá Espírítu. Te nuū ñne Espírítu maá Jítóho yō, yūcuan cúu nuū iyó libre ñayuu jeē tuá yíhi i chíji ley jenahán. <sup>18</sup>Te jeē yúcuán maá yó jijnáhan yó, tuá jési nuū jeē nǎjnūnǎi yō. Chi cácuu yó nájñuhun espejo jeē jéhe nduva, cúu jeē cájica ndaá yō te suu stéén ndese yóhyo luu cújéhnú maá Jítóho yō. Te maá yó tāca quǎvi cuanasāma yó cuanduu luu ga anuá yō nájñuhun cáa maá yá. Chi maá Jítóho yō jeē cúu ya Espírítu, súcuan sáha ya jíin yó.

**4** Núu súcuan te tu ndínuu ni rǎ cá-nacani ri jñuhun ya. Chi siquǎ jeē ní cundáhú ni yā ruhū jijnáhan ri te ni jéhe ya jniñu yáha nuū rǎ. <sup>2</sup>Te tu cásáha ri jniñu néé jéé cúcanu yō sáha, ni tu cájica cuu ri jíin jñuhun ndíchí stáhú, ni tu cásama ri jñuhun Yaā Dios. Chi sa suhva cácahān rǎ máni jñuhun ndaá. Te súcuan te cuu cuni tāca ñayuu ini anuá i jeē cácahān ndaá rǎ jíto jínúú Yaā Dios. <sup>3</sup>Te núu íyó ñayuu tu jécūhun ni jñuhun jnama ya yohó jéé cánacani ri, te súcuan cúu nuū máni maá ñayuu jnahnū ndetū. <sup>4</sup>Te jeē tu cácañdǎje i, te maá jéxeén jeē ndácu jniñu ini ñayivi yáha, ní jesi nuū jeē nǎjnūnǎi i, návāha ma ndǎndēe jñuhun Cristo ini anuá i, te ma cúni i jeē yóhyo luu cújéhnú Cristo, Yaā jeē ínuú cáa jíin Yaā Dios. <sup>5</sup>Te jeē cánacani ri jñuhun, te nasūu jñuhun maá rǎ, chi sa suhva jñuhun Jítóho yō Jesucristo cánacani ri. Te maá rǎ chi cácuu ri mozo-ni nuū rō jijnáhan ró jéé siquǎ jeē manǎ rǎ jíin Jesús. <sup>6</sup>Chi ná ni sáha Yaā Dios ñayivǎ te ni cahān yā jeē na cúndijin nuū néé. Te suni súcuan ni sáha ya jeē ní cundijin nuū anuá yō jeē cájecūhun ni yō siquǎ Jesucristo, ndese ndǎndēe núu yā, cúu jeē yóhyo luu cújéhnú ya nájñuhun cúu Yaā Dios.

### Jeē cándiquǎn yō jñuhun cácañdǎje yó yá

<sup>7</sup>Te tāca jñuhun yáha jeē yóhyo luu cújéhnú, chi nájñuhun jeē ñuhun ini ñin quǎsi ñuhun. Chi cácuu yó nájñuhun quǎsi ñuhun, chi tú na fuerza yō. Te jeē yúcuán cájini vāha ri jeē maá Yaā Dios cúu jeē jéhe poder siquǎ jñuhun yáha jeē yóhyo luu cújéhnú, te nasūu fuerza maá rǎ cúu. <sup>8</sup>Te jeē yúcuán, vēsú tāca lado cájito ri jñúndóho, te tu sáha jeē ma ndúsiǎ gā ni rǎ. Te vēsú cácuuñhyá ni rǎ siquǎ jñúndóho, te cáñuhun ni rǎ jeē quee vāha jniñu rǎ. <sup>9</sup>Te vēsú cájito xeén ñayuu ruhū, te maá yá tu stóo ya ruhū jijnáhan ri. Te vēsú cánducú i snáa i ruhū jíin jniñu sáha rǎ, te ma cúu. <sup>10</sup>Te ndéni cúu nuū cuángoo rǎ, te nájñuhun ni ndoho Jesús jeē ni jíhi yā, suni súcuan cándoho ri jeē jé yajni cuu rǎ, návāha suni cuu stéén rǎ fuerza Jesús jeē técu yā ini yiquǎ cúñu rǎ. <sup>11</sup>Chi jeē níni cátecu rǎ, te tāca quǎvi je yajni cahni ñayuu ruhū jeē siquǎ Jesús. Te súcuan te cájito ñayuu jeē técu Jesús ini yiquǎ cúñu rǎ jeē cúu. <sup>12</sup>Núu súcuan te ruhū jijnáhan rǎ, níni cúu jeē jé yajni cuu rǎ siquǎ jñuhun ya, te yúcuán sáha jeē cotecu maá ró ní cáni jijnáhan ró.

<sup>13</sup>Te yósó núu tútu ii: Ni candǎje ri te jeē yúcuán ní cahān rǎ, achí. Te suni jeē cácañdǎje maá rǎ cúu jeē cánacani ri jñuhun ya. <sup>14</sup>Chi cájini rǎ jeē maá Yaā jeē ní nastécu Jítóho yō Jesús, suni súcuan nastécu yā ruhū, te sáha ya jeē ñin cáhnu ni cuiñi ndíhi yó núu yā. <sup>15</sup>Chi tāca jñúndóho yáha cándoho ri návāha coo vāha ró jíijnáhan ró. Te súcuan te cayā cuehē gā ñayuu jeē sáha ya jeē váha i. Yūcuán na te suni yóhyo cuehē i nacuatáhú i nuū Yaā Dios, te cújéhnú ga yā sáha.

<sup>16</sup>Jeē yúcuán cúu jeē tu ndínuu ni rǎ, te vēsú cuandíhi fuerza yiquǎ cúñu rǎ, te sa suhva cuanduu fuerza gā anuá rǎ

tāca quívi. <sup>17</sup> Chi jnündóho jeē ndóho yó ñayívi yáha, tú-ni xeēn cúu, te yachí yáha. Te sáha jeē nihín yó ñin tahū jeē cujéhnū yó ní cáni jeē cáa ndasí gá vésú jnündóho ún. <sup>18</sup> Te tu táñúhún yó nuū tāca jnündóho jító yó núu vijna, chi sa suhva táñúhún yó nuū tāca jéē váha jeē tu jító yó núu vijna. Chi tāca jéē jító yó núu vijna, chi yachí ndíhi, te tāca jéē tu jító yó núu, chi coo ní cáni.

**5** Chi yiquí cúñu yó jeē ndeé yó ñayívi yáha, cúu nájñuhun ñin vehe jeē náā. Te cájini yó jeē núu na náā, te cuáha Yaā Dios ñin yiquí cúñu jeé, te suu cúu nájñuhun ñin vehe jeē coo ní cáni ichi ándiví. Te nasūú ñin vehe jeē sáha ñayuu cúu, chi jeē sáha Yaā Dios cúu. <sup>2</sup> Te níni jéē ndeé yó vehe yáha jeē cúu yiquí cúñu yó, te cájitū ni yó sáha, chi yóhyo cúní yó jeē núcūhun yó yiquí cúñu jeé yó nde andiví. <sup>3</sup> Chi jeē núcūhun yó un, te ma cóo máá na anuá yó jeē náā yiquí cúñu yó yáha. <sup>4</sup> Chi níni jéē iyó gá yó ñin vehe yiquí cúñu yó yáha, te jítú ni yó te cúcuíhyá ni yó. Te nasūu jéē cuní yó jeē stóo yó yiquí cúñu yó te coo máá-ni ánuá yó. Chi sa suhva cúní yó nucūhun yó jéē jeé, náváha ndahvá yiquí cúñu yó jeē náā, te coo máá jéē cótecu ní cáni. <sup>5</sup> Te Yaā Dios cúu jeē ni sáha ya jeē súcuan coo yó. Te ni jēhe ya Espíritu yā jeē cóndee ñin anuá yó, te sáha Espíritu jeē iyó ndāā ni yó jeē cuáha Yaā Dios tahū yó.

<sup>6</sup> Núu súcuan te níni cúu jeē cácuahū ni rí. Chi cájini rí jeē níni ndeé gá rí chíji yiquí cúñu yáha, te jícá cúu rí jíin núu ndeé máá Jítóho yó. <sup>7</sup> Chi vijna chi cácuahū rí jeē iyó yá jíin rí, vésú ná tu coto rí nuū yā. <sup>8</sup> Te cácuahū ni rí, chi sáha rí cuenta jeē váha ga núu na quéndā rí chíji yiquí cúñu yáha te quihín rí condee rí jíin máá Jítóho yó. <sup>9</sup> Jeē yúcuán cúu jeē cánducú ndeéyí rí sáha rí jeē cusí ni yá jíin rí, vésú núu ndeé gá rí yiquí cúñu

rí chí vésú núu condee rí jíin yá. <sup>10</sup> Chi cánuú jéē ndíhi yó cuiñi yuhu mesa Cristo jeē sándaā yā jniñu yó. Te ná ñin ná ñin yó níñin yó siquí ndese ni casáha yó, á jéē váha chí jéē neé, ná ni condee yó chíji yiquí cúñu yó.

### Siquí jeē ndávicoo yó núu jnūhun maní Yaā Dios jíin yó

<sup>11</sup> Núu súcuan te cándiso iyo rí nuū maá Jítóho yó, te jeē yúcuán ndúcú ndeéyí rí scandíje rí ñayuu. Te jíni Yaā Dios jeē cáhiyo ndāā rí, te ñūhun ni rí jeē suni súcuan cájini maá ró. <sup>12</sup> Te nasūu jéē cánducú tucu rí cahān rí jeē váha ga tēe cácuu rí, chi sa suhva cástūhun rí jeē cuu cusí ni rō jeē siquí rí jíināhan rí. Te súcuan te cuu stío cuiñí rō nuū ñayuu jeē cutéyí i siquí ndese cáa ñayuu, te tu sáha i cuenta ndese cáa ñin anuá ñayuu. <sup>13</sup> Te va sanaa te cájeni ni rō jeē tēe loco cácuu rí jeē cácahān rí súcuan. Te siquí jeē cándíhvī ni rí jehē Yaā Dios cúu. Te tuú chí cáhiyo váha xini rí, te jeē yúcuán cájejníñu rí jeē quéndōo váha ró. <sup>14</sup> Chi siquí jeē ní cundáhú ni Cristo ruhū jíināhan rí cúu jeē cánuú nacani rí jnūhun ya. Chi cájini váha rí jeē ni jíhi mañúhún-ni ya jeē siquí ndíhi yó, te jeē yúcuán nájñuhun ni jíhi ndíhi yó jíin yá. <sup>15</sup> Chi ni jíhi yā jeē siquí ndíhi yó náváha tāca yó jéē técu, ma cótecu ga yó jeē sáha yó jéē cuní maá yó, chí sa suhva jeē cuní maá yá jeē ni jíhi yā te ni natecu yā jeē siquí yó. <sup>16</sup> Jeē yúcuán tuá casáha rí cuenta ndese-ni cándāā ñayuu, nájñuhun casáha ñayuu ñayívi. Te vésú súcuan ni casáha rí cuenta siquí Cristo nde saá, jeē ñin tēe-ni cúu ya, te vijna chí cájini rí jeē cúu ya Sēhe Yaā Dios. <sup>17</sup> Chi núu ñin ñayuu yíhi i ndaha Cristo, te je ni ndujeé i. Te tāca modo neé ní neváha i, je ni yáha cuahān, te vijna je ni ndujeé ndíhi.

<sup>18</sup> Te Yaā Dios cúu jeē sáha ndíhi jeē yáha, chí jíin Cristo ni sáha ya jeē ní

ndivicoo yó núú jnúhun maní yā jíín yó. Te ni tejníñu ya ruhū jeē cánacani ri jnúhun jeē ndivicoo ñayuu nuú jnúhun maní yā jíín i. <sup>19</sup> Chi jíín Cristo te ni sáha Yaā Dios jeē ñayuu ñayivi ndivicoo i nuú jnúhun maní yā jíín i. Te tu ndácunehen ya cuēchi ni casáha ñayuu. Te ni tejníñu ya ruhū jeē cánacani ri jnúhun yáha ndese ndivicoo i nuú jnúhun maní yā jíín i. <sup>20</sup> Núú súcuan te cácuu ri tēe cájica jniñu máá Cristo. Te jeē cahán rí, te nájñuhun jeē máá Yaā Dios cahán ndahú yá jíín ró. Núú súcuan te cácahān ndahú rí jíín ró jeē cahán Cristo, jeē na ndivicoo ró núú jnúhun maní Yaā Dios jíín ró. <sup>21</sup> Te Cristo, vēsú tú ni ñin cuēchi ya, te ni sáha Yaā Dios jeē ní nucondee cuēchi yó siquī yā. Te súcuan te yóhó jéē yíhi ndaha Cristo, ni nucondee siquī yō jeē iyó ndāā yō nájñuhun iyó ndāā Yaā Dios.

**6** Núú súcuan te siquī jeē cácuu ri tēe casájniñu jíín yá, te cácahān ndahú rí jíín ró jeē ma stóo uun ró jnúhun jeē ni sáha Yaā Dios jeē váha róhó. <sup>2</sup> Chi áchí yá nuú tútu ii:

Máá tiempo cuní máá rí te cuni sōho rí jnúhun cáhān ndahú ró jíín rí.

Te máá tiempo jnáma ri ñayuu, te jnama ri rohó.

Achí yá. Te vijna-ni cúu máá tiempo jeē cuní yā, chi vijna-ni cúu tiempo ni quiji Yaā jnáma yóhó.

<sup>3</sup> Te cánducú rí jeē ma sáha ri ni ñin jniñu jeē casi jeē candíje ñayuu, návāha ma cahán i siquī jniñu ndíso ri. <sup>4</sup> Chi sa suhva cánducú rí jeē ndíhi jeē sáha ri, steén jeē cácuu ri tēe cájegniñu nuú Yaā Dios. Jeē yúcuan cájendeyí ni rí jíín jéē ndóho ri jñúndóho, jíín jéē cúmani nuú rí, jíín jéē yí sáha jíín rí. <sup>5</sup> Chi ni iyó tijní jínu jeē ní cacani i ruhū, jeē ní cachune i ruhū vecāa, jeē ní candonda i siquī rí, jeē ní casájniñu ñihin rí, jeē ní cajehni rí máhna máá rí, jeē ní cahíyo ndite ni rí. <sup>6</sup> Te suni cánducú

rí jeē cuajnúhún i ruhū siquī jeē ndoo cájica ri, te cájecūhun vāha ni rí jnúhun ndaā, te cáhíyo paciencia ni rí, te vāha ni rí, te ndéé Espíritu Santo ini rí, te cá-cundáhú ndije ni rí jnáhan ri. <sup>7</sup> Te cánacani ndaā rí jnúhun, te poder Yaā Dios íne jíín rí. Te jíín jnúhun ndaā cándahva rí táca jniñu néé, chi nájñuhun jeē cájegniháhan rí siquī. Chi nájñuhun jeē ndóna un siquī rí te ndóna ri siquī. <sup>8</sup> Iyó jínu yfñúhún ñayuu jíín rí, te iyó jínu tuú. Iyó jínu jéjnúhún i ruhū, te iyó jínu cácahān i siquī rí. Iyó jínu cácahān i jeē tēe stáhú cácuu ri, te iyó jínu cácahān i jeē tēe ndaā cácuu ri. <sup>9</sup> Iyó jínu casáha i nájñuhun jeē tu jíín i ruhū jijnáhan ri, te iyó jínu jeē jiní vāha i ruhū. Iyó jínu jeē cuní ñayuu cahni i ruhū, te cátecu nahín rí. Te vēsú cástóho i ruhū, te tu cájihí rí sáha. <sup>10</sup> Te vēsú iyó jéē cácu-cuíhyá ni rí, te níni cácusí ni rí. Te vēsú tēe ndáhú cácuu ri, te sácúca rí cuehē ñayuu jíín jnúhun ya. Te vēsú tú na vé cánevāha ri, te jíín máá yá te ndíhi-ni cúu jeē cánevāha ri.

<sup>11</sup> Hermano ñuu Corinto, súcuan cúu jeē cácahān cají rí jíín ró jijnáhan ró, chi siquī jeē maní rí jíín ró, jeē yúcuan cáchí ndíhi ri ndese cándoho ri. <sup>12</sup> Máá rí jijnáhan ri cácahān cají rí siquī jeē maní ndasí rí jíín ró, te máá ró jijnáhan ró sanaa te tu súcuan cúu. <sup>13</sup> Nájñuhun cáhān tatá jíín séhe, súcuan cáhān ndahú rí jíín ró jeē nájñuhun iyó mání rí jíín ró, súcuan na cóo maní tucu ró jíín rí.

### Siquī jeē cúu yó templo Yaā Dios

<sup>14</sup> Ma quívi nduu rō jíín jniñu néé casáha ñayuu tu cáncandíje, chi ma cúu coo ñnuú ró jíín i. ¿Chi ndese cuu quijnáhan jniñu casáha ñayuu ndaā jíín jniñu casáha ñayuu tú ndaā? ¿Te ndese cuu coyūcú ñnuú ñayuu cájica jíín luz yā jíín ñayuu cájica nájñuhun nuú néé? <sup>15</sup> ¿Ndese cuu coo ñnuú ni Cristo jíín Satanás? ¿Te ndese cuu cuiñi cáhnu ñayuu

cácandíje jíin ñáyuu tu cácandíje? <sup>16</sup> ¿Te ndese cuu quijnáhan templo Yaā Dios jíin ídolo? Chi máá ró cácuu templo Yaā Dios, Yaā técu, chi ndéé yá ini anuá rō, nájñuhun ni cahān yā:

Condee rī ini i te caca cuu ri mēhñū i, te cuu ri Yaā Dios maá i, te cuu i ñayuu maá rí.

<sup>17</sup> Te jeē yúcuan ní cahān gā yā:

Ma quívi nduu rō jíin jñiñu néé casáha i, te cusñi ró jijnáhan ró, áchí Jítóho yō.

Te ma jñí ró táca jéé tú ndaā.

Yūcuán na te naquihin ri rohó,

<sup>18</sup> te cuu ri Tatá rō jijnáhan ró, te cuu ró séhe yíí rí jíin séhe síhí rí, áchí Jítóho yō, Yaā jñí ndíhi poder.

Achí tutu.

**7** Núu súcuan, ñānī mánī, cánevāha yó táca jñuhun yáha jéé ni jéjnūhun ya. Jeē yúcuan na sándoo yó máá yó táca jéé sajnéhén yiqui cúñu yō jíin ánuá yō. Te na cónso iyo yó núu Yaā Dios, te coo ndoo coo ií yō nuū yā jíin ndíhi jñiñu cúni yā.

### Jeē ní canacani ni ñayuu Corinto siquī cuéchi i

<sup>2</sup> Coo manī rō jíin rí jijnáhan ró víi. Chi tu ní sáha ri falta nuū ní iin ró, te tu ní stívi rí anuá ni iin ró, te ni iin ró tu ní stáhú rí. <sup>3</sup> Te nasūu jéé nducú rí cahān rī nuū rō cúu jeē cahān rī súcuan, chi je ni cahān rī jeē yóhyo manī rī jíin ró. Te níní ñūhun ni rī rohó, vēsú cuu yō chí cotecu yō. <sup>4</sup> Te cúcáhnū ndasí ni rī rohó jijnáhan ró, te cúsiñ teyí ni rī jeē siquí rō. Te vēsú cájito ri táca jñúndóho yáha, te íyó ndeyí ni rī te cúsiñ ndasí ni rī jeē siquí rō.

<sup>5</sup> Ná ni jengoo ri Macedonia te tu ní íyo nayúú ni anuá rī, chi sa suhva yíí ní íyo jñúndóho jíin rí táca lado. Chi ni íyo jeē ní castáhān jnáhan jíin rí, te ni cayūhu rí sanaa te caca yátá ñáyuu cácandíje. <sup>6</sup> Te Yaā Dios jeē sáha jeē ndúndeyí ni ñayuu cacucuíhyá ni, ni sáha ya jeē ní

candundeyí ni rī, chi ni quiji Tito ni sáha ya. <sup>7</sup> Te ni candusiñ ni rī, nasūu máá iin-ni siquí jeē ní quiji de, chi suni jeē ní ndundeyí ni de ni casáha ró. Chi ni castūhún de jeē cáñuhun ni rō coto tucu ró rúhū, jíin jéé cacucuíhyá ni rō jeē siquí cuéchi ró, jíin jéé canacani ni rō jehē rī. Te jeē yúcuan ní cusíñ gā ni rī.

<sup>8</sup> Te carta jeē ní tají rí nuū rō, vēsú ni sáha jeē ní cacucuíhyá ni rō, te tuá nācani cuíhyá ni rī jeē ni sáha súcuan. Chi vēsú ni cucuíhyá ni rī saá, te vijna te tuá, chi jíin rī jeē jecu-ni quívi ni cacucuíhyá ni rō ni sáha. <sup>9</sup> Te vijna te cúsiñ ni rī, te nasūu siquí máá jéé ní cacucuíhyá ni rō. Chi cúsiñ ni rī jeē ní jejníñu jeē ní cacucuíhyá ni rō, chi ni sáha jeē ní canacani ni rō siquí cuéchi ró. Chi ni cacucuíhyá ni rō nájñuhun cúni máá Yaā Dios, te nasūu jéé ni sáhuhū rī rohó. <sup>10</sup> Chi núu cúcuíhyá ni yō nájñuhun cúni Yaā Dios, te suu sáha jeē nācani ni yō siquí cuéchi yó te jnama ya yohó, te ma cóo ga jeē nācani cuíhyá ni yō. Te jeē cacucuíhyá ni ñayuu tu cácandíje, tu jéjníñu jeē nācani ni i, chi sa jnahñū ndetū i. <sup>11</sup> Te ni cacucuíhyá ni rō nájñuhun cúni Yaā Dios, te vijna te cájito ró náa vāha ni jejníñu. Chi ni canacani ndasí ni rō ni sáha, te ni canducú ró jeē quéndoo ndaā rō, te ni cacuxeēn rō nuū téé ni sáha cuéchi, te ni cayūhu ró jeē ní castívi ró núu yā. Yūcuán na te yóhyo ni cacuni rō coto tucu ró núu rī, te yóhyo ni candíhvī ni rō ni cacuxeēn rō nuū téé ni sáha cuéchi ún. Te súcuan ni castéén rō jeē tú cuéchi ró, chi tu ní cájejnúhún ró cuéchi ni sáha téé ún. <sup>12</sup> Te jeē ní tee ri carta un, nasūu máá-ni jeē cúxeēn rī nuū téé ni sáha cuéchi ún, ni nasūu máá-ni jeē cahān rī jehē téé ni ndoho ni sáha de. Chi sa suhva ni tee ri návāha nucūhun ni rō ndese yóhyo ni canacani ni rō jehē rī jíto jínúu Yaā Dios. <sup>13</sup> Jeē yúcuan ní candusiñ ni rī jeē siquí rō.

Te víhyá gā ni cacusiī ni rī jeē ní jini rī jeē cusiī ni Tito, chi ni nduu nayúú ini de ni casáha ró. <sup>14</sup> Chi je ni cahān rī jín de jeē cusiī ni rī jeē váha ñayuu cácuu ró, te vijna te tu ní quéndōo rī jñuhun canu jeē siquī ró. Chi nájñuhun ni cajini ró jeē iyó ndāā tāca jñuhun ni cacahān rī jín ró, suni súcuan ni cundaā jñuhun ni cacahān rī jín Tito jeē cusiī ni rī siquī ró jeē váha cásquícu ró. <sup>15</sup> Te víhyá gā maní de jín ró vijna jeē ñuhun ni de jeē váha ni cajetáhú ró jeē cahán de, te ni cahíyo yñúhún ró ni candiso iyo ró núu de. <sup>16</sup> Núu súcuan te cusiī ni rī siquī jeē cucáhnu ndasí ni rī rohó jínáhan ró.

### Jeē na cusiī ni i socō i cuehē

**8** Hermano, vijna te suni cácuni rī castūhun rí nuū ró jijnáhan ró ndese cuehē jeē váha ni sáha Yaā Dios jín ñáyuu cácandíje cáyūcú Macedonia. <sup>2</sup> Chi vēsú yōhyo ni jito ndee jñundóho i, te suni yōhyo ni cacusiī ni i jín jñuhun ya. Te vēsú ñayuu ndahú ndasí cácuu i, te yōhyo váha ni cajequin i cuehē xūhun jéé cúu ñayuu ndahú cácandíje. <sup>3</sup> Chi cúu rī testigo jeē ní cacusiī ni máa i ni cajēhe i ndésaa ni canda i, te nde víhyá gā ni cajēhe i. <sup>4</sup> Chi ni cacahān ndahú ndasí i jín rí jeē na cuáha rī jñuhun chindéé ñáhán i jín yó cuáha i xūhún cuu hermano cándoho ndáhú. <sup>5</sup> Te víhyá gā ni casáha i vēsú jeē ní cajeni ni rī, chi xihna gā ni casocō i máa i nuū Jítoho yō, te sáa te ni cajēhe i máa i sáha i tāca jéé cácuni rī, ndihí ndese núnjahan ni Yaā Dios. <sup>6</sup> Te jeē súcuan ni casáha ñayuu Macedonia, te ni castíhvī ni rī Tito jeē na jéé tucu de nuū máa ró, sáha de jeē jínu jniñu jeē ni squéjéé de jín ró jeē suni caquin ró cuehē xūhún cuu ñayuu ndahú. <sup>7</sup> Chi máa ró yōhyo váha cásáha ró táca-ni, chi váha cácandíje ró, váha cánacani ró jñuhun, váha cájecūhun ni ró, váha cándíhvī ni ró, váha maní ró jín rí jijnáhan rī. Núu súcuan te suni cánuú

sáha váha ró jniñu yáha jéé cuáha ró jéé cúu ñayuu ndahú.

<sup>8</sup> Te nasūu jéé cuní rī ndacu rī jniñu nuū ró, chi sa cástūhun rí nuū ró ndese yōhyo cácusiī ni sava ga ñayuu jéhe i xūhún, te súcuan te cuni rī jeē suni máa ró cákundáhú ndije ni ró ñayuu ndahú. <sup>9</sup> Chi je cájini ró ndese yōhyo váha ni Jítoho yō Jesucristo jín yó. Chi siquī jeē ní cundáhú ni yā rohó te ni nasáha ndáhú yá máa yá, vēsú cucá ndasí yá nde andiví núu. Te súcuan ni sáha ya jeē cácućá ró ndihí jeē ndíso jñuhun ya, siquī jeē ní nasáha ndáhú yá máa yá.

<sup>10</sup> Te jeē váha máa ró cúu jeē na cáchi rī ndese jéni ni rī siquī jniñu yáha. Váha ni caquejéé ró nde jendujin, chi nasūu máa-ni jeē ní cajequin ró xūhún, chi suni yōhyo ni cacusiī ni ró sáha ró. <sup>11</sup> Núu súcuan te vijna te sínu ró. Te nájñuhun ni cacusiī ni ró ni caquejéé ró jín, suni súcuan na cusiī ni ró sínu ró, chi cuáha ró núu ndese cáneváha ró. <sup>12</sup> Chi núu cusiī ni yō cuáha yó, te jétáhú yá núu ndese névaha yó, chi tu jícán yā jeē cuáha yó jéé tu névaha yó.

<sup>13</sup> Te nasūu jéé cahán rī jeē cáhni ndahú ró máa ró jeē cáa ga nihin i vēsú jeē ndóo nuū máa ró. <sup>14</sup> Chi sa suhva jeē iin cūhva-ni coneváha ró jín i. Chi cánevaha cuehē ró vijna, te cuu cuáha ró jéé cúmani nuū i. Yūcuán na te núu ndé iin quiví coneváha i, te suni cuu cuáha i te núu ni cumani nuū ró. Te súcuan te iin cūhva-ni coneváha ró jijnáhan ró, <sup>15</sup> nájñuhun cáhán tutu i siquī ñáyuu jeē ní canastútú maná nde jenahán: Tēe jeē ní nastútú cuehē, tu ní ndóo ga nuū de. Te tēe jeē ní nastútú jecu-ni, suni tu ní cúmani nuū de. Achí tutu.

### Jñuhun Tito jín úu gā jnáhan de

<sup>16</sup> Te na cútahū rī nuū Yaā Dios jeē ni sáha ya jeē ndíhvī ni Tito jehē ró nájñuhun cándíhvī ni máa rí. <sup>17</sup> Chi ni jetáhú de jeē ní cacahān rī jín de jeē jeé



de nuū rō. Te siquī jeē ndihví ni de jehē rō, jeē yúcuan cuájeē de, chi súcuan cúu ni maá de.

<sup>18</sup>Te suni cátají rí ñin hermano cuajeē jíin Tito nuū rō. Te tāca grupo ñayuu cácañdije cájejnúhún i tēe un jēē váha jéjníñu de siquī jnúhun jeē jnáma ya yohó. <sup>19</sup>Te tāca grupo ñayuu cácañdije suni ni catee i jniñu siquī de jeē cáca de jíin rí chindéé ñáhán de quindēca de xúhun jíin rí jeē ní cajēhe ñayuu. Te jniñu yáha cásáha ri náváha cahān ñayuu jeē yóhyo váha Yaā cúu máá Jí-toho yō, chi cuni i ndese yōhyo cácusii ni rō cásocō rō xúhún. <sup>20</sup>Te quingoo ndindúú rí náváha ni ñin ñayuu ma tēe i cuēchi siquī rí siquī xúhun cásocō ñayuu. <sup>21</sup>Chi ndúú rí jeē squícu ndaā rí tācá jniñu, nasūu máá ñin-ni nuū Yaā Dios, chi suni nuū ñáyuu.

<sup>22</sup>Te suni cátají rí ñinga hermano yō cuajeē de jíin ndindúú tēe yáha. Te tijni jínu ni steén de jeē yóhyo cúsiñ ni de ndihví ni de tācá jniñu. Te vijna chi ndihví gā ni de jehē rō, chi cúcáhnun ndasí ni de jeē cásquícu rō. <sup>23</sup>Te núu cácajnúhún ñayuu siquī Tito, te achi rō jeē cúu de tēe chindéé ñáhán jéjníñu jíin rí nuū rō siquī jnúhun ya. Te uū gā hermano yō yáha, achi rō jeē cácuu de tēe jeē ní catejníñu ñayuu cácañdije, te cáhiyo yíñúhún de nuū Cristo. <sup>24</sup>Núu súcuan te stēén rō nuū de jeē cáhiyo maní ndije rō jíin de, náváha na cúní tāca grupo ñayuu cácañdije. Te súcuan cuni i jeē tu ní cácusii cāhá ni rí siquī rō.

### Siquī jeē cájequin i xúhún cuu tācá hermano

**9** Te vijna te tuá jíni ñúhún tee ri nuū rō siquī xúhun jeē cájequin rō cuu tācá hermano cándoho ndáhú. <sup>2</sup>Chi je jíni rí jeē cánujnahan ni rō cuāha rō. Te jeē yúcuan máni cúsiñ ni rí cahán rí jíin ñáyuu Macedonia jeē rohó ñáyuu Acaya, je ni casátúhva rō xúhun ndé jendujin.

Te jeē súcuan ni cacusiñ ni maá rō, te jeē yúcuan cuehē ñayuu Macedonia ni cācondihví ni i ni cajēhe máá i. <sup>3</sup>Te tájí rí ndinúni hermano yáha cuájeē maá de nuū rō xihna gā, náváha jeē jinú maá rí te ma quēndōo néé rí siquī jnúhun ni cahān rí jeē squícu váha rō jíin jniñu ún. Chi coo túhva ndije rō jíin xúhun nájñuhun ni cahān rí jíin i. <sup>4</sup>Chi sanaa te jecoo jecu tēe Macedonia jíin rí, te núu cuni de jeē tu cáhiyo túhva rō, te coo jnúhun canu nuū ri, te suni nuū maá rō jijnáhan rō, chi ni cahān teyí rí jeē cáhiyo túhva ndije rō. <sup>5</sup>Jeē yúcuan ní jeni ni rí jeē cánúú cahān rí jíin táca hermano yáha jecoo de xihna gā, te sáá te jinū ri, náváha stíhví ni de róhó jēē yáchí na cóo túhva xúhun jēē ní cacahān rō jeē cuáha rō. Te súcuan te coo túhva siquī jeē váha ni rō, te nasūu jēē safuerza rí rohó.

<sup>6</sup>Cocuhun ni rō jnúhun yáha, jeē núu jecu-ni cuāha rō te suni jecu-ni nanihin rō: Chi tēe jeē tihlí-ni táji, suni tihlí-ni nastútú. Te tēe jeē táji cuehē, suni cuehē nastútú. Achí tutu. <sup>7</sup>Tācá ñin ñin rō cuāha rō ndésaa ni tee ni rō. Ma cúxii ni rō cuāha rō, chi nasūu fuerza cúu. Chi Yaā Dios maní yā jíin ñáyuu jeē cúsiñ ni cuāha. <sup>8</sup>Te máá Yaā Dios cuu sáha ya jeē nducuehē ndinuū jeē váha cuu rō jijnáhan rō, náváha níni coneváha rō ndihí tācá jeē jíni ñúhún rō, te coo sobra gā jeē cuāha rō jēē cúu tācá jniñu váha. <sup>9</sup>Chi súcuan cáhán tutu ñi siquī tāca ñáyuu jéhe: Ni scáa i ni jēhe i nuū ñáyuu ndahú. Te tācá jniñu váha sáha i, chi quēndōo ní cání.

Achí tutu. <sup>10</sup>Te Yaā Dios jéhe ya tata nuū tēe táji, te nihin de staā jeē cáji de. Te suni súcuan cuāha ya ndinuū jeē váha cuu rō, te sáha ya jeē cáyā te nducuehē jniñu váha cásáha rō. <sup>11</sup>Súcuan cucúcá rō jíin táca-ni, náváha cuu cuāha cuehē rō. Te xúhun jēē cuāha rō quíhin nuū

hermano cándoho ndáhú, suu sáha jeē nácuatáhú i nuū Yaā Dios. <sup>12</sup>Chi xūhun jēe cuāha ró núū i, nasūu máá ĩn-ni jeē nihín i jeē cúmani nuū i, chi suni sáha jeē nácuatáhú ndasí i nuū Yaā Dios. <sup>13</sup>Te cahān i jeē yóhoyo vāha Yaā cúu Yaā Dios, chi xūhun jēe ní cajēhe ró stéén jeē vāha cácanđije ró jnúhun Cristo. Te suni sáha jeē cahān i jeē yóhoyo cújéhu Yaā Dios siquī jeē ní cajēhe cuehē ró nuū i jíin núū sava ga ñayuu. <sup>14</sup>Te suni cacān tahú i jehē ró, chi coo maní ndasí i jíin ró siquī jeē yóhoyo vāha ni sáha Yaā Dios jíin ró. <sup>15</sup>Te na cútahū yō nuū Yaā Dios, chi ni jēhe ya Sēhe ya nuū yō, jeē cúu ĩn tahū cáhnu ndasí jēe ma cánda cuiti yō castúhún ndíhi yó.

### Jeē ndíso jniñu Pablo cúu de apóstol

**10** Te ruhū Pablo, cáhán ndahú rí jíin ró jijnáhan ró jíin modo maá Cristo jeē vitá ni yā te vāha ni yā. Ruhū, chi cácahān rō jeē iyó suchí ni rí núu ndéé rí jíin ró, te núu ndéé jíicá rí te tu yúhú cuiti rí cahān nihin rí jíin ró, cácahān rō. <sup>2</sup>Núu súcuan te cáhán ndahú rí jíin ró jeē núu na jéé rí te ma cahán rō jnúhun jeē sáha jeē cuxeēn rí nuū rō. Chi sava ró cácahān jeē casáha rí jniñu ya siquī jeē máni jeē na níhín rí siquī ún. Núu súcuan te íyó túhva rí cuxeēn rí nuū ñayuu cácahān súcuan. <sup>3</sup>Chi vésú cácuu rí ñayuu cáyúcú ini ñayíví, te tu cájejnáhan rí modo cájejnáhan ñayuu ñayíví. Chi nájnūhun jeē cájejnáhan rí siquī táca jniñu neé. <sup>4</sup>Chi nasúu ndajniñu ñayíví jéjñiñu rí cájejnáhan rí, chi jíin poder Yaā Dios cájejnáhan rí snáa rí táca fuerza jeē cúu contra siquī yā. <sup>5</sup>Súcuan cásnáa rí táca jnúhun ndúxí jíin jnúhun téyí jeē nducú casi jeē ma cúni ñayuu ndese Yaā cúu Yaā Dios. Te cájesi rí nuū ndíhi jeē tú vāha jeē cájeni ni ñayuu, návāha cuandetū i nuū Cristo. <sup>6</sup>Te jeē jíinu cuandetū vāha máá ró, yúcuán na te coo túhva rí

cuāha rí castigo nuū táca gá ñayuu jeē tu cájendetū.

<sup>7</sup>Máá ró jijnáhan ró máni cájeni ni rō modo ñayuu tu cájecūhun ni. Núu na-ni tēe jéni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan rí. <sup>8</sup>Te núu ni cahān teyí rí jíin ró jeē ndíso jniñu rí, te tu cúcanu rí sáha. Chi máá Jítóho yō ni tejníñu ya ruhū jijnáhan rí, návāha sáha rí jeē ije ánuá ró jíin jnúhun ya, nasúu jéé snáa rí. <sup>9</sup>Núu súcuan te tu cúni rí jeē cáni ni rō jeē nducú rí siúhú rí rohó jíin carta rí. <sup>10</sup>Chi cácahān sava ró jéé táca carta rí yóhoyo stfhví ni te nihin ndácu jniñu, te sa suhva núu ndéé rí jíin ró te tu cúndeyí ni rí ndacu nihin rí jniñu, te suni tu cúu cahān vāvíhí rí, achí ró. <sup>11</sup>Te ñayuu cácahān súcuan na sáha i cuenta jeē nájnūhun nihin cáhán carta rí jeē íne jíicá rí, suni súcuan nihin ndacu rí jniñu nuū rō jeē cóndee rí jíin ró.

<sup>12</sup>Te va ma chúndeyí cuiti ni nde rí jeē sajeñnu rí maá rí, nájnūhun casáha sava tēe un jéé cájejnúhún nde de máá de. Táca tēe ún chi cáacunéé de jeē cájeni ni de jeē cujéñnu ga de vésú jnáhan de, te tu casáha de cuenta ndese cúni Yaā Dios jeē caca de. <sup>13</sup>Te ruhū jijnáhan rí, chi cuteyí nde rí maá cúhva-ni jniñu jeē ni jéhe Yaā Dios nuū rí, te ma yáha ga rí. Máá Yaā Dios ni tee cúhva yá ndésaa cúu jeē sáha rí, te máá yá ni jéhe jnúhun jeē ni jíin rí nuū rohó ñayuu ñuu Corinto. <sup>14</sup>Jeē yúcuán ná ni jinūcoo rí nuū rō jeē xíhna níhún te nasúu jéé ni yáha rí nuū cúhva jniñu ní jéhe ya nuū rí. Chi xíhna gā maá rí ni jinūcoo nuū rō ni canacani rí jnúhun vāha Cristo. <sup>15</sup>Te tu cácuteyí rí siquī jniñu ní casáha ĩnga tēe, nájnūhun jeē jniñu máá rí cúu. Chi sa suhva cáñuhun ni rí jeē cuehē gā candíje ró, te súcuan te cuu sáha rí cuehē gā jniñu ya mēñnu ró, te níni máá cúhva jeē ni jéhe ya nuū rí. <sup>16</sup>Yúcuán na te cácuni rí scuité núu ga rí jnúhun jnáma ya yohó

núu táca gá ñuu yúcu ndé yúcuan gá. Te súcuan te ma quívi nduu rí cutéyí rí nuū jeē jé ni canacani inga tēe jnūhun.

<sup>17</sup> Te núu ndé tēe cúní de cutéyí de, na cutéyí de siquī jeē sáha máá Jítóho yō, nasūu síquī jēē sáha máá de. <sup>18</sup> Chi nasūu tēe jeē jejnūhún máá cúu jeē quéndōo yñūhún, chi sa suhva tēe jeē jejnūhún máá yá.

### Jeē cahán Pablo siquī tēe cānacani jnūhun stáhú

**11** Cone cáhnu ni rō jijnáhan rō jeē cahán rí jecu jnūhun modo nájñūhun cácahān ñayuu canéé. Núu súcuan te cáhnu coo ni rō víi. <sup>2</sup> Chi cúcuñí rí jehē rō jijnáhan rō, nájñūhun cúcuñí Yaā Dios. Chi cácuu rō nájñūhun iin sūchi síhí íyó ndoo, te ni sáha ri jeē quijnáhan rō jíin Cristo, nájñūhun quijnáhan iin sūchi síhí jíin máñūhún-ni yñi i. <sup>3</sup> Te yúhú rí sanaa te cuāha ro jnúhun stáhú táca tēe un rōhó, te síáá rō jnūhun jeē chiñūhún ndāā rō Cristo nde jíin ini jíin ánuá rō. Chi suni súcuan ni sáha Satanás jíin Eva, chi ni quívi ini iin coō, te ni stahú un ña jíin jnúhun ndíchí stáhú. <sup>4</sup> Chi núu quíjicoo tēe nuū rō jeē tu cānacani ndāā de jnūhun Jesús nájñūhun ni canacani ri nuū rō, te va yōhyo vāha cájetáhú nde rō de. Te suni súcuan vāha cájetáhú nde rō núu inga espíritu jíin núu inga jnūhun jeē tu quijnáhan jíin Espíritu jíin jnúhun jeē ní cacandíje rō jēē jnáma ya rohó. <sup>5</sup> Te táca tēe cacandíje rō un jēē cácahān jeē apóstol cujéhnu ga cácuu, tú cuiti jeē cujéhnu ga nde de nuū rí. <sup>6</sup> Chi vēsú tu níhín vāha nde ri modo cahán rí, te jécūhun vāha ni rí. Chi jíin ndíhi jniñu ni casáha ri mēhñu rō ni castéén cají rí nuū rō jeē súcuan cúu.

<sup>7</sup> Tu ní jícán rí xūhun núu rō siquī jeē ní nacani ri jnūhun jnáma ya yohó. Te súcuan ni cotecu ndahú rí návāha quendōo vāha ga máá rō jíin jnúhun ya.

¿Te va cuēchi ni sáha ri jeē ni sáha ri súcuan, chí naún? <sup>8</sup> Chi sava ga grupo ñayuu cacandíje ni quihín ri xūhun jēē ní cajēhe i nuū rí, návāha súcuan-ni nacani ri jnūhun ya nuū rō jijnáhan rō. <sup>9</sup> Te ná ni condee rí jíin rō te ni ndíhi xūhun rí, te tu ní jícán cuiti rí nuū ní iin rō. Chi hermano jeē ní quijicoo ichi Macedonia ni cajēhe de nuū rí jeē cúmani. Te jeē súcuan tu ní stáhān rí rohó, te ni ma sáha cuiti rí. <sup>10</sup> Te nájñūhun cúcāhnu vāha ni ri jeē jíin rí jnūhun ndāā Cristo, suni súcuan jíin rí jeē ma quíhín ri xūhún nuū ni iin ñayuu ní ndāñūú Acaya, návāha ma cási i jeē cúsiñi ni rí jeē súcuan-ni nā-cani ri jnūhun ya. <sup>11</sup> ¿Te á síquī jeē tú maní rí jíin rō cúu jeē cahán rí súcuan, jéni ni rō, chí naún? Tuú chi máá Yaā Dios jíin yā jeē maní rí jíin rō jijnáhan rō.

<sup>12</sup> Te sáha ri ná-ni sáha ri, chi ma quíhín ri xūhun rō, návāha casi rí nuū jeē casatéyí tēe un máá de jeē cácahān de jeē inuú casáha de jniñu ya jíin rí. <sup>13</sup> Te tēe ún chi nasūu apóstol ndāā cácuu de, chi máni máá jnúhun stáhú cácahān de, te casáha de máá de jeē cácuu de apóstol Cristo. <sup>14</sup> Te tu náā ni yō jíto yó jēē casáha de súcuan, chi je jíin yō jeē suni Satanás násama máá te stáhú jēē sáha máá nájñūhun iin ndajéhé Yaā Dios jeē jíca jíin luz yā. <sup>15</sup> Te jeē yúcuan suni tu náā ni yō jíto yó jēē tēe cájejniñu nuū Satanás, casáha de máá de jeē tēe ndāā cácuu de. Te iin quívi te nanihín de siquī jniñu néé casáha de.

### Jnūndóho ni ndoho Pablo siquī jeē cúu de apóstol

<sup>16</sup> Inga jínu cáhán rí jíin rō jeē ni iin rō ma cáni ni rō jeē tēe cánéé cúu ri. Te núu súcuan cájeni ni rō, te va cuatáhú nde rō jēē cahán rí nájñūhun tēe cánéé, návāha suni cuu cutéyí nde ri jecu nájñūhun casáha tēe ún. <sup>17</sup> Jeē cahán rí vijna chi nasūu jēē ní ndacu máá Jí-

toho yō cúu, chi sa nájñuhun tēe cánéé cáhán rí jeē cutéyí nde rí. <sup>18</sup> Chi cuehē de casátéyí de máá de modo jeē iyó ini ñayíví, te suni súcuan na sátéyí nde rí maá rí núu súcuan. <sup>19</sup> Te va tēe cáhiyo cájí xíní cácuu nde ró, te jeē yúcuan cúu vāha ni nde ró cuatáhú ró ñin tēe cánéé núu súcuan. <sup>20</sup> Chi va vāha-ni cá-jendeyí ni rō nuū tēe un jéé casáfuerza de rōhó cuajniñu ró núu de, chí casáha de jeē ndundáhú ró, chí cáquende de nda-jniñu ró, chí casájéñu de máá de nuū rō, chí ndé cácatu de nuū rō. <sup>21</sup> Te vēsú cúcanu nde rí cahān rí, te na cáhán rí jeē tu ní cúndeyí ni nde rí satéyí rí maá rí nájñuhun casáha tēe ún.

Te vijna te núu iyó sava tēe chúndeyí ni de sátéyí de máá de, te va suni chundeyí ni nde máá rí núu súcuan. Te va cáhán rí nájñuhun cáhán ñin tēe cánéé. <sup>22</sup> Núu cácutéyí de jeē tēe hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū. <sup>23</sup> Núu tēe cájejniñu nuū jnúhun Cristo cácuu de, te víhyá gā ruhū. Te va cáhán rí nájñuhun tēe cánéé jéé cutéyí rí súcuan. Chi ni caa ga ni sájñiñu rí vēsú maá de jíjnáhan de, te ni caa ga ni cacani i ruhū, te cuehē gā jínu ni ine rí vecāa, te suni cuehē gā jínu ni cacani ñayuu cahni i ruhū. <sup>24</sup> Te jnáhan rí hebreo, uhūn jínu ni cacani xeēn de ruhū jíin cuarta ñiñ, ñin cūhva jeē jé yajni cuu rí sáha. <sup>25</sup> Uní jínu ni cacani de ruhū jíin yujnu xii, te ñin jínu ni cajēhe de yuū xini rí. Uní jínu ni quēe barco jeē ní jica rí siquī jnúhun ya. Te ñin jecuáa jíin ñin ndiáca ni yosō candá rí nuū cunú ndute mar. <sup>26</sup> Cuehē jínu ni ndoho rí ni jica rí ichi, te ni cācu rí nuū táca yúte, te ni cācu rí nuū táca ñācuilhná. Ni cācu rí nuū ñayuu nación rí jíin núu ñayuu ñuu jicá. Ni cācu rí cháha chúcuan ná ni iyo rí ñuu jíin rancho jíin mar. Ni cācu rí nuū táca jnáhan rí jeē tu iyó ndáa. <sup>27</sup> Ni sájñiñu ñihin rí te yíí ní

ndoho rí. Cuehē jínu ni jehni rí maá rí máhná. Ni jíi rí sōco, ni jichí rí ndute. Cuehē jínu ni iyo ndite ni rí, ni cuijnu rí, ni cumaní sahma rí

<sup>28</sup> Te siquī táca jéé yáha chi iyó gá. Chi ndiquiví ndóho rí jeē nácani ndasí ni rí jehē táca grupo ñayuu cácadíje. <sup>29</sup> Núu ñin ñayuu tu fuerza ini i, te suni ndóho rí jehē i. Te núu ñin ñayuu quívi i cuēchi sáha jnáhan i, te ndóho rí jnúhun cúcanu jíin jnúhun náxeēn ni. <sup>30</sup> Núu súcuan te núu cánuú cutéyí nde rí, te va cutéyí rí siquī táca jéé steén jeē tú na fuerza ini rí. <sup>31</sup> Te Yaā Dios, Yaā cúu Tátá maá Jítóho yō Jesucristo, jíin yā jeē cahán ndaā rí. Te ní cání na cáhán ñayuu jeē vāha ndasí Yaā cúu ya. <sup>32</sup> Ná ni iyo rí ñuu Damasco, te gobernador jeē ndácu jniñu ndañúu jeē jñí rey Aretas, ni jeni de soldado ni cacondito táca yéhyí jeē ní condúu ndihyú ñuu ún, chi jniñ de ruhū quihín rí vecāa ni cuni de núu. <sup>33</sup> Te ni quívi rí chíji ñin jica, te ñayuu cácadíje ni cascúun i ruhū ventana ñin vehe jeē néne jicā jeē ndihyú ñuu ún. Te súcuan ni cācu rí nuū tēe ún.

### Jeē ní jito ndijin Pablo jeē ni stúu ya nuū de

**12** Te tu níhín jniñu jeē cutéyí rí. Te vāha ga na cástúhun rí nuū rō siquī jeē ní jito rí jeē ni stúu maá Jítóho yō nuū rí te ni steén ndijin yā nuū rí. <sup>2</sup> Jíní rí ñin tēe cándíje Cristo, te je ni cuu uxí cuūn cuiyā jeē ní sáha ya jeē ní caa tēe un ní jehēn de nde andiví úní. Te tu jíin rí núu ni jehēn rí jíin yiqui cúñu rí, chí ní jehēn anuá-ni rí. Máá Yaā Dios cúu jeē jíiní. <sup>3</sup> Te jíiní rí jeē ní ndonehen ya ruhū. Te á ní jehēn rí jíin yiqui cúñu rí, chí ní ndōo, tu jíiní rí, chí máá-ni Yaā Dios cúu jeē jíiní. <sup>4</sup> Chi ni sáha ya jeē ní caa rí ni jehēn rí nde jardín andiví. Te yúcuan ní jíiní sōho rí táca jnúhun sáhi ndasí jéé ma cúu castúhun yóhó ñayuu. <sup>5</sup> Te siquī jeē ni sáha ya súcuan jíin rí cúu

jeē cutéyí rí, te ma cutéyí rí siquī ndese cúu máá rí. Chi cutéyí rí máni jeē tú na fuerza ini rí. <sup>6</sup>Te núu cúni rí cutéyí rí siquī maá rí nuú, te nasūu jéē canéé rí núu sáha ri súcuan núu, chi ndaā cúu jeē iyó jeē cutéyí rí. Te ni ma sáha ri, chi tu cúni rí jeē cani ni ñayuu jeē cujéhnu ga rí vēsú jeē ní jito i chí jéē ní jini i jnūhun rí.

<sup>7</sup>Te tu cúni yā jeē yáha ri cutéyí rí siquī jeē ni stéén ndijin yā jniñu jéhnu ndasí un núu rí, te jeē yúcuan ni quiji ñin jnūndóho jeē ndiquín ruhū te stóho ruhū. Te ñin jeē ni jéhe ya jnūhun ni tají Satanás cúu, ñin jeē stóho ruhū, návāha ma yáha ri cutéyí rí. <sup>8</sup>Te uní jínu ni cahān ndahú rí jíin máá Jítóho yō jeē na téjiyo ya quihīn. <sup>9</sup>Te ni cahān yā jíin rí: Tuú chi tu cúmani jeē cundáhú ni rí rohó. Chi ñayuu jeē tú na fuerza ini, sáha ri jeē nducuehē gā fuerza maá rí ini i, ni achi yā. Núu súcuan te cúsiñ ni rí jeē tú na fuerza ini rí, chi súcuan te nducuehē gā fuerza Cristo ini rí. <sup>10</sup>Jeē yúcuan cúu jeē cúsiñ ni rí jeē tú na fuerza rí, jíin jéē cácahān ndevāha ñayuu jíin rí, jíin jéē cúmani nuū rí, jíin jéē cájito xeēn i ruhū, jíin jéē ndóho ri jnūndóho siquī Cristo. Chi jeē tú na fuerza maá rí, yúcuan sáha jeē nihín rí fuerza maá yá.

### Jeē nácani ni Pablo siquī ñayuu cácaandíje ñuu Corinto

<sup>11</sup>Te va tēe cánéé cúu ri jeē ni sátéyí nde ri maá rí. Te siquī jeē tu cácaandíje ró rúhū, jeē yúcuan ní sátéyí rí maá rí. Chi cánuú jéē máá ró cuajnúhún ró ruhū nuú. Chi vēsú tú jniñu ri jeē maá rí, te va tu núu cuiti nde ri nuū tāca tēe un jéē cácahān rō jeē apóstol cujéhnu cácuu de. <sup>12</sup>Chi mēhñu ró ní sáha ri tācá jniñu jeē steén jeē cúu ndije ri apóstol. Chi jíin cuéhē paciencia ni sáha ri tācá jniñu jéhnu jeē steén poder Yaā Dios, jíin tāca jniñu jeē nahán ní canaa ni rō ni cajito ró. <sup>13</sup>Te tu ní sáha ri jeē núu ga cácuu

ró núu tāca gā grupo ñayuu cácaandíje, chi máá ñin-ni jeē tu ní stáhān rí rohó jéē cuáha ro jéē jíni ñúhún rí. Cone cáhnu ni rō núu súcuan ni sáha nde ri falta nuū rō víi.

<sup>14</sup>Te vijna je íyó túhva ri jecondēhe rí rohó vuelta uní. Te suni tú na vé cacán rí nuū rō, chi nasūu ndajniñu ró cúu jeē cuní rí, chi sa suhva jeē quendōo vāha ró jíin jnūhun ya. Chi ñajnúhun sēhe ri cácuu ró, te sēhe chi tu cánuú caya i jeē cúu tátá i, chi sa tátá cánuú cuáha de jeē quendōo vāha sēhe de. <sup>15</sup>Jeē yúcuan cúsiñ ni rí stíhi ri jeē névāha ri, te nde stíhi ri fuerza maá rí, návāha sáha ri jeē quendōo vāha ánuá rō jijnáhan ró. Te maní gā coo ri jíin ró, vēsú sanaa te jecu-ni cáhiyo maní rō jíin rí.

<sup>16</sup>Te íyó jecu rō cácahān jeē vēsú tú na vé ni jícan rí nuū rō, te tēe stáhú cúu rí, chi ni nducú rí modo ndichí nihīn rí xūhun ró, cácahān rō. <sup>17</sup>¿A táca tēe ní tají rí nuū rō, á ñin máá de ni stahú de róhó jéē nihín de xūhun ró cuu máá rí, chí naún? Tú cuiti. <sup>18</sup>Ni cahān ndahú rí jíin Tito jeē jecondéhe de róhó, te ni tají rí ñin hermano ni jeē jíin de. ¿Te chí ní stahú Tito rohó ní quihin de xūhun núu rō jeē cuu máá de, chí naún? Tuú chi inuú-ni cásáha ndindúú rí, te ñin-ni ánuá ndindúú rí.

<sup>19</sup>¿Sanaa te cájeni ni rō jeē cahán rí jnūhun yáha návāha quendōo vāha ri jíin ró, chí naún? Nasūu súcuan cúu, chi Yaā Dios jiní yā jeē cahán rí maá-ni jnūhun jeē cuní Cristo. Te ndíhi jeē cahán rí chi nducú rí jeē ije ró jíin jnūhun ya, ñáni máni. <sup>20</sup>Chi yúhú rí jeē núu na jéé rí, te sanaa te cuni rí jeē tu cásáha ró jniñu nújnahan ni rí. Te máá ró jijnáhan ró, suni ma nújnahan ni rō ruhū. Chi sanaa te cátejnhān ró, cácu-cuésún ni rō, cáquití ni rō, cásándúxí ró, cásájnúhún ró, cácahān rō siquī jnhān ró, cácutéyí ró, cájica néé ró. <sup>21</sup>Te yúhú rí jeē núu na jéé tucu ri te cuáha Yaā Dios

jnūhun canu nuū rī jeē súcuan cásáha ró. Te sanaa te cucuíhyá ni rī núu íyó cuéhē rō jeē ní casáha cuēchi ichi yátá, te tu nácani ni rō stóo ró jniñu jnéhén jniñu jíca jnéni jíin jniñu néé ndasí ní casáha ró.

**Saludo jíin jnúhun  
cástūhun Pablo jeē sándīhí**

**13** Yáha cúu vuelta unī jeē jé-condēhe rí rohó. Te sándaā yō jniñu nájñūhun cáhán tutu: Jíin jnúhun jeē cahán uū chí únī testigo te cundaā táca jniñu, áchí. <sup>2</sup>Te vijna jeē íne jícá rí te cáhán tucu ri nájñūhun ni cahán rī ná ni ine ri jíin ró. Cáhán rī nuū ñáyuu ni casáha cuēchi un jíin núu ndíhi ró, jeē núu na jéé tucu ri te ma cóo vītá ni rī jíin ró. <sup>3</sup>Te yūcuán cuu prueba jeē cánducú ró, suu núu jendaá jeē cahán rī jíin fuerza Cristo. Chi Cristo tu cúmanī fuerza yā jeē sándaā yā jíin ró, chi stéén yā poder yā mēhñu ró. <sup>4</sup>Te vēsú tu ní stéén yā fuerza yā ná ni jihí yā jicā cruz, te vijna chi técu yā jíin poder Yaā Dios. Te nájñūhun ni ndoho máá yá, suni súcuan cándoho ri vijna jeē tu fuerza rī. Te vēsú súcuan te jíin poder Yaā Dios cátecu ri jíin yá jeē cuajññu ri nuū rō jeē siquí jnúhun ya.

<sup>5</sup>Coto ndee rō maá ró núu cáhiin nīhin ró jíin jnúhun cácandíje ró yá. Sáha váha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandíje ndije ró? <sup>6</sup>Te ñūhun ni rī jeē

suní cácucahñu ni rō jeē maá rí cácandíje ndije ri. <sup>7</sup>Te cájicān tahú rī nuū Yaā Dios jeē ma sáha ró ni iin jniñu néé. Te vēsú núu cuajññuhún ró jeē váha ndácu ri jniñu nuū rō, chí vēsú núu ma cuajññuhún ró, te tú na vé sáha, chí máni jeē na sáha ró jniñu ndaā cúu jeē cánducú rí. <sup>8</sup>Chi tu jésí ri nuū jniñu ndaā, chí sa suhva scáca ri. <sup>9</sup>Núu súcuan te cácusñi ni rī núu tú na fuerza maá rí, te núu íyó fuerza maá ró. Te níni cácan tahú rī jeē na íje ga ni rō jijnáhan ró jíin jnúhun ya. <sup>10</sup>Te téé ri carta yáha nuū rō nde ná tu jeē rī, náváha núu na jéé rī te tuá jíni ññuhún cuxeēn rī nuū rō. Chi ni jēhe Jitoho yō jniñu ndíso ri yáha jéé sáha ri jeē íje ánuá rō jíin jnúhun ya, nasūu jéé snáá rī.

<sup>11</sup>Je ni cahán yō núu súcuan hermano, te na cóo jeē váha jíin ró jijnáhan ró. Te na cóndihvī ni rō ije ró jíin jnúhun ya, te coo ndeyí ni rō. Te na cóo inuú ni rō te coyūcu máni rō jíin jnáhan ró. Te Yaā ndíso jnúhun ndeyí sñi ni jíin jnúhun cúndáhú ni, coo ya jíin ró jijnáhan ró. <sup>12</sup>Te jeē cahán rō jíin táca jnáhan ró, te yññuhún techūhu ró ndaha i. <sup>13</sup>Sándeýí ni rō jijnáhan ró, áchí hermano cácandíje jeē cáyūcu yáha.

<sup>14</sup>Te ñūhun ni rī jeē Jítoho yō Jesucristo na sáha ga yā jeē váha rōhó jijnáhan ró, te Yaā Dios cundáhú ni yā rohó, te Espíritu Santo condee cáhnu ya jíin ró. Súcuan na cóo. Amén.

## CARTA JEE NI TEE SAN PABLO APOSTOL NUU ÑAYUU GALACIA

**1** Máá rí cúu Pablo apóstol. Te nasūu ñáyuu ni jéni ruhū ni nasūu ñáyuu ni tájí ruhū jeē nácani ri jnūhun, chi sa suhva máá Jesucristo jíin Tátá yō Yaā Dios, Yaā ní nastécu Jesús mēhñu ndíyí. <sup>2</sup>Te ruhū jíin táca hermano cáyūcu jíin rí yāhá, cátee ri carta yáha cuájeē nuū rohó ñáyuu cácandíje ní región Galacia. <sup>3</sup>Te cánuhun ni ri jeē Tátá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo síi ni rō. <sup>4</sup>Chi Jesús ni socō yā maá yá jeē ni jíhi yā jeē siquí cuéchi yó, návaha jnama ya yohó nuū tāca jéē neé íyó ñayívi yáha, chi súcuan ni nujnahan ni maá Tátá yō Yaā Dios. <sup>5</sup>Jeē yúcuan na cáhán yō jeē yóhoyo luu cújéhu ya ní cání. Súcuan na cóo. Amén.

### Siquí jeē tuá na inga jnūhun cácu ñayuu

<sup>6</sup>Te náhán náā ni rí jíto ri jeē yóhoyo yachí cánducú ró stóo ró Yaā Dios, Yaā ní cana róhó jéē quívi ró ndaha ya siquí jeē cundáhú ni Cristo yohó. Chi ni candiquín rō inga jnūhun jeē síin cáhán. <sup>7</sup>Te tú cuiti na inga jnūhun jnama yóhó íyó. Te cáhiyo jecu ñayuu castáhán i róhó, te cácuni i nasama i jnūhun ndese jnáma Cristo yohó. <sup>8</sup>Te núu ñayuu nacani inga jnūhun nuū rō ndese jnáma ya rohó, te núu tu quíjnahan jíin jnūhun ni canacani ri nuū rō xihna gā, na jnáhnú ndetū ñayuu ún. Te vésú maá rí chí ñin ndajéhé jeē quíji nde andiví nacani inga jnūhun núú, na jnáhnú ndetū. <sup>9</sup>Je ni cahán rí jíin ró, te suni súcuan cáhán tucu ri vijna: Na-ni tēe nacani inga jnūhun nuū rō, te núu tu quíjnahan jíin jnūhun jeē ní cajetáhú ró, na jnáhnú ndetū tēe ún.

<sup>10</sup>Te jeē cahán rí súcuan, ¿á ndúcú rí jeē cuajnúhún ñáyuu ruhū, chí Yaā Dios? ¿Chí ndúcú rí jeē cúsi ni ñayuu jíin rí, cájeni ni rō? Núu ndúcú gá rí jeē cúsi ni ñayuu jíin rí, te nasūu mozo Cristo cúu ri núu súcuan.

### Ndese ni jinū Pablo cúu de apóstol

<sup>11</sup>Te cástūhun rí nuū rō, hermano jijnáhan ró, jéē jnūhun jnáma ya yohó jéē nácani ri, nasūu jéē ní jeni ni maá rí jíin ñáyuu cúu. <sup>12</sup>Chi nasūu ñáyuu ni steén nuū rí, ni nasūu ñáyuu ni sáha jeē ní cutūhva ri, chi sa suhva máá Jesucristo ni steén nuū rí.

<sup>13</sup>Chi je ni cajini jnūhun ró ndese ni sáha ri nde saá, ná ni chíñúhún rí sahán jnáhan ri ñayuu hebreo. Te cájini rō jeē yóhoyo ni jito xeēn rí ñayuu cácandíje nuū Yaā Dios, te ni condíhvī ni rí snáā rí i núú. <sup>14</sup>Te váha ga ni cutūhva ri sahán ún vésú cuehē gā tēe nación rí jeē ní cajehnu jíin rí, chi ni condíhvī gā ni rí siquí tāca jéē ní cajequin jíi rí. <sup>15</sup>Te vésú súcuan te Yaā Dios je ni nacáji ya ruhū nde ná tu cacu ri, te ñin quiví te ni cusíi ni yā ni cana ya ruhū jeē quívi ri ndaha ya, siquí jeē yóhoyo ni cundáhú ni yā ruhū. <sup>16</sup>Te ni steén yā Sēhe ya nuū rí, návaha nacani ri jnūhun ndese jnáma ya ñayuu táca nación jeē tu jíin jnūhun ya. Yūcuán na te tu ní cájnūhun rí ni ñin ñayuu, <sup>17</sup>ni tu ní jéhén rí ñuu Jerusalén nuū tēe cácuu apóstol xihna gā vésú ruhū. Chi sa suhva ni jehēn-ni ri nde región Arabia, te saá te ni nuhūn tucu ri ñuu Damasco.

<sup>18</sup>Yūcuán na te nde ni yáha uní cuiyá, te ni jehēn rí Jerusalén. Te ni jini jnáhan ri jíin Pedro, te ni condee rí jíin de xahūn-ni quiví. <sup>19</sup>Te tu ní jíto ri nuū tāca gá apóstol, chi máá ñin-ni nuū Jacobo ñani maá Jítóho yō. <sup>20</sup>Jnūhun yáha jéē tēe ri cuajeē nuū rō, chí jíin Yaā Dios jeē ndaā cúu.

<sup>21</sup>Yūcuán na te ni jehēn rí ní región Siria jíin Cilicia. <sup>22</sup>Te ñayuu cácandíje

jeē yǎhi ndaha Cristo, jeē cáyucú región Judea, ná tu coto cuiti i nuū rī saá. <sup>23</sup> Chi máni jnūhun-ni ni cajini i cacahān ñayuu: Tēe ni jito xeēn yohó ndé saá, vijna chi nácani de jnūhun cándíje yó jéē ní nducú de snáa de nde saá, áchí i. <sup>24</sup> Te ni cacahān i jeē yóhyo cújéhnū Yaā Dios jeē súcuan ni sáha ya jíin rí.

### Jeē ní cajetáhú táca gá apóstol un Pablo

**2** Yūcuán na te nde nuū uxí cuñ cuiyā, te ni jehēn tucu ri Jerusalén jíin Bernabé, te suni ni jeca ri Tito ni jehēn de jíin rí. <sup>2</sup> Te ni jehēn rī chi máá Yaā Dios ni steén yā jeē jíni ñúhún quǎhin rī. Te ni candutútú sǎin nene tēe cácu-jéhnū nuū ñayuu cácaandíje ún. Te ni castūhun rí nuū de siquǐ jnúhun jnáma ya yohó jéē nácani ri nuū ñayuu táca nación tu jíni jnūhun ya. Te súcuan ni sáha ri návāha cuajnúhún de jniñu ri, te ma quéndōo cāhá jniñu sáha ri jíin jéē ni sáha ri. <sup>3</sup> Te ni tu ní cásáha fuerza de Tito, tēe ni jica jíin rí, jeē cóndee jnuni circuncidar de, vēsú nasūu tēe hebreo cúu de. <sup>4</sup> Te súcuan ni cundaā, vēsú ni quǐvicoo jecu tēe stáhú jéē sáha de jeē hermano cácuu de. Te tēe un ní quǐvicoo de návāha yuhu-ni coto de ndese ni ndulibre yō nuū ley circuncidar siquǐ jeē yǎhi yó ndaha Cristo Jesús. Chi cácuuni de jeē squícu tucu yó ley un, nduu tucu yó mozo nuū ley un. <sup>5</sup> Te tu ní cájetáhú cuiti rī nuū tēe ún, chi cúni rī jeē quéndōo nihin ró jíjnáhan ró jíin jnúhun jnáma ya yohó.

<sup>6</sup> Te máá tēe cácu-jéhnū nuū ñayuu cácaandíje ún, tuá na inga jniñu jéē ní cándacu de nuū rī. Te máá rí chi tu ní chíhi ri cuenta siquǐ jeē cácu-jéhnū de, chi suni Yaā Dios tu sáha ya cuenta, chi inuú-ni cúu ndivii tēe nuū yā. <sup>7</sup> Chi sa suhva ni cajini de jeē jnúhun jnáma ya yohó, ndíso jniñu ri nacani ri nuū ñayuu táca nación jeē tu cásáha circun-

cidar, nájñūhun nácani Pedro jnūhun un núu ñayuu hebreo jeē casáha circuncidar. <sup>8</sup> Chi Yaā Dios jeē ní tají Pedro jeē nácani de jnūhun nuū ñayuu hebreo, suni máá yá ni tají rúhū jeē nácani ri jnūhun nuū ñayuu táca nación tu jíni jnūhun ya.

<sup>9</sup> Jeē yúcuán, Jacobo jíin Pedro jíin Juan, ni cajini de jeē Yaā Dios ni jēhe ya jniñu luu yáha nuū rī. Te tēe un cacahān ñayuu cácaandíje jeē maá de cácu-jéhnū ga. Te ni cajni de ndaha ri jíin ndaha Bernabé, jeē ní castéén de jeē cáhiyo maní de jíin rí, jíin jéē ní cacundaā ni de jeē maá rí quingōo nacani jnūhun nuū ñayuu táca gá nación, te máá de jíjnáhan de nuū ñayuu hebreo. <sup>10</sup> Te máá iin-ni jeē ní cajicān de cúu jeē cónahán rí chindéé ñáhán rí ñayuu cándoho ndáhú, te jniñu ún je ni condihvī ni rī ni sáha ri.

### Jeē ni cāhān Pablo nuū Pedro

<sup>11</sup> Te ná ni quiji Pedro ñuu Antioquía, te ni cahān cají rí nuū de, chi ni stǎvi de jniñu. <sup>12</sup> Chi nde ná tu quecoo sava jnáhan de hebreo jeē ní tají Jacobo, te yéji de staā jíin ñayuu jeē násuú hebreo cácuu. Yūcuán na te nuū ní quecoo tēe ún, te ni cusǎin de jeē tuá yéji de jíin i, chi yúhú de jeē cúni táca tēe un jéē tuá squícu de ley jnáhan de hebreo. Chi áchí ley jeē ma cúu caji de staā jíin ñayuu jeē tu cásáha circuncidar. <sup>13</sup> Te sava ga tēe hebreo jeē cácaandíje, suni ni cacujiyo de nuū i, nájñūhun ni sáha Pedro, chí cáyūhú de jeē cúni tēe ún. Te nde máá Bernabé ni cascáhán de ni cujiyo. <sup>14</sup> Yūcuán na te ni jini rī jeē ní canayūhú de caji de staā jíin ñayuu ún, cúu jeē tuá jíca de jíin modo jeē cahán jnūhun jnáma ya yohó. Te ni cahān rī nuū Pedro, jíto jíinúu táca de: Róhó jéē cúu tēe nación yō hebreo, tuá squícu ró ley jnáhan yō hebreo, chí yéji rō jíin ñayuu ún. ¿Te najehē safuerza rō i jeē squícu i ley jnáhan yo hebreo núu súcuan? ni achi rí.



### **Īin-ni modo jnáma ya ñayuu hebreo jíin táca gá nación**

<sup>15</sup>Te yóhó chi cúu yó ñayuu hebreo, te cácahān yō jeē násūu ñayuu táca gá nación casáha cuēchi cácuu yó. <sup>16</sup>Te vēsú súcuān te jíin yō jeē ní ĩin yó tu quéndōo ndāā yō nuū Yaā Dios jeē squícu yó jniñu ndácu ley Moisés jehān, chi máá jéē candíje yó jeē Jesucristo ndahva yā cuēchi yó. Jeē yúcuān suni máá yó ni candíje yó Jesucristo, návāha ndahva yā cuēchi yó síquī jeē candíje yó, nasūu jíin jéē nducú yó squícu yó ley un. Chi áchí tutu ĩi: Ni ĩin ñayuu ma quéndōo ndāā i nuū Yaā Dios jíin jéē nducú i squícu i jniñu jeē ndácu ley, achí.

<sup>17</sup>Te máá yó ñayuu hebreo, núu cúní yō jeē ndahva Yaā Dios cuēchi yó síquī jeē ni jíhī Cristo jehē yō, suu cúu jeē jécūhun ni yō jeē suni ñayuu casáha cuēchi cúu yó, nájnūhun táca gá ñayuu. Núu súcuān ¿te á cuēchi ni sáha yó jeē ni stóo yó ley jehān ná ni candíje yó Cristo? Tú cuíti jeē súcuān. <sup>18</sup>Chi sa núu naquihīn tucu yó ley jeē ni stóo yó un, te súcuān téē yó cuēchi síquī máá yó. <sup>19</sup>Chi ruhū, nájnūhun ni jíhī rī ni sáha ley un, te jeē yúcuān má cúu ga ndacu jniñu nuū rī. Te súcuān te cuu cotecu rī jeē sáha rī jeē cuní Yaā Dios. <sup>20</sup>Chi nájnūhun je ni jíhī rī jicā cruz jíin Cristo, te vijna chi tuá técu rī jeē máá rí, chi máá Cristo cúu jeē técu ĩni rī. Te jeē técu rī ĩni ñayīvi yáha vijna cúu jeē candíje rī jeē Sēhe Yaā Dios chindéē ñāhān yā ruhū. Chi ni cundáhú ni yā ruhū te ni socō yā máá yá jehē rī. <sup>21</sup>Núu súcuān te tu cúní rī casi rī nuū jnúhun jeē ndáhva Yaā Dios cuēchi yó síquī jeē yóhō vāha ni yā jíin yó. Chi núu jeē quéndōo ndāā yō nuū yā jeē nducú yó squícu yó ley jehān, yūcuān na te tu ndé jéjníñu jeē ni jíhī Cristo nuú.

### **Jnúhun ley jíin jnúhun cándíje**

**3**Róhó hermano ñuu Galacia, ¿naun tu cájecūhun ni rō? ¿Ndé téē ni saca núu xini rō jeē tuá cájetáhú ró jnúhun ndāā? Chi ná ni canacani rī jnúhun ya nuū rō, te cájī ndasí ni cájecūhun ni rō jeē ni jíhī Jesucristo jicā cruz jehē rō. <sup>2</sup>Īin-ni jnúhun yáha cájnūhun rí rohó: ¿Ndese ni canihīn rō Espírītu Santo? ¿A jéē ní cacundeyí ró squícu ró jniñu ndácu ley Moisés? Tú cuíti, chi jeē ní cacandíje ró jnúhun jnáma ya rohó jéē ní cajini sōho ró. <sup>3</sup>¿Ndese cúu jeē tu cájecūhun cuíti ni rō? Chi xīhna gā ni cacandíje ró jéē ni jíhī Cristo jeē jnama ya rohó, te ni canihīn rō Espírītu. Te vijna ¿á cájeni ni rō jeē stóo ró jnúhun ún te fuerza máá ró squícu ró ley un, te cācu ró naún? <sup>4</sup>Núu súcuān te tu ndé ní jéjníñu cuíti jeē ní castóho ñayuu rohó síquī jnúhun jnáma Cristo rohó, chi vijna cánducú ró squéndōo ró jnúhun ún. Nacā jeē váha te núu jeē tu ní castóo ró, chi sa cácaandíje ndije ró yá. <sup>5</sup>¿Te na síquī cúu jeē jéhe Yaā Dios Espírītu yā nuū rō te sáha ya jniñu jéhnu mēhñu ró? Tu sáha ya síquī jeē cánducú ró squícu ró ley un, chi síquī jeē ní cacandíje ró jnúhun jnáma ya rohó jéē ní cajini sōho ró.

<sup>6</sup>Abraham ni candíje de jeē sáha Yaā Dios jeē ni jéjníñu ya, te jeē yúcuān ní ndahva yā cuēchi de. <sup>7</sup>Núu súcuān te na jécūhun ni rō jíjnāhan ró jéē ñayuu cácaandíje jeē sáha Yaā Dios jehē ĩ, ndívi ĩ yucūn Abraham síquī jeē súcuān cácaandíje ĩ. <sup>8</sup>Chi nde jehān je cáhān tutu ĩi jeē ñayuu táca nación tu jíin jnúhun Yaā Dios, ndahva yā cuēchi ĩ núu candíje ĩ ún. Te nde ná tu cuu táca jéē yáha te je ni jejnúhun ya jnúhun vāha yáha nuū Abraham: Jeē rohó cúu jeē quéndōo ndetū ñayuu táca nación. <sup>9</sup>Núu súcuān te ñayuu cácaandíje, quéndōo ndetū ĩ jíin Abraham, téē ni candíje jeē ni jéjníñu ya.

<sup>10</sup>Te sa jnahnū ndetū ñayuu jeē cánducú i quendōo ndaā i jeē jiín ley Moisés. Chi súcuan yósó núu tútu ii: Jnahnū ndetū tāca ñayuu jeē tu squícu ndihí cuítí jnūhun yósó núu tútu ley, áchí.

<sup>11</sup>Núu súcuan te cájí cúu jeē ni ñin ñayuu ma quéndōo ndaā i nuū Yaā Dios siquī jeē nducú i squícu i ley un. Chi cáhán tutu: Ñayuu jeē ní ndahva yā cuēchi i, técu i jeē candíje i jeē sáha ya jehē i, áchí. <sup>12</sup>Te ley Moisés tu cáhán jeē cótecu yō níí cáni siquī jeē candíje yó, chi sa suhva cáhán: Núu ndé ñayuu squícu jniñu yáha, te cotecu i sáha, áchí.

<sup>13</sup>Te Cristo ni jnama ya yohó núu jnūhun cáhán ley jeē jnahnú ndetū yō siquī cuēchi yó, chi máá yá ni ndoho siquī jnūhun jeē jnahnú ndetū yō. Chi yósó núu tutu ii: Tāca ñayuu condita caa jicā yújnu, jnahnū ndetū i, áchí. <sup>14</sup>Te Cristo Jesús ni jihí yā jicā yújnu cruz návāha quendōo ndetū ñayuu tācá nación sáha ya. Chi jnūhun jeē ni jéjñūhun ya quendōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yō, te nihin yō Espíritu jeē ni jéjñūhun ya quiji.

### **Siquī ley jiín siquī contrato jeē ni jéjñūhun ya**

<sup>15</sup>Hermano, na cáhán rī ñin jnūhun ndese cásáha ñayuu ñayiví: Núu ñin tēe sáha de ñin contrato chí ñin acta, te núu je ni cucutú ni sáha de firmar, te ma cúu ga najnanū, ni ma cúu jecosō gā. <sup>16</sup>Te suni súcuan ni sáha Yaā Dios ñin contrato jeē ni jéjñūhun ya nuū Abraham jiín yúcūn de jeē quíji. Te tu cáhán tutu ii siquī cuehē yucūn de, chi sa cáhán siquī ñin-ni yucūn de, te suu cúu Cristo. <sup>17</sup>Núu súcuan te jnūhun jeē cahán rī yāha cúu jeē xihna gā ni sáha Yaā Dios ñin contrato jiín Abraham, jeē quiji Cristo jnama ya yohó, te ni sácutú yá. Yūcuán na te ni yāha cuūn ciento ocō uxī cuiyā, te sáá te ni jēhe ya ley nuū Moisés. Te ley un

jeē ní quee cueé gá, ma cúu nacanu contrato un, ni ma cúu casi nuū jnūhun jeē ni jéjñūhun ya jeē jnama ya yohó. <sup>18</sup>Chi núu jeē jiín ley Moisés jnama Yaā Dios ñayuu, yūcuán na te nasūu siquī contrato jeē ni jéjñūhun ya cúu. Chi sa suhva siquī maá jéē ni jéjñūhun Yaā Dios nuū Abraham cúu jeē ní jnama ya de.

<sup>19</sup>Núu súcuan ¿te ndese jéjñiñu ley Moisés? Jéjñiñu chi ni jēhe ya un cuéé gá návāha nastūu cuēchi i. Te ni ndacu jniñu máá-ni nde ná tu quiji Cristo, Yaā cúu yucūn jeē ni jéjñūhun Yaā Dios jeē quíji. Te nde ná ni jēhe Yaā Dios ley un núu ñayuu, te ni tají yá tācá ndajéhé yā ni cacastūhun núu Moisés, te Moisés ni nacachí nuū i. <sup>20</sup>Te sñin cúu jnūhun jeē ni jéjñūhun ya nuū Abraham jeē quíji Cristo, chi máñúhún-ni ya ni jejnūhun, te tu ní jini ñúhún ni ñin jeē nacachí nuū Abraham.

### **Siquī ndese jéjñiñu ley jenahán**

<sup>21</sup>Núu súcuan ¿te á cúní cahán jeē ley jeē ni jēhe Yaā Dios nuū Moisés, téjiyo jeē ni jéjñūhun ya ún? Tú cuítí jeē súcuan. Chi núu jeē ni jēhe Yaā Dios ñin ley jeē cótecu ñayuu níí cáni sáha, yūcuán na te quendōo ndaā i nuū yā siquī jeē squícu i jniñu ndácu ley un núu. <sup>22</sup>Te tuú chi yósó núu tútu ii jeē ndihí ñayuu ñayiví, nájnūhun yñdihyū i vecāa chí cáyihí i chíji cuēchi. Te súcuan cúu návāha tācá i jeē candíje i jeē ni jíhi Jesucristo jehē i, nihin i máá jéē ni jéjñūhun ya nuū i siquī jeē candíje i ún.

<sup>23</sup>Chi nde ná tu quee jnūhun candíje yó Cristo, te nájnūhun ni yñdihyū yō ni sáha ley jenahán, návāha condetu yó quívī quiji Cristo, Yaā candíje yó. <sup>24</sup>Núu súcuan te ley ni cuu ñin jeē ndíto yóhó nájnūhun ñin mozo ndíto sūchi lúli, te ni jéjñiñu nde quívī ní quiji Cristo, návāha candíje yó jéē ni jíhi yā jehē yō, te ndahva Yaā Dios cuēchi yó. <sup>25</sup>Te vijna jeē ní quee Cristo, Yaā candíje yó, te tuá

yíhi yó ndaha ley jeē cúu nájñuhun mozo ndíto yóhó.

<sup>26</sup> Chi ndivii rō cácuu sēhe Yaā Dios siquī jeē ní cacandíje rō Cristo Jesús. <sup>27</sup> Chi tāca rō jeē ní jendute rō siquī jeē ní quívi rō ndaha Cristo, ni sáha ya jeē ní nduu rō nájñuhun cúu máá yá. <sup>28</sup> Te vijna chi tuá cúu rō ni ñayuu hebreo ni ñayuu griego, ni mozo jeē ní jeen ñayuu, ni ñayuu sájñiñu cuenta maá, ni tēe ni ñahan. Chi ñin na cúu rō núu yá jeē cáyihí rō ndaha Cristo Jesús. <sup>29</sup> Te núu cáyihí rō ndaha Cristo, núu súcuan te yucūn Abraham cácuu ndije rō, te nihin rō maá táhū jeē ni jéñuhun ya.

**4** Jeē cahán rī jín rō jijnáhan rō cúu jeē yáha: ñin sūchi chíí táhū, vēsú maá i naquihin ndíhi jeē névāha tátá i, te núu lulí i chi ñnuú cúu i jín mozo. <sup>2</sup> Chi yíhi i ndaha tāca jéē ndíto i jín jéē ndíto ndajñiñu i, nde quee quívi jeē ní jeni tátá i, te sáá te nihin i. <sup>3</sup> Te suni súcuan yóhó, chi nde ná tu jecūhun ni yō siquī Cristo te ni cuu yó nájñuhun sūchi lulí, te ni yíhi yó chíji tāca costumbre jeē ní cajequin ñayuu ñayívi. <sup>4</sup> Te nde ná ni quee quívi jeē ní jeni Yaā Dios, te ni tají yá Sēhe ya, ni cacu ya chíji ñin ñahan, te ni cacu ya yucūn ñayuu nación hebreo jeē cáyihí chíji ley Moisés. <sup>5</sup> Súcuan ni cacu ya návāha jnama ya yohó jéē tuá quíhi yó chíji ley un, te návāha naquihin Yaā Dios yohó cuu yó sēhe ya.

<sup>6</sup> Te siquī jeē cácuu rō sēhe ya, te ni tají Yaā Dios Espíritu Sēhe ya ni quívi ñin anuá rō, te sáha ya jeē cácahān jee rō: Tátá maá ná. <sup>7</sup> Núu súcuan te tuá cácuu rō nájñuhun mozo, chi sēhe ya cácuu rō. Te jeē cácuu rō sēhe Yaā Dios, te suni nihin rō maá táhū jeē ni jéñuhun ya jeē jín Cristo.

### Jeē nacani ni Pablo siquī ñayuu cacandíje

<sup>8</sup> Chi nde saá, nde ná tu jecūhun ni rō ndese Yaā cúu Yaā Dios, te ni cacu rō

mozo nuū tāca jéē násūu yāā ndaā cúu. <sup>9</sup> Te vijna chi je cájini rō ndese Yaā cúu ya, te vāha ga na cáhán rī jeē maá yá je jíní yā rohó. Núu súcuan ¿te najehē cá-cuni rō nandió cóo rō nduu tucu rō mozo nuū tāca costumbre ñayuu ñayívi jéē tu níhín jñiñu cuiti? <sup>10</sup> Chi máni jeē cánēe ñi rō quívi jín yóo jín vico jín cuíyā. <sup>11</sup> Te yúhú rí sanaa te tu ní jéñiñu cuiti jeē ní nacani rí jñuhun nuū rō.

<sup>12</sup> Cáhán ndahú rí jín rō hermano, jeē na cáni ni rō nájñuhun jéni ni maá rí jeē tuá squícu rí costumbre ñayuu hebreo. Chi ruhū ni nasáha rí maá rí nájñuhun máá rō jeē tu ní cáyihí rō núu ley costumbre ñayuu hebreo. Te tú na vé ni cása rō jéē cucuíhyá ni rí nde saá. <sup>13</sup> Chi cájini rō ndese ni cuu ná ni nacani núu rí jñuhun nuū rō ndese jnáma ya yohó. Chi siquī jeē cūhú rí te ni jecuíñi rí ñuu rō ni nacani rí jñuhun. <sup>14</sup> Te vēsú jñundóho ni cuu jeē ní cocuhū rí, te tu ní cásjéē ni rō nuū rí, ni tu ní cásquéhichí ni rō ruhū. Chi sa ni cajetáhú rō ruhū nájñuhun jeē cúu rí ñin ndajéhé Yaā Dios, chí nájñuhun jeē cúu rí maá Cristo Jesús. <sup>15</sup> Núu súcuan ¿te najehē cúu jeē tuá cá-cusiñi ni rō jín rí vijna? Chi náhán rí jeē vāha ni casáha rō jéē ní cajnahuhū ni rō núu jeē cúu te tava rō tinūu váha máá rō, cuāha rō nduu tinūu rí nuú. <sup>16</sup> Te vijna ¿á ní nduu rí enemigo rō siquī jeē cachí rí máni jñuhun ndaā nuū rō, chí naún?

<sup>17</sup> Te cáhiyo tēe jeē cándihvi ni siquī rō jijnáhan rō, te nasūu jéē quéndōo vāha ánuá rō, chi sa jeē cácuni de nasásñin de rōhó jín ruhū, návāha condihvi ni rō jeē cúu máá de. <sup>18</sup> Te íyo vāha jeē cándihvi ni de jehē rō, te núu jeē quéndōo vāha ánuá rō cúu núu. Chi níni jíní ñuhún sáha de jeē vāha rōhó, vēsú núu íne rí jín rō chí núu tú rí íne. <sup>19</sup> Séhē máni jijnáhan rō, jeē siquí rohó cúu jeē inga jínu jñahuhū ni rí, chí nájñuhun ñin ñahan scácu sēhe, súcuan ndóho rí jehē rō. Te suu cúu jeē jñahuhū ni rí ndétu rí

jeē na ndúndaā anuá rō ndacu ró Cristo. <sup>20</sup>Nacā jeē váha núu jeē ndeé rí jíin ró vijna nūhún, návāha cuu cahān manī rī jíin ró. Te tu cújnúní cuiti ni rī ndese ga cúu jeē cáni ni rī síquī rō.

### **Jnūhun yátá síquī Agar jíin Sara**

<sup>21</sup>Róhó jíjnāhan ró jéē cácu ni rō quíhi ró chíi ley Moisés, cachi nuū rī: ¿A tu ní cájini sōho ró ndese cáhán ley un? <sup>22</sup>Chi cáhán tutu ii jeē Abraham ni iyo uū sēhe yí de. Te iin i cúu sēhe Agar, ñahan cúu mozo vehe de. Te inga i cúu sēhe ñahan íyó libre, suu ñasihí de Sara jeē ní cuu ña ñahan numá. <sup>23</sup>Te sēhe ñahan cúu mozo, ni cacu i nájnūhun cácu táca gá sūchi lúlí. Te sēhe ñahan cúu libre, ni cacu i máá síquī jeē súcuan ni jejnūhun Yaā Dios. <sup>24</sup>Te yāha cúu iin jnūhun yátá, chí ndíndúú ñahan un cúu ña nájnūhun ndíndúú contrato jeē ni sáha Yaā Dios jíin ñáyuu. Máá ñahan nání Agar, cúu ña nájnūhun contrato ley jeē véji nde yucu Sinaí. Te ñayuu cáyíhi chíi contrato ley, cácuu i mozo nuū ley un. <sup>25</sup>Chi Agar cúu nájnūhun ley jeē ni jéhe Yaā Dios xinī yucu Sinaí jeē iin nde Arabia. Te cúu ña nájnūhun Jerusalén, ñuu ñayuu hebreo, jeē íyó vijna, chí táca sēhe ñuu Jerusalén, cácuu i nájnūhun mozo nuū ley un. <sup>26</sup>Te Jerusalén jeē íyó andiví, chí sa suhva íyó libre nájnūhun Sara. Te yóhó ñáyuu cácandíje, nájnūhun sēhe un cácuu yó, chí íyó libre yō nuū contrato ley. <sup>27</sup>Chi suhva yósó núu tútu ii: Róhó jeē ní cuu ró ñahan numá jéē tú sēhe ró, na cúsiī ni rō.

Róhó jéē tu ní jéhnde chíi ró jéē scácu ró, na cána jee ró jéē cúsiī ni rō.

Chi coo cuehē gā sēhe róhó jéē ní cuu ró ñahan numá vēsú ñahan jeē jé ní scácu sēhe.

Achí tutu.

<sup>28</sup>Hermano, sēhe Yaā Dios cácuu yó, chí súcuan ni jejnūhun ya nuū yō, nájnūhun ni jejnūhun ya nuū Abraham

jeē cacu sēhe de Isaac. <sup>29</sup>Te nde saá te inga sūchi ní cacu nájnūhun cácu táca gá ñayuu, ni jito xeēn i Isaac, sūchi ní cacu ni sáha Espíritu. Te nájnūhun ni iyo saá, suni súcuan cájito xeēn ñayuu táca sēhe Yaā Dios nde vijna. <sup>30</sup>¿Te ndese cáhán tutu ii? Achí: Quenehen ró ñahan cúu mozo na quíhín ña jíin sēhe ña. Chí sēhe ñahan cúu mozo, ma nihín i tahū jíin sēhe ñahan libre, achí yá jíin Abraham. <sup>31</sup>Núu súcuan hermano, tu cúu yó nájnūhun sēhe ñahan cúu mozo, chí nájnūhun sēhe ñahan libre cúu yó.

### **Na cuíni nihin yó jíin jnūhun jeē ni sáha libre yohó**

**5** Te Cristo ni sáha libre yā yohó jéē tuá yíhi yó chíi ley Moisés. Núu súcuan te cuíni nihin ró jíin jnūhun jeē ni sáha libre yā yohó, te ma ndávicoo tucu ró cuu ró mozo nuū ley un.

<sup>2</sup>Sáha ró cuenta jíjnāhan ró, chí ruhū Pablo cahán rī jíin ró jeē núu squícu ró ley circuncidar, yūcuán na te tu nihín jnínu cuiti jeē ní candíje ró jéē ni jíhi Cristo jehē rō. <sup>3</sup>Te inga jínu cáhán nihin rī jíin táca téé cánducú cuu circuncidar, jeē núu súcuan te suni cánuú jéē squícu de ndívii cuiti gā jnūhun cáhán ley Moisés. <sup>4</sup>Róhó jéē cánducú ró quendō ndaā rō jeē squícu ró ley un, je ni casiaá rō Cristo núu súcuan. Je ni castóo ró jnūhun jeē ndahva yā cuēchi ró síquī jeē cundáhú ni Yaā Dios rohó. <sup>5</sup>Te máá yó chí cájica yó jíin Espíritu, te cácandíje yó jéē ní ndahva yā cuēchi yó, te jeē yūcuan ñūhun ni yō jeē quendō ndaā yō quiví cuíni yó núu Yaā Dios. <sup>6</sup>Chi yóhó jéē cáyíhi ndaha Cristo Jesús, vēsú núu jeē cúu yó circuncidar chí tu cúu yó, tú na vé nihín jnínu. Jeē nihín jnínu cúu jeē candíje yó jeē sáha ya jehē yō. Te yūcuan sáha jeē cundáhú ni yō jnāhan yó.

<sup>7</sup>Vāha ni cacandíje ró núu. ¿Te ndé iin ni jesi jeē tuá cájetáhú ró jnūhun ndaā núu súcuan? <sup>8</sup>Jnūhun jeē ní cascáhán de

róhó, chi tú vēji nuū maá Yaā ní cana róhó ní quīvicoo ró ndaha ya. <sup>9</sup>Te ma náā ni rō jeē tēe cástáhú róhó, jñuhun cástéén de cúu nájñuhun levadura, chi vēsú jecu-ni levadura, te ndáa ndihī ñu-jen sáha. <sup>10</sup>Te cúcáhnu ni rī jeē maá Jítóho yō sáha ya jeē ma cándīje ró jñínáhan ró inga jñuhun jeē sīn cáhán. Te maá Yaā Dios cuáha ya castigo tēe jeē sáca núu xinī rō, núu na-ni tēe cúu de.

<sup>11</sup>Te ruhū, hermano, núu jeē nácani ga ri jñuhun ley circuncidar nde vijna, te jñáhan ri ñayuu hebreo ma cóto xeēn i ruhū nuú. Chi ma quití ni i jeē nácani ri jñuhun jeē ni jñī Cristo jicā cruz, núu jeē súni nácani ri jñuhun circuncidar nuú. <sup>12</sup>Te táca tēe jeē sáca núu xinī rō siquī jñuhun ún, vāha ga na cáhnde gā de maá de núu súcuan.

<sup>13</sup>Chi maá ró jijnáhan ró hermano, ni cana ya rohó návāha coo libre rō nuū ley un. Te vēsú iyó libre rō, te ma cáni ni rō jeē cúu quīvicoo ró táca cuēchi jeē cúu modo neé cúní maá ró, chi sa suhva na sáha ró maá ró mozo jeē chindéé ñáhán ró jñáhan ró siquī jeē cundáhú ni rō i. <sup>14</sup>Chi je ni squícu ró ndihī ley núu squícu ró iin-ni jñuhun ndácu jniñu yáha: Cundáhú ni rō jñáhan ró nájñuhun cundáhú ni rō maá ró, achí. <sup>15</sup>Te núu máni jeē ndóna xeēn rō siquī jñáhan ró jēe cuajnáhan ró, te coto ma snáa rō jniñu jeē ni sáha ya mēhñu ró jijnáhan ró.

### Modo cuní ñayuu tu cándīje jín modo sáha Espíritu

<sup>16</sup>Súcuan cáhán rī jín ró jijnáhan ró: Caca ró nájñuhun cúní maá Espíritu, te yūcuán na te ma sáha ga rō modo jeē cuní maá ró. <sup>17</sup>Chi táca jēe cuní maá yó, yūcuan jési nuū jeē cuní maá Espíritu. Te jeē cuní Espíritu, jési nuū modo neé jēe cuní maá yó. Te jeē ndindúú yáha chi cájesi nuū jñáhan, te jeē yūcuan tu cúu sáha ró jniñu vāha jeē cuní rō sáha ró.

<sup>18</sup>Te núu maá Espíritu steén nuū rō, núu súcuan te tuá cáyihī ró chíji ley jenahán.

<sup>19</sup>Te iyó ndijin táca jniñu cásáha ñayuu cájica jín modo neé maá, te yáha cúu: Cásíquí ndéé jñáhan i, cásáha i jniñu jnehén, cásáha neé ndasí i. <sup>20</sup>Cáchiñúhún i ídolo, cásáha tásí i, cájito uhū jñáhan i, cájejnáhan i, cácu-cuñí ni i. Te yachī cáquitī ni i, te cándihvī ni i jeē cúu máa-ni i, te cáte-jnáhan i cásásín i maá i. <sup>21</sup>Te cácu-cuésún ni i, cájehni i ndīyi, cánajini i, cásáha i vico neé, jín táca gá jeē súcuan. Te cáhán nihin ri jín ró, nájñuhun je ni cahán rī jín ró saá, jeē ñayuu casáha súcuan, ma nihín tahú i quīvicoo i ñuu nuū ndácu Yaā Dios jniñu.

<sup>22</sup>Te ñayuu jeē nduú i jín Espíritu, táca jniñu yáha sáha ya jín i: Jeē cundáhú ni jñáhan, jeē cúsiñi ni, jeē iyó ndeyí sñi ni, jeē iyó paciencia, jeē maní ni, jeē vāha ni, jeē squícu vāha, <sup>23</sup>jeē tu sáha jeē cujéhnu, jín jēe jési modo jeē cuní maá. Te tú na ley cacán cuēchi siquī rō núu sáha ró táca jniñu yáha. <sup>24</sup>Te ñayuu cáyihī ndaha Cristo, nájñuhun je ni cajehni i modo neé maá i jicā cruz, nde jín táca jēe ndīyo neé ni i te cútíndí i. <sup>25</sup>Te jeē súcuan ni jēhe maá Espíritu iin vida jeē núu yō, te suni na cáca yó jín modo steén Espíritu.

<sup>26</sup>Te ma sandúxí yó jēe squití ni yō jñáhan yó, te ni ma cucuésún ni yō siquī jñáhan yó.

### Jñuhun jeē chindéé ñáhán yó jñáhan yó

**6** Hermano, núu iin jñáhan ró ni sáha cuēchi, te róhó jēe cájica jín Espíritu, na náchuhun ichí ró i. Te jín jñuhun vitá cahán rō jín i, te suni condito ró maá ró jeē ma cacán ini rō sáha ró táca cuēchi. <sup>2</sup>Te chindéé ñáhán ró jñáhan ró núu na vé cúu jeē ndóho i, chi súcuan cúu jeē squícu ró ley Cristo.

<sup>3</sup> Chi núu iin ñayuu jéni ni i jeē ñáyuu teyí cúu i, vēsú nasūu sūcuan cúu, te stáhú i máá i núu sūcuan. <sup>4</sup> Te tācá iin iin ró na cóto ndee rō ndese cáa jniñu sáha ró. Te núu vāha sáha ró, yūcuán na te cuu cusī ni rō jíin jēē sáha máá ró, te tu níni jēē scáni jnāhan ró máá ró jíin jnāhan ró. <sup>5</sup> Chi tācá iin iin yó cánuú squícu yó jíin jniñu ní jéhe ya nuū maá yó.

<sup>6</sup> Te róhó jēē cascuáha jnūhun vāha ya, na chindéē ñáhán ró tēe cástéén nuū rō jíin táca jēē vāha cánevāha ró.

<sup>7</sup> Ma stívi ró cani ni rō jeē cuu sáha ró cuéchi. Chi ma cúu sácata rō nuū Yaā Dios cani ni rō jeē tu sáha ya cuenta. Chi tāca núu ndese sáha ñayuu, suu yūcuán nanihīn i. <sup>8</sup> Chi ñayuu jeē sáha i jeē cuní modo neé máá i, nihīn i jeē jnahnú ndetū i sáha modo jeē cuní maá i ún. Te ñayuu jeē sáha jeē cuní maá Espíritu, chi nihīn i jeē cótecu i níí cáni andíví sáha Espíritu. <sup>9</sup> Te ma cuíta yó jeē sáha yó jniñu vāha núu sūcuan, chi jeē quée maá quívī te nanihīn yō, te núu ma cuíta yó. <sup>10</sup> Núu sūcuan te tāca jínu jeē cúu sáha yó, te na sáha vāha yó jíin táca ñáyuu, te hermano yō jeē cácanđje cúu jeē cánuú gá.

**Saludo jíin jnúhun  
cástūhun Pablo jeē sándīhí**

<sup>11</sup> Condēhe ró jeē náhnu letra tēe ri cuajeē nuū rō jíināhan ró, chi ndaha máá

rí tēe ri yāhá. <sup>12</sup> Te tēe jeē casáfuerza de róhó cuu ró circuncidar, cásáha de siquī jeē cácani de cuajnúhún ñáyuu de. Te cásáha de návāha ma cóto xeēn ñayuu de jeē cácanani de jnūhun jeē ni jíhī Cristo jehē yō. <sup>13</sup> Te ni máá de jeē casáha de circuncidar, suni tu squícu vāha de ndihī ga ley jenahán. Te cácani de jeē cuu ró circuncidar, návāha cuu sátéyí de máá de núu quihīn ró jnúni circuncidar sáha de. <sup>14</sup> Te ruhū tu cúní rī satéyí rí maá rí siquī ní iin jeē yúcuán, chi máá iin-ni siquī jeē ni jíhī Jitoho yō Jesucristo jíca cruz. Chi siquī yūcuán cúu nájñūhun ni jíhī rī, chi ni siaá rī tāca jēē iyó ini ñayíví, te suni nájñūhun iin ndīyí cúu rī nuū ñayíví. <sup>15</sup> Chi núu yāhi yó ndaha Cristo Jesus, te tu níhín jniñu núu cúu yó circuncidar chí tuú. Chi jeē níhín jniñu cúu jeē ní nasájeé yá anuá yō. <sup>16</sup> Te ñúhun ni rī jeē tāca ró jeē jíca ró jíin modo yáha, na sáha ga yā jeē coo ndeyí coo siī ni rō, te cundáhú ni yā rohó. Te suni ñúhun ni rī jeē sūcuan sáha ya jíin táca gá i jeē cúu ndije i ñayuu cácanđje Yaā Dios.

<sup>17</sup> Te vijna jíin níí gá cuahān yō, cúní rī jeē ma stáhān gā ni iin ñayuu ruhū. Chi yiqui cúñu rī ndíso seña jeē ni tújī rī ni ndoho rī jeē cúu rī mozo maá Jítoho yō Jesús.

<sup>18</sup> Hermano, ñúhun ni rī jeē na sáha ga Jitoho yō Jesucristo jeē vāha róhó jíināhan ró. Sūcuan na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU EFESO

**1** Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te téé ri carta yáha cuá-jeē nuū rohó ñayuu ñuu Efeso, jeē cácuu ró ñayuu maá yá jeē cacandíje ró Cristo Jesús. <sup>2</sup>Te ñúhun ni ri jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo siī ni rō.

### Jeē sáha Cristo jeē quéndōo váha ánuá yō

<sup>3</sup>Na cáhán yō jeē yóhoyo cújéhu Yaā Dios, Yaā cúu Tatá Jitoho yō Jesucristo. Chi ni jēhe ya táca jéé váha íyó andiví jéé quéndōo váha ánuá yō, chi yíhi yó ndaha Cristo. <sup>4</sup>Chi nde ná tu jecōo ñayiví te ni nacāji ya yohó jéé quívi yó ndaha Cristo, návāha coo ndoo ánuá yō te caca ndaā yō nuū yā. <sup>5</sup>Je ni cundáhú ni yā yohó nde saá, te ni tana ya yohó jéé náqui-hin séhe ya yohó. Te jíin Jesucristo ni sáha ya súcuan, chi ni nujnahan ni yā sáha ya. <sup>6</sup>Te jeē yúcuan níni na cáhán yō jeē yóhoyo cújéhu ya, chi yóhoyo váha ni sáha ya yohó jíin táca jéé váha ni yā, siquī jeē yíhi yó ndaha Cristo, Séhe ya jeē maní yā jíin. <sup>7</sup>Te siquī jeē yóhoyo váha ni yā jíin yó, te Séhe ya un ní jnama ya yohó jéé ni jíhi yā jehē yō, te ni ine cáhnu ni yā nuū cuéchi yó. <sup>8</sup>Te ni steén yā jeē cundáhú ndasí ni yā yohó, te ni sáha ya jeē jécūhun ni yō te cundíchí yó jíin jnúhun ya. <sup>9</sup>Te ni sáha ya jeē cuni yō ñi jnúhun ya jeē ní yisāhí, jeē tu ní sáha ya jeē cuni ñayuu jenahán. Chi súcuan ni tee ni yā nde saá, te nujnahan ni yā sáha ya. <sup>10</sup>Te yāha cúu jnúhun ún: Nde na queé tiempo te sáha ya jeē ndíhi jeē yúcu andiví jíin jéé yúcu ñayiví, inuú-ni nduu, quíhi ndaha Cristo.

<sup>11</sup>Te siquī jeē yíhi yó ndaha Cristo, te nihin yō tahū yō, chi je ni nacāji Yaā Dios yohó nde saá. Chi súcuan ni tee ni maá yá, chi sáha ya táca-ni jeē jé ni cundaā ni yā jeē nujnahan ni yā sáha ya. <sup>12</sup>Súcuan ni sáha ya návāha máá rí jeē xíhna gā ni cacandíje ri Cristo, caca ndaā ri te súcuan sájéhu ni yā jeē yóhoyo luu cújéhu ya. <sup>13</sup>Te suni máá ró jíinánan ró, ni cajini ró jnúhun ndaā jnúhun váha jeē jnama ya rohó, te ni cacandíje ró Cristo. Te ni canihin ró Espiritu Santo jeē ni jécūhun ya jeē cuáha ya. Te ndéé Espiritu yā ún ini anuá yō, te cúu ya nájnūhun sello jeē steén jeē cúu yó séhe Yaā Dios. <sup>14</sup>Te sáha ya jeē jiní ndije yó jéé cucuéeé gá te cuāha Yaā Dios tahū yō, nde na sínu ya jniñu jeē jnama ya ñayuu yā. Te quiví ún cahán yō jeē cújéhu ya, chi yóhoyo luu cújéhu ya.

### Jeē jicán tahú Pablo jehē ñayuu cacandíje

<sup>15</sup>Te ruhū ni jini jnúhun ri ndese cá-candíje ró jéé ni sáha Jitoho yō Jesús jehē rō, jíin ndese cá-cundáhú ni rō ndíhi ñayuu cáyihí ndaha Yaā Dios. <sup>16</sup>Te jeē yúcuan tu jécuiñi ri jeē nácuatáhú rí jehē rō, te jeē jicán tahú rí te tu nāā ni rí cacān tahú rí jehē rō. <sup>17</sup>Chi jicán tahú ri jeē na sáha Yaā Dios jeē jécūhun váha ni rō te ndundíchí ró jíin jnúhun ya, te cuni gā rō ndese Yaā cúu ya. Chi máá yá cúu Yaā Dios Jitoho yō Jesucristo, te cúu ya Tatá yō jeē lúu ndasí cújéhu. <sup>18</sup>Te jicán tahú ri jeē na sándijin gā yā nuū jeē níjnūni rō, návāha jecūhun ni rō ndese cáa ndíhi jeē cáñuhun ni rō nihin rō siquī jeē ní cana ya rohó. Te jecūhun ni rō ndese cúca cácuu ró jíin táca jnúhun jéhu luu ndíso jnúhun ya jeē cúu ñayuu maá yá. <sup>19</sup>Te jicán tahú ri jeē na jécūhun ni rō ndese yóhoyo jéhu poder yā jeē sájniñu ya ini anuá yohó jéé cúu yó ñayuu cacandíje. Chi tu ndíhi cuiti poder yā. <sup>20</sup>Te suu poder un cúu

jeē ni stéén yā ná ni sáha ya iin jniñu jéhu ga jeē ní nastécu yā Cristo mēhñu ndíyi te ni scúcoo ya lado váha ya nde andívi. <sup>21</sup> Te ni jeni ya Cristo siquī tāca jéē cujéhu, jíin jéē ndíso jniñu, jíin jéē jnñi poder, jíin jéē ndácu jniñu, jíin siquī tāca jeē cácahān ñayuu jeē cujéhu, cúu tiempo yáha, cúu tiempo quiiji. <sup>22</sup> Te ni jēhe ya jeē cujéhu Cristo siquī ndívi. Te ni sáha ya jeē cúnúú yá cujéhu ya nuū ñayuu cácañdije. <sup>23</sup> Te ñayuu cácañdije un cácuu i nájnñuhun yiqui cúñu ya, chi iin na cúu i jíin yá te nñuhun chitú yá ini anuá i, chi Yaā jeē nñuhun chitú ní cáhnu-ni cúu ya.

### Ni cācu yó siquī jeē ní cundáhú ni yā yohó

**2** Te ni sáha ya jeē cotecu rō ní cāni jíin Cristo. Chi je ni cacuu rō nájnñuhun ndíyi nuū yā, ni sáha cuēchi rō jíin jniñu néé ní casáha rō. <sup>2</sup> Chi ni cajica rō jíin jniñu yúcuan nde saá, ná ni cacondiquin rō jniñu ñayuu ñayívi, ná ni cajetáhú rō núú jexeén jeē ndácu jniñu nuū tāca táchi xeén, te jica nuū tachí. Te suu cúu jeē scánda ini ñayuu nihni ni nuū Yaā Dios. <sup>3</sup> Te máá rí jijnáhan ri, suni súcuan ni cajica ri, chi ni casáha ri jniñu néé jéē cuní máá rí, jíin táca jéē jicán yiqui cúñu rí, jíin jéē cá-jeni néé ni rí nde saá. Jeē yúcuan suni ni cacuu ri ñayuu jeē nihñin castigo xeén jeē cuáha ya nuú, chi inuú-ni ni casáha ri nájnñuhun casáha máá i. <sup>4</sup> Te Yaā Dios chi yóhoyo cuehē ni cundáhú ni yā yohó, te vāha ndasí ni yā jíin yó. <sup>5</sup> Te náa cúu yó nájnñuhun ndíyi nuū yā ni sáha cuēchi yó, te ni nastécu yā yohó jéē cótecu yō ní cāni jíin Cristo. Chi siquī jeē yóhoyo vāha ni yā cúu jeē ní jnama ya yohó. <sup>6</sup> Te ni nastécu yā yohó jéē cótecu inuú yó jíin Cristo Jesús, te scúcoo ya yohó jíin yá nde andívi. <sup>7</sup> Súcuan ni sáha ya návāha ní gá tiempo jeē quíji, te stéén yā ndese yóhoyo maní yā jíin yó, jíin ndese vāha

ni yā jíin yó jeē siquī Cristo Jesús. <sup>8</sup> Chi siquī jeē yóhoyo maní yā jíin rō cúu jeē ní jnama ya rohó, chi ni cacandije rō jéē sáha ya jehē rō. Te nasūu siquī jeē ní casáha máá rō cúu, chi tahū jeē ni jéhe ya nuū rō cúu. <sup>9</sup> Chi tú na jniñu vāha ní casáha yó jéē jnáma ya yohó, te jeē yúcuan ni iin yó ma cúu sátéyí yó maá yó. <sup>10</sup> Chi cúu yó iin jniñu luu jeē ní nasáha máá yá, chi ni nasáha ya yohó jéē cundúú yó jíin Cristo Jesús, návāha sáha yó táca jniñu vāha jeē jé ni sátūhva Yaā Dios jeē sáha yó.

### Jeē sáha Cristo jeē ndívi yó núú jnñuhun maní Yaā Dios jíin yó

<sup>11</sup> Núú súcuan te na núcūhun ni rō ndese ñayuu ni cacuu rō ndé saá. Chi tu ní cácuu rō ñáyuu hebreo, chi sa suhva ni cacuu rō ñáyuu tācá nación jeē tu jíní jnñuhun ya. Te ñayuu hebreo jeē casáha circuncidar yiqui cúñu, ni cacahān i jeē cácuu rō ñáyuu tu sáha circuncidar. <sup>12</sup> Na núcūhun ni rō jeē ndé saá tu ní cáhñin rō jíin Cristo, te ni cacuu rō ñáyuu ñuu jicá núú nación Israel. Te tu ní cájini rō tāca jnñuhun contrato jeē ni jéjnñuhun Yaā Dios. Te tu ní íne Yaā Dios jíin rō ñayívi yáha, te tú na vé jeē vāha ní cáñuhun ni rō jeē cóo. <sup>13</sup> Te vijna chi ni ndívicoo rō núú Yaā Dios jeē tu ní cájini rō jnñuhun ya nde saá, chi ni quívicoo rō ndaha Cristo siquī jeē ni jíñi yā jehē rō. <sup>14</sup> Chi Cristo cúu Yaā sáha jeē ndúmani jnáhan yó. Chi ni sáha ya jeē ñáyuu hebreo jíin ñáyuu tāca gá nación, ni nduu yó iin na nuū yā. Chi ni sáha ya jeē tuá jíto uhñ jnáhan yó, te suu cúu nájnñuhun jeē ní jenu ya iin jeē ndíhyú sava mēhñu yó jeē sásñin yóhó. <sup>15</sup> Chi ni socō yā maá yá ni jíñi yā, te súcuan ni ndahva yā ley jenahán jíin jnñuhun ndácu jniñu jíin jéē tajnúní ndíso máá. Chi ley un ní sásñin ñayuu hebreo jíin táca nación jeē tu ní jíní i ley un. Te ni nasquíjñahan ya ndíñi yó jéē ní nduu yó iin na nación jeé, yñi



yó ndaha ya. Te súcuan ni sáha ya jeē ní ndumaní jnáhan yó. <sup>16</sup>Te jíin jéē ni jíhí yā jicā cruz, te ni snāā yā jnūhun cájito uhū jnáhan ñayuu hebreo jíin táca gá nación. Te ni sáha ya jeē ndávicoo yó núu jnūhun maní Yaā Dios jíin yó, te ni nduu yó iin na ñayuu maá yá.

<sup>17</sup>Chi ni quiji Cristo ni nacani ya jnūhun vāha nuū táca ñayuu jeē na ndávi i nuū jnūhun maní yā jíin i, cúu róhó ñayuu tu ní cájini jnūhun ya, te suni ñayuu jnáhan ri hebreo jeē cájini jnūhun ya. <sup>18</sup>Te vijna te siquī jeē ni jíhí Cristo, te ndíhi yó, cúu ñayuu hebreo chí ñayuu táca gá nación, cuu quívicoo yó núu Tata yō Yaā Dios, te iin-ni Espíritu yā sáha. <sup>19</sup>Núu súcuan te tuá cúu ró nájñūhun ñayuu ñuu jicá ni ñayuu tatú, chi iin na ni nduu ró jíin ñayuu ñuu maá yá. Te jnáhan ñayuu vehe Yaā Dios cácuu ró. <sup>20</sup>Te cácuu ró nájñūhun iin iin parte iin vehe cáhnu jeē cúvāha siquī cimientu, te cimientu un cúu jnūhun Cristo jeē ní canacani táca apóstol jíin téē ni canacani jnūhun ya jenahán. Te máá Jesucristo cúu nájñūhun yuū cánuú gá jeē yítuu vehe. <sup>21</sup>Te ní vehe cúvāha vāha siquī maá yá, cúsucún cuáhān, cúu iin templo ií jeē ndeé maá Jítóho yō. <sup>22</sup>Te suu cúu máá ró jijnáhan ró, chi ndúú ró jíin Cristo, te inuú-ni sáma ya rohó jíin táca ñayuu cácandíje, cácuu ró nájñūhun iin iin yuū templo. Te suu cúu jeē ndeé Espíritu Yaā Dios ini rō nájñūhun ini iin templo.

**Jeē ndíso jníñu Pablo nácani  
de jnūhun nuū ñayuu tu  
jíin jnūhun Yaā Dios**

**3** Te jeē yúcuan ruhū Pablo, jícán tahú rī nuū yā. Te íne ri vecāa siquī jeē ní nacani ri jnūhun Cristo Jesús nuū rohó ñayuu táca nación jeē tu ní jíin jnūhun ya nuú. <sup>2</sup>Te jíin rī jeē ní cajini ró jnūhun ndese yōhoyo vāha ni sáha Yaā Dios jíin rí, chi ni jēhe ya jniñu nuū rī

jeē nácani ri jnūhun vāha ya nuū rō. <sup>3</sup>Te jnūhun ya jeē ní yisāhí, ni nastúu ya nuū rī, nájñūhun je ni tee ri jecu siquī un núu rō. <sup>4</sup>Te núu na cáhu ró te cuu jecūhun ni rō jeē ní jini vāha ri jnūhun Cristo jeē ní yisāhí un. <sup>5</sup>Te tu ní stéén yā jnūhun sáhi un núu ní iin ñayuu táca cuíyā ní quiji ichi yátá. Te vijna cúu jeē steén ndijin yā jíin Espíritu yā nuū táca apóstol jeē ní jeni ndoo ya, jíin núu téē cánacani jnūhun ya. <sup>6</sup>Te súcuan cáhán jnūhun ní yisāhí un: Ñayuu táca gá nación, iin cáhnu-ni nihin i tahū i jíin ñayuu hebreo, chi ni cacandíje i jnūhun jeē jnáma ya i. Te inuú-ni ni nduu ndíhi i, te iin cáhnu-ni quéndōo ndetū anuá i sáha Cristo, nájñūhun ni jejnūhun Yaā Dios. <sup>7</sup>Te jeē siquī jnūhun yáha cúu jeē ní jeni ya ruhū jeē nácani ri jnūhun nuū rō. Chi ni cutahū rī jniñu luu yáha jeē ni jēhe ya nuū rī. Te jíin poder yā ni sáha ya un jíin rí. <sup>8</sup>Te ruhū chi cúu ri téē núu ga nuū táca ñayuu núu ga jeē yíhi ndaha ya. Te vésú súcuan te nuū maá rí ni jēhe ya jniñu luu yáha jéē nácani ri jnūhun vāha ya nuū ñayuu táca nación jeē tu jíin, ndese yōhoyo cúca yó ndíhi jeē ndíso jnūhun Cristo, jeē ma cánda cuíti yō jecūhun ni yō. <sup>9</sup>Chi ni jeni ya ruhū jeē steén cají rí jeē suni máá i jnama ya i. Te yúcuan cúu jnūhun Yaā Dios jeē ní yisāhi ndé jenahán ndasí, chí máá yá ni sáha ndíhi-ni. <sup>10</sup>Te súcuan ni sáha ya jíin ñayuu, návāha vijna te táca jéē cácu-jéhnu jíin jéē ndíso jniñu nuū sucún, na cúni ndese ndíchí ndasí Yaā Dios. Chi ndíchí ndasí ni sáha ya jíin ñayuu cácan-díje. <sup>11</sup>Chi súcuan ni tee ni yā nde níif cáni, te ni sáha ya jeē Jítóho yō Cristo Jesús ni squícu ya ún. <sup>12</sup>Te siquī jeē ni sáha Cristo, te vijna te jíin ndije yó jéē cúu quívi yó cáhán yō jíin Yaā Dios siquī jeē candíje yó Cristo. <sup>13</sup>Núu súcuan te cáhán ndahú rí jíin ró jeē ma cucuíhyá ni rō siquī jnūndóho jeē ndóho ri jehē rō.

Chi suu sáha jeē quéndōo ndetū anuá rō jijnáhan ró.

### **Cristo yōhyo cundáhú ni yā yohó**

<sup>14</sup>Te jeē yúcuan cúu jeē jécuiñi yití rí nuū maá Yaā cúu Tátá Jitoho yō Jesu-cristo. <sup>15</sup>Te maá yá cúu Tátá nuū ndihi ñayuu yā jeē yúcu andiví jíin ñayiví. <sup>16</sup>Te jícán tahu rí jeē jíin poder yā jeē kujéhnú ndasí yá, na sáha ya jeē íje váha ni rō jíin jnúhun ya, te coo fuerza ini anuá rō, sáha Espiritu yā. <sup>17</sup>Te jícán rí jeē candíje nihin ró Cristo, návaha condee yā ini anuá rō, te jnií váha ró jnúhun jeē cundáhú ni yā rohó, te cuiñi nihin ró jíin. <sup>18</sup>Te súcuan te cuu jecúhun váha ni rō jíin táca ñayuu candíje, ndese cáa jnúhun cundáhú ni Cristo yohó. Chi yōhyo jíté, cáni, cúnú, súcún jnúhun ún, chi yōhyo cuehē sáha. <sup>19</sup>Te jícán rí jeē na cúni váha ró ndese cundáhú ni yā yohó, vésú tu cúu cuiti jecúhun ni yō ndihi ndihi. Te súcuan te cundúú ró jíin Yaā Dios jeē cunuú yá ini anuá rō.

<sup>20</sup>Núu súcuan te na cáhán yō jeē yóhyo luu cújéhnú ya, chi maá yá cúu Yaā iyó poder jeē sáha ya jeē váha ndasí gá vésú ndihi jeē jicán yō chí jéé jéni ni yō. Te sáha ya un jíin poder yā jeē sájniñu ini anuá yō. <sup>21</sup>Te na cáhán yō jeē yóhyo luu cújéhnú ya jeē siquí jeē ni sáha ya jehē ñayuu cácandíje jíin jéé siquí Cristo Jesús. Te súcuan na cóo nde ní cáni cuiti tiempo jeē quíji. Amén.

### **Inuú-ni cácuu ñayuu cácandíje sáha Espiritu**

**4** Te ruhū jeē íne ri vecāa siquí jnúhun maá Jitoho yō, cáhán ndahú rí jíin ró jeē na cáca ndaā rō nájñuhun cánuú caca ró jéé cácuu ró ñayuu ni cana ya. <sup>2</sup>Te níni na cóo suchí ni rō, te coo vitá ni rō. Te na cóo paciencia rō, te cuandeyí ni rō jíin jnáhan ró jéé cundáhú ni rō i. <sup>3</sup>Te na cóndihví ni rō coyūcu maní inuú ró, sáha maá Espiritu nuū véji jnúhun maní

ni. <sup>4</sup>Chi iin-ni cácuu ñayuu maá yá, te íyó iin-ni Espiritu, te inuú cánūhun ni yō jeē cóo jeē váha siquí jeē ní cana ya yohó. <sup>5</sup>Te íyó iin-ni Jitoho yō, jíin iin-ni jnúhun cándíje yó, jíin iin-ni jnúhun jéndute yó. <sup>6</sup>Te íyó iin-ni Yaā Dios jeē cúu Tátá yō jijnáhan yó. Te maá yá kujéhnú siquí ndihi yó, te sájniñu ya jíin ndihi yó, te ndéé yá ini ndihi yó.

<sup>7</sup>Te táca iin iin yó ní cacutahū yō sñin sñin jniñu sáha yó, núu ndese ni tana Cristo cūhva tahū un núu yō. <sup>8</sup>Jeē yúcuan cáhán tutu íi: Ná ni ndaa ya cuanuhun yā andiví, te ni stutú yá cuehē jeē yíndihyū, cuahān yā jíin.

Te ni saja ya tahū nuū táca ñayuu.

<sup>9</sup>Te jeē cahán tutu jeē ní ndaa ya, suni cúní cahān jeē xihna gā nde andiví ni cuun ya nde nuū cunú gá ñayiví yáha. <sup>10</sup>Te Yaā ní cuun, suni maá yá cúu jeē ní ndaa nde nuū sucún gá andiví, návaha cuhun chitú yá níí cáhnu-ni. <sup>11</sup>Te ni tana ya sñin sñin jniñu sáha ñayuu. Chi ni jeni ya sava ñayuu cuu apóstol, te sava ga nacani jnúhun ya, te sava ga scándíje ñayuu jnúhun jeē jnáma ya i, te sava ga coo pastor condito ñayuu cá-candíje, te sava ga steén. <sup>12</sup>Súcuan ni jeni ya ñayuu maá yá jeē cuajniñu i nuū yā, návaha cuehnu ga ñayuu Cristo jíin jnúhun ya. <sup>13</sup>Te súcuan coo nde nduu inuú-ni ndihi yó jíin jnúhun cándíje yó, te cuni váha yó ndese Yaā cúu Sēhe Yaā Dios. Te súcuan ije váha yó ndé na cú-chitú yó jíin ndihi jnúhun jeē ñúhun chitú ini Cristo. <sup>14</sup>Te súcuan te ma cóo ga yō nájñuhun sūchi lúlf jéé yachí jéni yāha jéni yūcuán ni i, ni ma quívi nduu yō cháha chúcuan jíin sñin sñin jnúhun jeé cástéén tēe stáhú jéé yóhyo ndito de squívi de yóhó nuū jnúhun stáhú. <sup>15</sup>Chi sa suhva na cóndiquin yō jnúhun ndaā jíin jnúhun cundáhú ni. Te súcuan cuehnu yó jíin táca jniñu cúní Cristo, Yaā kujéhnú nuū ñayuu cácuu nájñuhun

yiqui cúnu yā, chi ìn na cúu i jíin yá. <sup>16</sup>Te sáha ya jeē nduu ìnuú ni tācá i jeē cáhije i cuahān i, chi cácuu i nájnūhun ìn na yiqui cúnu jíin yá. Te jéjníñu vāha tācá ìn ìn i ndese ni nihīn jníñu i, návāha scuéhnu jnáhan te ije jíjnáhan jíin jnúhun cúndáhú ni.

### Jeē ndújeé yó sáha Cristo

<sup>17</sup>Núu súcuan te yāha cúu jnúhun cáhān rī jíin ró, te jeē achí Jítóho yō cúu jeē cahán nihīn rī jíin ró: jeē ma cáca ga rō nájnūhun cájica sava ga ñayuu jeē tu jíin i ndese Yāā cúu Yāā Dios, chi cájica i jíin jnúhun jeē jéni sáá-ni máá i. <sup>18</sup>Te íyó nee nuū jeē níjnūnī i, te tu névāha i Espírítu jeē véji nuū Yāā Dios, chi tu jíin i jnúhun ya, siquī jeē níhni ni i. <sup>19</sup>Te tuá cúcanu i, chi ni quīvicoo i jíin jniñu néé ndasí, te ndíhvi ni i sáha i tācá jniñu jnéhén. <sup>20</sup>Te róhó jíjnáhan ró, nasūu súcuan ní cáscuáha ró jnúhun Cristo, <sup>21</sup>te núu ndaā jeē ní cajini ró jnúhun ya jíin jéé ní cacutūhva ró jíin jnúhun ndaā Jesús. <sup>22</sup>Núu súcuan te na stóo ró táca jniñu ní casáha ró ichi yátá, ná ni casáha ró modo cuní máá ró jeē ní cujnéhén ánuá rō ni sáha jniñu néé stáhú jéé ní ndiyo ni rō. <sup>23</sup>Te na ndújeé ánuá rō jíin jéé níjnūnī rō. <sup>24</sup>Te na cuáha ró jnúhun ndujeé ró, chi nasáha Yāā Dios rohó nájnūhun cúni máá yá jeē cáca ndaā rō jíin jniñu vāha jniñu ndoo.

<sup>25</sup>Núu súcuan te ma cahán gā rō jnúhun stáhú, te na cáhān ndaā rō jíin táca jnáhan ró, chi ìn-ni cácuu ndíhi yó.

<sup>26</sup>Núu véji ìn jeē squití ni rohó, te ma quití neé ni rō. Te ma quití ni rō nde quēe niāndii. <sup>27</sup>Ma cuáha ró jnúhun jeē sáha jexeén jeē quívi ró cuéchi.

<sup>28</sup>Ñayuu ní sacuíhná, ma sacuíhná gá i, chi sa suhva na sájniñu i, te na cócuu i jíin jniñu vāha, návāha nihīn i jeē cuáha i nuū ñayuu cúmanī nuū.

<sup>29</sup>Ni ìn jnúhun néé ma cahán rō, chi sa suhva na cáhān rō jnúhun vāha jeē

scuéhnu jnáhan jíin jnúhun ya, te sáha jeē quéndōo vāha ñayuu jíin sōho. <sup>30</sup>Ma sáha ró cuéchi návāha ma cucuíhyá ni Espírítu Santo Yāā Dios. Chi Espírítu yā cúu nájnūhun sello jeē steén jeē cúu yó séhe Yāā Dios, nde quiji quívi jínu jniñu jeē jnáma ya rohó.

<sup>31</sup>Te na siáá rō táca jnúhun cútucu ni, jíin jnúhun xeén ni, jíin jnúhun quití ni, jíin jnúhun cáhān ndevāha, jíin táca jnúhun néé. <sup>32</sup>Chi sa suhva na cóo vāha ni rō jíin jnáhan ró, te cundáhú ni rō i. Na cóne cáhnu ni rō nuū jnáhan ró, nájnūhun ni ine cáhnu ni Yāā Dios nuū rō siquī Cristo.

### Ndese cánuú caca ndaā séhe Yāā Dios

**5** Núu súcuan te na ndácu ró Yāā Dios, chi cácuu ró séhe ya jeē maní yá jíin. <sup>2</sup>Te níni cundáhú ni rō jnáhan ró, nájnūhun ni cundáhú ni Cristo yohó, te ni socō yā máá yá jehē yō, ni cuu ya nájnūhun ìn londe jeē jeén asīn nuū Yāā Dios jeē ni sócō yā máá yá.

<sup>3</sup>Te vijna jeē cácuu ró séhe Yāā Dios, te ni ma sáha ró ni ma ndájnuhun ró siquī jnúhun jica jnéni, ni tācá jniñu jnéhén, ni jnúhun ndíyo ni ndajniñu.

<sup>4</sup>Te ni ma cahán rō táca jnúhun sáha jeē cúcanu jnáhan, ni jnúhun cánéé íi, ni jnúhun jeē tu ndé jéjníñu cuiití. Chi tācá un tu níhín jniñu. Chi sa suhva na nácuatáhú ró nuū Yāā Dios.

<sup>5</sup>Chi je cajini rō jeē ní ìn ñayuu cájica jnéni, ni jeē sáha jniñu jnéhén, ni jeē ndíyo ni tācá ndajniñu, ma nihín tahú i quívi i ndaha Cristo jíin Yāā Dios jeē ndacu ya jniñu nuū i. Chi táca jéé ndíyo ni i cúu nájnūhun ídolo i jeē cáchiñúhún i.

<sup>6</sup>Te coto ró jéé ma stahú ni ìn i róhó jíin táca jnúhun cáhān saá ni i, chi siquī táca jnúhun néé yáha cúu jeē quíji castigo xeén Yāā Dios nuū táca ñayuu nihni ni. <sup>7</sup>Ma quívi nduu rō jíin i núu súcuan.

<sup>8</sup>Chi táca quívi saá ni coyūcu ró nájnūhun nuū néé, te vijna chi cáyūcu ró

jiín luz maá Jítóho yō, cúu jeē cájecūhun ni rō siquī yā. Te na cáca ró nájñūhun cájica ñayuu jeē steén luz yā ini anuá i. <sup>9</sup>Chi jniñu sáha luz yā jiín yó cúu táca jniñu manī ni, jniñu ndaā, jiín jniñu vāha. <sup>10</sup>Scuáha ró sáha ró táca jniñu jeē núnahan ni maá Jítóho yō. <sup>11</sup>Te ma quívi nduu rō jiín táca jeē tu níhín jniñu jeē casáha ñayuu cáyūcu nájñūhun nuū neé. Chi sa suhva steén rō nuū i jeē tú vāha casáha i. <sup>12</sup>Chi cúcanu yō cahān yō siquī jniñu casáha yuhu maá i. <sup>13</sup>Te luz yā sáha jeē nátūu táca jniñu neé casáha i. Te núu cuatáhú i luz yā te caca i jiín luz ún. <sup>14</sup>Jeē yúcuan cáhán tutu: Róhó jeē cúhuun ni, jeē nájñūhun quíxi, natahū ni, te quenda ró méhñu ñáyuu jeē cácuu nájñūhun ndīyi. Te Cristo steén yā luz yā ini anuá rō. Achí tutu.

<sup>15</sup>Núu súcuan te coto vāha ró ndese caca yúcun ró. Te ma cáca ró nájñūhun cájica ñayuu canéé, chi caca ró nájñūhun cájica tēe ndíchí. <sup>16</sup>Ma snāā rō tiempo, chi condihvi ni rō jiín jniñu ya, chi íyó cuéhē cuēchi quívi yāha. <sup>17</sup>Núu súcuan te ma cóo neé xini rō, chi sa suhva na jécūhun vāha ni rō na jniñu núnahan ni maá Jítóho yō. <sup>18</sup>Te ma nájini ró, chi tīvi ró sáha. Chi sa suhva na ndúcú ró jeē cúnuú Espíritu Santo ini anuá rō. <sup>19</sup>Te cahān rō jiín jnáhan ró jiín salmo jiín himno, yaa ii jeē cahán jñūhun ya. Te ini anuá rō cahān rō jiín yá jiín táca yaa, chi yúcuan cúu jeē jíta ánuá rō nuū yā chíñúhún ró yā. <sup>20</sup>Te níni nacuatáhú ró siquī táca-ni nuū Tatá yō Yāā Dios te ndacunehen ró síhvi máá Jítóho yō Jesucristo.

### Ndese squícu vāha ñayuu cávandíje nuū jnáhan i

<sup>21</sup>Te cuatáhú ró nuū jnáhan ró siquī jeē cáhiyo yíñúhún ró nuū Cristo.

<sup>22</sup>Róhó ñahan cácuu ñasihí, cuatáhú ró nuū yii ró, nájñūhun jétáhú ró nuū Jítóho yō. <sup>23</sup>Chi yii cújéhnú nuū ñasihí, nájñūhun cújéhnú Cristo nuū yohó ñáyuu cávandíje, jeē cácuu yó nájñūhun yiquí cúñu yā, chi iin na cúu yó jiín yá. Te máá yá jnáma ya yohó. <sup>24</sup>Chi nájñūhun ñayuu cávandíje cá-jetáhú i nuū Cristo, suni súcuan ñasihí cuatáhú ña ndihi jeē cahán yii ña.

<sup>25</sup>Te róhó tēe cácuu yii, cundáhú ni rō ñasihí ró, nájñūhun ni cundáhú ni Cristo yohó ñáyuu cávandíje, te ni socō yā maá yá jehē yō. <sup>26</sup>Súcuan ni sáha ya jeē cóo ndoo coo ii yō nuū yā, te ni nacate ya anuá yō jiín jñūhun ya jiín jēe ní jendute yó. <sup>27</sup>Te yohó ñáyuu cávandíje chi cuiñi yó núu yā, te luu cujéhnú yó. Te ma cóndee cuēchi ánuá yō, ni jeē tú luu, ni iin jeē súcuan, chi sa suhva coo ndoo coo ii yō nuū yā, te tú na vé cumani gā. <sup>28</sup>Te nájñūhun Cristo ni cundáhú ni yā ñayuu cávandíje, suni súcuan cánuú jēe cundáhú ni yii ñasihí de, nájñūhun cundáhú ni de máá de. Chi tēe cundáhú ni de ñasihí de, máá de cundáhú ni de. <sup>29</sup>Chi ni iin tēe tu jito uhū de máá de, chi sa suhva yéji de te ndíto yúcun de máá de. Te suni súcuan sáha Cristo jiín yohó ñáyuu cávandíje nuū yā. <sup>30</sup>Chi cácuu yó nájñūhun yiquí cúñu yā, te iin iin yó cácuu nájñūhun iin iin parte yiquí cúñu yā. <sup>31</sup>Te suu cúu nájñūhun tēe jeē stóo de tátá de náná de, te quijnáhan de jiín ñasihí de, te iin na cúu ndindúú de. <sup>32</sup>Yōhyo jéhnú jñūhun sáhi yāha, te cáhán rī jeē ñáyuu cávandíje suni súcuan quijnáhan i jiín Cristo. <sup>33</sup>Te suni súcuan ná iin ná iin ró cundáhú ni rō ñasihí ró, nájñūhun cundáhú ni rō maá ró. Te ñasihí na cúu yíñúhún ña jiín yii ña.

**6** Te róhó séhe jíjnáhan ró, cuandíje ró núu tatá rō nuū naná rō, chi yúcuan cúu jeē vāha sáha ró jēe candíje ró Jítóho yō. <sup>2</sup>Chi yāha cúu iin jnáhan jeē uxí jñūhun ndácu jniñu jeē ni jéhe ya,

te xihna gā jnūhun yáha ndíso tahū: Cooyíñúhún ró nuū tatá rō nuū naná rō, <sup>3</sup>návāha quendōo ndetū rō, te nāhán cotecu rō ini ñayivi yáha. Achí.

<sup>4</sup>Te rōhó tátá jijnáhan ró, ma squití ni rō sēhe ró, chi sa suhva scuéhnū ró i jín jnūhun cuandije i, te stéén rō nuū i jeē candíje i máá Jítóho yō.

<sup>5</sup>Te rōhó mozo jijnáhan ró, cuandije ró núū patrón rō ñayivi yáha, te cooyíñúhún ró te conso iyo ró núū de. Te na sájniñu ndaā sájniñu ndije ró, cani ni rō jeē nuū Cristo cájejniñu ró. <sup>6</sup>Ma sájniñu ndúxí ró jeē máá jēē coto de te cuajnúhún de rōhó. Chi sa suhva sáha ró cuenta jeē mozo Cristo cácuu ró. Te sáha ró jēē nújnahan ni Yaā Dios nde jín ini jín ánuá rō. <sup>7</sup>Te na cúsi ni rō sájniñu ró, te na cáni ni rō jeē nuū máá Jítóho yō cájejniñu ró, nasūu núū ñayuu. <sup>8</sup>Chi je cájini rō jeē jniñu váha sáha ñin ñin ró, te nihin rō yáhu jniñu yúcuan núū máá Jítóho yō, vēsú cúu ró mozo chí téē sájniñu máá.

<sup>9</sup>Te rōhó patrón jijnáhan ró, suni súcuan sáha ró jín mozo rō, te ma cahán xeén rō jín i. Chi na cócuhun ni rō jeē suni máá ró jín máá i yíhi ró ndaha Jítóho yō, Yaā ndeé andiví. Te tu sáha ya cuenta ndese cúu ñin ñin ñayuu, chi inuú sáha ya jín i.

### Na cúcutú yó jín táca fuerza Yaā Dios

<sup>10</sup>Te íyó inga jnūhun, hermano jijnáhan ró. Nducú ró jeē na cóo fuerza ini rō jín fuerza máá Jítóho yō jeē nduú yá jín ró, chi íyó téyí poder yā. <sup>11</sup>Na cúcutú ró jín táca fuerza Yaā Dios, návāha cuu cuiñi nihin ró jēē ma stahú jexeén rōhó. <sup>12</sup>Chi nájnūhun jeē cájejniáhan yó jín táca jēē neé. Te nasūu ñayuu cúu jeē cájejniáhan yó jín, chi sa suhva jín táca táchi cájica nuū sucún. Te yúcuan cúu jeē cácujeñu, jín jēē cándiso jniñu, jín jēē cándacu jniñu nuū ñayuu ñayivi yáha jeē nájnūhun cájica

i nuū neé. <sup>13</sup>Núu súcuan te na cúcutú ró jín ndíhi fuerza Yaā Dios, návāha cuu cuiñi nihin ró quíví jito ndee jexeén rohó. Te súcuan coo túhva ró jín táca ndíhi jeē cuiñi nihin ró jín. <sup>14</sup>Núu súcuan te cuiñi nihin ró jín jnūhun ndaā jeē cúu nájnūhun jeē yíhi nihin sanchí chiji ró. Te sácútu ró máá ró jín jnūhun caca ndaā rō, te suu cúu nájnūhun jeē cúcutú soldado jín sahna cáa jeē ndihyú de. <sup>15</sup>Te níní cotúhva ró nacani ró jnūhun ndeyí jnūhun siñi ni jeē véji nuū Yaā Dios. Te suu cúu nájnūhun jeē chíhi soldado ndijēn jehē de. <sup>16</sup>Te jeē cánuú gá cúu jeē candíje ró jeē iyó yá jín ró. Te yúcuan cúu nájnūhun jeē túhva ró máá ró yatā ñin escudo. Chi jín jnūhun cándíje ró un te cuu ndahva rō ndíhi jeē tají máá jexeén, jeē cúu nájnūhun nduva jeē cayú yáñuhūn punta. <sup>17</sup>Te cuiñi ró jín jnūhun ni jnama ya rohó, jeē cúu nájnūhun ñin lélú cāa. Te cuajniñu ró jnūhun jeē yosó núū tútu Yaā Dios jeē ni jēhe Espíritu Santo nuū rō. Chi yúcuan cúu nájnūhun jéjniñu soldado espada de. <sup>18</sup>Te níní cácan tahú rō nuū Yaā Dios siquí ndíhi-ni, te cahán ndahú ró jín yá jín fuerza Espíritu. Núu súcuan te ndito na cóo ni rō, te ma jécuiñi rō jeē cacán tahú rō jehē táca ñayuu máá yá. <sup>19</sup>Te suni cahán rō jehē rí, návāha nihin rí jnūhun cahán rí, te coo téyí ni rí nacani cájí rí jnūhun jeē jnáma ya yohó, suu jnūhun jeē ní yisáhi un. <sup>20</sup>Chi ni tají yá ruhū jeē jíca rí nacani rí jnūhun ya ún, te jeē siquí un cúu jeē íne rí vecāa. Te na cácan tahú rō jeē coo téyí ni rí cahán rí jnūhun ya, nájnūhun cánuú cahán rí.

### Saludo jeē sándíhi

<sup>21</sup>Tíquico cúu ñin hermano jeē maní yó jín, te cúu de tēē squícu váha chíndéē nájnáhan jín rí nuū jniñu máá Jítóho yō. Te máá de castúhún ndíhi ndese cuahán jniñu rí te ndese íyó rí. <sup>22</sup>Jeē yúcuan ní tají rí de cuajeē de nuū rō, návāha cachi

de ndese cáhiyo ri, te coo ndeyí ni rō jijnáhan ró sáha de.

<sup>23</sup>Te ñúhun ni rī jeē Tatá yō Yaā Dios jíin Jítóho yō Jesucristo, na sáha ya jeē coo ndeyí coo siī ni tāca rōhó jéē cácuu

hermano, te coo manī gā rō jíin yá, te candíje vāha ró. <sup>24</sup>Te ñúhun ni rī jeē na sáha ga yā jeē váha rōhó jíin náhan ró jéē maní ndije ró jíin Jítóho yō Jesucristo. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU FILIPOS

**1** Máá rí cúu Pablo jíin Timoteo, mozo Jesucristo. Te cátee ri carta yáha cuájeē nuū tāca rōhó hermano cáyucú ñuu Filipos, jeē cácuu ró ñáyuu maá yá jeē cáyihí ró ndaha Cristo Jesús. Te suni cátee ri nuū tée cándiso jníñu cándito rōhó, jíin núu tēe cájejníñu mēhñu ró. <sup>2</sup>Te cáñuhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo sñi ni rō.

### Jeē jicán tahu Pablo jehē ñáyuu cácanđije

<sup>3</sup>Tāca jínu jeē núcūhun ni rí rohó jíjnáhan ró, te nácuatáhú rí nuū Yaā Dios. <sup>4</sup>Te náa jicán tahu rí, te níní cúsiñi ni rí jicán tahu rí jehē rō. <sup>5</sup>Chi ni chindéé ñájnáhan ró jíin rí jeē scáca yó jnúhun váha ya, nde quiví ní cacandíje ró te nde vijna. <sup>6</sup>Te jíni ndije ri jeē maá Yaā ní squéjéé jniñu váha jíin ró, cocu ya jíin ndé quiví ndíji Jesucristo, te sínu ndihí ya. <sup>7</sup>Te íyó váha jeē súcuan jéni ni rí siquí tāca rōhó, chí yōhyo maní rí jíin ró, te inuú-ni ni sáha ya jeē váha yóhó. Te súcuan cúu vésú íne ri vecāa chí vésú cuiñi ri nuū tāca tēe cújéhnu, cahān rí jehē jnúhun jeē jnáma ya yohó jēe jnúhun ndaā cúu. <sup>8</sup>Chi Yaā Dios jíni yā ndese yōhyo maní rí jíin ró jíjnáhan ró, nájnūhun yōhyo maní Jesucristo jíin yó. <sup>9</sup>Te jicán tahu rí jeē na cáa ga jeē cundáhú ni rō jnáhan ró, jíin jēe na jécūhun ga ni rō te cundíchí ró jíin tāca jnúhun ya. <sup>10</sup>Te súcuan te cuu nacāji ró tāca jēe váha condiquin rō, te caca ndaā rō, te ma cóo ni ñin cuēchi siquí rō quiví ndíji Cristo. <sup>11</sup>Te súcuan te cayā cuehē jniñu váha jeē sáha Jesucristo jíin ró. Te

sáha jeē coo yíñúhún ñáyuu jíin Yaā Dios te cahān i jeē yōhyo luu cújéhnu ya.

### Jnúhun jeē técu nduú yó jíin Cristo

<sup>12</sup>Hermano, cúní rí jeē na cúcáhnu ni rō jíjnáhan ró ndese ni sáha jnúndóho ni ndoho rí. Chí ni sáha jeē ni jíitē núu ga jnúhun jeē jnáma ya yohó. <sup>13</sup>Chi tācá soldado cáyucú ini palacio, jíin tāca gá ñáyuu, cájini i jeē íne ri vecāa jeē siquí Cristo. <sup>14</sup>Te siquí jeē íne ri vecāa, jeē yúcuán cúu jeē vihyá gā nihin ndeyí ni cuehē tācá hermano cácanđije nuū Jítóho yō. Te cáhiyo téyí gá ni de nácani de jnúhun ya, te tu ndé ndínuu ni de.

<sup>15</sup>Te ndaā chí sava tēe cánacani de jnúhun Cristo siquí jeē cuesún ni de jíin jēe nduxí de. Te sava ga de chí sa suhva cánacani de jnúhun ya siquí jeē váha ni de. <sup>16</sup>Sava de cánacani jnúhun Cristo siquí jeē nducú de jeē váha máa-ni de, te tú ndije de, chí cácuni de jeē nihin gā rí jnúndóho jeē íne ri vecāa. <sup>17</sup>Te sava ga de chí cánacani de jnúhun siquí jeē cundáhú ni de ruhū, chí cájini de jeē íne ri vecāa siquí jeē cahān rí jehē jnúhun jeē jnáma ya yohó. <sup>18</sup>Tú na vé sáha núu súcuan, chí tācá-ni modo cascuíté núu de jnúhun Cristo, vésú núu ndije de chí tuú. Te yáha cúu jeē cúsiñi ni rí sáha.

Te suni cusñi gā ni rí, <sup>19</sup>chí jíni rí jeē tāca jēe yáha sáha jeē váha ga coo jíin rí, chí cájicān tahu rō jehē rí, te Espiritu Jesucristo chindéé ñáhán yá ruhū. <sup>20</sup>Chi ñúhun ni rí te cúu ndasí ni rí jeē ma sáha ri ni ñin jeē sáha jeē cucanu ri nuū yā. Chí sa suhva coo téyí ni rí cahān rí jnúhun ya, návāha ndujéhnu ga Cristo sáha máa rí vijna, nájnūhun je ni sáha ri ñí véji rí, te vésú na cótecu rí chí vésú na cúu rí. <sup>21</sup>Chi jeē técu rí cúu jeē nduú rí jíin Cristo, te jeē cúu rí cúu jeē vihyá gā váha coo jíin rí. <sup>22</sup>Te núu cotecu gā rí, te cuu scáca ga rí jniñu máa Jítóho yō. Núu súcuan te tu cúcáhnu ni rí ndé ñin cúu jeē váha ga, núu jeē cótecu rí chí

jeē cúu rī. <sup>23</sup> Chi mēhñú ndindúú jnúhun yáha íne nihin ri. Chi ìin cúu jeē cuní rī quihīn rī condee rī jíin Cristo, chi yūcuan cúu jeē vihyá gā vāha coo jíin rí. <sup>24</sup> Te suni cánuú gá jeē cōtecu gā rī jeē siquí rohó jíjnáhan ró. <sup>25</sup> Núu súcuan te íyó ndāā ni rī jeē quéndōo ri condee gā rī jíin ró, návāha stéén gā rī nuū rō ndese caca vāha ga rō jíin yá, te cusī gā ni rō jíin jnúhun cávandíje ró. <sup>26</sup> Núu súcuan te condee tucu ri jíin ró, te cusī teyí ni rō jeē siquí ruhū, sáha máá Cristo Jesús.

<sup>27</sup> Te máá ìin-ni jeē condihvī ni rō caca ndāā rō, nájñuhun cánuú caca ró síquī jeē cávandíje ró jnúhun Cristo. Yūcuán na te vēsú na jínú rī coto jnáhan yó, chí condee jicá rí, te nihīn rī jñuhun ro jéē cáhīin nihin ró jíin jnúhun ya, te cáhīyo inuú ni rō, te inuú-ni cánducú ndéyí ró síquī jnúhun jeē cávandíje yó jéē jnáma ya yohó. <sup>28</sup> Te ma yūhú cuiti rō sáha jeē cájito uhū rohó. Chi jeē jíto uhū i rōhó, yūcuan stéén jeē jnahnú ndetū i, te suni stéén jeē cácu ánuá máá ró jíjnáhan ró sáha Yaā Dios. <sup>29</sup> Chi ni jēhe Cristo uū jeē vāha nuū rō: nasūu máá ìin-ni jeē candíje ró yá, chi suni jeē na ndóho ró jéē siquí yā. <sup>30</sup> Chi máá rí jíin rōhó jíjnáhan ró, nájñuhun jeē cájejnáhan yó jíin táca jéē neé. Chi ni cajito ró jéē súcuan ni sáha máá rí, te cánihin rō jñuhun jeē sáha ga rī nde vijna.

**Jeē ni sáha suchí yá máá yá te ni ndujéhnu ya**

**2** Núu súcuan te sáha Cristo jeē cáhīyo ndeyí ni rō, jíin jéē cusī ni rō siquí jeē vāha ni yā jíin ró. Te ndéé Espírítu yā jíin ró, te maní rō jíin jnáhan ró, te cájito ndáhú ró i. <sup>2</sup> Núu súcuan te na cócu ga rō jíin táca jnúhun yáha, návāha cusī teyí ni rī. Te inuú-ni na cóo ni rō, te coyūcu mání rō, te inuú na cóo ánuá rō, te inuú cani ni rō. <sup>3</sup> Te ni ìin jniñu ma sáha ró jéē nducú ró jeē vāha máá-ni ró, ni jeē satéyí ró máá ró. Chi sa suhva sáha

suchí ró máá ró, te sáha ró cuenta jeē vāha ga jnáhan ró vēsú máá ró. <sup>4</sup> Te ma cóndihvī ni rō máá-ni jniñu jeē quéndōo vāha máá-ni ró, chi suni na cóndihvī ni rō jniñu jeē quéndōo vāha jnáhan ró.

<sup>5</sup> Te na cáni ni rō jíjnáhan ró nájñuhun ni jeni ni Cristo Jesús. <sup>6</sup> Chi máá yá cujéhnu inuú yá jíin Yaā Dios, te vēsú súcuan te tu ní jéni ni yā jeē cujéhnu inuú yá jíin Yaā Dios. <sup>7</sup> Chi ni siaá yā jeē cujéhnu ya, te ni nduu ya nájñuhun índāa mozo, te ni cacu ya ni nduu ya tēe. <sup>8</sup> Te ná ni nduu inuú yá jíin tée, te ni sáha suchí yá máá yá. Te ni jendije ya nde jíin jnúhun jeē cúu yā, te nde jíin jnúhun canu jeē cúu yā jicā cruz. <sup>9</sup> Jeē yūcuan ní sáha Yaā Dios jeē yóhoyo ni ndujéhnu luu ya, te síhvī yá cujéhnu ndasí gá nuū táca gá síhvī. <sup>10</sup> Te táca jéē cáhīin andíví jíin ñáyiví jíin chíjí ñayiví, núu na cúni i síhvī Jesús te jecuiñi yití i. <sup>11</sup> Te cahān ndāā ndivii i jeē Jesucristo cúu máá Jítóho. Te súcuan stéén i jeē yóhoyo cújéhnu máá Tátá yā Yaā Dios.

**Ñayuu cávandíje cúu i nájñuhun quīmi jeē ndíndéé**

<sup>12</sup> Núu súcuan hermano jíjnáhan ró, nájñuhun níni ní cajendije ró jnúhun ni cahān rī ná ni condee rī jíin ró, suni súcuan víhyá gā cuandije ró vijna jeē ndeé jíicá rí jíin ró. Te condihvī ni rō jeē caca ndāā rō jíin jnúhun ní jnama ya rohó, te caca yínúhún ró conso íyo ró núu yā. <sup>13</sup> Chi Yaā Dios jícu ya jíin ró jeē cúu ni rō sáha ró jniñu vāha, te chindéé ñáhán yá rohó jéē squícu ró jniñu nájñahan ni yā.

<sup>14</sup> Ndíhi jeē sáha ró, ma cahān sōo ró, ni ma tejnáhan ró, <sup>15</sup> návāha cuu ró séhe Yaā Dios jeē tú na cuēchi coo siquí rō te coo ndāā rō. Te caca ndoo ró méhñu ñayuu nihni ni jeē casáha neé. Chi mēhñu ñayuu un stéén rō jniñu vāha ró, te súcuan cácuu ró nájñuhun quīmi jeē ndíndéé núu neé ñayiví. <sup>16</sup> Te stéén



rō jnūhun ya nuū i jeē cótecu i nńí cáni sáha. Te súcuan te cusīi teyí ni rī quiví ndíji Cristo, chi cuni rī jeē tu ní jíca cāhá rí, ni tu ní sájniñu cāhá rí. <sup>17</sup> Te vēsú na cúu rī jeē socō rī maá rí nuū yā jeē siquí rohó, te yúcuan cúu jeē nducú rí scandíje ga rī rohó, návāha socō rō maá ró sáha ró jniñu váha jeē cácanđíje ró yá. Jeē yúcuan cúsiñi ni rī, te cúní rī jeē suni cusīi ni rō jíin rí jijnáhan ró. <sup>18</sup> Núu súcuan te na cúsiñi ni maá ró jíin rí, te inuú na cúsiñi ni yō jijnáhan yó.

### Jnūhun Timoteo jíin Epafrodito

<sup>19</sup> Te nūhun ni rī jeē cuáha máá Jítóho yō Jesús jnūhun jeē tají yáchí rī Timoteo jeē de nuū rō, návāha ndusiñi ni rī núu na níhín rī jnūhun ndese cáhiyo ró. <sup>20</sup> Chi tuá na inga tēe íyó yáha jēe inuú jéni ni jíin rí, nájñūhun máá de jeē ndihví ndije ni de jehē rō. <sup>21</sup> Chi tēcá de cánducú de jeē cúu máá de, te nasūu jēe cuní Cristo Jesús. <sup>22</sup> Te je cájini rō jeē tēe vāha cúu Timoteo. Chi nájñūhun sēhe jíin tátá, súcuan ni jejniñu de jeē nácani de jnūhun vāha ya jíin rí. <sup>23</sup> Núu súcuan te nūhun ni rī tají rí de jeē de nuū rō, te núu je ni cucáhu ni rī ndese coo jíin rí. <sup>24</sup> Te jéni ndije ni rī jeē cuáha Jítóho yō jnūhun jeē suni máá rí jinū yachí rī nuū rō jijnáhan ró.

<sup>25</sup> Te suni jéni ni rī jeē cánuú tají rí hermano yō Epafrodito jeē de, chi tēe sájniñu jíin rí siquí jnúhun ya cúu de te chindéé nájñáhan de jíin rí. Chi máá ró ni catají ró de jeē cuajniñu de nuū rī tēca jēe cúmani nuū rī. <sup>26</sup> Chi yōhyo cúu ni de ndacoto tucu de nuū rō jijnáhan ró. Te ni cucuíhyá ndasí ni de, chi ni canihín rō jnūhun jeē ní cocuhū de. <sup>27</sup> Chi jendaá ni cocuhū de, te je yajni cuu de núu. Te Yaā Dios ni cundáhú ni yā de, te nasūu máñúhún-ni de, chi suni ruhū, návāha tú caa ga cucuíhyá ni rī jehē de núu. <sup>28</sup> Jeē yúcuan cúu jeē ndihví gā ni rī tají rí de nuū rō, návāha ndusiñi ni rō jeē

ndácoto tucu ró núu de. Te suni ruhū ma cucuíhyá ndasí gá ni rī. <sup>29</sup> Núu súcuan te na cúsiñi ni rō jeē nájñū de nuū rō, chi cúu de hermano yō jeē candíje de maá Jítóho yō. Te coo yíñúhún ró jíin táca tēe índāa nájñūhun cáa de. <sup>30</sup> Chi jeē siquí jniñu Cristo cúu jeē jé yajni cuu de núu. Chi ni chundeyí ni de jeē cúu de siquí jeē chindéé nájñán de ruhū jíin jniñu jeē tu ní íyo modo sáha máá ró jijnáhan ró.

### Jnūhun jeē cáca ndaā vāha yó

**3** Te vijna, hermano jijnáhan ró, na cúsiñi ni rō jíin máá Jítóho yō. Ruhū chi tu jnánini ni rī jeē tēe tucu ri jnūhun yáha núu rō, chi cuajniñu jeē quéndōo vāha ga rō. <sup>2</sup> Condito ró máá ró nuū tēe casáha jniñu néé, jeē cándāa ná cándāa ina. Chi cánducú de stújí de róhó jēe casáha de circuncidar, te tu casáha de jniñu ndaā. <sup>3</sup> Te máá yó cácuu ñayuu ni cuu circuncidar ndije, chi cáchiñúhún yó nuū Yaā Dios nde jíin ini jíin ánuá yō, te cácusīi ni yō jeē yihí yó ndaha Cristo Jesús, te tu tēnuū yō jeē quéndōo ndaā yō jíin jniñu jeē sáha máá-ni yó. <sup>4</sup> Núu jeē súcuan cúu te ruhū chi suni cuu tenuū rī jniñu jeē sáha máá-ni ri nuú. Chi núu ndé tēe jéni ni de jeē cuu tenuū de máá de, te ruhū chi víhyá gā cuu tenuū rī maá rí. <sup>5</sup> Chi ni casáha circuncidar ruhū nuū uná quiví ná ni cacu ri. Te yucūn Israel cúu ri, te suni jnáhan yucūn Benjamín, te ñin hebreo sēhe hebreo cúu ri. Te suni ni cuu ri tēe grupo fariseo jeē ni squícu ri tēca ley jnáhan ñuu rī hebreo. <sup>6</sup> Te ni jito xeēn rī ñayuu cácanđíje, chi yōhyo ni condihví ni rī jeē ma sáma i modo ley jenahán. Te ni ñin tu ní cúu cahān jeē tu squícu ri ley un, chi ni squícu vāha ri. <sup>7</sup> Te tēca jēe ní tenuū rī ún, chi sáha ri cuenta jeē tu ndé níhín jniñu cuíti, chi vijna te ni candíje ri Cristo. <sup>8</sup> Te suni chíhi ri cuenta jeē vāha ga na náa ndihi jeē ní tenuū rī ún, chi vāha ndasí gá cúu jeē ni quíví

ri ndaha máá Jítóho rí Cristo Jesús. Te jeē siquí máá yá te ni siaá rí ndihí ún, te sáha ri cuenta jeē nájñuhun yácá-ni cúu. Chi ni quívi ri ndaha Cristo, <sup>9</sup>te ndúú yá jíín rí. Te tuá nducú rí quendōo ndaā rí jeē jíín ley un, chi sa suhva Yaā Dios ni ndahva yā cuēchi ri jeē ní candíje ri Cristo. Chi súcuan squéndōo ndaā yā ñayuu cácdánje. <sup>10</sup>Te vijna te cúní ri jecūhun vāha ni rí ndese Yaā cúu ya. Te cúní rí jeē poder jeē ní natecu yā cone jíín rí. Te cúní rí ndoho ri jíín yá, te nde jinū ri ndoho ri nájñuhun ni ndoho máá yá jeē ni jííhi yā. <sup>11</sup>Chi yōhyo ñúhun ni rí natecu rí nájñuhun ni natecu yā.

### Jeē nducú ndéyí Pablo sínu de carrera de

<sup>12</sup>Te ná tu nihín rí ndihí jeē ni cáhān rí ún, ni ná tu ije ri jíín. Te nducú ndéyí rí siquí ún, chi ñúhun ni rí jeē nihín rí tācá un, chi jeē yúcuan cúu jeē ni níhín Cristo Jesús ruhū xihna gā. <sup>13</sup>Hermano jijnáhan ró, tu sáha ri cuenta jeē jé ni nihín rí ndihí ún. Te iyó ñin jeē sáha ri, cúu jeē squéndōo ri tāca jéé ní cuu ichi yátá, te nducú ndéyí rí nihín rí tāca jéé iyó ichi núú. <sup>14</sup>Chi cúu un nájñuhun jeē jíinu ri ñin carrera cuahān rí nde jinū rí andiví, te nihín rí premio jeē cuáha Yaā Dios. Chi ni cana ya yohó jéé quihín yō nuū yā andiví siquí jeē yfhi yó ndaha Cristo Jesús.

<sup>15</sup>Te tāca yó jeē jé ni ije vāha yó jíín jnúhun cándíje yó, súcuan na cáni ni yō. Te núu ndé ñin ró síin jéni ni rō, te Yaā Dios suni stéén yā nuū rō jeē násūu súcuan cúu. <sup>16</sup>Te jíni ñúhún cani ni yō te caca yó modo jeē quijnáhan jíín jéé jé ni nihín yō.

<sup>17</sup>Hermano, na ndácu ró rúhū jijnáhan ró. Te condēhe vāha ró ndese cájica ñayuu ndaā, chi cájica i nájñuhun ni castéén rí nuū rō. <sup>18</sup>Te je ni cuu tijni jíinu ni cahān rí jíín ró, te nde ndahyú rí cahán tucu ri vijna, jeē iyó cuéhē ñayuu

cájica i ñin modo jeē steén jeē jíto uhū i jnúhun jeē ni jííhi Cristo jicā cruz. <sup>19</sup>Te ñin quívi te jnahñū ndetū ñayuu ún. Chi máni jeē cáji vāha i cúu jeē cáchiñúhún i. Te sátéyí i máá i jíín jniñu néé jeē jéhe jnúhun canu. Te máni máá jéé iyó ini ñayivi cúu jeē ndihví ni i. <sup>20</sup>Te máá yó chi ñayuu coyūcú andiví cúu yó, te cándetu yó jéé nde yūcuán ndiji Jitoho yō Jesucristo, Yaā jnáma yóhó. <sup>21</sup>Te máá yá nasama ya yiqui cúñu ndahú yó, návāha nduu yó nájñuhun cáa máá yá jeē lúu cújéhnu ya. Te súcuan sáha ya jíín poder yá jeē cújéhnu ya siquí ndihí-ni.

### Níní na cúsiñ ni yō jíín Jítóho yō

**4** Núu súcuan hermano jijnáhan ró, cuiñi nihín ró jíín jnúhun máá Jítóho yō. Chi yōhyo maní rí jíín ró, te cúní rí jeē coto jnáhan yó, te cúsiñ ni rí jíín ró, te nájñuhun premio rí cácuu ró.

<sup>2</sup>Te cáhān ndahú rí jíín róhó Evodia jíín Síntique jeē ñnuú na cóo ni rō, chi cácuu ró hermana jeē cácdánje ró máá Jítóho yō. <sup>3</sup>Te suni cáhān ndahú rí jíín róhó, téé jeē ní chindéé ñájñáhan vāha jíín rí, jeē na chindéé ñáhán ró hermana un, chi ni casájniñu nihín ña jíín rí siquí jnúhun jeē jnáma ya yohó. Te suni súcuan ni sáha Clemente jíín sava ga ñayuu ni sájniñu jíín rí. Te ni jecosō sihví i nuū libro jeē yosó sfhví ñayuu cotecu níí cáni.

<sup>4</sup>Te níní na cúsiñ ni rō jijnáhan ró jíín máá Jítóho yō. Te inga jíinu cáhān ri jeē na cúsiñ ni rō. <sup>5</sup>Sáha vāha ró jíín tāca ñayuu, návāha cuni i jeē súcuan vāha ni rō. Chi máá Jítóho yō, yajni-ni cúu ya jíín ró.

<sup>6</sup>Ma nácani ndasí ni rō siquí ni ñin. Chi sa cahān rō jíín Yaā Dios siquí tāca jéé nácani ni rō. Chi cacān tahú rō, te cahān ndahú ró, te suni nacuatáhú ró nuū yā. <sup>7</sup>Yūcuán na te sáha Yaā Dios jeē cóo ndeyí coo siñ ndasí ni rō, te súcuan coo jíín ró nde cúhva jeē ma jécūhun ni

rō ndese cúu jeē sāha ya ún. Te condito vāha ya anuá rō jíin jéē níjnūnī rō, coo cuehē jnūhun ndeyí jnūhun sīi ni jíin ró, siquī jeē yíhi ró ndaha Cristo Jesús.

### Jeē na cáni ni yō siquī tāca jéē vāha

<sup>8</sup>Te iin na jnūhun íyó, hermano jijnáhan ró. Na cáni ni rō siquī tāca jéē iyó ndáa, jíin jéē sāha yíñúhún, jíin tāca jniñu sāha vāha, jíin jniñu íyó ndoo, jíin tāca jéē iyó mání ni, jíin jéē lúu sāha. Te mání na núcūhun ni rō tāca jéē vāha jeē sāha jeē nácuatáhu ró nuū yā.

<sup>9</sup>Tāca jéē ni stéen rī nuū rō, jeē ní cacutūhva ró núu rī, jíin jéē ní cajini ró ní cahān rī, jíin jéē ní cajito ró ni sāha ri, tāca yúcuan suni na sāha máá ró. Yūcuán na te máá Yaā jeē jéhe jnūhun ndeyí sīi ni, coo ya jíin ró.

### Jeē ní casocō ñayuu Filipos nuū Pablo

<sup>10</sup>Te yóhoyo cúsiī ni rī sāha máá Jítóho yō, chi vijna te ni canucūhun tucu ni rō jeē chindéé ñáhán ró rúhū. Te nasūu jéē ní naa ni rō sāha ró súcuan, chi siquī jeē tu ní íyo modo. <sup>11</sup>Te nasūu jéē cahán rī siquī jeē ndóho ndáhú rí, chi je ni cutūhva ri cusīi ni rī jíin jéē névāha ri. <sup>12</sup>Jíni rī cotecu ndahú rí, te jíni rī cotecu cucá rí. Chi ni cāan ri jíin tāca-ni, núu jeē ndutú chíji ri chí jéē ndóho ri sōco, núu jeē cónévāha cuehē rī chí jéē cúmani nuū rī. <sup>13</sup>Ndihī-ni cúu sāha ri, chi máá Cristo jéhe ya fuerza ini rī. <sup>14</sup>Te vēsú súcuan te vāha ni casáha ró jéē ní chindéé ñáhán ró rúhū jíin jnúndóho jeē ndóho ri.

<sup>15</sup>Te róhó ñáyuu ñuu Filipos, je cajini rō ndese ni cuu. Chi nde quivī ní que-

jéé rí nácani ri jnūhun jeē jnáma ya yohó, ná ni quenda ri Macedonia vēji ri, te ni casocō rō xūhun núu rī siquī jeē ní canihīn rō jnūhun ya ni nacani ri. Te ni iin grupo ñayuu cácanđije tu ní sāha súcuan, chi máá-ni róhó jíjnáhan ró. <sup>16</sup>Te ná íne ri ñuu Tesalónica, te ni catajī ró jecu jeē jíni ñúhún rí, ni jinū iin uū jínu. <sup>17</sup>Te nasūu jéē nducú rí jeē cuáha ró núu rī, chi sa nducú rí jeē na cáyá gā jniñu vāha ró, návāha cayā tahū rō nuū Yaā Dios. <sup>18</sup>Chi je ni nihin rī ndihī jeē jíni ñúhún rí, te ndóo ga. Te íyó cuehē nuū rī, chi ni nihin rī jeē ní catajī ró vēji jíin Epafrodito. Te jeē ní catajī ró cúu nájñūhun iin ofrenda jeē asín jeén, ni casocō rō nuū Yaā Dios, te cúsiī ni yā jíin. <sup>19</sup>Te Yaā Dios chi cuáha ya nuū rō tāca jéē cúmani nuū rō, chi cúcá ndasí yá jíin tāca jéē vāha jeē lúu íyó núu Cristo Jesús. <sup>20</sup>Te na cáhán yō jeē yóhoyo luu cújéhnu Tátá yō Yaā Dios níí cáni. Amén.

### Saludo jeē sándihí

<sup>21</sup>Cachi rō nuū tāca ñáyuu maá yá jeē sándeýí ni i, áchí rí, chi cácanđije i Jesucristo. Te hermano yō cáyūcu jíin rí yáha, cácahān de jeē sándeýí ni rō jíjnáhan ró. <sup>22</sup>Te tāca ñáyuu maá yá jeē cáhiyo yáha, suni cácahān i jeē sándeýí ni rō. Te ñayuu cáyūcú vehe rey cújéhnu ñuu Roma yáha, máá i cácahān gā súcuan.

<sup>23</sup>Te ñúhún ni ri jeē maá Jítóho yō Jesucristo, na sāha ga yā jeē vāha róhó jíjnáhan ró. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU COLOSAS

**1** Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíin hermano yō Timoteo <sup>2</sup> cátee ri carta yáha cuájeē nuū rohó ñáyuu ñuu Colosas, jeē cácuu ró ñáyuu maá yá jeē cácandíje vāha nuū Cristo. Te cáñuhun ni rī jeē Tatá yō Yaā Dios na sáha ga yā jeē váha róhó, te sáha ya jeē coo ndeyí coo sī ni rō.

### Jeē jicán tahu Pablo jehē ñáyuu cácandíje

<sup>3</sup> Te jeē cájicān tahu rī nuū Yaā Dios, Yaā cúu Tátá maá Jítóho yō Jesucristo, te níní cánacuatáhú rí nuū yā jeē siquí rohó jíjnáhan ró. <sup>4</sup> Chi ni cajini jñuhun ri ndese vāha cácandíje ró Cristo Jesús, jíin ndese cákundáhú ni rō tāca ñáyuu maá yá. <sup>5</sup> Chi cáñuhun ni rō nihin rō jeē ñuhun vāha nde andiví cuu ró. Chi ná ni cajini ró jñuhun ndaā jeē jnáma ya rohó, te ni caquejeé ró ñuhun ni rō. <sup>6</sup> Te jñuhun un jéē ní canacani nuū rō, chi ndúcuehē cuahān te níhín jñínu níf cáhnu ñayiví. Te suni súcuan ni sáha jíin róhó jíjnáhan ró ndé quiví ní cajini ró te ni cajecūhun ni rō jeē ndaá cúu jeē yóhyo vāha ni Yaā Dios jíin ró. <sup>7</sup> Te jñuhun un cúu jeē ni stéén Epafras nuū rō, tēe sájniñu jíin rí jeē maní rī jíin. Chi cúu de tēe jéjñínu squícu vāha nuū Cristo jeē ndíto de róhó. <sup>8</sup> Te máá de ni castūhun núu rī siquí rohó, ndese cákundáhú ni rō jnáhan ró sáha máá yá.

<sup>9</sup> Jeē yúcuan suni tu cájecuññī rī jeē cájicān tahu rī jehē rō, nde quiví ni níhín rī jñuhun ún te nde vijna. Te cájicān rī nuū yā jeē na jécūhun vāha ni rō te coo ndíchí ró jíin jñuhun ya, sáha máá Espíritu, návāha cuni rō ndihī ndese nujnahan ni máá yá. <sup>10</sup> Te cájicān rī jeē

caca ndaā rō nájñuhun cánuú caca ró jéē cácuu ró ñáyuu maá Jítóho yō. Te súcuan te sáha ró ndihī jeē nujnahan ni yā, te nihin jñínu ró jíin táca jniñu vāha, te jecūhun ga ni rō ndese Yaā cúu Yaā Dios. <sup>11</sup> Te cájicān rī jeē cuáha ya fuerza ini rō, nájñuhun íyó fuerza maá yá jeē kujéhnu luu ya. Te súcuan te cuu cuandeyí ni rō jíin táca-ni jñundóho, te cusīñ teyí ni rō. <sup>12</sup> Te cuu nacuatáhú ró nuū Tatá yō, chi máá yá ni chihi fuerza yohó jéē iin cáhnu-ni jíin táca ñáyuu maá yá nihin yō tahū yō. Chi cájica yó jíin luz yā jeē yíhi yó ndaha ya. <sup>13</sup> Chi ni jnama ya yohó jéē ni yíhi yó ndaha máá jéē jñí poder nuū nēe, te ni squívi ya yohó ndaha Séhe ya jeē maní yā jíin, ndácu ya jniñu nuū yō. <sup>14</sup> Chi Séhe ya un ní jnama ya yohó jéē ni jíhi yā jehē yō, te ni ine cáhnu ni yā nuū cuéchi yó.

### Jeē ni sáha Cristo jeē ní ndivi yó núu jñuhun maní Yaā Dios jíin yó

<sup>15</sup> Yaā Dios jeē tu cúu coto yó, ni sáha ya jeē ní quiji Séhe ya, te súcuan ni jito yó máá yá. Te Séhe ya ún, je íyó yá nde ná tu jecōo tāca jéē íyó. <sup>16</sup> Chi jíin Séhe ya ni sáha Yaā Dios ndihī jeē ni jécōo, ndihī jeē íyó andiví jíin jéē íyó ñayiví, jeē jiní yō nuū jíin jéē tu jíin yō nuū. Te suni ni sáha ya tācá ndajéhe jeē cándacu jniñu, jíin jéē cándiso jñínu, jíin jéē cácujeñnu, jíin jéē cájniñ poder. Jíin Cristo ni sáha Yaā Dios jeē ni jécōo ndihī, te jeē cúu Cristo cúu. <sup>17</sup> Te je íyó Cristo nde ná tu coo ndihī jeē íyó. Te ndaha máá yá yíhi vāha ndihī-ni. <sup>18</sup> Te máá yá cújéhnu nuū ñáyuu cácandíje, nájñuhun cújéhnu xinī nuū yiquí cúñu, chi nájñuhun yiquí cúñu yā cácuu i, cúu jeē iin na cúu i jíin yá. Te máá yá sáha jeē cotecu i níf cáni, te xihna gā maá yá ni natecu mēñnu ndýi, návāha kujéhnu ya nuū tācá-ni. <sup>19</sup> Chi ni cusīñ ni Yaā Dios jeē ndihī ndese cúu máá yá, suni súcuan cúu Cristo. <sup>20</sup> Te siquí jeē ni jíhi Cristo,

te ni cusī ni Yaā Dios sāha ya jeē ndívicoo tācā-ni nuū jnūhun manī yā jín, tāca jée yúcu ñayīvi jín jée yúcu andíví. Chi jín jée ni jíhí Cristo jicā cruz, te ni sāha Yaā Dios jeē ndívicoo tācā-ni nuū jnūhun manī yā jín.

<sup>21</sup> Te máá ró jijnáhan ró, chi sīn siquī ni cahīn ró ndé saá, te ni cajito uhū rō yā ní anuá rō, chi máni jniñu néé ní casáha ró. Te vijna chi je ni sāha Yaā Dios jeē ní ndívicoo ró núu jnūhun manī yā jín ró. <sup>22</sup> Súcuan ni sāha ya siquī jeē ni sócō Cristo máá yá ni jihī yā, návāha coo ndoo coo īi rō cuiñi ró núu yā, te ma cóo jnéhén ró, te tú na cuēchi coo siquī rō. <sup>23</sup> Te súcuan sāha ya núu cuiñi nihin ró jée candíje vāha ró, te núu quendōo nihin ró jín jnūhun vāha jeē cáñuhun ni rō jeē jnáma ya rohó, te ma siaá cuiti rō. Chi jnūhun un ní cajini ró, te ni jite núu ní cáhnu ñayīví. Te ruhū Pablo suni jéjníñu ri jeē nácani ri jnūhun ún.

### Jeē jejnīñu Pablo siquī ñáyuu cácandíje

<sup>24</sup> Te vijna te cúsi ni rī jeē ndóho ri jehē rō jijnáhan ró. Chi jín yiqui cúñu rī ndóho ri jeē cúmani gā ndoho ri jín Cristo jehē ñáyuu cácandíje, suu ñayuu cúu nájñuhun yiqui cúñu yā. <sup>25</sup> Te cúu ri tēe jéjníñu siquī ñáyuu cácandíje, chi súcuan ni tejníñu Yaā Dios ruhū, návāha nacani ndihī ri jnūhun ya nuū rō te quendōo vāha ró. <sup>26</sup> Te nácani ri jnūhun ya jeē ní yisāhí, jeē tu ní cájini ñayuu nde jenahán ndasí te nde ní cāni vēji. Te vijna te je ni steén cají yá jnūhun un núu ñáyuu máá yá. <sup>27</sup> Chi ni cusī ni yā jeē steén yā nuū i ndese cúcúca ndasí i jín ndihī jeē ndíso jnūhun sāhi yáha jée lúu cújéhnu, te cuitē núu quihīn nuū tācá nación jeē tu jíní. Te jnūhun sāhi yáha cúu jeē ndeé Cristo ini anuá rō, ndúú yá jín ró, te jeē yúcuan cáñuhun ni rō tāca jée lúu jéhnu jeē coo.

<sup>28</sup> Te jnūhun Cristo un cúu jeē cá-nacani ri, te cástíhví ni rī tāca ñáyuu, te cástéén rī jnūhun ya návāha jecūhun vāha ni i. Te súcuan te ije vāha ni ndívii i jeē yíhi i ndaha Cristo Jesús. <sup>29</sup> Te siquī yúcuan cúu jeē sájniñu ri, chi ndíhví ni rī nácani ri jnūhun jín táca fuerza Cristo jeē chindéé ñájñahan ya jín rí.

**2** Chi cúní rī jeē na jécūhun ni rō ndese yōhoyo ndúcu ndéyí rí jehē rō, jín jéhē ñayuu ñuu Laodicea, jín ndé tāca ñáyuu jeē tu ní cájini cuiti nuū rí. <sup>2</sup> Chi cúní rī jeē coo ndeyí ni anuá i, te inuú-ni coyūcu máni i, te jecūhun ndihī ni i ndese yōhoyo cúca i jín jnūhun jeē candíje nihin i. Chi cuni i ndese Yaā cúu Cristo, chi máá yá cúu jnūhun Yaā Dios jeē ni yísahí un. <sup>3</sup> Te ini Cristo yísahí tāca jnūhun jeē cucúca ró jín, suu jnūhun ndíchí jín jnūhun jécūhun ni. <sup>4</sup> Te jnūhun yáha cáhán rī jín ró jijnáhan ró, návāha ma stahú ni ñin i rohó jín táca jnūhun stahú jée lúu cáhán. <sup>5</sup> Chi vésú ndeé jíca rí jín ró, te ñúhun ni rī rohó, te cúsi ni rī jeē jiní rī ndese cájica ndaā rō te cácandíje nihin ró Cristo.

<sup>6</sup> Núu súcuan te nájñuhun ni cajetáhú ró jeē Jítóho rō cúu Jesucristo, suni súcuan na cáca ndaā rō jín yá. <sup>7</sup> Te na jnā vāha jnūhun ya ini rō, te na ije vāha ró jín jnūhun cácandíje ró yá, nájñuhun je ni cajini rō. Te níni nacuatáhú ró nuū Yaā Dios.

### Jeē ndújeé yó sāha Cristo

<sup>8</sup> Coto má cuāha ró jnūhun jeē stahú ni ñin ñayuu rohó jín jnūhun ndíchí jée tu jéjníñu, jín jnūhun ndúxí stáhú. Chi tu cácandíje i jnūhun Cristo, chi sa cácandíje i tāca jée tajnúni ñayuu, modo jeē castéén ini ñayīvi yáha.

<sup>9</sup> Chi ndihī ndese cúu máá Yaā Dios, suni súcuan cúu Cristo. <sup>10</sup> Te ndihī ndese cúu Cristo, suni súcuan cúu ró jijnáhan ró, chi cáyihī ró ndaha ya. Te máá yá cújéhnu nuū tāca jée cújéhnu jín jée

ndíso jníñu andíví. <sup>11</sup> Te siquī jeē cáyihí ró ndaha ya, suu cúu jeē nájñuhun ni cuu ró circuncidar. Te jeē súcuan ni sáha ya circuncidar rohó, chi nasúú ñin jñuní jeē yíhi yiquí cúñu ró cúu, chi sa suhva jeē ní sándoo ya tāca cuēchi ni casáha ró jíñ modo neé máá ró. Chi súcuan cúu jeē sáha Cristo circuncidar rohó. <sup>12</sup> Te jeē ní cajendute ró cúu nájñuhun jeē ní quindūji ró jíñ Cristo, te suni nájñuhun jeē ní natecu ró jíñ yá. Chi ní cacandíje ró jéé jíñ poder Yaā Dios ni nastécu yā Cristo mēññu ndíyi. <sup>13</sup> Chi ni cacuu ró nájñuhun ndíyi nuū yā siquī cuēchi ró, chi ná tu sáha ya circuncidar anuá ró nde saá. Te vijna te ni sáha Yaā Dios jeē cotecu ró ñí cáni jíñ Cristo, chi ni ñe cáhnu ni yā nuū tāca cuēchi ró. <sup>14</sup> Te nájñuhun jeē iyó ñin acta jeē jicán cuēchi siquī yō jeē ni stívi yó ley yā. Te ni ndahva yā acta un, chi ni chunaa Cristo cuēchi yó jéé ni jíñ yā jicā cruz. <sup>15</sup> Chi ná ni jíñ yā jicā cruz, te ni quende yā ndíhi poder tāca jéneé jéé cácujeñhu jíñ jéé cáññi poder. Te ni quende yā jeē tuá cujeñhu, chi ni sáha ya jeē cuángoo nuū quíndihyū, te súcuan ni steén yā poder yā.

### Na ndúcu yó jeē quéndōo vāha yó ndé andíví

<sup>16</sup> Núu súcuan te ma cuatáhú ró núu cácahān ñayuu cuēchi siquī ró, siquī ñin jeē yéji ró chí siquī ñin jeē jíñi ró, chí jéé tu nées ñi ró quíví víco jíñ quíví núcosō yoō jíñ quíví ndétátú. <sup>17</sup> Chi tāca ley siquī un ní jeñññu máá ndé ná tu quiji Cristo. Te vijna te ni quiji ya te tuá jíñi ññuhún tāca ún. <sup>18</sup> Ma cuáha ro jñuhun jeē cási ni ñin ñayuu jeē ñihín ró tahū ró. Chi cáchiññuhún i tācá ndajéhé yā, te cácahān i jeē súcuan casáha suchí i máá i. Te cácahān i jeē cájini ndije i jeē iyó ndáa jñuhun cánacani i, te tuú. Te súcuan casáha téyí sáa-ni i máá i, chí cájini nées ni i. <sup>19</sup> Te tu cáhñin i jíñ Cristo,

Yaā cujeñhu nuū ñayuu cacuu nájñuhun yiquí cúñu yā chí ñin na cúu i jíñ yá. Chi máá yá scuéñhu ya i jíñ jñuhun ya, te nduu ñnuú ni tācá i jeē cáhije i cuahān i, nájñuhun ni jeni ni Yaā Dios.

<sup>20</sup> Núu súcuan te nájñuhun jeē je ni cajihí ró jíñ Cristo, cúu jeē ní casíáa ró tāca jéé tajñuní jeē castéén ñin ñayíví. Núu súcuan ñe naun casáha ga ró nájñuhun casáha ñayuu ñayíví jéé jéndije ró tāca jéé tajñuní i? <sup>21</sup> Chi cácahān i: Ma quehé ró ma cáji ró jeē yáha chí jéé yícuan, ni ma jñí ró, áhí i. <sup>22</sup> Te máni jeē tajñuní ñayuu jíñ costumbre máá i cúu te tu ñhín jññu jeē quéndōo ndaā ñayuu. <sup>23</sup> Te ndaā chí cájini ni i jeē jñuhun ndíhí cúu ún, chí sáha jíñ i jeē chíññuhún ñhín i, jíñ jéé sáha suchí i máá i, jíñ jéé stóho i yiquí cúñu i. Te tu ñhín jññu cuiti jeē casi tācá jññu nées jéé cuní i sáha i.

**3** Núu súcuan te nájñuhun ni natecu Cristo, suni súcuan ni canatecu ró jeē ní cuu ró nájñuhun ndíyi ni sáha cuēchi ró. Te na cóndihví ni ró siquī tāca jéé iyó andíví núu ndeé Cristo lado váha Yaā Dios nuū cujeñhu ya. <sup>2</sup> Te na cáni ni ró siquī tāca jéé iyó andíví, nasūu síquī jeē iyó ñin ñayíví. <sup>3</sup> Chi nájñuhun je ni cajihí ró jíñ Cristo, te vijna chí nájñuhun cátecu ró jíñ yá andíví, chí cáyihí ró ñin ndaha Yaā Dios. <sup>4</sup> Te quíví ndíji Cristo, Yaā sáha jeē cótecu yō ñí cáni, yūcuán na te suni quendacoo ndíjin máá ró jíñ yá, te cujeñhu luu ró jíñ yá.

### Ñayuu jíca jíñ modo cuní máá, jíñ ñayuu ní ndujeé

<sup>5</sup> Núu súcuan te casi ró tāca modo cuní máá ró jeē cáhíyo ró ñin ñayíví yáha. Chi ma cáca jñéní ró, ma sáha ró jññu jñéhén, ma ndíyo ni ró sáha ró tāca jññu nées, ma cutóo ró, ma ndíyo ni ró ndajññu. Chi tācá ndajññu jeē ndíyo ni yó cúu nájñuhun ídolo yō jeē chíññuhún yó. <sup>6</sup> Chi siquī tācá jññu yáha cúu jeē cuāha

Yaā Dios castigo xeēn nuū ñayuu niñni ni nuū yā. <sup>7</sup>Te suni jíin jniñu yáha ní cajica ró ndé saá, ná ni casáha ró súcuan. <sup>8</sup>Te vijna te na stóo ró táca jéē yáha: jeē quití ni, jeē xeēn ni, jeē sáha jniñu néé, jeē cahán ndeváha nuū jnáhan, jíin jéē cahán táca jnúhun tú vāha. <sup>9</sup>Ma stahú ró jnáhan ró, chi yūcuan cúu modo maá ró jeē ní cajica ró jíin ndé saá, te je ni castóo ró. <sup>10</sup>Te ni canduu ró ñayuu jeé, cuandacu ró máá Yaā ni sáha róhó, te cuajecūhun vāha ni rō ndese Yaā cúu ya. <sup>11</sup>Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jicá, ni ñayuu yucú jeē ní indāa néé, ni mozo jeē ní jeen ñayuu, ni ñayuu sájniñu cuenta maá, chi inuú cúu ndíhi i nuū yā. Chi Cristo cúu Jitoho ndíhi i, te ndéé yá ini anuá ndíhi i, ndúú yá jíin i.

<sup>12</sup>Chi ni nacāji Yaā Dios rohó jíjnáhan ró jeē cúu ró ñayuu maá yá jeē maní yā jíin. Núu súcuan te níni cundáhú ni rō jnáhan ró, te coo vāha ni rō jíin jnáhan ró. Te coo suchí ni rō, te coo vitá ni rō, te coo paciencia ni rō. <sup>13</sup>Cuandeyí ni rō jíin jnáhan ró, te cone cáhnu ni rō nuū i te núu na vé ni sáha i nuū rō. Chi nájñuhun ni ine cáhnu ni Cristo nuū rō, suni súcuan sáha máá ró. <sup>14</sup>Te jeē cánuú gá cúu jeē cundáhú ndasí ni rō jnáhan ró. Chi yūcuan sáha jeē ndúu inuú ni rō te íje vāha ni rō jíin jniñu vāha. <sup>15</sup>Te jñuhun coyūcu mání na cúnuú ini anuá rō sáha Yaā Dios. Chi ni cana ya rohó jéē nduu ró ñin na ñayuu jéē cóyūcu mání rō. Te níni na nácuatáhú ró núu yā.

<sup>16</sup>Te scuáha vāha ró jnúhun Cristo návāha cunuú jnúhun ún ini anuá rō. Te stéén rō nuū jnáhan ró, te stíhví ni rō i jíin táca jnúhun ndíchí yá. Te jíin salmo jíin himno, yaa ii jeē cahán jñuhun ya, na cáta luu ró jéē nácuatáhú ró ini anuá rō nuū Yaā Dios. <sup>17</sup>Te táca jniñu sáha ró, núu jeē cahán rō chí jéē sáha ró cúu,

ndíhi na sáha ró jéē ndujéhnu síhví máá Jitoho yō Jesús, te nacuatáhú ró núu Tatá yō Yaā Dios sáha ya.

### Ndese cánuú squícu ñayuu cácandije nuū jnáhan i

<sup>18</sup>Róhó ñahan cácuu ñasihí, cuatáhú ró nuū yíi ró, chi súcuan cánuú sáha ró síquí jeē candije ró Jitoho yō. <sup>19</sup>Te róhó téé cácuu yíi, cundáhú ni rō ñasihí ró, te ma cútucu ni rō jíin ña. <sup>20</sup>Róhó séhe jíjnáhan ró, táca-ni jniñu cuandije ró núu tatá rō nuū naná ró, chi súcuan cúsiñi ni maá Jitoho yō. <sup>21</sup>Te róhó tátá jíjnáhan ró, ma squití ni rō séhe ró, návāha ma cucuíhyá ni i. <sup>22</sup>Róhó mozo jíjnáhan ró, táca-ni jniñu cuandije ró núu patrón rō ñayívi yáha. Ma sájniñu ndúxi ró jeē maá jéē coto de te cuajnúhún de róhó. Chi na sájniñu ndaá sájniñu ndije ró, te conso íyo ró núu Yaā Dios. <sup>23</sup>Te táca jniñu sáha ró, na cúsiñi ni rō sáha ró, te na cáni ni rō jeē nuū Jitoho yō cájejniñu ró, nasūu núu ñayuu. <sup>24</sup>Chi je cájini rō jeē maá Jitoho yō cuāha ya cuehē tahū cuu ró ní cáni. Chi nuū maá Cristo cájejniñu ró, chí máá yá cúu Jitoho rō. <sup>25</sup>Te ñayuu casáha jniñu néé, chí sa suhva ndutahú i síquí jeē ni sáha i. Chi tu sáha Yaā Dios cuenta ndese cúu ñin ñin ñayuu, chí inuú sáha ya jíin i.

**4** Róhó patrón jíjnáhan ró, vāha ndaá na sáha ró jíin mozo rō. Te na núcūhun ni rō jeē suni íyó Jitoho maá ró, Yaā ndeé andiví.

<sup>2</sup>Te ndívii rō ma jécuiñí rō jeē jicán tahú rō, chí coo ndito ni rō jíin, te nacuatáhú ró núu Yaā Dios. <sup>3</sup>Te suni cacān tahú rō jehē rí jíjnáhan rí, jeē na sáha Yaā Dios jeē cóo ga modo nacani rí jñuhun, návāha cuu cahán rí jñuhun Cristo jeē ní yisáhí, jeē tu ní cájini ñayuu jenahán. Te síquí jñuhun un cúu jeē íne rí vecāa. <sup>4</sup>Te cacān tahú rō jeē cuu cahán cají rí ndese cánuú cáhān rí.

<sup>5</sup>Sáha yúcún váha ró jíin ñáyu tu cá-candíje. Ma cúhuun ni rō siquī i, chi condíhvī ni rō scandíje ró i. <sup>6</sup>Te máni cahān váha ró jíin ñáyu, te cahān rō jñuhun cuajníñu jeē quéndōo váha i sáha. Te cani ni rō ndese váha nastíó cuíñí rō jñuhun nuū iin iin i.

### Saludo jeē sándihí

<sup>7</sup>Tíquico cúu iin hermano jeē maní yō jíin, te tēe squícu váha chindéé ñájnáhan jíin rí cúu de, te jéjníñu de jíin rí nuū maá Jítóho yō. Te maá de castühún ndihi nuū rō ndese cuahān jniñu ri. <sup>8</sup>Jeē yúcuan ní tají rí de cuajeje de nuū rō jñáhan ró, návāha cuni rō ndese cáhíyo ri jíin jniñu, te coo ndeyí ni rō sáha de. <sup>9</sup>Te suni cuajeje Onésimo jíin de, tēe cúu jñáhan máá ró jijnáhan ró. Te cúu de hermano jeē squícu váha jeē maní yō jíin. Te ndíndúú de castühun núū rō ndese cuahān táca jniñu ichi cháha.

<sup>10</sup>Sándeyí ni rō jijnáhan ró, áchí Aristarco, tēe íne jíin rí vecāa. Te suni súcuan cáhán Marcos, ñani primo Bernabé. Te je ni ndacu ri jniñu nuū rō siquī Marcos, te núu ni jecondéhé de rōhó te sáha váha ró jíin de. <sup>11</sup>Te suni súcuan cáhán Jesús, tēe jeē suni nání Justo, jeē sándeyí ni rō. Te maá-ni de cácuu tēe hebreo cá-candíje jeē chindéé ñáhán cá-

nacani jñuhun jíin rí siquī ndese ndácu Yaā Dios jniñu. Te yōhyo ndeyí íyó ni rí casáha de. <sup>12</sup>Sándeyí ni rō jijnáhan ró, áchí Epafra, tēe cúu jñáhan máá ró, te mozo Cristo cúu de. Te níni jíicán tahú ndasí de jehē rō, jeē na cuíñi nihin ró, te ije váha ni rō jeē squícu váha ró ndihi jniñu cúni Yaā Dios. <sup>13</sup>Chi cáhán ndaā ri jeē yóhyo ndíhví ni de jehē rō jijnáhan ró, jíin jehē ñáyu nuu Laodicea jíin Hierápolis. <sup>14</sup>Lucas, tēe cúu médico jeē maní yō jíin, suni cáhán de jeē sándeyí ni rō, te suni súcuan cáhán Demas.

<sup>15</sup>Cachi rō nuū táca hermano nuu Laodicea jeē sándeyí ni i, áchí rí. Te suni súcuan cahān rō jíin Ninfas, jíin táca ñáyu cá-candíje cándututú vehe ña. <sup>16</sup>Te ná ni jinu ni cacahu ró carta yáha, te suni tají ró na cáhu ñáyu cá-candíje nuu Laodicea. Te suni cahu máá ró carta jeē cuahán nuū ñáyu Laodicea te ndiji nuū rō. <sup>17</sup>Te cachi rō nuū Arquipo jeē na ndúcu ndeyí de squícu de jniñu ní tee Jítóho yō siquī de, áchí rí.

<sup>18</sup>Ruhū Pablo, yāhá-ni cúu jeē tēe ri jíin ndaha máá rí, jeē sándeyí ni rō. Te nucūhun ni rō ruhū jeē íne ri vecāa. Te ñúhun ni rí jeē na sáha ga Yaā Dios jeē váha rōhó jijnáhan ró. Súcuan na cóo. Amén.



## CARTA HN JEE NI TEE APOSTOL SAN PABLO NUU ÑAYUU NUU TESALONICA

**1** Máá rí cúu Pablo jíin Silvano jíin Timoteo, te cátee ri carta yáha cuájeē nuū rohó ñáyuu cácanđije ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sií ni rō jijnáhan ró.

### Ñayuu Tesalónica cúu i iin ejemplo váha

<sup>2</sup>Níní cánacuatahú rí nuū Yaā Dios jeē siquí rohó jíjnáhan ró, te tu náā ni rí cacān tahú rí jehē rō jeē cájicān tahú rí. <sup>3</sup>Te níní ndácunehen ri rohó núu Tátá yō Yaā Dios, jeē váha cásáha ró táca jniñu chi cácanđije ró, jíin jéē váha cájejníñu ró núu yā chi maní rō jíin yá, jíin jéē cájendeyí ni rō chi cáñuhun ni rō jeē coo jeē váha sáha Jítóho yō Jesucristo. <sup>4</sup>Chi maní Yaā Dios jíin ró jíjnáhan ró hermano, te cájini rí jeē ní nacāji ya rohó. <sup>5</sup>Chi ná ni canacani ri jñuhun nuū rō jeē jnáma ya rohó, te nasūu jéē ni cáhān rí súcuan-ni, chi ni nacani ri jíin poder Espíritu Santo, te ni cacucáñnu váha ni rí jeē jnúhun ndaā cúu. Te cájini rō ndese ni casáha váha ri ná ni coyūcu rí jíin ró, chi ni nducú rí jeē quéndōo váha ró.

<sup>6</sup>Te róhó jíjnáhan ró chi ni candacu ró rúhū, te suni ni candacu ró máá Jítóho yō. Chi ni cajetáhú ró jñuhun ya, te ni cacusí ni rō ní sáha Espíritu Santo, vésú ni cajito ró cuehē jñundóho siquí ún. <sup>7</sup>Te súcuan cácuu ró iin ejemplo nuū ndíhi ñayuu cácanđije jeē cáyucú región Macedonia jíin Acaya jíñā. <sup>8</sup>Chi jeē siquí rohó jíjnáhan ró cúu jeē ní jite núu jñuhun Jítóho yō, te nasūu máni Macedonia jíin Acaya, chi suni ní cáhnu-ni

ni jité núu jñuhun ndese cácanđije ró Yaā Dios. Te jeē yúcuu tuá jíni ñúhūn jeē nácani máá rí jñuhun nuū i. <sup>9</sup>Chi sa máá i cácanani ndese ni cajetáhú váha ró rúhū ná ni jecoo ri nuū rō, jíin ndese ni castóo ro ídolo te ni quívicoo ró ndaha Yaā Dios, Yaā ndaā Yaā técu, jeē cuajniñu ró núu yā. <sup>10</sup>Te cácanani i jeē cándetu ró jéē ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núu castigo xeēn jeē quíji.

### Jniñu jeē ni sáha Pablo ñuu Tesalónica

**2** Chi cájini rō hermano, jeē tu ní jécoo cáhá-ni ri nuū rō. <sup>2</sup>Te cájini rō jeē ní castóho i ruhū te ni cacahān ndevāha i nuū rí ini ñuu Filipos. Te vésú súcuan te máá Yaā Dios ni chindéé ñáhān yá ruhū, ni sáha ya jeē ni íyo ndeyí ni rí, te ni jecoo ri ñuu rō ni canacani ri jñuhun jeē jnáma ya rohó. Súcuan ni casáha ri vésú xeēn ni íyo jñundóho. <sup>3</sup>Te jñuhun ni canacani ri, nasūu jnúhun ni castívi rí cúu, ni nasūu jéē nihín rí siquí rō, ni nasūu jéē ní castáhú rí rohó. <sup>4</sup>Chi máá Yaā Dios ni jito ndee yā ruhū, te ni tejniñu ya ruhū jeē nácani ri jñuhun jeē jnáma ya rohó. Te jeē yúcuu cúu jeē cácahān rí. Te tu cácahān rí jñuhun jeē nújnahan ni ñayuu, chi sa jeē nújnahan ni Yaā Dios, chi máá yá jíto ndee anuá rí. <sup>5</sup>Te cájini rō jeē tu ní cánducú rí cuajnúhūn rí rohó iin modo stahú, ni tu ní cácahān rí jeē cúsi ni rí jíin ró návāha nihín rí xūhun ró. Te jíni Yaā Dios jeē súcuan cúu. <sup>6</sup>Te ni tu ní cánducú rí jeē cuajnúhūn ró ruhū, ni jeē cuajnúhūn inga ñayuu ruhū, vésú súcuan cánuú coo núu, chi apóstol Cristo cácuu rí. <sup>7</sup>Chi sa suhva víta ní cacahān rí jíin ró, nájñuhun sáha ñahan ndéca yiquín jéē yucún ndíto ña sēhe ña. <sup>8</sup>Te siquí jeē cácondáhú ndasí ni rí rohó, jeē yúcuu ní cacondíhvī ni rí nacani ri jñuhun váha Yaā Dios nuū rō. Te nasūu máá

yúcuan-ni, chi suni nde vida rí cuāha ri jeē siquí rō nuú, chi yōhyo maní rí jíin ró. <sup>9</sup>Te cánahan ró hermano, jeē tú ni ñin ró ní stáhān rí jeē cacān rí nuú rō ná ni canacani ri jñūhun vāha Yaā Dios nuú rō. Chi ni canducú ndéyí rí ni casájniñu ndasí rí siquí jeē cótecu rí. Te nduú ñuú ni casájniñu ri.

<sup>10</sup>Máá ró cájini rō, te suni Yaā Dios jíiní yā ndese ndaā ndoo ni cajica ri nuú rohó ñáyuu cácandíje. Te ni ñin tu cúu cahān cuēchi siquí rí. <sup>11</sup>Te suni cájini rō ndese ni castíhví ni rí ná ñin ná ñin ró, te ni cacahān rí jñūhun ndeyí ni jíin ró, nájñūhun sáha ñin tátá jíin séhe de. <sup>12</sup>Te ni cacahān nihin ri jíin ró jeē na cáca ndaā rō nuú Yaā Dios nájñūhun cánuú caca ró. Chi ni cana ya rohó jeē quíngoo ró núu ndácu ya jniñu, nuú luu kujéhu ró jíin yá.

<sup>13</sup>Te jeē yúcuan níiní nácuatáhú rí nuú Yaā Dios, chi ni cajetáhú ró jñūhun ya jeē ní canacani ri. Chi ni cájini rō jeē násū jñūhun ñin tēe cúu, chi jñūhun Yaā Dios cúu. Te máá jéndaá jeē jñūhun un sájniñu ini anuá rohó ñáyuu cácandíje nde ndacu ró yá. <sup>14</sup>Hermano, ñayuu ñuu rō ni cajito xeēn i rohó, te súcuan ni candoho ró nájñūhun ni candoho ñayuu cácandíje cáyucú región Judea jeē cáyihí ndaha Yaā Dios jíin Cristo Jesús. Chi nájñūhun ni candoho i ni sáha jñáhan i ñayuu hebreo, suni súcuan ni candoho ró. <sup>15</sup>Chi suu ñayuu hebreo ni cajehni de máá Jítoho yō Jesús, nájñūhun ni cajehni de tāca tēe ñuu de jeē ní canacani jñūhun ya nde jenahán. Te suni nde ruhū jijnáhan ri ni cascúnu de. Te casáha de jniñu jeē tu tújnahan ni Yaā Dios, te cúu de contra siquí tāca ñáyuu. <sup>16</sup>Chi Jesúsicoo de jeē ma nácani ri jñūhun nuú ñáyuu tācá nación jeē tu jíiní, návāha tú cācu i. Te súcuan sáha de jeē nducuehē gā cuēchi siquí de. Te vijna te yachí quiji quiví jeē cuāha Yaā Dios castigo xeēn nuú de.

### Jeē cuní Pablo quicōndēhé tucu de ñayuu Tesalónica

<sup>17</sup>Hermano, ni cacujiyo ri ñin núnúu-ni nuú rō jijnáhan ró. Te vēsú rí cájito jñáhan yó, te níiní cáñuhun ni rí rohó. Te yōhyo ni cacuu ni rí ndacoto ri nuú rō jijnáhan ró. <sup>18</sup>Te jeē yúcuan ní cajeni ni rí jecoo ri nuú rō nuú. Te ruhū Pablo, tíjini jínu ni nducú rí modo jeē rí, te Satanás ni jesi ichi ri jijnáhan ri. <sup>19</sup>Chi tuá na inga cáñuhun ni rí, te tuá na inga cácusí ni rí, chi suu máá ró jijnáhan ró. Te jeē siquí máá ró cúu jeē nihín rí premio rí te cusí teyí ni rí cuiñi yó núu máá Jítoho yō Jesucristo quiví ndíji ya. <sup>20</sup>Suu jeē siquí rohó cúu jeē cácusí teyí ni rí.

**3** Te jeē yúcuan tuá ni cácanda ri condetu ri nde nihín rí jñūhun ndese cáhiyo ró. Te ni casándaā rí jeē quéndōo máá-ni ri ñuu Atenas. <sup>2</sup>Te ni catají rí hermano yō Timoteo, tēe jéjñiñu jíin rí nuú Yaā Dios siquí jñūhun jeē jnáma Cristo yohó. Te ni jecondēhé de rohó návāha sáha de jeē cuiñi nihin ró te coo ndeyí ni rō jíin jñūhun cácandíje ró. <sup>3</sup>Te ni jeē de návāha ma náyūhú ni ñin ró síquí tāca jnúndóho jeē sáha ñayuu. Chi je cájini rō jeē súcuan cánuú ndoho yó. <sup>4</sup>Chi nde ná ni coyūcu rí jíin ró, te ni cacastūhun rí nuú rō jeē nihín nahín yó jnúndóho. Te je cájini rō jeē súcuan ni cuu, nájñūhun ni cacahān rí. <sup>5</sup>Te jeē yúcuan, ná tuá ni cánda ri condetu ri jeē nihín rí jñūhun ndese cáhiyo ró, te ni tají rí de ni jeē de, návāha cuni rí núu cácandíje nahín ró. Chi ni jeni ni rí á sanaa te jexeēn jeē jíto ndee yohó ní cundeyí jíin ró, te naa cāhá-ni jniñu jeē ní casáha ri jíin ró.

<sup>6</sup>Te vijna chi je ni ndee Timoteo nuú rí jijnáhan ri jeē ni jēe de ñuu rō Tesalónica. Te ni nacani de jeē cácandíje vāha ró, te cácundáhú ni rō jñáhan ró. Te ni cachi de jeē cáñuhun ni rō ruhū, chi cáhiyo maní rō jíin rí. Te cácuni rō nda-

coto ró núū rī, nájñūhun cáconi rī ndacoto ri nuū rō. <sup>7</sup>Te jeē yúcuān ní candusiī ni rī siquī jeē cácanđije vāha ró, hermano, vēsú xeēn iyó jñūndóho siquī rī. <sup>8</sup>Te vijna je ni cananihin ni rī, chi cáhiin nihin ró jíin máá Jítóho yō. <sup>9</sup>Núu súcuān te tu jínu cuiti nacuatáhu rī nuū Yaā Dios jeē siquī rohó jijnáhan ró. Chi jíto ya jeē cácusī ndasí ni rī jeē súcuān cáhiyo ró. <sup>10</sup>Te nduú ñuú cájicān tahú ndasí rī jeē ndácoto tucu rī nuū rō, te stéén gā rī na-ni jñūhun cúmanī jecūhun ni rō siquī jñūhun cácanđije yó.

<sup>11</sup>Te cáconi rī jeē máá Tátá yō Yaā Dios jíin Jítóho yō Jesucristo, na núne ya ichi jeē cuu jecoo tucu rī nuū rō. <sup>12</sup>Te na sáha máá Jítóho yō jeē cuehē ndasí gā cundáhu ni rō jnáhan ró jíin táca gā ñayuu, nájñūhun cácundáhu ni rī rohó jíjñáhan ró. <sup>13</sup>Te na sáha ya jeē íje ánuá rō jeē cuiñi nihin ró, návāha coo ndoo ró jéē ma cóo cuēchi ró núū máá Tátá yō Yaā Dios, quivī ndíji Jítóho yō Jesucristo jíin táca ñayuu yíhi ndaha ya.

#### **Siquī jeē caca ndaā yō modo jeē cúsiī ni yā**

**4** Te vijna hermano, íyó inga jñūhun jeē cácahān ndahú rī jíin ró te cáhān nihin ri jíin ró, chi súcuān cúni máá Jítóho yō Jesús. Je ni castéén rī nuū rō ndese cánuú caca ndaā rō návāha cusī ni Yaā Dios. Te cácahān ndahú rī jíin ró jeē sa víhyá gā na cáca ró súcuān.

<sup>2</sup>Chi je cájini rō na jniñu ni candacu rī nuū rō jeē ní ndacu máá Jítóho yō Jesús. <sup>3</sup>Te cūni Yaā Dios jeē na cóo ndoo coo i rō nuū yā, te ma cáca jnéni ró. <sup>4</sup>Te ná ñin ná ñin ró na cóndeca yíñūhún ró ñasihí máá ró, te súcuān caca ndoo ró. <sup>5</sup>Te ma sáha ró jniñu néé jéē ndíyo ni rō jesihí, nájñūhun cásaħa ñayuu táca nación jeē tu cájini i jñūhun Yaā Dios. <sup>6</sup>Ni ñin ró ma sáha ró cuēchi jeē quénde rō ñasihí jnáhan ró. Chi máá Jítóho yō cuāha ya castigo xeēn nuū ñayuu casáħa táca

jniñu súcuān, nájñūhun je ni cacahān nihin ri ni castūhun rī nuū rō. <sup>7</sup>Chi tu ní cána Yaā Dios yohó jéē sáħa yó jniñu jnéhén, chi sa jeē caca ndoo yó. <sup>8</sup>Núu súcuān te ñayuu jeē squéhichī jñūhun yáħa, nasūu jñūhun ñin tēē squéhichī i, chi sa jñūhun Yaā Dios, Yaā ni jéħe Espíritu Santo nuū yō.

<sup>9</sup>Te tu jíni ñúhún jéē tēē rī nuū carta yáħa jéē coo manī rō jíin táca hermano, chi je ni steén Yaā Dios nuū rō jeē coo manī rō jíin jnáhan ró. <sup>10</sup>Te je cáhiyo manī rō súcuān jíin táca hermano cáyūcu ní cáħnu Macedonia jíñā. Te cáhān ndahú rī jíin ró hermano, jeē sa víhyá gā na cóo manī rō jíin i. <sup>11</sup>Te na cóndihvī ni rō coyūcú nayúú ró, te ma cóndihvī ni rō siquī ndese cásaħa jnáhan ró, chi condihvī ni rō sáħa ró jniñu máá ró, nájñūhun ni candacu rī nuū rō. <sup>12</sup>Súcuān na sáħa ró návāha ñayuu tu cándíje, cuatáhu i róhó, te suni ma cúmanī jeē cotecu rō.

#### **Siquī jeē ndíji Jítóho yō**

<sup>13</sup>Suni cáconi rī, hermano, jeē na jécūhun ni rō jijnáhan ró siquī ñayuu cájihī, návāha ma cucuíhyá ni rō nájñūhun sava ga ñayuu jeē tu cáñuhun ni i jeē nátecu ndíyi. <sup>14</sup>Chi nájñūhun cácanđije yó jéē ni jíhi Jesús te ni natecu yā, suni súcuān cácanđije yó jéē nastécu Yaā Dios táca ñayuu ni cacandíje nuū Jesús te ni cajihī.

<sup>15</sup>Jeē yúcuān cácastūhun rī ñin jñūhun jeē ní castūhun máá Jítóho yō nuū rī: Jeē yohó jéē cátecu gā quivī ndíji máá Jítóho yō, nasūu máá yó cosnū jéē ndaa yó quíhin yō. Chi xihna gā ñayuu je ni cajihī ndaa i quíhin i. <sup>16</sup>Chi máá Jítóho yō nuu ya quiji ya ichi ándiví, te cana jee ya jeē máá yá ndácu jniñu, te cana jee ndajéħe cujéħnu ga, te cuecu trompeta Yaā Dios. Te xihna gā natecu táca ndíyi jeē ní cacandíje Cristo. <sup>17</sup>Yūcuán na te yohó jeē cátecu gā yō quivī ndíji ya,

suní ndonehen ya yohó jíin i, quihín yō mēhñu vícō. Te naquijnáhan yó jíin máá Jítóho yō sava andíví. Te súcuan condee yō níí cáni jíin máá Jítóho yō. <sup>18</sup>Núu súcuan te jíin jnúhun yáha cahān ndeyí ni rō jíin táca jnáhan rō.

**5** Te tu jíni nūhún jēé tēe ri nuū carta yáha síquī cuiyā chí quíví jēé coo táca un, hermano. <sup>2</sup> Chi je cájini váha rō jēé iin sanaa ni yō te quee quíví ndíji máá Jítóho yō, nájñuhun iin sanaa ni yō te quíji ñacuínhá jecuáá. <sup>3</sup> Chi ná-ni cácahān ñayuu jēé nayúú-ni íin te tú na jñundóho coo, te ná-ni cácahān i súcuan te iin sanaa ni i te quiji jñundóho síquī i jēé náá i, te ma cácu cuití i. Chi quiji quíví un nájñuhun iin sanaa-ni te quéjéé jéhdē chiji iin ñahan scácu sēhe. <sup>4</sup> Te rōhó hermano, tu cácuu rō ñayuu cájica nájñuhun nuū néé jēé iin sanaa-ni te quiji quíví un síquī rō nájñuhun quíji ñacuínhá. <sup>5</sup> Chi ndíhi rō cácuu ñayuu jēé nájñuhun cájica rō nduú, chi stéén luz yā ini anuá rō. Chi tu cácuu yó nájñuhun ñayuu jēé tu jécūhun ni síquī Yaā Dios, jēé nájñuhun cájica i nuū néé. <sup>6</sup> Núu súcuan te ma cúhuun ni yō nájñuhun ñayuu cáquixí, chi sa ndito na cóo ni yō te coo cájí xíní yō. <sup>7</sup> Chi jecuáá cúu jēé cáquixí ñayuu, te suni jecuáá cúu jēé nájini i. <sup>8</sup> Te máá yó chí nájñuhun jēé cájica yó nduú, te na cóo cájí xíní yō. Te na cúcutú yó jíin jnúhun cándíje níhin yó jíin jnúhun cúndáhú ni yó jnáhan yó, nájñuhun cúcutú soldado jíin sahma cáa. Te na cúcutú yó jíin jnúhun jēé cáñuhun ni yō jēé cācu yó, nájñuhun cúcutú soldado jēé ñuhun lélú cāa xíní de. <sup>9</sup> Chi Yaā Dios tu ní jéni ya yohó jēé cuáha ya castigo yohó, chí sa suhva jēé jnama ya yohó sáha máá Jítóho yō Jesucristo. <sup>10</sup> Te máá yá ni jihí yā jehē yō, návāha cotecu inuú yó jíin yá, vēsú núu cotecu gā yō ñayívi yáha chí cúu yō. <sup>11</sup> Núu

súcuan te cahān rō jnúhun ndeyí ni jíin táca jnáhan rō, te scuéhnu jnáhan rō jíin jnúhun ya, nájñuhun je casáha rō.

### Jēé jéni ichí Pablo táca hermano

<sup>12</sup> Te cácahān ndahú rí jíin rō hermano, jēé cuatáhú rō tēe cájejniñu cándito rōhó, jēé cácujeñu de nuū rō jíin jniñu máá Jítóho yō, te cájeni ichí de rōhó. <sup>13</sup> Te coo yñíhún ndasí rō nuū de, te coo maní rō jíin de síquí jniñu ya jēé casáha de. Te na cóyūcu máni rō jíin táca jnáhan rō.

<sup>14</sup> Te suni cácahān ndahú rí jíin rō hermano, jēé na stíhví ni rō ñayuu cájica cúxí. Te cahān rō jnúhun ndeyí ni jíin ñayuu jēé yachí ndínuu ni i. Te chindéé ñáhán rō ñayuu jēé tu fuerza ini. Te cuandeyí ni rō jíin ndíhi ñayuu.

<sup>15</sup> Te coto má nasáha ndevāha ro jíin ni iin ñayuu te núu sáha ndevāha i jíin rō. Chi máni jēé váha nducú rō sáha rō jíin táca jnáhan rō jíin ndíhi-ni ñayuu.

<sup>16</sup> Níní na cóo sñí ni rō jijnáhan rō. <sup>17</sup> Te níní na cácan tahú rō. <sup>18</sup> Te nacuatáhú rō jēé síquí táca-ni. Chi súcuan cúni Yaā Dios jēé sáha rō jēé cácañdíje rō Cristo Jesús.

<sup>19</sup> Te ma cási rō nuū jniñu jēé sáha Espíritu Santo jíin rō. <sup>20</sup> Te ni ma cujéé ni rō nuū jnúhun cácahān tēe cácanani jnúhun Yaā Dios. <sup>21</sup> Chi coto ndee rō táca jnúhun, te núu jēé váha cúu, te cuatáhú rō. <sup>22</sup> Te ma quíví nduu rō jíin ni iin jniñu néé.

<sup>23</sup> Te máá Yaā Dios jēé jéhe jnúhun ndeyí sñí ni, ñuhun ni rí jēé sáha ndíhi ya jēé cóo ndoo coo ií rō nuū yā. Te ñuhun ni rí jēé cóndito váha ya anuá rō jíin jēé níjñuní rō, jíin yiquí cúñu rō, návāha tú na cuēchi coo síquí rō quíví ndíji máá Jítóho yō Jesucristo. <sup>24</sup> Chi Yaā jēé ní cana rōhó, sáha ya ndíhi un jíin rō, chí síquícu ya jēé ni jéjñuhun ya.

**Saludo jiín bendición jeē sándīhí**

<sup>25</sup> Hermano jijnáhan ró, cacān tahu rō jehē rī jijnáhan rī.

<sup>26</sup> Te núu na cáhán rō jiín táca hermano, te techūhu yíñúhún ró ndaha i.

<sup>27</sup> Te cáhán nihin rī jiín ró, chí súcuan cúní maá Jítoho yō, jeē na cáhu ró carta yáha núū tācá hermano.

<sup>28</sup> Te ñúhun ni rī jeē maá Jítoho yō Jesucristo na sáha ga yā jeē váha róhó. Súcuan na cóo. Amén.

## CARTA UU JEE NI TEE APOSTOL SAN PABLO NUU ÑAYUU NUU TESALONICA

**1** Máá rí cúu Pablo jíin Silvano jíin Timoteo, te cátee ri carta yáha cuájeē nuū rohó ñáyyu cácanđje ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. <sup>2</sup>Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sií ni rō jijnáhan rō.

### Jeē sándaā yā cuēchi quívī ndíji Cristo

<sup>3</sup>Cánuú jéē niní nacuatáhú rí nuū Yaā Dios jeē siquí rohó jíin náhan rō hermano. Chi súcuan íyó váha, chi yōhyo váha cuahije rō jíin jnūhun jeē cácanđje rō yá, te yōhyo cuanducuehē jeē cá-cundáhú ni rō táca jnáhan rō. <sup>4</sup>Te jeē yúcuan cúu jeē cácusī teyí ni rí cánacani ri jnūhun rō núu táca grupo ñayuu cá-candíje nuū Yaā Dios. Chi váha cácanđje rō, te váha cájendeyí ni rō jeē cájito xeēn ñayuu rohó jíin jéē cándoho rō táca gá jnūndóho. <sup>5</sup>Te jíin táca jéē yáha chíhi ya cuenta jeē cácuu rō ñáyyu váha jeē quívicoo rō ñuu nuū ndácu ya jniñu. Chi siquí ñuu un cúu jeē cándoho rō. Te jeē súcuan chíhi ya cuenta siquí rō, yáha stéén nuū yō jeē váha Yaā cúu ya.

<sup>6</sup>Te suni íyó váha jeē nastóho ya ñayuu castóho róhó. <sup>7</sup>Te quívī ndíji Jítóho yō Jesús, quívī un sáha Yaā Dios jeē ndétātu róhó jéē cándoho, te suni ruhū jijnáhan ri. Chi jíin yáñuhūn quiji Jesús ichi ándiví jíin táca ndajéhé yā jeē ndíso poder. <sup>8</sup>Te cuáha ya castigo nuū ñáyyu jeē tu ní cájēhe i jnūhun cuni i ndese Yaā cúu Yaā Dios, te tu ní cájetáhú i jnūhun máá Jítóho yō Jesucristo jeē jnáma ya i. <sup>9</sup>Te ñayuu ún chi ndoho i ní cáni, chi cujiyo i nuū máá Jítóho yō, te ma cúu

quívicoo i nuū lúu ndasí cújéhnú ya jíin poder yā. <sup>10</sup>Súcuan sáha ya quívī ndíji ya jeē lúu cújéhnú ya sáha ñayuu cá-candíje jeē yíhi ndaha ya. Te nahán naa ni i coto i nuū yā. Te suni súcuan róhó jíin náhan rō, chí ni cacandíje rō jnūhun jeē ní canacani ri nuū rō.

<sup>11</sup>Te jeē yúcuan cúu jeē niní cájicān tahú rí jehē rō, jeē na cúu rō ñáyyu váha jeē ní cana ya rohó. Te jíin fuerza yā na sáha ya jíin rō jeē siquí rō táca jniñu váha jeē ní catee ni rō sáha rō siquí jeē cácanđje rō. <sup>12</sup>Te súcuan te cújéhnú máá Jítóho yō Jesucristo sáha rō, te suni cújéhnú máá rō jijnáhan rō sáha ya. Chi Yaā Dios yō jíin Jítóho yō Jesucristo, súcuan cúu jeē sáha ya jeē váha yóhó.

### Jnūhun siquí máá téé sáha xeēn cuēchi

**2** Vijna te cahān rí siquí jeē ndíji máá Jítóho yō Jesucristo jíin jéē ndutútú yó núu yā. Cácahān ndahú rí jíin rō jijnáhan rō hermano, <sup>2</sup>jeē ma cuáha rō jnūhun sacā nuu caní ni rō, ni ma cunéé ni rō núu cácahān ñayuu jeē jé ni quee quívī ndíji máá Jítóho yō. Ma candíje cuiti rō vēsú núu cahān i jeē ni níhin i iin jnūhun siquí un núu Espíritu, chí iin jnūhun jeē ni cáhān inga, chí núu cachi i jeē ruhú jijnáhan ri ni tají iin carta jeē cahán súcuan. <sup>3</sup>Ma cuáha cuiti rō jnūhun jeē stahú ni iin i róhó. Chi nde ná tu quiji quívī ún te xíhna gā ndunihni ni cuehē ñayuu nuū yā, te quenda ndijin máá téé sáha xeēn cuēchi, te téé jnáhnū ndetū cúu máá téé ún. <sup>4</sup>Chi téé jító uhū Yaā Dios cúu de, te ndonda de contra siquí táca jéē casnání i yaā i jíin táca jeē cáchiñúhún i. Te xeēn gā sáha de, chí nde cucōo de ini templo Yaā Dios jeē iyó Jerusalén, te cahān de jeē máá de cúu Yaā Dios.

<sup>5</sup>¿A cánahán rō jnūhun yáha? Chi súcuan ni cahān rí jíin rō ná ni iyo ri jíin rō. <sup>6</sup>Te je cájini rō ndé vé cúu jeē

jési jeē ná tu quenda ndijin tēe ún, chi nde na quée quivī maá de. <sup>7</sup> Chi je jícu sāhi táca cuēchi xeēn ini ñayiví, te vijna chi íyó jée jési nuū, návāha ma cáa ndasí gá cuēchi, chi nde na cújiyo maá jée jési nuū. <sup>8</sup> Te sáa te quenda ndijin maá tēe xeēn ún. Te máá Jítóho yō Jesús cahni ya tēe un jíin táchi yuhu-ni ya, te jíin jée ndíndēe yá ndiji ya te snáhnú ndetū yā de. <sup>9</sup> Te jeē quíji tēe xeēn ún chi máá Satanás sáha. Te quiji de jíin cuéhē poder, te sáha de táca jniñu jéhu jeē stahú de, jeē nahán naa ni ñayuu coto i. <sup>10</sup> Te jíin táca jniñu néé te stáhú ndasí de ñayuu jeē jnahnú ndetū, chi tu ní cúní i cuatáhú i jnūhun ndaā jeē cácu i núú. <sup>11</sup> Te jeē yúcuan cuāha Yaā Dios jnūhun jeē cuatáhú i jnūhun jeē tú ndaā cuiti, te candíje i jnūhun stáhú un. <sup>12</sup> Te súcuan te jecondee cuēchi siquī ndihi i jeē tu ní cá-candíje i jnūhun ndaā, chi sa jniñu néé ni cacusi ni i jíin.

### Ñayuu jeē ní nacāji ya jeē cácu i

<sup>13</sup> Te cánúu jée niní nacuatáhú rí jijnáhan ri nuū Yaā Dios jeē siquí rohó jée cácuu ró hermano jeē maní Jítóho yō jíin. Chi nde ná ni jecōo ñayiví, te je ni nacāji Yaā Dios rohó jée jnáma ya rohó. Chi sáha Espíritu yā jeē cáhiyo ndoo cáhiyo ii ró nuū yā te cá-candíje ró jnúhun ndaā. <sup>14</sup> Chi jeē yúcuan ní cana ya rohó jíin jnūhun jeē jnáma ya yohó jeē ní canacani ri, návāha quivícoo ró núú cujéhu luu ró jíin máá Jítóho yō Jesucristo.

<sup>15</sup> Núú súcuan te cuiñi nihin ró hermano, te conahán váha ró jnūhun jeē ní cacutühva ró núú rí, núu jeē ní cacahán rí chí jée ní tee ri nuū carta. <sup>16</sup> Máá Jítóho yō Jesucristo jíin Tátá yō Yaā Dios ni cundáhú ni yā yohó, te ni sáha ya jeē coo siñ ni yō ní cáni, jíin jée ñūhun ni yō táca jée váha jeē coo siquí jeē váha ni yā jíin yó. <sup>17</sup> Te na sáha ga yā jeē cóo ndeyí ni anuá ró jijnáhan ró, te na sáha ya jeē

íje ró cáhān ró táca jnúhun váha ya, te sáha ró táca jniñu váha.

### Jeē na cacán tahú i jehē de

**3** Te íyó inga jnūhun cánúu, hermano. Na cacán tahú ró jehē rí jijnáhan ri, návāha yachí cuité núu jnūhun máá Jítóho yō, te cuatáhú váha ñayuu, nájnūhun ni cajetáhú máá ró. <sup>2</sup> Te suni cacán tahú ró jeē na cácu ri nuū táca tēe cásáha néé jée cátejnéhan jíin rí. Chi tú ndihi tēe cá-candíje jnūhun ya. <sup>3</sup> Te máá Jítóho yō chi váha squícu ya jeē ni jéjnūhun ya, te sáha ya jeē íje ni táca ró jíin jnúhun ya, te coto ya rohó núú jeneé. <sup>4</sup> Te cá-cucáhu ni rí sáha máá Jítóho yō, jeē cócuu ró jíin jniñu jeē ní candacu ri nuū ró, te suni cocuu ga ró jíin. <sup>5</sup> Te ñūhun ni rí jeē máá Jítóho yō steén gā yā ndese coo maní gā ró jíin Yaā Dios nde jíin ini jíin ánuá ró, jíin jée cuándeyí ni ró nájnūhun ni sáha Cristo.

### Jeē cánúu sájniñu yó

<sup>6</sup> Te cándacu ri jniñu nuū ró hermano, chi súcuan ni ndacu máá Jítóho yō Jesucristo, jeē na cújiyo ró núú táca hermano cájica cúxí te tu cájica váha de nájnūhun ni castéén rí nuū ró. <sup>7</sup> Chi je cájini ró ndese cánúu ndacu ró rúhū jijnáhan ri, chi tu ní cájica cúxí rí ná ni cahíyo ri jíin ró. <sup>8</sup> Ni tu ní cáyeji rí staā ni iin ró súcuan-ni, chi ni cachunaa rí. Chi sa ni canducú ndeyí rí ni casájniñu téyí rí nduú ñuú, návāha ma stáhān rí ni iin ró. <sup>9</sup> Te vēsú íyó derecho rí jeē cacán rí nuū ró nuú, te tu ní cájicān rí, chi súcuan ni casáha ri návāha cuu ri iin ejemplo nuū ró ndese sáha ró jijnáhan ró. <sup>10</sup> Chi ná ni coyūcu rí jíin ró, te ni candacu ri jniñu yáha nuū ró: Núú ndé iin ñayuu tu cúní i sájniñu i, te suni ma cáji i núu súcuan. <sup>11</sup> Chi ni canihín rí jnūhun jeē cájica cúxí sava ró, te tu casájniñu ró, chi yáha yúcuan-ni sáha ró. <sup>12</sup> Te cándacu ri jniñu nuū rohó jée casáha súcuan, te

cástihví ni rī rohó jeē na cóo nayúú ró te sájniñu ró, návāha nihīn rō jeē cáji rō siquī jniñu sáha máá ró. Chi súcuan ndácu máá Jítóho yō Jesucristo jniñu.

<sup>13</sup> Hermano, ma ndīnuu ni rō jijnáhan ró sáha ró táca jniñu váha. <sup>14</sup> Te núu ndé iin i tu jétáhú i jnūhun jeē cahán rī nuū carta yáha, te condēhe váha ro ndé-ni i cúu, te ma quijnáhan ga rō jiín i, návāha na cúcanu i te nacani ni i. <sup>15</sup> Te nasūu jēe cóto uhū rō i, chí sa cahān rō jiín i nájnūhun jíín ñani rō jeē na sájniñu váha i.

### **Bendición jeē sándihí**

<sup>16</sup> Te ñūhun ni rī jeē máá Jítóho yō, Yāa jeē jēhe jnūhun ndeyí sī ni, níní na

sáha ya jeē coo ndeyí coo sī ni rō siquī tācá-ni, te coo ya jiín ró jijnáhan ró.

<sup>17</sup> Ruhū Pablo, yāhá-ni cúu jeē tée ri jiín ndaha máá rí jeē cahán rī jeē sándeýí ni rō jijnáhan ró. Te súcuan jēhe ri firma nuū táca carta rī, návāha cuni rō jeē carta máá rí cúu. Súcuan cáa letra rī. <sup>18</sup> Te ñūhun ni rī jeē máá Jítóho yō Jesucristo, na sáha ga yā jeē váha ró jijnáhan ró. Súcuan na cóo. Amén.



## CARTA HN JEE NI TEE SAN PABLO APOSTOL NUU TIMOTEO

**1** Máá rí cúu Pablo, apóstol Jesucristo, chi Yaā Dios jeē jnáma yóhó, jíin Jítóho yō Jesucristo jeē ñúhun ni yō coto yó, ni catajǎ yá ruhū jeē nácani ri jnúhun ya. <sup>2</sup>Te tée ri carta yáha cuájeē nuū rō Timoteo, chi cúu ndije rō nájnúhun séhe ri siquǎ jeē ni scándíje ri rohó. Te ñúhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyǎ coo sǎ ni rō.

### Jeē ma candíje i tāca jnúhun stáhú

<sup>3</sup>Ná ni quihin ri ichi jeē quihín ri Macedonia, te ni cahān ndahú rí jíin rō jeē quéndōo rō ñuu Efeso. Te suni súcuan cáhán rí jíin rō vijna, návāha cahān nihin rō jíin sava ñayuu yúcuan jeē ma stéén i inga jnúhun jeē tú ndaā. <sup>4</sup>Te ma cuatáhú i tāca jnúhun jeē cúu máá cuento-ni, jíin jnúhun jeē cahán siquǎ ndese vĕji yucūn tāca jíi yō. Chi tāca jéé yúcuan sáha jeē nahán cánda-jnúhún i siquǎ, te tu ndé jéjníñu, te tu sáha jeē íje i squícu i nuū Yaā Dios siquǎ jnúhun cácanđíje yó.

<sup>5</sup>Te ndácu ri jniñu yáha chi cúní rí jeē na cundáhú ni i jnáhan i siquǎ jeē iyó ndoo iyó ndaā anuá i, te cácanđíje ndije i ya. <sup>6</sup>Te sava ñayuu chi ni cajica yátá i, te ni cascuíta i jnúhun ya, ni quívicoo i nuū tāca jnúhun jeē tu ndé jéjníñu. <sup>7</sup>Chi cácani i cuu i maestro ley yā, te ni tu cá-jecūhun ni i na jnúhun cúu jeē cácahān i, jíin na vé cúu jeē castéén nihin i.

<sup>8</sup>Te jíní yō jeē iyó váha ley un, te núu jecūhun ni yō ndese jéjníñu. <sup>9</sup>Chi cánuú sáha yó cuenta jeē tu ní jécōo ni ñin ley jeē siquǎ ñayuu ndaā, chi sa suhva siquǎ ñayuu jeē tu cájetáhú, jeē níñni ni, jeē casáha jniñu néé, jeē casáha cuēchi, jeē tu cáchiñúhún Yaā Dios ni tu cácanđíje

ley yā, jeē cájehni tatá jíin náná, jíin jéé cájehni ndíyi. <sup>10</sup>Te suni ni jecōo siquǎ ñáyuu cájica jnéni, jíin téé casáha ndíyi jíin jnáhan yí, jíin ñáyuu casacúhna inga ñayuu, jíin ñáyuu castáhú, jíin ñáyuu cácahān nihin jnúhun yáá. Te ni jecōo siquǎ tāca gá ñayuu jeē casáha jniñu tu quíjnáhan jíin jnúhun ya jeē steén ndaā váha. <sup>11</sup>Te jnúhun ya un cúu jnúhun yōhyo jéhu jeē jnáma Yaā Dios yohó. Te yōhyo ndetū Yaā cúu ya. Te ni tejníñu ya ruhū nácani ri jnúhun ya.

### Jeē nácuatáhú Pablo siquǎ jeē ní cundáhú ni yā de

<sup>12</sup>Te nácuatáhú rí nuū Jítóho yō Jesucristo, Yaā ni jēhe fuerza ini ri, chi ni quihin ya ruhū ni sáha ya jeē cuu squícu ri, te ni tejníñu ya ruhū nácani ri jnúhun ya. <sup>13</sup>Te súcuan ni sáha ya jíin rí vésú ni cahān ndevāha ri siquǎ yā nde saá, te ni sáha ndevāha ri jíin ñáyuu cácanđíje, te xēen ni sáha ri. Te vésú súcuan te ni cundáhú ni yā ruhū, chi ná tu candíje ri yā nde saá, te tu ní jécūhun ni rí na vé cúu jeē sáha ri. <sup>14</sup>Súcuan ni sáha Jítóho yō jeē váha ndasí jíin rí. Te ni sáha ya jeē candíje ri jíin jéé cundáhú ni rí jnáhan ri siquǎ jeē ni quívi ri ndaha Cristo Jesús.

<sup>15</sup>Te ndaā ndije cúu jnúhun yáha, te jeē cánuú candíje ndíhi ñayuu cúu: jeē ní quiji Cristo Jesús ini ñayívi návāha jnama ya ñayuu iyó cuēchi. Te ruhū cúu téé jeē vihyá gā ni sáha cuēchi. <sup>16</sup>Te ni cundáhú ni Yaā Dios ruhū, návāha jíin rúhū jeē vihyá gā ni sáha cuēchi te stéén Jesucristo ndese yōhyo íne cáhnu ni yā. Te súcuan ni sáha ya jeē cúu ri ñin ejemplo nuū tāca ñáyuu candíje ní cuáhān yō, návāha nihin tahú i cotecu i ní cáni. <sup>17</sup>Núu súcuan te ní cáni na cáhán yíñúhún yó jeē yōhyo luu cújéhu máá Yaā jeē cúu Rey siquǎ ndíhi, jeē técu ní cáni, jeē tu náá cuiti. Te tu cúu coto yó núu yā vijna, te máá ñin-ni ya iyó, te ndíchí yá. Amén.

<sup>18</sup>Nájnūhun sēhe ri cúu ró Timoteo, te jniñu yáha téjñiñu ri rohó, jéē na ndúcú ndéyí ró síquī jniñu váha. Te na cándíje váha ró, te na cóo ndaā anuá rō. Chi nde saá je ni cacahān tācá hermano jíin jnūhun Yaā Dios jeē súcuan condiso jniñu ró. <sup>19</sup>Chi sava ñayuu tuá iyó ndáā anuá i nuū yā, te ni casnāā i jnūhun cá-candíje i. <sup>20</sup>Himeneo jíin Alejandro cúu uū tēe ni casáha súcuan. Te je ni siaá ri de nuū Satanás, jeē stóho ún de, návāha jíin jnúndóho ún te cutūhva de jeē ma cáhán ndevāha ga de síquī Yaā Dios.

### Siquī ndese cacān tahú yó

**2** Núu súcuan te xihna gā ndácu ri jeē cacān tahú rō jehē tāca ñayuu. Te cahān ndahú ró jehē i, te cacān rō na-ni na vé jíni nūhún i, te nacuatáhú ró nuū yā jeē síquī i. <sup>2</sup>Te cacān tahú rō jehē tāca tēe cácujeñu jíin jéē ndácu jniñu, návāha sáha de jeē cuu coyūcu váha yó te tú na jnúndóho coo síquī yō, te cuu chiñúhún váha yó Yaā Dios te sáha yíñúhún yó jíin táca-ni. <sup>3</sup>Chi yáha cúu jeē váha jeē núnjahan ni Yaā Dios, Yaā jnáma yóhó. <sup>4</sup>Chi máá yá cuní yā jnama ya tāca ñayuu te cuni i ndese íyó jnūhun ndaā yā. <sup>5</sup>Chi íyó ñni Yaā Dios, te suni íyó ñni Yaā jeē cahán jíin Yaā Dios jehē ñayuu. Te Yaā un cúu máá Jesucristo jeē ní nduu tēe. <sup>6</sup>Te ni socō yā maá yá ni jihí yā jeē ní chunaa yā cuēchi ndihí yó. Te ná ni quiji máá quívi ún, te ni quejéé ní canacani jnūhun ún. <sup>7</sup>Te jeē síquī yúcuan ní jeni ya ruhū cúu ri apóstol jeē nácani ri jnūhun ya, návāha stéén rī nuū ñayuu tācá nación jeē tu jíin jnūhun ya, jeē na cándíje i jnūhun ún te sáha i jniñu ndaā. Te síquī jeē candíje ri Cristo te ndaā cúu jeē cahán rī.

<sup>8</sup>Núu súcuan te cúní ri jeē ndihí-ni lugar na cacān tahú tāca tēe. Te na cóo ndoo ánuá de jeē ma quití ni de ni ma tejnáhan de. <sup>9</sup>Te suni súcuan tācá ñahan, na cási váha ña máá ña nájnūhun

cánuú, návāha ma cóo jnūhun canu. Te ma cóndihvi ni ña jeē sáha luu ndasí ña xini ña, chí jéē cuhun ña síquī oro chí perla chí sahma váha ga. <sup>10</sup>Chi sa suhva na quéndōo luu ánuá ña jíin jniñu váha sáha ña, nájnūhun cánuú sáha ñahan ndoo ánuá jeē cájejniñu nuū Yaā Dios. <sup>11</sup>Te núu cáhiin ña jíin ñayuu cascuáha jnūhun ya, te na cúní nahín ña te cuatáhú ña. <sup>12</sup>Chi tu jéhe ri jnūhun jeē steén ñahan nuū ñayuu ndutítú, ni jeē ndácu ña jniñu nuū tēe. Chi sa suhva na cúní nahín ña. <sup>13</sup>Chi xihna gā Adán ni sáha ya, te saá te ni sáha ya Eva. <sup>14</sup>Te tu ní stáhú jexeén Adán, chí sa suhva ni stahú un ñasihí de, te ni sáha ña cuēchi. <sup>15</sup>Te jeē scácu tācá ña sēhe te coo váha ña, te núu na quéndōo ña jíin jnūhun cándíje ña ya, jíin jéē cundáhú ni ña jnáhan ña, jíin jéē cóo ndoo ánuá ña, jíin jéē sáha yíñúhún ña.

### Ndese cánuú coo tēe cándiso jniñu nuū ñayuu cácuandíje

**3** Ndaā cúu jnūhun yáha: Núu ñni tēe cúní de condiso jniñu de condito de ñayuu cácuandíje, te váha jniñu ndúcú de sáha de. <sup>2</sup>Núu súcuan te tēe ndiso jniñu nuū ñayuu cácuandíje, cánuú jeē ma cóo ni ñni jeē nihín ñayuu cuēchi síquī de. Te na cóo ñni ñasihí de, te cáji coo ni de, te ndito coo xini de, te sáha yíñúhún de. Te cánuú jeē niní cuanúu de vehe nuū ñayuu cájica, te níní stéén váha de jnūhun ya. <sup>3</sup>Te ma cúu de tēe nájini, te ma tejnáhan de, te ma ndíyo ni de xūhún. Chi sa suhva coo váha ni de, te coo vitá ni de, te ma cutóo ni de síquī xūhun. <sup>4</sup>Te cánuú jéē na ndácu váha de jniñu ini vehe de, te sáha de jeē squícu váha sēhe de te coo yíñúhún i nuū de. <sup>5</sup>Chi núu ñni tēe tu jíin de ndacu váha de jniñu ini vehe de, ¿te ndese cuu condiso jniñu de nuū ñayuu cácuandíje nuū Yaā Dios? <sup>6</sup>Núu súcuan te tēe ndiso jniñu nuū ñayuu cácuandíje, ma cúu de tēe jeē

saá ní candíje, chi núu súcuan te sanaa te sándúxí de máá de, te inuú-ni cuēchi jeconde siquī de jíin jéxeén. <sup>7</sup> Te cánuú cuu de tēe jeē suni nde ñayuu tu cácan-díje, cuajnúhún i de, návāha ma nihín i cuēchi siquī de, te ma cúndeyí jexeén jíin de.

### **Ndese cánuú coo tēe cájejníñu mēhñu ñayuu cácan-díje**

<sup>8</sup> Te suni súcuan tēe cájejníñu mēhñu ñayuu cácan-díje, cánuú jēē na cóo yínúhún de, te na squícu de jíin jnúhun cáhán de. Te ma cúu de tēe nájini, te ni ma ndíyo ni de xūhún. <sup>9</sup> Te na cuñi nihin de jíin jnúhun cándíje yó jēē ní yisāhi ndé jenahán, te na cóo ndoo anuá de. <sup>10</sup> Te cánuú jēē xíhna gā coto ndee rō de, te núu ni jini rō jeē tú na cuēchi de, yūcuán na te cuu cuajníñu de mēhñu ñayuu cácan-díje. <sup>11</sup> Te suni súcuan ñasihí de jíjnáhan ña, cánuú coo yínúhún ña, te ma sajnúhún ña, te cájí coo ni ña, te squícu vāha ña tēcá-ni jniñu. <sup>12</sup> Te tēe cájejníñu mēhñu ñayuu cácan-díje, na cóo iin-ni ñasihí de, te na ndácu vāha de jniñu nuū séhe de jíin núu ñayuu vehe de. <sup>13</sup> Chi tāca tēe cájejníñu vāha mēhñu ñayuu cácan-díje, chi vāha quéndōo yínúhún de, te níhín de modo jeē cájí gá nácani de jnúhun Cristo Jesús jeē cácan-díje yó.

### **Jnúhun sāhi yá jeē cácan-díje yó**

<sup>14</sup> Te vēsú nñuhun ni ri cuajeē yachí ri coto jnáhan yó, te tēe ri jnúhun yáha cuajeē nuū rō, <sup>15</sup> návāha núu cucuéé rí, te je jíin rō ndese cánuú sáha vāha ñayuu cácuu séhe Yaā Dios. Chi máá i cácuu ñayuu cácan-díje nuū Yaā Dios, Yaā técu. Te máá i cásáha jeē iyó cutú jnúhun ndaā, chi cáhiin nihin i jíin. <sup>16</sup> Te jendaá ndije chi jéhnu ndasí cúu jnúhun yáha jeē cácan-díje yó, jeē ní yisāhi ndé jenahán:

Yaā Dios ni steén yā maá yá, chi ni nduu ya tēe,  
te Espíritu ni steén jeē iyó ndaā jniñu ni sáha ya,  
te tēcá ndajéhé andiví ní cajito jniñu ní sáha ya.  
Te ni jitē núu jnúhun ya nuū ñayuu tēcá nación,  
te ni cacandíje ñayuu ní ñáyivi núu yā,  
te ni ndaa ya cuanuhun yā andiví.

### **Siquí ñayuu cájica yátá nuū jnúhun cácan-díje yó**

**4** Te cájí steén Espíritu Yaā Dios jeē quiví cuándihi te coo sava ñayuu caca yátá i nuū jnúhun cácan-díje yó. Te cuatáhu i tāca jēē cácahān jnúhun stáhú jíin jnúhun ní castéén tachi. <sup>2</sup> Chi cuni nahín i jnúhun cástéén tēe cástáhú-ni, jeē tu cácahān ndaā de. Chi tēe un ní cahije ndasí ni de jíin jnúhun stáhú, te tuá sáha jíin ánuá de jeē nácani ni de. <sup>3</sup> Te cahān de jeē cuēchi cúu jeē coo ñasihí tēe, te suni súcuan núu caji ñayuu sava ndeyu. Te ndeyu ún chi ni sáha Yaā Dios jeē cúu ñayuu cácan-díje jeē jiní jnúhun ndaā, návāha caji i te nacuatáhu i nuū yā. <sup>4</sup> Chi ndihi jeē ni sáha Yaā Dios, iyó vāha, te ma squexícó yō ni iin, chi sa nacuatáhu yó te caji yō. <sup>5</sup> Chi jíin jēē cáhu yó jnúhun Yaā Dios jíin jēē nácu-atáhu yó nuū yā, te iyó ndoo ndihi-ni.

### **Tēe jéjníñu vāha nuū Jesucristo**

<sup>6</sup> Te núu steén rō jnúhun yáha núu tēcá hermano, núu súcuan te cuu ró tēe jéjníñu vāha nuū Jesucristo, te ije ró jíin jnúhun vāha ya jeē candíje ró, chi ni cutúhva ró te ndíquin rō. <sup>7</sup> Te ma quívi nduu rō jíin tāca jnúhun jeē cúu cuento-ni jeē cájeni cāhá ni ñayuu. Chi níní na scuáha ró ndese chiñúhún vāha ró Yaā Dios. <sup>8</sup> Chi jeē scuáha yó ejercicio jeē cóo ndacuí yiqui cúnu yō, jecu-ni níhín jniñu. Te jeē scuáha yó chiñúhún vāha yó yá, suu yūcuan cúu

jeē váha níhín jníñu siquī tācá-ni, jeē cúu vida yáha jíin vida quiji. <sup>9</sup>Te ndaā ndije cúu jñuhun yáha, te jeē cánuú candíje ndíhi ñayuu cúu. <sup>10</sup>Te jeē siquī yáha cúu jeē sájniñu nihin yó síquī jñuhun ya te ndóho yó jéē cácahān ndevāha i nuū yō. Chi níuhún ni yō jeē coto yó núú maá Yaā Dios, Yaā técu. Te máá yá cúu Yaā jnáma tāca ñayuu, te ñayuu cácañíje jñuhun cúndáhú ni yā i, máá i cúu jeē jnáma ya.

<sup>11</sup>Tāca jñuhun yáha cánuú jéē ndacu ró núú i te stéén rō. <sup>12</sup>Ma cuáha ro jñuhun jeē kujéē ni ni iin i nuū rō siquī jeē suchí rō. Chi sa coo ró iin ejemplo nuū ñayuu cácañíje, jeē cúni i ndese vāha cáhān rō, ndese vāha sáha ró, ndese cúndáhú ni rō jnáhan ró, ndese cándíje ró, ndese íyó ndoo ánuá rō. <sup>13</sup>Te níni ndé ná tu jinū rī nuū rō, te condíhvī ni rō jeē cáhu ró tutu i nuū hermano cándutútú, jíin jéē síhvī ni rō i, jíin jéē steén rō nuū i. <sup>14</sup>Ma cúhuun ni rō jíin táhū jeē ni jéhe Yaā Dios nuū rō jeē nácani ró jñuhun ya. Chi tāca téé jéhnu cándiso jníñu nuū ñayuu cácañíje, ni casóó de ndaha de xinī rō, te ni sáha Yaā Dios jeē ní cacahān de jeē súcuan condiso jníñu ró.

<sup>15</sup>Núu súcuan te cocuu ró jíin táca jniñu yáha, te condíhvī ni rō jíin, návāha cuni tāca ñayuu jeē váha íje ró cuáhān rō jíin. <sup>16</sup>Coo cuidado rō jeē caca ndaā rō jíin jéē steén vāha ró jñuhun ya, te cuiñi nihin ró jíin ndíhi. Chi núu súcuan sáha ró te quendōo vāha ánuá maá ró jíin ñayuu chuhun ni jñuhun cáhān rō.

### Ndese sáha vāha yó jíin ñayuu cácañíje

**5** Ma cúxeēn rō nuū tāca téé jéhnu, chi sa cahān vāha ró jíin de jeē ma stívi de, nájnūhun cáhān rō jíin tátá rō. Te tāca téé suchí, suni cahān vāha ró jíin de nájnūhun jíin ñani rō. <sup>2</sup>Te suni súcuan cahān rō jíin táca ñahan jéhnu, nájnūhun jíin náná rō. Te suni súcuan jíin táca ñahan súchí, nájnūhun

jíin cuáha ró, te yíñuhún ndajñuhun ró jíin ña.

<sup>3</sup>Te ñayuu cácañíje na cuáha i jeē jíni níuhún ñahan ni caquendōo ndáhú, te núu ni quendōo ndáhú ndije ña jeē tú na ñayuu condito ña. <sup>4</sup>Chi iin ñahan ní quendōo ndáhú, núu íyó séhe ña chí séhe chání ña jeē jévāha, te na cóto máá i ña. Chi cánuú cutúhva i jeē xíhna gā nuū ñayuu vehe i squícu i coto i. Te na náccoto i náná i tátá i siquī jeē ní cacandito ña i. Chi yáha cúu jniñu váha jeē nújnahan ni Yaā Dios. <sup>5</sup>Te iin ñahan ní quendōo ndáhú ndije jeē máá iin na ña, níuhun ni ña jeē maá Yaā Dios condito ya ña, te tu jécuiñi ña jeē jicán tahú ña nduú ñuú. <sup>6</sup>Te sa suhva núu máni ndíhvī ni ña siquī tāca jéē cúsiñi ni maá-ni ña, yūcuán na te vésú técu ña, te nájnūhun je ni jihī ña. <sup>7</sup>Jniñu yáha ndacu ró núú ñayuu, návāha ma cóo cuēchi siquī i. <sup>8</sup>Te núu iin ñayuu tu ndíto i jnáhan vehe i, te víhyá gā ñayuu ini vehe i, núu súcuan te sáha i jniñu jeē tu quíjnahan jíin jñuhun cándíje yó, te cúu i iin jeē neé gá vésú ñayuu tu cácañíje.

<sup>9</sup>Te ñahan viuda cuu quívi síhvī ña nuū lista ñayuu jeē cáchindéé ñahán ró jíin xúhūn, te núu je ni jinū ña unī xico cuiyā, te núu ni íyo iin-ni yí ña. <sup>10</sup>Te suni cánuú jéē cuajnúhún ñayuu ña jeē váha jniñu ni sáha ña, núu jeē ni scuéhnu vāha ña séhe ña, jíin jéē ní jéhe núu ña vehe nuū ñayuu cájica, jíin jéē ní jejniñu ña nuū hermano cácañíje, jíin jéē ní chindéé ñahán ña ñayuu cándoho jñundóho, jíin jéē ni sáha ña tāca gá jniñu váha.

<sup>11</sup>Te tācá ñahan viuda jeē iyó suchí gá, chi ma soó ró síhvī ña nuū lista. Chi sanaa te nducú ña jeē cúsiñi ni maá-ni ña, te ma cóndíhvī ni ña siquī Cristo, chí cuu ni ña condeca tucu ña tēe. <sup>12</sup>Te súcuan jecondee cuēchi siquī ña, chí tu ní squícu ña jeē ni jéjnūhun ña ná ni jecosoó síhvī ña nuū lista. <sup>13</sup>Te suni caca

cuu ña tãcã-ni vehe te quee cúxí ña. Te nasũu máni jeẽ cáca cúxí ña, chi suni siquĩ jeẽ sajnũhún ña, te quĩvi nduu ña cahãn ña jnũhun jeẽ tu íyó váha jeẽ cahán ña. <sup>14</sup> Jeẽ yúcuan cúní rĩ jeẽ tãcã ñahan viuda jeẽ iyó suchí, na nándãha ña, te scuẽhnu ña sêhe, te coto váha ña vehe ña, návãha ñayuu cácuu contra ma cúu cahãn i siquĩ ña. <sup>15</sup> Chi sava ñahan viuda je ni cajica yátã ña te sãha ña jniũu jeẽ cuní Satanás.

<sup>16</sup> Te núu ñin tẽe chí ñin ñahan cándíje, núu íyó ñahan viuda vehe i, te na cóto máã i ña. Te ma cóndee gasto ña siquĩ grupo ñayuu cácañdije, návãha cuu cuãha váha i nuũ ñahan viuda jeẽ tu ndé ñin coto ña.

<sup>17</sup> Te tãca tẽe jẽhnu cándito ñayuu cácañdije, na jécunaã doble yãhu de, te núu cándihví ni de cástéẽn de cánacani váha de jnũhun ya. <sup>18</sup> Chi cúu nájnũhun cáhãn tutu ii: Ma cánda stiquĩ caxĩn tĩ trigo, núu ma cuãha ró jéẽ cáji tĩ. Te suni cáhãn: Tẽe jeẽ sãjniũu tátú, jíni ñũhún quiyãhu de, áchĩ.

<sup>19</sup> Ma cuajnúhún ró te núu jéquin ñayuu cuẽchi siquĩ ñin tẽe jẽhnu cándito ñayuu cácañdije te núu tu íyó úũ chí únĩ testigo. <sup>20</sup> Te núu cásaãha ñayuu cuẽchi, te cánuú cuxeẽn rō nuũ i, jíto jínuú ndihĩ ñayuu, návãha na cónso iyo sava ga i. <sup>21</sup> Te cáhãn nihĩn rĩ jíin ró, jíto máã Yaã Dios jíin Jítóho yō Jesucristo jíin táca ndajéhé yã jeẽ ní nacãji ya: Squĩcu váha ró jniũu yãha, te ma sãha ró cuenta ndese cúu ñin ñin i, chi inuú-ni sãndaã rō siquĩ ndihĩ-ni i. <sup>22</sup> Ma cáni yachĩ rō ñin tẽe jeẽ condiso jniũu de nuũ ñayuu cácañdije, chi xĩhna gã coto ndee rō de. Chi sanaa te stívi de, te cuẽchi de suni condee siquĩ rō jíin de. Te coto ró máã ró jeẽ ma quĩvi ró jíin jniũu neé.

<sup>23</sup> Te siquĩ jeẽ núu-ni núu-ni cúhú chíji ró, te ma cóho ga rō máni ndute, chi suni coho ró jecu vino.

<sup>24</sup> Cuẽchi sava ñayuu chi je íyó ndijin nde ná tu quĩvi i nuũ cúndaã cuẽchi i. Te cuẽchi sava ga i chi cúcuéẽ te natũu nahĩn. <sup>25</sup> Te suni súcuan tãcã jniũu váha, chi íyó ndijin. Te vêsú ná tu natũu jniũu váha ún, te ma cúu quisãhi ní cáni, chi natũu nahĩn.

**6** Tãca ñayuu cácuu mozo, na cóo yĩnúhún váha i nuũ patrón i, návãha ma cahán neé ñayuu siquĩ Yaã Dios jíin siquĩ jnũhun ya jeẽ cástéẽn yō. <sup>2</sup> Te mozo jeẽ yĩhi nuũ patrón cácañdije, ma cáni ni i jeẽ cũhva-ni sãha yĩnúhún i nuũ de siquĩ jeẽ hermano cácañdije cácuu de. Chi sa cuajniũu váha ga i nuũ de, chi tẽe cácañdije tẽe maní i jíin cúu tãca tẽe un jéẽ sãjniũu i nuũ. Jnũhun yãha stéẽn rō te stíhvi ní rō i.

### **Siquĩ jeẽ chínúhún váha yó yá te cusĩ ni yō jíin cúhva jeẽ névãha-ni yō**

<sup>3</sup> Te núu ndé tẽe stéẽn de jnũhun tú ndaã jeẽ tu quĩjnãhan jíin jnũhun váha ndaã máã Jítóho yō Jesucristo, jíin jnũhun ni stéẽn Yaã Dios jeẽ cácañdije yó, <sup>4</sup> núu súcuan te máni tẽe ndúxĩ tẽe tu jécũhun cuĩti ni cúu de. Chi cánéẽ xĩni de, chi máni cúní de tejnãhan de siquĩ táca jnũhun stéẽn de. Te tãcã un sãha jeẽ cácuuésún ni, jíin jéẽ cátejnãhan, jíin jéẽ cácahãn ndevãha, jíin jéẽ cájeni neé ni siquĩ jnãhan, <sup>5</sup> jíin jéẽ máni cástãhãn jnãhan. Súcuan cásaãha tẽe jeẽ ní ndunéẽ xĩni, jeẽ tu cájini jnũhun ndaã. Te cájeni ni de jeẽ nihĩn de cuehẽ xũhun siquĩ jnũhun cácañdije de stéẽn de. Na cújiyo ró nuũ ñayuu cándaã súcuan. <sup>6</sup> Te jendaã jeẽ yóhyo váha quéndōo yó te núu chínúhún váha yó yá, te núu cusĩ ni yō jíin cúhva jeẽ névãha-ni yó. <sup>7</sup> Chi tú na vé ni cácu yó jíin ñayĩvi yãha, ni tú na vé condiso yó quĩhĩn yō jíin núu na cúu yō. <sup>8</sup> Te núu íyó jéẽ cáji yō jeẽ cusúcun yó, te na cusĩ ni yō jíin yúcuan-ni. <sup>9</sup> Chi ñayuu jeẽ cuní cucúcã, chi yachĩ quĩvi i cuẽchi jeẽ jíto ndee jexeẽn i. Te quĩvi

i jíin cuéhē jniñu cánéé jniñu stívi jéē ndíyo ni i. Te tāca un sáha jeē t́vi ñayuu te jnahnū ndetū i. <sup>10</sup> Chi jeē ndíyo ni yō xühún, yūcuan sáha jeē quejéé táca jniñu néé. Te sava ñayuu jeē ndíyo ni xühún, ni castóo i jnūhun cácanđije i, te ni canihñ i i cuehē ndasí jnúndóho.

**Jeē na ndúcú ndéyí  
yó siquī jnúhun cándije yó**

<sup>11</sup> Te róhó chi tēe jéjníñu nuū Yaā Dios cúu ró, te cunu ró coto ró táca cuéchi yáha. Te condiquin rō jniñu ndaā, te chiñúhún váha ró Yaā Dios, te candíje váha ró, te cundáhú ni rō jnáhan ró, te cuandeyí ni rō, te coo vitá ni rō. <sup>12</sup> Te nducú ndéyí ró siquī jnúhun cándije yó yá. Te cuiñi nihin ró jíin jnúhun jeē ni nihñin tahú yō cotecu yō ní cáni. Chi jeē yúcuán cúu jeē ní cana ya rohó, te cáji ní cahān rō jeē váha cándije ró yá, jíto jínúú cuehē ñayuu. <sup>13</sup> Te cáhán nihin ri jíin ró, jíto máá Yaā Dios, Yaā jeē sáha jeē técu táca-ni, jíin Jesucristo, Yaā jeē cají ní cahān yā ni nacani ya jnūhun váha nuū Poncio Pilato. <sup>14</sup> Squícu váha ró jniñu ndácu ya nuū rō, te ma stívi ró sáha ró, náváha ma cahán ñayuu cuéchi siquī rō. Te súcuán sáha ró ní ndé quiví ndíji Jitoho yō Jesucristo. <sup>15</sup> Chi quiji ndíjin yā máá quiví jeē ní jeni Yaā Dios. Te Yaā Dios chi máá ñin-ni ya cúu Yaā yōhyo ndetū, te jnñi ya ndíhi poder. Te cúu ya Rey nuū táca rey, jíin Jítoho nuū

tāca jítoho. <sup>16</sup> Te máñúhún-ni ya cúu jeē iyó ní cáni. Te ndéé yá ñin lugar nuū ndí ndaxín, nuū ma cúu quiví yó. Te ni ñin ñayuu ñayiví yáha tu ní jíto cuiñi i nuū yā, te ni ma cúu coto i nuū yā. Te ní cáni na cóo yínúhún yó nuū yā, chi jnñi máá yá poder ní cáni. Amén.

<sup>17</sup> Te cahān rō jíin ñayuu cucá nda-jniñu ñayiví yáha, jéé ma cundúxí i. Te ma ténuū i xühún i, chi yachí naa ún. Chi sa suhva na ténuū i jeē coo váha i sáha Yaā Dios, Yaā técu, chi máá yá jéhe cuehē yā táca-ni jeē cúsiñi ni yō jíin. <sup>18</sup> Te ndacu ró jniñu nuū i jeē na sáha váha i, chi jeē sacúcá ndije i máá i cúu jeē sáha i táca jniñu váha. Te na cúu i ñayuu váha ni jeē cuáha i jeē cúu jnáhan i. <sup>19</sup> Te súcuán caya i cuehē jniñu váha jeē coo cúca i nuū yā ní tiempo jeē quíji. Te nihñin tahú i cotecu i ní cáni.

**Jniñu sándíhi ndácu  
Pablo nuū Timoteo**

<sup>20</sup> Te róhó Timoteo, condito ró táca jniñu ní chíhi ya ndaha ró. Te ma quiví nduu rō jíin táca jnúhun cáhá-ni, cuenta ñayiví yáha, jíin táca jnúhun stáhú jéé cácahān i jeē jnúhun ndíchí ndaā cúu. <sup>21</sup> Chi sava ñayuu cándiquin táca jnúhun yáha, ni cajica yátá i ni castóo i jnūhun cácanđije i ya.

Te núhun ni rí jeē Yaā Dios na sáha ga yā jeē váha róhó. Súcuán na cóo. Amén.

## CARTA UU JEE NI TEE SAN PABLO APOSTOL NUU TIMOTEO

**1** Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō ní cáni siquī jeē yǎhi yó ndaha Cristo Jesús. <sup>2</sup> Te téé ri carta yáha cuájeē nuū rō Timoteo, chi cúu ro nájñūhun séhe ri jeē maní rí jíin. Te ñūhun ni ri jeē Tatá yō Yaā Dios jíin Jítóho yō Jesucristo, na sáha ga yā jeē váha rōhó, te cundáhú ni yā rohó, te sáha ya jeē coo ndeyí coo sǎ ni rō.

### Jeē nácani de jnūhun Cristo

<sup>3</sup> Níní tu náā ni rí cacān tahu rí jehē rō nuū Yaā Dios nduú ñuú, te nácu-atáhú rí nuū yā jeē siquí rō. Chi nuū maá yá jejníñu ri, nájñūhun ni casáha táca jíi rí, te íyó ndoo ánuá rí nuū yā. <sup>4</sup> Te núcūhun ni rí jeē ni ndáhyū rō ná ni quenda ri cuahān rí. Te cúu ni rí ndacoto jnáhan yó, náváha cusí ndasí ni rí. <sup>5</sup> Te núcūhun ni rí jeē váha ndije cándíje rō Cristo, nájñūhun ni cándíje náná jéhnū rō Loida, jíin náná rō Eunice xihna gā. Te cúcáhnū ni rí jeē suni súcuan cándíje máá rō vijna.

<sup>6</sup> Te jeē yúcuan nástǎhví ni rí rohó jéé na cóndihví gā ni rō jíin táhū jeē ni jéhe Yaā Dios nuū rō jeē nácani rō jnūhun ya. Te tahu un ní nihīn rō ná ni tee ri ndaha rí xini rō. <sup>7</sup> Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jnūhun, chi sa sáha jeē íyó fuerza ini yō, jíin jéé cundáhú ni yō jnáhan yó, jíin jéé ndító íyó xini yō. <sup>8</sup> Núu súcuan te ma cúcanu rō nacani ndaā rō jnūhun máá Jítóho yō. Te suni ma cúcanu rō jeē siquí maá rí jeē íne ri vecāa siquí jnūhun ya. Chi sa cuáha rō jnūhun ndoho rō jíin rí siquí jeē cánacani yó jnūhun jnáma ya yohó, núu ndese ni jéhe Yaā Dios fuerza

ini yō. <sup>9</sup> Chi ni jnama ya yohó, te ni cana ya yohó jéé coo ndoo ánuá yō cuajníñu yó núu yā. Te tu ní cána ya yohó siquí jeē váha ni sáha yó, chi siquí jeē ní tee ni maá yá jeē cundáhú ni yā yohó jéé yǎhi yó ndaha Cristo Jesús. Chi nde ná tu jecōo ñayiví, te je cundáhú ni yā yohó. <sup>10</sup> Te vijna jeē ní quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ni yā yohó. Chi máá Cristo ni snáā yā poder cuehyí jéhnū yóhó, chi jíin jnūhun jnáma ya yohó ni steén cají yá nuū yō jeē cótecu yō ní cáni chi ma jnahnú ndetū yō.

<sup>11</sup> Te ni jeni Yaā Dios ruhū jeē nácani ri jnūhun ún, te ni tají yá ruhū cúu ri apóstol jeē steén rí nuū ñáyuu táca nación jeē tu jíin jnūhun ya. <sup>12</sup> Te siquí un cúu jeē ndóho ri táca jnúndóho yáha íne ri vecāa. Te tu cúcanu rí, chi jíin rí ndese Yaā cúu Yaā cándíje ri, te cúcáhnū ni rí jeē cúu coto ya jniñu jeē ní chili ya ndaha ri nde vijna te nde quiví ndíji ya.

<sup>13</sup> Te cuiñi nihin rō jíin táca jnūhun ya jeē steén ndaā, suu jnūhun jeē ni steén rí nuū rō. Te caca rō jíin jnūhun cándíje yó, te cundáhú ni rō jnáhan rō siquí jeē yǎhi rō ndaha Cristo Jesús. <sup>14</sup> Te condito rō táca jniñu váha jeē ní chili ya ndaha rō, sáha poder maá Espíritu Santo jeē ndeé ini yō.

<sup>15</sup> Je jíin rō jeē táca ñáyuu cáyūcu Asia ni castóo i ruhū. Te uū i cúu Figelo jíin Hermógenes. <sup>16</sup> Te jíicán tahu rí jeē cundáhú ni Jítóho yō ñayuu vehe Onesíforo, chi cuehē jíinu ni nanihīn ni rí ni sáha de, te tu ní cúcanu de siquí rí jeē ní ine ri vecāa. <sup>17</sup> Chi sa suhva ná ni quiji de ñuu Roma, te ni nanducú yúcún de ruhū nde ni nanihīn de ruhū. <sup>18</sup> Te jíicán tahu rí jeē maá Jítóho yō cundáhú ni yā de quiví ndíji ya. Te je jíin váha máá rō ndese yóhyo ni chindéé ñáhán de ruhū ná ni cahiyó ri ñuu Efeso.

**Jeē cúu yó nájñuhun soldado  
vāha nuū Jesucristo**

**2** Núu súcuan te róhó, séhē mání, na cóo fuerza ni rō siquī jeē yfhi ró ndaha Cristo Jesús te sāha ya jeē vāha róhó. <sup>2</sup>Te tāca jñuhun jeē ní jini ró ní cahān rī, jító jínúū ñayuu cuehē, jñuhun ún na nástéén rō nuū tēe cásquícu vāha, návāha suni cuu stéén tucu máá de nuū sáva ga i.

<sup>3</sup>Te róhó na cuándeýí ni rō coto ró jnúndóho, chi cúu ró nájñuhun iin soldado vāha nuū Jesucristo. <sup>4</sup>Ni iin soldado jeē iin nuū guerra, tu sájñeñu de máá de jíin jniñu máá de, chi cánuú jeē sāha de mání máá jēe ndácu tēe ní tejniñu de. <sup>5</sup>Te suni súcuan tēe cásiquí deporte, ma nihín de premio te núu tú condihví ni de cosiquí vāha de máá modo chíjñiñu. <sup>6</sup>Te tēe sájñiñu nihin ñuhun, máá de cúu jeē nihín xihna gā jeē cuáha itu. <sup>7</sup>Nacani ni rō siquī jeē cahán rī, te máá Jítoho yō sāha ya jeē jécūhun ni rō siquī ndihí.

<sup>8</sup>Te cocuhun ndasí ni rō Jesucristo, Yaā ní quiji yucūn rey David, te ni natecu yā mēhñu ndíyí, nájñuhun cáhán jñuhun jnáma ya yohó jēe nácani ri. <sup>9</sup>Te jeē siquí jñuhun un ndóho ri jnúndóho, te nde ni cajihni i ruhū íne ri vecāa nájñuhun iin tēe ní sāha cuēchi xeēn. Te jñuhun Yaā Dios chi ma cúu cuhni i jeē ma cuité núu. <sup>10</sup>Núu súcuan te jéndeýí ni rī jító ri tāca jnúndóho yāha síquī jeē cundáhú ni rī ñayuu jeē ní nacāji ya, návāha suni cācu máá i jeē quívi i ndaha Cristo Jesús, te quihín i nuū cujéñu i níí cáni. <sup>11</sup>Chi ndaā cahán jñuhun yāha: Núu vēsú na cúu yō jeē siquí yā, te suni cotecu yō jíin yá,

<sup>12</sup>te núu cuandeýí ni yō ndoho yó, te suni ndacu yó jniñu jíin yá.

Te núu ma cuajnúhún yó yā, te suni ma cuajnúhún yá yohó.

<sup>13</sup>Te vēsú tu squícu vāha yó, te máá yá chi mání squícu ya, chi tu cúu sáfalta yā, chi squícu ya jeē ni cahān yā.

**Tēe sájñiñu squícu  
vāha jíin jñuhun ya**

<sup>14</sup>Jñuhun yāha na nástíhví ni rō ñayuu, te cahān nihin ro jíin i, jító máá Jítoho yō, jeē ma téjñahan i siquí tāca jñuhun sáa-ni. Chi tu ndé jéjñiñu cuití, chi sa stívi ñayuu jíni sōho. <sup>15</sup>Te nducú ndéýí ró jeē cuajnúhún Yaā Dios rohó, jēe cúu ró tēe sájñiñu squícu vāha jíin jñuhun ya, návāha ma cúcanu rō nuū yā siquí ní iin, chi vāha nacani ró jñuhun ndaā yā. <sup>16</sup>Te ma quívi nduu rō jíin tāca jñuhun sáa-ni ñayívi yāha, chi suu sāha jeē ndúcuehē gā jniñu née quívi-coo ñayuu cácahān. <sup>17</sup>Te tāca jñuhun cástéén i chi cúu nájñuhun iin ndíhyi xeēn jeē sacáhú gā cuahān. Te Hime-neo jíin Fileto cúu uū tēe jeē casáha súcuan. <sup>18</sup>Chi tēe un ní cajica yátá de nuū jñuhun ndaā, te cácahān de jeē jé ni cuu ni canatecu ndíyí. Te súcuan cásaca nuu de xiní sava ñayuu cácandíje. <sup>19</sup>Te Yaā Dios ni jeni ya ñayuu máá yá, te íyó cutú ndaā i jeē ma cáca yátá i, nájñuhun yósó núu tútu i: Je jíin Jítoho yō Yaā Dios tāca ñayuu jeē yfhi ndaha máá yá. Te suni cáhán: Tāca ñayuu jeē ndácunehen síhví Cristo, na cújiyo i nuū jniñu née, áchí.

<sup>20</sup>Te ini iin vehe cáhnu íyó cuéhē cohō, nasūu mání cohō oro cohō plata, chi suni cohō yujnu cohō ñuhun. Te íyó jēe fino te íyó jēe corriente. <sup>21</sup>Te núu iin ñayuu sándoo i máá i jeē quénda i nuū tācá jniñu née, te cuu i nájñuhun iin cohō fino. Te coo ndoo coo i i nuū Jítoho yō, te nihin jniñu i ndese cúni máá yá. Te coo túhva i jeē sāha i tācá jniñu vāha.

<sup>22</sup>Núu súcuan te cunu ró coto ró tāca jēe tú vāha jeē cándiyo ni tēe suchí.



Te condiquin rō jniñu ndaā, jiin jnūhun cándije ró yá, jiin jnūhun cúndáhú ni, jiin jnūhun coyūcu mánī jiin jnáhan. Te súcuan sáha ró ndé jiin táca ñayuu ndoo ánuá jeē ndácunehen síhvi máá Jítóho yō. <sup>23</sup>Te ma quívi nduu rō jiin táca jnūhun cánéé íi jeē tu íyó cájī, chi je jínī rō jeē sáha jeē tejnáhan ñayuu. <sup>24</sup>Te mozo maá Jítóho yō, tú vāha jeē tejnáhan de, chi sa sulva cánuú jéē coo vāha ni de jín táca ñayuu. Te coo vāha ni de stéén de, te cuandeyí ni de jín i. <sup>25</sup>Te jín jéé víta ni de te cani ichí de ñayuu niñni ni. Chi sanaa te nacani ni i sáha Yaā Dios, te jecūhun ni i ndese íyó jnūhun ndaā. <sup>26</sup>Te nducájī ni i te cācu i nuū jexeén jeē ní jniñ ún i, chi ni cundeyí jín i jeē sáha i jeē cuní maá.

### Siquí ndese coo ñayuu sáha néé quívi cuándihi

**3** Te suni na jécūhun ni rō jeē quívi cuándihi te quee quívi coo jnūndóho. <sup>2</sup>Chi coo ñayuu jeē chiñúhún máá, te ndiyo ni i xūhún, te sátéyí i máá i, te sándúxí i máá i. Te cahān neé i siquí Yaā Dios, te cunihni ni i nuū tatá i nuū naná i, te ma nácuatáhú i, te ma chiñúhún i Yaā Dios. <sup>3</sup>Te ma cóo maní i jín jnáhan i ni ma cundáhú ni i. Te sájnúhún i, te ma cúu casi i táca jéé ndíyo néé ni i, te yōhoyo xeēn coo i, te quiti ni i coto i táca jniñu vāha. <sup>4</sup>Te suni nastúu i jnáhan i, te ma yūhú i sáha i cuēchi, te coo ndúxí ndasí i, te nducú i jeē cúsiñ ni maá-ni i, te ma nducú i quívi i nuū Yaā Dios. <sup>5</sup>Te sáha-ni i jeē chiñúhún i ya, te casi i nuū poder yā jeē ma sáma modo i.

Ma quívi nduu rō jiin ñayuu casáha súcuan. <sup>6</sup>Chi sava tēe ún quívi de vehe te stáhú de táca ñahan cánéé jéé iyó ndasí cuēchi. Te yachī quívicoo ña jín táca jnūhun tú ndaā jeē cúsiñ ni ña jín. <sup>7</sup>Te vésú niní scuáha ña na-ni jnūhun, te tu cúu cuiti jecūhun ni ña jnūhun

ndaā yā. <sup>8</sup>Te nájñūhun ni casáha tēe tásí James jiin Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jnūhun ndaā. Chi coo nee jeē níjnūnī de, chi ma candíje ndije de jnūhun cándíje yó. <sup>9</sup>Te ma quee jniñu sáha de, chi cuni táca ñayuu jeē tēe cánéé xínī cácuu de, nájñūhun ni cajini ñayuu jeē ni íyo néé xínī ndindúú tēe jeē ní nducú casi nuū Moisés.

### Jniñu sándihi ndácu Pablo nuū Timoteo

<sup>10</sup>Te róhó chi je ni cutūhva vāha rō ndese stéén rī, ndese jíca ndaā rī, ndese tēe ni rī sáha ri, ndese cándíje ri yā, ndese née ri paciencia, ndese cúndáhú ni rī jnáhan ri, jiin ndese jéendeyí ni rī. <sup>11</sup>Chi ni cajito xeēn ñayuu ruhū, te ni ndoho ri jnūndóho. Te jínī rō táca jéé ní ndoho ri ñuu Antioquía, ñuu Iconio, jiin ñuu Listra. Te jínī rō ndese ni cajito xeēn i ruhū. Te máá Jítóho yō ni jnama ya ruhū nuū ndihi ún. <sup>12</sup>Chi ndaā cúu jeē táca ñayuu jeē ndihví ni cuajniñu vāha nuū Cristo Jesús, ndoho i jeē coto xeēn ñayuu i. <sup>13</sup>Te ñayuu casáha jniñu néé jín ñayuu castáhú, chi sa víhyá gā cocuu i jín jniñu néé, chi stáhú i ñayuu, te suni candíje máá i jnūhun stáhú.

<sup>14</sup>Te róhó chi sa cuiñi niñin rō jín jéé ní cutūhva rō jín jéé ní cucáhnu vāha ni rō. Chi jínī rō ndese ñayuu cúu jeē ní castéén nuū rō. <sup>15</sup>Chi nde ná lulí rō, te je jínī rō ndese cáhán tutu ii jeē steén nuū rō ndese candíje ró jeē ni jhī Cristo Jesús jehē rō návāha cācu ró. <sup>16</sup>Te ní tutu ii cúu jnūhun jeē ni cáhān Yaā Dios, te vāha níhín jniñu jeē steén nuū yō, jeē cahán nuū yō, jeē náchuhun ichí yóhó, jín jéé scuéhnu yóhó jín jniñu ndaā, <sup>17</sup>návāha tēe cájejniñu nuū Yaā Dios, ije ni de te coo tūhva vāha de sáha de táca jniñu vāha.

**4** Te cáhán rī jín ró, jító Yaā Dios jín Jítóho yō Jesucristo, Yaā quiji ndacu jniñu, te sándaā yā jniñu ñayuu cátecu jín ñayuu ní cajihī. <sup>2</sup>Cáhán nihin ri jeē na nácani ró jnúhun ya, te stíhvī ni rō i candíje i. Te níní sáha ró súcuan nú nune i chí vésu tu núne i. Te sáha ró jéē na jécūhun ni i, te cahān rō nuū i, te caní ichí váha ró i, te jín cuéhē paciencia steén rō nuū i. <sup>3</sup>Chi quee tiempo jeē ma cuájnuhún cuiti ñayuu jnúhun ya jeē steén ndaā váha, chí sa cuájnuhún i jnúhun cúsi ni maá i, te nducú i cuehē maestro jeē steén nuū i máni jnúhun jeē nújnahan ni i cuni nahín i. <sup>4</sup>Te cujiyo i nuū jnúhun ndaā, te condíhvī ni i tāca jnúhun jeē maá cuento-ni cúu. <sup>5</sup>Te róhó chí níní coo ndito ni rō, te cuandeyí ni rō jín jnúndóho, te condíhvī ni rō nacani ró jnúhun jnáma ya yohó, te squícu váha ró jín jniñu ya jeē sáha ró.

<sup>6</sup>Te ruhū chí je ni socō rī maá rí jeē cúu rī, te je cuacuyajni quívi cuu rī. <sup>7</sup>Te je ni cundeyí rí jeē ní nducú ndeyí rí siquī jniñu váha, te je ni jinu ni jica ri ñayívi yáha, te tu ní siáá rī jnúhun cándíje ri yā. <sup>8</sup>Te vijna je íyó túhva premio jeē nihín rī siquī jeē ní jica ndaā rī. Chí Jitoho yō cuāha ya un núu rī maá quívi sándaā yā jniñu, chí maá yá cúu juez ndaā. Te nasūu núu maá ñin ruhū cuāha ya, chí suni cuāha ya nuū tāca ñayuu jeē cúu ni i jeē ndíji ya chí maní i jín yá.

### Jeē cána Pablo quiji Timoteo nuū de

<sup>9</sup>Nducú ndeyí ró quiji yachí rō nuū rī. <sup>10</sup>Chi Demas ni stóo de ruhū, chí ndíyo ni de ndajniñu ñayívi yáha, te cuahān de ñuu Tesalónica. Te Crescente chí cuahān de Galacia, te Tito cuahān de Dalmacia. <sup>11</sup>Te maá ñin na Lucas íne jín rí. Te jeē quíji ró, te condeca ró Marcos quiji ró

jín de, chí váha cuajniñu de jeē chindéé ñáhán de ruhū jín jniñu ya. <sup>12</sup>Tíquico ni tají rí de cuahān de ñuu Efeso. <sup>13</sup>Te jeē quíji ró, te condaha ró cotón jeē ni stóo ri vehe Carpo ñuu Troas. Te suni condaha ró tāca libro, te jeē cánuú gá cúu tāca tutu ní tee maá rí.

<sup>14</sup>Alejandro, tēe cúu herrero, yōhoyo xeēn ni sáha de jín rí. Te maá Jítóho yō cuāha ya yāhu de jeē súcuan ní sáha de. <sup>15</sup>Te condito ró maá ró nuū de, chí yōhoyo ni cuu de contra siquī jnúhun cástéén yó.

<sup>16</sup>Te ná ni ine ri jeē xíhna ñúhún núu tāca tóhō, te tú ni ñin tēe ní índichi jín rí, chí ndíhi de ni castóo de ruhū. Te ñúhún ni ri jeē Yaā Dios cone cáhnu ni yā nuū de. <sup>17</sup>Te vésu súcuan te maá Jítóho yō ni chindéé ñáhán yá ruhū, te ni jēhe ya fuerza ini rī, te súcuan ni sínu ri ni nacani ndíhi ri jnúhun jnáma ya yohó, ni cajini nahín ñayuu tācá nación tu jín jnúhun ya. Súcuan ni jnama Jitoho yō ruhū nuū tāca tēe xeēn. <sup>18</sup>Te jnama ga yā ruhū nuū tācá jniñu néé, te condito ya ruhū nde quívi ri andívi núu ndácu ya jniñu. Te na cáhán yō jeē yóhoyo luu cújéhnu ya ní cáni. Amén.

### Saludo jín bendición jeē sándihí

<sup>19</sup>Te cahān rō jeē sándeýí ni Prisca jín Aquila, jín ñayuu vehe Onesíforo, achí rí. <sup>20</sup>Erasto ni quendōo de ñuu Corinto. Te ni quendōo Trófimo ñuu Mileto, te cúhú de. <sup>21</sup>Te condíhvī ni rō quiji ró nde ná tu quejéé vico míjin. Sándeýí ni rō, achí Eubulo jín Pudente jín Lino jín Claudia jín táca gá hermano.

<sup>22</sup>Te ñúhún ni ri jeē maá Jítóho yō Jesucristo na cóo ya jín ró, te Yaā Dios sáha ga yā jeē váha róhó jínáhan ró. Súcuan na cóo. Amén.

## CARTA JEE NI TEE SAN PABLO APOSTOL NUU TITO

**1** Máá rí cúu Pablo, mozo Yaā Dios jíin apóstol Jesucristo, chi ni tají Yaā Dios ruhū jeē scándíje ri ñayuu ní nacāji ya, návāha jecūhun ni i jnūhun ndaā yā jeē candíje yó, <sup>2</sup> te cocuhun ni i jeē cótecu i níí cáni. Chi nde ná tu jecōo ñayíví te ni jejnūhun Yaā Dios jeē cótecu yó, te íyó ndáā jnūhun ni cahān yā. <sup>3</sup> Te vijna jeē ní quee tiempo ni jeni ya, te stéén cají yá jnūhun ya nuū yō. Te ni tejniñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya. <sup>4</sup> Te téé ri carta yáha cuá-jeē nuū rō Tito, chi nájñūhun sēhe ri cúu ndije ró síquī jeē ínuū-ni cándíje yó yá. Te ñūhun ni ri jeē Tatá yō Yaā Dios jíin Jítóho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā róhó, te sáha ya jeē coo ndeyí coo siñ ni rō.

### Jniñu ya jeē ni sáha Tito nde isla Creta

<sup>5</sup> Te ni stóo ri rohó ndé isla Creta, návāha sándaā rō síquī jniñu jeē cúmani gā cundaā, te caní ró táca téé jéhu condito ñayuu cáncandíje táca ñuu, nájñūhun ni ndacu ri jniñu nuū rō. <sup>6</sup> Te téé jéhu un cánuú jeē ma cóo ni ñin jeē nihín ñayuu cuēchi síquī de. Te cánuú coo ñin-ni ñasihí de. Te sēhe de cánuú cuu i sūchi cáncandíje jeē ma nihín ñayuu cuēchi síquī i jeē tu sáha váha i chí jéē níhni ni i nuū de. <sup>7</sup> Chi téé cácu-jéhu cáncandíje jeē ma nihín ñayuu cuēchi síquī i jeē tu sáha váha i chí jéē níhni ni i nuū de. <sup>7</sup> Chi téé cácu-jéhu cáncandíje jeē ma nihín ñayuu cuēchi síquī i jeē tu sáha váha i chí jéē níhni ni i nuū de. <sup>8</sup> Chi sa cánuú jéē níí cuāha núu de vehe nuū ñayuu cájica, te níí sáha de jniñu váha, te

ndito coo xiní de, te coo de tēe ndaā, te coo ndoo ánuá de, te casi de modo jeē cuní maá de. <sup>9</sup> Te cánuú cuiñi ñihin de jíin jnūhun ndaā jeē ni scuáha de, návāha cuu stíhví ni de ñayuu jíin táca jnūhun ndaā váha, te suni cuu sáha de jeē jécūhun ni ñayuu cácuu contra, te casi i yuhu i.

<sup>10</sup> Chi íyó cuéhē ñayuu ñihni ni, te cástéén i inga modo jéni ni maá i jeē súcuan cácu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan. <sup>11</sup> Te cánuú jéé casi rō yuhu táca téé ún, chi cástéén de jnūhun jeē tu íyó váha stéén de, chi cúní de ñihin de xūhun síquī ún. Te súcuan sáca nuu de xiní ndíhi ñayuu táca vehe.

<sup>12</sup> Te ñin téé isla Creta jeē nácani jnūhun, ni cahān de síquī jnáhan ñuu de: Jnáhan yó ñayuu Creta, chi máni ñayuu stahú cácuu i, te nájñūhun quití xéén casáha i, te máni ndíhví ni i caji cuéhē i, te cúxí i, áchí de. <sup>13</sup> Te ndaā cúu jnūhun ni cahān téé ún. Jeē yúcuan na cúxeén rō nuū i, návāha ndaā váha na cándíje i. <sup>14</sup> Te ma sáha i cuenta táca jnūhun ni catava jnáhan yó hebreo, jeē maá cuento-ni cúu, ni ma squícu i jniñu cáncacu téé ni quendacoo nuū jnūhun ndaā.

<sup>15</sup> Te ñayuu jeē ní ndundoo jeē níjnūní, máni modo íyó ndoo íyó váha jéni ni i jító i táca-ni. Te ñayuu tu cáncandíje jeē tu ní ndundoo jeē níjnūní, máni jéni ni i ñin modo tú ndoo tú váha síquī táca jéé jító i. Chi nde jeē níjnūní i jíin ánuá i íyó jnéhén. <sup>16</sup> Te vésú cácahān i jeē jíin i Yaā Dios, te jíin jniñu casáha i te jíin yó jeē tú ndije i. Chi ñayuu ndevāha ñayuu ñihni ni cácuu i, te tu cúu sáha i ni ñin jniñu váha.

### Jnūhun ya jeē steén ndaā váha

**2** Te máá ró chi níí na cáhān rō táca jnūhun jeē quijnáhan jíin jnūhun ya jeē steén ndaā váha. <sup>2</sup> Te cahān rō jíin

tāca tée jéhnú jeē na cóo cájí ni de, te sāha yíñúhún de, te ndito coo xiní de, te candíje nihin de jnúhun cundáhú ni yā de, te cundáhú ni de jnáhan de, te cuandeyí ni de. <sup>3</sup>Te suni súcuan tācá ñahan jéhnú, na sāha yíñúhún ña, te ma sajnúhún ña, te ma nájini ña. Te na stéén ña nuū tācá jéē váha. <sup>4</sup>Te na stéén ña nuū tācá ñahan sūchí jéē coo maní ña jíin yii ña jíin séhe ña. <sup>5</sup>Te ndito coo xiní ña, te coo ndoo ánuá ña, te coto váha ña jniñu vehe ña, te coo váha ni ña, te cuatáhú ña nuū yii ña, návaha ma cahán neé ñayuu siquí jnúhun Yaā Dios.

<sup>6</sup>Te suni súcuan stíhví ni rō tāca tée sūchí jeē ndito na cóo xiní de. <sup>7</sup>Te rōhó, cuu ró ñin ejemplo nuū de jeē sāha ró tāca jniñu váha. Te jeē steén rō nuū de te ndaā steén rō te coo ndije ni rō. <sup>8</sup>Te ndaā váha steén rō, návaha ma cúu cahán ñayuu siquí. Te súcuan te cucanu ñayuu cácuu contra, chi ma cúu cahán i ni ñin cuēchi siquí rō.

<sup>9</sup>Te cahán rō jíin ñayuu cácuu mozo jeē na cuatáhú i nuū patrón i, te na sāha i tācá jniñu jeē nújnahan ni de, te ma cahán maá i núu ndácu de jniñu nuū i. <sup>10</sup>Te ma sacuíñná i ndajniñu de, chi na cúu i ñayuu ndaā ndije, návaha jíin tāca jniñu jeē sāha i, te cuni tāca ñayuu jeē yóhyo luu cúu jnúhun jeē steén siquí Yaā Dios, Yaā jnáma yóhó.

<sup>11</sup>Chi vijna je ni steén Yaā Dios ndese sāha ya jeē váha ñayuu, chi cúní yā jnama ya ndíhi ñayuu ñayiví. <sup>12</sup>Te jnúhun jeē váha ni yā jíin yó, suu stéén nuū yō jeē na síáá yō jniñu neé jíin tāca jéē ndíyo neé ni yō. Te ndito na cóo xiní yō ini ñayiví yáha, te caca ndaā yō, te chiñúhún váha yó Yaā Dios. <sup>13</sup>Te suni stéén nuū yō jeē cocuhun ni yō jeē quéndōo ndetū yō jeē quíji maá quíví jéhnú jeē quénda ndijin Yaā Dios, Yaā cujéhnú ndasí, suu Jesucristo, Yaā jnáma yóhó. <sup>14</sup>Chi ni socō yā maá yá jehē yō, návaha jnama ya yohó núu tāca jniñu

neé, te sándoo ndíhi ya anuá yō jeē cuu yó ñayuu maá yá, te condíhví ni yō sāha yó jniñu váha.

<sup>15</sup>Tāca jnúhun yáha cánuú stéén rō, te stíhví ni rō i, te cahán rō nuū i, chi súcuan ndíso jniñu ró. Te ma cuáha ro jnúhun jeē sajeé ni ni ñin i nuū rō.

### Ndese cánuú sāha ñayuu cácuandíje

**3** Te na nástíhví ni rō i jeē cuatáhú váha i nuū tée cácujehnú jíin tée cándiso jniñu ñuu. Te na squícu i jniñu cándacu de, te coo ñamā ni i sāha i tācá jniñu váha. <sup>2</sup>Te ma cahán neé i siquí ni ñin ñayuu, te coyūcu mání i jíin ñayuu, te coo váha ni i, te coo vitá ni i jíin ndíhi ñayuu.

<sup>3</sup>Chi maá yó suni ni cuu yó ñayuu canéé jeē tu jécūhun ni nde saá, te ni cacunihni ni yō nuū Yaā Dios. Te ni cacandíje yó tāca jnúhun tú ndaā, te ni cajejniñu sáa-ni yó núu tāca jéē ní ndiyo neé ni yō jíin na-ni jniñu ni cusí ni yō. Te ni cajica yó jíin jniñu neé jíin jnúhun cuésún ni. Chi ni cajito uhū ñayuu yohó, te ni cajito uhū yō i. <sup>4</sup>Yūcuán na te Yaā Dios, Yaā jnáma yóhó, ní steén yā jeē váha ni yā te cundáhú ni yā ndíhi ñayuu ñayiví. <sup>5</sup>Te ni jnama ya yohó, te tú na jniñu váha ní cásaha yó jéē jnáma ya yohó, chi sa siquí jeē ní cundáhú ni yā yohó. Chi ni nacate ya anuá yō, te súcuan ni nacacu jeé yó, te ni ndujeé yó ni sāha ya jíin maá Espíritu Santo. <sup>6</sup>Te yóhyo ni cunuú Espíritu Santo ini anuá yō, jeē ni sāha Yaā Dios jeē jíin Jesucristo, Yaā jnáma yóhó. <sup>7</sup>Te súcuan te ni ndahva yā cuēchi yó siquí jeē váha ni yā, te nihín tahú yō cotecu yō ní cání, nájñuhun ñuhun ni yō.

<sup>8</sup>Ndaā cúu jnúhun yáha, te cúní rí jeē niní cáhán nihin ro tāca jnúhun yáha, návaha ñayuu cácuandíje Yaā Dios, na cóndíhví ni i cocuu i jíin jniñu váha. Chi íyó váha tāca jéē yáha, te nihín jniñu jeē quéndōo váha ánuá ndíhi ñayuu.

<sup>9</sup>Te ma quívi nduu rō jíin táca jnúhun cánéé íi, jíin jnúhun siquī ndese vēji tāca jíí yō, jíin táca jnúhun sáha jeē cáte-jnáhan i cácahān i jeē cánuú squícu yó ley Moisés. Chi máni jnúhun cāhá-ni jeē tu níhín jniñu cúu.

<sup>10</sup>Te núu íyó ñáyuu jeē sáha jeē ndusíin ini ñayuu cácanđíje, te cahān rō nuū i ñin uū jínu, te núu ma chúhun ni i, te quenehen ró i. <sup>11</sup>Chi jíni rō jeē ñin ñayuu sáha súcuan, stívi ndasí i chi jíni i jeē tú vāha sáha i, te jeē yúcuan jécondee cuēchi siquī i.

### **Jeē cána Pablo quiji Tito nuū de**

<sup>12</sup>Te jeē tají rí Artemas chí Tíquico cuajeē de, yūcuán na te nducú ndéyí ró quiji ró núu rī ñuu Nicópolis, chi

je ni cundaā ni rī jeē yúcuan condee rī tiempo mījin. <sup>13</sup>Te condíhvī ni rō chindéé ñáhán ró Zenas, tēe cúu abogado, te suni súcuan Apolos. Chi cuāha ró jéé jíni ñúhún de jeē quíngoo ga de ichi nuū quihín de. Te coto ró jéé ma cúmanī ni ñin nuū de. <sup>14</sup>Te ñayuu cáhiin jíin yó, cánuú cutúhva i sáha i tācá jniñu vāha, te chindéé ñáhán i ñayuu cúmanī nuū, návāha ma cótecu saá-ni i.

### **Saludo jíin bendición jeē sándīhí**

<sup>15</sup>Tāca ñáyuu cáyūcu jíin rí yáha, cácahān i jeē sándeyí ni rō. Te cahān rō jeē achí rí jeē sándeyí ni ñayuu jíñā jeē maní yō jíin síquī jeē cácanđíje yó. Te ñúhun ni rī jeē na sáha ga Yaā Dios jeē vāha róhó jíjnáhan ró. Súcuan na cóo. Amén.

## CARTA JEE NI TEE SAN PABLO APOSTOL NUU FILEMON

**1** Máá rí cúu Pablo, te íne ri vecãa jeë siquí jnúhun Cristo Jesús. Te jíin hermano yō Timoteo cátee ri carta yáha cuájeë nuū rō Filemón. Chi cúu ró tée jeë cáhiyo maní rí jíin, chi chindéé nájnañan ró jíin rí siquí jnúnu Yaā Dios. <sup>2</sup>Te suni cátee ri carta yáha nuū ñáyyuu cácan-díje cándutútú ini vehe ró, te suni nuū hermana yō Apia, jíin núu Arquipo, tēe chindéé nájnañan jíin yó siquí jnúnu cánducú ndeyí yó jíin. <sup>3</sup>Te cáñuhun ni rí jeë Tatá yō Yaā Dios jíin Jítóho yō Jesucristo, na sáha ga yā jeë váha róhó jíjnañan ró, te sáha ya jeë coo ndeyí coo síi ni rō.

### Tēe cúndáhú ni te cándíje vāha cúu Filemón

<sup>4</sup>Te jeë jíicán tahú rí nuū Yaā Dios te tu náa ni rí cacān tahú rí jehē rō, te níní nácuatáhú rí nuū yā jeë siquí rō. <sup>5</sup>Chi níhín rí jnúhun jeë váha cándíje ró jnúhun cúndáhú ni Jítóho yō Jesús rohó, te cúndáhú ni rō tāca ñáyyuu yfhi ndaha Yaā Dios. <sup>6</sup>Te jíicán tahú rí jeë ñáyyuu ni cacandíje siquí jeë candíje máá ró, na jécūhun váha ga ni i siquí tāca jēē váha jeë sáha ya yohó jeë jíin Cristo Jesús. <sup>7</sup>Chi cúsiñ ndasí ni rí te íyó ndeyí ni rí, hermano, siquí jeë cundáhú ni rō ñáyyuu cácan-díje. Chi máá ró ni sáha jeë ní ndusiñ ni i.

### Jeë jíicán Pablo ñin favor jehē Onésimo

<sup>8</sup>Núu súcuan te cáhán ndahú rí jíin ró, vēsú cuu ndacu ri nuū rō ndese cánuú sáha ró, chi cúu ri apóstol Cristo. <sup>9</sup>Te tuú chi sa cáhán ndahú rí jíin ró siquí jeë cáhiyo maní yō. Te cundáhú ni rō ruhū sáha ró jēē cuní ruhū Pablo, chi je jéhnū ri, te íne ri vecãa jeë siquí jnúhun Cristo Jesús. <sup>10</sup>Te cáhán ndahú rí jíin ró jehē

mozo rō Onésimo jeë ní jeen ró te ni jinu. Te vijna te cúu i nájnuñun sēhe ri, chi ni scándíje ri i ini vecãa yāhá.

<sup>11</sup>Te nde saá chi tu ní cúu i mozo squícu nuū rō, chi ni jinu i. Te nde vijna chi váha cuajnáñu i nuū rō jíin núu rí. <sup>12</sup>Te nátají rí i najeē i nuū rō. Núu súcuan te cahān váha ró jíin i, te sáha ró cuenta jeë nájnuñun máá rí ni najinū, chi yōhyo maní rí jíin i. <sup>13</sup>Te cusíñ ni rí núu jeë na cúu quendōo i jíin rí yāhá, návāha cuajnáñu i nuū rí lugar máá ró níní jēē íne ri vecãa jeë siquí jnúhun váha ya. <sup>14</sup>Te tu ní cúní rí sáha ri súcuan, chi nde cuāha máá ró jnúhun. Chi nasūu jēē sa-fuerza rí rohó, chi jeë váha ni rō te sáha ró favor jíin rí, nájnuñun cúsiñ ni máá ró. <sup>15</sup>Chi sanaa te jeë siquí yáha cúu jeë ní jinu i ni cujiyo i nuū rō jecu-ni tiempo, suu návāha ví quendōo i jíin ró sáha Yaā Dios. <sup>16</sup>Te vijna tuá cúu i ñin mozo jeë ní jeen ró, chi ni nduu i ñin jeë váha ga, suu ñin hermano jeë maní rō jíin. Te ruhū chi yōhyo maní rí jíin i, te nagā ni cuu máá ró jeë ma cóo maní rō jíin i. Te nasūu jēē maní rō jíin ñin tēe súcuan-ni, chi siquí jeë cúu i ñin hermano jeë candíje nuū Jítóho yō.

<sup>17</sup>Te núu sáha ró cuenta jeë ruhū cúu jnañan ró cándíje, núu súcuan te cahān váha ró jíin i jeë jinú i nuū rō, nájnuñun jeë ruhū cahān rō jíin. <sup>18</sup>Núu na-ni falta ni sáha i nuū rō, chí núu taú i nuū rō, te cacān rō chunaa máá rí. <sup>19</sup>Ruhū Pablo, jíin ndaha máá rí tēe ri yāha jēē máá rí nachunaa. Súcuan cáhán rí vēsú cuu cahān rí jeë sa máá ró taú nuū rí sáha ró jēē cúsiñ ni rí siquí jeë ni scándíje ri rohó te ni cācu ánuá rō. <sup>20</sup>Núu súcuan, hermano, sáha ró favor yáha jíin rí siquí jeë candíje ró Jítóho yō. Sáha ró jēē ndusiñ ni rí, siquí jeë cúu ró hermano candíje Cristo.

<sup>21</sup>Te tēe ri yáha núu rō, chi cúcáhnū váha ni rí jeë cuatáhú ró, te nde vihyá gā sáha ró vēsú jeë ni jíicán rí. <sup>22</sup>Te suni

jícán rī jeē sātūhva ró núū cóndee rī, chi ñúhun ni rī jeē quénda ri yāhá te jeē rī nuū rō sáha Yaā Dios siquī jeē cájicān tahú rō jehē rī.

**Saludo jiín bendición jeē sándīhí**

<sup>23</sup>Epafras, tēe íne jíín rí vecāa jeē siquī jnúhun Cristo Jesús, cáhán de jeē

sándeýí ni rō. <sup>24</sup>Te suni súcuan cácahān Marcos, jíín Aristarco, jíín Demas, jíín Lucas, tēe cáchindéé ñájnáhan jíín rí siquī jníñu ya.

<sup>25</sup>Te ñúhun ni rī jeē Jítóho yō Jesucristo na sáha ga yā jeē váha róhó jíínáhan ró. Súcuan na cóo. Amén.

## CARTA JEE CUAHAN NUU ÑAYUU HEBREO

### Jeē ní tají Yaā Dios Sēhe ya ni nacani ya jnūhun

**1** Tijni jínu te tijni modo ni cahān Yaā Dios jíin táca jíi yō nde jenahán, chi ni tají yá tēe ni canacani jnūhun ya. <sup>2</sup>Te vijna te tiempo cuándihi yáha ní tají yá maá Sēhe ya ni nacani ya jnūhun nuū yō. Te jíin Sēhe ya ni sáha ya ñayīvi jíin táca gá, te ndivii jeē iyó ní chihí ya ndaha Sēhe ya. <sup>3</sup>Te Sēhe ya yóhoyo luu cújéhnú ya, nájnūhun luu cújéhnú maá yá. Te ndihi ndese cúu maá yá, suni súcuan cúu Sēhe ya. Te jíin poder jnūhun ni cahān Sēhe ya te iyó cutú ndihi-ni. Te ni sándoo ya yohó táca cuéchi yó, te sáá te ni cucōo ya lado váha mesa maá Yaā cujéhnú nde andiví.

### Jeē cujéhnú ga Sēhe Yaā Dios vēsú tǎcǎ ndajéhé yǎ

<sup>4</sup>Te ni ndujéhnú ndasí gá Sēhe ya vēsú tǎcǎ ndajéhé andiví, chi ni nihīn yā tahū jeē ndíso ya jniñu jéhnú ndasí gá vēsú jniñu cándiso ndajéhé. <sup>5</sup>Chi súcuan ni cahān Yaā Dios jíin Sēhe ya, te nasūu jíin ndajéhé yā:

Maá ró cúu Sēhe ri,  
te vijna te ni sajhéhnú ri rohó jéē cúu ri  
Tatá rō.

Te suni ni cahān yā jnūhun Sēhe ya, te nasūu jnūhun ndajéhé yā:

Maá rí cúu Tatá nuū Sēhe ri,  
te maá i cúu Sēhe nuū rí.

<sup>6</sup>Te suni ná ni tají yá Sēhe ya cujéhnú, ni quiji ini ñayīvi yáha, te ni cahān yā: Ndihi ndajéhé rí na chíñúhún i Sēhe ri.

<sup>7</sup>Te ni cahān tucu ya jnūhun ndajéhé yā: Nájnūhun quée tachí, súcuan cájica ndajéhé rí sáha ri,  
te tǎcǎ un jéē cájejníñu nuū rí, nájnūhun yáñuhūn cácuu.

<sup>8</sup>Te jnūhun Sēhe ya chi sa suhva cáhán yā:

Maá ró cúu Yaā Dios, te ndacu ró jniñu níí cáni,

te jniñu ndacu ró, máni jniñu ndaā cúu.

<sup>9</sup>Cúsī ni rō jíin jniñu váha, te jíto uhū rō jniñu néé.

Jeē yúcuan ruhū, Yaā Dios maá ró, ni sáha ri

jeē yóhoyo ga cúsi ni rō vēsú táca gá jeē iyó andiví.

<sup>10</sup>Te suni cáhán yā:

Maá ró cúu Jitoho, te nde xihna ñúhún ni sáha ró jéē ni jécōo ñayīvi.

Te andiví chi suni jeē ni sáha ró cúu.

<sup>11</sup>Te tǎcǎ un chi naa, te maá ró chi níí cáni iyó ró.

Te tǎcǎ un chi cutúhú nájnūhun cutúhú iin sahma,

<sup>12</sup>te nacaquin jnahnū rō te nasama ró jíjnáhan.

Te maá ró chi ma sáma cuiti rō,  
te quiví cótecu rō ma ndíhi cuiti.

<sup>13</sup>Te súcuan ni cahān tucu yā jíin Sēhe ya, te nasūu jíin ndajéhé yā:

Cucōo ró lado váha ri nuū cujéhnú ró,  
te na sáha ri jeē quende rō poder táca jéē cájito uhū rohó.

Achí yá. <sup>14</sup>Te tǎcǎ ndajéhé yā chi mozo-ni cácuu, te tájí yá cuango jeē chindéé ñáhán ñayuu jeē nihín tahū jeē jnama ya.

### Jeē ma cúhuun ni yō jíin jnúhun jnáma ya yohó

**2** Núu súcuan te cánuú jéē váha ga chuhun ni yō táca jnúhun ya jeē ní cajini yó, chi núu tuú te sanaa te scuíta yó. <sup>2</sup>Chi nde jenahán ní jejníñu ya ndajéhé yā ni cacastúhun jnūhun ya, te ni cajini ñayuu jeē iyó ndáa. Te ñayuu nihni ni jíin ñayuu tu ní cájendetú jnūhun ún, vetú-ni ni canihīn i castigo. <sup>3</sup>Te núu súcuan ni cuu, te yóhó, ¿ndese cácu yó núu ma chúhun ni yō jnūhun cánuú gá jeē jnáma ya yohó? Chi xihna



gā maá Jítóho yō ni nacani ya jnūhun yáha, te sáá te tēe jeē ní cajini nahín ni canacani ndaā tucu máá de nuū yō. <sup>4</sup>Te Yaā Dios suni ni chindéé ñáhán yá de jeē ní canacani de jnūhun ya. Chi ni sáha ya jiín de jeē ní casáha de sfiín sfiín jniñu jéhu jeē nahán náá ni yō jító yó poder yā. Te suni ni jēhe ya Espíritu Santo yā nuū fiín iin yó, ndese ni nujnahan ni maá yá sáha yó.

### Jeē ní nduu Jesús jnáhan ñayuu

<sup>5</sup>Te Yaā Dios nasūu núu ndajéhé yā ni jēhe ya jnūhun jeē condiso jniñu siquī ñayīvi jéé quíji, chi sa suhva nuū Séhe ya Cristo ni jēhe ya. Te siquī ñayīvi un cúu jeē cahán rī yāhá. <sup>6</sup>Chi suhva yósó núu tútu jeē ni cáhān David jiín yá: ¿Na vé cúu ñayuu jeē ñūhun ni ní i? Te ndíhvī ni ní siquī i, te máá ñayuu cúu i.

<sup>7</sup>Chi jecu-ni tiempo ni sáha ní jeē núu i nuū tācá ndajéhé ni. Yūcuán na te sajéhu ní i te squéndō yíñúhún ní i, te cani ní i jeē ndacu i jniñu nuū tāca jéé ni sáha ní.

<sup>8</sup>Te ndíhi jeē iyó chi sáha ní jéé cujéhu i siquī.

Achí tutu. Te jeē ni sáha Yaā Dios jeē cujéhu i siquī ndíhi, núu súcuan te ma quéndō ni iin jeē ma cújéhu i siquī. Te vésú súcuan te vjna te ná tu coto yó jéé cujéhu i siquī ndíhi jeē iyó. <sup>9</sup>Te jeē jiní yō vjna cúu Jesús, Yaā jeē ní nduu núu jecu-ni tiempo nuū tācá ndajéhé yā. Chi ni ndoho ya jeē ni jíhi yā jehē yō, te jeē yúcuán ní ndujéhu luu tucu ya, te ndíhi cáhiyo yíñúhún núu yā. Chi jeē váha ni Yaā Dios jiín yó, jeē yúcuán ní jihí Jesús jehē yō.

<sup>10</sup>Te ndíhi jeē iyó chi cuenta Yaā Dios cúu, chi máá yá ni sáha. Te suni ndéca ya cuehē ndasí séhe ya jeē quihín i andívi núu luu cujéhu i jíin yá. Te váha níhín jniñu jeē ni jēhe ya jnūndóho nuū Jesús,

chi jeē ní ndoho ya súcuan te cuu condeca váha ya ñayuu ní jnama ya. <sup>11</sup>Chi Jesús jeē ni sándoo ya i te máá i jeē ní candundoo i, chi iin-ni Tátá i jíin yá. Te jeē yúcuán tu cúcanu Jesús jeē cahán yā hermano yā jíin i, vésú ndasí núu i. <sup>12</sup>Chi yósó núu tútu jeē ni cáhān yā jíin Tátá yā:

Cachi na jnūhun ní núu tācá hermano na,  
te mēhñu núu cándutútú i cata ná ndese cújéhu ní.

<sup>13</sup>Te suni cáhān yā nájñūhun cácahān hermano yā:

Ruhū chi cándíje ri yā.

Te cáhān tucu yā:

Yāha íne ri jíin táca gá séhe Yaā Dios jeē ni jēhe ya nuū rī.

Achí Jesús.

<sup>14</sup>Te nájñūhun cácacu ñayuu jeē cúu i yiqui cúñu, suni súcuan ni cacu Jesús, návāha cuu yā jehē yō. Te súcuan ni snáá yā poder jexeén jeē squívi ñayuu nuū cuéchi te jíhi i. <sup>15</sup>Te ni cacu ya súcuan návāha cuu quenehen ya tāca ñayuu chíji jnūhun jeē yuhú i cuu i. Chi ní vida i ndóho i sáha ún. <sup>16</sup>Te jendaá tu ní quíji ya jeē chindéé ñáhán yá tācá ndajéhé yā, chi sa suhva jeē chindéé ñáhán yá ñayuu cácañíje jeē ní nduu yucūn Abraham. <sup>17</sup>Jeē yúcuán ní jini ñúhún nduu ínuú yá jíin táca hermano yā, návāha cuu ya sutū cujéhu jeē squícu váha ya tācá jniñu jehē i nuū Yaā Dios. Chi ni cundáhú ni yā i, te ni ndahva yā cuéchi i jeē ni sócō yā maá yá jehē i. <sup>18</sup>Chi suni máá yá ni ndoho ya jeē ní jito ndee jnūndóho ya, te jeē yúcuán cuu chindéé ñáhán yá ñayuu jeē jító ndee jnūndóho i.

### Cújéhu ga Jesús vésú Moisés

**3** Hermano, ni cana Yaā Dios rohó, te cácuu ró ñayuu ndoo máá yá. Núu súcuan te na nácani váha ni rō siquī Cristo Jesús, Yaā cúu apóstol jeē ní tejññu Yaā Dios, te suni cúu ya sutū

cujéhnū siquī jnúhun cácanđíje yó. <sup>2</sup> Chi ní squícu vāha ya nuū Yaā Dios, Yaā ní tee jniñu un síquī yā, nájñūhun ni squícu vāha Moisés nuū ñáyuu jeē ni cáhān Yaā Dios jeē cácuu i ñayuu vehe ya. <sup>3</sup> Chi cújéhnū ndasí gá Jesús vēsú Moisés, nájñūhun cújéhnū ndasí gá tēe sáha vehe nasūu máá vehe. <sup>4</sup> Chi táca vehe íyó tēe ní sáha. Te máá Yaā Dios cúu jeē ní sáha táca jēe íyó. <sup>5</sup> Te Moisés ní squícu vāha de jíin jniñu jeē ní cuu de mozo ni condito de ñayuu vehe Yaā Dios. Te ni castūhún de siquī táca jnúhun jeē steén yā tiempo quiji. <sup>6</sup> Te Cristo chi sa cúu ya maá Séhe jeē ndácu jniñu nuū ñáyuu vehe Tátá yā, te vāha squícu ya jeē ni jéjñūhun ya nuū i. Te suni máá yó cácuu ñayuu vehe ya, te núu na cuñiñi nihin yó jíin jnúhun cándíje yó ndé quiví sándíhí, te núu cúsiñi ni yó jeē ñúhun ni yó táca jēe váha jeē coo.

### Jnúhun jeē ndetātu ñáyuu Yaā Dios

<sup>7</sup> Núu súcuan te na chúhun ni yó jeē cahán Espíritu Santo nuū tútu i:

Vijna te núu cuni sōho ró jēe cahán Yaā Dios,

<sup>8</sup> te ma cúnihni ni rō nájñūhun ni cacunihni ni ñayuu jenahán.

Chi tu ní cájendetū i nuū yā ná ni cajica i nuū ñúhun téhé.

<sup>9</sup> Chi yúcuan ní casáha jíi rō jniñu jeē ni quítī ni rī, achí yá,

vēsú ni cajito i táca jniñu ni sáha ri uū xico cuiyā.

<sup>10</sup> Jeē yúcuan ní quítī ni rī jíin ñáyuu tiempo un.

Te ni cahān rī jeē máni jeē castóo i ichi ndaā,

chi tu cácuu i condiquīn i jnúhun ri.

<sup>11</sup> Te jeē yúcuan ní quítī ni rī, te ni cahān teyí rí

jeē ma quívicoo cuiti i nuū ndetātú i sáha ri.

Achí yá.

<sup>12</sup> Núu súcuan hermano, coto má conéé ánuá ni ñin ró jēe cáca yátá ró jeē tuá candíje ró Yaā Dios, Yaā técu. <sup>13</sup> Chi sa suhva táca quívī na stíhvi jnáhan ni rō, níni gá íyó tiempo, návāha ma cúnihni ni ñin ró te stáhú rōhó sáha ró cuéchi. <sup>14</sup> Te núu na cuñiñi nihin yó ndé quívī sándíhí jíin jnúhun jeē ní quejéé yó jíin, yúcuan na te cuu yó jnáhan Cristo.

<sup>15</sup> Chi cáhān tutu:

Vijna te núu cuni sōhó ró jēe cahán Yaā Dios,

te ma cúnihni ni rō nájñūhun ni cunihni ni ñayuu jenahán.

Achí. <sup>16</sup> ¿Te ndé-ni cúu ñayuu jeē ní jini jnúhun ya te ni cunihni ni? Suu ndíhi ñayuu jeē ni scácu Moisés jeē ní quendacoo Egipto.

<sup>17</sup> ¿Te ndé-ni cúu ñayuu jeē ni quítī ni yā nuū uū xico cuiyā? Suu ñayuu jeē ní casáha cuéchi, te ni cajihí i nuū ñúhun téhé.

<sup>18</sup> ¿Te ndé-ni i cúu jeē ni cáhān teyí yá jeē ma quívicoo cuiti i nuū ndetātú i sáha ya? Suu máá ñáyuu jeē tu ní cájendetū nuū yā.

<sup>19</sup> Núu súcuan te jíni yó jeē tu ní cúu quívicoo i nuū ndetātú i, siquī jeē tu ní cácanđíje i ya.

**4** Te níni íyó gá jnúhun jeē ni jéjñūhun ya jeē quívicoo ñayuu nuū ndetātú i sáha ya, te na cónso íyo yó jēe ma stívi yó, návāha tú coo jíin sava ró jēe ma nihín rō quívī ró. <sup>2</sup> Chi suni máá yó ni cajini sōho yó jnúhun jeē jnáma ya yohó, nájñūhun ñayuu jenahán un. Te nuū maá i tu ní jéjñūhun jnúhun ni cajini i ún, siquī jeē tu ní cácanđíje i. <sup>3</sup> Te yóhó jēe cácanđíje, máá yó cúu jeē quívicoo yó núu ndetātu yó. Te siquī ñáyuu tu cácanđíje ni cahān yā suhva:

Jeē yúcuan ní quítī ni rī, te ni cahān teyí rí

jeē ma quívicoo cuiti i nuū ndetātú i sáha ri.

Te súcuan ni cahān yā vēsú je íyó túhva nuū ndetātú i nde ná ni jecōo ñayíví.

<sup>4</sup> Chi súcuan yósó jnúhun nuū tútu i siquī quívī uxá:

Ni sínu Yaā Dios tāca jēē ni sāha ya, te ni ndetātu yá quivī uxá.

<sup>5</sup>Te suni nuū tūtu un yósó tucu:

Ma quívicoo cuiti i nuū ndetātú i sāha ri. Achí yá. <sup>6</sup>Núu súcuan te sava ñayuu chi quívicoo nahín i nuū ndetātú i. Te ñayuu jenahán jēē ní cajini jñūhun jeē jnáma ya i, tu ní quívicoo i siquī jeē tu ní cá-jendetú i nuū yā. <sup>7</sup>Jeē yúcuan ní jeni tucu ya inga quivī jeē quívicoo ñayuu, te quivī un cúu vijna. Chi ná ni yāha cuehē tiempo jeē ni cáhān yā jíin ñayuu jenahán, te yósó núu tūtu jeē ni sāha ya jeē suni ni cahān David suhva:

Vijna te núu cuni sōho ró jēē cahán yā, te ma cúnihni ni rō núu súcuan.

Achí tutu. <sup>8</sup>Te nde jenahán ní squívi Josué ñayuu Israel un ñuu nuū ndetātú i. Te tu ní cúu squívi de i nuū ndetātu ánuá i sāha ya. Chi núu súcuan te ma cahán gā Yaā Dios jíin táca ñayuu jeē vijna cúu quivī jeē quívicoo i nuū ndetātú i. <sup>9</sup>Núu súcuan te íyó túhva nahín iin nuū ndetātu ñayuu Yaā Dios, nájñūhun ni ndetātu máá yá. <sup>10</sup>Chi ñayuu jeē quívicoo nuū ndetātú i jíin yá, chi ndetātú i jeē ní casájñiñu i, nájñūhun ni ndetātu Yaā Dios nuū jñiñu ni sāha máá yá. <sup>11</sup>Núu súcuan te na ndúcú ndéyí yó quivī yó núu ndetātu yó un, te ma sāha ni iin yó cuéchi jeē ma cándíje yó, nájñūhun ni casáha i nde saá.

<sup>12</sup>Chi jñūhun Yaā Dios ndíto técu te íyó poder. Chi cúu nájñūhun iin espada jeē xeén ndindúú lado, chi nástúu cájí ndese íyó jēē níjnūnī yō jíin ánuá yō, nájñūhun sāha espada jeē jéhnde te nástúu nuū ñujnáhan yiqui jíin meque. Te jñūhun ya nástúu ndíhi ndese jéni ni yō jíin ndese cúní yō sāha yó. <sup>13</sup>Te tu íyó ni iin jeē yísahí jeē tu jíiní maá Yaā jeē náquihin cuenta, chi ndíhi-ni jíiní vāha ya, te ndíhi-ni túu ndijin nuū yā.

### Jesús cúu sutū cujéhnū ga

<sup>14</sup>Te cánevāha yó iin sutū cujéhnū ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuíñi nihin yó jíin jñūhun jeē ní cándíje yó. <sup>15</sup>Chi névāha yó iin sutū cujéhnū jeē jíto ndáhú yóhó jeē tu fuerza yō squícu vāha yó. Chi nájñūhun ndóho yó jēē jíto ndee jexeén yohó, suni súcuan ni ndoho ya jeē ní jito ndee un yá, vésú tú cuiti cuéchi ya. <sup>16</sup>Núu súcuan te ma yūhu yó, chi na quiví yó yuhu mesa yā, cúu jeē cacān tahú yō. Chi maní yā jíin yó, te cúndáhú ni yā yohó, te siquī jeē vāha ni yā te chíndéé ñáhán yá yohó táca jínu jeē jíiní ñúhún yó.

**5** Chi tāca sūtū jeē ní cujéhnū jenahán, ni nacāji Yaā Dios de mēhñu ñayuu, te ni jeni ya de jeē cuíñi de nuū yā jehē ñayuu, te socō de ndajñiñu jíin quiti nuū yā jeē siquí cuéchi i. <sup>2</sup>Te cuu cahán vítá de jíin ñayuu tu jécūhun ni jíin ñayuu castívi, chi máá de suni tú na fuerza ini de squícu vāha de. <sup>3</sup>Jeē yúcuan cúu jeē suni cánuú sócō de quiti nuū yā jeē siquí cuéchi máá de, nasūu máá-ni jeē siquí cuéchi ñayuu.

<sup>4</sup>Te ni iin tēe tu cúu sájéhnū de máá de jeē cuu de sutū cujéhnū, chi sa máá Yaā Dios cúu jeē nacāji ya de, nájñūhun ni nacāji ya Aarón nde jenahán. <sup>5</sup>Te suni súcuan Cristo, tu ní sájéhnū ya maá yá jeē cuu ya sutū cujéhnū, chi sa Yaā Dios ni sāha, chi ni cahán yā jñūhun yāha:

Máá ró cúu Sēhe ri,

te vijna te ni saájéhnū ri rohó jēē cúu ri Tatá rō.

<sup>6</sup>Te suni cáhán tucu ya nuū tūtu i:

Níí cáni cúu ró sūtū,

nájñūhun sutū Melquisedec jenahán.

<sup>7</sup>Te Cristo, ná ni condee ya ñayiví, te ni jicān tahú yā, te nde ni ndahyū yā te ni ndahyū cohó yá. Te ni cahán ndahú yá jíin Yaā Dios, Yaā jeē cúu jnama ya jeē ma cúu yā nuú. Te siquī jeē yíñúhún

ni chiñúhún yá Yaā Dios, te ni chindéé ñájnáhan Yaā Dios jíin yá nuū jnūdóho ún. <sup>8</sup> Chi vēsú Sēhe Yaā Dios cúu ya, te ni jendetū yā ni ndoho ya ini ñayiví, te súcuan ni jini yā ndese cúu jnūhun jendetū. <sup>9</sup> Te ná ni cuu ni squícu ndihi ya jeē ní jendetū yā, te ni cucutú jnūhun jeē jnáma ya tāca ñayuu jendetū nuū yā, te cotecu i ñí cáni. <sup>10</sup> Chi ni jeni Yaā Dios yā jeē cúu ya sutū kujéhu nájñūhun sutū Melquisedec.

### Siquí jeē ma cáca yátá i

<sup>11</sup> Te íyo cuéhē jnūhun jeē castūhun rí siquí tāca jéē yáha. Te yí cúu jeē jecūhun ni rō sáha ri, siquí jeē tu cáconi rō chuhun ni rō. <sup>12</sup> Te je ni cunahán cá-candíje rō, te jini ñúhún jéē cúu rō téē stéén nuú. Te tuú chi sa cájini ñúhún tucu máá rō téē stéén nuū rō tāca jnūhun Yaā Dios jeē tú yí cuiti. Chi sa ni canduu rō nájñūhun sūchi yíquín jéē jini ñúhún caxin i, chi ná tu ije i caji i jeē ndáva. Súcuan cácuu rō chi ná tu ije rō jíin jnūhun yí gá. <sup>13</sup> Chi núu máni máá nájñūhun sūchi yíquín jéxin cácuu rō, núu súcuan te tu cúu jecūhun vāha ni rō jnūhun ndaā. <sup>14</sup> Te ñayuu jeē jé ni ije, chi cáyeji i jeē ndáva, cúu jeē ní cutúhva vāha i te je cúu nácaji i jeē váha jíin jéē neé.

**6** Núu súcuan te na yáha yó núū tāca jnūhun Cristo jeē tú-ni yí, te na quíhín yō nuū jnūhun yí gá, návāha na íje vāha ni yō jíin jnūhun ya. Te ma ndejéé tucu yó jíin jnūhun jeē ni scuáha yó xíhna gā, suu jnūhun jeē nácani ni yō stóo yo cuéchi yó jéē cúu yō sáha, jíin jéē candíje yó Yaā Dios, <sup>2</sup> jíin síquí jeē jéndute, jíin síquí jeē soó ndaha xiní ñayuu, jíin síquí jeē nátecu ndíyi, jíin síquí jeē jnahnú ndetū ñayuu ñí cáni. <sup>3</sup> Núu súcuan te na yáha yó núū tāca jéē yáha te quívi yó núū jnūhun yí gá, te núu cuáha Yaā Dios jnūhun.

<sup>4</sup> Chi íyo ñayuu jeē jé ni jecūhun ni i, te je ni jini i tāca jéē jéhe Yaā Dios, te je ni quívi i nuū jnūhun stéén Espíritu Santo, <sup>5</sup> te suni je ni jini i jnūhun vāha Yaā Dios jíin ndese coo poder yā tiempo quiji. <sup>6</sup> Te ñayuu un núu caca yátá i, te ma cúu ga ndejéé jeé i jeē nácani ni i. Chi jeē cáca yátá i cúu nájñūhun jeē nác-ahni tucu i Sēhe Yaā Dios jicā cruz, te cájēhe i jnūhun canu yā cájito ñayuu. <sup>7</sup> Te ñayuu chi cácuu i nájñūhun ñuhun jeē cúun vāha saū nuū te ndóyo vāha. Te núu cánecoo jeē vāha caji téē casájñū, yūcuán na te cusíi ni Yaā Dios jíin. <sup>8</sup> Te núu máni iñu yóquin jíin yucū sajnéñu cánecoo nuū, núu súcuan te tu jéjñū cuiti, te squéndōo i yā, te iñ quívi te cayū. Súcuan jnahnú ndetū ñayuu cájica yátá.

### Jeē ñūhun ni yō tāca jéē váha jeē coo

<sup>9</sup> Te máá rō jijnáhan rō hermano, vēsú cácahān rí súcuan jíin rō, te cácuahnu ni rí jeē cácuu rō ñayuu cuiñi ñihin, chi ñayuu ni jnama ya cácuu rō. <sup>10</sup> Te Yaā ndaā cúu Yaā Dios, te tu náa ni yā jniñu cásaáha rō. Chi siquí jeē cáhiyo maní rō jíin yá te ni cacundáhú ni rō hermano rō cá-candíje, te ni cachindéé ñáhán rō i, te súcuan cásaáha rō ndé vijna. <sup>11</sup> Te cá-cuni rí jeē niní súcuan sáha ga ná iñ ná iñ rō ndé quívi sándihí, chi jeē sáha rō súcuan te ñihin rō ndihi jeē cáñuhun ni rō. <sup>12</sup> Te cáconi rí jeē ma cúhuun ni rō, chi sa ndacu rō ñayuu cá-candíje jeē jíin paciencia cándetu i, te jeē yúcuan ñihin tahú i tāca jéē ni jéjñūhun ya.

<sup>13</sup> Chi quívi jeē ni jéjñūhun Yaā Dios nuū Abraham, te ni ndacunehen ya maá yá jeē ni jéjñūhun téyí yá, chi tuá na inga ndacunehen ya jeē kujéhu ga vēsú maá yá jeē cuu testigo yā. <sup>14</sup> Te ni cahān yā: Jendaá ndije jeē vāha ndasí sáha ri jíin rō, te sáha ri jeē nducuehē ndasí yúcūn rō, achí yá jíin Abraham. <sup>15</sup> Te jíin paciencia ni condetu de, te súcuan te ni

nihin de jeē ní jejnūhun ya. <sup>16</sup>Te núu cáhán teyí ñáyuu, te ndácunehen i síhví ñin jeē cujéhnū ga vēsú maá i. Te núu íyó ñin jnūhun jeē tu cácanđíje jnáhan, te núu ñin tēe cáhán teyí de jíin síhví Yaā Dios, yūcuán na te jécuiñí jeē cátejnáhan. <sup>17</sup>Te suni súcuan Yaā Dios, chi ni jejnūhun teyí yá nuū ñáyuu jeē cuáha ya tahú i. Chi ni cuni yā jeē cucáhnū vāha ni i jeē ma nácani yátá ni yā siquī jeē ni jéjnūhun ya nuū i. <sup>18</sup>Chi ma nácani yátá cuití ni yā siquī jnūhun jeē ni cáhān yā uū jínu, ñin jeē ni jéjnūhun ya, te inga jeē ni cáhān teyí tucu ya siquī suni jnūhun ún. Chi tu stáhú cuití yā. Te jeē yúcuan máá yó jeē ní tūhva yó yá, chi yōhoyo íyó ndeyí ni yō, te cáñuhun teyí ni yō jeē squícu ya jeē ni cáhān yā. <sup>19</sup>Te siquī jeē súcuan ñūhun ni yō, te suu sáha jeē quéndōo nihin ánuá yō jíin jnūhun ya, te quéndōo ndaā ni yō, nájnūhun quéndōo nihin barco jeē jnī gancho yuū. Te sáha jeē cúu quívi yó andívi núu íf gā, nájnūhun cuarto íi gā jeē ni íyo ichi yátá sahna ni ndita caa ini vehe íi jenahán. <sup>20</sup>Te ini yūcuán chi xihna gā Jesús ni quívi, návāha nune ya ichi quívicoo yó. Te jeē yúcuan ní cání cúu ya sutū cujéhnū nájnūhun sutū Melquisedec.

### Jeē cúu Jesús sutū nájnūhun Melquisedec

**7** Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā cujéhnū teyí. Te ni jejnahan de Abraham ná ni nandicó Abraham jeē ní cundeyí de ni cajejnáhan de jíin táca rey. Te ni jicān tahú de jehē Abraham. <sup>2</sup>Te táca úxí ndajníñu jeē ní quende Abraham nuū táca rey un, ni jēhe de ñin ñin siquī un núu Melquisedec. Te síhví Melquisedec cuní cahān: rey jeē sáha jniñu ndaā. Te suni nání de rey Salem, te jnūhun Salem cuní cahān: jeē íyó ndeyí síhví ni. Te jeē yúcuan suni nání de: rey jeē sáha jeē íyó ndeyí síhví ni ñáyuu. <sup>3</sup>Te tu

cáhān tutu jnūhun tátá de ni náná de ni táca jíi de. Ni tu cáhān núu ni cacu de, ni núu ni jihí de. Chi cúu de nájnūhun Jesús, Sēhe Yaā Dios, chi ní cání cúu de sutū.

<sup>4</sup>Te condēhe jíjnáhan ró náa jéhnū ni cuu Melquisedec, chi jíi jéhnū yó Abraham ni jēhe de ñin ñin siquī táca jéē uxí nuū de siquī táca jéē ní quende de nuū rey un. <sup>5</sup>Te jíin yō jeē táca úxí ndajníñu ni canihin ñáyuu, ni cajēhe i ñin ñin siquī un ní caquihin tēe cácuu sutū yucūn Leví, nájnūhun cáhān ley Moisés. Te ni caquihin de nuū ñáyuu cácuu jnáhan de, chi ñin-ni yucūn Abraham cácuu de jíin i. <sup>6</sup>Te Melquisedec nasūu yúcūn Leví cúu de, te vēsú súcuan te ni quihin de ñin ñin siquī táca jéē uxí nuū Abraham. Te suni ni jicān tahú de jehē Abraham, vēsú cúu Abraham tēe jeē ni jéjnūhun ya nuū. <sup>7</sup>Te jíin vāha yó jéē tēe cújéhnū ga cúu jeē jicān tahú jehē tēe núu ga. <sup>8</sup>Te ñayívi yáha chi táca sutū cáquihin de ñin ñin siquī táca jéē uxí nuū ñáyuu, vēsú cácuu te tēe cájihí. Te Melquisedec suni ni quihin de, te máá de chi cáhān tutu íi jeē técu de. <sup>9</sup>Te suni cuu cahān yō jeē Leví, tēe jeē ní quihin ñin ñin siquī táca jéē uxí nuū ñáyuu, suni nájnūhun nuū maá de ni quihin Melquisedec ñin ñin siquī táca jéē uxí. Chi jeē ni jēhe Abraham nuū Melquisedec, suu cúu nájnūhun jeē suni ni jēhe de jeē siquí Leví jíin ndihí ga yucūn de jeē quíji. <sup>10</sup>Chi yucūn Abraham cúu Leví, te vēsú ná tu cacu de quívi jeē ni jéjnahan Melquisedec Abraham, te nájnūhun jeē ni jēhe máá de cúu jeē ni jēhe Abraham.

<sup>11</sup>Te yucūn Leví ni cane sutū Aarón jíin táca gá sutū ní quíjicoo. Te ni castéen de ley yā nuū ñáyuu Israel jenahán. Te núu ní cúu sáha de jeē quendōo ndaā ñáyuu jíin ley un núu, te tuá cánuu jeē núcuñí inga clase sutū lugar Aarón jíin yúcūn de. Te inga clase sutū cúu Cristo jeē cúu ya nájnūhun sutū Melquisedec.

<sup>12</sup> Te núu nucuiniŋ inga clase sutū, te suni cánuú sáma ley siquī yucūn de. <sup>13</sup> Núu súcuan te ni sáma ley un, chi cáhán tutu iŋ jeē Jítóho yō Jesús cúu inga clase sutū ún, te ni cacu ya chíji inga yucūn. Te yucūn ní quiŋi ya ún, tú ni iŋ ní cúu sutū. <sup>14</sup> Chi jíní vāha yó jēē chíji yucūn Judá ni cacu Jitoho yō. Te yucūn ún chi tu ní cáhán cuiti Moisés jeē cánecoo sutū.

<sup>15</sup> Te cájŋi cúu jeē ní nucuiniŋ Cristo jeē cúu ya inga clase sutū nájnūhun sutū Melquisedec. <sup>16</sup> Te tu cúu ya sutū jeē ní cacu chíji yucūn Leví nájnūhun cáhán ley jenahán. Chi cúu ya sutū siquī jeē ndíso ya poder cotecu yā níí cáni te ma cúu cuiti yā. <sup>17</sup> Chi súcuan ni cahān Yaā Dios jnūhun ya:

Níí cáni cúu ró sūtū,  
nájnūhun sutū Melquisedec.

<sup>18</sup> Núu súcuan te jniñu jeē ní ndacu ley jenahán siquī sutū, chi ni naa vijna, chi tu ní níhín jniñu quendōo níí cáni. <sup>19</sup> Chi ley Moisés tu ní sáha jeē quéndōo ndaā ñayuu. Te ni nihīn yō iŋ jnūhun vāha ga jeē ñúhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

<sup>20</sup> Te jín jēē ni cáhán teyí Yaā Dios te cúu Jesús sutū. <sup>21</sup> Chi táca gá tēe ún, nasūu jín jnúhun jeē ni cáhán teyí yá ní cúu de sutū. Te Jesús chi ni cahān teyí Yaā Dios jeē cuu ya sutū, chi súcuan cáhán tutu:

Ni cahān teyí máá Jítóho yō Yaā Dios, te ma nácani yátá ni yā:  
Níí cáni cúu ró sūtū,  
nájnūhun sutū Melquisedec.

Achí yá. <sup>22</sup> Núu súcuan te jín Jesús ni cucutú iŋ contrato vāha ga vēsú ley jenahán. <sup>23</sup> Te táca gá sutū ún, chi ni iyo cuehē de, chi siquī jeē cájhi de te tu ní cúu cuiñi de níí cáni. <sup>24</sup> Te Jesús chi cúu ya sutū jeē cuiñi níí cáni, chi técu yā níí cáni. <sup>25</sup> Jeē yúcuan ndíso jniñu ya jnama ya ñayuu qujicoo nuū Yaā Dios, cotecu i níí cáni. Chi níí cáni técu yā te cáhán yā jehē i jín Yaā Dios.

<sup>26</sup> Núu súcuan te vāha ndasí sutū cujéhu cúu Jesús, jeē nájnūhun jini ñúhún yó. Chi sutū iŋ cúu ya, te tú na cuēchi ya, te íyó ndoo ya, te tu cúu ya jnáhan ñayuu casáha cuēchi, te cújéhu téyí yá nde nuū sucún gá andiví. <sup>27</sup> Te máá yá tu jini ñúhún sáha ya nájnūhun ni casáha sutū cácujeñu jenahán, jeē ndiquiví ni casocō de quiti siquī cuēchi máá de xihna gā, te sáá te siquī cuēchi ñayuu. Chi iŋ jínu-ni ni socō yā máá yá jehē yō, te ni cuu-ni. <sup>28</sup> Chi ni jeni ley Moisés táca sūtū cujéhu jeē tú na fuerza squícu vāha. Yūcuán na te cuéé gá te ni cahān teyí Yaā Dios. Te jín jēē ni cáhán teyí yá, te ni jeni ya Sēhe ya jeē cúu ya sutū cujéhu, te sutū ndaā sutū vāha cúu ya níí cáni.

### Jeē ndíso jniñu Cristo siquī iŋ contrato jeē

**8** Núu súcuan te jnūhun cánuú gá jeē jé ni cahān rī cúu yāhá: Névāha yó iŋ sutū cujéhu nájnūhun ni cahān rī, te ndéé yá lado vāha mesa nuū ndácu jniñu máá Yaā cujéhu nde andiví. <sup>2</sup> Te vijna te cúu ya sutū nde andiví, jeē cúu ndije lugar iŋ jeē ni sáha máá Jítóho yō Yaā Dios, nasūu ñayuu. Chi tu cáa nájnūhun vehe iŋ jenahán jeē ní casáha ñayuu. <sup>3</sup> Te táca sūtū cujéhu ni jeconaā de jeē socó de ndajniñu jín quiti nuū Yaā Dios. Núu súcuan te Jesucristo suni ni jini ñúhún jeē socó yā jeē cúu ya sutū. <sup>4</sup> Te núu ní íyo ga yā ini ñayiví, te ni ma qui-jnáhan jeē cúu ya sutū jín táca gá sutū, chi níí casocō gā de quiti nájnūhun cáhán ley Moisés. <sup>5</sup> Te jniñu casáha de, tu qui-jnáhan jín jēé iyó andiví. Chi cúu iŋ muestra-ni jeē steén siquī andiví. Te cúu nájnūhun jeē ni cáhán Yaā Dios jín Moisés quiví ní quejéé de sáha de vehe iŋ jenahán: Coto vāha ró jēé sáha ró táca ndajniñu nájnūhun jito jeē ni steén rī nuū rō nde xini yúcu, áchí Yaā Dios jín de. <sup>6</sup> Te vijna te sáha Cristo jniñu jéhu

ndasí gá vēsú jeē casáha tāca sūtū ún, chi ndíso jniñu ya siquī contrato jeé jéē yóhyo vāha ga, chi ndíso jnūhun jéhu ga jeē ni jéjnūhun Yaā Dios.

<sup>7</sup> Chi contrato ley xihna ñúhún, núu jeē ni sáha jeē quée vāha jniñu núu, te tuá cánuú jéē cóo contrato uū. <sup>8</sup> Chi ñayuu jenahán un jéē tu ní cáquendōo ndaā, suhva ni cahān Yaā Dios jíin i, áchí tutu:

Quiji quivī jeē nasáha ri iin contrato jeé jíin ñáyuu Israel jíin ñáyuu Judá, áchí Jítóho yō Yaā Dios.

<sup>9</sup> Te ma cóo nájñūhun contrato jeē ni sáha ri jíin jíi i jenahán, quivī jeē ní jniñ ri ndaha de jíjnáhan de, te ni quenehen ri de ini nación Egipto. Chi tu ní cásquicu vāha de jíin contrato ley rī.

Jeē yúcuan tuá ni tánúhún rí de, áchí Yaā Dios.

<sup>10</sup> Núu súcuan te suhva coo contrato jeé nasáha ri jíin ñáyuu Israel, nde na quíji quivī yúcuan, áchí Jítóho yō Yaā Dios:

Sáha ri jeē jécūhun ley rī nuū jeē níjnūni i,

te suni ini anuá i tee ri jnūhun ley rī.

Te cuu ri Yaā Dios maá i,

te maá i cuu ñayuu maá rí.

<sup>11</sup> Te tuá jíni ñúhún stéén i nuū jnáhan i nuū ñáni i,

návaha cuni i ndese Yaā cúu Jítóho i.

Chi ndíhi i cuni ndese Yaā cúu ri,

nde ñayuu núu ga jíin ndé ñayuu cujéhu ga.

<sup>12</sup> Chi cone cáhnu ni rī nuū i jeē ní casáha i jniñu néé,

te ni ma núcūhun ga ni rī cuēchi ni casáha i.

Achí Yaā Dios. <sup>13</sup> Te jeē ni cáhān yā jeē cuáha ya iin contrato jeé cúu jeē ní cachi yā jeē tuá cuajniñu contrato xihna ñúhún. Te iin jeē ní cutúhú jéē tuá jejniñu, chi jíni yō jeē je yajni naa.

### Vehe ii ñayīvi yáha ní steén ndese cáa andiví

**9** Te ndaā chi contrato xihna ñúhún ní ndacu jniñu ndese chiñúhún i ya, jíin ndese coo iin vehe ii ini ñayīvi yáha. <sup>2</sup> Te ni cuvāha vehe ii ún, te ni iyo uū cuarto. Te cuarto xihna ñúhún jéē naní cuarto ii, ni iin candelero oro jíin mesa oro jíin pan ii. <sup>3</sup> Te ni iyo sahma jeē ndíta caa jeē ndihyú inga cuarto jeē naní cuarto ii ndasí gá. <sup>4</sup> Te ini un ní iyo iin altar oro nuū cayú sūje cútú, jíin yéjñū jeē ñúhún contrato ley, te máni oro cúu ní siquī yejñú. Te ini yejñū un íne iin tijeñen oro jeē ñúhún maná jeē ní cuun andiví. Te suni íne vara Aarón jeē ní nane numa, jíin tabla yuū jeē yosó jnūhun contrato ley. <sup>5</sup> Te siquī yejñū un ní cahíin ndindúú figura ndajéhé querubín jeē steén jeē íne Yaā Dios. Te ni sáha cuandahū siquī tapa yejñū nuū ni cóso yuyú níñi jeē ndáhva cuēchi. Te tu núne yó cáhān gā yō siquī tāca yúcuan vijna.

<sup>6</sup> Te ná ni jinu tācá un, te núu-ni núu-ni quívicoo sūtū ini cuarto xihna ñúhún jéē casáha de jniñu jeē cúu de sūtū. <sup>7</sup> Te ini cuarto uū, chi tu cúu quívicoo na-ni sūtū jíin inga ñayuu, chi máñúhún-ni sūtū cujéhu ga cúu jeē quíví, te suni iin-ni vuelta jeē cuiyá. Te suni ma cúu quíví de núu tú níñi quiti jeē socó de nuū Yaā Dios jeē siquí cuēchi maá de jíin siquī cuēchi ñayuu. <sup>8</sup> Te jíin yúcuan stéén Espíritu Santo nuū yō jeē ná ni iyo ga cuarto ii xihna ñúhún ini ñayīví, te tu ní núne ichi jeē quíví ñayuu ini lugar ii ndasí jeē cúu andiví. <sup>9</sup> Chi tāca yúcuan cúu jeē ni stéén ndese cúu tiempo vijna. Chi jeē ní casocō i ndajniñu jíin quiti nuū Yaā Dios, chi tu ní cúu cuiti sáha jeē quéndōo ndoo ánuá ñayuu ní casocō ún.

<sup>10</sup> Chi tācá un ní steén máni siquī yiqú cúñu yō, ndese caji yō, ndese coho yó, ndese ndundoo yó. Te ni jejniñu maá-ni nde ni quíji Cristo jíin iin modo vāha ga.

<sup>11</sup> Chi vijna je ni quiji Cristo, te cúu ya sutū cujéhu ga jeē ndíso jnínu ya siquī tāca jéē váha jeē ní quiji vijna. Te cúu ya sutū ini lugar ii nde andíví jéē cujéhu ga te váha ga vēsú cuarto ii jenahán. Te nasūu jéē ní casáha ñayuu cúu, chi nasūu cuenta ñayívi yáha cúu. <sup>12</sup> Te jeē ni quívi ya ini lugar ii ndasí gá nde andíví, te nasūu jíin níñi ndixúhú ni níñi becerro, chi jíin níñi maá yá ni quívi ya, ni socó yá iin jínu-ni jeē níf cáni. Te súcuan ni jnama ya yohó jéē cótecu yō níf cáni. <sup>13</sup> Chi nde jenahán te níñi stíquī jíin níñi ndixúhú jíin yáa becerro jeē ní cáyū nuū altar, ni cacosó yuyú de siquī ñayuu jeē tu íyó ndoo ánuá i, te súcuan ni ndundoo i nuū yā. <sup>14</sup> Te núu ni nihín jnínu níñi tācá quití ún, te nagā ni cuu níñi maá Cristo. Chi Yāa ndoo cúu ya, te ni socó yā maá yá nuū Yāa Dios, ni sáha Espíritu jeē íyó níf cáni. Te níñi yā nácate ánuá yō nuū jnínu néé jéē cúu yō sáha. Te súcuan te cuu cuajnínu yó núu Yāa Dios, Yāa técu.

<sup>15</sup> Jeē yúcuan cúu jeē ndíso jnínu ya siquī iin contrato jeé. Chi ni jihí yā, te súcuan ni quende yā cuéchi ni casáha ñayuu ná ni íyo i chíji contrato xihna ñúhún. Te ñayuu jeē cána Yāa Dios i quívicoo i ndaha ya, nihín i tahū i jeē cóo níf cáni, nájnūhun ni jejnūhun ya. <sup>16</sup> Chi cúu nájnūhun núu sáha iin tēe acta jeē cahán siquī tahū, te nde na cúu de te níhín jnínu. <sup>17</sup> Chi núu técu gā tēe ni sáha, te tu níhín jnínu. Te nde núu ni jihí de, te sáa te jéjnínu. <sup>18</sup> Te suni súcuan contrato xihna ñúhún, suni ni jini ñúhún cucutú jíin níñi quití ní jihí. Te contrato jeé chi ni cucutú jíin níñi Cristo jeē ni jihí yā. <sup>19</sup> Chi ná ni cuu ni cachi Moisés tācá jnínu ndácu contrato ley un núu ndívii ñayuu, te ni quihin de níñi becerro jíin níñi ndixúhú jíin ndute, te jíin ixi cácuéhé jíin yúcú hisopo ni cosó yuyú de siquī libro ley jíin síquī ndívii ñayuu. <sup>20</sup> Te ni cahán de: Yáha cúu níñi

jeē cúcutú contrato ley jeē ní sáha Yāa Dios jíin yó, achí de. <sup>21</sup> Te suni níñi un ní cosó yuyú de nde maá vehe ii jíin táca ndajnínu ni cajejnínu de jeē cáchiñúhún de ya. <sup>22</sup> Te je yajni ndíhi ndajnínu, chi cahán ley un jeē jíni ñúhún ndundoo jíin níñi. Te núu ma cáti níñi te ma cóne cáhnu ni yā nuū cuéchi núu.

### Jeē ni sócō Cristo maá yá jeē quénde yā cuéchi

<sup>23</sup> Núu súcuan te tācá ndajnínu un jéē cácuu muestra tāca jéē íyó andíví, ni jini ñúhún ndundoo jíin níñi quití. Te tāca maá jéē íyó andíví, chi ni jini ñúhún ndundoo jíin níñi Cristo jeē yóhyo váha ga. <sup>24</sup> Te Cristo chi tu ní quívi ya ini lugar ii jeē ní casáha ñayuu, chi iin muestra-ni ni cuu un jéē steén ndese íyó lugar ii ndije nde andíví. Chi maá andíví ní quívi ya, te vijna íne ya nuū Yāa Dios jeē cahán yā jehé yō. <sup>25</sup> Te maá sūtū cujéhu ga quívi de tāca cuíyā ini cuarto ii gā jeē socó de níñi quití. Te Cristo tu ní sócō yā maá yá cuehē jínu, chi iin jínu-ni. <sup>26</sup> Chi núu jeē súcuan te cánuú jéē cuehē jínu ndoho ya nde ná ni jecóo ñayívi te nde vijna núu. Te tuú chi sa tiempo cuándíhi yáhá ni quenda ndijin yā iin jínu-ni jeē níf cáni, ni socó yā maá yá jeē ní quende yā cuéchi. <sup>27</sup> Te nájnūhun ni cundaá jeē cúu tāca ñayuu iin jínu-ni, yūcuán na te sándaá Yāa Dios jnínu i, <sup>28</sup> suni súcuan Cristo ni jihí yā iin jínu-ni jeē ni sócō yā maá yá jeē ní quende yā cuéchi cuehē ñayuu. Yūcuán na te ndiji ya inga jínu, te nasūu jéē socó tucu ya maá yá jeē quénde yā cuéchi, chi sa suhva jeē jnáma ya ñayuu jeē cándetu i jeē ndíji ya.

**10** Chi ley Moisés ni cuu iin muestra-ni tāca jéē váha jeē ní quiji jíin Cristo, iin jeē steén-ni ndese coo maá jéē váha. Jeē yúcuan tu cúu cuití sáha ley un jéē quéndōo ndaá ñayuu jeē quíjicoo i nuū Yāa Dios jeē cásocō i quití nuū cuiyá nuū cuiyá. <sup>2</sup> Chi



núu ní cúu sáha ley un jéé quéndōo ndaā i, te jecuiñī jeē cásocō i quiti núu. Chi núu ní cúu, te ñin jínu-ni te je ni quendōo ndoo ánuá ñayuu cásocō ún, te ma yūhu gá anuá i jeē ni sáha i cuēchi núu. <sup>3</sup>Te tuú chi jeē cásocō i quiti ún táca cuýā, sa sáha jeē núcūhun ni i cuēchi i. <sup>4</sup>Chi niñī stíquī jín nñī ndixúhú, ma cúu cuiti quende cuēchi.

<sup>5</sup>Jeē yúcuan ná ni quiji Cristo ini ñayíví, te ni cahān yā jín Yaā Dios: Jeē jéhi i quiti jín jéé jéhe i ofrenda nuú ní, chi tu ní núnahan ni ní. Te ni sātūhva ní yiqui cúñu maá ná jeē socó na.

<sup>6</sup>Te tu ní cúsiñ ni ni jéé jéhu i quiti te sócō i ti jeē ndúndoo cuēchi i núu.

<sup>7</sup>Yūcuán na te ni cahān ná: Yāha véji ná jéé squícu ná jniñu jeē núnahan ni ní, Tátā Yaā Dios.

Chi súcuan je yósó jnúhun na núu tútu. Achí Jesús. <sup>8</sup>Xihna gā ni cahān yā jeē tu ní núnahan ni Yaā Dios te tu ní cúsiñ ni yā jeē jéhi i quiti te jéhe i ofrenda, jín jéé jéhu i ti te sócō i ti jeē ndúndoo cuēchi i núu, nájñuhun ndácu ley jenahán jniñu. <sup>9</sup>Te ni cahān gā yā: Yāha véji ná jéé squícu ná jniñu jeē núnahan ni ní, Tátā Yaā Dios. Te jeē ni cahān yā súcuan, te ni sáha ya jeē jécuiñī jeē cásocō i quiti, chi ni socō yā maá yá. <sup>10</sup>Te ni sáha Yaā Dios jeē iyó ndoo iyó íi yō nuú yā siquī jeē ni sáha Jesucristo jeē núnahan ni Yaā Dios, suu jeē ni sócō yā yiqui cúñu yā ñin jínu-ni jeē ní cáni.

<sup>11</sup>Te táca sūtū ún ndíquívī ni cahiin de ni cajeñiñu de nuú yā, te cuehē jínu cájehni de suu quiti jeē socó socó de. Te táca un chi ma cúu cuiti quende cuēchi.

<sup>12</sup>Te Cristo chi ñin jínu-ni jeē ní cáni ni socō yā maá yá jeē siquī cuēchi yó. Te sáa te ni cucōo ya lado váha Yaā Dios nuú cujéhu ya. <sup>13</sup>Te yūcuan ndétu ya vijna nde quiji quívī jeē quénde yā poder táca jéé jito uhū nuú yā. <sup>14</sup>Chi jeē ni sócō yā maá yá ñin jínu-ni, te ni sáha ya jeē ní

cáni quendōo ndaā ñayuu ni sándoo ya. <sup>15</sup>Te maá Espíritu Santo suni cájí cahán yā siquī jnúhun yáha, chi xihna gā cahán yā:

<sup>16</sup>Suhva coo contrato jeē nasáha ri jín i, nde na quíji quívī yúcuan, áchí Jítoho yō Yaā Dios:

Sáha ri jeē jécūhun ley rī ini anuá i, te suni nuú jeē níjnūnī i tee ri jnúhun ley rī.

<sup>17</sup>Yūcuán na te cahán gā yā: Ma núcūhun cuiti gā ni rī táca cuēchi jín jniñu néé ní casáha i.

Achí yá. <sup>18</sup>Núu súcuan te núu je ni ine cáhnu ni yā nuú cuēchi yó, te tuá cánuú jéé socó gā yō jeē siquī cuēchi yó.

### Jeē ní nune ichi quívī yó núu Yaā Dios

<sup>19</sup>Jeē yúcuan hermano, ma ñin jeē cáni ni yō, chi cuu quívī yó lugar ñi ndasí ndé nuú iyó Yaā Dios, siquī jeē ní jeti niñī Jesucristo. <sup>20</sup>Chi ni nune ya ñin ichi jéé jéé cótecu yō ní cáni sáha ya. Chi ná ni jihī yā te ni tahndē sahna ndíta caa jeē ndíhyú lugar ñi ndasí gá ini vehe ñi.

Te súcuan ni steén Yaā Dios jeē núne quívī yó lugar ñi ndasí gá nuú iyó yá. <sup>21</sup>Te Jesús cúu sutū cujéhu ndasí jeē ndíto yóhó ñayuu cácuu séhe Yaā Dios.

<sup>22</sup>Núu súcuan te na quívicoo yó núu Yaā Dios, te na cóo ndije ndaā anuá yō, te na cándíje nihin yó jéé iyó ndáa ndíhi jnúhun ya. Chi jín niñī Cristo ni ndundoo ánuá yō nuú táca cuēchi ni casáha yó, nájñuhun ni ndundoo yó núu yā jeē ní jendute yó jín ndute. <sup>23</sup>Te na cuñi nihin yó jín jnúhun jeē cácahān yō jeē ñúhun ni yō jeē sáha ya jeē váha jín yó. Te ma cáca yátá yó, chi váha squícu maá Yaā Dios jeē ni jéjnūhun ya nuú yō. <sup>24</sup>Te na nácani ni yō ndese stíhvī jnáhan ni yō jeē cundáhú gá ni yō jnáhan yó, jín jéé sáha yó jniñu váha. <sup>25</sup>Te níni na ndútútú yó chíñúhún yó yā, te ma cúhuun ni yō nájñuhun casáha sava i, chi sa víhyá gā

na stáhví jnáhan ni yō, chi je cájini yō jeē cuácuyajni quiví ndíji ya.

<sup>26</sup>Te núu je ni jecūhun ni yō te ni jetáhú yó jñūhun ndaā, te núu máni sáha sáha-ni yó cuéchi, núu súcuan te tuá na inga iyó jée cúu siquī cuéchi yó. <sup>27</sup>Chi sa quéndōo máni ga jñūhun xeēn siquī yō jeē quiji quiví juicio te quiji yáñuhūn xeēn jeē cayū ñayuu jeē cájito uhū i ya. <sup>28</sup>Ñayuu squéhichí ley Moisés, te núu uū chí úní ñayuu cahán cuéchi siquī i, te cuu nahín i, te tuá na jñūhun cundáhú ni iyó. <sup>29</sup>Te nagā ni cuu jeē ma ndóho xeēn gā ñayuu jeē squéhichí i máá Séhe Yaā Dios, chi nájñūhun jeē jeñú nñnu i siquī yā. Te sáha i jeē tu ndé jéjñíñu niñí yā jeē ní jeti siquī contrato jeē ndúndoo i nuū yā nuú. Te súcuan sáha ndeváha i nuū maá Espíritu Yaā Dios jeē sáha jeē váha yóhó. <sup>30</sup>Chi je jíní yō jeē ni cáhān maá yá: Máá rí sáha jeē ndutahū i siquī cuéchi i, máá rí cuāha castigo i, áchí Jítóho yō. Te suni cáhán: Máá Jítóho yō sándaā yā siquī cuéchi ñayuu yā. <sup>31</sup>Núu súcuan te xeēn ndasí cúu jeē quiví ñayuu ini ndaha Yaā Dios, Yaā técu, jeē ndú-tahū i siquī cuéchi i.

<sup>32</sup>Te na núcūhun ni rō ndese ni cuu ichi yátá, nde náa sá ní quejéé ró caca ró jíñ luz yā, te ni cajendeyí ni rō ni candoho ró tijní jñūndóho xeēn. <sup>33</sup>Chi sava ró ní cacahān neé i nuū rō te ni castóho i róhó ní cajito ñayuu. Te sava ga rō ni cajēhe ró jñūhun cuiñí ró jíñ ñáyuu ni candoho súcuan. <sup>34</sup>Chi ni cacundáhú ni rō ñayuu ní cahiin vecāa jeē siquí yā, te ni cacusiñ ni rō vésú ni caque-nde ñayuu ndajñíñu ró. Chi ni casáha ró cuenta jeē ndé andiví cáneváha ró ññ tahū jeē váha ndasí gá jeē coo níí cáni. <sup>35</sup>Núu súcuan te ma siaā rō jñūhun jeē ní candíje ndije ró jée váha ni yā, chi cuehē ndasí táhū nihín rō siquí ún. <sup>36</sup>Chi cánuú jée cuándeyí ni rō náváha sáha ró jée núnjahan ni Yaā Dios, te nihín rō jeē ni jéjñūhun ya. <sup>37</sup>Chi cáhán tutu i:

ññ núnúu-ni te ndee Yaā ndiji, te ma cu-cuéé yá.

<sup>38</sup>Te ñayuu jeē ní ndahva rí cuéchi i, cotecu i jeē candíje i jeē sáha ri jehē i.

Te núu na cáca yátá i, te ma cúsiñ ni rí jíñ i.

Achí Yaā Dios. <sup>39</sup>Te yóhó tu cácuu yó jnáhan ñayuu cájica yátá jeē jñahnú ndetū i. Chi sa cácandíje yó jée nihín tahū yó cotecu anuá yō.

### Siquí jñūhun cándíje

**11** Te jeē candíje yó, suu cúu jeē cúndaā ndije ni yō jeē nihín yō táca jée ñūhun ni yō, jíñ jée jíñí váha yó jée iyó ndije táca jée tu cájito yó núu vjna. <sup>2</sup>Te ñayuu jenahán chi ni jejnúhún yá i siquí jeē súcuan ni cacandíje nihín i.

<sup>3</sup>Siquí jeē candíje yó cúu jeē jécūhun ni yō jeē ni sáha Yaā Dios ñayiví jíñ jñūhun ni cahán-ni ya. Te jíñ poder Yaā Dios jeē tu jíto yó núu, ni jecōo táca jée jíto yó núu.

<sup>4</sup>Ni candíje Abel jeē sáha ya jehē de, te jeē yúcuan ní socō de jeē váha ga nuū Yaā Dios vésú Caín. Te jeē yúcuan ní jejnúhún yá jeē iyó ndaā de, chi ni jetáhú yá jeē ní sócō de quití nuū yā. Te vésú ni jihí de, te cáhán gā ejemplo de jíñ yó nde vijna, chi ni candíje ndaā de.

<sup>5</sup>Ni candíje Enoc jeē sáha ya jehē de, te jeē yúcuan ní naquihín ya de cuahán de andiví, te tu ní jíñí de. Te tu ní cánanihín ñayuu de, chi ni ndoñúhún-ni de ni sáha ya. Te áchí tutu jeē nde ná tu naquihín ya de te ni cusíñ ni yā jíñ táca jée ni sáha de. <sup>6</sup>Te núu tu cándíje yó jée sáha ya jehē yō, te tú na modo cusíñ ni Yaā Dios jíñ yó. Chi ñayuu jeē cuní quivícoo ndaha ya, cánuú jée candíje ndaā i jeē iyó yá jíñ jée cuáha ya tahū nuū ñáyuu jeē nducú i candíje i ya.

<sup>7</sup>Te Noé ni candíje de jeē sáha Yaā Dios jehē de, ná ni castūhun yá nuū de jeē coo jñūndóho jeē ná tu coto de jeē

coo. Te jeē yúcuan ní jendetū de ni sáha de barco cáhnu jeē naní arca, návaha cácu de jíin ní vehe de. Te jeē súcuan ni candíje de, te ni cane cuēchi siquī ñayuu jeē tu ní cándíje i ya. Te ni ndahva yā cuēchi de siquī jeē ní candíje de jeē sáha ya jehē de.

<sup>8</sup>Te Abraham ni candíje de jeē sáha ya jehē de, te jeē yúcuan ní jetáhú de ná ni cahān yā jíin de jeē quihín de ñin lugar nuū cuáha ya cuu tahū de. Te ni quenda de cuahān de, vēsú tu jíin de ndé nuū quihín de. <sup>9</sup>Ni candíje de jeē sáha ya jehē de, te jeē yúcuan ní condee tatú de nuū ñūhun jeē ni jéjnūhun ya jeē cuáha ya nuū de. Te ni condee de vehe ñi, te suni súcuan Isaac jíin Jacob, chi sēhe de ún suni ñuú ñihín tahū i jíin de jeē ni jéjnūhun ya. <sup>10</sup>Chi ni ñuhun ni de condee de máá ñuu andiví jéé iyó cutú cimientu, te máá Yaā Dios ni jequin yā ni sama ya ñuu ún.

<sup>11</sup>Te suni ni candíje máá Sara jeē sáha ya jehē ña, te jeē yúcuan ní ñihín ña fuerza jeē ní jecūhun sēhe ña. Chi nde ná ni yāha ndasí cuýā ña, te ni cacu ñin sēhe yí ña, chi ni candíje ña jeē squícu Yaā Dios jeē ni jéjnūhun ya. <sup>12</sup>Te súcuan ni cuu jeē ni táhū cuehē ñayuu ni sáha ñin-ni Abraham, vēsú je jéhnu ndasí de. Te yucūn de ni nducuehē ndasí, nájñūhun quimi andiví, jíin ñiti yumar, jeē ma cúu cuiti cahu yó.

<sup>13</sup>Te tāca téé cándíje un, ní cajihí de. Te vēsú tu ní cájito de jeē ni jéjnūhun ya, te ni cajini vāha de jeē cóo, te ni cacusiñ ni de jeē cóto de inga tiempo. Te súcuan ni cacahān de jeē ñáyuu ñuu jicá ñáyuu tatú cácuu de ini ñayivi yáha. <sup>14</sup>Te tāca téé jeē cahān súcuan, chi stéén cají de jeē nducú de ñin ñuu jeē cúu andiví núú cúu ñuu maá de. <sup>15</sup>Chi núu jeē cánacani ni de siquī ñúú nuū ní quendacoo de, te iyó modo jeē nándicó cóo de te núu jeē cá-cuni de núú. <sup>16</sup>Te tuú chi ni cacuu ndasí ni de coyúcú de inga ñuu váha ga jeē cúu

ñuu andiví. Jeē yúcuan tu cúcanu Yaā Dios jeē naní yá Yaā Dios de jíjnāhan de, chi je ni sátūhva ya ñin ñuu nuū cóyúcú de.

<sup>17</sup>Ni candíje Abraham jeē sáha ya jehē de, te jeē yúcuan ní jehēn de jíin Isaac jeē socó de i, ná ni jito ndee ya de. Te ni iyo tūhva de jeē socó de sēhe de un jéé mañúhún ni i nuū de, vēsú ni ñihín de jñūhun jeē ni jéjnūhun ya suhva siquī i: <sup>18</sup>Isaac cúu tēe jeē squejéé rí yucūn rō quihín, achí jñūhun ni jéjnūhun ya. <sup>19</sup>Te ni sáha de cuenta jeē cúu nastécu Yaā Dios i. Te nájñūhun súcuan ni cuu, chi cuu cahān yō jeē nájñūhun ni jihí i te ni natecu i nuū de, chi ni jesi-ni ya jeē ma cáhni de i.

<sup>20</sup>Ni candíje Isaac jeē sáha ya jehē de, te jeē yúcuan ní cahān de jeē vāha tahū ñihín sēhe de Jacob jíin Esaú tiempo quiji. <sup>21</sup>Te suni súcuan ni candíje Jacob, te jeē yúcuan, náa je yajni cuu de te ni cahān de jeē vāha tahū ñihín ndindúú sēhe yí José. Te yítuu de vara de, ni chíñúhún de Yaā Dios. <sup>22</sup>Te suni súcuan ni candíje José, te jeē yúcuan, náa cuacuyajni cuu de, te ni cahān de jeē tāca yúcūn Israel, ñin quiví quendacoo i nación Egipto. Te ni ndacu de jñiñu jeē chíndūji i yiqui de ñuu nuū quívicoo i.

<sup>23</sup>Te ná ni cacu Moisés, te tátá i náná i ni cacandíje de jeē sáha ya jehē de, te jeē yúcuan ní cacondito sáhi de i uní yoō. Chi ni cajito de jeē lúu cáa i, te tu ní cáyuhú de siquī acta jeē ni sáha rey jeē na cúu tāca súchi yí. <sup>24</sup>Te suni súcuan ni candíje Moisés, te jeē yúcuan ná ni jehnu de te tuá ni jéhe de jñūhun cuu de sēhe ñahan cúu sēhe síhi rey Egipto. <sup>25</sup>Chi sa ni cuu ni de ndoho de jíin tāca jñāhan de ñayuu Yaā Dios, nasūu jéé cusí ni de jecu-ni tiempo jíin cuēchi. <sup>26</sup>Chi ni sáha de cuenta jeē núu cahān neé ñayuu siquī de jeē siquí Cristo, te yúcuan sáha jeē cucá ndasí gá de ndiñi jeē ndíso jñūhun Yaā Dios, vēsú jeē ni-

hín de ndíhi ndajniñu cúca íyó nación Egipto. Chi ni ñuhun ni de jeē cuáha ya tahū de. <sup>27</sup> Te jeē súcuan ni candíje de, jeē yúcuan ní quenda de nación Egipto cuahān de. Te tu ní yúhú de jeē quití ni rey nuū de. Chi ni iin nihin de siquī jniñu sáha de, chi ni sáha de cuenta jeē je jíto de nuū Yaā jeē tu cúu coto yó núu vijna.

<sup>28</sup> Te jeē súcuan ni candíje de, te jeē yúcuan ní cahān de jeē na cáhni ñayuu londe pascua. Te ni ndacu de jniñu jeē na cóso yuyú i niñi tī yehyí i, návāha núu na quíji ndajéhé jeē cáhni yā tāca séhe nuú ñayuu Egipto, te ma cáhni yā séhe nuú ñayuu Israel. <sup>29</sup> Te siquī jeē ní cacandíje ñayuu Israel jeē sáha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuan ni cacuni tēe Egipto yāha de núu, te ni nandíhyū-ni ndute siquī de ni cajihí de.

<sup>30</sup> Ni cacandíje soldado jeē sáha ya jehē de, te jeē yúcuan ní cotúú jeē ní condúu ndíhyú ñuu Jericó, ná ni cajicó ndúu de uxā quivī. <sup>31</sup> Te Rahab, vésú ñahan tíjni ni ni cuu ña, te ni candíje ña jeē sáha ya jehē ña. Te ni chindéé ñáhán ña tēe Israel jeē ní quijicoo ni condéhé yuhu ndese íyó ñuu ña. Te jeē yúcuan tu ní jíhí ña jíin ñayuu nihni ni ñuu ña ún.

<sup>32</sup> ¿Te ndé jnúhun ga cahān rī núu súcuan? Chi tuá na tiempo jeē nácani ga rī jnúhun Gedeón jíin Barac jíin Sansón jíin Jefté jíin David jíin Samuel jíin táca tēe ni canacani jnúhun ya nde jenahán. <sup>33</sup> Ni cacandíje de jeē sáha ya jehē de jíjnāhan de, te jeē yúcuan ní cacundeyí de ni canajniñi de tācá ñuu náhnu, te vāha ni candacu de jniñu nuū, te ni chindéé ñáhán yá de nájnūhun ni jejnūhun ya. Te nuū sava de ni jesi Yaā Dios yuhu ndíc-aha jeē tu ní cáyeji tī de. <sup>34</sup> Te sava de tu ní cáyú de sáha ñuhūn jeē cayú xeēn. Te sava de ni cācu de jeē tu ní jíhí de jíin espada. Te sava de ni nanihin ni de náa tuá fuerza de núu, te ndacuí teyí ní iyo

de nuū guerra, te ni cacundeyí de siquī soldado tācá ñuu jicá jéē jíto uhū ún de. <sup>35</sup> Te sava ñahan ni natecu séhe ña jeē ni jíhi i.

Te sava ga ñayuu chi sa suhva ni candoho xeēn i nde ni cajihí i. Te tu ní cájēhe i jnúhun jeē siaá i jnúhun ya te cācu i, chi ni catee ni i jeē natecu i coyūcu váha ga i andiví. <sup>36</sup> Te sava ga i ni casacatā ñayuu nuū i, te ni cacani ñayuu i, te nde ni cacunuhni cadena i ni cahiin i vecāa. <sup>37</sup> Te ni cajēhe yuū xiní i, te ni cajehnde i jíin sierra, te ni cajito ndee i jíin jnúndóho, te ni cajehni i jíin espada. Ni cajica cuu i cháha chúcuan, te máá ñii lánchi máá ñii ndíxúhú ní cañuhun i. Ni candoho ndáhú i, ni cajito i jnúndóho, ni castóho ñayuu i. <sup>38</sup> Vāha ndasí ñayuu ni cacuu i jeē tú cuiti ñayuu ñayivi súcuan, te vésú súcuan te ni casáha ñayuu jeē ní cajica cuu i nuū ñuhun téhé jíin chíji yucu, ni cahiin i yaū cava jíin yáú ñuhun. <sup>39</sup> Te tāca ñayuu yáha, vésú ni jejnúhún yá i jeē ní cacandíje nihin i jeē sáha ya jehē i, te tu ní cájito i nuū jeē ni jéjnūhun ya. <sup>40</sup> Chi ni sātúhva Yaā Dios iin jniñu váha ga, te suu cúu jeē sáha Cristo jíin yó, návāha iin cáhnu-ni nihin yō tahū yō jíin i, te jeē yúcuan cúu jeē ná tu nihin i ndíhi tahū i.

### Jeē na cócunuū yō nuū maá iin-ni Jesús

**12** Te íyó cuéhé ndasí ñayuu un jéē ní cacandíje nihin i jeē sáha ya jehē i, te nájnūhun ni jicó ndúu i yóhó, cástéén gā i nuū yō nde vijna jeē suni súcuan na cándíje yó. Núu súcuan te suni máá yó, na téjiyo yó táca jéē sajnéñu jíin cuéchi jeē ni cáan yó jíin. Te na cuándeýí ni yō cunu yó jíin carrera jeē ni jéhe ya jeē cunu yó. <sup>2</sup> Te na cócunuū vāha yó Jesús, Yaā jeē ni scándíje yóhó te sáha ya jeē íje vāha yó jíin jnúhun ya nde jínu ije yó. Chi máá yá ni jendeyí ni yā ni ndoho ya jicá cruz. Te vésú jnúhun canu cúu jeē

súcuan cuu yā, te tu ní sáha ya cuenta. Chi ni ñuhun ni yā jeē sa cusī ndasí ni yā ná ni cuu ni ndoho ya. Yūcuán na te ni cucōo ya lado váha mesa nuū ndácu Yaā Dios jniñu.

<sup>3</sup>Te na nácani ni rō ndese ni jendeyí ni yā ni ndoho ya jeē ni sáha ndeváha ñayuu iyó cuēchi jíjn yá. Te súcuan te ma cuíta ró ni ma ndínuu ni rō jíjn jnúndóho. <sup>4</sup>Chi ni ná tu ndoho ró jéē ndé cuu rō jeē cánducú ndéyí ró snáa rō cuēchi. <sup>5</sup>Te sanaa te je ni canaa ni rō jnúhun cáhán tutu ii, jeē stihví ni Yaā Dios rohó jéē cácuu ró séhe ya:

Séhē, ma quití ni rō jeē snahnú Jitoho yō rohó,  
te ni ma ndínuu ni rō núu cáhán yā nuū rō.

<sup>6</sup>Chi Jitoho yō snáhnú yā ñayuu jeē maní yā jíjn,  
te jéhe ya castigo tāca jéē náquihin ya cuu séhe ya.

Achí tutu. <sup>7</sup>Núu súcuan te na cuándeyí ni rō jeē snahnú Yaā Dios rohó, chi sáha ya jíjn ró nájnūhun sáha tátá jíjn séhe. Chi tú na séhe íyó jéē tu snáhnú tátá i. <sup>8</sup>Te núu ma snahnú yā rohó, nájnūhun ndóho tāca séhe, núu súcuan te nájnūhun séhe ndáhu cácuu ró, nasūu séhe ndije ya. <sup>9</sup>Te tátá yō ñayívi yáha, suni ni snahnú de yóhó, te ni iyo yíñúhún yó jíjn de. Te nagā ni cuu jeē ma cuándetū yō nuū maá Tátá yō andiví jeē snahnú yā yohó, te cotecu yō níf caní. <sup>10</sup>Te ndaā chi máá de ni casnáhnú de yóhó jecu-ni quiví, ndese ni cuu ni maá de. Te máá yá chi snáhnú yā yohó ñin modo jeē quéndōo váha ga yō, náváha coo ndoo yó nájnūhun íyó ndoo máá yá. <sup>11</sup>Te ndaā chi tu cácusī ni yō maá hora jeē ndóho yó castigo, chi sa cúcuíhyá ni yō. Te cúcuéé gá te cuni yō jeē ní quéndōo ndaā yō te coo ndeyí sfi ni yō jeē ni snáhnú yā yohó.

### Siquí ñayuu jeē casquéhichi i jnúhun cáhán Yaā Dios

<sup>12</sup>Núu súcuan te ma cóo ró nájnūhun tēe ni cuíta íi ndaha te quísi i xiní yití, chi sa ndacuí na sáha ró máá ró nuū jnúndóho. <sup>13</sup>Te sáha ró ichi ndóo caca ndaā rō, náváha nduváha rōhó jéē tu fuerza ini, jeē cácuu ró nájnūhun tēe chácuá jeē tu cúu caca váha.

<sup>14</sup>Te na cóndihví ni rō jeē condee maní rō jíjn táca ñayuu, jíjn jéē cóo ndoo coo ii rō nuū yā. Chi ma cúu coto ni ñin ñayuu nuū maá Jítoho yō te núu tu íyó ndoo i. <sup>15</sup>Te coto má cáca yátá ni ñin ró te scuíta ró jnúhun jeē sáha Yaā Dios jeē váha rōhó, náváha tú cuu ró nájnūhun ñin yucū uvuá jeē stívi te sáha dañó jíjn cuéhē ñayuu. <sup>16</sup>Te ni ñin ró ma cáca jnéni. Te ni ma cóo jéē ni rō nuū Yaā Dios, nájnūhun ni iyo Esaú. Chi máá ñin cohō ndeyu ni jicān de nuū ñáni de, ni sama de jíjn derecho de jeē cúu de sūchi núu, te súcuan ni xicó de derecho de. <sup>17</sup>Te cájini rō jeē cucuéeé gá te ni cuni de jeē na cáhán tátá de jeē váha tahū niñin de, te tu ní cúu, chi tuá ni táñúhún Yaā Dios de. Chi tu ní ñihñ jniñu jeē ní nacani ni de, vésú ni nducú ndéyí de te nde ndahyú de.

<sup>18</sup>Te rōhó jíjnáhan ró tu ní quíjicoo ró núu íyo cúu, nájnūhun iyo ni cuu máá yucu nuū ni jéhe ya ley yā nuū ñayuu Israel. Chi ni cane yáñuhún yucu Sinaí, te nee lúchi jnúu jíto, te queé tachí xeén. <sup>19</sup>Te ni jecu trompeta, te ni cahān Yaā Dios. Te ñayuu jeē ní cajini sōho jeē cahán yā, ni cacahān ndahú i jeē ma cahán gā yā jíjn i. <sup>20</sup>Chi tu ní cúndeyí i jíjn jnúhun jeē ní ndacu ya jniñu nuū i, chi ni cahān yā: Vésú ñin quití-ni núu quívi tí yucu yáha, jíni ñúhún cuu tí jíjn yúu chí jíjn lanza, achí yá. <sup>21</sup>Te siquí jeē íyo ndasí cúu jeē cájito i ún, te ni cahān Moisés: Quísi i ruhū jeē yuhú rí, achí de.

<sup>22</sup>Te vijna róhó jéē cácan-díje, tu ní quíjicoo ró núū yúcu yúcu. Chi sa suhva nuū maá yucu Sion jíin núū maá űuu Yaā Dios, Yaā técu, ni quívicoo ró. Te űuu un cúu Jerusalén jeē iyó andíví, nuū cáhiyo tútú cuéhē ndasí mil nda-jéhé cáchiñúhún Yaā Dios. <sup>23</sup>Te ni quívicoo ró núū cáyūcu tútú űayuu cácan-díje jeē cácuu sēhe Yaā Dios, jeē iyó lista i andíví. Te ni quívicoo ró núū Yaā Dios, Yaā sándaā jniñu ndiñi űayuu, jíin núū cáhiyo ánuá űayuu váha jeē jé ni squéndōo ndaā yā i. <sup>24</sup>Te suni nuū maá Jesús, Yaā ndíso jniñu siquí contrato jeē ní quívicoo ró. Te yahu ndasí gá jniñu sáha niñi yā jeē ni jéti jeē ndáhva cuēchi yó, nasūu níñi Abel jeē ní jicān cuēchi.

<sup>25</sup>Núu súcuan te coto má squéhichi rō jñuhun jeē cahán yā jíin ró jijnáhan ró. Chi űayuu jeē tu ní cájetáhú ná ni cahán yā jíin i űayívi yáha, tu ní cáccācu i. Te xeēn gā ndoho yóhó te núu ma cu-atáhú yó nuū yā jeē cahán yā nde ichi ándíví núu súcuan. <sup>26</sup>Te nde saá ní quisi i űayívi jéē ni cahán yā. Te vijna chi cáhán yā: ĩn na jínu quisi ri űayívi, te nasūu máa-ni űayívi, chi suni tāca jéē ĩn andíví, áchí yá. <sup>27</sup>Te jñuhun yáha jéē cahán, ĩn na jínu, chi cúní cahán jeē téjiyo ya tāca jéē tu íyó cutú, suu jeē ní cuvāha, návāha na quéndōo jeē cóo cutú níñi cáni. <sup>28</sup>Núu súcuan te cuāha Yaā Dios ĩn űuu nuū yō jeē cóo cutú níñi cáni. Te jeē yúcu, na nácuatáhú yó nuū yā, te na chíñúhún yó yā, te na cóo yíñúhún yó, návāha cusí ni yā jíin yó. <sup>29</sup>Chi Yaā Dios maá yó cúu nájnūhun ĩn űuhūn jeē snāā ndiñi jeē neé.

### Ndese sáha yó te cusí ni Yaā Dios

**13** Ma jécuiñi rō jijnáhan ró jéē cundáhú ni rō hermano rō cácan-díje. <sup>2</sup>Conahán ró jeē cánuú cuāha núu ró vehe nuū űayuu cájica. Chi íyó jínu jeē súcuan ni cajēhe núu űayuu vehe, te

tu ní cájini i jeē nuū maá ndajéhé andíví ní cajēhe núu i vehe.

<sup>3</sup>Te conahán ró chindéē ñáhán ró űayuu cáhiin vecāa, chi sáha ró cuenta jeē nájnūhun cáhiin cáhnu ró jíin i vecāa. Te suni nacani ni rō jehē jnánhan ró jéē cándoho i sáha űayuu, chi núu súcuan coo jíin máá ró te suni ndoho ró.

<sup>4</sup>Coo yíñúhún ró síquí jñuhun quíjnáhan űayuu, te ma cosíquí ndéē jnánhan ró. Chi máá Yaā Dios sándaā yā cuēchi űayuu tijni ni jíin űayuu casíquí ndéē jnánhan.

<sup>5</sup>Te ma ndíyo ni rō xūhún, chi na cóo sī ni rō jíin jéē cánevāha ró. Chi máá yá ni cahán: Ma siaá cuiti rī rohó, ni ma stóo cuiti rī rohó, áchí yá. <sup>6</sup>Núu súcuan te ma ĩn jeē cáni ni yō, chi cuu cahán yō:

Máá Jítóho rī chindéē ñáhán yá ruhū,  
te ma yūhu rí núu na vé cuní űayuu sáha  
i jíin rí.

Achi yō.

<sup>7</sup>Te na núcūhun ni rō tācá pastor rō, jeē ní castéén de jñuhun Yaā Dios nuū rō. Te sáha váha ro cuenta ndese ni nihin jniñu jeē ní casáha de, te na ndácu ró de jeē ní cacandíje de jeē sáha ya jehē de.

<sup>8</sup>Te Jesucristo chi ĩn-ni cáa ya ichi yátá jíin vijna jíin níñi cáni. <sup>9</sup>Núu súcuan te ma cuāha ró jñuhun candíje ró tāca jñuhun jeē sīin cáhán jeē tu quíjnáhan jíin jñuhun máá yá. Chi íyó váha jeē na ĩje ánuá yō sáha jñuhun jeē váha ni yā jíin yó. Te tu jíni űñúhún yó jñuhun jeē tajnúni siquí jeē yéji yō, chi tu níñi jniñu cuiti jíin űayuu cáhiin jíin.

<sup>10</sup>Te máá yó chi cánevāha yó ĩn jeē ni sócō máá jéhē yō, cúu Cristo. Te tāca sūtū jeē cásoō gā de modo jeē cahán ley jenahán, tú na vé nihín de nuū yā jeē ni sócō yā máá yá. <sup>11</sup>Te sutū cu-jéhnu ga, ná ni socō de niñi tācá quiti ĩni cuarto ĩi gā jeē siquí cuēchi, te yiquí cúñu tī ni cajehmu de ichi yátá űuu. <sup>12</sup>Te suni súcuan ni ndoho máá Jesús

ichi yátá ñuu, návāha jíin níñī maá yá te sándoo ya ñayuu. <sup>13</sup> Núu súcuan te ma cóo inuú gá ni yō jíin ñáyuu tu cácandíje, chi nájnūhun quihīn yō jíin yá ichi yátá ñuu, te na ndóho yó jíin yá jeē sácata i. <sup>14</sup> Chi ñayīvi yáha tu íyó ñuu nuū coo yó níf cáni, chi sa cánducú yó máá ñuu nuū cóyūcu yó quivī quíji. <sup>15</sup> Núu súcuan te jeē jíin Jesucristo te níni na cáhán yō jeē yóhoyo cújéhu Yaā Dios, chi suu cúu nájnūhun iin jeē socó yō nuū yā, suu jeē nácuatáhú yó nuū yā. <sup>16</sup> Te ma náā ni rō sáha vāha ró núū jnáhan ró, te cuāha ró jéē cúmanī nuū i. Chi nájnūhun iin jeē cáscō rō nuū Yaā Dios cúu táca jéē yáha, te cúsiñ ni yā jíin.

<sup>17</sup> Te cuandije ró núū tēe cácuu pastor rō, te cuandetū rō nuū de. Chi cándito de róhó jéē quéndōo vāha ánuá rō, chi cájini de jeē cánuú nacuāha de cuenta nuū yā. Te condihvī ni rō sáha vāha ró, návāha cusīñ ni de siquī rō te ma cu-cuúhyá ni de siquī rō. Chi núu tu súcuan te ma cóo jeē vāha jíin ró.

<sup>18</sup> Te cacān tahú rō jehē rī jijnáhan rī. Chi vāha íyó ni anuá rī jeē tú na cuēchi rī. Chi cácuu rī caca yínúhún rī jíin táca jniñu. <sup>19</sup> Te suni cáhán ndahú rī jíin ró jeē cacān tahū ndasí ró jehē maá rī, návāha cuāha ya jnūhun jeē yachī gā cuajeē tucu rī nuū rō.

### Bendición jíin saludo jeē sándāhí

<sup>20</sup> Te máá Yaā jeē jéhe jnūhun ndeyí sñī ni nuū yō, ni nastécu yā Jitoho yō Jesucristo méhñu ndíyi. Te Jesús cúu pastor cújéhu jeē ndíto ñayuu cácuu nájnūhun lanchi ya. Chi jíin níñī yā ni sácutu yá contrato jeé yá jeē coo níf cáni. <sup>21</sup> Te ñúhun ni rī jeē Yaā Dios na sáha ya jeē ije ni rō jijnáhan ró, návāha cuu sáha ró táca jniñu vāha ndese nújnahan ni yā. Te ñúhun ni rī jeē jíin fuerza Jesucristo jeē ndeé yá ini yō, na sáha Yaā Dios jeē cuu yó ñáyuu cúsiñ ni yā jíin. Te na cáhán yō jeē yóhoyo luu cújéhu ya níf cáni. Amén.

<sup>22</sup> Hermano jijnáhan ró, cáhán ndahú rī jíin ró jeē cone cáhnu ni rō jeē stihví ni rī rohó jíin jecu-ni jnūhun ni tee rī nuū carta yáha. <sup>23</sup> Te cástūhun rī jeē hermano yō Timoteo, je ni quenda de vecā. Te núu yachī quiji de yāhá, te cuajecoo ndindúú rī nuū rō coto jnáhan yó.

<sup>24</sup> Te cahān rō jíin táca tēe cácuu pastor rō jíin táca hermano cácandíje jeē sándeyí ni de, áchí rī. Te ñayuu Italia suni cácahān i jeē sándeyí ni rō.

<sup>25</sup> Te ñúhun ni rī jeē na sáha ga Yaā Dios jeē vāha róhó jijnáhan ró. Súcuan na cóo. Amén.

## CARTA JEE NI TEE SANTIAGO NUU ÑAYUU CACANDIJE

**1** Máá rí cúu Santiago, mozo Yaā Dios jíin Jítóho yō Jesucristo. Te tée ri carta yáha cuájeē nuū rohó ñayuu cá-candíje jeē cácuu ró ndihúxí uū yucūn Israel, te ni cajitē núu ró níí ñáyiví. Sándeyí ni rō jijnáhan ró.

### Yaā Dios sáha jeē jécūhun ni yō

<sup>2</sup>Ñānī mánī, na cúsiī ndasí ni rō jijnáhan ró núu quiji tijni tāca jnūndóho siquī rō. <sup>3</sup>Chi cájini rō jeē núu jíto ndee jnūndóho rōhó núu cá-candíje vāha ró, te yūcuan sáha jeē cútūhva ró cuándeyí ni rō. <sup>4</sup>Te na cuándeyí ni rō nde ije vāha ró jíin, návāha cuu sáha ró ndihi jniñu vāha, te ma cúmanī jeē squícu vāha ró núu yā.

<sup>5</sup>Te núu ndé iin ró cúmanī jecūhun ni rō caca ndíchí ró jíin jnúhun Yaā Dios, na cácan rō nuū yā, te sáha ya jeē jécūhun ni rō. Chi sáha ya ndihi jeē cájicān ñayuu, te tu cúxeēn yā nuū i jeē jicán i. <sup>6</sup>Te jeē jicán rō, te cánuú candíje ró jéē sáha ya jeē jicán rō, te ma cáni siquí ni rō. Chi ñayuu jéni siquí ni, cúu i nájnūhun ndute mar jeē ndóna jísó cóyo cuahān cháha chúcuan sáha tachī. <sup>7</sup>Ñayuu ún ma cáni ni i jeē sáha Jitoho yō jeē jicán i. <sup>8</sup>Chi ñayuu jeē jéni iin jéni uū ni, chí mánī násāma ni i jíin tāca jniñu cásāha i.

<sup>9</sup>Tācá hermano ndahú, na cúsiī ni de jeē sáha Yaā Dios jeē kujénu de. <sup>10</sup>Te hermano cucá, na cúsiī ni de núu ni ndundáhú de. Chi tāca tée cucá, yachī naa jeē cucá de, nájnūhun nāā ita yucū. <sup>11</sup>Chi núu ni cane niāndii te cújihní, te íchí-ni yucū, te cóyo-ni ita, te nāā-ni jeē lúu cáa. Te suni súcuan ndoho tāca tée cucá níni sá jícu de jíin jniñu de.

### Siquī jeē jíto ndee jnūndóho yóhó

<sup>12</sup>Yōhoyo ndetū tēe jeē jéndeyí ni de núu jíto ndee jnūndóho de. Chi núu je ni cundeyí de jíin, te nihin de premio jeē kujénu de cotecu de níí cáni. Chi súcuan ni jejnūhun Yaā Dios jeē cuáha ya nuū ñayuu jeē maní jíin yá. <sup>13</sup>Núu iin ñayuu jicán ini i jeē sáha i cuēchi, te ma cáni ni i jeē nuū Yaā Dios vēji jeē jicán sáha i cuēchi. Chi ni iin ma cúu cuiti sáha jeē quívi Yaā Dios cuēchi, te ni máá yá tu squívi ya ni iin ñayuu nuū cuēchi. <sup>14</sup>Chi sa suhva jeē ndíyo néé ni maá i, suu sáha jeē jicán ini i sáha i cuēchi, te scānda ini i chí stáhú un i. <sup>15</sup>Te jeē ndíyo néé ni i, yūcuan quéjéé cuēchi. Te cuēchi ún, núu je ni cunihin, te sáha jeē jnahnú ndetū ñayuu. <sup>16</sup>Núu súcuan te ma stívi ró cani ni rō jijnáhan ró, ñānī mánī.

<sup>17</sup>Tāca jéē cútahū yō jeē vāha jeē lúu íyó, chí vēji nde andiví núu maá Yaā Dios, Yaā ni sáha tāca jéē ndíndēe iin andiví. Te máá yá tu násāma cuiti ini yā nájnūhun násāma nduva jíin cuándahū. <sup>18</sup>Te ni sáha ya jeē cótecu yō níí cáni, chí ni candíje yó jnúhun ndaā yā. Te ni nduu yó nájnūhun sēhe nuú yá nuū tāca gá sēhe ya jeē quíji, chí súcuan ni nujnahān ni yā sáha ya.

### Siquī ndese chiñúhún ndáā yō yā

<sup>19</sup>Núu súcuan te tāca rōhó ñānī mánī, ñāma na chúsóhó ró jnūhun ya, te sa suhva ma cahán yachī rō, ni ma quití yachī ni rō. <sup>20</sup>Chi ñayuu cáquití ni, tu sáha i jniñu ndaā jeē cuní Yaā Dios. <sup>21</sup>Núu súcuan te na siáá rō tācá jniñu jnéhén jíin jniñu néé jéē ni cáyā jíin ró. Te na cóo vitá ni rō te cuatáhú ró jnūhun ya jeē ni quívi ini anuá rō. Chi jnūhun un ndíso poder jeē cācu ánuá rō.

<sup>22</sup>Te na squícu ró jéē steén jnūhun ún, te nasūu máá jéē cúni sōho ró súcuan-ni, chí núu súcuan te cástáhú ró maá ró, chí tu níhin jniñu núu tu squícu ró. <sup>23</sup>Chi



tēe jeē jīni sōho de jñuhun ya súcuan-ni, te tu squícu de, cúu de nájñuhun ñin tēe jeē jító de nuū espejo ndese cáa nuū de. <sup>24</sup>Te jító vāha de nuū de, te cuahān-ni de, te nāā ni de ndese cáa nuū de. <sup>25</sup>Te núu ñin tēe tu nāā ni de jñuhun jīni sōho de, chi sa suhva chúhun vāha ni de jeē cahān ma ley ndaā Jesús jeē ni sāha libre yohó, te núu cuiñi ñihin de jín, te squícu de jeē ndácu, yūcuán na te quéndōo ndetū de jín jñiñu vāha jeē sāha de.

<sup>26</sup>Te núu ndé ñin ró jéni ni rō jeē chiñúhún vāha ró Yaā Dios, te núu tu ndító ró yáá ró, núu súcuan te stáhú ró maá ró, te tu ndé jéjñiñu jeē chiñúhún ró yā. <sup>27</sup>Ñayuu jeē chiñúhún ndoo chiñúhún ndaā i máá Tátá yō Yaā Dios, chi jñiñu yāha sāha i: Chíndéé ñáhán i sūchi ní caquendōo ndáhú jín ñahan ní caquendōo ndáhú, núu na-ni jñundóho íyó. Te tu sájñéhén i ánuá i jín jñiñu néé íyó ñáyiví.

### Ma cūhichi ni yō coto yó ñayuu ndahú

**2** Ñāni mání, cá candíje ró Jítóho yō Jesucristo jeē cujéñu luu ya. Núu súcuan te ma sāha ró cuenta ndese cúu ñin ñin ñayuu, chi ñnuú sāha ró jín ndihi i. <sup>2</sup>Chi íyó jínu quívi ñin tēe ini vehe nuū cándutútú ró, te yñhi xehyu oro ndaha de, te ññuhun de sahma vāha. Te suni íyó jínu quívi ñin tēe ndáhú, te ññuhun de sahma tahndé. <sup>3</sup>Te tú vāha núu sāha yñúhún ró jín tēe ññuhun sahma vāha, te cahān rō jín de: Cucōo ní lugar vāha yāhá. Te cahān rō jín tēe ndáhú: Yūcuán cuiñi ní, chí yāha cucōo ní nuū ññuhun, achi rō. <sup>4</sup>Chi núu cāsáha ró súcuan, te tu jéni vāha ni rō siquī jñahan ró, chi sñin sāha ró jín tēe cúcá jín tēe ndáhú.

<sup>5</sup>Ñāni mání, chusóhó ró jñuhun cáhán rī: Yaā Dios ni nacāji ya ñayuu ndahú ini ñáyiví yāha jéé cóo cúcá i jín jñuhun cá-candíje i ya, te ñihin i tahū i ñuu nuū ndácu ya jñiñu. Chi ni jejnñuhun ya cuāha

ya un núu ñáyuu jeē maní jín yá. <sup>6</sup>Te máá ró chi sa suhva cájēhe ró jñuhun canu ñayuu ndahú. ¿Te á násūu tēe cúcá cúu jeē castáhú rōhó síquī jeē ñihin de xūhun ró, te yachī jéquin de cuēchi siquī rō nuū tohó? <sup>7</sup>Te suni cácahān neé de siquī Cristo, te suu sñhví máá yá cúu jeē cánaní ró cristiano.

<sup>8</sup>Vāha cāsáha ró te núu cásquícu ndíje ró máá jñuhun jéñu ga jeē cahān ley, nájñuhun yósó núu tútu i: Cundáhú ni rō jñahan ró nájñuhun cundáhú ni rō maá ró, achi. <sup>9</sup>Te núu sñin sāha ró jín ñayuu cucá jín ñayuu ndahú, núu súcuan te cuēchi cāsáha ró, te jécondee cuēchi siquī rō jeē stívi ró ley Yaā Dios. <sup>10</sup>Chi núu ñin ñayuu stívi i ñin-ni jñiñu ndácu ley, te vēsú na squícu i ndihi ga, te nájñuhun ni stívi i ndihi ley, te ndihi un jécondee cuēchi siquī i. <sup>11</sup>Chi Yaā jeē ni cáhān jeē ma cósíquī ndéé jñahan ró, suni ni cahān yā jeē ma cáhni rō ndíyi. Te vēsú tu ní cásíquī ndéé jñahan ró, te núu ni jehni rō ndíyi, núu súcuan te je ni stívi ndihi ró ley. <sup>12</sup>Te tāca jéé cahān rō jín jéé sāha ró, chi sāha ró cuenta jeē sándaā yā ndihi un jín máá ley Jesús jeē ni sāha libre rohó. <sup>13</sup>Chi quiví sándaā yā jñiñu, te ñayuu jeē tu ní cundáhú ni jñahan, suni ma ñihin i jñuhun cundáhú ni. Te ñayuu ni cundáhú ni jñahan, cusñi ni i jeē ní ndahva yā cuēchi i máá quívi sándaā yā jñiñu.

### Tu jéjñiñu jeē candíje yó núu tu squícu yó

<sup>14</sup>Ñāni mání, núu cáhán ñin tēe jeē candíje de jeē sāha ya jehē de, te núu tu sāha de jñiñu vāha, ¿te ndé jéjñiñu jeē candíje de ún? ¿A cuu cācu ánuá de jín jéé cahān-ni de jeē candíje de, te núu tu sāha de jñiñu vāha? <sup>15</sup>Te núu ñin hermano yō chí hermana yō, cúmani sahma i jín jéé cāji i tāca quívi, <sup>16</sup>te núu ñin ró cáhán jín i: Cuandeyí ni rō, te cusúcun vāha ró te caji vāha ró, achi rō jín i, te

núu tu ní jéhe ro jéé jíni ñúhún i cotecu i, ¿te ndé jéjníñu jeé cahán rō súcuan? <sup>17</sup> Te suni súcuan cúu jeé núu áchí ró jeé candíje ró jeé sáha ya jehē rō, te núu tu sáha ró jniñu váha, núu súcuan te tu ndé jéjníñu cuiti jeé cahán-ni ró jéé candíje ró.

<sup>18</sup> Te sanaa te cahán ñin ñayuu: Róhó chi cándíje ró jéé sáha ya jehē rō, te ruhū chi sáha ri jniñu váha. ¿Na jíin stéén rō jeé candíje ró jeé sáha ya jehē rō, te núu tú na jniñu váha sáha ró? Te ruhū chi sáha ri jniñu váha te súcuan stéén rī jeé candíje ri jeé sáha ya jehē rī. <sup>19</sup> Ndaā chi cándíje ró jeé iyó ñin-ni Yaā Dios. Te va íyó váha núu súcuan. Te tachī chi suni súcuan cáncandíje, te cáquísí i jeé cáyūhú, chi tu cásáha jniñu váha. <sup>20</sup> ¿Te naun tu jécūhun ni rō? ¿A tu jíin rō jeé núu tu sáha ró jniñu váha, te tu ndé jéjníñu cuiti jeé cahán rō jeé candíje ró? <sup>21</sup> Te jíi yō Abraham, ni ndahva yā cuēchi de siquī jeé ni sáha de jniñu váha. Chi ni jetáhú de jeé ni cáhān yā jeé cahni de sēhe de Isaac socō de i nuū altar. <sup>22</sup> Te jécūhun ni rō jeé siquī jeé ní candíje de jeé sáha ya jeé ni jéjñūhun ya nuū de, jeé yúcuan ní jetáhú de jeé ni cáhān yā jeé socó de sēhe de. Te jeé ní jetáhú de, suu ni stéén jeé candíje ndije de jeé sáha ya jeé ni jéjñūhun ya nuū de. <sup>23</sup> Te súcuan ni cundaā jñūhun cáhān tutu ii: Abraham ni candíje de jeé ni jéjñūhun ya nuū de, te jeé yúcuan ní ndahva yā cuēchi de, áchí tutu. Te ni conaní de amigo Yaā Dios.

<sup>24</sup> Núu súcuan te je ni cajini rō jeé ndahva Yaā Dios cuēchi ñayuu jeé casáha i jniñu váha siquī jeé cáncandíje i jeé sáha ya jehē i, te nasūu máá jéé cahán-ni i jeé candíje i. <sup>25</sup> Te suni súcuan Rahab, vēsú ñahan tǽjni ni ni cuu ña xihna gā, te ni ndahva yā cuēchi ña siquī jeé ni sáha ña jniñu váha. Chi ni jéhe núu ña vehe nuū tāca mozo ni tají Josué, te ni chuhichí ña de inga ichi, návāha cācu de nuū tée cánducú cahni de. Te jeé yúcuan

ní ndahva Yaā Dios cuēchi ña. <sup>26</sup> Te ñin ñayuu núu tuá anuá i nuū yiqui cúñu i, te ndīyi cúu i. Te suni súcuan núu cándíje yó jeé sáha ya jehē yō, te núu tu sáha yó jniñu váha, te nájnūhun ndīyi cúu yó.

### Jñūhun siquī yaá yó

**3** Nāni mánī, ma cáni ni cuehē rō cuu ró maestro steén jñūhun ya. Chi cájini rō jeé yóhó jéé steén jñūhun, cuehē gā cuēchi ndenehen ya siquī yō. <sup>2</sup> Chi ndīhi yó stívi cuehē jniñu. Te núu ñin tēe cuu condito de yáá de jeé ma stívi de jíin ni ñin jeé cahán de, núu súcuan te yōhyo váha tēe cúu de, te suni cuu condito de níí gá de jeé ma stívi de. <sup>3</sup> Chi cúu nájnūhun jeé chíhi yó freno yuhu caballo, te súcuan snáhnú yō níí tǽ jeé quihín tǽ jíin yó ndé nuū cuní yō. <sup>4</sup> Te suni súcuan tāca barco, vēsú náhnu ndasí, te vēsú nihin chúndahá táchī, te jíin ñin timón lulí-ni te cuu scuícó tēe scáca, te quihín de jíin ndé nuū cuní de. <sup>5</sup> Te suni súcuan cúu yáá yó, chi vēsú lulí-ni, te cuehē teyí sáha yó jíin. Te suni jíin yō jeé ñin ñūhūn lulí cuu jniñ jeé cayú ñin yucu cáhnu ndasí. <sup>6</sup> Te suni súcuan yáá yó, chi sáha nájnūhun ñin ñūhūn, chi scuíquín cuehē teyí jniñu néé. Te yáá yó cúu ñin parte lulí yiqui cúñu yō, te sáha jeé quívi níí yó cuēchi. Te infierno cúu jeé scuíquín jñūhun néé jíin yáá yó, te yáá yó scuíquín cuehē jniñu néé níí tiempo jeé iyó yó ñin ñayiví. <sup>7</sup> Te ñayuu chi cuu snáhnú i tāca quiti jíin saa jíin cóo jíin quiti ñūhūn nuū mar, te je ni snáhnú i cuehē tǽ. <sup>8</sup> Te ni ñin ñayuu ma cúu condito i yáá i. Chi ñin jeé neé jéé ma cúu condito i cúu. Te nájnūhun yuhu cóo jeé ñūhūn chitú veneno jeé jéhni, súcuan cúu yáá yó. <sup>9</sup> Jíin yáá yó chíñūhún yó Tatá yō Yaā Dios, te suni jíin yáá yó cahán ndevāha yo síquī ñayuu jeé ni sáha ya ánuá i nájnūhun íyó máá yá. <sup>10</sup> ñin-ni yuhu cáne jñūhun chíñūhún yó yá jíin jñūhun cáhān ndevāha yó. Nāni

máni, tu íyó váha cuiṭi jeē súcuan. <sup>11</sup> ¿A ñin-ni tesōcó cáne ndute váha jíin ndute úvuá, chí naún? <sup>12</sup> Nání máni, ¿á cuu cuun ndehē oliva xiní yújnu higo, te á cuu cuun ndehē higo xiní yoyúcú uva, chí naún? Te suni súcuan ñin tesōcó ma cúu cane ndute úhvuá jíin ndute váha.

### Jnūhun ndíchí jéē véji nuū Yaā Dios

<sup>13</sup> Te núu ndé ñin ró ndíchí te jécūhun váha ni, núu súcuan te jíin jéē jíca ndaā rō steén rō jeē súcuan cúu ró. Te na cóo suchí ni rō modo jeē jéhe jnūhun ndíchí yá. <sup>14</sup> Te núu cácuéúsún teyí ni rō te ndúcú ró jéē cujéhnu máá ró, núu súcuan te ma cutéyí ró cani ni rō jeē ndíchí ró. Chi suu cúu jeē stahú ró, te cúu ró contra siquī jnūhun ndaā. <sup>15</sup> Chi ñayuu cándāa súcuan, nasūu núu Yaā Dios véji jeē ndíchí i. Chi cuenta ñayīvi, jíin cuenta anuá neé ñayuu, jíin cuenta maá jéxeén cúu. <sup>16</sup> Chi nuū íyó ñayuu cucuésún ni jíin ñayuu nducú jéē cujéhnu máá, suni yūcuan íyó jnūhun sáca núu jíin táca jniñu neé. <sup>17</sup> Te jnūhun ndíchí jeē véji nuū Yaā Dios, núu ni sáha jeē ní ndundíchí ñayuu, yūcuán na te íyó ndoo ánuá i. Te suni yúcu maní i jíin jnáhan i, te vitá ni i, te tú ñihni ni i. Te cúndáhú ni i jnáhan i, te sáha i jniñu váha. Te suni íyó ndāā i, te tu stáhú i. <sup>18</sup> Te ñayuu cáyūcu máni jíin jnáhan, jíin jnūhun maní casáha i táca jniñu ndaā, te nanihin i jeē quéndōo ndaā i.

### Jeē ma cutóó ni yō jeē íyó ini ñayīví

**4** ¿Te ndese quejéé jéē cájejnáhan ró jíin jéē cátejnáhan ró? Quejéé siquī jeē cándiyo neé ni rō, te yōhyo scánda ini anuá rō. <sup>2</sup> Chi cándiyo ni rō, te tu cáneváha ró, te suu sáha jeē cájehni rō ndīyi. Cándiyo ni rō jeē névāha jnáhan ró, te tu níhín rō, te suu sáha jeē cátejnáhan ró te cájejnáhan ró. Te tu cánihin rō jeē cuní rō, chi tu cájicān rō nuū Yaā Dios. <sup>3</sup> Te núu cájicān rō, te tu cáni-

hin rō, chi tu cájicān vāha ró, chi máni jeē cusī ni maá ró cúu jeē cájicān rō nuū yā. <sup>4</sup> Ñayuu castóo Yaā Dios cácuu ró. ¿A tu cájini rō jeē núu cutóó ni rō jeē íyó ini ñayīví, yūcuan cúu jeē cájito uhū rō Yaā Dios? Chi ñayuu jeē cutóó ni jeē íyó ñayīví, ndúu i ñayuu jíto uhū nuū Yaā Dios. <sup>5</sup> Te tu cáhán saá-ni jnūhun yáha jéē yosó núu tútu ii: Máá Espíritu jeē ni jéhe Yaā Dios jeē ndeé ini yō, cúcuñí ni yā jeē súcuan casáha yó, chi maní yā jíin yó, achí. <sup>6</sup> Te jeē váha ni Yaā Dios, te jéhe ya fuerza ini yō jeē ma sáha yó súcuan. Chi cáhán tutu ii: Yaā Dios jési yā nuū ñayuu casáha téyí máá, te váha ni yā chindéé ñáhán yá ñayuu casáha suchí máá, áchí. <sup>7</sup> Núu súcuan te cuandetū rō nuū Yaā Dios. Te cuiñí ñihin ró jéē ma cuátáhú ró jexeén, te cunu coto róhó jíjnáhan ró. <sup>8</sup> Maní gā coo ró jíin Yaā Dios, te víhyá gā steén yā jeē maní yā jíin ró. Róhó jéē casáha cuéchi, na sándoo ró máá ró, stóo ró cuéchi. Te róhó jéē cácuñi rō coo maní rō jíin Yaā Dios níni jéē cácuñi rō cutóó ni rō jeē íyó ini ñayīví, na sándoo ró ánuá rō jeē tuá coo ró súcuan. <sup>9</sup> Na jnáhuhū ni rō, te cucuñhyá ni rō, te na ndáhyú rō siquī jeē íyó cuéchi ró. Te vēsú ni cajecū rō, te vijna na ndáhyú cohó ró. Te vēsú ni cacusiñ ni rō, te vijna na ndúcuñhyá ni rō. <sup>10</sup> Na sásuchí ró maá ró nuū Yaā Dios, te sájéhnu ya rohó.

### Ma cóndihví ni yō siquī cuéchi jnáhan yó

<sup>11</sup> Hermano jíjnáhan ró, ma cahán neé ró siquī jnáhan ró. Chi tēe jeē cahán neé siquī jnáhan, chí jéē ndihví ni siquī cuéchi jnáhan, nájnūhun jeē siquī ley yā cahán neé de, chi tu squícu de ley jeē cundáhú ni yō jnáhan yó, te nájnūhun cáhán de jeē tu íyó ndāā ley yā. Te núu cáhán rō jeē tu íyó ndāā ley yā, núu súcuan te nasūu jéē squícu ró, chí sa jeē cahán rō siquī. <sup>12</sup> Íyó ñin-ni Yaā jeē ni

jehe ley, te máá-ni ya cúu jeē sándaā siquī cuéchi. Te jnama ya ñayuu cácan-díje te snáhnú ndetū yā ñayuu tu cácan-díje. Núu súcuan ¿te na jniñu ndíso ró jéē sándaā ró siquī jnáhan ró?

### Tú vāha jeē satéyí yó maá yó

<sup>13</sup>Vijna te cáhán rī jín róhó jéē cácahān: Vijna chí sájnē te quihñ yō ñuu yúcuán, te coyūcu yó ñin cuiyā, te cuaan yó xíco yó, te nihñ yō siquī, achí ró. <sup>14</sup>Te tu jíní cuití ró ndese coo sajnē. ¿Chi na vé va vhlí cúu vida rō? Cúu nájnūhun ñin vicō nūhún jéē ñin núnúu-ni núcūhun, te yūcuán na te ndéchi-ni cuahān. <sup>15</sup>Chi sa vāha ga na cáhán rō: Núu cúní maá Jítoho yō te cotecu yō te sáha yó jéē yáha chí jéē yúcuán, achi rō. <sup>16</sup>Te sa suhva máni cácutéyí ni rō cácahān rō. Te tú vāha jeē súcuan cácutéyí ni rō. <sup>17</sup>Te núu ñin ñayuu jíní i sáha i jniñu vāha, te núu tu sáha i, te cuéchi cúu núu súcuan.

### Jnūhun cáhán nuū tēe cúcá

**5** Te cáhán rī jín táca róhó tēe cúcá, jéē na ndáhyú ró te ndahyū cohó ró siquī jnūndóho jeē quíji nuū rō. <sup>2</sup>Chi ndajññu cúcá cánevāha ró, je téhyú. Te sahna vāha ró, je tēe tiquixín. <sup>3</sup>Te oro jín plata cánevāha ró, chi je cáne xehyu. Te xehyu un stéén jeē ní casáha ró jniñu stáhú jín xūhun ró. Te yúcuán cúu jeē ndúnihñ cuéchi siquī rō, nájnūhun ñin ñuhūn jeē snáā yiqui cúñu rō. Chi ni cacaya cuehē rō ndajññu vāha quiví cuándihí yáha. <sup>4</sup>Te táca tēe ni cajehnde trigo rō, tu ní cáchunaa vāha ró yáhu de. Te vijna cácana jee de nuū Yaā Dios, Yaā cúu Jítoho nuū táca ndajéhé andiví, jeē súcuan ni casáha ró. Te jíní sōho ya jeē cácana jee tēe ni cajehnde ún. <sup>5</sup>Cátecú vāha ndasí ró ini ñayiví yáha, te casáha ró táca jéē cácusñ ni maá ró. Te cájito yúcún ró maá ró, te cúu ró nájnūhun quití néñu jeē ndétu quiví cúu. <sup>6</sup>Te ni catee ró cuéchi siquī ñayuu ndaā, te nde

ni cajehni ró i. Te tu ní cúu casi i jeē casáha ró.

### Jeē na cóo paciencia ni yō te cacān tahu yō

<sup>7</sup>Hermano, núu súcuan te coo paciencia ni rō condetu ró ndé quiví ndíji máá Jítoho yō. Tēe sájniñu ñuhun, cánuú coo paciencia ni de condetu de nde quiji saū néhen jín saū néñu isa, te sáá te nihñ de nuni vāha jeē jehe itu. <sup>8</sup>Te suni súcuan coo paciencia ni rō, te ndeyí coo ni rō condetu ró, chi cuacuyajni ndee maá Jítoho yō. <sup>9</sup>Te ma cáhán sōo ró siquī jeē sáha jnáhan ró, hermano, návāha ma jécondée cuéchi siquī rō. Chi máá Yaā jeē sándaā cuéchi, je yajni ndiji ya. <sup>10</sup>Ñāni máni, conahan ró jijnáhan ró ndese ni casáha tēe ni canacani jnūhun máá Jítoho yō nde jenahán, chi ni cacuu de ñin ejemplo nuū yō. Chi vēsú ni candoho de, te ni iyo paciencia ni de. <sup>11</sup>Te cáhán yō jeē ñayuu cájendeyí ni jín jnūndóho, ndetū cúu i sáha Yaā Dios. Chi ni cajini ró jnūhun ndese ni jendeyí ni Job jín jnūndóho, te suni cájini ró jeē yóhoyo vāha ga ni quendōo de ni sáha máá Jítoho yō ná ni yáha jnūndóho. Chi yóhoyo cúndáhú ni yā yohó, te vāha ndasí ni yā jín yó.

<sup>12</sup>Ñāni máni, jeē cánuú gá cúu jeē ma cáhán cáha ró sihví Yaā Dios jín jnūhun cácahān teyí ró. Ma cáhán rō verdad de Dios, Yaā ndeé andiví, ni ma cáhán rō verdad de Dios, Yaā chíí ñayiví, te ni ñin ga jnūhun súcuan ma cáhán teyí ró. Chi núu cáhán rō jeē cuu, te súcuan-ni cáhán rō. Te núu cáhán rō jeē tuú, te súcuan-ni cáhán rō, ma scāa gā rō cáhán rō, návāha ma ndénehen Yaā Dios cuéchi siquī rō.

<sup>13</sup>Te núu íyó ñin ró jéē ndóho jnūndóho, te na cácan tahu rō. Te núu íyó ñin ró jéē cúsiñ ni, te na cáta ró yaa jeē chíñuhún ró yá. <sup>14</sup>Te núu íyó ñin ró jéē huhú, te na cána ró tēe jéñnu cándito ñayuu cácan-díje. Te na cácan tahu

de jehē ñayuu cuhú. Te jíin sǎhví máá Jítoho yō na chíhi de aceite i. <sup>15</sup> Te núu cá-candíje de jeē sáha Jitoho yō jeē cájicān tahú de, yūcuán na te jnama ya ñayuu cuhú. Chi nasávāha ya i, te núu ni sáha i cuēchi, te cone cáhnu ni yā nuū i. <sup>16</sup> Núu súcuan te nacani ndaā rō cuēchi ró núu jnáhan ró, te cacān tahú rō jehē jnáhan ró návāha nduvāha ró jíjnéhan ró. Chi núu iin tēe ndaā ndǎhví ni de jíicán tahú de, te yōhyo vāha níhín jníñu, chi sáha ya jeē jíicán de. <sup>17</sup> Chi Elías, tēe ni nacani jnúhun Yaā Dios jenahán, suni iin tēe jeē

nájnúhun íyó máá yó ni cuu de. Te ni jíicān tahú ndasí de jeē ma cúun saū, te tu ní cúun saū uní cuiyā iñū yoō. <sup>18</sup> Yūcuán na te ni jíicān tahú tucu de, te ni cuun saū, te ni canecoo tucu tāca jēē jéhe ñuhun.

<sup>19</sup> Nání mání, núu iin ró ni stóo ichi ndaā, te núu inga rō nachuhichí ró jnáhan ró, <sup>20</sup> núu súcuan te cuni rō jeē núu ni nachuhichí ró tēe ni quívi cuēchi, te je ni jnama ró de jeē jnahmú ndetū de núu, te súcuan íyó jnúhun cáhnu ni nuū cuehē cuēchi de.

**CARTA HN JEE NI TEE  
SAN PEDRO APOSTOL  
NUU ÑAYUU CACANDIJE**

**1** Máá rí cúu Pedro, apóstol jeē ní tají Jesucristo, te tée ri carta yáha cuájeē nuū rohó ñáyuu ní cajitē núu, te cáyücu jíca ró níf Ponto, Galacia, Capadocia, Asia, jíin Bitinia. <sup>2</sup>Te máá Tátá yō Yaā Dios ni nacāji ya rohó, chi súcuan ni tee ni yā nde ná tu jecōo ñayiví. Te jíin Espiritu Santo ni sáha ya jeē iyó ndoo iyó íi rō cájetáhú ró núu yā, te ni nacate ya anuá rō jíin níñi Jesucristo. Te ñūhun ni rī jeē na cáya gā tāca jéē váha jeē sáha ya rohó, jíin jéē coo ndeyí coo síi ni rō jíinánhan ró.

**Jeē ñūhun ni yō tāca jéē  
váha jeē cóo andiví**

<sup>3</sup>Na cáhán yō jeē yóhoyo cújéhu Yaā Dios, Yaā cúu Tátá máá Jítoho yō Jesucristo. Chi ni cundáhú ndasí ni yā yohó, te ni sáha ya jeē ní nacacu jeé yó, siquí jeē ní natecu Jesucristo mēhñu ndíyi. Te jeē yúcuan níní cáñuhun ni yō tāca jéē váha jeē coo. <sup>4</sup>Chi nihin rō tahū jeē ñūhun váha ini andiví jeē cúu ró jíinánhan ró. Te tahū un má náa cuítí, ni ma tívi cuítí, ni ma ndíhi cuítí. <sup>5</sup>Chi cá-candíje ró jéē sáha Yaā Dios jehē rō, te jeē yúcuan ndíto ya rohó jíin poder yā, návaha jnama ya rohó quíví sándíhi, chi ni sándaā yā jeē súcuan coo.

<sup>6</sup>Jeē yúcuan cácusíi ndasí ni rō, vēsú cájito ró cuéhē ndinuū jñundóho jecu-ni quíví. <sup>7</sup>Chi nájnūhun jeē stuhvá ñayuu oro jíin ñūhūn, jíto ndee i núu jeē váha cúu, suni súcuan cánuú coto ndee jñundóho rōhó núu cá-candíje nihin ró chí tuú. Chi jeē cá-candíje nihin ró, chi yahu ndasí gá cúu vēsú oro, ndajniñu jeē náa. Te yúcuan cúu jeē cuajniñún yá rohó, te sájéhu ya rohó, te squéndōo

yíñuhún yá rohó quíví quenda ndijin Jesucristo.

<sup>8</sup>Te vēsú tu ní cájito ró núu yā, te cáhiyo maní ndasí ró jíin yá. Te cá-candíje nihin ró yá vēsú tu cájito ró núu yā vijna. Te yóhoyo luu cácusíi ndasí ni rō, chi nde tuá níhín cuítí yō jñūhun castūhun yó ndese cúsií ni yō. <sup>9</sup>Te nihin tahú rō jeē cácu ánuá rō, chi jeē yúcuan cúu jeē cá-candíje ró.

<sup>10</sup>Te tée ni canacani jñūhun Yaā Dios nde jenahán, ni cananducú yúcún de ni cacajñūhun váha de siquí jñūhun ndese jnama ya yohó. Te ni cacachi de ndese sáha Yaā Dios jeē váha rōhó jíinánhan ró. <sup>11</sup>Chi nde ná tu coo, te ni steén Espiritu Cristo nuū de jíinánhan de ndese quiji jñundóho siquí Cristo jíin ndese luu ndujéhu tucu ya jeē yáha jñundóho ún. Te ni cananducú yúcún de jeē na jécūhun ni de ndé quíví quiji Cristo te ndese coo tāca jéē ni cáhán máá Espiritu jeē ndeé ini de. <sup>12</sup>Te ni steén Yaā Dios nuū de jeē násūu máá de coto jniñu jeē ní canacani de ún, chi sa máá yó cúu jeē cóto. Te vijna je ni cajini sōho máá ró jñūhun ún, chi tāca téé nácani jñūhun jnáma ya yohó, ni canacani de nuū rō, ni sáha poder Espiritu Santo jeē ní quiji ichi andiví. Te jñūhun ún chi nde máá ndajéhé Yaā Dios cánanducú návaha na jécūhun ni.

**Cúní yā jeē coo ndoo ánuá yō**

<sup>13</sup>Jeē yúcuan ndíto na cóo xini rō jíinánhan ró, te cájí coo ni rō. Te cocuhun ndasí ni rō jeē nihín rō tāca jéē váha jeē sáha Yaā Dios rohó quíví quenda ndijin Jesucristo. <sup>14</sup>Te na cúu ró séhe jeē cá-jetáhú váha. Te ma sáha ga rō táca jniñu jeē ní cacusíi ni rō sáha ró nde ná tu jecūhun ni rō jñūhun Yaā Dios. <sup>15</sup>Chi sa suhva na cóo ndoo ánuá rō jíin táca jniñu cásáha ró, chi Yaā ní cana rōhó, Yaā iyó ndoo cúu ya. <sup>16</sup>Chi súcuan cáhán tutu ii:

Na cóo ndoo ró jíjnáhan ró, chi ruhū iyó ndoo ri, achí yá.

<sup>17</sup>Te núu cácahān rō Tatá rō jíin Yaā Dios, núu súcuan te na cáca yínúhún ró nuū yā tāca quívī jéē cájica ró ñayīvi yáha. Chi máá yá sándaā siquī ndese ni casáha iin iin yó, te tu sáha ya cuenta ndese cúu iin iin yó, chi inuú sáha ya jíin ndíhi yó. <sup>18</sup>Chi ni jnama ya rohó núu tācá costumbre jeē ní cajequin jíí rō, jeē ní cajejnīnu cāha ró núu. Te cájini vāha ró jéē yahu cúu jeē ní jnama ya rohó. Chi tu ní chúnāa yā jíin ndajjnīnu jeē nāā, nájnūhun oro jíin plata, <sup>19</sup>chi sa suhva jíin nīnī Cristo jeē yáhu ndasí gá cúu. Chi ni socō yā maá yá nájnūhun iin londe, quítī iyó váha iyó ndoo. <sup>20</sup>Chi jeē yúcuan ní jeni Yaā Dios maá Cristo nde ná tu jecōo ñayīví, te ni cane ndi-jin Cristo maá tiempo cuándíhi yáha, návāha quendōo vāha ánuá rō jíjnáhan ró. <sup>21</sup>Te jeē jíin Cristo te cácandíje ró Yaā Dios. Chi ni sáha Yaā Dios jeē ní natecu yā mēhūu ndíyi jíin jéē ní ndu-jéhu ya. Te jeē yúcuan cácandíje ró Yaā Dios, te cáñuhun ni rō coto ró yá.

<sup>22</sup>Te vijna chi je ni candundoo ánuá rō, chi ni cajetáhú ró jnūhun ndaā ni sáha Espíritu jíin ró, návāha cundáhú ndije ni rō hermano cácandíje. Núu súcuan te na cúndáhú ndasí ni rō jnáhan ró nde jíin ini jíin ánuá rō. <sup>23</sup>Chi je ni canacacu jeé ró, te nasūu chíji yucūn ñayuu jeé cúu. Chi sa jnūhun Yaā Dios jeē ndíto técu níf cáni ni sáha jeē ní nacacu ró. <sup>24</sup>Chi súcuan cáhán tutu ii: Nájnūhun yucū cúu ndíhi tāca ñayuu, chi jecu-ni quívī técu i.

Te nájnūhun ita yucū cúu jeē cujéhu i. Chi íchí-ni yucū, te ndáhvá-ni ita.

<sup>25</sup>Te jnūhun Jitoho yō Yaā Dios, sa quéndōo níf cáni.

Achí tutu. Te jnūhun un cúu máá jnūhun jnáma ya yohó jéē ní canacani ri nuū rō.

**2** Núu súcuan te na siáá rō tācá jniñu néé, tāca jéē stahú, jéē tú ndije,

jeē cucuésún ni, jíin jéē sajnúhún síquī jnáhan. <sup>2</sup>Te nájnūhun sūchi yíquín sá ní cacu jeē jéxin te jéhu, súcuan na cóndihvi ni rō scuáha ró jnūhun ndaā yā, návāha cuehnu ró jíin te cācu ánuá rō. <sup>3</sup>Chi je cájini rō jeē yóhyo vāha ni maá Jítoho yō.

### Cristo cúu nájnūhun yuū yítuu vehe

<sup>4</sup>Núu súcuan te maní gā coo ró jíjnáhan ró jíin Jítoho yō Cristo. Chi cácuu ró nájnūhun templo nuū ndeé Yaā Dios, chi ndeé yá ini anuá rō. Te Cristo cúu nájnūhun iin yuū cánuú gá jeē yítuu yiquī templo, te sáha ya jeē cótecu rō níf cáni. Te ñayuu vēsú ni casquéhichí i ya, te Yaā Dios chi je ni nacāji ya Cristo chí cánuú ndasí yá, nájnūhun nacāji yó iin yuū váha jeē quítuu yiquī vehe. <sup>5</sup>Te máá ró chi cácuu ró nájnūhun iin iin yuū jeē cúvāha templo Yaā Dios, te cotecu rō níf cáni. Te na cuáha ró jnūhun jeē sama ya rohó jíjnáhan ró jéē cúvāha templo yā, cúu jeē ndeé Espíritu yā ini anuá rō nájnūhun ini iin templo. Te suni cúní Yaā Dios jeē cuu ró sūtū cáhiyo ndoo cájejnīñu nuū yā. Chi siquī jeē ni sáha Jesucristo jehē rō, te na sócō rō maá ró jeē cuajjnīnu ró núu yā sáha ró tāca jniñu váha jeē nújnahan ni Yaā Dios. <sup>6</sup>Chi súcuan cáhán tutu ii:

Vijna te nde ñuu ri Sion jéquin rī iin yuū jeé cánuú gá jeē quítuu yiquī vehe, chí ni nacāji ri yā nájnūhun iin yuū váha jeé cánuú téyí.

Te ñayuu jeē candíje i ya, jnama nahín yá i.

Achí Yaā Dios, achí tutu. <sup>7</sup>Te máá ró jeē cácandíje ró, chí yuū váha jeé cánuú téyí cúu ya nuū rō. Te nuū ñayuu tu cácandíje chí tuú, chí sa cúndaā jeē cahán tutu ii:

Máá yúu jeē ní casquéhichí tēe cásama vehe,

suu cúu yuū cánuú gá yítuu yiquī vehe.

<sup>8</sup>Te suni cúndaā jnūhun jeē cahán tutu siquī ñayuu tu cácañdije:

Cúu ya nájnūhun ñin yuū jeē cácachihí i jehē i,

nájnūhun toto jeē cotúú i sáha.

Achí. Chi jeē cácachihí i jehē i cúu jeē casánihni ní i nuū jnúhun ya. Te je ni cundaā jeē jnahnú ndetū i siquī jeē cá-cunihni ní i.

### **Jnūhun ñayuu maá Yaā Dios**

<sup>9</sup>Te maá ró cácuu ñayuu jeē ní nacāji Yaā Dios. Te suni cácuu ró sūtū cáje-jniñu nuū maá Yaā cúu Rey, te ñayuu cáhiyo ndoo, jíin ñayuu maá yá cácuu ró. Súcuan ní sáha Yaā Dios rohó návaha nacani ró jnúhun ndese yōhyo jéhnú jniñu sáha ya, chí maá yá ní cana róhó ná ní coyūcu ró nájnūhun nuū néē. Te ní squívicoo ya rohó núu luz yā jeē yóhyo vāha stéén yā ini anuá rō. <sup>10</sup>Chi nde saá te nasūu ñayuu Yaā Dios cácuu ró, te vijna je ní nduu ró ñayuu maá yá. Te nde saá chí ná tu cundáhú ní yā rohó, te vijna je cúndáhú ní yā rohó jíjnáhan ró.

### **Jeē cuajniñu vāha yó núu Yaā Dios**

<sup>11</sup>Ñáni mání, ini ñayivi yáha cácuu ró nájnūhun ñayuu ñuu jicá jéē cájica cuu tátú. Núu súcuan te cáhán ndahú rí jíin ró jéē ma sáha ró táca jniñu jeē ndíyo néé ní rō jíin modo maá ró. Chí táca un cáje-jnáhan jíin ró, ndúcú jéē jnahnú ndetū anuá rō. <sup>12</sup>Te ndaā na cáca ró méhñu ñayuu tu jíin jnūhun Yaā Dios. Chí vēsú cácahān i siquī rō, nájnūhun cácahān i siquī ñayuu casáha jniñu néé, te núu na cóto i jniñu vāha casáha ró, te quivī sándaā Yaā Dios jniñu te cahān i jeē yóhyo cújéhnú ya.

<sup>13</sup>Jeē siquí maá Jítóho yō te cuatáhú ró nuū táca tóhō cándiso jniñu nuū ñayuu. Cuatáhú ró nuū maá rey, chí tēe cújéhnú ga cúu de. <sup>14</sup>Te cuatáhú ró nuū táca gobernador jeē ní jeni rey návaha stóho de ñayuu casáha jniñu néé te cua-

jnúhún de ñayuu casáha jniñu vāha.

<sup>15</sup>Chí cúiní Yaā Dios jeē sáha ró jniñu vāha, te jeē súcuan sáha ró te táca ñayuu canéé jéē tu cájecūhun ní, casi i yuhu i.

<sup>16</sup>Te na cáca ndaā rō jeē cácuu ró ñayuu ní nduu libre anuá, te nasūu jéē ní nduu libre rō jeē sáha ró jniñu néé. Chí sa cácuu ró mozo Yaā Dios, te cuajniñu vāha ró núu yā. <sup>17</sup>Coo respeto rō nuū táca ñayuu. Cundáhú ní rō hermano cá-candije. Conso iyo ró núu Yaā Dios. Coo yíñúhún ró nuū maá rey.

### **Jeē na ndóho yó jéhē jnáhan yó nájnūhun ní ndoho Cristo**

<sup>18</sup>Róhó jéē cácuu mozo, cuatáhú ró nuū patrón rō, te coo respeto rō nuū de. Te nasūu maá-ni nuū tēe vāha ní jíin tēe vítá ní, chí suni nuū tēe xeēn ní. <sup>19</sup>Chí ñin jeē vāha cúu núu jéndeýí ní ñin tēe jeē stóho cáha ñayuu de siquī jeē squícu de nuū Yaā Dios. <sup>20</sup>Chí núu cástóho i róhó jéē casáha ró cuéchi, te ní ñin ma cuajnúhún róhó núu jéndeýí ní rō jíin jeē ndóho ró. Te núu cástóho i róhó jéē casáha ró jniñu vāha, te núu jéndeýí ní rō jíin, yāha cúu jeē vāha jeē nújnahan ní Yaā Dios. <sup>21</sup>Chí jeē yúcuan cúu jeē ní cana ya rohó jíjnáhan ró. Chí suni maá Cristo ní ndoho ya jeē siquí rō, te súcuan ní cuu ya ñin ejemplo nuū rō jeē na ndóho ró jéhē jnáhan ró, te súcuan condiquín rō ichi ya. <sup>22</sup>Te maá yá tú cuítí na cuéchi ní sáha ya, ní tú cuítí na jnūhun stáhú ní cáhán yā. <sup>23</sup>Ná ní cacahān neé i nuū yā, te tu ní nacahān neé yá. Te ná ní castóho i ya, te tu ní téjnáhan ya jíin i, chí sa ní chihí ya maá yá ndaha Yaā Dios, Yaā sándaā vāha siquí ndihí ún. <sup>24</sup>Te ní condiso maá Cristo cuéchi yó jíin yiquí cúñu yā ná ní jihí yā jicā cruz, návaha quenda yó chíji cuéchi te caca ndaā yō. Chí ní tuji yā, te jeē yúcuan ní canduvāha ánuá rō. <sup>25</sup>Chí ní casana ró nájnūhun lanchi, te vijna je ní candicó ró ní ndívicoo ró núu Cristo,



Yaā cúu pastor rō te ndíto vāha ya anuá rō.

**Ndese cánuú coyūcu  
vāha yii jíin ñasihí**

**3** Suni súcuan rōhó ñasihí jíjnáhan rō, cuatáhú rō nuū yii rō, návāha núu cúu de tēe tu cándíje jnūhun ya, te cuu scándíje rō de, jeē tuá níní jíin jeē cahán rō, chí máá jíin jeē casáha vāha rō. <sup>2</sup> Chi cuni de jeē cájica ndaā rō te cáhiyo respeto rō. <sup>3</sup> Te jeē casáha luu rō máá rō, chí nasūu mání máá ichi síquī rō sáha rō, jeē sáha luu ndasí rō xini rō, chí jeē cúhun rō síquī oro chí sahma vāha ga. <sup>4</sup> Chi sa nducú rō jeē quéndōo luu ánuá rō, te coo luu rō iin modo jeē ma náā cuítí, suu jeē cóo vítá ni rō te coo nahín ni rō. Chí yāha cúu jeē yahu ndasí gá nuū Yaā Dios. <sup>5</sup> Chi ñahan ní cahíyo ndoo ánuá nde jengahán, suni súcuan ni casáha luu ña ánuá ña. Chí ni cañuhun ni ña Yaā Dios, te ni cajetáhú ña nuū yii ña. <sup>6</sup> Te súcuan ni sáha Sara, chí ni jetáhú ña nuū yii ña Abraham, te ni cahán yinūhún ña jíin de. Te rōhó jíjnáhan rō, núu sáha vāha rō te núu ma yūhu rō ni iin, yūcuán na te coo rō nájñuhun ni iyo Sara.

<sup>7</sup> Te suni súcuan rōhó yii, na cóo vítá ni rō jíin ñasihí rō. Te yinūhún coo rō jíin ña, síquī jeē núu ga fuerza ña vēsú rohó, te suni síquī jeē inuú ní canihín tahú rō cotecu rō níf cáni síquī jeē vāha ni Yaā Dios. Te súcuan sáha rō návāha tú casi nuū jnūhun jíicán tahú rō.

**Jnūhun ñayuu cándoho  
síquī jeē cájica ndaā**

<sup>8</sup> Núu súcuan te inuú na cáni ni rō jíjnáhan rō, te cucuíhyá ni rō jeē ndóho jnáhan rō, te cundáhú ni rō i nájñuhun ñani rō. Te na cóo maní rō te caní suchí ni rō. <sup>9</sup> Núu casáha neé ñáyuu jíin rō, te ma nasáha neé rō jíin i. Te núu cácahán neé i nuū rō, te ma nácahán neé rō núu i. Chí sa suhva cacān tahú rō jeē na

quéndōo vāha i. Chí Yaā Dios ni cana ya rohó jeē suni súcuan quéndōo vāha rō. <sup>10</sup> Chí súcuan cáhán tutu ii:

Ñayuu cácuni cotecu vāha te cusí ni tāca quívī,

na cóto i yuhu i jeē ma cáhán neé i, te na cóto i jeē ma cáhán i jnūhun stáhú.

<sup>11</sup> Na cújiyo i nuū jniñu neé, te na sáha i jniñu vāha.

Na nducú i coyūcu mání i, te na cóndihvī ni i jíin.

<sup>12</sup> Chí máá Jítoho yō ndíto ya ñayuu ndaā,

te jíni nahín yá jeē cájicān tahú i.

Te ñayuu casáha jniñu neé, chí tu jétáhú yá i.

Achí tutu.

<sup>13</sup> Te ni iin ma sáha neé jíin rō te núu mání jniñu vāha cándihvī ni rō sáha rō.

<sup>14</sup> Te vēsú núu ndóho rō síquī jeē cájica ndaā rō, te yōhyo ndetū cácuu rō. Núu súcuan te ma yūhu rō coto rō i, ni ma cunee ni rō.

<sup>15</sup> Chí sa jíin ini jíin ánuá rō chiñúhún rō máá Jítoho yō Cristo.

Te níní coo tūhva rō nastíó cuíní víta rō te cahán yinūhún rō jíin ñáyuu jeē castíchí rohó síquī tāca jeē cañuhun ni rō.

<sup>16</sup> Te caca ndaā rō jeē tú na cuēchi condee anuá rō, návāha ñayuu cácahán neé síquī rō, cucanu i jeē ni stáu yāhu i rōhó jeē cájica ndaā rō chí cácañdíje rō Cristo.

<sup>17</sup> Chí núu cúní Yaā Dios te vāha ga jeē ndóho rō síquī jeē casáha rō jniñu vāha vēsú síquī núu sáha rō jniñu neé.

<sup>18</sup> Chí máá Cristo suni ni ndoho ya, te iin jínu-ni ni jihí yā jeē síquī cuéchi ndihí yó. Yaā vāha cúu ya, te ni ndoho ya jehē yohó ñáyuu ní casáha jniñu neé, návāha quívicoo yó núu Yaā Dios sáha ya. Chí ni jihí yiquí cúñu yā, te ánuá yā chí técu-ni níf cáni.

<sup>19</sup> Te ná ni jihí yā te ni jehē anuá yā ni nacani ya jnūhun nuū anuá ñayuu cáyindihyū.

<sup>20</sup> Chí nde jengahán tu ní cájetáhú i, ná ni iyo paciencia ni Yaā Dios te ni condetu ya níní sáha Noé barco jeē naní arca. Te jíin arca un ní

cācu jecu-ni ñayuu, chi unā-ni i ni cācu nuū ndúte. <sup>21</sup>Te nájñuhun ni cacācu i nuū ndúte, súcuan cúu jeē jéndute yó vija te cácu ánuá yō. Te jeē jéndute yó, nasūu jéē ndúndoo yiqui cúñu yō, chi sa jeē jicán yō nuū Yaā Dios jeē ndúndoo ánuá yō. Te súcuan te cācu yó, chi ni cundúu yó jíñ Jesucristo nuū jñuhun ni natecu yā. <sup>22</sup>Te ni ndaa ya cuanuhun yā andiví, te ndéé yá ichi ndávaha Yaā Dios nuū cujéñu ya. Te táca ndajéhé andiví, jíñ jéé cándacu jniñu, jíñ jéé cájñi poder, cájendetū nuū yā.

### Jeē na cuajñiñu yó jíñ táhū jeē ni jéhe ya nuū yō

**4** Núu súcuan te nájñuhun ni ndoho Cristo jehē yō jíñ yiqui cúñu yā, suni súcuan na táva ni maá ró ndoho ró. Chi ñayuu jeē ní ndoho jíñ yiqui cúñu, tuá sáha i cuēchi. <sup>2</sup>Núu súcuan te ní tiempo jeē cuahán gā rō, na sáha ró jniñu jeē cuní Yaā Dios, te ma sáha ga rō jniñu jeē ndíyo neé ni rō jíñ modo maá ró. <sup>3</sup>Chi nde ní véji ró, te ni casáha ró cuéhe cuēchi jeē cánujnahan ni rō siquī jeē tu ní cájini rō jñuhun Yaā Dios. Te tiempo un máni máá jéé neé ni casáha ró, te ni candiyo ni rō táca jéé neé, ni canajini ró, ni casáha ró vico neé, ni cajilhi ndasí ró nuū víco ró, te ni cachiñúhún ró ídolo jeē ni cáhān Yaā Dios jeē ma chíñúhún yó. <sup>4</sup>Te cáacunéé ni i jeē tuá cájica ró jíñ i jeē sáha ró táca cuéchi xeēn jíñ i. Te jeē yúcuan cúu jeē cácahān neé i siquī rō. <sup>5</sup>Te máá i chi iñ quiví te nacuaña i cuenta nuū maá Yaā jeē iyó túhva ya sándaā yā jniñu ñayuu técu jíñ ñayuu ní cajihí. <sup>6</sup>Chi jeē yúcuan suni ni quiji jñuhun vāha ya nuū táca ndíyi ná ni cotecu i. Te ni cundaā siquī cuéchi ni casáha i ñayiví yáha, nájñuhun cundaā siquī ndíhi ñayuu, návaha nacani ni i te cotecu anuá i ní cáni nájñuhun técu Yaā Dios.

<sup>7</sup>Te je cuacuyajni quiví jeē náā táca jéé iyó. Núu súcuan te ndito na cóo xiní rō jijnáhan ró, te condihví ni rō cacān tahú rō. <sup>8</sup>Te jeē cánuu gá cúu jeē cundáhú ndasí ni rō jnáhan ró. Chi núu cundáhú ni yō jnáhan yó, te iyó jñuhun cáhnu ni nuū cuehē cuēchi. <sup>9</sup>Sáha vāha ró jíñ ñayuu jeē jinú i vehe ró, te ma cúxii ni rō. <sup>10</sup>Tāca ró cuajñiñu ró núu jnáhan ró, núu ndese iyó máá táhū rō jeē ni jéhe Yaā Dios jeē cuajñiñu ró núu yā. Te squícu vāha ró jíñ táhū jeē sñin sñin ni jéhe ya nuū iñ iñ ró. <sup>11</sup>Núu tahū jeē nácani ró jñuhun cúu, te na cáhān rō nájñuhun jeē maá Yaā Dios cahán. Te núu tahū jeē chindéé ñahán ró jnáhan ró cúu, te na sáha ró jíñ fuerza jeē ni jéhe ya nuū rō, návaha jíñ ndíhi jeē casáha ró te cahān ñayuu jeē yóhoyo cújéñu Yaā Dios siquī jeē ni sáha ya jíñ Jesucristo. Te na cáhān yō jeē luu cújéñu Cristo te jñí ya poder ní cáni. Amén.

### Jeē ndóho yó siquī jeē candíje yó Cristo

<sup>12</sup>Ñāni máni, núu véji jñúndóho xeēn jeē coto ndee rohó, te ma cunéé ni rō cani ni rō jeē maá ró ni nihin jñúndóho xeēn gā. <sup>13</sup>Chi sa cusihí ni rō jeē cándoho ró jecu jñúndóho jeē ní ndoho Cristo, návaha suni cusihí ndasí ni rō quiví quénda ndijin yā jeē cujéñu luu ya. <sup>14</sup>Te yóhoyo ndetū rō te núu cácahān neé i nuū rō siquī jeē cácandíje ró Cristo. Chi máá Espiritu Yaā Dios jeē cujéñu ndasí, ndéé yá ini rō. Máá i chi cácahān neé i siquī yā, te máá ró chi cachiñúhún ró yā. <sup>15</sup>Te núu ndoho ró, te na ndóho ró siquī jeē cácandíje ró Cristo. Te ma ndóho ró siquī táca cuéchi nájñuhun cándoho ñayuu jéñi ndíyi, ñayuu sacuíñná, ñayuu sáha jniñu neé, jíñ ñayuu quívi nduu nuū jñiñu jnáhan jeē tu cánuu quívi nduu. <sup>16</sup>Te sa núu iñ ró ndóho siquī jeē candíje ró Cristo, te

ma cúcanu rō, chi sa nacuatáhú ró nuū Yaā Dios siquī jeē cúu ró cristiano.

<sup>17</sup> Chi je ni jinū quivī jeē quejéé sándā Yaā Dios cuēchi, te xihna gā ñayuu cácuu sēhe ya sándā yā cuēchi. Te núu xihna gā cuēchi máá yó quejéé yá sándā yā, núu súcuan te xeēn gā coo jeē ndénehen ya cuēchi siquī ñáyuu jeē tu ní jétáhú jnúhun vāha ya. <sup>18</sup> Te núu yōhyo yí cácu ñayuu vāha, núu súcuan ¿te ndese cácu ñayuu casáha jniñu néé jíin táca cuēchi? <sup>19</sup> Núu súcuan te róhó jéé cándoho siquī jeē súcuan cúní Yaā Dios, ma jecuñi rō sáha ró jniñu vāha, te na chíhi ró máá ró ndaha máá Yaā jeē ni sáha róhó, chi squícu ya jeē ni jéjnūhun ya.

### Jeē jéhe de consejo ñayuu cáchandje

**5** Vijna te na cáhán rī jíin táca róhó téé jéhnu cándito ñayuu cáchandje, chi suni téé jéhnu ndíto ñayuu cáchandje cúu máá rí. Te cúu ri testigo jeē ní jito ri ndese ni ndoho Cristo. Te suni ndujéhnu ri jíin ró sáha Cristo quivī quénda ndijin yā. <sup>2</sup> Na cóto yúcún ró ñayuu jeē ndeé jniñu ró condito ró, jeē cácuu i nájñūhun lanchi Yaā Dios. Te na cúsií ni rō condito ró i, chi súcuan cúní Yaā Dios. Te nasūu siquī jeē sáfuerza yā rohó, ni nasūu siquī jeē nihín rō xūhún, chi sa siquī jeē cuní rō cuajniñu ró. <sup>3</sup> Te nasūu jéé ndacu nihín ró jniñu nuū ñáyuu cándito ró, chi sa nducú ró cuu ró iin ejemplo nuū i jeē cácuu i lanchi ya. <sup>4</sup> Yūcuán na te quivī quénda ndijin maá Yaā cúu Pastor kujéhnu nuū rohó téé cácuu pastor lanchi ya, te cuāha ya premio nuū rō jijnáhan ró jéé yóhyo luu te ma náā cuíti.

<sup>5</sup> Te suni róhó táca téé suchí, na cuándetū rō nuū táca téé jéhnu jíiñā. Te ndíhi róhó ñáyuu cáchandje, cuandetū rō nuū jnánhan ró, te cani suchí ni rō. Chi suhva cáhán tutu:

Yaā Dios jési yā nuū ñáyuu casáha téyí máá,

te vāha ni yā chindéé ñáhán yá ñayuu casáha suchí máá.

Achí. <sup>6</sup> Núu súcuan te na cáni suchí ni rō, chi cáyíhi ró ndaha Yaā Dios jeē jniñ poder. Te sájéhnu ya rohó, na jíin máá quivī. <sup>7</sup> Táca jéé cánacani ndasí ni rō siquī, chíhi ró ndaha máá yá te máá yá coto, chi ndíto ya rohó.

<sup>8</sup> Te cájí na cóo xiní rō te ndito coo ni rō. Chi jexeén jeē jito uhū rohó, jíca cuu ndúcú squívi róhó jíjnáhan ró núu cuēchi. Te xeēn gā sáha vésú ndicaha jeē iyo ndáhyú. <sup>9</sup> Te cuiñi nihín ró jéé ma cúndeyí jexeén jíin ró, te nihín cándije ró jnúhun cúndáhú ni yā rohó. Chi cájini rō jeē suni súcuan cándoho hermano rō jeē cáyūcu ní cáhnu ñayiví. <sup>10</sup> Te núu ni jinu jeē ndoho ró jecu-ni tiempo, te Yaā Dios chi sáha ya jeē ije vāha ni rō jíin jnúhun ya, jíin jéé cuiñi nihín ró, te cuāha ya fuerza ini rō, te quendōo cutú ró ní cáni. Chi máá yá cúu jeē sáha táca jéé vāha yóhó, te ni cana ya yohó jéé kujéhnu luu yó jíin yá ní cáni, siquī jeē nduú yó jíin Jesucristo. <sup>11</sup> Te na cáhán yō jeé yóhyo luu cújéhnu ya te jniñ ya poder ní cáni. Amén.

### Saludo jeē sándihí

<sup>12</sup> Jíní rī jeē Silvano cúu iin hermano jeē squícu vāha. Te máá de cuajeé nuū rō jíin carta yáha jéé ní tee ri jecu jnúhun. Te jíin yáha stíhví ni ri rohó, te cáhán ri jíin ró jeē ndaá cúu jeē táca jéé vāha ni sáha Yaā Dios rohó, suu stéén nuū rō jeē cundáhú ndije ni yā rohó. Te na cuiñi nihín ró jíin jnúhun yáha.

<sup>13</sup> Ñayuu cáchandje jeē cáyūcú ñuu Babilonia, jeē ní nacáji ya i nájñūhun ni nacáji ya rohó, cácahán i jeē sándeyí ni rō. Te Marcos, téé cúu nájñūhun sēhe ri, suni súcuan cáhán de. <sup>14</sup> Te núu na cáhán ró jíin jnánhan ró, te techūhu mání rō ndaha i.

Te na cóo ndeyí coo sī ni ndihi ró jēē  
cáyihī ró ndaha Jesucristo. Súcuan na  
cóo. Amén.

## CARTA UU JEE NI TEE SAN PEDRO APOSTOL NUU ÑAYUU CACANDIJE

**1** Máá rí cúu Simón Pedro, te cúu ri mozo Jesucristo, te cúu ri apóstol jeē ní tají yá. Te tée ri carta yáha cuájeē nuū rō jijnáhan rō, jeē ni sáha Yaā Dios jeē inuú-ni jíin rí jijnáhan ri ni canihin rō jnūhun luu váha jeē cácanđije yó yá. Chi Yaā ndaā cúu Yaā Dios, suu máá Jesucristo jeē jnáma yóhó. <sup>2</sup>Te ñūhun ni ri jeē na sáha ga yā jeē váha ndasí róhó jíin jéē yóhoyo coo ndeyí coo siñ ni rō siquí jeē cájécūhun váha ni rō ndese Yaā cúu Yaā Dios jíin Jítóho yō Jesús.

### Siquí ndese cánuú coo ñayuu cácanđije

<sup>3</sup>Te Yaā Dios, jíin poder yā ni jēhe ya nuū yō tāca jéē sáha jeē cúu caca ndaā yō nuū yā jíin jéē chiñúhún váha yó yá. Chi ni steén yā maá yá nuū yō, chi cúu ya Yaā jeē ní cana yóhó, siquí jeē yóhoyo cújéhnu ya jíin táca jniñu jéhnu sáha ya. <sup>4</sup>Jeē yúcuán ní jejnūhun ya tāca jéē yóhoyo jéhnu yóhoyo váha sáha ya yohó, návaha jíin táca ún te nduu ró nájnūhun iyó máá yá, te cācu ró núū jniñu jeē cándiyó néé ni ñayuu casáha i ini ñayívi yáha. <sup>5</sup>Núu súcuán te na ndúcú ndeyí ró jíin jnūhun yáha. Te jeē cácanđije ró, te siquí ún na chísoó ró jeē caca ndaā rō. Te jeē cájica ndaā rō, te siquí ún chísoó ró jeē cóndihvī ni rō jecūhun váha ni rō. <sup>6</sup>Te siquí ún chísoó ró jeē casi rō modo jeē cuní maá ró. Te siquí ún chísoó ró jnūhun cuandeyí ni rō, te siquí ún chísoó ró jeē chiñúhún váha ró Yaā Dios. <sup>7</sup>Te siquí ún chísoó ró jeē cóo maní rō jíin jnáhan ró, te siquí ún chísoó ró jeē cundáhú ni rō jnáhan ró.

<sup>8</sup>Chi núu cayā tācá jniñu yáha jíin ró, te suu sáha jeē ma cótecu saá-ni ró, chi sa quee váha jniñu sáha ró, siquí jeē cá-

jecūhun ni rō ndese Yaā cúu Jítóho yō Jesucristo. <sup>9</sup>Te ñayuu jeē tu casáha jniñu yáha, nájnūhun jeē cáhiyo cuáá i, chi tu jécūhun ni i jnūhun ya, te je ni naa ni i jeē ni sándooyá i tāca cuéchi ni casáha i ichi yátá. <sup>10</sup>Jeē yúcuán na ndúcú ndeyí ró hermano, návaha coo seguro jeē ní cana ya rohó jíin jéē ní nacáji ya rohó. Chi núu sáha ró táca jniñu yáha, te ma cáca yátá cuítí rō. <sup>11</sup>Yúcuán na te nune váha ichi quívi ró ini ñuu máá Jítóho yō Jesucristo, Yaā jnáma yóhó, nuū ndácu ya jniñu níf cáni.

<sup>12</sup>Jeē yúcuán ma jécuiñi rí sáha ri jeē núcūhun ni rō tāca jnūhun yáha, vēsú je cájini rō te cáhiin nihin ró jíin jnūhun ndaā jeē cácanđije ró. <sup>13</sup>Chi jéni ni rí jeē iyó váha stíhvī ni rí rohó vijna técu gā rí, návaha nucūhun ni rō. <sup>14</sup>Chi máá Jítóho yō Jesucristo ni castūhun yá nuū rí jeē tuá cotecu nahán rí ñayívi yáha. <sup>15</sup>Jeē yúcuán na ndúcú ndeyí gá rí stíhvī ni rí rohó, návaha núu je ni jihí rí, te níni nucūhun ni rō tāca jnūhun yáha.

### Jeē ní cajito de jeē cujéhnu Cristo

<sup>16</sup>Ná ni castéén rí jnūhun máá Jítóho yō Jesucristo nuū rō, ndese ndiji ya jíin poder yā, te tu ní cácahān ri ñin cuento-ni jeē ní catava ndichí ñayuu. Chi ná ni cahiyó ri jíin yá xini yúcu, te ni cajito jíin núu rí jeē tucu ni nduu ya jeē ní nduluu jéhnu ya. <sup>17</sup>Chi ni cajini rí jeē Tatá yō Yaā Dios ni cahān yñúhún yá jíin Jesús, te ni sajeñu ya Jesús. Chi ichi ándiví ní quiji jnūhun luu, ni cahān Yaā Dios: Yáha cúu Sēhe ri jeē maní ndasí rí jíin, te cúsiñ ni rí jíin, áchí yá. <sup>18</sup>Te ni cajini sōho ri jnūhun un jéē ni cáhān ichi ándiví, chi ni cahíin ri jíin máá Jítóho yō xini yúcu ii ún.

<sup>19</sup>Te súcuán cájini yō jeē iyó ndaā ndije tāca jnūhun ni catee tēe ni canacani jnūhun ya nde jenahán. Te váha jeē na chúhun ni rō jnūhun un jíjnáhan ró, chi suu cúu nájnūhun ñin

luz jeē cayú nuū néē, nde na cúndijin quivī ndíji ya, te stéén yā ini anuá rō nájñuhun jeē ndíndéé lucero. <sup>20</sup> Te xihna gā na jécūhun ni rō jeē ni ñn jñuhun cáhán tutu ñi, nasūu jéē súcuan-ni ni cajeni ni tēe cúu. <sup>21</sup> Chi tāca tēe ndoo jeē ní canacani jñuhun ya nde jenahán, tu ní cácahān cuiti de jñuhun jeē cúu ni maá de. Chi sa suhva ni canacani de jñuhun Yaā Dios jeē ni stéén Espíritu Santo nuū de.

### Siquī tēe cástéén jñuhun stáhú

(Judas 4-13)

**2** Te mēhñu ñayuu Israel ún suni ni cahīyo tēe ni canacani jñuhun stáhú. Te suni súcuan coo tēe stéén jñuhun stáhú mēhñu ró. Te squívī de jñuhun stáhú jéē tívi ñayuu sáha. Te ni ma cuajñuhún de Jitoho yō jeē jnáma ya de, te súcuan sáha de jeē jnahnú ndetū yachi de. <sup>2</sup> Te cuehē ñayuu condiquin i modo neé jéē castéén de. Te sáha de jeē cahán neé ñayuu siquī jñuhun vāha ya jeē cúu ichi ndaā. <sup>3</sup> Te siquī jeē cándiyo ni de xūhún, te quende de xūhun ró siquī jñuhun stáhú stéén de nuū rō. Te tu quixín jñūdóho jnahnú ndetū de, chi nde jenahán je ndétu jñuhun ndonda ya siquī cuéchi de.

<sup>4</sup> Chi tu ní ñne cáhnu ni Yaā Dios nuū táca ndajéhé yā jeē ní casáha cuéchi, chi sa ni jnaa yā infierno cáyindihyū nuū néē, cánuhñi jíin cadena. Te ni chindihyū yā nde quivī sándaā yā siquī. <sup>5</sup> Te suni tu ní ñne cáhnu ni yā nuū ñayuu jenahán, chi sa ni scúun ya saū xeén siquī ñayuu ni casáha neé un. Te máá-ni Noé, tēe ni nacani jñuhun ndaā, ni scácu ya de jíin úxā gā ñayuu. <sup>6</sup> Te suni ni ndonda ya siquī cuéchi ñayuu ñuu Sodoma jíin ñuu Gomorra, te ni cayū ñuu i ni nduu máá yáa na. Te súcuan cúu i ñn ejemplo nuū táca gā ñayuu sáha neé jéē quíji ga. <sup>7</sup> Te ni scácu ya Lot, chi tēe ndaā ni cuu de, te ni cucuíhyá ndasí ni de ni jito de

jniñu neé ní casáha ñayuu neé un. <sup>8</sup> Chi tēe váha un ní condee de mēhñu ñayuu ún, te ndiquivī ni nacani cuíhyá ni de jeē ní jini sōho de ni jito de táca jniñu neé ní casáha i. <sup>9</sup> Núu súcuan te máá Jítoho yō chi jnáma ya ñayuu cáchiñuhún núu yā, te núu vēji jñūdóho siquī i. Te chindihyū yā ñayuu casáha neé, návāha ndoho i castigo quivī sándaā yā cuéchi i.

<sup>10</sup> Te vīhyá gā stóho ya tēe casáha jniñu jñéhén jéē ndíyo neé ni de, te cácuu jéē ni de siquī jññu ndácu máá Jítoho yō. Nihni ndasí ni de, te cáhundeyí ni de sáha de jeē cácuu ni maá de, te tu cáyuhú de cahán ndevāha de siquī táca jéē cácujuhnu nuū sucún. <sup>11</sup> Te ni máá ndajéhé jeē cáhiin nuū Jitoho yō, vēsú cácujuhnu ga yā jíin fuerza jíin jniñu ndíso ya, te tu cácahān ndevāha ya siquī táca jéē cácujuhnu ún.

<sup>12</sup> Te tēe ún chi cácuu de nájñuhun quiti yúcu jéē ni jéconā tī jíin modo sáha tī, te cátahū tī návāha nihñ ñayuu tī cahni i tī. Chi cácahān neé de siquī táca jéē tu cájecūhun ni de. Te cuu de nájñuhun jíhí táca quiti ún. <sup>13</sup> Te jeē ní castóho de ñayuu, suni súcuan nanihñ de ndoho de. Te cácusī ni de jíin táca jéē cácajni ni de, te casáha de táca jniñu jeē cándiyo neé ni de. Te cácuu de tēe quini jeē casáha jniñu cúcanu ñayuu. Te jeē cándutútú de jíin ró vico ró, te níni cácusī ni de jíin jniñu neé jniñu stáhú.

<sup>14</sup> Te cándiyo ni de cájito de ñahan, te tu cájecuñi de sáha de cuéchi. Te cástáhú de ñayuu tahya ni. Chi ni cacāan de jíin jñuhun ndíyo ni de táca ndajññu. Te tēe jnahnú ndetū cácuu de. <sup>15</sup> Te ni casana de, chi ni castóo de jñuhun jeē cúu ichi ndaā. Te ni candiquin de modo Balaam, tēe ni nacani jñuhun nde jenahán, séhe Beor. Chi tēe un ní cusī ni de nihñ de xūhun síquī jñuhun neé jéē cahán de. <sup>16</sup> Te ñn burro ni cahán tī nájñuhun ñn ñayuu, vēsú quiti ñihán cúu tī. Te ni cahán tī nuū tēe ún, te súcuan

ni jesi tī jeē ma quihín de cahān de tāca jnúhun nées stívi.

<sup>17</sup>Te tāca tée súcuan chi cácuu de nájnūhun tesōco íchi, nájnūhun vicō jeē stechí táchi. Te jnahnū ndetū de quívi-coo de nuū néē nuū lúchi jnúú coyúcú de ní cání. <sup>18</sup>Chi yōhyo cásándúxí de máá de jín jnúhun cácahān saá-ni de. Te cánducú de squívi tucu de sava ñayuu nuū jniñu nées jniñu ndíyo ni. Te súcuan cástáhú de ñayuu jeē sa ní quenda i ní cácu i nuū ñayuu casáha jniñu nées. <sup>19</sup>Te cácahān de jeē cáhiyo libre i sáha i ndese-ni cúní maá i, te ní máá de tu cáhiyo libre de, chi cácuu de mozo nuū cuéchi, chi máni jniñu jnéhén casáha de. Chi táca jniñu jeē cúndeyí jín ñin tēe jeē sáha de, suu yūcuan ndúu de mozo nuū. <sup>20</sup>Chi núu je ní cajini de ndese Yaā cúu máá Jítóho yō Jesucristo, Yaā jnáma yóhó, te núu súcuan ni quenda de ní cácu de nuū jniñu jnéhén íyo ini ñayívi, te yūcuán na te núu ndívicoo tucu de nuū jniñu un jéē cúndeyí tucu jín de, núu súcuan te néé gá quendōo de jeē sándíhí vésú jeē xíhna ñúhún. <sup>21</sup>Chi vāha ga núu jeē tu ní cajini de jnūhun ichi ndaā nuú, vésú jeē ní cajini de, te stóo tucu de jniñu ndoo jeē ní ndacu ya nuū de. <sup>22</sup>Chi cún-daā jín de nájnūhun cáhān ñin jnūhun jenahán: Ina ní nacaji tī jeē ní ndujen tī. Te quíní ní ndundoo, ní nacuchi tucu tī ndehyū, achí.

### Siquí jeē ndíji Jitoho yō

**3**Ñání mání, yāha cúu carta uū jeē tée ri nuū rō. Te jín ndindúú carta yāha cúní rī jeē nacani ní rō siquí ndíhi jeē váha ndaā jeē jéni íchí rí rohó. <sup>2</sup>Te na núcūhun ní rō tāca jnúhun jeē ní canacani tēe ndoo Yaā Dios nde jenahán, jín jniñu ní ndacu máá Jítóho yō, Yaā jnáma yóhó. Te suu cúu jeē ní castéén tēe cácuu apóstol nuū rō.

<sup>3</sup>Te xíhna gā jnūhun yáha na jécūhun ní rō: Jeē nuū cuándíhi quívi te quiji-

coo tēe sácatā siquí jnúhun ndaā yā, chi sáha de táca jniñu nées jéē ndíyo ni maá de. <sup>4</sup>Te cahān de jínáhan de: ¿Najehē cúu jeē tu ndíji Cristo nájnūhun ni je-jnúhun ya? Chi nde quívi ní cajíhi jíi yō te nde vijna, tu ndé sáma cuiti ndíhi jeē iyó ndé ná ní jecōo ñayívi, achi de. <sup>5</sup>Chi tu cácuu de jécūhun ní de jeē ndé jenahán ní cuvāha andívi jín jnúhun ni cahān Yaā Dios. Te ní ndacu ya jniñu jeē na cuvāha ñayívi jín ndute, te mēhñú ndute ní nane ñuhun íchi. <sup>6</sup>Te suni jín ndute ní naa ñayívi jenahán, chi ní ndaa ndute jeē ní cuun saū xeén. <sup>7</sup>Te suni súcuan jín jnúhun ní cahān Yaā Dios ní sātūhva ya jeē cayú andívi jín ñayívi íyo vijna. Chi máá quívi juicio te cayú ndíhi, te jnahnū ndetū ñayuu ní casáha néé.

<sup>8</sup>Te suni ma náā ní rō jnūhun yáha, ñání mání: Jeē nuū maá Jítóho yō chi ñin quívi cúu nájnūhun mil cuiyā, te mil cuiyā cúu nájnūhun ñin quívi-ni. <sup>9</sup>Chi nasūu jéē cucuéé máá Jítóho yō siquí jnúhun ní jejnūhun ya, nájnūhun cájeni ní sava ñayuu. Chi sa suhva íyo paciencia ní yā nuū yō, chi tu cúní yā jeē jnahnú ndetū ní ñin yó, chi sa cúní yā jeē ndíhi yó nacani ní yō stóo yó cuéchi yó.

<sup>10</sup>Te quívi ndíji máá Jítóho yō, ñin sanaa-ni te quee, nájnūhun ñin sanaa-ni te quee ñacuíhna jecuāa. Te quívi ún chi ñihñ ndasí andívi, te naa-ni. Te ndíhi jeē iyó andívi chi naa sáha ñuhūn. Te ñayívi jín táca jéē iyó ini, ndíhi cayū.

<sup>11</sup>Te núu súcuan naa táca un, te cánuú ndasí jéē coo ndoo ánuá rō te chíñúhún váha ro yá jínáhan rō. <sup>12</sup>Te condetu ró te condíhvī ní rō jeē na quee yachí quívi ndíji Yaā Dios. Te quívi ún cayū andívi te naa-ni, te tāca jéē iyó chi ndute sáha yáñuhūn. <sup>13</sup>Te máá yó chi cándetu yó andívi jéē jín ñayívi jéé, chi súcuan ní jejnūhun Yaā Dios. Te yūcuán chi máni jniñu ndaā jín jniñu váha coo.

<sup>14</sup>Núu súcuan, ñání mání, níni jéē cándetu ró jéē squícu táca jniñu yáha, te

na ndúcu ndéyí ró návāha quivī ndíji ya te nihīn yā rohó jēē cáyūcu mánī rō, te coo ndoo ró jēē tú na cuēchi ró. <sup>15</sup>Te na jécūhun ni rō jeē siquī jeē iyó paciencia ni maá Jítóho yō, jeē yúcuan cácu yó. Chi hermano yō Pablo jeē maní yō jíín, suni súcuan ni tee de nuū rō, chi súcuan ni steén Yaā Dios jnūhun ndíchí yá nuū de. <sup>16</sup>Te cáhán de siquī jnúhun yáha núū tāca carta jeē ní tee de. Te nuū carta de un íyó jecu jnūhun jeē yíí jécūhun ni yō. Te ñayuu tu jécūhun ni jíín ñáyuu tu íje jíín jnúhun cándíje, cánasama i modo steén jnūhun yíí un, nájnúhun násama i

jeē cahán sava ga tutu ii. Te súcuan sáha i jeē jnahnú ndetū maá i.

<sup>17</sup>Te rōhó ñánī mánī, vijna te je ni cajini rō ndese coo tācá jniñu yáha. Núu súcuan te coto má condiquīn rō jnūhun stáhú cástéén ñayuu casáha néé. Chi núu tuú te snáā rō jnūhun cáhiin nihin ró jíín.

<sup>18</sup>Chi sa na cóndihvī gā ni rō cuni rō ndese Yaā cúu máá Jítóho yō Jesucristo, Yaā jnáma yóhó. Te na íje ga ni rō jíín jnúhun cúndáhú ni yā rohó. Te na cáhán yō jeē yóhyo luu cújéhnú ya nde vijna jíín níí cáni. Súcuan na cóo. Amén.



## CARTA HN JEE NI TEE SAN JUAN APOSTOL NUU ÑAYUU CACANDIJE

### Jnūhun cotecu yō nīf cáni

**1** Jnūhun cátee ri cuajeē nuū rō jijnáhan rō cúu jnūhun máa Yaā jeē je íyó ndé ná tu jecōo tāca jéē iyó. Te ni cajini sōho ri jeē ni cáhān yā, te ni cajito jínúu ri yā, chi ni cajito vāha ri nuū yā, te ni cajni ri yā. Te máa yá cúu Jnūhun cotecu yō nīf cáni. <sup>2</sup>Chi Yaā yáha jéē sáha ya jeē cótecu yō, ni quenda ndijin yā. Te cácahān rī jnūhun ya, chi ni cajito ri yā. Te cácastūhun rí nuū rō jijnáhan rō síquī Yaā cúu Jnūhun cotecu yō nīf cáni, Yaā ni condee jíin Tátá yō Yaā Dios, te ni quenda ndijin yā nuū rī jijnáhan ri. <sup>3</sup>Jeē ní cajito ri jíin jéē ní cajini sōho ri, yūcuan cúu jeē cácastūhun rí nuū rō, návāha coo inuú ni rō jíin yó jijnáhan yó. Te jendaá chi cáhiyo inuú ni yō jíin máa Tátá yō Yaā Dios jíin Séhe ya Jesucristo. <sup>4</sup>Te jnūhun yáha cátee ri cuajeē nuū rō, návāha cusī teyí ni rō jijnáhan rō.

### Yaā Dios cúu luz

<sup>5</sup>Te yāha cúu jnūhun ni steén Jesucristo nuū rī, te vijna cácastūhun rí nuū rō: Yaā Dios cúu luz, chi yōhyo ndaā yā, te tú cuiti na jniñu nées íyó jíin yá. <sup>6</sup>Núu cácahān yō jeē cáhiyo inuú ni yō jíin yá, te núu cájica yó nájnūhun nuū nées jeē sáha yó jniñu nées, núu súcuan te cástáhú yó, te nasūu jniñu ndaā casáha yó. <sup>7</sup>Te núu cájica yó jíin luz yā jeē casáha yó jniñu ndaā, nájnūhun íyó máa yá jíin luz yā jeē sáha ya jniñu ndaā, yūcuán na te cáhiyo inuú ni yō jíin táca jnáhan yó. Te niñi maá Séhe ya Jesucristo sándoo yóhó núu ndíhi cuēchi yó.

<sup>8</sup>Núu cácahān yō jeē tú na cuēchi yó, te cástáhú yó máa yó jeē jéni ni yō súcuan, te tu níñhun jnūhun ndaā ini yō.

<sup>9</sup>Te núu nacani ndaā yō cuēchi yó núu yā, te cone cáhnu ni yā nuū cuēchi yó, te sándoo ya yohó ndíhi jeē neé casáha yó. Chi jíin yō jeē Yaā vāha Yaā ndaā cúu ya. <sup>10</sup>Te núu cácahān yō jeē tú na cuēchi yó, te nájnūhun sáha yó jéē Yaā stahú cúu ya, te tu cándíje ndije yó jnūhun ya.

### Cristo cúu Yaā cahán jehē yō

**2** Tāca jnūhun yáha téee ri cuajeē nuū rohó jéē cácuu rō nájnūhun séhe ri, návāha ma sáha rō cuēchi jijnáhan rō. Te núu ndé iin rō ní sáha cuēchi, te íyó máa Yaā cahán jehē yō nuū maá Tátá yō Yaā Dios. Jesucristo Yaā ndaā cúu ya. <sup>2</sup>Te ni socō yā máa yá jeē ndahva yā cuēchi yó, te nasūu cuēchi máa-ni yó, chi suni cuēchi ñayuu ní ñáyiví.

<sup>3</sup>Núu squícu yó jniñu ndácu Yaā Dios nuū yō, jíin yúcuu cúcáhnu ni yō jeē jíin ndije yó ndese Yaā cúu ya. <sup>4</sup>Te núu cáhán iin ñayuu: Ruhū chi jíin rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhán i jnūhun ndaā. <sup>5</sup>Te sa ñayuu squícu jnūhun ya, je ni ije vāha ni i jeē maní i jíin yá. Súcuan te cuni yō núu ndúu yó jíin yá chí tuú. <sup>6</sup>Núu cáhán iin ñayuu jeē nduú i jíin yá, cánuú jéē caca ndaā i nájnūhun ni jica Jesucristo.

### Jniñu jéē ndácu ya nuū yō

<sup>7</sup>Hermano, nasūu iin jniñu jéē ndácu ri nuū rō jeē cahán rī jeē na cúndáhú ni rō jnáhan rō. Chi jniñu jeē je cájini rō nde ná ni quejéé rō candíje rō cúu. Te jniñu yáha jeē ndácu ya, vēji nde jehahán, te suu cúu jnūhun ni cajini sōho rō ndé quiví ní quejéé rō candíje rō. <sup>8</sup>Te vēsú súcuan, te níin jniñu jéē cúu, te jniñu ndaā cúu nuū Cristo jíin núu maá rō jijnáhan rō. Chi je cuayāha jniñu nées jéē íyó núu nées, te je steén maá luz ndaā ini anuá yō vijna.

<sup>9</sup>Núu iin ñayuu cahán i jeē jíca i jíin luz yā, te núu jíto uhū i jnáhan i,

ñayuu ún chi jíca ga i nájñuhun nuū neē jíin cuéchi. <sup>10</sup> Te ñayuu jeē cundáhú ni jnáhan, chi jíca i jíin luz yā, cúu jeē sáha i jniñu váha. Te ni ñin ma cúu sáha jeē quívi i cuéchi. <sup>11</sup> Te ñayuu jíto uhū jnáhan, chi íyó i nuū neē, te jíca i nuū neē. Te tu jíni i ndé chi quíhín i, chi nuū neē un ní jesi jeē tu jécuhun ni i.

<sup>12</sup> Róhó jéē cácuu sēhe, téé ri jñuhun yáha cuájeē nuū rō, chi jeē siquí Jesucristo te ni ine cáhnu ni Yaā Dios nuū cuéchi ró. <sup>13</sup> Róhó tátá jijnáhan ró, suni téé ri nuū rō, chi cájini rō ndese Yaā cúu Yaā iyó ndé xihna ñúhún. Róhó téé suchí jijnáhan ró, suni téé ri nuū rō, chi ni cacundeyí ró jeē tu ní cúu squívi jexeén rohó cuéchi.

Róhó jéē cácuu sēhe, téé ri jñuhun yáha cuájeē nuū rō, chi cájini rō ndese Yaā cúu máá Tátá yō Yaā Dios. <sup>14</sup> Róhó tátá jijnáhan ró, suni téé ri nuū rō, chi cájini rō Yaā iyó ndé xihna ñúhún. Róhó téé suchí jijnáhan ró, suni téé ri nuū rō, chi cáhñin nihin ró, te cácuandíje ró jnúhun Yaā Dios, te ni cacundeyí ró siquí jexeén.

<sup>15</sup> Ma cutóó ni rō siquí ñayívi, ni táca jéē iyó ini ñayívi. Chi núu ndé ñayuu cutóó ni i siquí ñayívi, ñayuu ún tu íyó máni i jíin Tátá yō Yaā Dios. <sup>16</sup> Chi táca jéē cúu cuenta ñayívi, nasūu ndé nuū Tátá yō Yaā Dios vēji, chi cuenta ñayívi cúu. Te yūcuan cúu táca jéē cájini ni yō jeē cuní modo neé máá yó, jíin jéē ndíyo ni yō jeē jíto yó núu, jíin jéē sandúxí yó máá yó siquí ndajniñu névaha yó. <sup>17</sup> Te cuandíhi ñayívi jíin táca jéē ndíyo neé ni yō. Te ñayuu casáha jeē cuní máá Yaā Dios, chi cotecu i ní cání.

### Jñuhun ndaā jíin jnúhun stáhú

<sup>18</sup> Róhó jéē cácuu nájñuhun sēhe ri, cáhán rī jíin ró jeē cuandíhi quívi. Te je ni cajini jñuhun ró jéē quíji máá téé cuu contra siquí Cristo. Te nde vijna je ni canecoo cuehē téé jeē cácuu contra siquí

Cristo. Te jeē yūcuan jíni yō jeē cuandíhi quívi. <sup>19</sup> Mēhñu máá yó ni quendacoo de, te nasūu jnáhan yó cácuandíje cácuu de. Chi núu jeē jnáhan yó cácuu de, te quendóo de jíin yó nuú. Te ni quenda de cuangoo de, návaha cuni cají yó jéé nasūu jnáhan yó cácuu ndíhi de.

<sup>20</sup> Te máá ró jijnáhan ró, chi Cristo ni jēhe ya Espíritu Santo, ndeé yá ini anuá rō, te jeē yūcuan cájini rō jñuhun ndaā. <sup>21</sup> Núu súcuan te téé ri yáha cuájeē nuū rō, siquí jeē cájini rō jñuhun ndaā, nasūu siquí jeē tu cájini rō. Te cájini rō jeē tú na jñuhun stáhú íyó nuū jnúhun ndaā.

<sup>22</sup> ¿Ndeé ñin cúu jeē cahán máni jñuhun stáhú? Suu téé jeē cahán jeē Jesús, tu cúu ndije ya Cristo, Yaā ní tají Yaā Dios. Yūcuan cúu téé jeē cúu contra siquí Cristo, chi tu jéjñuhún de máá Tátá yō Yaā Dios jíin Séhe ya. <sup>23</sup> Táca ñayuu jeē tu jéjñuhún i Séhe ya, suni tu íyó máá Tátá jíin i. Te ñayuu jeē jejñuhún i Séhe ya, suni íyó máá Tátá jíin i.

<sup>24</sup> Núu súcuan te chuhun váha ni rō maá jnúhun ni cajini sōho ró ndé jeē xihna ñúhún. Te núu ñúhún váha ni rō jñuhun ní cajini sōho ró ndé jeē xihna ñúhún, yūcuán na te suni ndúú ró jíin máá Tátá yō jíin Séhe ya. <sup>25</sup> Te yáha cúu jñuhun jeē ni jéjñuhun Jesucristo nuū yō: jeē cótecu yō ní cání sáha ya.

<sup>26</sup> Jñuhun yáha ní tee ri nuū rō jeē cástuhun rí siquí ñayuu cánducú stáhú róhó. <sup>27</sup> Te máá ró jijnáhan ró, chi ni jēhe Jesucristo Espíritu Santo, ndeé yá ini anuá rō. Te jeē yūcuan tu jíni ñúhún jéē steén ni ñin ñayuu nuū rō ndé vé cúu jendaá, chi máá Espíritu cúu jeē steén ndíhi nuū rō, te steén yā jñuhun ndaā, chi tu stáhú cuiti yā. Núu súcuan te caca ndúú ró jíin Cristo, nájñuhun steén Espíritu nuū rō.

<sup>28</sup> Séhē jijnáhan ró, vijna te na cáca ndúú ró jíin Cristo, návaha núu na quénda ndíjin yā, te ma yūhu yó, ni ma cúcanu yō nuū yā quívi ndíji ya. <sup>29</sup> Chi

je cájini rō jeē Yaā ndaā cúu Jesucristo, te suni na jécūhun ni rō jeē tāca ñayuu casáha jniñu ndaā, sēhe Yaā Dios cácuu i.

### Jnūhun ñayuu cácuu sēhe Yaā Dios

**3** Nacā jeē yóhyo ni cundáhú ni Tatá yō Yaā Dios yohó, chi ni nihīn yō jnūhun cuu yó sēhe ya, te suu cúu ndije yó. Jeē yúcuan, ñayuu ñayiví tu cájini i jeē cúu yó sēhe ya, chi tu jíní i ndese Yaā cúu máá yá. <sup>2</sup>Ñāni mání, vijna te cúu yó sēhe Yaā Dios, te ná tu cuni yō ndese coo yó nńí cáni. Te je jíní yō jeē quiví quenda ndijin Jesucristo, te nduu yó nájñuhun íyó máá yá, chi coto yó núu yā ndese íyó yá. <sup>3</sup>Te tāca ñayuu jeē súcuan ñūhun ni i, chi sándoo i ánuá i, nájñuhun íyó ndoo Jesucristo.

<sup>4</sup>Te ñayuu casáha cuēchi, chi stívi i ley Yaā Dios. Chi núu sáha yó cuēchi, te stívi yó ley yā. <sup>5</sup>Te je cájini rō jeē ní quiji Jesucristo ini ñayiví návāha quende yā cuēchi yó. Te máá yá tú na cuēchi ya. <sup>6</sup>Te tāca ñayuu jeē nduú i jíní yá, tu cájica i jíní cuēchi. Te tāca ñayuu cájica jíní cuēchi, tu jíní i ya, ni tu jécūhun ni i ndese Yaā cúu ya. <sup>7</sup>Séhē jijnáhan rō, coto rō jéē ma stáhú ni ĩn i róhó. Chi na jécūhun ni rō jeē ñayuu casáha jniñu ndaā, máá i cácuu ñayuu ndaā, nájñuhun íyó ndaā máá yá. <sup>8</sup>Te ñayuu casáha cuēchi, máá i cácuu sēhe jexeén. Chi jexeén cúu jeē sáha cuēchi vēji nde jeē xíhna ñúhún. Jeē yúcuan ní quiji Sēhe Yaā Dios, jeē snáa yā tācá jniñu nées sáha jexeén.

<sup>9</sup>Ni ĩn ñayuu jeē cúu sēhe Yaā Dios, tu jíca i jíní cuēchi, chi ni sáha Yaā Dios jeē ní nduu i nájñuhun íyó máá yá. Te ma cúu ga caca i jíní cuēchi, chi sēhe Yaā Dios cácuu i. <sup>10</sup>Súcuan cuni yō ndé ĩn cúu sēhe Yaā Dios jíní sēhe jexeén: Tāca ñayuu jeē tu sáha jniñu ndaā, jíní jéē tu cundáhú ni jnáhan, nasūu sēhe Yaā Dios cúu i.

### Jeē na cundáhú ni yō jnáhan yó

<sup>11</sup>Yāha cúu jnūhun jeē ní cajini sōho rō ndé jeē xíhna ñúhún: jeē na cundáhú ni yō jnáhan yó. <sup>12</sup>Te ma sáha yó nájñuhun ni sáha Caín, jeē ní cuu de sēhe jexeén, te ni jehni de ñani de. ¿Te najehē ni jehni de ñani de? Siquí jeē ñani de ni sáha jniñu ndaā te máni jniñu nées ní sáha máá de.

<sup>13</sup>Hermano jijnáhan rō, ma cunéé ni rō te núu ñayuu ñayiví cáquití ni i nuū rō. <sup>14</sup>Te máá yó chi siquí jeē cundáhú ni yō jnáhan yó, súcuan jíní yō jeē jé ni cācu yó jéé cótecu yō níí cáni. Te ñayuu jeē tu cundáhú ni jnáhan, íyó i jíní jnúhun jnahnū ndetū i. <sup>15</sup>Chi tāca ñayuu quití ni nuū jnáhan, nájñuhun ñayuu jéhni ndīyi cúu i. Te cájini rō jeē ñayuu jéhni ndīyi, ma nihín tahu i cotecu i nńí cáni. <sup>16</sup>Jeē ni jíhí Cristo jehē yō, yúcuan cúu jeē steén cají ndese cúu jnūhun cundáhú ni. Te máá yó, chi suni súcuan jíní ñúhún cundáhú ni yō jnáhan yó vēsú na cúu yō jehē i. <sup>17</sup>Te núu névāha yó jéé cótecu yō ñayiví, te núu jíní yō jeē cúmaní nuū jnáhan yó, te núu tú cundáhú ni yō i cuāha yó jéé jíní ñúhún i, núu súcuan ¿te á íyó máni yō jíní Yaā Dios, chi naún? <sup>18</sup>Séhē jijnáhan rō, ma cundáhú ni yō jíní máá jnúhun cáhán-ni yó, chi sa suhva na cundáhú ndije ni yō nde jíní jniñu sáha yó.

### Ndese cucáhnu ni yō jeē váha sáha yó núu Yaā Dios

<sup>19</sup>Te súcuan cundaā ni yō jeē squícu yó jnúhun ndaā, te cucáhnu ni yō jeē váha sáha yó núu yā. <sup>20</sup>Chi núu ánuá yō tú vāha sáha siquí jeē íyó cuēchi yó, te Yaā Dios chi cújéhu ga yā vēsú anuá yō, te jíní ndihí ya tācá un. <sup>21</sup>Núu súcuan ñāni mání, núu vāha sáha ánuá yō siquí jeē tú na cuēchi yó, yúcuan na te cucáhnu ni yō jeē váha sáha yó núu Yaā Dios. <sup>22</sup>Te tāca jéé cacán yō nuū yā, te

sáha ya jeē cahán yō, chi squícu yó jniñu ndácu ya te sáha yó jniñu jeē cúsiñ ni yā. <sup>23</sup> Te yāha cúu jniñu ndácu ya: jeē na cándíje yó jéē ni sáha Sēhe ya Jesucristo jehē yō, jíin jéē na cúndáhú ni yō jnáhan yó, nájnūhun ni ndacu ya jniñu nuū yō. <sup>24</sup> Te tāca ñáyuu squícu jniñu ndácu Yaā Dios, ndúú i jíin yá, te ndéé yá ini anuá i. Te jíin máá Espíritu jeē ni jéhe ya jeē ndeé ini anuá yō, jíin yúcuu te jíin yō jeē ndeé Yaā Dios ini yō.

### **Jnūhun jeē vēji nuū Espíritu jíin jnūhun cáhán contra Cristo**

**4** Ñání mání, ma candíje ró tāca tée jéē cácahān de jeē jíin Espíritu Yaā Dios cánacani de jnūhun. Chi sa suhva coto ndee rō de, núu nde nuū Yaā Dios vēji jnūhun cácahān de, chí tuú. Chi ini ñayívi je ni canecoo cuehē tēe cánacani jnūhun stáhú, te cácahān de jeē ndé nuū Yaā Dios vēji. <sup>2</sup> Te súcuu nacuni rō ndé-ni i cúu jeē jíin Espíritu Yaā Dios cahán: tāca ñáyuu jeē cácahān ndaā jeē ní quiji Jesucristo, ni nduu ya tēe, máá i cúu jeē jíin Espíritu Yaā Dios cácahān. <sup>3</sup> Te tāca ñáyuu jeē tu cájejnūhún jeē súcuu ni nduu ya tēe, máá i chi nasūu jíin Espíritu Yaā Dios cácahān i. Chi sa suhva cácuu i contra siquí Cristo. Te je ni cajini jnūhun ró jéē quíjicoo ñayuu súcuu, te vijna je cáhiyo i ini ñayívi.

<sup>4</sup> Séhē jijnáhan ró, máá ró cácuu sēhe Yaā Dios, te je ni cacundeyí ró siquí tēe cástáhú un. Chi jéhu ga cúu poder maá Yaā jeē ndeé ini rō, vēsú poder maá jéē ndeé jíin ñáyuu ñayívi jéē castáhú. <sup>5</sup> Máá i cácuu cuenta ñayívi, te jeē yúcuu cácahān i jnūhun cuenta ñayívi. Te ñayuu cácuu cuenta ñayívi, cájini nahín i jnūhun ún. <sup>6</sup> Te máá yó chi sēhe Yaā Dios cácuu yó. Te ñayuu jeē cájini i ndese Yaā cúu Yaā Dios, máá i cájini nahín i jnūhun cácahān yō. Te ñayuu jeē násūu sēhe Yaā Dios cácuu,

máá i tu cájini nahín i jnūhun cácahān yō. Te súcuu nacuni yō ndé-ni cúu jeē cahán jnūhun ndaā jíin ndé-ni cúu jeē cahán jnūhun stáhú.

### **Máni jnūhun cúndáhú ni iyó jíin Yaā Dios**

<sup>7</sup> Ñání mání, na cúndáhú ni yō jnáhan yó, chi jnūhun cúndáhú ni, nde nuū Yaā Dios vēji. Te tāca ñáyuu cundáhú ni jnáhan, chi sēhe Yaā Dios cúu i, te jíin i ndese Yaā cúu Yaā Dios. <sup>8</sup> Te ñayuu jeē tu cúndáhú ni jnáhan, tu jíin i ndese Yaā cúu Yaā Dios, chi máni jnūhun cúndáhú ni iyó jíin Yaā Dios. <sup>9</sup> Súcuu ni steén Yaā Dios ndese cúndáhú ni yā yohó, chi ni tají yá Sēhe ya ni quiji ini ñayívi yáha, vēsú mañúhún-ni ya iyó, návāha cotecu yō ní cáni sáha ya. <sup>10</sup> Te yāha cúu jnūhun cúndáhú ni: nasūu jéē xíhna máá yó ni íyo maní yō jíin Yaā Dios, chi sa suhva máá yá cúu jeē ní cundáhú ni yā yohó. Te ni tají yá Sēhe ya ni quiji, návāha socō yā máá yá jeē quende yā cuēchi yó.

<sup>11</sup> Ñání mání, núu súcuu ni cundáhú ni Yaā Dios yohó, te suni súcuu cánuú jeē cundáhú ni yō jnáhan yó. <sup>12</sup> Ni ñayuu tu ní jíto cuití nuū Yaā Dios. Te núu cúndáhú ni yō jnáhan yó, te ndéé Yaā Dios ini anuá yō, te je ni ije vāha ni yō jíin jnūhun cúndáhú ni. <sup>13</sup> Te máá Espíritu Santo jeē ni jéhe ya jeē ndeé ini yō, máá yá steén jeē nduú yó jíin Yaā Dios, te ndéé Yaā Dios ini yō. <sup>14</sup> Te ni cajito ri te cácastūhun rí jeē maá Tátá yō ni tají yá Sēhe ya ni quiji návāha jnama ya ñayuu ñayívi. <sup>15</sup> Te núu ndé ñáyuu jejnūhún i jeē Séhe Yaā Dios cúu Jesús, te ndúú i jíin Yaā Dios, te Yaā Dios ndeé yá ini i.

<sup>16</sup> Te máá yó, je ni jini yō te ni candíje yó jéē cundáhú ni Yaā Dios yohó. Chi máni jnūhun cúndáhú ni iyó jíin Yaā Dios. Te ñayuu cundáhú ni jnáhan, ndúú i jíin Yaā Dios, te ndéé yá ini anuá i. <sup>17</sup> Te súcuu cúu jeē íje vāha ni yō jíin

jnūhun cúndáhú ni, návāha ma yūhu yó quivī sándaā yā jniñu yó. Chi nájnūhun cúndáhú ni Cristo, suni súcuan cándāa máá yó ini ñayīvi yáha. <sup>18</sup>Te núu manī yó jíin yá, te tu yúhú yó nuū yā. Chi núu ni ije yó jíin jnūhun manī yó jíin yá, te tú na siquī yuhú yó nuū yā. Chi jnūhun yúhú un cúu jeē yuhú yó ndoho yó castigo. Jeē yúcuan ñayuu cáyūhú chi ná tu ije vāha i jíin jnūhun manī i jíin yá.

<sup>19</sup>Te yóhó chi manī ndasí yó jíin Yaā Dios, chi xīhna gā maá yá ni cundáhú ni yā yohó. <sup>20</sup>Te núu ñayuu cahán i jeē manī i jíin Yaā Dios, te núu quítí ni i nuū jnáhan i, núu súcuan te ñayuu stahú-ni cúu i. Chi núu ñayuu tu íyó mání i jíin jnáhan i jeē jíto i nuū, te ni ma cúu coo manī i jíin Yaā Dios jeē tu jíto i nuū yā. <sup>21</sup>Chi je ni ndacu ya jniñu yáha nuū yó: Ñayuu jeē manī i jíin Yaā Dios, suni na cóo manī i jíin jnáhan i.

### Jeē cúndeyí yó siquī jeneé íyó ini ñayīvi

**5** Tāca ñayuu jeē cácañdije i jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu manī jíin Yaā cúu Tátá, suni cácañdáhú ni i ñayuu cácuu sēhe ya. <sup>2</sup>Súcuan jíní yó jeē cundáhú ni yó ñayuu cácuu sēhe ya, núu manī yó jíin yá te squícu yó jniñu ndácu ya. <sup>3</sup>Chi jeē squícu yó jniñu ndácu Yaā Dios cúu jeē manī yó jíin yá. Te jniñu ndácu ya chi tú vēyi. <sup>4</sup>Chi tāca ñayuu cúu sēhe Yaā Dios, cúndeyí i siquī jeneé íyó ini ñayīvi. Te jeē candije yó jéē cundáhú ni yā yohó, yúcuan cúu fuerza jeē sáha jeē cúndeyí yó. <sup>5</sup>Máá-ni ñayuu jeē candije jeē Jesús cúu Sēhe Yaā Dios, máá i cúu jeē cúndeyí siquī jeneé íyó ini ñayīvi.

### Jnūhun cáhán ndaā siquī Sēhe Yaā Dios

<sup>6</sup>Te jeē ní quiji Jesucristo ini ñayīvi, chi ni jendute ya jíin ndute, te ni jeti

niñī yā jeē ni jíhī yā jehē yó. Te nasūu máá ñin-ni jeē ní jendute ya jíin ndute, chi suni ni jeti niñī yā. Te máá Espíritu Yaā Dios cahán ndaā siquī yā, chi nuū maá Espíritu vēji jnūhun ndaā. <sup>7</sup>Chi ini andiví íyó únī jeē cácañhān ndaā siquī jnūhun yáha: máá Yaā cúu Tátá, jíin Yaā cúu Jnūhun, jíin Espíritu Santo. Te ndinúní yá, chi ñin-ni cúu ya. <sup>8</sup>Te ini ñayīvi suni íyó únī jeē steén ndaā: máá Espíritu, jíin jéē ní jendute Jesús, jíin jéē ní jeti niñī yā. Te ndinúní yáha, chi inuú-ni stéén siquī yā. <sup>9</sup>Te cájetáhú yó jnūhun cácañhān ndaā tēe, te jéhu ga cúu jnūhun cáhán maá Yaā Dios. Te jnūhun ni cahán yā cúu jnūhun siquī Sēhe ya. <sup>10</sup>Ñayuu cácañdije jeē Sēhe Yaā Dios cúu Jesús, je ni cacundaā ni i jnūhun yáha jeē ni cáhān Yaā Dios. Te ñayuu jeē tu cácañdije jeē ni cáhān Yaā Dios, nájnūhun cásaħa i jeē Yaā stahú cúu ya, chi tu cácañdije i jnūhun ni cahán ndaā yā siquī Sēhe ya. <sup>11</sup>Te jnūhun ndaā un cúu jeē ni sáha ya jeē cótecu yó níí cáni, te Sēhe ya ndíso jnūhun cotecu yó. <sup>12</sup>Ñayuu jeē íyó Sēhe ya jíin i, je ni nihín tahú i cotecu i. Te ñayuu jeē tu íyó Sēhe ya jíin i, ma nihín tahú i cotecu i.

### Jnūhun consejo jeē sándihí

<sup>13</sup>Jnūhun yáha tēe ri nuū rohó ñayuu cácañdije Sēhe Yaā Dios, návāha cucáhnu ni rō jeē ni nihín tahú rō cotecu rō níí cáni.

<sup>14</sup>Te cúcáhnu ni yó Yaā Dios, chi jíní yó jeē núu na vé jicán yó nuū yā jeē suni cúní maá yá, te jíní nahín yá jeē jicán yó. <sup>15</sup>Te núu jíní yó jeē jíní nahín yá jeē jicán yó, núu súcuan te suni jíní yó jeē sáha ya jeē jicán yó.

<sup>16</sup>Núu ñayuu jíní i jeē sáha jnáhan i cuēchi jeē násūu cuēchi jeē jnahnú ndetū i cúu, te na cácañ tahú i nuū Yaā Dios, te cuāha ya jnūhun cotecu jnáhan i, te núu nasūu cuēchi jeē sáha jeē jnahnú

ndetū i cúu. Iyó cuéchi jeē jnahnú ndetū i sáha, te tu cáhán rī jeē cacán tahu rō jehē ñayuu sáha cuéchi súcuan. <sup>17</sup>Tācá jniñu néé cúu cuéchi, te íyó cuéchi jeē násūu jéē jnahnú ndetū i cúu.

<sup>18</sup>Te jíní yō jeē tāca ñáyuu cácuu sēhe Yaā Dios, tu jíca i jíín cuéchi. Chi Yaā cúu Sēhe Yaā Dios, ndító vāha ya i. Te tú na vé cúu sáha jexeén jíín i.

<sup>19</sup>Te jíní yō jeē séhe Yaā Dios cácuu yó. Te ñayuu níí ñáyivi yíhi i ndaha jexeén.

<sup>20</sup>Te suni jíní yō jeē ní quiji Sēhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúú yó jíín Yaā ndaā, suu jíín máá Sēhe ya Jesucristo. Máá yá cúu ndije Yaā ndaā, te máá yá sáha jeē cótecu yō níí cáni. <sup>21</sup>Séhē jijnáhan ró, na cújiyo ró núu tāca jéē násūu Yaā ndaā cúu. Súcuan na cóo. Amén.

## CARTA UU JEE NI TEE SAN JUAN APOSTOL

### Jnūhun ndaā jín jnúhun cúndáhú ni

**1** Máá ná cúu tēe jénu ndíso jnínu, te tēe ná carta yáha cuájeē nuū ni jēe cúu ní hermana ni nacāji Yaā Dios, jín núu séhe ní jínáhan i. Te maní na jín ní jijnáhan ní sáha jnūhun ndaā yā, te nasūu máá-ni ná, chi suni tāca ñayuu jini jnūhun ndaā. <sup>2</sup>Te maní na jín ní jijnáhan ní siquī jeē cácandíje yó jnúhun ndaā yā jeē iyó ini anuá yō, te coo jín yó ní cáni. <sup>3</sup>Te ñúhun ni na jēe Tátá yō Yaā Dios jín Séhe ya Jitoho yō Jesucristo, na sáha ga yā jeē váha níhín, te cundáhú ni yā nihín, te sáha ya jeē coo ndeyí coo sī ni ní, jín jnúhun ndaā jín jnúhun cúndáhú ni.

<sup>4</sup>Yōhyo ni cusī ni ná, chi ni jini na jēe sava séhe ní cájica i jín jnúhun ndaā, nájnūhun ni ndacu máá Tátá yō Yaā Dios jniñu nuū yō. <sup>5</sup>Hermana, cáhán ndahú ná jín ní jeē na cúndáhú ni yō jnáhan yó. Te jnūhun tēe ná yáha cuájeē nuū ní, nasūu ñin jniñu jēe sá ndácu ya cúu, chi jniñu ní ndacu ya nuū yō nde ná ni quejé yó candíje yó cúu. <sup>6</sup>Te jeē cundáhú ni yō jnáhan yó cúu jeē caca yó nájnūhun ni ndacu ya jniñu nuū yō. Te jniñu ní ndacu ya cúu jeē caca ní jín jnúhun cúndáhú ni, nájnūhun ni cajini sōho ní ndé ná ni quejé ní candíje ní.

### Siquī tēe cástáhú

<sup>7</sup>Chi cuehē tēe cástáhú ni canecoo de ní ñáyiví, te tu cájejnúhún de jeē ní quiiji Jesucristo ni nduu ya tēe. Te tēe tu cájejnúhún súcuan, cácuu de tēe stáhú, te cácuu de contra siquī Cristo. <sup>8</sup>Coto ní jēe ma snáā ni táhū siquī jniñu váha ni casáha ní, chi sa suhva jeē na níhín ni ndihí tahū ní.

<sup>9</sup>Núu ndé ñayuu jniñi ñga jnūhun, te tu quéndōo i jín jnúhun ni steén Cristo, núu súcuan te tu iyó Yaā Dios jín i. Te ñayuu quéndōo jín jnúhun ni steén Cristo, chi iyó Tátá yō jín i, te suni iyó Séhe ya jín i. <sup>10</sup>Te núu jinū ñin ñayuu vehe ní, te núu tu quijnáhan jnūhun steén i jín jnúhun yáha, te ma cuáha ní jnúhun condee i vehe ní, ni ma cahán ni jnúhun ndeyí ni jín i. <sup>11</sup>Chi ñayuu cahán jnūhun ndeyí ni jín i, chindéé ñájnáhan jín i siquī jniñu neé casáha i.

### Jnūhun sandíhi

<sup>12</sup>Iyó cuehē gā jnūhun cahán na jín ní jijnáhan ní, te tu cúní na tee ná núu tútu jín tinta. Chi ñúhun ni na cuájeē ná coto jnáhan yó, te ndajnūhun yó, návaha cusī ndasí ni yō.

<sup>13</sup>Tāca séhe cuhū ní, ñahan jeē suni ni nacāji ya, cácahán i jeē sánde yí ni ní. Súcuan na cóo. Amén.

## CARTA UNI JEE NI TEE SAN JUAN APOSTOL

### Jeē jejnúhún de tēe nání Gayo

**1** Máá rí cúu tēe jéhu ndíso jnínu, te tēe rí carta yáha cuájeē nuū rō, amigo Gayo, chi manī rī jíin ró sáha jnūhun ndaā.

<sup>2</sup> Nánī mánī, jícan tahú rī jeē vāha na quíhín tācá jnínu sáha ró, jíin jēē na cóo vāha ró, nájnūhun íyó vāha ánuá rō jíin jnúhun ya. <sup>3</sup> Yōhyo ni cusī ni rī ná ni quecoo sava hermano te ni cacastúhún de nuū rī ndese vāha squícu ró táca jnínu ndaā, chi jíca ndaā rō. <sup>4</sup> Tuá na inga sáha jeē cúsih gā ni rī, chi mánī jeē nihín rī jnūhun jeē cájica ndaā ñayuu cácuu nájnūhun sēhe rí siquī jeē ni scándíje rí i.

<sup>5</sup> Nánī mánī, yōhyo vāha sáha ró jēē chindéē ñáhán ró tācá hermano, te víhyá gā núu tēe ñuu jíca cácuu de. <sup>6</sup> Chi tēe un ní canacani de jnūhun nuū ñayuu cá-candíje yāhá, ndese cúndáhú ni rō de. Te jícan rī jeē chindéē ñáhán gá rō de, núu na vé jíni ñúhún de jeē caca ga de ichi nuū quíhín de, nájnūhun nújnahan ni Yaā Dios. <sup>7</sup> Chi tēe un ní quendacoo de cájica de siquī jnínu Jesucristo. Te tú na vé cáquihín de nuū ñayuu jeē tu jíni jnūhun Yaā Dios. <sup>8</sup> Jeē yúcuan cánuú coto yó de, chindéē ñáhán yó de jeē cá-nacani de jnūhun ndaā.

### Siquī jeē tú vāha sáha Diótrefes

<sup>9</sup> Je ni tee rí iin carta nuū ñayuu cá-candíje jíñā. Te Diótrefes, tu jétáhú de

jnūhun cáhán rī, siquī jeē cuní de cu-jéhu máá de nuū i. <sup>10</sup> Jeē yúcuan, núu na jée rí te cahán rī nuū de siquī jnínu sáha de, chi yōhyo sájnúhún de te cáhán de jnūhun stáhú siquī rī jíjnáhan rí. Te nasūu máá yúcuan-ni sáha de, chi suni tu jétáhú de tācá hermano jéngoo nuū de, te jési de jeē ma cuátáhú ñayuu nuū tācá hermano un. Te ñayuu cájetáhú nuū hermano un, quénehen de i nuū cándutútú ñayuu cá-candíje.

<sup>11</sup> Nánī mánī, ma ndácu ró ñayuu casáha jnínu néé, chi sa suhva ñayuu casáha jnínu vāha. Chi sēhe Yaā Dios cácuu ñayuu casáha jnínu vāha. Te ñayuu casáha jnínu néé, tu cájini i ndese Yaā cúu Yaā Dios.

### Jeē cácahán i jeē vāha sáha Demetrio

<sup>12</sup> Tāca ñayuu chi cácahán i jeē vāha sáha Demetrio. Te jnínu ndaā jeē sáha de, stéén jeē tēe ndaā cúu de. Te suni súcuan cácahán maá rí, te cájini rō jeē iyó ndáā jnūhun cáhán rí.

### Jnūhun sandíhí

<sup>13</sup> Iyó cuéhē gā jnūhun cahán rí jíin ró, te tu cuní rí tee rí jíin tinta jíin pluma. <sup>14</sup> Chi ñúhún ni rí cuajeē yachī rí coto jnáhan yó, te ndajnūhun yó.

<sup>15</sup> Te ñúhún ni rí jeē na cóo ndeyí coo sī ni rō. Tācá amigo yō vāha cácahán i jeē sándeyí ni rō. Te suni cahán rō jíin iin iin amigo jíñā jeē sándeyí ni i, áchi rí, te cocahán yō.



## CARTA JEE NI TEE SAN JUDAS APOSTOL NUU ÑAYUU CACANDIJE

**1** Máá rí cúu Judas ñani Jacobo, te mozo Jesucristo cúu ri. Te tée ri carta yáha cuájeē nuū rohó ñayuu jeē ní cana máá Tátá yō Yaā Dios, te ni sáha ya jeē iyó ndoo iyó fí rō nuū yā jeē cácuu rō ñayuu maní yā jíín. Te Jesucristo ndíto vāha ya rohó jée cáyihí rō ndaha ya. <sup>2</sup>Te ñúhun ni rí jeē na cúndáhú gá ni yā rohó, te sáha ya jeē coo ndeyí coo sīi ni rō, te coo maní ndasí yá jíín rō, te na ndúcuehē gā tāca jée yáha núū rō.

### Siquí tēe cástéén jñūhun stáhú

(2 Pedro 2.1-17)

<sup>3</sup>Ñāni mánī, yōhyo ní cuu ni rí tee ri nuū rō siquí jñūhun ni jnama ya rohó jíín rúhū jijnáhan yó. Te ni jini rí jeē cánuú gá tee ri carta jeē stíhví ni rí rohó návāha nducú ndeyí rō jeē ma cási ñayuu nuū jñūhun cácanđije yó. Te jñūhun ún chi je ni jēhe ya iin jínu-ni nuū tāca ñayuu maá yá. <sup>4</sup>Chi sava tēe ni castáhú de rōhó ní quívicoo de mēhñu rō. Te tēe ún chi nde jenahán je cáhán tutu ii jeē jnahnú ndetū de siquí jñíñu casáha de. Cácuu de tēe ndevāha, chi cácahān de jeē vāha ni Yaā Dios, te jeē yúcuan vetū-ni sáha de jniñu néé, cácahān de. Te tu cájejnúhún ndije de Jitoho yō Jesucristo jíín Yaā Dios, jeē mañúhún-ni ya cujéhnū nuū yō.

<sup>5</sup>Te vijna chi vēsú je cájini vāha rō, te cúní rí jeē na núcūhun ni rō ndese ni sáha máá Jitoho yō. Chi ni jnama ya ñayuu Israel jenahán, ni chindéé ñájñáhan ya i jeē ní jinu i ini ñuu tatú Egipto cuahān i. Te vēsú súcuan te cuéé gá te ni snāá yā sava i jeē tu ní cácanđije i. <sup>6</sup>Te suni nucūhun ni rō siquí ndajéhé yā jeē ní castóo jniñu ndíso, te ni castóo nuū ní ndeē andíví. Te Yaā Dios ni chindihyū yā jijnáhan, te cándetu nde

quiji quiví cáhnu jeē sándaā yā jniñu. Te cánuhnī jíín cadena, cáyūcu ní cáni nuū cunú núū néé. <sup>7</sup>Te suni ni stóho ya ñayuu ñuu Sodoma jíín ñuu Gomorra jíín sava ga ñuu jeē ní iyo yajni, chi suni ni casáha néé i nájñūhun ni casáha tāca ndajéhé un ndé jenahán gá. Te máá i ni cajica jnéni i te ni casáha i tāca cuéchi néé ndasí. Te ni canihin i castigo ñuhūn jeē cayú ní cáni, te súcuan cúu i iin ejemplo nuū ndihí ñayuu.

<sup>8</sup>Te tēe cástáhú jeē ní quívicoo mēhñu rō, vēsú cájini de jeē súcuan ni sáha ya, te cájeni cáhá ni de, te casáha jnéhén de yiquí cúñu de, te cásquéhichí ni de tēe cándacu jniñu Jitoho yō, te cácahān ndevāha de siquí tāca jée cácujuhūnu nuū sucún. <sup>9</sup>Te nasūu súcuan ní sáha ndajéhé Miguel, vēsú ndajéhé cujéhnū ga cúu ya. Chi tu ní cáhán ndevāha ya ni tu ní ndácunehen ya cuéchi siquí jexeén ná ni casásáhán jnáhan ya jíín jéxeén un jeē siquí yiquí cúñu Moisés ná ni jihí de. Chi suhva-ni ni cahān yā: Máá Yaā Dios, Yaā cúu Jitoho, cuxeén yā nuū rō, ni achi Miguel. <sup>10</sup>Te tēe cástáhú yáha chi cácahān neé de siquí tāca jée tu cájecūhun ni de. Te tāca modo cánevāha de siquí jeē sá cáa de, nájñūhun quití yúcu jée sá cáa tí, suu yúcuan sáha jeē jnahnú ndetū de.

<sup>11</sup>Nacā xeēn ndoho de núu súcuan, chi tu cájetáhú de Yaā Dios, nájñūhun jeē tu ní jétáhú Caín. Te siquí jeē cá-cuni de nihin de xūhún te cástéén de jñūhun stáhú, nájñūhun ni sáha Balaam. Te jnahnú ndetū de nájñūhun Coré, tēe ni jihí siquí jeē ní cunihni ni de. <sup>12</sup>Tēe yáha núu cándutútú de jíín rō jeē cáyeji maní rō, te casáha de jniñu cúcanu rō. Chi cáyeji cájihí sīi ni de, te tu casáha de cuenta ndese caji inga ñayuu, chi mání máá de ndíhví ni de caji vāha de. Te cácuu de nájñūhun vicō íchi jée stechí táchí. Te suni cácuu de nájñūhun yujnu jeē tu jéhe ndehē maá tiempo. Te cácuu

de nájñūhun yujnu jeē ní quenda nde jíin yoho, te tú cuiṭi gā na modo nane numa. <sup>13</sup>Te nájñūhun jeē jisó cóyo ndute mar te cáne tiñū, súcuan jícu de jíin jniñu néé jéé cúu jñūhun canu. Te cácuu de nájñūhun quimi jeē ní sana ichi. Te je íyó túhva nuū néé nuū lúchi jnúú coyūcú de níí cáni.

<sup>14</sup>Te jeē ní yāha iñū yucūn Adán, te ni cacu Enoc, te ni nacani de jñūhun jeē ni stéén Yaā Dios nuū de siquī tāca téé yāha, áchí de: Máá Jítóho yō ni steén yā nuū rí jeē iin quiví te quiji ya jíin cuéhē mil ñayuu maá yá. <sup>15</sup>Te sándāā yā jniñu tāca ñayuu, te snáhnú ndetū yā tāca ñayuu casáha néé. Chi máni jniñu néé casáha i siquī jeē canéé máá i, te cácahān i cuehē jñūhun ndevāha siquī yā. Ni achi Enoc. <sup>16</sup>Tāca téé yāha máni cácahān sōó de, te cácahān de siquī ñayuu. Te máni jeē cúsi ní maá de cánducú de. Te cácahān de jeē téé téyí cácuu de, te cácahān yiñúhún de jíin ñayuu návāha nihin de jecu nuū i.

### Jeē stihví ní Judas ñayuu cácañdije

<sup>17</sup>Te máá ró jijnáhan ró ñáni máni, na núcūhun ni rō jñūhun jeē jé ni canacani téé cácuu apóstol maá Jítóho yō Jesucristo. <sup>18</sup>Chi ní cacahān de: Nde nuū cuándihí quiví te quijicoo téé sácatā siquī jñūhun ndāā yā, te sáha de táca jniñu néé jéé ndíyo ni maá de. Súcuan ni cacastūhún apóstol. <sup>19</sup>Téé un cúu jeē

casásñin ñayuu. Te máni cándihví ni de tāca jéé cutíndí ni maá de, chi tu ndéé Espíritu yā jíin de.

<sup>20</sup>Te máá ró ñáni máni, na íje vāha ni rō jíin jñūhun ndoo ndasí jéé cácañdije ró. Te cacān tahú rō jíin fuerza Espíritu Santo. <sup>21</sup>Te quendōo nihin ró jíin jñūhun jeē cundáhú ni Yaā Dios rohó. Te condetu ró quiví jeē cótecu rō níí cáni sáha máá Jítóho yō Jesucristo siquī jeē cundáhú ni yā rohó.

<sup>22</sup>Te sava ñayuu jeē cájeni siquí ni, nducú ró modo scandíje ró i. <sup>23</sup>Te sava ga i chi nducú ndéyí ró jeē cácu i nuū cuéchi i, jeē nájñūhun stāa ró i nuū ñuhún. Te cundáhú ni rō i jnama ró i, te coto ró máá ró, te cuquini ni rō coto ró nde sahma i jeē ní cujnéhén jíin jniñu néé casáha i.

### Jñūhun cújéñnu Yaā Dios níí cáni

<sup>24</sup>Te Yaā Dios chi máñúhún-ni máá yá cúu Yaā ndichí, Yaā jnáma yóhó. Te íyó poder yā jeē coto ya rohó jéé ma quiví ró cuéchi, jíin jéé sáha ya jeē cuíñi ró núú ndíndēe yá, te quiví ún coo ndoo ró núú yā, te cusí ndasí ni rō sáha ya. <sup>25</sup>Te na cáhán yō jeē yóhoyo luu cújéñnu ya siquī jeē ni sáha ya jíin Jítóho yō Jesucristo. Te na cáhán yō jeē cújéñnu téyí yá, te ndácu ya jniñu jíin poder jeē ndíso ya nde jenahán ndasí jíin ndé vijna jíin ndé níí cáni. Súcuan na cóo. Amén.

## JNIÑU QUIJI JEE NI JITO NDIJIN SAN JUAN

### Jeë ni stéén Jesucristo tācá jniñu quiji

**1** Jñuhun yáha cúu jeë ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñáyuu cácanđije jeë cácuu i mozo yā. Te stéén yā nuū i tācá jniñu jeë yachī coo. Te ni tají yá ndajéhé yā ni quiji ya ni steén ndijin yā jniñu un núu ruhū Juan jeë cúu ri mozo yā. <sup>2</sup> Te máá rí cástūhun ndāā rī siquī tāca jéē ní jito ri ún, te ná-cani ndāā rī jñuhun Yaā Dios jíin jñuhun jeë ní cahān ndāā Jesucristo.

<sup>3</sup> Yōhoyo ndetū ñayuu cahu tutu yáha, te suni yōhoyo ndetū ñayuu cuni nahín jeë cáhu ñayuu tāca jñuhun yáha jeë ní cachi Yaā Dios, te chuhun ni i. Chi je cuacuyajni quivī coo tācá jniñu yósó núu tútu yáha.

### Jeë tée Juan carta nuū ndihúxá grupo ñayuu cácanđije

<sup>4</sup> Máá rí cúu Juan, te tée ri jñuhun yáha cuájeë nuū rohó, ndihúxá grupo ñayuu cácanđije jeë cáyūcu Asia. Te ñúhún ni rī jeë máá Yaā Dios na sáha ga yā jeë váha rōhó jíjnáhan ró, te sáha ya jeë coo ndeyí coo sī ni rō. Chi máá yá cúu Yaā iyó vijna, te ni iyo ya ní cání, te coo ya ní cání. Te ñúhún ni rī jeë suni súcuan sáha ndihúxá Espíritu jeë cáhiin ya yuhu mesa nuū ndácu Yaā Dios jniñu. <sup>5</sup> Te ñúhún ni rī jeë suni súcuan sáha Jesucristo, Yaā cahán ndāā tāca jñuhun. Te xihna gā máá yá ni natecu mēhñu ndíyī. Te cújéhu ya nuū tāca rey jeë iyó ñayiví. Te máá yá cúndáhú ni yā yohó, te ni nacate ya yohó núu cuéchi yó jíin níñī yā. <sup>6</sup> Te ni sáha ya jeë ní nduu yó rey jíin sútú cájejniñu nuū Tatá yā Yaā Dios. Te na cáhán yō jeë yóhoyo luu cújéhu ya te jnái ya poder ní cání. Amén.

<sup>7</sup> Cuni sōho jíjnáhan ró, chi ndiji Cristo jíin vícō. Te ndívii ñayuu coto i nuū yā, te nde jíin ñáyuu jeë ní castújí i ya. Te tāca raza ñayuu ní cáhnu ñayiví ndahyū i jeë tu ní cácanđije i ya. Súcuan nahín coo.

<sup>8</sup> Suhva cáhán maá Jítoho yō, Yaā jnái ndihi poder: Máá rí cúu nájñuhun letra A xihna ñúhún jíin letra Z jeë sándihí na, chi máá rí ni squejéé ndihi te máá rí sínu, áchí máá Yaā iyó vijna, te ni iyo ya ní cání, te coo ya ní cání.

### Jeë ní jito Juan jeë cújéhu luu Cristo

<sup>9</sup> Máá rí cúu hermano rō Juan jíjnáhan ró. Te inuú-ni ndóho ri jñundóho jíin ró siquī jeë cácanđije yó Jesucristo, te inuú-ni ndácu Yaā Dios jniñu nuū yō, te inuú-ni jéndeýí ni yō sáha Jesucristo. Te siquī jeë ní nacani ri jñuhun Yaā Dios jíin jéē ní cachi ndāā rī jñuhun Jesucristo, jeë yúcuan ní cajni i ruhū cuenta preso, te ni cachune i ruhū isla jeë naní Patmos. <sup>10</sup> Te iin domingo ni jito ndijin rī jeë ni stéén maá Espíritu Santo nuū rī. Te ni jini sōho ri iin jeë cána jee nihin ichi yátá rī nájñuhun jeë tívi trompeta. <sup>11</sup> Te ni cahán jíin rī:

Máá rí cúu nájñuhun letra A xihna ñúhún jíin letra Z jeë sándihí na, chi máá rí cúu Yaā iyó ndé xihna ñúhún te coo ri ní cání. Te na tée ró núu iin tutu tāca jéē cóto ró, te tají ró quihñ nuū ndihúxá grupo ñayuu cácanđije jeë cáyūcú i ní cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

<sup>12</sup> Yūcuán na te ni ndicó cóto ri jeë cóto ri ndé iin cúu jeë cahán jíin rí. Te ná ni ndicó cóto ri te ni jito ri uxā candelero oro. <sup>13</sup> Te mēhñú ndihúxá candelero un índichi máá Yaā ní nduu tē. Te ñúhún ya iin sahma cání jeë jinú nde nuū jehé yā. Te núhñi iin cinturón oro jicā yā. <sup>14</sup> Te ixi xíní yā chi yaa nájñuhun

ixi lánchi, nájñuhun yuhvā volcán. Te tinūu ya ndíndēe nájñuhun yáñuhūn. <sup>15</sup>Te jehē yā xīñú jíto nájñuhun cāa cuaán jēē ni ndúhvā nuū horno. Te nñhin ndasí cáhán yā, nájñuhun nñhin cuehē yūte nāhnu. <sup>16</sup>Te ndaváha ya jñí ya uxā quīmi. Te yuhu ya quéndā jeē cāa nájñuhun espada jeē xeén ndíndúú lado, te suu cúu jñuhun ya jeē niní sándaā yā siquī cuéchi. Te nuū yā cāa nájñuhun niándii jeē nándii ndaxín.

<sup>17</sup>Te ná ni jito ri yā te ni cotúú rí nuū jéhē yā nájñuhun jeē ni jíhi rí. Te ni soó yā ndaváha ya siquī rí, te ni cahān yā:

Ma yūhu ró. Máá rí cúu Yaā iyó ndé xihna ñúhún te coo ri níí cáni. <sup>18</sup>Te Yaā técu cúu ri. Chi ni jíhi rí te ni natecu rí, te vijna chi técu rí níí cáni. Te máá rí jñí poder siquī cuéhyī jéhni ñayuu jíin siquī lugar nuū cáyūcu ánuá ndīyí. <sup>19</sup>Núu súcuan te tee ró núu tútu tāca jēē ní jito ró, jeē cúu vijna jíin jēē cóo ichi núu. <sup>20</sup>Te yāha cúu jñuhun sāhi siquī ndihúxá quīmi ni jito ró jñí ndaváha ri, jíin siquī ndihúxá candelero oro. Ndiuhúxá quīmi ún cúu nájñuhun ndihúxá jeē cácujeñnu nuū ndihúxá grupo ñayuu cácuandíje. Te ndihúxá candelero cúu nájñuhun ndihúxá grupo ñayuu cácuandíje.

### **Jñuhun cuahān nuū ndihúxá grupo ñayuu cacandíje:**

#### **Jñuhun cuahān ñuu Efeso**

**2**<sup>2</sup>Te tee ró jñuhun yāha na quíhín nuū jeē cujéñnu nuū ñayuu cácuandíje ñuu Efeso: Súcuan cáhán ruhū, Yaā jeē jñí ndihúxá quīmi jíin ndaváha ri, te jíca cuu ri mēhñú ndihúxá candelero oro. <sup>2</sup>Je jíin rí tācá jñiñu váha casáha ró, jeē cándihvī ni rō siquī jñuhun ri, jíin jēē cájendeyí ni rō. Te jíin rí jeē tu cájēhe ró jñuhun quívicoo ñayuu casáha néé méhñu ró. Te jíin rí jeē ní cajito ndee rō tēe cástáhú jeē cácahān de jeē cúu de apóstol, te ni cajini rō jeē tēe stáhú

cácuu de. <sup>3</sup>Te ni cajendeyí ni rō ni candoho ró jñúndóho, te tu ní ndínuu ni rō jeē cácuu ndasí ró jíin jñiñu ri. <sup>4</sup>Te vēsú súcuan te íyó jecu jeē cahán rí nuū rō, chi tuá cáhiyo maní váha ró jíin rí nájñuhun ni íyo maní rō jíin rí quívī jehé. <sup>5</sup>Núu súcuan te nucūhun ni rō ndese ni castóo ró jñuhun jeē ni íyo maní rō jíin rí, te nacani ni rō, te na sáha ró nájñuhun ni casáha ró ndé quívī ún. Te núu ma nácani ni rō, te yachí jeē rí te stáa ri candelero rō nuū ín, cúu jeē ma cuíñi ga rō jíin ñayuu cácuandíje. <sup>6</sup>Te vēsú súcuan te íyó ín jeē váha casáha ró, chi tu cánujnahan cuítí ni rō cájito ró jñiñu néé casáha ñayuu cándiquín jñuhun jeē steén Nicolás. Te suni máá rí tu nájñuhan cuítí ni rí jíto ri. <sup>7</sup>Ñayuu iyó sóho na chúsóho i jeē cahán maá Espíritu Santo jíin táca grupo ñayuu cácuandíje. Tāca ñayuu jeē cúndeyí siquī jeneé, cuāha ri jñuhun caji i ndehē jeē cúun xiní yújnu jeē sáha jeē cótecu i níí cáni. Te yujnu un ín nuū jardín Yaā Dios nde andiví, áchi yá.

#### **Jñuhun cuahān ñuu Esmirna**

<sup>8</sup>Te tee ró jñuhun yāha na quíhín nuū jeē cujéñnu nuū ñayuu cácuandíje ñuu Esmirna: Súcuan cáhán ruhū, Yaā jeē iyó ndé xihna ñúhún te coo ri níí cáni, te ni jíhi rí te ni natecu rí. <sup>9</sup>Je jíin rí tācá jñiñu váha casáha ró, jíin jñúndóho cándoho ró, jíin jēē cándoho ndáhú ró. Te vēsú súcuan te cúcá ró ndihi jeē ndíso jñuhun ri. Te jíin rí jeē cácahān neé ñayuu siquī rō jijnáhan ró. Ñayuu un cácahān i jeē ñayuu hebreo, ñayuu maá Yaā Dios cácuu i, te tuú chi cástáhú-ni i, chi sa ñayuu yñhi ndaha Satanás cácuu i. <sup>10</sup>Te ma yūhú cuítí rō tāca jēē ndoho ró. Chi jexeén je yajni sáha jeē quívicoo sava ró vecāa jeē cóto ndee rohó jíjnáhan ró, te ndoho ró jñúndóho uxí quívī. Te na cuíñi nihin ró ndé cuu rō, te cuāha ri premio jeē cótecu rō níí cáni. <sup>11</sup>Ñayuu

iyó sóho na chúsóhó i jeē cahán maá Espíritu Santo jíin táca grupo ñayuu cácan-díje. Tāca ñayuu jeē cúndeyí síquī jéneé, ma nihín i jnündóho jeē jnahnú ndetū i cuu i vuelta uū, achí yá.

### Jnūhun cuahān ñuu Pérgamo

<sup>12</sup>Te tee ró jnúhun yáha na quíhín nuū jeē cujéhnu nuū ñayuu cácan-díje ñuu Pérgamo: Súcuan cáhán ruhū, Yaā jeē névāha espada jeē xeén ndindúú lado, te suu cúu jnúhun ri jeē sándaā rī síquī cuéchi. <sup>13</sup>Je jíin rī tācá jniñu váha cásáha ró, te jíin rī jeē cáyūcu ró mēhñu ñayuu jeē ndácu Satanás jniñu nuū. Te vēsú súcuan te cáhiin nihin ró jíin jnúhun ri, te tu ní cánayūhu ró jeē cácan-díje ró rúhū, ni quivī ni jíhi Antipas, tēe ni squícu váha ni nacani ndaā jnúhun ri. Chi ñuu rō cáyūcu ñayuu cá-jejniñu nuū Satanás, te ni cajehni i Antipas. <sup>14</sup>Te vēsú súcuan te íyó jecu jeē cahán rī nuū rō jijnáhan ró. Chi mēhñu róhó ñayuu ñuu Pérgamo iyó sava ñayuu cándiquin jnúhun ni steén Balaam. Chi tēe un ní steén de nuū Balac ndese squívī de ñayuu Israel cuéchi jeē cáji i jeē ni sócō nuū ídolo jíin jéē cosíquí ndéē jnáhan i. <sup>15</sup>Te suni íyó sava ñayuu mēhñu ró jeē cácan-díje ga i jnúhun ni steén Nicolás, te jnúhun ún chi tu núnjahan cuítī ni rī. <sup>16</sup>Núu súcuan te nacani ni rō síquī cuéchi ró. Chi núu tuú te yachī jeē rī jíin espada jeē quéndā yuhu rī, te suu cúu jnúhun ri jeē sándaā rī síquī cuéchi. Te jíin yúcuan te stóho ri ñayuu jeē candíje ga jnúhun néé un. <sup>17</sup>Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cácan-díje. Tāca ñayuu jeē cúndeyí síquī jéneé, scáji rī i maná jeē yísāhí ichi ándiví. Te suni cuāha ri ñin yuū cuijín núū i, te nuū ún condee ñin síhvī jéé, te ni ñin ñayuu ma cúnī síhvī un, chi máá-ni i jeē nihín. Achí yá.

### Jnūhun cuahān ñuu Tiatira

<sup>18</sup>Te tee ró jnúhun yáha na quíhín nuū jeē cujéhnu nuū ñayuu cácan-díje ñuu Tiatira: Súcuan cáhán ruhū, maá Séhe Yaā Dios jeē ndíndēe tñūu rī nájñūhun yáñuhūn. Te jehē rī xínú jíto nájñūhun cāa cuaán jéē ni ndúhvā. <sup>19</sup>Je jíin rī tācá jniñu váha cásáha ró, chi cá-cundáhú ni rō jnáhan ró, te cácan-díje nihin ró rúhū, te cájejniñu ró núū rī, te cájendeyí ni rō. Te jíin rī jeē vihyá gā cásáha ró vijna vēsú nde quivī jehé. <sup>20</sup>Te vēsú súcuan te íyó jecu jeē cahán rī nuū rō. Chi íyó ñin ñahan mēhñu ró jéē naní Jezabel, te cájehe ró jnúhun stéén ña nuū rō. Te áchí ña jeē nácani ña jnúhun Yaā Dios. Te tuú chi jíin jnúhun stéén ña te stáhú ña ñayuu cácan-díje jeē cácuu i mozo rī. Te sáha ña jeē casíquí ndéē jnáhan i, jíin jéē cáyeji i jeē ni sócō nuū ídolo. <sup>21</sup>Te ni jēhe ri tiempo jeē na nácani ni ña, te tu cúnī ña nacani ni ña stóo ña jeē casíquí ndéē ña. <sup>22</sup>Núu súcuan te na sáha ri jeē jécava ña jíin cuéhyī. Te tāca ñayuu casíquí ndéē jíin ña, suni cuāha ri jnündóho xeén nuū i, te núu ma nácani ni i stóo i jniñu néé nájñūhun sáha ña. <sup>23</sup>Te sáha ri jeē cúū ñayuu jeē ni scándíje ña. Te súcuan cuni tāca grupo ñayuu cácan-díje jeē maá rī cúu Yaā jíin ndihī ndese cāa jeē níjnūnī jíin ánuá ñayuu. Te cuāha ri yāhu ñin ñin ró núu ndese ni casáha ró. <sup>24</sup>Te sava ga rō jeē cáyūcú ñuu Tiatira, jeē tu ní cájetáhú jnúhun stéén ñahan ún, ni tu ní cájniñu ró jnúhun jeē cácahān i jeē jnúhun sáhi gá Satanás cúu, jíin máá ró cahán ri jeē ma tēe ga rī inga jniñu síquī rō. <sup>25</sup>Chi máá-ni jeē na quéndōo nihin ró jíin jnúhun ndaā cácan-díje ró, te quendōo nihin ró jíin ndé quivī ndíji rī. <sup>26</sup>Tāca ñayuu jeē cúndeyí síquī jéneé, jíin jéē squícu váha jniñu cúnī rī nde vijna te nde quivī sándíhí, sáha ri jeē cu-jéhnu i ndacu i jniñu nuū tācá nación,

<sup>27</sup> nájñuhun ni sáha Tátá ri jeē cujéñnu ri ndácu ri jniñu. Te ndacu niñin i jniñu nuū tācá nación. Te nájñuhun cúun yúú i quísi tahú, súcuan squéhichí i ñayuu tu cájendetū nuū rí. <sup>28</sup> Te sáha ri jeē coto i ruhū jeē luu cujéñnu ri quenda ndijin rí, nájñuhun jíto i lucero jeē cáne cúndijin. <sup>29</sup> Ñayuu iyó sóho na chúsóhó i jñuhun jeē cahán maá Espíritu Santo jíin táca grupo ñayuu cácanđije. Achí yá.

### Jñuhun cuahān ñuu Sardis

**3** <sup>1</sup> Te tee ró jñuhun yáha na quíhín nuū jeē cujéñnu nuū ñayuu cácanđije ñuu Sardis: Súcuan cáhán ruhū, maá Yaā jeē névāha ndihúxá Espíritu Yaā Dios jíin ndihúxá quími. Je jíni rí tācá jniñu cásáha ró, te cácahān ñayuu jeē cátecu rō, te nuū rí chi nájñuhun ndíyí cácuu ró. <sup>2</sup> Na nátañu ni rō, te ndejéé niñin ró jíin jniñu jeē jecu na iyó te ndúcú naa. Chi je jíni rí jeē tu squícu vāha vāha ró núu Yaā Dios. <sup>3</sup> Te na núcūhun ni rō tāca jñuhun jeē ní castéén nuū rō. Te cuatáhú ró jñuhun ún te nacani ni rō siquí cuéchi ró. Chi núu tú natañu ni rō, te cuajeē rí nuū rō iin sanaa-ni nájñuhun jeē iin sanaa-ni te quíji ñacuíhná, te ma cúni rō na hora jinū rí nuū rō. <sup>4</sup> Te vēsú súcuan te iyó nahín jecu rō ñuu Sardis jeē tu ní cásáha ró cuéchi, jeē cúu nájñuhun jeē tu ní sájñéhén ró sahma ró. Jeē yúcuan cujíin yaa coo sahma ró caca ró jíin rí, chi ñayuu vāha cácuu ró. <sup>5</sup> Chi tāca ñayuu jeē cúndeyí síquí jeneé, cuāha ri sahma cujíin yaa cuhun i. Te ma ndáhva rí síhví i nuū libro jeē yosó síhví ñayuu cotecu níf cáni. Te cuajnúhún rí i nuū Tátá rí jíin núu tācá ndajéhé yā. <sup>6</sup> Ñayuu iyó sóho na chúsóhó i jñuhun jeē cahán maá Espíritu Santo jíin táca grupo ñayuu cácanđije. Achí yá.

### Jñuhun cuahān ñuu Filadelfia

<sup>7</sup> Te tee ró jñuhun yáha na quíhín nuū jeē cujéñnu nuū ñayuu cácanđije ñuu

Filadelfia: Súcuan cáhán ruhū, Yaā ndoo Yaā ndaā, te névāha ri ndacáa rey David. Te máá rí núne jeē quívi ñayuu nuū ndácu ri jniñu, te ni iin ma cúu casí, te máá rí jési, te ni iin ma cúu nune. <sup>8</sup> Je jíni rí tācá jniñu vāha cásáha ró. Te ni nune ri nájñuhun iin yéhyí quívicoo ró, te ni iin ma cúu casí. Chi vēsú jecu-ni fuerza rō iyó, te ni cacandíje ró jñuhun ri, te tu cájesi rō yuhu ró jéé cácanđije ró rúhū. <sup>9</sup> Te iyó sava ñayuu yíhi ndaha Satanás, te cácahān i jeē ñayuu hebreo, jíin ñayuu maá Yaā Dios cácuu i, te tuú chi cástáhú-ni i. Núu súcuan te sáha ri jeē jécoo i nuū rō te jecuíñi yití i nuū rō, te cuni i jeē maní rí jíin ró. <sup>10</sup> Te vāha ni casquícu ró jñuhun ní cahān rí jeē cuándeýí ni rō. Te jeē yúcuan jnama ri rohó quíví jeē quíji iin jñundóho xeēn siquí ñayuu níf cáhnu ñayívi, jéé cóto ndee ún i jíjnáhan i. <sup>11</sup> Te yachí ndiji rí. Núu súcuan te quendōo niñin ró jíin jñuhun cácanđije ró, návāha ni iin ma quénde premio rō. <sup>12</sup> Tāca ñayuu jeē cúndeyí síquí jeneé, sáha ri jeē cuu i nájñuhun siñin yuū luu ini templo Yaā Dios maá rí. Te ma cújiyo i nuū ndeé yá un. Te tee ri síhví Yaā Dios maá rí jneē i, jíin síhví jéé máá rí, jíin síhví ñuu Yaā Dios maá rí. Te ñuu un cúu Jerusalén jeé, te cuun quiji ichi ándiví ndé nuū Yaā Dios maá rí. <sup>13</sup> Ñayuu iyó sóho na chúsóhó i jñuhun jeē cahán maá Espíritu Santo jíin táca grupo ñayuu cácanđije. Achí yá.

### Jñuhun cuahān ñuu Laodicea

<sup>14</sup> Te tee ró jñuhun yáha na quíhín nuū jeē cujéñnu nuū ñayuu cácanđije ñuu Laodicea: Súcuan cáhán ruhū, maá Yaā cúu jñuhun ndaā, Yaā cúu testigo vāha jeē cahán ndaā. Te máá rí ni sáha ndíhi jeē ni cáhān Yaā Dios jeē na jécōo. <sup>15</sup> Je jíni rí tācá jniñu cásáha ró. Te cácuu ró nájñuhun jeē tú mijin ni tú jihní, cúu jeē jecu-ni cácanđije ró jñuhun ri, te ni

tu cájito uhū rō ni tu cándihvī ni rō siquī. Te nacā jeē váha núu jeē mǐjin ró chí jéē jihní ró nuú. <sup>16</sup>Te tuú chi máá yívixi-ni ró, chi ni tu cájito uhū rō ni tu cándihvī ni rō siquī. Te jeē yúcuan squéhichī rī rohó nájñuhun ñin jeē tésihī rí jeē séyūhu rí jeē tu nújnahan ni rī. <sup>17</sup>Te cácahān rō jeē cucá ró, te quéndōo vāha ró, te tu cúmanī ni ñin nuū rō. Te tu cásáha ró cuenta jeē cuécá ñi cándoho ró, te ndáhú ndasí ró, te cácuáá ró, te máá ñii líi rō. Te tāca jéé yáha cúní cahān jeē tu cácañdije vāha ró. <sup>18</sup>Núu súcuan te cáhān rī jíin ró jeē nuū rī cuaan ró oro jeē ni ndúhvā nuū ñuhún te ni nduu máá nene, te suu cúu jeē sáha rī jeē coo cúcá ndije ró ndihi jeē ndíso jñuhun rī. Te nuū rī cuaan ró sahma cuijín cuhun ró, návāha tú cucanu rō jeē maá ñii líi rō, cúu jeē quéndōo ndāā rō sáha rī. Te cuaan ró tájnā nuū rī, quēvi tinūu ró, návāha ndundijin tinūu ró, cúu jeē jecūhun ni rō jñuhun rī. <sup>19</sup>Tāca ñáyuu jeē cundáhú ni rī, chí cáhān rī nuū i te stóho rī i, návāha na chūhun ni i. Núu súcuan te na cóndihvī ni rō jijnáhan ró, te nacani ni rō jeē stóo ró cuéchi ró. <sup>20</sup>Cuni sōho, chí ñin rī yehyí ánuá rō te cáhān rī. Te núu ndé-ni rōhó cuni sōho te nune ró yéhyí ánuá rō, te quēvi rī caji rī staā jíin ró, te suni caji máá ró jíin rí. Te suu cúu jeē cóndee rī anuá rō. <sup>21</sup>Tāca ñáyuu jeē cúndeyí síquī jeneé, cuāha rī jñuhun conene i jíin rí nuū mesa nuū ndácu rī jñiñu. Chí máá rí suni ni snāā rī poder jeneé, te ni cucōo rī jíin Tátá rī nuū mesa nuū ndácu ya jñiñu. <sup>22</sup>Ñayuu iyó sōho na chúsóhó i jñuhun jeē cahān máá Espíritu Santo jíin táca grupo ñayuu cácañdije. Achí yá.

**Tāca jéé cáyūcú andiví  
cáchiñúhún nuū yā**

**4** Yūcuán na te ni ndacoto rī, te ni jito rī jeē núne ñin yéhyí andiví, te máá Yaā jeē ni cáhān jíin rí jeē xíhna ññuhún,

ni cahān tucu jíin rí nájñuhun jeē tívī trompeta. Te ni cahān:

Caa quiji ró yáha, te na stéén rī nuū rō tācá jñiñu jeē cóo ichi núu gā, achí yá.

<sup>2</sup>Te máá Espíritu Santo ni scóto-ni ya ruhū. Te ni jito rī jeē andiví ñin ñin mesa nuū ndácu jñiñu, te néne máá yá nuū mesa un. <sup>3</sup>Te máá yá jeē néne yūcuan cáa ya nájñuhun ndíndee ñin yuū quiyi ndí chí ñin yuū cuehé ndí. Te ñin ticō vėhnde ní jicó ndúú yuhu mesa yā, te ndíndee nájñuhun ñin yuū cuí ndí. <sup>4</sup>Te xiin mesa yā ni jito rī jeē ní jicó ndúú ocō cuñ gā mesa nuū ndácu jñiñu. Te nuū mesa un néne ocō cuñ tēe jėhnu cándiso jñiñu. Te cáñuhun de sahma cuijín yaa, te xiní de cáñuhun corona oro. <sup>5</sup>Te nde nuū mesa nuū ndácu ya jñiñu ndíndee taja te ññin te cáhān taja. Te ichi núu mesa yā ñin ndihúxá Espíritu Yaā Dios, jeē cáa nájñuhun uxā yiti náhnu jeē cayú ñuhun. <sup>6</sup>Te ichi núu mesa yā ún suni íyó nájñuhun ñin mar jeē jíto quiyi nájñuhun vidrio.

Te xiin mesa yā un ní jicó ndúú cuñ jeē técu. Te íyó cuehé tinūu ní cáhnu ichi núu jíin ichi yátá un. <sup>7</sup>Te ñin jeē técu un cáa nájñuhun ndicaha. Te ñnga cáa nájñuhun stiquī. Te jeē uní chí nēe nuū tēe. Te jeē cuñ chí cáa nájñuhun yaha chócó jéé jicó núu tachí. <sup>8</sup>Te ndicúun jeē técu un íyó ññu ndijēn jeē ñin ñin. Te máni máá tñūu cúu ní cáhnu nde jíin ní chíji ndijēn. Te nduú ñuú tu jécuiñi cuiti jeē cahān:

Yaā ñi Yaā ndoo ndasí

cúu máá Jítoho yō Yaā Dios, Yaā jñí ndihi poder,

Yaā iyó vijna, te ni iyo yá ní cáni, te coo ya ní cáni.

Achí.

<sup>9</sup>Chí máni jeē cácahān ndicúun un jéé cujėhnu ndasí máá Yaā jeē néne nuū mesa, Yaā jeē técu ní cáni cuiti. Te yíñuhún cácahān un jíin yá, te nácu-atáhú núu yā. <sup>10</sup>Te tāca jínu jeē casáha

súcuan, te ndihóco cuūn tēe jéhnū cándiso jníñu, cájecuññi yití de nuū Yaā jeē técu ní cáni cuiti, cáchiñúhún de ya. Te cástaa de corona de, cájequin de ichi núú jehé mesa yā. Te cácahān de:

<sup>11</sup> Jitoho ná te Yaā Dios na cúu ní.

Te vāha ndasí Yaā cúu ní jéē cácahān i jeē luu cújéhnū ní, te cáhiyo yñúhún i nuū ní, te jñí ní ndihi poder.

Chi máá ní ni sáha ndihi jeē iyó, te siquí jeē súcuan ni cuu ni maá ní te ni jecōo ndihi.

Achí de jíjnāhan de.

### Jeē ní nune Londe Yaā Dios tutu

**5** Yūcuán na te ni jito ri jeē Yaā néne mesa jeē ndácu jniñu, ndaváha ya jñí ya iin tutu cáni jeē ní tuu. Te yósó jnúhun ndindúú lado tutu ún, te ndíhyú jíín úxā sello. <sup>2</sup>Te ni jito ri iin ndajéhé yā jeē ndíso poder, te ni cahān jee:

¿Ndé iin cúu tēe vāha ndasí jeē cóndiso jniñu cahnde sello te nune tutu yáha? achí ndajéhé yā.

<sup>3</sup>Te ni andiví ni ñayiví ni jeē iyó chíji ñayiví, tu ní íyo ni iin jeē cóndiso jniñu nune tutu ún, ni jeē cóto nuū. <sup>4</sup>Te ni ndahyū ndasí rí, chí tu ní íyo ni iin jeē cóndiso jniñu nune te cahu tutu ún, ni jeē cóto nuū. <sup>5</sup>Yūcuán na te ni cahān iin tēe jéhnū un jíín rí:

Ma ndahyú rō, chí íyó iin Yaā ndíso jniñu jeē cahnde yā ndihúxá sello ndihyú tutu, te nune ya. Te máá yá chí íyó cuéhē poder yā, nájñuhun jeē iyó cuéhē fuerza iin ndicaha. Te ni cacu ya chíji yucūn Judá, jeē cúu yucūn rey David. Te ni snáa yā poder tāca jéneé.

<sup>6</sup>Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un iin ya nuū iin mesa Yaā Dios, mēhñu ndicúún jeē técu, jíín tēe jéhnū cándiso jniñu. Te íyó úxā ndiquí jíín úxā tinūú Londe ún. Te tinūú un cúu ndihúxá Espíritu Yaā Dios jeē ní

tají yá ni jengoo ní cáhnu ñayiví. <sup>7</sup>Te Londe un ní jequihin ya tutu jeē jñí ndaváha Yaā jeē néne nuū mesa. <sup>8</sup>Te ná ni quihin ya tutu ún, te ndicúún jeē técu jíín ndihóco cuūn tēe jéhnū cándiso jniñu, ni cajecuññi yití núú yā. Te ná iin ná iin tēe jéhnū un cándaha yaa jeē naní arpa, jíín cóhō cúu oro jeē ñúhun chítú súje cutú. Te súje cutú un cúu máá táca jnúhun jeē cájicān tahú ñayuu yñi ndaha Yaā Dios. <sup>9</sup>Te ni cajita de iin yaa jeé, te suhva cáhān:

Vāha ndasí Yaā cúu ní jéē quihin ní tutu te cahnde ni sello jeē ndihyú.

Chi ni cajehni i níhín, te jíín níñi ni ní nacuaan ní ñayuu

mēhñu táca raza, tācá yuhu, tācá ñuu, tācá nacióon, návāha cuu i ñayuu Yaā Dios.

<sup>10</sup>Te ni sáha ní jéē cuu i rey jíín sūtú nuū Yaā Dios,

te ndacu i jniñu ini ñayiví.

Achí de cájita de.

<sup>11</sup>Te ni jito ga rí, te ni jini sōho ri jeē cácahān cuehē ndajéhé yā jeē ní cajicó ndúú xiin mesa yā, jíín xiin ndicúún jeē técu, jíín xiin tēe jéhnū cándiso jniñu. Te íyó cuéhē ndasí millón ndajéhé un. <sup>12</sup>Te suhva ni cacahān jee ya:

Vāha ndasí Yaā cúu Londe jeē ní cajehni i.

Te jeē yúcuán jñí ya poder, te yōhyo cúcá yá,

te yōhyo ndíchí yá, te ndíso ya cuehē fuerza,

te cáhiyo yñúhún ndihi nuū yā, te luu cújéhnū ya,

te cácahān i jeē vāha ndasí Yaā cúu ya.

Achí.

<sup>13</sup>Te suni ni jini sōho ri jeē cácahān ndihi jeē ni sáha Yaā Dios jeē iyó ini andiví jíín ini ñayiví jíín chíji ñayiví jíín ini mar. Te ndivii un ní cacahān:

Cúsí ni yō cahán yō jeē yōhyo vāha Yaā cúu máá Yaā néne mesa nuū ndácu ya jniñu,



jiín Yaā cúu Londe Yaā Dios.  
Te na cóo yínúhún yó núu yā, chi  
cújénu luu ya,  
te jní ya poder ní cání cuiti.  
Achí.

<sup>14</sup>Te ni cacahān ndicúún jeē técu:

Súcuan na cóo, áchí.

Te ndihóco cuūn tēe jénu cándiso  
jnínū ni cajecuiñi yití de, te ni  
cachinúhún de nuū Yaā jeē técu ní cání  
cuiti.

### Siquí ndihúxá sello

**6** Yūcuán na te ni jito ri jeē Yaā cúu  
Londe Yaā Dios, ni jehnde yā iin  
jeē uxá sello un. Te ni jini sōho ri jeē  
cahán iin jnáhan ndicúún jeē técu ún,  
nájñuhun cáhán taja:

Nehen te cuni rō.

<sup>2</sup>Te ni ndacoto ri, te ni jito ri iin ca-  
ballo cuijín. Te jeē yosó síquī tī un ndáhá  
iin arco jeē stáva nduva. Te ni jecúhun  
iin corona xinī. Te ni quenda ni jejnáhan,  
te ni cundeyí síquī ndihí.

<sup>3</sup>Yūcuán na te Londe un ní jehnde yā  
sello uū. Te ni jini sōho ri jeē cahán inga  
jnáhan ndicúún jeē técu:

Nehen te cuni rō.

<sup>4</sup>Te ni quenda iin caballo cuehé, te jeē  
yosó síquī tī ndíso jnínū jeē snāá jñuhun  
cáyūcu máni ñayuu ñayiví, te quejéé i  
cahni jnáhan i. Te ni nihin ún iin espada  
cáhnu.

<sup>5</sup>Yūcuán na te Londe un ní jehnde yā  
sello unī. Te ni jini sōho ri jeē cahán inga  
jnáhan ndicúún jeē técu:

Nehen te cuni rō.

Te ni ndacoto ri, te ni jito ri iin caballo  
jnuú. Te jeē yosó síquī tī ndáhá iin bal-  
anza jeē chícuāha, chi coo jnamā xeēn.  
<sup>6</sup>Te mēhñú ndicúún jeē técu un ní jini  
sōho ri iin jeē cahán:

Máá iin kilo-ni trigo nihin i jíin yáhu i  
jeē sájniñu i iin quiví. Te núu cebada, te  
uni-ni kilo nihin i jíin yáhu i jeē sájniñu i

iin quiví. Te aceite jíin vino chi ma sáha  
ró jéé cúmani. Achí.

<sup>7</sup>Yūcuán na te Londe un ní jehnde yā  
sello cuūn. Te ni jini sōho ri jeē cahán  
tucu inga jnáhan ndicúún jeē técu:

Nehen te cuni rō.

<sup>8</sup>Te ni ndacoto ri, te ni jito ri iin ca-  
ballo cuaán yaa, te jeē yosó síquī tī cúu  
máa cuéhyi jéni ñayuu. Te ichi yátá un  
ndíquin máa jnúhun jeē quívi ñayuu lu-  
gar nuū cáyūcu ánuá ndíyi. Te ndindúú  
un cándiso jnínū jeē ndóna síquī iin jeē  
ndicúún parte ñayiví, te cuu sáha jeē cúu  
ñayuu jíin guerra, jíin jnamā, jíin cuéhyi  
xeén, jíin táca quití xeén jeē iyó ñayiví.

<sup>9</sup>Yūcuán na te Londe un ní jehnde yā  
sello uhūn. Te chíji altar cáhnu ni jito ri  
anuá ñayuu jeē ní cacandíje jñuhun Yaā  
Dios te ni canacani ndaā i jñuhun ya, te  
síquī yūcuan ní cajehni ñayuu i. <sup>10</sup>Te ni  
cacana jee ánuá un:

Jitoho ná Yaā Dios, maá ní cúu Yaā  
ndoo te vāha squícu ní jéé ni jéjñuhun  
ní. ¿Te nasaa ga tiempo coo te sándaā ni  
jéhē ná, te nacuāha ní jéé ndútahū ñayuu  
ñayiví jéé ní cajehni sáná? áchí.

<sup>11</sup>Yūcuán na te ni jehne ya sahna cuijín  
cuhun i jíjnáhan i, te ni cahán yā jíin i jeē  
na ndétátú i jecu gā tiempo. Chi íyó gá  
hermano i jeē cájejniñu nuū yā, jeē suni  
jíni ñúhún cuu i návaha jinu número i,  
áchí yá.

<sup>12</sup>Yūcuán na te Londe un ní jehnde  
yā sello iñū. Te ni jito ri jeē ni jnáa  
ndasí. Te ni cujnúú níandii nájñuhun iin  
sahma jnúú. Te ní yóó ni nduu nájñuhun  
niñi. <sup>13</sup>Te quími andiví ní ningoyo nuū  
ñúhun nájñuhun níngoyo ndehē yihí yu-  
jnu higo sáha tachí níhin. <sup>14</sup>Te andiví  
ní cujiyo cuahān nájñuhun jeē nátuu iin  
tutu cáhnu. Te táca yucu jíin táca isla ni  
cujioy cuango inga lado. <sup>15</sup>Te táca rey  
ñayiví, jíin jéé cácujeñu, jíin jéé cucá,  
jíin táca capitán, jíin jéé cándiso poder,  
jíin mozo jeē ní cajeen ñayuu, jíin tée  
cásajniñu cuenta maá, ní cachisáhi máá

ini yaū cava jíin méhñu cava chíji yucu.

<sup>16</sup>Te ni cacahān i jíin yucu jíin cava:

Ndicó cáva siquī rī, na quísāhi rī návāha tú coto máá Yaā néne mesa ndácu jniñu, jíin Yaā cúu Londe jeē cuáha ya castigo xeēn ruhū. <sup>17</sup>Chi ni quee maá quívī cáhnu jeē cuáha ya castigo, ¿te ndé iin canda condichi nuū yā? achí i jíjnáhan i.

### **Ñayuu tāca yúcūn Israel jeē ni jécondee sello jneē**

**7** Te ná ni cuu jniñu yáha, te ni jito ri cuūn ndajéhé yā jeē cáhiin ndicúún lado ñayīví. Te cájesi yā nuū ndicúún tachī, návāha ma quee nuū ñúhun ni nuū mar ni nuū ní iin yujnu. <sup>2</sup>Te suni ni jito ri inga ndajéhé yā, vēji ichi núū cáne niāndii. Te ndáhá yá sello Yaā Dios, Yaā técu. Te ni cahān jee ya jíin ndicúún ndajéhé un jéē ndíso jniñu jeē sáha daño nuū ñúhun ichi jíin núū mar:

<sup>3</sup>Ma sáha ró daño nuū ñúhun ni nuū tācá yujnu ni nuū mar, chí nde na téé yó sello jneē tāca ñáyuu cájejniñu nuū Yaā Dios yō.

<sup>4</sup>Te ni jini sōho ri jeē achí jéē iyó ciento uū xico cuūn mil ñayuu jeē ni jécondee sello jneē. Te ñayuu un cácuu tāca yúcūn ñayuu Israel. <sup>5</sup>Te iyó úxī uū mil ñayuu cácuu yucūn Judá jeē ni jécondee sello, jíin úxī uū mil yucūn Rubén, jíin úxī uū mil yucūn Gad, <sup>6</sup>jíin úxī uū mil yucūn Aser, jíin úxī uū mil yucūn Neftalí, jíin úxī uū mil yucūn Manasés, <sup>7</sup>jíin úxī uū mil yucūn Simeón, jíin úxī uū mil yucūn Leví, jíin úxī uū mil yucūn Isacar, <sup>8</sup>jíin úxī uū mil yucūn Zabulón, jíin úxī uū mil yucūn José, jíin úxī uū mil yucūn Benjamín. Ndihi yucūn yáha cúu jeē ni jécondee sello.

### **Ñayuu cuehē jeē cáñuhun sahma cuijín**

<sup>9</sup>Te ná ni cuu jniñu yáha te ni ndacoto ri, te ni jito ri cuehē ndasí ñáyuu. Te

cúu i ñayuu tācá nación jíin tāca raza jíin tāca yuhu jíin tāca ñuu. Te cáhiin i nuū mesa nuū ndácu Yaā Dios jniñu jíin núū maá Yaā cúu Londe. Te siquī jeē cuehē ndasí i, te ni iin ma cúu cahu nasaa i cúu. Te cáñuhun i sahma cuijín, te cándahá i ñuū. <sup>10</sup>Te ni cacana jee i:

Yaā Dios maá yó cúu jeē ní nnama yóhó, Yaā jeē néne nuū mesa jeē ndácu jniñu, jíin Yaā cúu Londe Yaā Dios.

Achí i jíjnáhan i. <sup>11</sup>Te ndihi ndajéhé ni cajicó ndúú yā cáhiin ya xiin mesa Yaā Dios, jíin xiin tēe jéhnu cándiso jniñu, jíin xiin ndicúún jeē técu. Te ni cajecuiñi yití yá ni cachínúhún yá Yaā Dios ichi núū mesa yā. <sup>12</sup>Te ni cacahān yā:

Amén. Cúsī ni yō cahán yō jeē yóhoyo vāha Yaā cúu Yaā Dios maá yó.

Te luu cújéhnu ya te ndíchí yá.

Te na nácuatáhú yó nuū yā, te na cóo yínúhún yó núú yā.

Chi jniñ ya poder, te ndíso ya cuehē fuerza jeē ní cáni cuiti. Amén.

Achí tāca ndajéhé yā.

<sup>13</sup>Yūcuán na te ni cahān iin tēe jéhnu un jíin rí:

¿Nde ñáyuu cúu yāha jéē cáñuhun sahma cuijín, te ndé chí véjicoo i?

<sup>14</sup>Te ni cahān rí jíin de:

Maá ní cúu jeē jiní, Tātá.

Te ni cahān de jíin rí:

Yāha cácuu ñayuu jeē ní cayāha i jeē ní cajito i jñúndóho xeēn. Te ni canacate i sahma i jíin níñi maá Londe, te ni nduyaa vāha, cúu jeē ní ndundoo ánuá i ni sáha ya. <sup>15</sup>Jeē yúcuan cúu jeē cáhiin i nuū mesa nuū ndácu Yaā Dios jniñu, te cájejniñu i ini templo yā nduú ñuú. Te Yaā jeē néne nuū mesa, coto ya i jeē quéndóo vāha i nuū yā. <sup>16</sup>Te ma cúu gā i sōco, te ma jichí gā i ndute. Te ma cayú gā i nuū niāndii, ni ma ndóho ga i jeē jihní. <sup>17</sup>Chi máá Yaā cúu Londe jeē néne nuū mesa jeē ndácu jniñu, coto ya i nájnūhun jeē cúu i lanchi ya. Te condeca ya i quihín yā jíin i nuū cáne ndute

jeē cótecu i sáha. Te Yaā Dios nacuaa yā ndute núú i jíjnáhan i, te ma ndahyú gā i. Achí tée jéhnú ún.

### Siquí sello uxā jíin cóhō cūu oro

**8** Te Londe un ní jehnde yā sello uxā jeē ndihyú tutu ún, te nayúú-ni ni iyo ini andiví nájñuhun sava hora. <sup>2</sup> Te ni jito ri ndihúxá ndajéhé jeē cáhiin nuū Yaā Dios. Te ni cajéhe uxā trompeta nuū ndajéhé un. <sup>3</sup> Yūcuán na te ni quee inga ndajéhé, ndáhá yá iin cohō cūu oro, te ni jecuiñi yā nuū altar. Te ni jéhe cuehē sūje cutú núú yā, návāha socō yā jíin jnúhun cájicān tahú ndíhi ñayuu cácan-díje Yaā Dios. Te ni socō yā nuū altar oro jeē índichi ichi núú mesa nuū ndácu Yaā Dios jniñu. <sup>4</sup> Te nuū cohō cūu jñí ndajéhé un ní cane ñuhmā sūje cutú, ni caa nuū Yaā Dios nde jíin jnúhun cájicān tahú ñayuu cácan-díje Yaā Dios. <sup>5</sup> Yūcuán na te ni quihin ndajéhé un cóhō cūú un. Te ni scutú yá tícua ñuhūn jeē cayú nuū altar. Te ni jete yā nde ini ñayiví. Te ni sáha jeē ni cáhān taja, te ni ñihin, te ni ndindēé taja, te ni jñāa.

### Jnúhun siquí trompeta

<sup>6</sup> Yūcuán na te ndihúxá ndajéhé jeē cándāhá ndihúxá trompeta, ni casátuhva ya jeē tiví yā.

<sup>7</sup> Te ndajéhé iin ni tiví yā trompeta. Te ni cuun ñíñi ini ñayiví jíin ñúhūn jeē ni sácā núú jíin ñíñi. Te ni cayú iin jeē uní parte ñayiví, jíin iin jeē uní parte yujnu, jíin iin jeē uní parte ite cuí.

<sup>8</sup> Te ndajéhé uū ni tiví yā trompeta. Te iin nájñuhun iin yucu cáhnu jeē cayú ñuhūn ni ñingava cuahān nuū mar. Te iin jeē uní parte mar ni nduu ñíñi. <sup>9</sup> Te ni jihí iin jeē uní parte quití ñúhūn nuū mar. Te ni naa cuehē barco, chí iin iin jeē táca úní ni naa.

<sup>10</sup> Te ndajéhé uní ni tiví yā trompeta. Te ni ñingava iin quími cáhnu ichi ándiví, te cáyú nájñuhun cáyú iin yiti

cáhnu. Te ni ñingava siquí iin iin jeē táca úní yūte jíin núú cáne ndute. <sup>11</sup> Te quími un nání quími uvuā. Te iin jeē uní parte ndute ni cuu uvuā. Te ni cajihí cuehē ñayuu ni sáha jeē ní cuu uvuā ndute ún.

<sup>12</sup> Te ndajéhé cuūn ni tiví yā trompeta. Te iin jeē uní parte niāndii jíin yóó jíin quími ni tiví. Te ni ndunee iin jeē uní parte i, te tuá ni cúndijin iin jeē uní parte nduú jíin ñuú.

<sup>13</sup> Te ni ndacoto ri, te ni jini sōho ri jeē cána jee iin ndajéhé yā jeē ndáva cuahān sava andiví:

Nacā xeēn gā ndoho ñayuu cáyūcú ini ñayiví, chí je yajni cuecu uní gā trompeta jeē tiví uní gā ndajéhé, achí yá.

**9** Te ndajéhé uhūn ni tiví yā trompeta. Te ni jito ri jeē ichi ándiví ní ñingava iin quími nde ini ñayiví. Te nuū quími un ní jéhe ndacáa jeē núne túhñchi cúnú ndasí. <sup>2</sup> Yūcuán na te ni nune un túhñchi, te ni cane ñuhmā ni caa nájñuhun ñuhmā iin ijnū cáhnu. Te ñuhmā un ní sáha jeē ní cunee niāndii jíin ñí núú tachí. <sup>3</sup> Te nuū ñuhmā un ní canecoo tícá ndicuéhyí, ni jitē núú tí ñí cáhnu ñayiví. Te ni jéhe ya jnúhun jeē sáha tí nájñuhun cásaáha tisuhma xeēn jeē iyó ini ñayiví. <sup>4</sup> Te ni ndacu ya jniñu nuū tí jeē ma sáha tí daño ite jíin yúcú cuí jíin yujnu, chí mání ñayuu jeē tu ndéé sello Yaā Dios jneē i cúu jeē tuu tí. <sup>5</sup> Te tu ní jéhe ya jnúhun jeē cáhni tí ñayuu, chí mání jeē stóho tí i uhūn yoō. Te sáha tí jeē jetú i nájñuhun jeē jetú ñayuu jeē túu tisuhma i. <sup>6</sup> Te quiví ún nducú ndasí ñayuu modo cuu i, te ma nihín i modo. Te vēsú cuní i cuu i, te tú na modo cuu i.

<sup>7</sup> Te tícá ndicuéhyí un cáa tí nájñuhun caballo jeē cáhiyo túhva quingoo nuū cuájñáhan. Te xiní tí ñúhūn nájñuhun corona oro. Te née tí nuū téa. <sup>8</sup> Te íyó ixi tí jeē cáa nájñuhun ixi xíní ñahan. Te jnúhun tí cáa nájñuhun jnúhun ndicaha. <sup>9</sup> Te ñí tí ndihyú nájñuhun sahma cáa. Te ñihin ndijēn tí nájñuhun ñihin

jeē cuángoo cuehē caballo nuū guerra cáñuhun tī carreta. <sup>10</sup>Te suhmā tī ndíso iñu nájñuhun tisuhma. Te jíin súhmā tī cuu stóho tī ñayuu uhūn yoō. <sup>11</sup>Te íyó iin jeē cujéhnū nuū tī, te suu cúu ndajéhé jexeén jeē ndíto tūhnchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jée snāa.

<sup>12</sup>Je ni yāha iin jñundóho, te íyó úū gā jñundóho jeē quíji.

<sup>13</sup>Te ndajéhé iñu ni tivi yā trompeta. Te ni jini sōho ri iin jñuhun jeē ni cáhān nde mēhñú ndicúún yiquí altar oro jeē íin nuū Yaā Dios. <sup>14</sup>Te ni cahān un jíin ndajéhé iñu jeē ndahá trompeta:

Nandají ró ndicúún ndajéhé jeē nuhní yuhu yúte cáhnu jeē naní Eufrates, achí.

<sup>15</sup>Te ni nandají ndicúún ndajéhé un, nāvāha cahni iin jeē uní parte ñayuu ñayiví. Chi je cáhiyo tūhva ndajéhé un jeē siquí maá hora jíin quíví jíin yōō jíin cuíyā jeē cóo súcuan. <sup>16</sup>Te ni jini sōho ri jeē achí jée íyó úū ciento millón soldado jeē cáyoso caballo.

<sup>17</sup>Te ni steén gā yā nuū rī, te ni jito ndijin rī tāca caballo. Te tēe cáyoso siquí tī cáñuhun de camisa cāa jeē cuehé, jeē ndeé, jíin jée cuaán. Te xiní caballo un cándāa nájñuhun xiní ndícaha. Te yuhu tī quénda ñuhūn jíin ñúhmā jíin azufre.

<sup>18</sup>Te jíin úní jeē quénda yuhu caballo un, te ni jihí iin jeē uní parte ñayuu, suu jíin ñúhūn jíin ñúhmā jíin azufre. <sup>19</sup>Chi yuhu tī jíin súhmā tī íyó fuerza jeē cáhni tī ñayuu. Chi suhmā tī cándāa nájñuhun coō, te íyó xíní, te jíin yúcuan stóho tī ñayuu.

<sup>20</sup>Te sava ga ñayuu jeē tu ní jíhí jíin tāca jñundóho yāha, tu ní nácani ni i stóo i ídolo jeē ní casáha i. Te tu ní stóo i jeē cáchiñúhūn i tāca táchi jíin ídolo jeē ní cuvāha jíin oro jíin plata jíin cāa cuaán jíin yūú jíin yujnu. Te tācá un chi tu cúu coto, ni tu cúu cuni sōho, ni tu cúu caca.

<sup>21</sup>Te ni tu ní cánacani ni i stóo i jeē jéhni i ndíyi, jíin jée satásí i, jíin jée jíca jnéni i, jíin jée sacuíhná i.

### Ndajéhé jeē ndahá libro lulí

**10** Te ni jito ri inga ndajéhé yā jeē ndíso poder, ni cuun ya ichi ándiví. Te ñúsúcun yá vicō, te xiní yā ñúhun ticō vēhndé. Te nuū yā ndíndēe nájñuhun niāndii, te síhni ya cāa nájñuhun uū síhni jeē cāa ná cāa ñuhūn. <sup>2</sup>Te ndahá yá iin libro lulí jée núne. Te ni jeni ya jehē váha ya nuū mar, te jehē jecó yá nuū ñúhun íchi. <sup>3</sup>Te ni cana jee téyí yá, nájñuhun jeē ndahyú ndicaha. Te ná ni cana jee ya, te ni cacahān uxā taja. <sup>4</sup>Te ná ni cacahān uxā taja, te je íyó tūhva ri jeē tēe ri jñuhun un núú. Te ni jini sōho ri iin jñuhun ichi ándiví jeē ni cáhān jíin rí:

Chuvāha ró táca jñuhun jeē ní cacahān uxā taja ún, te ma steén rō, ni ma tēe ró, achí.

<sup>5</sup>Yūcuán na te ndajéhé jeē ní jito ri jeē íin nuū mar jíin núú ñúhun, ni ndonehen ya ndaha váha ya ichi ándiví. <sup>6</sup>Te ni ndacunehen ya síhví máá Yaā jeē técu níf cáni, Yaā ni sáha ándiví jíin ñáyiví jíin mar jíin táca ndíhi jeē íyó ini. Te jíin síhví yá un ní cahān teyí ndajéhé:

Ma cucuéé gá jeē jínu ñayiví. <sup>7</sup>Chi núu na quéjée ndajéhé uxā tivi yā trompeta, yūcuán na te squícu-ni Yaā Dios jñuhun sáhi yá, nájñuhun ni castūhun yá nuū tāca mozo yā, tēe ni canacani jñuhun ya nde jenahān, achí ndajéhé.

<sup>8</sup>Yūcuán na te máá jée ní jini sōho ri jeē ni cáhān ichi ándiví, ni cahān tucu jíin rí:

Cuáhān te quihin ró libro lulí jée núne jeē ndahá ndajéhé jeē íin nuū mar jíin núú ñúhun, achí.

<sup>9</sup>Te ni jehēn rī nuū ndajéhé un, te ni jicān rī jeē na cuáha ya libro lulí un núú rí. Te ni cahān yā:

Quihin te caji rō. Chi vixī sāha ini yuhu ró nájñuhun ndūxi, te chiji ró chi cuhiyá sāha, áchí yá.

<sup>10</sup>Yūcuán na te ni quihin ri libro lulí jeē ndahá ndajéhé yā, te ni yeji rī. Te vixī ni sāha ini yuhu ri nájñuhun ndūxi. Te ná ni cuu ni yeji rī, te ni jitē iyá ni rī. <sup>11</sup>Te ni cacahān jíin rí:

Cánuú jéē nacani tucu ró jnúhun Yaā Dios, ndese coo siquī ñayuu cuehē ñuu jíin cuehē nación jeē sīn sīn yuhu, jíin síquī cuehē rey cándacu jniñu, áchí jíin rí.

### Siquī uū testigo yā

**11** Yūcuán na te ni cajēhe iin yujnu nuū rī, jeē cúu iin cūhva jeē chícuāha. Te ni cacahān jíin rí:

Ndocuñī te chicuāha ró templo cáhnu Yaā Dios jíin altar, te cahu ró nasaa ñayuu cúu jeē cáchiñúhún núu yā yūcuán. <sup>2</sup>Te ma chícuāha ró patio yatā templo. Chi je ni jēhe ya nuū ñayuu tācá ñuu jicá. Te coyūcú i ini ñuu iī yāhá, te uū xico uū yoō cueñū i siquī ñuu. <sup>3</sup>Te tají rí uū testigo rī jeē nácani jñuhun ri mil uū ciento unī xico quivī. Te cuhun de sahna ndáyí jéē cácuñhyá ni de siquī cuéchi ñayuu, áchí yá.

<sup>4</sup>Te ndíndúú testigo un cúu nájñuhun ndíndúú yujnu olivo jíin ndíndúú candelero jeē ín nuū Yaā Dios, Yaā chíí ñayiví. <sup>5</sup>Te na-ni ñayuu núu nducú sāha ndevāha jíin ndíndúú testigo un, te quenda ñuhūn yuhu ndíndúú de, te cayū ndíhi ñayuu cájito uhū i de. Te súcuan cuu tāca ñayuu jeē nducú sāha ndevāha jíin de. <sup>6</sup>Te íyó poder ndíndúú testigo un jéē cásí de jeē ma cúun saū ní tiempo jeē nácani de jñuhun ya. Te suni íyó poder de sāha de jeē nduu niñī tācá ndute. Te cuu stívī de ñayiví jíin ndínuū jñúndóho, núu nasaa jínu cácuni de. <sup>7</sup>Te ná ni jínu ni canacani de jñuhun ya, yūcuán na te quenda quití xéén jeē néne tūhnchi ún. Te cuajnáhan jíin ndíndúú de, te cundeyí

jíin de, te cahni de. <sup>8</sup>Te ndíyí ún cava nuū yáhu ñuu cáhnu nuū ní cajehni i máá Jítóho yō jicá cruz. Te ñuu un cácahān yatá i jeē ñuu Sodoma jíin Egipto cúu, siquī jeē xeēn cuéchi íyó ñuu ún. <sup>9</sup>Te ñayuu tācá ñuu, tāca yúcūn, tācá yuhu, tācá nación, chi coto i jeē cáva ndíndúú ndíyí un únī quivī yosáva, te ma cuáha i jñuhun jeē quíndúji. <sup>10</sup>Te ñayuu ní cáhnu ñayiví cusī ndasí ni i jeē ní cajihí de, te sāha i vico, te cuāha i regalo nuū jnáhan i. Chi ndíndúú téé ni canacani jñuhun ya ún, ní casáha de jeē ní candoho ndasí ñayuu ñayiví. <sup>11</sup>Te jeē yáha unī quivī yosáva ún, te Yaā Dios sāha ya jeē nastáa tachí de, te ndonda-ni de. Te yūhú ndasí ñayuu coto i jeē ní canatecu de. <sup>12</sup>Yūcuán na te cuni sōho de jeē cána jee ichi ándiví:

Caa ró quijicoo ró ndé yāhá, áchí.

Te ndaa de mēhñu vícō quingoo de andiví, cuni ñayuu cájito uhū i de. <sup>13</sup>Te máá hora un jnáa ndasí, te ndicó cáva naa iin jeē uxí parte ñuu ún. Te jíin ñu-jnáa ún cuu uxā mil ñayuu. Te tāca gá ñayuu jeē ndóo, yūhú ndasí i, te cahān i jeē cujéhu Yaā Dios jeē ndeé andiví.

<sup>14</sup>Súcuan yāha jñúndóho uū, te yachi coo jñúndóho unī.

### Siquī trompeta uxā

<sup>15</sup>Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān: Tācá nación ñayiví je ni nuquihí ndaha máá Jítóho yō Yaā Dios jíin Cristo jeē ní tají yá. Te ndacu ya jniñu ní cáni cuití. Achí.

<sup>16</sup>Yūcuán na te ndíhócó cuñ tēe jéhu cándiso jniñu jeē cánene de mesa de ichi núu Yaā Dios, ni cajecuiñí yití de, ni cachíñúhún de ya. <sup>17</sup>Te ni cacahān de: Na cútahū na núu ní, Tátā Yaā Dios, chí máá ní jní ndíhi poder,

te cúu ní Yaa iyó vijna, te ni iyo ní nńí cáni, te coo ní nńí cáni.

Te ni najnií ní ndívii jeē iyó,

te jíin poder ni ní quejéé ní ndácu ní jniñu nuū.

<sup>18</sup> Ñayuu tāca nación ni caquitī ni i siquī ní.

Te vijna chi ni quee quivī jeē cuáha ní castigo i,

jíin jéē sándaā ní jniñu tāca ndíyi.

Te cuáha ní táhu nuū tāca mozo ni jéē ní canacani jñuhun ní,

jíin núu tāca ñayuu cájejnñu nuū ní, jíin ñayuu cáchiñhún núu ní,

cúu ñayuu cácujeñhu jíin jéē tuú.

Te vijna te snáhnú ndetū ni ñayuu castívi ñayívi.

Achí de jíináhan de.

<sup>19</sup> Yūcuán na te ni nune templo Yaa Dios jeē iyó andiví. Te ni cajito ñayuu jeē yúcuán íne yejnū jeē ñuhun contrato yā. Te ni ndindéé taja, te nñhin, te cáhán taja, te ni jnāa, te ni cuun xeēn ñiñí.

### Jñuhun ñahan jíin cóo cáhnu

**12** Yūcuán na te ini andiví ní cane iin jeē nahán náa ni yō jíto yó: iin ñahan jeē ñuhun ña niāndii nájnñuhun sahma, te iin jehē ña siquī yó, te ñuhun iin corona xiní ña jeē ndeé uxí uū quími.

<sup>2</sup> Te ñuhun sēhe ña. Te ni ndahyū cohó ña jeē ndóho ña jéhnde chiji ña jeē scácu ña i.

<sup>3</sup> Yūcuán na te ini andiví ní cane tucu inga jeē náa ni yō jíto yó: iin coō cuehé cáhnu ndasí. Te iyó úxā xiní tī jíin úxí ndiquí tī. Te ndihúxá xiní tī ñuhun corona.

<sup>4</sup> Te jíin súhmā tī ni stáa tī iin jeē uní parte quími jeē iyó andiví, te ni sín-goo tī ini ñayívi. Te ni ine tī nuū ñahan jeē scácu sēhe ún, ndétu tī cocó tī sēhe ña jeē jé yajni cacu i.

<sup>5</sup> Te ni scácu ña iin sēhe yí, te sūchi un ní jeconāa jeē ndácu nihin i jniñu nuū ndívii nación. Yūcuán na te ni ndoñhún sēhe yí ña ún, ni ndaa i cuahān i nde nuū iin mesa Yaa Dios nuū ndácu ya jniñu.

<sup>6</sup> Te ñahan

un ní jinu ña cuahān ña nde nuū ñuhun téhé núu iyó iin lugar jeē ni sátuhva Yaa Dios. Te yūcuán condee ña nihin ña jeē cáji ña mil uū ciento uní xico quiví.

<sup>7</sup> Yūcuán na te ni cajejnáhan ini andiví. Chi ndajéhé jéhnú ga jeē naní Miguel jíin táca ndajéhé jeē cácuu mozo nuū yā, ni cajejnáhan jíin cóo cáhnu. Te coō un jíin táca ndajéhé maá, ni cajejnáhan jíin yā.

<sup>8</sup> Te tu ní cácuñdeyí tī, te tuá ní cúu coyūcu tī andiví.

<sup>9</sup> Súcuan ni cuu jeē ní quenehen ya coō cáhnu un jéē iyó ndé jenahán ndasí. Te nání tī jexeén jíin Satanás, te maá tī cúu jeē stahú ndihi ñayuu ñayívi. Te ni scáne ya tī nde ini ñayívi jíin táca ndajéhé tī.

<sup>10</sup> Yūcuán na te ni jini sōho ri iin jñuhun jeē cahán jee ichi ándiví:

Je ni quee quiví jeē jíinu jnama ya yohó, jíin jéē steén ndijin yā jeē jñí ya poder, jíin jéē ndácu ya jniñu, jíin jéē ndíso jniñu maá Cristo jeē ní tají yā. Chi je ni quenehen ya maá jéē cahán cuēchi siquí tācá hermano yō. Chi nduú ñuú ni cahán cuēchi siquí i nuū Yaa Dios maá yó.

<sup>11</sup> Te ni cacundeyí i siquí Satanás un, ní sáha jñuhun jeē ni jíhi Yaa cúu Londe, jíin jéē ní cacahān ndaa i jñuhun Yaa Dios, jíin jéē tu ní cundáhú ni i maá i, chi ni jēhe i jñuhun candíje i vésú núu cuu i jeē siquí yā.

<sup>12</sup> Núu súcuan te na cúsiñ ndasí ni táca róhó jéē cáyūcú andiví. Te nacā xeēn ndoho táca róhó jéē cáyūcú ini ñayívi jíin núu mar. Chi ni cuun jexeén ni jinū nuū rō jijnáhan ró. Te quití xeēn ní, chi jíin jeē tuá coo cuehē gā tiempo jeē stahú ñayuu. Achí.

<sup>13</sup> Te ni jini coō cáhnu ún jéē ni scáne ya maá cuahān ini ñayívi, te ni jinu tī jíin ñahan ní scácu sēhe yí, jeē xeēn sáha tī jíin ña núu.

<sup>14</sup> Te ni cajēhe uū ndijēn yaha chócó cáhnu nuū ñahan ún, návaha ndava ña quihñ ña lugar ña nuū ñuhun téhé, te cácu ña nuū coō ún. Te yūcuán condee ña uní cuiyā yosáva, te nihin ña jeē cáji ña.

<sup>15</sup> Te yuhu cóo un

ní cane ndute nájnūhun iin yūte cáhnu, cuahān yatā ña návāha jneni ña. <sup>16</sup>Te máá ñuhun chi ni chindéé ñáhán ñahan ún, chi ni nune-ni, te ni nungoo yūte jeē ní cane yuhu coō ún. <sup>17</sup>Yūcuán na te xeēn ni quitī ni coō cáhnu ni jito ti ña. Te cuahān tī cuajnáhan ti jíin táca gá sēhe ña, suu ñayuu casquícu jniñu ndácu Yaā Dios te cácanđíje váha i jnūhun Jesucristo.

### Jnūhun siquī uū quitī xéén

**13** Te ni indichi rī yumár. Te ni jito ri jeē ní cane iin quitī xéén ini mar. Te íyó úxā xinī tī jíin úxī ndiqui tī. Te ndihúxí ndiqui tī ñúhun corona. Te ndihúxá xinī tī ndeé iin síhví nées jéé quitī ni Yaā Dios sáha. <sup>2</sup>Te quitī xéén jeē ní jito ri ún, cáa tī nájnūhun cuiñī, te ndaha tī cáa nájnūhun ndaha oso, te yuhu tī cáa nájnūhun yuhu ndícaha. Te nuū quitī un ní jēhe coō cáhnu poder maá jíin mesa nuū ndácu máá jniñu. Te ni sáha jeē cujéhnu ndasí quitī ún. <sup>3</sup>Te ni jito ri jeē ni tújī iin xinī tī, jeē jé yajni cuu tī nuú. Te ni nduvāha tī jeē ni tújī tī. Te nahán ní naa ni ñayuu ní cáhnu ñayīvi ní jito i, te ni cajetáhú i nuū tī. <sup>4</sup>Te ni cachiñúhún i coō cáhnu siquī jeē ni sáha tī jeē cujéhnu ndasí quitī xéén un, te suni ni cachiñúhún i quitī xéén un. Te ni cacahān i:

Tú ni iin jeē cujéhnu nájnūhun quitī yáha, te tú ni iin cundeyí cuajnáhan jíin tī, áchí i jíjnáhan i.

<sup>5</sup>Te tu ní jési ya jeē cahān tī jeē quitī téyí cúu tī, jíin jéé cahán ndevāha tī siquī yā. Te ni nihin jniñu tī jeē ndácu tī jniñu uū xico uū yoō. <sup>6</sup>Te ni quejéé tī ni cahān ndevāha tī siquī Yaā Dios, jíin síquī síhví yá, jíin síquī nuū ndeé yá, jíin síquī táca jéé iyó andíví. <sup>7</sup>Te tu ní jési ya jeē cuajnáhan tī jíin ñayuu maá Yaā Dios, te cundeyí tī jíin i. Te suni ni nihin jniñu tī jeē ndácu tī jniñu nuū ñayuu táca yúcūn, táca ñuu, táca yuhu, táca nación. <sup>8</sup>Te

ñayuu ní cáhnu ñayīvi jéé tu yósó síhví i nuū tútu, ni cachiñúhún i quitī xéén un. Te Yaā cúu Londe jeē ní cajehni i, máá yá névāha tutu un jéé yósó síhví ñayuu cotecu ní cáni, te je yósó síhví i nde quiví ni jécōo ñayīvi.

<sup>9</sup>Ñayuu iyó sóho na chúsóhó váha i jnūhun cahān rī yáhá. <sup>10</sup>Tāca ñayuu jeē sáha jeē quívi jnáhan vecāa, suni vecāa cone máá i. Te táca ñayuu jeē jéhni jnáhan jíin espada, suni jíin espada cuu maá i. Núu súcuan te ñayuu maá Yaā Dios chi jíni ñúhún cuandeyí ni i jíin jnúndóho te ma jécuiñī i candíje i jnūhun cúndáhú ni yā i.

<sup>11</sup>Yūcuán na te ni jito ri inga quitī xéén jeē ní cane chíji ñuhun. Te íyó úu ndiqui tī jeē cáa nájnūhun ndiqui lánchi. Te nájnūhun tachī coō cáhnu, súcuan tachī cahán tī. <sup>12</sup>Te nájnūhun ndácu quitī xéén xihna ñúhún jniñu, suni súcuan ndácu quitī uū ún jniñu, iin tī nuū quitī xihna ñúhún. Te quitī uū sáha tī jeē chiñúhún táca ñayuu ní cáhnu ñayīvi nuū quitī xihna ñúhún, quitī ní tújī jeē jé yajni cuu tī te ni nduvāha tī.

<sup>13</sup>Te quitī uū suni sáha táca jniñu jéhnu jeē nahán náa ni yō jíto yó. Chi ni scúun tī ñuhún ichi ándíví ní quiji ini ñayīvi, ní cajito ñayuu. <sup>14</sup>Te ni stahú tī ñayuu ñayīvi jíin táca jniñu jéhnu jeē ni níhin tī poder jeē sáha tī, jíto jínúu quitī xihna ñúhún. Te ni ndacu tī jniñu jeē na sáha ñayuu imagen quitī xihna ñúhún, quitī ní tújī jíin espada, jeē jé yajni cuu tī te ni nduvāha tī. <sup>15</sup>Te quitī uū ni nihin tī poder jeē chutáchí tī xijní imagen quitī xihna ñúhún, návāha cuu cahān, te cahni táca ñayuu jeē tu cájetáhú i chiñúhún i máá. <sup>16</sup>Te táca ñayuu cujéhnu jíin ñayuu tu cújéhnu, táca ñayuu cucá jíin ñayuu ndahú, táca ñayuu sájniñu cuenta maá jíin mozo jeē ní cajeen ñayuu, ni sáha tī jeē ni jécondee iin jnuni ndavāha i chí jnéé i. <sup>17</sup>Te ni iin ñayuu ma cúu cuaan i xicó i te núu tu ndíso i jnuni

jeē cūu sġhvĭ tĭ chí jnūnĭ número jeē cūu sġhvĭ tĭ. <sup>18</sup> Jnūhun ndĭchĭ cūu jeē cahān rĭ yāhā: Tāca ñāyuu jécūhun vāha ni cuu tava i cuenta número quitĭ xéén un, chí número un cūu sġhvĭ ĩn tēe. Te número un cūu ĩñū ciento unĭ xico ĩñū.

### Yaa jeē cājita 144,000 ñayuu

**14** Yūcuán na te ni ndacoto ri, te ni jito ri jeē ĩn máa Yaa cūu Londe xinĭ yucu Sġn. Te cáhiin ciento uū xico cuūn mil ñayuu jĭn yá. Te jneē i ndéé sġhvĭ máa yá jĭn sġhvĭ Tátá yā Yaa Dios. <sup>2</sup> Te ni jini sōho ri jeē nġhin ndasĭ ichi ándivĭ, nájñuhun jeē jíca cuehē yūte chí jēē cahān nġhin taja. Te jeē nġhin un sáha nájñuhun jeē cátee cuehē ñayuu yaa jeē nanĭ arpa. <sup>3</sup> Te cáhiin i ichi núu mesa nuū ndácu Yaa Dios jniñu, jĭn núu ndĭcúun jeē técu, jĭn núu ndĭhócó cuūn tēe jġhnu cándiso jnĭñu. Te ni cajita i ĩn yaa jeé. Te ni ĩn ñayuu tu cūu cutūhva i yaa ún, chí máni máa ciento uū xico cuūn mil ñayuu jeē ní jnama ya i ini ñayĭvĭ. <sup>4</sup> Te tāca tēe yáha cácuu jeē tu ní casáha cuēchi jĭn ñahan casáha néé, chí tēe ndoo ánuá cácuu de. Te cándiquĭn de Londe ndé-ni cūu-ni nuū cuahān yā. Chí ni jnama ya de ini ñayĭvĭ, te máa de cácuu tēe jeē xĭhna gā ni cacandĭje nuū Yaa Dios jĭn núu Yaa cūu Londe. <sup>5</sup> Te tú cuĭtĭ na jnūhun stáhú cácahān de, chí tēe ndoo ánuá cácuu de, cáhiin de nuū mesa Yaa Dios.

### Jnūhun jeē ní cacahān ndĭnúnĭ ndajéhé yā

<sup>6</sup> Yūcuán na te ni jito ri inga ndajéhé yā jeē ndáva cuahān sava andivĭ. Te ndĭso ya jnūhun jeē jnama Yaa Dios ñayuu cotecu i nġf cáni. Te ni nacani ya jnūhun un núu tāca ñayuu nġf cáhnu ñayĭvĭ, nuū ñayuu tācá nación, tāca yúcuñ, tācá yuhu, tācá ñuu. <sup>7</sup> Te ni cahān jee ya:

Conso ĩyo ró núu Yaa Dios, te na cáhān rō jeē yóhoyo cújġhnu ya, chí je ni quee quivĭ jeē sándaā yā siquĭ rō ndese ni casáha ró. Te na chíñúhún ró yā, chí máa yá ni sáha andivĭ jĭn ñayĭvĭ jĭn mar jĭn tāca núu cáne ndute, áchĭ ndajéhé yā.

<sup>8</sup> Yūcuán na te ndĭquĭn inga ndajéhé yā vēji, te ni cahān yā:

Je ni naa ĩ ñuu teyĭ Babilonia. Chí ni sáha jeē ñayuu tācá nación casiquĭ ndéé i Yaa Dios jeē ní castóo i ya te cándiquĭn i ídolo jĭn tāca jniñu néé, áchĭ ndajéhé uū.

<sup>9</sup> Yūcuán na te ndĭquĭn inga ndajéhé unĭ vēji, te ni cahān jee ya:

Xeēn coo siquĭ ñayuu cáchiñúhún quitĭ xéén jĭn imagen tĭ, te jéhe i jnūhun condee jnuni tĭ jneē i chí ndaha i. <sup>10</sup> Chí nihĭn i castigo xeēn siquĭ cuéchi ni casáha i, chí quitĭ ni Yaa Dios nuū i, te tuá cone cáhnu ni yā. Te ndoho i nuū cayú ñuhún jĭn azufre, coto tācá ndajéhé Yaa Dios jĭn Yaa cūu Londe. <sup>11</sup> Te ñuhmā nuū cándoho i cánda nġf cáni cuĭtĭ. Te nduú ñuu tu ndétátú ñayuu cándoho ún jeē ní cachiñúhún quitĭ xéén jĭn imagen tĭ, jĭn jéē ni jécondee jnuni sġhvĭ tĭ. <sup>12</sup> Jeē yúcuñ ñayuu máa Yaa Dios jeē casquĭcu i jniñu ndácu ya te cácañdĭje vāha i Jesús, cánuú jéē cuáñdeyĭ ni i. Achĭ ndajéhé unĭ.

<sup>13</sup> Yūcuán na te ni jini sōho ri ĩn jnūhun ichi ándivĭ jéē ni cáhān jĭn rĭ:

Te ró jnúhun jeē cahān rĭ jĭn ró yāhā: Nacā jeē ndetū tāca ñayuu cácañdĭje Jitoho yō jeē cājihĭ vijna jĭn ndé nġf cuáhān yō. Jendaá chí ndetátú i jeē ní casáha i jniñu vāha, te jniñu i un má náā chí sáha jeē quendōo vāha i nġf cáni, áchĭ Espĭritu.

### Jeē ní nastútú yá ñayuu ñayĭvĭ

<sup>14</sup> Yūcuán na te ni ndacoto ri, te ni jito ri ĩn vicó cuĭjĭn. Te nuū vicó un néne Yaa ní nduu tēe. Te xinĭ yā ñuhun corona oro, te ndáhá yá ĩn hoz xeēn. <sup>15</sup> Te ni



quenda inga ndajéhé yā ini templo, te ni cana jee, te cáhán jíin Yaā néne nuū vicó un:

Cahnde ni jíin hoz ní, te nastútú ní ñayuu ñayiví. Chi je ni quee quiví jeē nastútú ní i nájñuhun táhndé trigo jeē jé ni cuaan, áchí.

<sup>16</sup> Yūcuán na te Yaā néne nuū vicó ni nastútú yá ñayuu váha ini ñayiví, nájñuhun táhndé trigo jíin hoz.

<sup>17</sup> Yūcuán na te ni quenda inga ndajéhé yā ini templo jeē iyó andiví, te suni ndáhá yá iin hoz xeēn. <sup>18</sup> Te nde nuū altar ni quenda tucu inga ndajéhé, te ndíso jñíu ya siquí ñuhūn altar. Te ni cana jee ya, te cáhán yā jíin ndajéhé jeē ndahá hoz xeēn:

Cahnde rō jíin hoz xeēn rō, te nastútú ró ñayuu casáha néé ini ñayiví, nájñuhun jeē cájehnde i chutū ndehē uva jeē jé ni jichi, áchí.

<sup>19</sup> Te ndajéhé un ní jehnde yā jíin hoz yā, te ni nastútú yá ñayuu casáha néé ini ñayiví, nájñuhun ndútútú ndéhē uva. Te ni jnaa ya i nuū nihín i castigo xeēn Yaā Dios, nájñuhun jnáa i ndehē uva nuū taxín. <sup>20</sup> Te ni jēhe ya castigo i yatañū, te ni jica niñí i nájñuhun ndūxi uva. Te ni ndaa ni jinū cūhva jeē sucún yuhu caballo, te ni jica cuahān nde uní ciento kilómetro.

### Ndihúxá ndajéhé jíin ndihúxá jnūndóho jeē sándihí

**15** Te ni jito ri inga jñíu jéhu ichi ándiví jéé náa ni yō jíto yó. Chi cáhiin uxā ndajéhé yā jeē cuáha ndihúxá jñūndóho sandihí na. Te jeē jínu ndihúxá jñūndóho yáha, te jínu jeē cuáha Yaā Dios castigo xeēn siquí cuéchi.

<sup>2</sup> Te suni ni jito ri iin jeē cáa nájñuhun mar, te cáa nájñuhun vidrio jeē ndíndēe nájñuhun ñuhūn. Te yumar un cáhiin ñayuu ni cacundeyí síquí quiti xéén jíin imagen tí, jíin jéé tu ní cáquihin i jnuni número jeē cúu síhví tí. Te cándahá i yaa

jeē naní arpa jeē ni jéhe Yaā Dios nuū i. <sup>3</sup> Te cájita i yaa jeē ní tava Moisés, tēe cúu mozo Yaā Dios, jíin yaa maá Yaā cúu Londe. Te súcuan cáhán yaa ún:

Yōhō náa ni na cájito ná ndihi jñíu jéhu teyí jéé sáha ní,

Tátā Yaā Dios, chi jñí ní ndihi poder.

Te máni jñíu ndaā jñíu váha sáha ní, jeē cúu ní Rey nuū táca nación.

<sup>4</sup> Tú ni iin i iyó jéé ma cónso iyo i nuū ní, Tátā Yaā Dios.

Te ndihi i cahān nahín i jeē yóhōo cújéhu ní.

Chi máñuhún ni máá ní cúu Yaā ndoo Yaā i.

Te quijicoo ñayuu táca nación, chiñuhún i nhín,

chi je ni cajini i jeē ndaā váha sáha ní táca jñíu.

Achí i cájita i.

<sup>5</sup> Yūcuán na te ni ndacoto ri, te ni jito ri jeē ini andiví núne cuarto ii ini templo nuū íne tabla yuū jeē yosó ley yā.

<sup>6</sup> Te ini templo un ní quendacoo ndihúxá ndajéhé jeē cándiso jñíu siquí ndihúxá jñūndóho. Te cáñuhun ya sahama fino iyó ndoo te xínú. Te núhni cinturón oro jicā yā. <sup>7</sup> Te iin jnáhan ndicúun jeē técu ni jēhe iin iin cohō oro nuū ndihúxá ndajéhé un. Te ini cohō un ñuhun chitú castigo xeēn jeē ni jéhe Yaā Dios, Yaā técu ní cáni. <sup>8</sup> Te ni chitú ndí ñuhmā ini templo, te suu ni steén jeē yóhōo cújéhu Yaā Dios jíin poder jñí ya. Te ni iin tu ní cúu quiví ini templo, chi nde na ndíhi ndihúxá jñūndóho jeē cuáha ndihúxá ndajéhé yā.

### Siquí ndihúxá cohō jeē ñuhun castigo

**16** Yūcuán na te ini templo ni jini sōho ri iin jñuhun cáhán jee jíin ndihúxá ndajéhé yā:

Cuangoo te cati ró síquí ñayiví ndihúxá cohō jeē ñuhun castigo xeēn jeē ni jéhe Yaā Dios, achí.

<sup>2</sup>Te cuahān ndajéhé ìin, te ni jeti ya cohō yā siquī ñayiví. Te tāca ñayuu jeē ndeé jnūnī quitī xéén un jíin jéé cáchiñúhún imagen tī, ni canecoo ndíhyi xeén jeē jetú ndasí.

<sup>3</sup>Te ndajéhé uū ni jeti ya cohō yā nuū mar, te ndute mar ni nduu nájnūhun niñī ndíyī. Te ni cajihī tācá quitī jeē ñūhun ini mar.

<sup>4</sup>Te ndajéhé unī ni jeti ya cohō yā ini tāca yúte jíin tāca núú cáne ndute, te ni nduu niñī. <sup>5</sup>Te ni jini ri jeē cahán ndajéhé jeē ndíso jnínū siquī ndúte:

Tátā Yaā Dios, maá ní cúu Yaā ndoo Yaā ìi, Yaā iyó vijna, te ni iyo ní níf cáni. Te ndaā sáha ní jeē súcuan ni ndonda ní siquī cuéchi i. <sup>6</sup>Chi ni casáha i jeē ní jeti niñī ñayuu ndoo ní jíin ñayuu ní canacani jnūhun ní. Te vijna chi ni sáha ní jéé cájihī i niñī, chi ñayuu casáha jniñū néé cácuu i, jeē cánuú ndoho i súcuan.

<sup>7</sup>Te ni jini sōho ri jeē cahán inga nde nuū altar:

Tátā Yaā Dios, maá ní cúu jeē jnín ndihi poder. Te jniñū váha jniñū ndaā ni sáha ní jéé ní ndonda ní siquī cuéchi i. Achí.

<sup>8</sup>Te ndajéhé cuūn ni jeti ya cohō yā siquī nífandii, te ni jéhe Yaā Dios jnūhun jeē ndujíhní ndasí nífandii návāha cayū ñayuu. <sup>9</sup>Te xeén ndasí ní cayū tāca ñayuu. Te vésú súcuan te tu ní cánacani ni i stóo i cuéchi i, ni tu ní cacahān i jeē cujéhnū Yaā Dios. Chi sa suhva ni cacahān ndevāha i siquī yā jeē ni jéhe ya tācá castigo yáha nuū i.

<sup>10</sup>Te ndajéhé uhūn ni jeti ya cohō yā nuū mesa nuū ndácu quitī xéén jniñū. Te ni cunee níf cáhnū nuū ndácu tī jniñū. Te cáncayihī ñayuu yuhu i jeē cájetū ndasí i. <sup>11</sup>Te vésú súcuan te tu ní cánacani ni i stóo i jniñū néé casáha i. Chi sa ni cacahān ndevāha i siquī Yaā Dios andiví siquī jeē cájetū ndasí i jíin ndíhyi xeén cándoho i.

<sup>12</sup>Te ndajéhé ìñū ni jeti ya cohō yā siquī yúte cáhnū jeē naní Eufrates. Te ni ichi ndíhi ndute yúte ún, návāha nune ìin ichi jeē quíjicoo tāca rey ichi núú cáne niándii.

<sup>13</sup>Te ni jito ri jeē ini yuhu coō cáhnū jíin ini yuhu quitī xéén jíin ini yuhu máá téé nácani jnūhun stáhú ní canecoo unī tachī jeē cáa nájnūhun sáhvá. <sup>14</sup>Te tachī ún chi ndajéhé jexeén cácuu, te casáha jniñū jéhnū jeē náā ni ñayuu cájito i. Te ni quendacoo tachī un jéé nastútú tāca rey níf cáhnū ñayiví, jéé cuajnáhan de siquī Yaā Dios quiví jeē ndíji ya. Te máá yá cúu jeē jnín ndihi poder. <sup>15</sup>Cuni sōho jíjnáhan ró, chi sanaa ni rō te ndiji ri, nájnūhun jeē ìin sanaa-ni te quíji ñacuihná. Te nacā jeē ndetū ñayuu jeē ndito ni i, te ndíto yúcún i sahma i, návāha ma cáca vichí líi i, cúu jeē tú na cuéchi coo siquī i jeē cucanu i nuū tāca ñayuu, achí yá. <sup>16</sup>Te ni canastútú táchī un tāca rey, ni candutútú ìin lugar jeē yuhu hebreo naní Armagedón.

<sup>17</sup>Te ndajéhé uxā ni jeti ya cohō yā nuū tachí. Te ini templo andiví jíin núú mesa nuū ndácu ya jniñū, ni cane ìin jnūhun jeē ni cáhān jee:

Je ni jinu, achí.

<sup>18</sup>Yūcuán na te ni ndindéé taja, te níhin, te cáhān taja, te ni jnáa ndasí. Chi nde níf cáni jeē iyó ñayuu ñayiví, tu ní jnáa níhin ndasí nájnūhun jeē ni jnáa ni jito ri. <sup>19</sup>Te máá ñuu cujéhnū Jerusalén, ni cusín ni nduu unī parte, te níf cáhnū ñayiví ni naa tācá ñuu. Te ñuu teyí Babilonia, chi ni sáha nahín yá jeē ní ndutahū i castigo xeén, chi ni quitī ndasí ni yā siquī cuéchi i. <sup>20</sup>Te ni naa tāca isla, te suni yucu tuá gā. <sup>21</sup>Te ichi ándiví ní cuun nífíf náhnū siquī ñayuu, jeē véyí nde uū xico kilo. Te ni cacahān ndevāha ñayuu siquī Yaā Dios jeē ní cuun ndasí nífíf, chi ìin jnūndóho xeén ni cuu.

**Jeë ndonda ya siquĩ  
ñuu neé Babilonia**

**17** Yūcuán na te ni quiji ñn jnahan ndihúxá ndajéhé jeë ní candāhá ndihúxá cohō ún, te ni cahān yā jíin rí:

Nehen, te na steén rī nuū rō ndese coo castigo siquĩ maá ñahan jnení jeë cúu ñuu cujéhu ñe nuū iyó cuéhē ndute. <sup>2</sup>Chi tāca rey ñayiví nájñuhun ni casíquĩ ndéē de jíin ñahan ún, cúu jeë ní castóo de Yaā Dios te cándiquin de jñuhun neé ní steén ña. Te ni sáha ña jeë ñayuu ní cáhnu ñayiví, nájñuhun nájini i te casíquĩ ndéē i Yaā Dios cúu jeë ní castóo i ya te casáha ndasí i cuēchi. Achí ndajéhé yā.

<sup>3</sup>Te ni sáha ga Espíritu Santo jeë ní jito ndijin rī, te ndajéhé yā un cuáhān yā jíin rí nde nuū ñuhun téhé. Te ni jito ri ñn ñahan, yósó ña ñn quití xéén cacuéhé. Te ní cáhnu ti ndeé jñuhun neé jéē quití ni Yaā Dios sáha. Te iyó úxā xiní tī jíin úxí ndiqui tī. <sup>4</sup>Te ñahan un ñuhun ña sahma ndihí jíin sahma cuehé, te suni ñuhun ña siquĩ oro jíin yúu luu jíin perla jeë ndeé yahu. Te ndáhá ña ñn cohō oro jeë ñuhun chitú jíin jniñu neé ndasí jíin jniñu jnehén jéē jíca jnení ña. <sup>5</sup>Te jneē ña ndeé ñn síhví jéē cúu ñn jñuhun sáhi, te suhva cáhān: Yāha cúu ñuu teyí Babilonia, jeë cúu nájñuhun náná tāca jéē cájica jnení jíin jéē casáha neé ndasí ini ñayiví, áchí. <sup>6</sup>Yūcuán na te ni jini rī jeë ñahan un nájini ña jeë nájñuhun ni jihí ña niñí ñayuu maá Yaā Dios jíin níñí ñayuu ni cajihí siquĩ jeë ní canacani ndaā i jñuhun Jesús. Te nahán ní naa ni rī ni jito ri ña. <sup>7</sup>Yūcuán na te ni cahān ndajéhé un jíin rí:

¿Naun nāā ni rō jíto ró? Na cástūhun rí nuū rō ndese cúní cahān jñuhun sāhi síquĩ ñahan un jíin quití xéén yósó ña, jeë iyó úxā xiní tī jíin úxí ndiqui tī. <sup>8</sup>Quití xéén jeë ní jito ró, chí ni cotecu tī, te vijna chí tuá tī. Te ndenda tucu ti

ini túhñchi cúnú, te yūcuán na te quihñ tī nuū jnahnú ndetū tī. Te ñayuu cáyūcu ní cáhnu ñayiví, naa ni i coto i nuū quití un jéē ní cotecu tī te ni jihí tī, te natecu tucu tī. Te cácuu i ñayuu jeë tu yósó síhví i nuū tútu jeë yósó síhví ñayuu cotecu ní cáni jeë ni jécósó síhví i nde quiví ni jécóo ñayiví.

<sup>9</sup>Tāca ñayuu jécūhun vāha ni, cuu tava i cuenta ndese cúu: Ndiuhúxá xiní tī cácuu nájñuhun uxā yucu nuū néne ñahan ún. <sup>10</sup>Te ndihúxá xiní tī suni cácuu nájñuhun uxā rey. Te uhñ rey un je ni naa jeë ndácu de jniñu, te ñn de ndácu jniñu vijna, te inga de chí ná tu quiji de. Te núu na quiji de te jecu-ni tiempo coo de. <sup>11</sup>Te quití xéén jeë ní cotecu te tuá iyó tī vijna, máá tī cuu rey unā. Te ñn jnahan ndihúxá rey un cúu tī. Te suni quihñ tī nuū jnahnú ndetū tī.

<sup>12</sup>Te ndihúxí ndiqui jeë ní jito ró cúu nájñuhun uxí rey, te ná tu ndacu de jniñu jíjnahan de. Te máá de jíin quití xéén un, chí nihñ jniñu de cuu de rey jecu-ni tiempo. <sup>13</sup>Te ndihúxí rey un chí squíjnahan de jñuhun, te nacūaha de poder de jíin jniñu ndíso de nuū quití xéén un návāha ndacu ti jniñu. <sup>14</sup>Te cuajnáhan de jíin Yaā cúu Londe. Te Yaā cúu Londe quende yā poder de jíjnahan de. Chí máá yá cúu Jitoho nuū tāca jítoho, te máá yá cúu Rey nuū tāca rey. Te ñayuu cáhiin jíin yá, chí ni nacāji Yaā Dios i te ni cana ya i, te cásquícu vāha i. Achí ndajéhé un.

<sup>15</sup>Te ni cahān gā yā:

Cuehē ndute jeë ní jito ró núu néne ñahan jíca jnení, suu cúu ñayuu cuehē tācá ñuu, tācá yuhu, tācá nación. <sup>16</sup>Te ndihúxí ndiqui jeë ní jito ró jéē névāha quití xéén un, suu cácuu rey jeë coto uhū de ñahan jíca jnení un. Te sáha de jeë quendōo ndáhú ña te quendōo vichí lí ña. Te caji de cūñu ña te cahmu de ña nuū ñuhún. <sup>17</sup>Chi Yaā Dios scānda ya ini de jeë na sáha de jniñu cúní yā.

Te squíjnáhan de jnūhun jeē nacuāha de jniñu ndíso de nuū quítí xéén un, ndacu tí jniñu nde na squícu tāca jnūhun ni cahān Yaā Dios. <sup>18</sup> Te ñahan jeē ní jito ró cúu máá ñuu teyí jéē cujéhu nuū tāca rey ñayívi. Achí ndajéhé un.

### Siquí jeē naa ñuu Babilonia

**18** Yūcuán na te ni jito ri jeē ní cuun inga ndajéhé yā ni quiji ichi ándiví. Te cújéhu ndasí yá. Te jeē ndíndēe yá te ni ndíndēe núū ñayívi. <sup>2</sup> Te ni cana jee ya:

Je ni naa íi ñuu teyí Babilonia. Te ni nduu vehe tāca táchi, nuū ñūhun ndínuū tachí neé, jíin táca téji, quiti quíni jeē tu újnahan ni yō. <sup>3</sup> Chi ñuu un cúu nájnūhun ñiñ ñahan ndevāha, te ni sáha ña jeē ñáyuu tācá nación, nájnūhun nájini i te casíquí ndéē i Yaā Dios, cúu jeē ní castóo i ya te casáha ndasí i cuéchi. Te tāca rey ñayívi, nájnūhun ni casíquí ndéē de jíin ñahan ún jeē ní cajetáhú de jnūhun néé ní steén ña. Te ñayuu ní ñayívi jéē cájeen cáxicó, ní cacucúca i jíin cuéhē jeneé jeē ní nevāha ña.

<sup>4</sup> Yūcuán na te ni jini sōho ri inga jnūhun jeē ni cáhān ichi ándiví:

Máá ró jeē cácuu ró ñáyuu máá rí, quendacoo ró ini ñuu jíñā, návāha ma quívi nduu rō jíin táca cuéchi jeē sáha ña, te návāha ma ndóho ró jnūndóho xeén jeē ndoho ña. <sup>5</sup> Chi ni cayā cuéhē ndasí cuéchi ña, nájnūhun ñiñ montón cáhnu ndasí jéē ní cusúcún ndé andiví. Te vijna te nduxeēn Yaā Dios siquí cuéchi ña. <sup>6</sup> Stóho ró ña nájnūhun ni sáha ña jeē ní ndoho sava ga ñayuu. Te nachunaa rō nuū ña doble jnūndóho jeē ni jéhe ña nuū inga ñayuu. Te sáha ró jeē nandicó cóo doble siquí ña vésú jeē ni sáha ña siquí inga ñayuu. <sup>7</sup> Te yōhyo ni satéyí ña máá ña, te cúca ndasí ní cotecu ña. Te suni jíin cúhva yúcuán nacuāha ró jéē ndóho xeén ndasí ña. Chi jéni ni ña: Yāha néne ri ndácu ri jniñu, te tu cúu ri

ñahan viuda, te ma quíji cuiti jnūndóho ndoho ri, achí ña. <sup>8</sup> Jeē yúcuán cúu jeē ñiñ quiví-ni te quiji cuéhē jnūndóho siquí ña. Chi cuu ndíyí, te cucuíhyá ndasí ni ña, te coo jnamā, te cayū ña nuū ñuhún. Chi yōhyo íyó poder máá Jítóho yō Yaā Dios, Yaā ní ndonda siquí cuéchi ña, achí.

<sup>9</sup> Te tāca rey ñayívi jéē ní casíquí ndéē de jíin ña te ni cotecu cucá ndasí de jíin ña, ndahyū de te ndahyū cohó de coto de jeē cánda ñuhmā cayū ña. <sup>10</sup> Te cuiñi jíca de chi yūhú de coto de jeē súcuán ndoho ña castigo. Te cahān de jíjnáhan de:

Nacā jeē xeén ndóho ró, ñuu cujéhu Babilonia, chi yá-ni ñuu teyí ní cuu ró núú. Te vijna chi ñiñ núnú-ni te ni quee castigo jeē náā rō, achi de jíjnáhan de.

<sup>11</sup> Te tāca téē ñayívi jéē cájeen cáxicó ñuu ún, ndahyū de te ndahyū cohó de jehē. Chi tuá ndé ñiñ cuaan ndajniñu cáxicó de. <sup>12</sup> Te ndajniñu cáxicó de un cúu oro, plata, yuū luu jíin perla jeē ndeé yahu, jíin sahma fino jíin sahma seda jeē ndihí jíin jéē cuéhé. Te suni tāca yujnu jeē asín jéén xicō, jíin táca ndajniñu luu jeē ni sáha jíin marfil jíin yujnu lúu jeē ndeé yahu jíin cáa cuaán jíin cáa hierro jíin yúu cuijín luu. <sup>13</sup> Te suni cáxicó de canela jíin táca jíhyo asín jíin súje cutú jíin súje uvuā jíin táca perfume jíin vino jíin aceite jíin harina fina jíin trigo. Te suni cáxicó de quiti ndíso jíin lanchi jíin caballo jíin carreta, te nde ñayuu cáxicó de jeē sájniñu sáá-ni i. <sup>14</sup> Te cahān de jíin ñuu ún:

Ni cujiyo ndihi ndajniñu cúca jeē ní nujnahan ndasí ni rō. Te tāca jéē lúu jeē váha jeē ní cotecu cucá ró, chi ni naa ndihi, te ma nánihin cuiti gā rō, achi de jíjnáhan de.

<sup>15</sup> Te tāca téē ni cajeen ni cáxicó ní cacucúca jéē siquí ndajniñu ñuu ún, chi cuiñi jíca de jeē yūhú de coto de cas-

tigo coo ñuu ún. Te ndahyū de te ndahyū cohó de. <sup>16</sup> Te cahān de jíjnáhan de:

Nacā jeē xeēn ndóho ñuu teyí yáha. Chi ni cuu nájnūhun iin ñahan jeē ni ñūhun sahma fino, sahma ndihí jíin jéē cuehé. Te ni ñuhun ña siquī oro jíin yúū luu jíin perla jeē ndeé yahu. <sup>17</sup> Te vijna te iin núnúu-ni te ni naa ndihí táca ndajníñu váha ún, achi de jíjnáhan de.

Te cuiñi jíca táca tée cáscaca barco, jíin ñayuu cuángoo nuū barco, jíin tée cáśájniñu ini barco, jíin táca gá tée cáśájniñu nuū mar. <sup>18</sup> Chi coto de ñuhmā jeē cayú ñuu ún, te cana jee de jíjnáhan de:

¿Nde íne ga ñuu teyí jéē cujéhnu nájnūhun ni iyo ñuu yáha? achi de.

<sup>19</sup> Te cosō de ticachā ñuhun xinī de jeē cácuquíhyá ni de. Te ndahyū de te ndahyū cohó de. Te cana jee de jíjnáhan de:

Nacā jeē xeēn ndóho ñuu teyí yáha. Chi jíin ndajníñu cúca jeē ni íyo ñuu un ní cacucúca táca ñayuu cánevāha barco cájica nuū mar. Te vijna te iin núnúu-ni te ni naa ndihí-ni, achi de.

<sup>20</sup> Te na cúsiñi ni táca róhó jéē cáyucú andiví, siquī jeē ní naa ñuu ún. Te na cúsiñi ni rohó, táca tée apóstol, jíin tée cá-nacani jnūhun Yaā Dios, jíin ñayuu maá Yaā Dios. Chi ni sáha neé ñuu un síquī rō jíjnáhan ró, te jeē yúcuan ní ndonda Yaā Dios siquī, achi de.

<sup>21</sup> Yūcuán na te iin ndajéhé ndíso poder, ni quihin ya iin yuū cáhnu nájnūhun iin yōso cáhnu, te ni scáne ya ini mar. Te ní cahān yā:

Nájnūhun ni naa yōso yáha, suni súcuan naa Babilonia, ñuu cujéhnu téyí. Te ma núcoo cuiti gā jeē cóto yó núū. <sup>22</sup> Te ni cahān yā jíin ñuu ún: Ini calle rō ma cúni sōho cuiti gā ñayuu jeē scáta i yaa arpa jíin flauta jíin trompeta. Te suni ma cóo cuiti gā ñayuu casáha táca ndajníñu. Te suni ma cúni sōho ga i jeē

ñhín táca molino rō. <sup>23</sup> Te ni iin lámpara ma sáha ga jeē cúndijin nuū rō. Te ni ma cúni sōho ga i vico jeē cácusñi ni ñahan téē nándāha mēhñu ró. Te ñayuu ní ca-jeen ni caxícó nuū rō, ni cacujéhnu ndasí i ini ñayiví. Te ni stahú ró ñayuu táca nacióñ jíin jniñu tasí jíin jniñu mágica. Achí ndajéhé un.

<sup>24</sup> Te ñuu un ní nihin castigo xeēn, chi siquī ñuu un ndeé cuēchi jeē ní jeti niñi táca téē ní canacani jnūhun Yaā Dios, jíin táca ñayuu maá yá, jíin táca gá ñayuu ní cajehni i ní cáhnu ñayiví.

**19** Te ná ni cuu táca jéē yáha, te ni jini sōho ri jeē cahán jee cuehé ndasí ñayuu ini andiví:

Yōhyo cújéhnu Yaā Dios. Chi Yaā Dios maá yó cúu jeē ní jnama yóhó.

Te maá yá cujéhnu ndasí, te maá yá jnñi ndihí poder.

<sup>2</sup> Te ndaā te váha sándaā yā táca jniñu, chi ni ndonda ya siquī cuéchi ñuu neé cújéhnu ún.

Chi ni stiví un ñayuu ní cáhnu ñayiví jíin jnūhun cásiquí ndeé Yaā Dios.

Te ni sáha ya jeē ní ndutahū ñuu un síquī jeē ní jehni táca mozo yā.

Achí i jíjnáhan i.

<sup>3</sup> Te ni cacahān tucu i:

Yōhyo cújéhnu ya. Chi ní cáni canda ñuhmā ñuu un jéē cayú, achí.

<sup>4</sup> Te ndihóco cuñi téē jéhnu cándiso jniñu, jíin ndicúñ jeē técu, ni cajecuiñi yití de, te ni cachinúhún de Yaā Dios, Yaā néne nuū mesa ndácu jniñu. Te ni cacahān:

Amén. Súcuan na cóo. Yōhyo cújéhnu ya.

<sup>5</sup> Te nde nuū mesa nuū ndácu ya jniñu ni cahān iin jnūhun:

Róhó jéē cájeñiñu nuū Yaā Dios, jíin róhó jéē cándiso iyo nuū yā, jeē cácujeñu jíin jéē tu cácujeñu, na cáhán rō jeē yóhyo váha Yaā cúu ya. Achí.

### Vico jeē nándāha Yaā cúu Londe

<sup>6</sup>Te ni jini sōho ri jeē cácahān ñayuu cuehē ndasí, te nīhīn nájñūhun nīhīn cuehē yūte, te nájñūhun jeē cahán nīhīn taja. Te ni cacahān:

Yōhoyo cújēhnu ya. Chi Jitoho yō Yaā Dios, Yaā jñī ndīhi poder, vijna te ndácu nīhīn ya jñiñu.

<sup>7</sup>Te na cúsiñ ni yō, te siñ ndasí na cóo ni yō,

te na cáhān yō jeē yōhoyo cújēhnu ya. Chi ni quee quivī jeē nándāha máá Yaā cúu Londe.

Te je iyó túhva ñahan nandāha jíin yá, te suu cúu ñayuu máá Yaā Dios.

<sup>8</sup>Te ni nīhīn ña jñūhun cuhun ña sahma fino jeē ndóo ndasí te xīñú.

Achí i jíjnāhan i. Te sahma fino un cúu táca jñiñu ndaā jeē casáha ñayuu máá Yaā Dios.

<sup>9</sup>Te ni cahān ndajéhé yā jíin rí:

Tee ró jñūhun yáha: Nacā jeē ndetū táca ñayuu jeē ní cana ya quingoo vico nándāha Yaā cúu Londe.

Te ni cahān gā ndajéhé un jíin rí:

Tāca jñūhun yáha cúu jñūhun ndaā ni cahān Yaā Dios, achí yá.

<sup>10</sup>Te ni jecuiñī yití rí nuū jehé ndajéhé un jēe chiñūhún rí yā nuú. Te ni cahān yā jíin rí:

Ma sáha ró súcuan. Chi ruhū suni mozo Yaā Dios cúu ri, nájñūhun máá ró jíin táca hermano rō jeē cácañdije vāha jñūhun Jesús. Sa suhva nuū máá Yaā Dios chiñūhún ró. Achí yá.

Chi jñūhun siquī Jesús cúu jeē cácahān ndaā ñayuu cánacani jñūhun Yaā Dios.

### Yaā yosó síquī caballo cuijín

<sup>11</sup>Yūcuán na te ni jito ri jeē núne andiví. Te ni cane iin caballo cuijín, te Yaā yosó síquī tī naní yá Yaā ndaā, Yaā squícu, chi squícu ya jeē ni jéjñūhun ya. Te ndaā sándaā yā jñiñu te ndaā ndóna ya siquī táca jéneé. <sup>12</sup>Te tinūu

yá ndíndēe nájñūhun yáñuhūn. Te xini yā ñūhun cuehē corona. Te yosó iin síhví yá jeē maá-ni ya cúu jeē jiní. <sup>13</sup>Te ñūhun ya iin sahma jeē ni ñūndaji nuū niñí, te nání yá Jñūhun Yaā Dios. <sup>14</sup>Te táca ndajéhé yā jeē iyó andiví, cáyosó caballo cuijín, cándiquin yatā yā. Te cáñuhun sahma fino cuijín iyó ndoo. <sup>15</sup>Te ini yuhu máá Yaā jeē yosó síquī caballo, quénda jeē cáa nájñūhun iin espada xeén. Te espada un cúu jñūhun ya jeē stóho ya ñayuu táca nación. Te nīhīn ndacu ya jñiñu nuū i. Te sándaā yā siquī cuéchi i nájñūhun jeē jeñú siquī ndehē uva cájexin. Te cuāha ya castigo xeén ndoho i jeē quití ni yā siquī cuéchi i. Chi máá yá jñī ndīhi poder. <sup>16</sup>Te sahma ya jíin síhin ya yosó jñūhun yáha: Rey nuū táca rey jíin Jítoho nuū táca jítoho, achí.

<sup>17</sup>Yūcuán na te ni jito ri iin ndajéhé yā jeē iin nuū níandii. Te ni cana jee ya xini táca quití ndáva nuū tachí:

Ndutútú ró quijicoo ró cuxini ró iin vico cáhnu sáha Yaā Dios. <sup>18</sup>Te caji rō cūñu táca rey jíin capitán jíin tée téyí, jíin cūñu táca caballo jíin tée ni cayosó siquī tī. Te suni caji rō cūñu táca gá ñayuu, cúu ñayuu casájniñu cuenta máá jíin mozo jeē ní cajeen ñayuu, cúu ñayuu cácujeñu jíin ñayuu tu cácujeñu. Achí ndajéhé yā.

<sup>19</sup>Yūcuán na te ni jito ri máá quití xéén jíin táca rey ñayiví jíin cuehē soldado de. Te ni candutútú de jeē cuajnáhan de jíin máá Yaā yosó caballo jíin táca ndajéhé yā. <sup>20</sup>Te ni jñī ya quití xéén cuahān tī preso jíin tée ni nacani jñūhun stáhú jeē ni sáha táca jñiñu jéñu jeē ní jito jínúú quití xéén. Chi jíin jñiñu jéñu un cúu jeē ni stáhú de táca ñayuu jeē ní cajéhe jñūhun condiso jñuní quití xéén, jíin jéé ní cachiñūhún imagen tī. Te quití xéén un jíin tée ni nacani jñūhun stáhú un, cátecu ndíndúú te ni scáne ya nuū laguna ñuhūn jeē cayú jíin azufre. <sup>21</sup>Te jíin espada jeē cáne yuhu Yaā yosó

caballo ni cajihí tǎcǎ soldado quití xéén un. Te tǎcǎ quití ndáva nuū tachí ni candutú chíji tǐ ni cayeji tǐ cūñu de jíjnáhan de.

### Siquī mil cuiyā

**20** Te ni jito ri jeē ní cuun iin nda-jéhé yā ichi ándiví. Te ndáhá yá ndacáa jeē núne tūhnchi cúnú ndasí. Te suni ndáhá yá iin cadena cáhnu. <sup>2</sup> Te ni jnií ya maá cóo cáhnu jeē iyó ndé jehánan ndasí, te nání tǐ jexeén jíjn Satanás. Te ni jihni yā jeē conuhní mil cuiyā. <sup>3</sup> Te ni scáne ya ini tūhnchi cúnú ndasí. Te ni jesi vāha ya, te ni sácutú yá yuyáú, návāha ma stahú gá un ñáyuu tǎcǎ nación, chi nde na jínu mil cuiyā. Te jeē yáha mil cuiyā ún, yūcuán na te cánuú jéé ndajǐ caca cuu jecu na tiempo.

<sup>4</sup> Te ni jito ri tǎca mesa nuū ndácu jniñu, te yūcuan cáyūcu tǎca ñáyuu jeē ní canihín jniñu i sándaā i jniñu. Te suni ni jito ri anuá tǎca ñáyuu jeē ní cajehnde xiní i siquī jeē ní canacani i jnūhun Jesús jíjn jnūhun Yaā Dios. Te tu ní cáchiñúhún i quití xéén jíjn imagen tǐ, ni tu ní cájēhe i jnūhun jeē cóndee jnuni tǐ jneē i chí ndaha i. Te ni jito ri jeē ní natecu i te ni candacu i jniñu jíjn Cristo mil cuiyā. <sup>5</sup> Yāha cúu ndíyi jeē nátecu xihna gā. Te tǎca gá ndíyi, tu ní cánatecu i, chi nde jeē jínu mil cuiyā. <sup>6</sup> Te nacā jeē ndetū tǎca ñáyuu ndoo ánuá jeē nátecu xihna gā. Chi ma cúu cuití i vuelta uū. Te cuu i sutū nuū Yaā Dios jíjn núu Cristo, te ndacu i jniñu jíjn yá mil cuiyā.

<sup>7</sup> Te jeē jínu mil cuiyā ún, te ndajǐ Satanás te quenda nuū yíndihyū. <sup>8</sup> Te stáhú tucu ñáyuu tǎcǎ nación níí cáhnu ñayívi. Te stáhú ñáyuu ñuu Gog jíjn Magog. Te sáha jeē ndutútú tǎca soldado ñuu un jéé cuajnáhan de. Te coo cuehē ndasí de nájñuhun níí tǐ yumar. <sup>9</sup> Te cuitē núu de quingoo de níí cáhnu ñayívi. Te cuicó ndúú de ñuu nuū cáyūcu ñáyuu maá Yaā Dios, ñuu jeē maní yā jíjn. Te Yaā

Dios chi scúun ya ñuhūn ichi ándiví, te cayū ndíhi de. <sup>10</sup> Te jexeén jeē ni stáhú tǎca ñáyuu ún, chi scáne ya quihín nuū laguna ñuhūn jeē cayú jíjn azufre. Te yūcuán chi xihna gā ni scáne ya quití xéén jíjn tée ni nacani jnūhun stáhú. Te yūcuán ndoho nduú ñuú níí cáni cuití.

### Jeē sándaā yā jniñu nuū mesa cuijín

<sup>11</sup> Yūcuán na te ni jito ri iin mesa cuijín cáhnu, te néne maá Yaā ndácu jniñu. Te ñayívi jíjn ándiví ni ndoñúhún cuáhán jeē ní jito ya nuū, chi tuá ni cúu quendōo nuū yā. <sup>12</sup> Te ni jito ri tǎca ndíyi, jeē ní cujéhnu jíjn jéé tu ní cujéhnu, cáhiín nuū Yaā Dios. Te ni sáha ya jeē núne tǎca libro, te suni ni nune inga libro jeē yosó síhví ñáyuu cotecu níí cáni. Te ni sándaā yā siquī tǎca ndíyi ún, núu ndese jniñu ni casáha i jíjn ndese yosó núu tǎca libro un. <sup>13</sup> Te tǎca ndíyi jeē ní cajihí nuū mar, ni nanecoo. Te suni ni nanecoo tǎca ndíyi jeē ní cajihí i, jeē íne i maá lugar nuū cáyūcu ánuá ndíyi. Te ni sándaā yā siquī, núu ndese ni casáha iin iin i. <sup>14</sup> Yūcuán na te cuehyí jéhni ñáyuu jíjn lugar nuū cáyūcu ánuá ndíyi, ni snáā yā ni scáne ya cuangoo nuū laguna ñuhūn. Te jeē ndóho ñáyuu nuū laguna ñuhūn, yūcuan cúu jeē cúu i vuelta uū. <sup>15</sup> Te yūcuan ní scáne ya tǎca ñáyuu ni casáha jniñu néé jéé tu yosó síhví i nuū libro jeé yosó síhví ñáyuu cotecu níí cáni.

### Ándiví jéé jíjn ñayívi jéé

**21** Yūcuán na te ni jito ri ándiví jéé jíjn ñayívi jéé. Chi ándiví jíjn ñayívi xihna ñúhún ni naa. Te suni tuá mar. <sup>2</sup> Te ruhū Juan, ni jito ri ñuu íi jeé cúu Jerusalén jeé. Te ñuu un ní cuun vēji ichi ándiví núu néne Yaā Dios. Te ñuu ún luu cáa nájñuhun iin ñahan jeē ni sátúhva ña ni cucutú ña jeē nándāha ña jíjn yíí ña. <sup>3</sup> Te ni jini sōho ri iin jnūhun jeē ni cáhán jee ichi ándiví:

Condēhé, chi vijna te ndée Yaā Dios mēhñu ñáyuu. Te condee yā jíin i jíjnáhan i, te cuu i ñayuu maá yá. Te máá yá condee yā jíin i jeē cúu ya Yaā Dios i. <sup>4</sup>Te nacuaa yā ndute tínúú i jíjnáhan i. Te ma cúu gā ñayuu, ni ma ndahyú gā i, ni ma cucufhyá gā ni i, ni ma jetú gā i. Chi je ni yáha táca jnúndóho jeē ni íyo, áchí.

<sup>5</sup>Yücuán na te ni cahān maá Yaā néne nuū mesa:

Condēhé, chi nasáha jeé rí táca jée iyó, áchí yá.

Te suni ni cahān yā:

Tee ró jnúhun yáha. Chi táca jnúhun yáha cúu jnúhun jeē jiní ndije ró jée ndaā cúu.

<sup>6</sup>Te ni cahān gā yā:

Je ni jinu. Máá rí cúu nájnūhun letra A xihna ñúhún jíin letra Z jeē sándihí na, chi máá rí ni squejée ndihí te máá rí sínu. Te táca ñáyuu cájichí, súcuan-ni cuāha ri coho i ndute cáne jeē cótecu i ní cáni. <sup>7</sup>Tāca ñáyuu jeē cúndeyí síquí jénee, nihín i ndihí jeē yáha cuu tahū i. Te cuu ri Yaā Dios i, te cuu i sēhe ri. <sup>8</sup>Te táca ñáyuu jeē cáyūhú ndoho síquí jnúhun ri, jíin ñáyuu tu cácandíje, jíin ñáyuu casáha jniñu néé, jíin ñáyuu cájehni ndiyí, jíin ñáyuu cájica jnéni, jíin ñáyuu casáha tási, jíin ñáyuu cáchiñúhún ídolo, jíin táca ñáyuu castáhú, ñayuu ún chi quívicoo i laguna ñuhūn jeē cayú jíin azufre. Te yücuan cúu jeē cúu i vuelta uū.

### Jerusalén jeé

<sup>9</sup>Yücuán na te ni quiji ñin jnáhan ndihúxá ndajéhé jeē ní candāhá ndihúxá cohō jeē ni ñúhun chitú ndihúxá jnúndóho sandihí. Te ni cahān yā jíin rí:

Nehen, te na stéén rí nuū rō ñahan jeē nándāha ña cuu ña ñasihí Yaā cúu Londe, áchí yá.

<sup>10</sup>Te ni sáha ga Espíritu Santo jeē ní jito ndijin rí, te ndajéhé un ní jeca ya ruhú cuahān yā jíin rí xiní ñin yucu cáhnu súcún. Te ni steén yā nuū rí maá ñuu ñi cujéhnu jeē cúu Jerusalén, te ni cuun vēji nde andiví núu néne Yaā Dios. <sup>11</sup>Te ndíndēé ndasí ñuu un nájnūhun ndíndēé Yaā Dios. Te xínú nájnūhun xínú ñin yuū luu jeē ndeé yahu ndasí, nájnūhun yuū cuijín jeē quiyí nájnūhun vidrio. <sup>12</sup>Te yuhu núu un ní jicó ndúu ñin jeē cáhnu súcún ndíhnyú ñuu ún. Te íyó úxi uū yehyí. Te táca yéhyí un íin ñin ndajéhé yá. Te táca yéhyí un yósó síhví ndihúxí uū yucūn Israel. <sup>13</sup>Te lado nuū cáne niāndii iyó úní yehyí. Te lado norte suni íyó úní yehyí. Te lado sur suni íyó úní yehyí. Te lado nuū quée niāndii suni íyó úní yehyí. <sup>14</sup>Te íyó úxi uū yuū náhnu jeē cúu cimientó maá jée ndihyú ñuu ún. Te táca yuū un yósó síhví ndihúxí uū apóstol maá Yaā cúu Londe.

<sup>15</sup>Te ndajéhé jeē ni cahān jíin rí, ndáhá yá ñin yujnu oro jeē chícuāha yá ñuu un jíin táca yéhyí jíin maá jée ndihyú ñuu ún. <sup>16</sup>Te ñuu ún chi ñin cūhva-ni cúu ndicúún lado. Chi jeē cáni jíin jée jité, inuú-ni cúu. Te ndajéhé un ní chícuāha yá ñuu un jíin yujnu ún. Te née uū mil uū ciento kilómetro jeē ñin ñin lado. Te inuú-ni cūhva jeē cáni, jeē súcún, jíin jée jité. <sup>17</sup>Te suni ni chícuāha yá maá jée ndihyú ñuu ún, te née uní xico cuūn metro jeē súcún. Te yücuan cúu cūhva jejníñu ñayuu, jeē suni jéjníñu ndajéhé un.

<sup>18</sup>Te máá jée ndihyú ñuu un ní cuvāha jíin yuū cuijín quiyí. Te ñuu ún chi máá nene oro cúu, te cáa nájnūhun vidrio quiyí. <sup>19</sup>Te táca yuū jeē cúu cimientó maá jée ndihyú ñuu ún, ní cucutú jíin ndínuu yuū luu jeē ndeé yahu. Yuū ñin cúu yuū cuijín quiyí. Te jeē uú cúu yuū ndeé ndí. Te jeē uní cúu yuū pinto. Te jeē cuún cúu yuū cuí ndí. <sup>20</sup>Te jeē uhún cúu yuū pinto jeē ñúhun raya. Te jeē



iñú cúu yuū cuehé pinto. Te jeē uxá cúu yuū cuaán quiyi. Te jeē uná cúu yuū cuí ndéé. Te jeē iñn cúu yuū cuaán ndí. Te jeē uxí cúu yuū cuí cujín. Te jeē uxí iñn cúu yuū cuehé cuaán. Te jeē uxí uū cúu yuū ndihí ndí. <sup>21</sup>Te ndihúxí uū yehyí un cácuu uxí uū perla jeē ndeé yahu. Te iñn iñn yehyí cúu iñn iñn perla. Te máá nene oro cúu calle cáhnu ñuu ún, te quiyi nájñuhun vidrio.

<sup>22</sup>Te tú na templo ni jíto ri ini ñuu ún, chi nñ cáhnu ñuu un ndeé máá Jítoho yō, Yaā jñí ndihi poder, jínn Yaā cúu Londe. <sup>23</sup>Te ñuu ún tu jíni ñuhún cundijin jínn luz niándii jínn yóō. Chi jeē ndíndēe máá Yaā Dios cúu jeē cundijin ñuu ún. Te luz ñuu un cúu máá Yaā cúu Londe. <sup>24</sup>Te ñayuu tācá nación ñayīvi jēé ní jnama ya, caca i jeē cundijin luz ñuu un núū i. Te tāca rey ñayīví quijicoo de ñuu ún, quindeca de tācá ndajñíñu jeē ndeé yahu jínn jēé cujéñnu de sáha. <sup>25</sup>Te tāca yehyí ñuu ún ma cóndihyū cuiti nduú, chi tú na jecuáa coo. <sup>26</sup>Te ini ñuu ún quijicoo ñayuu tācá nación, quindeca i tācá ndajñíñu jeē ndeé yahu jínn jēé cujéñnu i sáha. <sup>27</sup>Te ma quívicoo cuiti ni iñn jeē jnehén. Ni ma quívicoo ñayuu casáha jniñu néé jínn jēé castáhú. Chi quívicoo máni máá ñayuu jeē yosó sñhví i nuū libro jeē yosó sñhví ñayuu cotecu nñ cáni, jeē névaha Yaā cúu Londe.

**22** Yūcuán na te ndajéhé yā ni steén yā nuū rí iñn yūte íyó ndoo. Te ndute un sáha jeē cótecu yō níí cáni. Te xínú nájñuhun vidrio, te cáne nuū mesa nuū ndácu Yaā Dios jniñu jínn Yaā cúu Londe. <sup>2</sup>Te jíca yūte ún sava mēññu calle cáhnu ñuu ún. Te ndíndúú lado yuyúte un yñhi yujnu jeē cótecu yō níí cáni sáha. Te yujnu un jéhe ndehē uxí uū jínu jeē iñn cuiyā, chi tāca yóō cúun ndehē. Te ndaha yúcu i cúu tajñā jeē ndívaha ñayuu tācá nación. <sup>3</sup>Te tācá-ni jeē ni cáhñn yā jeē násūu jēé váha cúu, ma cóo ini ñuu ún. Te ini ñuu ún cuiñi máá mesa

nuū ndácu Yaā Dios jniñu jínn Yaā cúu Londe. Te ñayuu cácan díje jeē cácuu i mozo yā, chiñúhún i ya. <sup>4</sup>Te coto i nuū yā, te condee sihví yá jneē i. <sup>5</sup>Te ma cóo ga jecuáa ñuu ún. Te ñayuu cáyūcu yúcuu tuá jíni ñuhún i jeē cundijin lám-para nuū i, ni jeē cundijin niándii. Chi jeē ndíndēe máá Jítoho yō Yaā Dios cúu jeē cundijin nuū i. Te ndacu i jniñu nñ cáni cuiti.

### Jeē cuácuyajni ndiji Cristo

<sup>6</sup>Yūcuán na te ni cahñn ndajéhé un jínn rí:

Tāca jñuhun yáha cúu jñuhun jeē jínn ndije ró jēé ndaā cúu. Te Jítoho yō Yaā Dios, máá yá sáha jínn téé cácanani jñuhun ya jeē jínn Espíritu yā cácanani de. Te suu máá yá ni tají yá ndajéhé yā návaha stéén nuū ñayuu cácuu mozo yā tācá jniñu jeē yachí coo.

<sup>7</sup>Ndiji yachí rí, achí yá.

Te nacā jeē ndetū ñayuu chusóhó jñuhun Yaā Dios jeē yosó núū tútu yáha.

<sup>8</sup>Te ruhū Juan, ni jini sōho ri tāca jñuhun yáha, te ni jito ri tācá jniñu yáha. Te ná ni jini sōho ri ni jito ri, yūcuán na te ni jecuiñi yití rí nuū jehé máá ndajéhé jeē ni stéén tācá jniñu yáha núū rí, jeē chiñúhún rí yā nuū. <sup>9</sup>Te ni cahñn ndajéhé un jínn rí:

Ma sáha ró súcuu. Chi ruhū suni mozo Yaā Dios cúu ri, nájñuhun máá ró jínn táca hermano rō jeē cácanani jñuhun ya, jínn ndihi ñayuu cájetáhú jñuhun yosó nuū tútu yáha. Sa suhva nuū máá Yaā Dios chiñúhún ró. Achí yá.

<sup>10</sup>Te ni cahñn gā ndajéhé un jínn rí:

Ma chísañi ró tāca jñuhun Yaā Dios jeē yosó núū tútu yáha, chi je cuácuyajni tiempo jeē cundaā ndihi. <sup>11</sup>Te ñayuu casáha jniñu néé, na sáha ga máá i jniñu néé. Te ñayuu jnehén ánuá, na quéndōo máá i súcuu. Te sa ñayuu casáha jniñu ndaā, na sáha ga i jniñu ndaā. Te ñayuu

cáhīyo ndoo ánuá, na cáca ndoo ga i súcuan. Achí ndajéhé un.

<sup>12</sup> Jendaá jeē ndiji yachī rī, achí Jesús. Te quiji ri jíin táhū cuāha ri nuū iin iin ñayuu, núu ndese jniñu ni casáha i.

<sup>13</sup> Máá rí cúu nájñuhun letra A xihna ñúhún jíin letra Z jeē sándihí na, chi íyó rí nde xihna ñúhún te coo ri níí cáni.

<sup>14</sup> Nacā jeē ndetū ñayuu jeē jéhe i jñuhun ndundoo ánuá i nájñuhun ndúndoo sahma. Chi cuu caji i ndehē yujnu jeē sáha jeē cótecu i níí cáni, te cuu quívicoo i yéhyí ñuu ií ún. <sup>15</sup> Te ichi fuera ñuu ún cuiñi ñayuu tu cácan-díje, jíin ñayuu casáha tási, jíin ñayuu cájica jnéni, jíin ñayuu cájehni ndīyí, jíin ñayuu cáchiñúhún ídolo, jíin ñayuu cá-cusiñi ni stahú jnáhan.

<sup>16</sup> Máá rúhū Jesús, ni tají rí ndajéhé rī návāha castūhun yá tāca jñuhun yáha nuū tāca grupo ñayuu cácan-díje. Te máá rí ni sáha jeē ni íyo rey David, te ni quiji ri nuū yucún David. Te cúu ri nájñuhun lucero ndíndee cáne cúndijin. Achí yá.

<sup>17</sup> Te máá Espíritu Santo jíin máá ñahan jeē nándāha jíin Yaā cúu Londe, cácahān:

Nehen, quívicoo ró ndaha ya, achí.

Te tāca ñayuu jeē jíni sōho, suni na cáhān i:

Nehen, quívicoo ró ndaha ya.

Te tāca ñayuu cájichí jeē cácuni i coho i, na quívicoo i ndaha ya, te súcuan-ni na cóho i ndute jeē cótecu i níí cáni sáha.

<sup>18</sup> Te tāca ñayuu jíni sōho jñuhun Yaā Dios jeē yosó núu tútu yáha, cáhān nihin ri jíin i: Núu ndé ñayuu chisóo i nuū jñuhun cáhān tutu yáha, te Yaā Dios chisóo yá jñundóho cáhān tutu yáha, ndoho i. <sup>19</sup> Te núu ndé ñayuu quende i jecu jñuhun cáhān tutu yáha, te Yaā Dios quende yā tahū i jeē yosó núu libro jeē yosó síhví ñayuu cotecu níí cáni, te ma nihín i tahū i ini ñuu ií ún. Te tutu yáha cúu jeē cahán siquī tācá un.

<sup>20</sup> Te Yaā jeē ni cáhān tāca jñuhun yáha, suhva cáhān yā:

Jendaá jeē ndiji yachī rī, achí yá.

Amén. Súcuan na cóo. Jitoho ná Jesús, jíicán tahú na jéē ndíji yachí ní.

<sup>21</sup> Te ñúhun ni rī jeē Jítoho yō Jesucristo na sáha ga yā jeē váha róhó jíjñáhan ró. Amén.